


Mata Ifeněya Ně
Od



The New Testament in the Marik Language of Papua New Guinea

Mata Ifeněya Ně Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Apr 2025 from source files dated 31 Aug 2023
d7099f9d-3bdf-5620-8eb3-7e6c51cab7ea

Contents

Uylil Od	1
Matyu	2
MAK	49
LUK	77
Jon	124
APOSEL	159
ROM	204
1 KORIN	225
2 KORIN	245
GALESIA	258
EFESUS	265
FILIPAI	272
KOLOSİ	277
1 TESALONIKA	282
2 TESALONIKA	286
1 TIMOTI	288
2 TIMOTI	293
TAITUS	297
FILEMON	300
HIBRU	301
JEMS	316
1 PITA	321
2 PITA	327
1 JON	331
2 JON	336
3 JON	337
JUD	338
KURŌ FESIYA OD	340
Enei Bun Ifaredif Nē	
Fadedya	363

Uylil Od

Preface

This book is a translation of the New Testament into the Marik language of Papua New Guinea. The population of the Marik language group is over 3,500. Most Marik speakers live in the Transgogol area of Madang province, approximately 15 miles south of Madang extending to the coast near Ogea.

Missionaries from Germany began work among the Marik people in the 1950's. The Amele and Bel languages from the coastal area around Gedaged were used as a medium for both evangelism and education. In the 1970's English became the language of education in the Marik area. Marik and Melanesian Pidgin continued to be used in the Marik churches until the time this translation work commenced.

At the invitation of the Marik people, the translation of this New Testament began in 1976 with the assistance of SIL. Thanks to the many Marik people whose efforts have gone into the production of this translation. Thanks also to the many people from around the world who have supported this work by means of financial support, prayers, and encouragement.

Above all, thanks be to God for His written word given as a means for people to come to know and believe in His Son, the living Word. Thanks to Him for faithfully sustaining and enabling each and every member of the translation team. To Him be the glory.

Uylil Od

Buk enei are Nu Testamen Papua New Guinea Marik od nem falei fiyan. Marik od wogō dedig tamo kayau are 3,500 wal fiya. Marik tamo kayau idi, Transgogol akor, Madang Distrik, Madang Provins bun difaredig, dogo neid modoũ are 15

mail saut Madang, Ogea nē akor maaĩ sirin difaref melsã.

Biya od wogōya nigin Gemini temeleid yar 1950's bun, Marik tamo kayau atun kabĩ gariya dinon. Sain anĩ bun, Amele od ado Bel od, are Garaged maaĩ sirin difaredig anidi neid od anĩ nem, biya od wogōya kabĩ ado keleĩ yaleya kabĩ yaleyan. Yar 1970's bun, Inglis od anĩ Marik akor bun od anim keleĩ yaleya nigin gariya inoyan, isi gama sain enei, Marik od ado Ninã Od anidim Marik sios bun kabĩ yalef isin, ile, sain Biya Od Marik od nem falei fiya kabĩ anĩ gariya inoyan.

Marik tamo kayau neid iweigya bunem, Marik Nu Testamen od falei fiya kabĩ anĩ, yar 1976 bun SIL nē isennēya bunem gariya inoyan. De fiyēya are Marik tamo kayau musei od falei fiya kabĩ enei nigin kabĩ total daledig anidi bun ilef. De fiyēya are tamo kayau kantri tunĩ bun temeleid kabĩ enei nigin dogo neid safineid, kosēya ado, wau yaleseya bunem disennadadig anidi ganan buneg ilef.

Eneidi ganan wal fiya, de fiyēya odug anĩ, Negur ĩ ada Yogon Naal kelei ken, momoi tauf nigin Mata Ifenēya nē Od anĩ ifanadan Ĩ bun ilef. Ada, Negur ĩ od falei fiya kabĩ talouf nigin ada mugu mugu toku isenada fen, mageir ifanadadig Ĩ anĩ de tafiyek bagai. Fula fiya medeĩya odug Ĩ bun dogol gai gai ibodkalauf!

Marik Translation Team

Matyu

Jesus Wō Yen In Ibor (Luk 3:23-38)

¹ Jesus Kristus wō yen, anī nē ibor gī isin, Ī Dawid tubu, Abraham nē ibor.

² Isak, ne tama Abraham, Jakop, ne tama Isak, Juda, ne tura tar geid, idi temeid Jakop,

³ Feres Sera ado, nedi temeid Juda, nedi sineid Tamar, Hesron, ne tama Feres, Ram, ne tama Hesron,

⁴ Aminadab, ne tama Ram, Nason, ne tama Aminadab, Salmon, ne tama Nason,

⁵ Boas, ĩ yogon tama Salmon, Boas sina Rahab, ĩ haiden kayau, Israel kayau sā,

Obed, ĩ yogon tama Boas, yogon sina Rut, ĩ haiden kayau, Israel kayau sā,

Jesi, ne tama Obed,

⁶ King Dawid, ne tama Jesi.

Solomon, ne tama Dawid, Solomon ne sina ĩ, kulu kusī mudur Uria nē kayaun,

⁷ Rehoboam, ne tama Solomon, Abiya, ne tama Rehoboam, Asa, ne tama Abiya,

⁸ Jehosafat, ne tama Asa, Jehoram, ne tama Jehosafat, Usia, ne tama Jehoram,

⁹ Jotam, ne tama Usia, Ahas, ne tama Jotam, Hesekia, ne tama Ahas,

¹⁰ Manase, ne tama Hesekia, Amon, ne tama Manase, Josia ne tama, Amon,

¹¹ Jekonia in tura tar geid, nedi temeid Josia, sain anī bun, Babilonem Israel tamo kayau guri difeid dirou, Babilon kalabus bun dilen.

¹² Babilon kalabus bun dilen sain anī bunem, Sieltiel, ne tama Jekonia,

Serubabel, ne tama Sieltiel,
¹³ Abiud, ne tama Serubabel,

Eliakim, ne tama Abiud, Asor, ne tama Eliakim,

¹⁴ Sadok, ne tama Asor, Akim, ne tama Sadok,

Eliud, ne tama Akim,

¹⁵ Eleasar, ne tama Eliud,

Matan, ne tama Eleasar,

Jakop, ne tama Matan,

¹⁶ Josef ĩ, ne tama Jakop, Josef ĩ Maria aiwa, Maria ĩ Jesus gō fen, Jesus ĩ anī Kristus* dedig.

¹⁷ Anī nigin, ibor Abraham bun tamal ile Dawid, are ibor 14, Dawid bun tamal ile Babilon kalabus dilen, are ibor 14, kalabus bun tamal ile Kristus wō yen, are ibor 14.

Jesus Kristus Wō Yen (Luk 2:1-7)

¹⁸ Jesus wō yen anī eig fiya: In sina Maria Josefem yalouf nigin digirkenen, anī ere, idi uruwom fau mois diyo ken, Awa Uur Fateul bunem Maria bou adon anī dilen.

¹⁹ Josef, Maria ne aiwa, ĩ nun kariya tamo, anī ĩ Maria atun meleid bun yana sane ifenēya itor ken, yaor to wogō yen, ĩ namen kayau anī itornēf nigin kisi fen.

²⁰ Agef kisif mog, Negur nē engel, imīya bun ĩ wagen wō ye fen, iron, “Josef, Dawid naal, Maria wale fō bun on kayau ibodōf nigin to kumī wo, ere nigin, Maria namen kare fef are, Awa Uur Fateul bunem.

²¹ Kayau anī kesu monog gō foug, ō yana ũ Jesus wouf, ere nigin, yogon tamo kayau mosor bun temeideid kel gei foug.”

²² Negur nē od, profet sigor bun eig ye wogō yen anī kisi falauf nigin, enī ganan wō yen:

²³ “Kayau taulei kesu adouf, kesu monog gō foug, idi yana dū Imanuel douf,”† anī nē gariya, “Negur ĩ ada ado.”

²⁴ Sain Josef irik yen, Negur nē engel wogō fiyen kilei agef fen, Maria yale fō bun irou ile, in kayau ibodon.

* **1:16:** Grik od Kristus, are Hibu od Mesia dedig. Anī nē gariya are, kabī ifenēya nigin, Negurem ĩ bouwa bun mouf fi felen. † **1:23:** Asaia 7:14

²⁵ Anĩ ere, ĩ kayau ado bouweid bagu fiya san, ile kesu monog matu gō fen, anĩ Josef kesu yana yū Jesus yen.

2

Gaa Iseyan Keleĩ Tamo Ki Dilen

¹ King Herod nē sain bun, Jesus Betlehem fonō Judia distrik bun wō yen, anĩ bure fele di, keleĩ tamo gaa iseyan temeleid Jerusalem disin,

² idi to difen, “Kesu momou Juda neid king wō youf den anĩ, nain wō yen? Amā in barisa gaa iseyan melem mailen, ĩ yana malesauf nigin masin.”

³ King Herod od anĩ karĩ yen, ĩ wau morō fen, idi Jerusalem dibodon anĩ ganan geid waud morō fedin.

⁴ Agef fen, tamo kayau neid pris odudug ganan ado, lo ifelnēdiya tamo ganan iweigneĩd, guru dife di, ĩ to fedin, “Kristus nain bagai wō youf?”

⁵ Idi aiten dalen, “Oun Betlehem fonō Judia distrik an, age foug nigin kulu profet eig ye itoton:

⁶ “ Ō Betlehem, Juda teneub bun,
ō Juda neid uyu irouya atun naal
bagai sã,
fau ō bunem tamo yana odug ado wō
youf,
ĩ anim neu tamo kayau Israel
marau ibodōf.* ”

⁷ Age de di, Herod gaa iseyan keleĩ tamo iminēyan iweigneĩd fen, ere sain bagai barisa anĩ wō yen anĩ keleĩn.

⁸ ĩ idi Betlehem sur feid fen, iron, “Ulagauf, kesu anĩ foinenem ed ge umirēgouf. Kesu anĩ fata gouf, kaisã bagai aya urokanag, ago ge di, ayag ele fen, yana alesauf.”

⁹ King nē od karĩ del fen, idi naab dale dilen, age de mog, barisa oun gaa iseyan idi dilen anĩ, ĩ ket uyu ile, kesu yenen nē modoũ an bagai dē yel ifaren.

¹⁰ Barisa anĩ dē ye le di, dile fen, idi waud kulīya odug bagai adon.

¹¹ Fō namen disorũ dilen, kesu sina Maria ado diledin, idi bobou dife fen, in yana dalesen, age de fen, nedi faa diwareĩd fen, safina ege luwa eneidi difenen, are gol, aa gaula sumeĩ nigin tō fiyadig, moul aa bun tamal sumeĩ biya biya ado anĩ.

¹² Herod wagenem to ke de dilauf nigin, imīya bunem wedereid iroun, anĩ nigin, idi neid teneub bun ke douf nigin naab taka dalen.

Isip Diya Dilen

¹³ Idi dilel mog, Odug nē engel, imīya bun Josef wagen wō yen, ĩ iron, “Fã wo, kesu sina ado gei wo, uyag Isip uleg, an ubodōg uleg mog, aya fau arokonōf, gama bagai Herod kesu imirek yukesiyouf nigin age fef.”

¹⁴ Anĩ nigin, Josef fã yen, kesu sina ado gei feid, bō turan Isip diya dilen.

¹⁵ Josef fau an ibod mog, Herod laa fen. Anĩ bun, Odug nē od, profet sigor bun eig ye wogō yen anĩ, wō ye kisi felen, “Isip bun tamal aya neu kesu aweignen.”†

¹⁶ Herod mogo kisi yalen, “Gaa iseyan keleĩ tamo aya didegnan,” ye fen, ĩ mogo fatuk bagai seye yen, keleĩ tamo naa nigin solo de diro-kenen anĩ bun kisi es fe fen, Betlehem fonō kalilĩ fiya anĩ kesu monog yar uru, yar tekelei anĩ ganan didenkesiyouf nigin bagai ari fedi di, didenkesin.

¹⁷ Anĩ bun, Negur, profet Jeremaia bunem eig ye wogō yen anĩ, agef kisi felen:

¹⁸ “Rama fonō ait taka,
inã wau gudũ fiya odug karĩ den,
Rahel inã odug gere tar nigin yalen,
ĩ taka nem bobo fiyēf anĩ itoron,
ere nigin, yogon kesu taka to mata
ibodon.”‡

Nasaret Ke Den

¹⁹ Herod laa fe di, Odug nē engel, Josef Isip ibod mog, imīya bun ĩ wagen wō ye fen,

²⁰ iron, “Fã wo, kesu sina ado gei wo, Israel teneub bun ule, ere nigin,

* 2:6: Maika 5:2 † 2:15: Hosia 11:1 ‡ 2:18: Jeremaia 31:15

idi kesu yukesiya nigin age difen are mogo gare den.”

²¹ Age fe di, Josef fā yen, kesu sina ado gei feid, Israel teneub bun diyok dilen.

²² Anī ere, ī, Akelaus ī mogo tama Herod fotokar Judia teneub lo fef ya anī karī ye fen, ī an ileyā nigin kumī yen. Imīya bun weder iroun nigin, ī tokō fel, Galili distrik ilen.

²³ Josef ilen, taun taka Nasaret dedig an ibodon. Anī bun, profet od eig de wogō den anī kisi felen, “Ī Nasaret tamo douf.”

3

Jon Naan Igunēdiya Tamo Naab Dodok Fenen
(Mak 1:1-8; Luk 3:1-18; Jon 1:19-28)

¹ Sain anī bun, Jon naan igunēdiya tamo isin, gerere tuan Judia teneub bun biya od wogō ye fen,

² iweig iron, “Wauī falei gei, ere nigin, saa tano mogo melsak.”

³ Tamo enī nigin profet Asaia eig ye wogō yen,

“Ait taka gerere tuan iweig iron, ‘Odug nē naab dodok gei, in naab madur gei.’ ”*

⁴ Jon ne gabar are kamel siwi, ī gaar gabar nem lū diwan anim luwa gu fedig. Yogon saaf totobi nin te ado.

⁵ Tamo kayau Jon wagen guru difen, idi Jerusalem, Judia teneub ganān, Jordan naan kalilī fiya anī adok bun temeleid.

⁶ Idi neid mosor yaor difele di, Jon Jordan naan igunēdin.

⁷ Anī ere, ī naan iguneīd mog, Farisia tamo, Sadusia tamo geid musei disi di, ileid fen, ī idi irokenēdin, “Ā, gogour sane gere tar! Didi isiyouf anī wal ge fen, uyagauf nigin aim irokenein?”

⁸ Wauī falei gef are, age fiya gen faat biya ū gouf.

⁹ Ā aug nigin kisi to eig ye irōf, ‘Abraham nemā tamamā.’ Aya aro-keneik, meein eneidi bun Negur sã irō di, Abraham gere tar wowā douf.

¹⁰ Safor aayū gariyan mogo ibodok, aayū ganān faat biya to yuk, are itu ira ken, yã malān irāf.

¹¹ “Wauī falei gef nigin, aya naan nem naan aguneik, anī ere, taka ī aya dumeun isiyouf, ī megeir barikā aya wal fiya, ayam yogon ye su inukeis kenēya kisi feleya sã.† Ī Awa Uur Fateul yã ado nem naan iguneīf.

¹² Ī susu fiya nē fok iman ado, ī yogon susu fiya nē mayā wāi fouf, yogon wit biya are wit fō bun kuruf fen, wit ido yã mala faimud bun an irāf.”

Jon Jesus Naan Igunen
(Mak 1:9-11; Luk 3:21, 22)

¹³ Anī bure fele di, Jesus Jonem naan igunēf nigin Galili tamal Jordan naanū isin.

¹⁴ Anī ere, Jon Jesus gudū fiye ken, iron, “Onom aya naan igunaya, ere nigin aya garan usif?”

¹⁵ Jesus aiten yalen, “Arokonok nem ago. Negur nē madur bagai anī ganān kisi falauf nigin ada age tafouf, are biya.” Age ye di, Jon dōf age fen.

¹⁶ Jesus naan yale bure fel fen, kaisā bagai ī naanū tamal fā yen. Agef mog bagai, saa ilun bobog kā fele di, ī lof mog, Negur nē Awa Uur, ninā kuburir gen Jesus muduren isi, lalan ifenen.

¹⁷ Ait taka saa ilun iweig iron, “Eī neu Kesu, ī nigin aya wau laa fedig, ī nigin aya wau kulī yedig.”

4

Satan Jesus Kisi Fiyen
(Mak 1:12, 13; Luk 4:1-13)

¹ Anī bure fele di, Awa Uur Jesus itonē di, gerere tuan ile, Satanem kisi fiyen.

² Ī kuri ibodon, naa foti bō foti bure fele di, ī naū fen.

* 3:3: Asaia 40:3 † 3:11: Juda neid tobonunā anī, sain tamo yana ado isi di, idi neid kabī tamo in ye su nē malū biru difedig.

³ Kisi fiyēya tamo Satan, ĩ bun wō ye fen, irokenen, “Ō Negur Naal ouf are, meein enidi urō di, bret falei fediyouf.”

⁴ Jesus Satan aiten yalen, “Negur nē Itotoya bun eig ye irok, ‘Tamo bretem dogol to mata ifenēf, sã, od ganan Negur sigor bun isif anim mata ifenēf.’* ”

⁵ Age fe di, Satan Jesus yale irou, fateul taun Jerusalem irou iselen, an tempel fō soko ilun bagai inenē ifaren.

⁶ Satan iron, “Ō Negur Naal ouf are, ogo ufū urā. Ere nigin, Negur nē Itotoya bun eig ye irok,

“ ‘Negur ō nigin yogon engel ari fedi di, idi ō imedim ololon daleyōf, age dife di, ō yē meein takam to itutu ouf.’† ”

⁷ Jesus Satan aiten yale iron, “Negur nē Itotoya taka buneg eig ye irok, ‘Odug ogon Negur kisi fiya bun to unenēf.’‡ ”

⁸ Baban, Satan Jesus yale irou, arei odug ilun biya isel fen, teneub enei nē tano ganan, nedi biya fiya adok ifelnen.

⁹ Satan iron, “Enidi ganan aya afonōf, ō wageun bobou wo, selu wabiyouf are.”

¹⁰ Jesus Satan irokenen, “Satan, utorna ule! Ere nigin, Negur nē Itotoya bun eig ye irok, ‘Odug ogon Negur seli wabi fen, ĩ dogol aruna walouf.’§ ”

¹¹ Age ye di, Satan Jesus itornē ile di, engel disi Jesus aruna dalen.

Jesus Biya Od Wogōya Gariya Inon
(Mak 1:14, 15; Luk 4:14, 15)

¹² Jesus mogo, Jon kalabus ibodon anī karī ye fen, kel Galili distrik ilen.

¹³ Jesus Nasaret taun itor ile, Kapenaum taun ibodon, Kapenaum are Galili daliyou sirin, Sebulun Naptali ado idi neid teneub akor bun ibodon.

¹⁴ Od profet Asaia eig ye wogō yen anī kisi falauf nigin, agef wō yen,

¹⁵ “Sebulun nē teneub, Naptali nē teneub,

are naab maaīwō ileyan, Jordan naan sitakã,

Galili distrik haiden Israel sã anidi dibodok nē,

¹⁶ tamo kayau gugum bun difaren, idi lalan odug dilen,

tamo kayau laa teneub ado laa nē buri bun dibodon idi bun lalan iran.”*

¹⁷ Sain anī bunem ilen anī, Jesus biya od wogōya gariya inon, “Wauī falei gei, ere nigin, saa tano mogo melsak.”

Jesus In Dō Fiya Tar Uyulil Iweignēdin

(Mak 1:16-20; Luk 5:1-11)

¹⁸ Jesus Galili daliyou yeri iyok isil fen, mala iran uru tura ado iledin, Simon yana taka Pita, yogon tura Endru ado. Idi maaī daliyou kakāg diran, ere nigin, idi gau yaleya tamo.

¹⁹ Jesus iron, “Usig, aya dō wiyag len, aya ā tamo gei fiya tamo aneneif.”

²⁰ Kaisã bagai, idi neid kakāg folō difel fen, Jesus dō difen.

²¹ Anenem iyok ile fen, Jesus baban mala iran uru tura ado iledin, Jems Sebedi ne naal, yogon tura Jon ado. Idi waag bun nedi temeid Sebedi geid kakāg madur difedif dibodon. Jesus disiyouf nigin iweignēdin.

²² Kaisã bagai, temeid waag ado ditor ken, Jesus dō difen.

Jesus Dagi Adodo El Fedin

(Luk 6:17-19)

²³ Jesus Galili distrik akor anī adok iyo ken, Juda neid uub fō bun od ifelneid, saa tano ne biya od anī wogō fedin, agef fen, tamo kayau atun dagi fire fire ado ilōyabidiya adok el fedin.

²⁴ ĩ nigin od anī, Siria teneub ganan bun iyokelen, age fe di, tamo kayau idi, dagi taka taka adodo anidi ganan Jesus wagen guri difeid, disin, idi darau odug biya adodo, idi kaa sesen adodo, idi mir adodo,

* 4:4: Diuteronomi 8:3 † 4:6: Sam 91:11, 12 ‡ 4:7: Diuteronomi 6:16 § 4:10: Diuteronomi 6:13 * 4:16: Asaia 9:1, 2

‡ 4:7: Diuteronomi 6:16 § 4:10: Diuteronomi

idi bouweid ilolaisidiya anī, Jesus el fedin.

²⁵ Guru fiya odug, Galili temeleid, Dekapolis† temeleid, Jerusalem temeleid, Judia teneub ado Jordan naan sitakā teneub akor anī ganam tamo kayau Jesus dō difen.

5

Jesus Arein Biya Od Wogō Yen (Luk 6:20-23)

¹ Gama tamo kayau musei guru dife di, Jesus ileid fen, arei wala bun isel ibodon. Yogon dō fiya tar Jesus wagen disin. ² Jesus gariya ino ifelneid fen, iron,

³ “Aib idi uur nigin maleg dibodok, gama idi el fedif, ere nigin, saa tano are idi neid.

⁴ Aib idi waud gudū fedif, gama idi el fedif, ere nigin, idi waud yo fediyouf.

⁵ Aib idi molol dibodok, gama idi el fedif, ere nigin, idi teneub akor adouf.

⁶ Aib idi Negur nē madur bagai nigin naū fedif, naan ail fedif, gama idi el fedif, ere nigin, idi weit fediyouf.

⁷ Aib idi waud ifenēdif, gama idi el fedif, ere nigin, idi wau ifenēya dalouf.

⁸ Aib idi waud bun karētut, gama idi el fedif, ere nigin, idi Negur dilouf.

⁹ Aib idi maur gudū difedig, gama idi el fedif, ere nigin, idi Negur gere tar difediyouf.

¹⁰ Aib idi Negur nē madur bagai nigin darau dalef, gama idi el fedif, ere nigin, saa tano are idi neid.

¹¹ “Aib ā aya nigin tamo kayau idi kono diyelik, darau difeneik, idegēya bun od sane ganam ā bun dirarak, gama ā nigin el yeik.

¹² Wauī kulīg fen, sereg, ere nigin, āgenei mala solo saa tano bun odug,

profet idi ket dibodoneg kulu darau age fiya bagai dalen.

Sol Lalan Ado (Mak 9:50; Luk 14:34, 35)

¹³ “Ā teneub enī nē sol, anī ere, sol in kai sa kalauf are, ere naig fe di, baban kai adouf? Ī baban ereb kabī taka ifenēya kisi feleya sā, diraille di, tamo anī teten dilef, disi difouf dogol.

¹⁴ “Ā teneub enī nē lalan. Taun taka uya bun ibodok anī inokeleya kisi feleya sā.

¹⁵ Age fiya gen, tamo kayau lam tō de fen, beī kur to dinouf. Age fiya ban, idi yoki bun diseginnē di, anī lalan tamo ganam fō anī bun ifenēdif.

¹⁶ Age fiya bagai, āgenei fula fiya tamo kayau lalan ifenēdiyouf, ago ge di, tamo kayau idi āgenei tobonunēi biya anī dile fen, āgenei Temeī saa ilun ibodok anī seli dabiyouf.

Lo Od Kisi Fel Age Fen

¹⁷ “Aya asin anī, Moses nē Lo, profet neid od ado alelauf nigin asin to gouf, aya anī yaleleya nigin to asin, anī kisi afalauf nigin asin.

¹⁸ Aya momoi bagai arokeneik, sain saa teneub ado iminkeleya sā mog, sifa naal bagai, pen togo fiya anī Lo bun taka to fitol yale iminkalauf, idi anī ganam dibod mog, ereb ereb ganam kisi falauf.

¹⁹ Aibem taka, itāfiya enī nē tekelei naal bagai anī to dōf fen, tamo tunī ĩ dō difiyē age difouf nigin ifelnēdiyouf are, ĩ saa tanon yana naal bagai youf, anī ere, aib taka itāfiya eneidi dōf agef kisi fel ifelnēdiyouf, saa tanon yana odug yalouf.

²⁰ Anī aya arokeneik, āgenei madur bagai anim, Farisia tamo ado lo ifelnēdiya tamo neid madur bagai to wal gouf are, ā saa tanon ileya nigin kisi feleya sā bagai.

Seyeya Nigin Ifelnēya (Luk 12:58, 59)

† 4:25: Anī nē gariya, Ten Taun. * 5:21: Eksodas 20:13

21 “Tamo itãfiya kulu eig den anĩ karĩ gen, ‘Õ tamo to ukeis, taka ne tã yukesif are, es fiya bun ifarauf.’*
 22 Anĩ ere, aya ã arokeneik, aibem taka tura seye ifenek are, ã es fiya bun ifarauf. Baban, aib taka tura irokenek, ‘Daku,’ ã kot bun ifarauf. Takag, aibem irok, ‘Õ neneya!’ age youf, hel nẽ yã uruwa dõya kelẽ fiyek.

23 “Anĩ nigin, õ Negur bun sesewi wou fenẽ kisi wale, alta garan safina urou ule fen, õ turã õ bun nauseir ado anĩ õ weder fokõ gouf are,
 24 safina an alta garan utor yen, kel ule turã ado komo weleg fen, gama usi, Negur safina wenẽ, sesewi wouf.
 25 “Aib õ kot bun irouleyõya nigin, ã uruwom naab luwe uleg fen, on kiwai tamo ado kaisã komo gouf. Sãf, ã õ es fiya tamo bun inenõf. Age fe di, es fiya tamo õ iroyõ polis imeid bun ino di, idim õ kalabus bun dirãyoõf.

26 Aya momoi arokonok, õ kalabus bun kutũ yesiya sã mog, wareg ganan unolauf.

Seseirã To Inoyauf Nigin Ifelnẽya

27 “Tamo itãfiya eig den anĩ karĩ gen, ‘Õ seseirã to uno.’†
 28 Anĩ ere, aya ã arokeneik, taka ã malam kayau lof fen, mala yũ yalef, ã mogo wau bun kayau anĩ bun seseirã inol.
 29 Õ malã biyalem mosor bun inenõf are, ubodol uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf.
 30 Õ imã biyalem mosor bun inenõf are, gudũ uraile. Õ boũ adok hel bun irãya anĩ fotokar, õ boũ tunĩ taka iminkalauf, are deuf.

Tamo Kayau Ado Bagu Fiya To Fara Fiyau Nigin Ifelnẽya
 (Matyu 19:9; Mak 10:11, 12; Luk 16:18)

31 “Itãfiya eig fe yenen, ‘Aibem taka yogon aiwa iruwau fenẽ, kayau ado

bagu fiya anĩ fara fiya nẽ pepa ifen ken, bagu fiya fara fouf.’‡

32 Anĩ ere, aya ã arokeneik, aibem taka, yogon kayau ã tamo taka ado to seseirã dino mog, iruf are, ã kayau anĩ seseirã naab bun inenek. Anĩ aibem taka kayau anĩ yalef, tamo anĩ mogo seseirã inof.

Wau Kuturoleya Od Nigin Ifelnẽya

33 “Takag, tamo itãfiya kulu eig den anĩ karĩ gen, ‘Ã wau kuturoleya od anĩ to waleleg. ã wau kuturoleya od, Odug mala bun unogen anĩ kulatun gouf.’

34 Anĩ ere, aya arokeneik, od megeir ifenẽya bun, saa mala bun to bagai wouf, ere nigin, saa are Negur nẽ ibodõya modoũ.

35 Oo teneub mala buneg to wouf, ere nigin, teneub are Negur ye inoya nẽ sawa. Oo Jerusalemeg mala bun to wouf, ere nigin, are King Odug in taun yana.

36 Õ muduremeg anĩ nigin megeir to unouf, ere nigin, õ ogon fatiya age fe di, lalau be karos be taka wõya kisi feleya sã.

37 ã nigin yo yeya are yo gouf, sã de sã gouf dogol, od enĩ wal fe fen, tobol fiya are Satan bunem isif.

Sane Solo Fiya Nigin Ifelnẽya
 (Luk 6:29, 30)

38 “Tamo itãfiya eig den anĩ karĩ gen, ‘Mala fagã difouf, mala solo abag mala fagã wo. Waila are waila tura.’§

39 Anĩ ere, aya arokeneik, tamo sane mala solo to wenẽ. Tamo taka ogon walã biyalẽ fakã fouf are, falei wel len, walã sitakãg fakã fouf.

40 Tamo taka ogon kolos yalouf nigin kot yõ fenẽ, malakaĩ ogon saket anĩg utorken.

41 Tamo taka mail tekelei ileya nigin nugo yõf, malakaĩ uruwom mail uru ulagauf.

42 Aibem erob taka nigin to yok, are wenẽf. Aibem erob taka wareg õ bun yalou fenẽf, õ to dudum wiyẽ.

† 5:27: Eksodas 20:14 ‡ 5:31: Diuteronomi 24:1 § 5:38: Eksodas 21:24; Levitikas 24:20; Diuteronomi 19:21

Kiwai Nigin Wau Laa Fiya
(Luk 6:27, 28, 32-36)

⁴³ “Tamo itãfiya eig den anĩ karĩ gen, ‘Õ nẽ tã nigin wau laaf fen, on kiwai anĩ kiwai wenẽ.’* ”

⁴⁴ Anĩ ere, aya arokeneik, ãgenei kiwai nigin wau laaf fen, tunĩ darau difeneik idi nigineg kosẽ gouf.

⁴⁵ Ago gouf are, ã Temeĩ saa ilun ibodok gere tar wowã gouf. Ī yogon gaa sur fef, tamo sane, tamo biya adok daledig, taka uyẽg sur fef, tamo madur, tamo madur sã adok ifenẽdidig.

⁴⁶ Idi ã nigin orodidig anidi nigin dogol wau laa foug are, ere mala solo anĩ ã walogouf? Are takis yaleya tamog to age difedig de?

⁴⁷ Ā tureĩ tar dogol aan wiyẽdigouf are, ere anĩ tunĩ wal fediya ago gef? Haiden are idig, anĩ to age difedig de?

⁴⁸ Anĩ nigin, Temeĩ saa ilun ibodok ĩ madur bagai gen, ãg de madur bagai agog.

6

Maleg Isennẽya

¹ “Ā lo welegei, ãgenei tobonuneĩ madur anĩ seluma kulõ difouf ge mã, anĩ tamo kayau meleid bun yaau to du wog. Ā ago gouf, Temeĩ saa ilun ibodok mala solo to ifeneĩf.

² “Sain õ maleg tamo usennẽdiyow fenẽ, õ anĩ taur to fũ fen, ait bagauf, mala yaleya tamo Juda neid uub fõ bun ado naabur, tamo idi seluma kulõ difouf de fen, age difedig gen. Aya momoi arokeneik, idi anĩ nẽ mala solo adok mogo dalen.

³ Anĩ õ maleg tamo usennẽdif, on imã kilẽ to keleĩ mog, imã biya melẽ age fouf,

⁴ anĩ õ iminẽyan dor walef. Ago di, on Tamã, õ iminẽyan agol, ile fen, mala solo ifonõf.

Kosẽya
(Luk 11:2-4)

⁵ “Sain ã kosẽ gouf bun, ã mala yaleya tamo age difedig gen to agog. Idi tamo dilemãf de fen, Juda neid uub fõ namen ado naab kaleyan difar fen, kosẽya orodidig. Aya momoi arokeneik, idi anĩ nẽ mala solo adok mogo dalen.

⁶ Sain õ kosẽ wou fenẽ, õ ogon aabẽ ule, sukar unol fen, Tamã Negur, ĩ iminẽyan ibodok, kosẽ wiyẽ. Anĩ on Tamã õ iminẽyan agol, ile fen, mala solo ifonõf.

⁷ Sain ã kosẽ gouf, haiden age difedig gen, od musei to dīg, ere nigin, idi neid kisi, nemã od musei nigin karĩ famãf de fen, idi od musei biya wogõ dedig.

⁸ Ā, idi age difedig gen, to agog, Negur ãgenei Temeĩ ĩ ereb ã lau gef anĩ mogo keleĩ mog, dum ĩ to wiyẽgedig.

⁹ “Kosẽ gou fenẽ, ã eig wog urõgouf:

“ ‘Õ nemã Dei õ saa ilun ubodok, õ yanã fateul ibodõf,

¹⁰ ogon tano isiyouf,

ogon oroyok saa ilun age fef gen, tenebur eineg age fouf.

¹¹ Saaf naa enĩ nẽ wanamãf.

¹² Õ amã nemã mosor nigin wederẽ tu kalauf, are idi amã bun mosor dinof, amãg idi neid mosor nigin wederamã tu kelef gen.

¹³ Kisi famãya bun to uroulemãf, sesen anĩ bun tamal amã walelnamãf.* ”

¹⁴ Tamo idi ã bun mosor dinoyeĩf, ã idi neid mosor nigin wedereĩ tu kalauf are, ãgenei Temeĩ saa ilun ibodok, ĩg ãgenei mosor nigin weder tu kalauf.

¹⁵ Anĩ ere, ã tamo idi neid mosor nigin wedereĩ to tu kalauf are, ãgenei Temeĩ, ĩg ãgenei mosor nigin weder to tu kalauf.

Kuriya Nigin Ifelnẽya

¹⁶ “Sain ã kuri gouf, mala yaleya tamo sẽya nẽ neweid age difedig gen to ago gei, ago gouf, tamo anĩ dile fen

* **5:43:** Levitikas 19:18 * **6:13:** Itotoya tunĩ agef yenek: *walelnamãf. Anĩ tano, megeir ado, fula fiya medeĩa faimud ogon ibodõf. Momoi.*

kuri def douf. Aya momoi arokeneik, anī nē mala solo adok mogo dalen.

¹⁷ Anī ere, sain ò kuri wouf, fatiyā moul u ken, nawā usurūf.

¹⁸ Anī bunem, ò kuri bek oo sã be, tamo idi ò nigin to keleī youf. Ogon Tamã, Negur iminēyan ibodok, ĩ yogo dogol keleī youf, anī ogon Tamã ò iminēyan ereb ago wouf ile fen, mala solo ifonōf.

Safina Biya Bagai Saa Ilun
(Luk 11:34-36; 12:33, 34; 16:13)

¹⁹ “Aug nigin safina biya biya tenebur ein to kuru wog. An dedek yāf, maat te yūf, bē tamog narī de, bē dalouf.

²⁰ Ā aug nigin safina biya biya saa ilun kuru wog. An dedek to yāf, maat te to yūf, bē tamog to narī de, bē dalouf.

²¹ Ogon safina biya biya ibodok nē an, ogon waūg an yenēf.

²² “Mala are bouwa nē yal. Ò malã biyauf are, ogon bouwã ganan lalan lauf.

²³ Anī ere, ò malã sane lauf are, ogon bouwã ganan gugum kalauf. Lalan ò ado anī gugum kalauf, gugum are odug bagai!

²⁴ “Aib taka ĩ yogon marau uru bun kabī to yalouf. Anī taka kiwai ifen ken, taka anī nigin wau laa fouf. Ī taka anī dōf fen, taka anī mala irim fouf. Anī nigin, ā uru to aruneid walogouf, Negur ado moni.

To Osig
(Luk 12:22-31)

²⁵ “Age fiya nigin, aya ā arokeneik, ā āgenei bouweī mata ibodōf nigin to osig fen, ere saaf tãf, ere naan tãf gouf. Ā āgenei bouweī nigin to osig fen, ere gabar tafilaīf gouf. Mata anī saaf wal fiya, bouwa anī gabar wal fiya sã de?

²⁶ Saa ilun ā ninã uledigouf, idi saaf to ditenēdig, idi saaf u de fen, kin to dinodig, anī ere, āgenei Temeī saa ilun yogo ifoutnēdidig. Ā idi anī wal fediya sã de?

²⁷ Ā takam yogon mata nigin osi ye fen, aua tekelei tobol fiya kisi feleya de?

²⁸ “Ere nigin ā gabar nigin osi gef? Dubur aa munī, naig fe odugedig anī ulogouf. Idi kabī to daledig, to diwadig.

²⁹ Anī ere, aya ā arokeneik, kulu King Solomoneg, yogon saki gegē biya biya ifonun anim, aa munī eig fediya taka to wal fen.

³⁰ Anī ere, Negur, dubur aa munī gama dogol ifarauf, nile di, yã irãf anī, agef naki fediyouf are, ā bun idi wal fediya bagai Negur ifounneīf, age fiya sã de, ā momoiya naal bagai ado?

³¹ Anī nigin, to osi wog urōgouf, ‘Ere saaf ada tãf?’ oo ‘Ere naan ada tãf?’ oo ‘Ere gabar ada tafilaīf?’

³² Haiden idi enī ganan nigin meleid dimirēdig. Āgenei Temeī saa ilun lau gef anī ganan keleī.

³³ Anī ere, Negur nē tano ado yogon madur bagai ketem umirēg, ago ge di, safina eneidig ganan ifeneīf.

³⁴ Age fiya nigin, naa nil nē anī nigin to osi wog, nil nē are yogo nigin osi youf. Naa mugu mugu nē morō are idi dogo dalouf.

7

Tunī Es Fediya
(Luk 6:37, 38, 41, 42)

¹ “Taka to es wiyēg, ago gouf, āg es yeīf.

² Anī nigin, tunī es wedigef gen, āg agef es yeīf. Āgenei es fiya nē naab de tekelei bun āg agef es yeīf.

³ “Ō ere nigin turã mala teteur lo fen, ò ogon aa masak malã bun ibodok anī to ulef?

⁴ Aa masak ogon malã bun ibod mog, naig fe di, turã nigin dogol urokenek, ‘Utor len, aya ogon malã teteur alelkonōf?’

⁵ Ō mala yaleya tamo, ò ogon malã bun ketem aa masak walel kelē wol fen, dum turã bun mala teteur walelauf.

⁶ “Ereb fateul anī gaū to urakenēdig. Āgenei maaī tuwa meli bagai

pel anī bor to urakenēdig. Ā ago gouf, yedim lalai difouf. Age de fen, falei del, ā serek de fisik diyeif.

*To Wouf, Umirēf, Godu Wouf
(Luk 11:9-13)*

⁷ “To gouf, agef ā ifeneif; umirēgouf, ā gurug gouf; godugodu gouf, ā sukar kā feneif.

⁸ Aibem taka to fef, yalouf; aibem taka imirek, gurug fouf; aibem taka godugodu fef, sukar kā fel kenēf.

⁹ “Ā anī takam, ī naal bret nigin to fef, ī meein ifenēf de?

¹⁰ Takag, ī gau nigin to fef, ī gogour ifenēf de?

¹¹ Seseneī bagai ā, āgenei kesu sa-fina biya biya anī ifenēdiya ā keleī bagai, age fiyauf are, Temeī saa ilun ibodok, safina biya biya aib idi to difiyek, āgenei wenēdigedig anī wal fiya, idi ifenēdiyof!

¹² Anī nigin, ereb ereb ganan bun, ereb taka idim age diyeif anī oroyeik anī, āg idi nigin ago gouf. Od enī Lo od ado Profet od neid kaū.

*Bobog Kidō Bobog Bilalā Fiya Ado
(Luk 13:24)*

¹³ “Bobog kidō bun usorug ulagauf. Ere nigin, daū fiya bun ileyā nigin bobog bilalā fiya, naab odug. Tamo kayau musei naab odug anī diledig.

¹⁴ Anī ere, mata tano bun ileyā nigin bobog kidō, naab naal. Anī nigin, tamo kayau teke tekeleim dogol, anī fata difedig.

*Aayū Yogon Faat Ado
(Luk 6:43, 44; 13:25-27)*

¹⁵ “Idegēya profet anidi lo weledi-gei. Idi ege sipsip siwi difoun ken, ā garan disif, anī ere, idi namedin gaū kuī sane ado.

¹⁶ Idi neid faat yūf bun, ā idi dogo anibo be biya be ulogouf. Tamo kayau idi wei biya barik bun, gira udum bun daledig de?

¹⁷ Age fiya gen, aayū biya are faat biya yūdig, aayū anibo are faat anibo yūdig.

¹⁸ Aayū biya ī, faat sane yūya kisi feleya sā, aayū anibo are faat biya imaya kisi feleya sā.

¹⁹ Aayū ganan faat biya to imaf are, ditu dale yā malan dirāf.

²⁰ Age fiya nigin, idi neid faat yūdig bunem, ā idi nigin yaor keleī youf.

²¹ “Idi aya ‘Odug, Odug’ de fen dirokanadig, idi ganan saa tanon to dilauf. Aibem ī, neu Dei saa ilun ibodok in oroya dōf age fef anim dogol ilauf.

²² Naa anī bun, musei aya dirokanauf, ‘Odug, Odug, amā ō yanā nem profet od wogō maun, amā ō yanā nem kaa sesen maruid fen, ō yanā nem memelik musei manodin!’

²³ Age de di, aya yaor aro-kenēdiyof, ‘Aya ā keleī sā. Ā sane gide gedig, uyaleleg!’

*Fō Inoya Nē Keleī Tamo Neneya Tamo Ado
(Luk 6:47-49)*

²⁴ “Age fiya nigin, taka ī neu od eneidi karī ye fen, dōf age fef, ī keleī tamo yogon fō meein teten inon gen.

²⁵ Sain uyē burabura isin, kuwei odug ile, solalā fel fen, yau odug fā ye fen, fō yoū fe di, to kubū yen, ere nigin, tor gariya meein teten inon.

²⁶ Anī ere, aib taka ī neu od eneidi karī ye fen, to dōf age fef, ī neneya tamo yogon fō subusir teten inon gen.

²⁷ Sain uyē burabura isin, kuwei odug ile, solalā fel fen, yau odug fā ye fen, fō yoū fe di, kubū ye narīf irailen.”

²⁸ Od ganan Jesus wogō ye idikele di, tamo kayau in od ifelnēdin anī nigin terē den,

²⁹ ere nigin, Jesus ifelnēdin are, taka ī yana adom gen age fiya od wogō fedin, idi neid lo ifelnēdiya tamo age difedig gen sā.

8

*Tamo Lepra Dagi Ado
(Mak 1:40-45; Luk 5:12-16)*

1 Jesus arein tamal kutū yesi di, tamo kayau musei dō difiyen.

2 Tamo lepra dagi ado isi, Jesus wagen ibor bobou fe fen, irokenen, “Odug, ò waū irom are, aya el fiyaya nigin kisi feleyam.”

3 Jesus ima iran, tamo anī kobūf fen, iron, “Aya wau irok, bouwā biyaf.” Age ye di, kaisā bagai yogon lepra dagi sa kelen.

4 Jesus irokenen, “Ō aib taka to urokenēf. Ō ogo pris wagen ule, bouwā ufelne ken, Moses nē od dō fen, safina sesewi wo, anī bunem ō biya lel anī, tamo kayau dilouf.”

Kusī Tamo Neid Orowa Nē Momiya

(Luk 7:1-10)

5 Jesus Kapenaum taun wō ye di, Rom kusī tamo neid orowa Jesus wagen isi fen, isennēf nigin to fiyen.

6 Ī iron, “Odug, neu kabī tamo fō bun darau odug ado ilolaisin yenek.”

7 Jesus irokenen, “Aya ele, el afiyēf.”

8 Age ye di, kusī orowa aiten yale iron, “Odug, aya to biya nigin aya kisi afef, ò neu fō bun to usiyouf. Malakaī, ò od dogol urō di, anī neu kabī tamo dagi sa kalauf.

9 Aya yug nigin age fiya, ayag neu odug anī farumen abodok, kusī tamo idig aya farumeun dibodok. Aya taka enī arokenek, ‘Ule’ afiyek, ĩ ilauf. Aya taka arokenek, ‘Ō usi’ au di, ĩ isidig. Neu kabī tamo enī ago afiyek, ĩ agef age fedig.”

10 Od anī kusī orowa age irō di, Jesus od anī karī ye, terē ye fen, tamo kayau dō difiyen anidi irokenēdin, “Aya ā momoi arokenek, aya Israel bun āgenei momoiya odug eig fiya taka to ailen.

11 Aya arokenek, musei fau gaa iseyan gaa ileyen temeledim disiyouf, idim modoū dalel fen, saa tano nē tar odug bun, Abraham, Isak, Jakop geid saa tanon dibodōf.

12 Anī ere, Israel tamo kayau musei Negurem idi nigin saa tano dodok fe

kenēdin anidi, fau dumeitur gugum bē mayarē irarāf, an inā odug ado firi de fen, goboreid kikokō youf.”

13 Jesus age wogō yel fen, kusī orowa irokenen, “Kel ule! Ō ogon momoiya kilei bagai, ò nigin dōf agef ifonōf.” Sain anī wogō ye mog bagai, yogon kabī tamo dagi sa kelen.

Jesus Dagi Tamo Kayau Musei El Fedin

(Mak 1:29-34; Luk 4:38-41)

14 Jesus Pita nē fō bun ilen, Pita nē mam bouwa uruwa odug ado fatarē yen mog, ilen.

15 Jesus kayau ima anī kobū fe di, bouwa uruwa fara fiye kele di, kaisā bagai kayau fā yale, Jesus aruna yalen.

16 Gugum mog, tamo kayau kaa sesen adodo musei guri difeid, Jesus wagen disin. Age dife di, Jesus od nem kaa sesen iruid fen, dagi adodo ganan el fedin.

17 Jesus enī ganan age fen, are Negur ĩ, profet Asaia bunem od eig ye wogō yen anī kisi falauf nigin:

“Ī yogo neda ilōyabiya yales, neda dagi faali fen.”*

Jesus Dō Fiyēya Bun Kafī Fiya Fire

(Luk 9:57-60)

18 Sain anī Jesus mala iran, tamo kayau musei kalilī difiyē di, daliyou sitakā dibal dilauf nigin in dō fiya tar irokenēdin.

19 Age fiyeid mog, lo ifelnēdiya tamo taka wagen isi fen, irokenen, “Tise, ò narib ulauf are, aya ò dō ayōf.”

20 Jesus aiten yale iron, “Gaū kuī idi yenēya nē modoū ku ado, ninā lalo bun diyok idi uru ado, anī ere, Tamo Naal ĩ mudur inoya nē modoū sã.”

21 In dō fiya taka irokenen, “Odug, fau de, folō wiya len, aya ele fen, neu dei mū afel fen.”

22 Anī ere, Jesus ĩ irokenen, “Ō aya dō wiya, laa tamo idi, laa tutur abob mumã difouf.”

* 8:17: Asaia 53:4

Jesus Uyē Yau Ado Irokenēdi Di, Kee Delen

(Mak 4:36-41; Luk 8:22-25)

²³ Jesus waag owor isile di, in dō fiya tar ī geid dilen.

²⁴ Idi kelei sā mog, maaī daliyoun yau total fā yen. Agef mog, maaī odug fā ye, waag yū di, waag anī naanū imutkesilau fenē age fen. Anī ere, Jesus mulā yenen.

²⁵ In dō fiya tar dilen, turī difiyē, diron, “Odug, usennamā! Amā mogo naanū mamutatā gare mausiyoun fenē!”

²⁶ Jesus aitedin yalen, “Āgenei momoiya naal bagai, ere nigin ā fatuk kumī gef?” Age ye fen, ī fā ye, maaī yau ado ou fiyēdi di, oditekei kee delen.

²⁷ Tamo idi terē de fen, to difen, “Tamo eī naig fiya bagai? Maaī yau ado karī difiyē ken, dō difef!”

Tamo Uru Kaa Sesen Adodo El Fedin

(Mak 5:1-17; Luk 8:26-37)

²⁸ Jesus Gadara neid teneub bun daliyou sitakā ilen, kaa sesen adodo tamo uru matmat bunem dile fen, Jesus tarabā difen. Tamo uru kuī bagai diledin nigin, tamo ganan naab anī to diyōdig.

²⁹ Anī idi diweig fen, diron, “Negur Naal, ō amā nigin ere naig wamāf? Ō naa wenen anī fau mog, gama bagai daig wamā fenē ein usif de?”

³⁰ Idi difaren sitakā gerō nuwa an, bor musei saaf doko diyon.

³¹ Kaa sesen idi Jesus digonen, “Ō tamo eneidi bun tamal urumā fenēf are, amā bor musei namedin sur wamāf.”

³² Jesus kaa sesen irokenēdin, “Ule-leg!” Idi ulolō deis fen, diselen bor namedin dilelen. Bor ganan gududu de bebeigir disil, daliyoun naanū gare desin.

³³ Bor lo fiya tamo diya, taun disil fen, Jesus kaa sesen irudi di, bor gare den anī ganan wogō den. Age de fen, idi ereb tamo uru kaa sesen adodo bun wō yen anī nigineg wogō den.

³⁴ Age de di, tamo kayau taun temeleid adok, Jesus ileyā nigin dilen. Idi Jesus dile fen, idi neid fonō anī itor ilauf nigin digonen.

9

Jesus Tamo Bouwa Ilolaisin Anī El Fiyen

(Mak 2:1-12; Luk 5:17-26)

¹ Jesus waag taka sō ye, daliyou ibal fen, yogon taun ilen.

² Tamo tunī tamo bouwa ilolaisin gabgab bun yen mog, Jesus wagen diroulen. Idi neid momoiya Jesus ile fen, Jesus tamo bouwa ilolaisin irokenen, “Kesu, waū unois, ogon mosor alelkonok.”

³ Anī karī de fen, lo ifelnēdiya tamo tunī, idi neid kisi bun diron, “Tamo eī Negur kono fiyek!”

⁴ Idi neid kisi kelei ken, Jesus iron, “Ā ere nigin wauī bun kisi sane agef wō yef?”

⁵ Nanī anī irōya nigin karika: ‘Ogon mosor alelkonok,’ de? Oo ‘Fā, ufar uyok ule’?

⁶ Anī ere, Tamo Naal ī tenebur ein mosor yaleleya nigin yana ado anī ā kelei youf nigin...” Age ye fen, tamo bouwa ilolaisin irokenen, “Fā ufar, ogon gabgab wale urou, fonō ule.”

⁷ Age ye di, tamo fā yale, fonō ilen.

⁸ Tamo kayau guru difen ganan anī meledim dile fen, terē de kumī den. Negur yogo tamo yana enī ifenēdin anī nigin, idi Negur yana dalesen.

Jesus Matyu Iweignen

(Mak 2:13-17; Luk 5:27-32)

⁹ Jesus an tamal iyok ile fen, mala irakelen, tamo yana Matyu takis yaleyā fō bun ibod mog, ilen. Jesus ī irokenen, “Aya dō wiya.” Age ye di, Matyu fā yale, Jesus dō fen.

¹⁰ Jesus Matyu nē fō bun bō saaf yō mog, takis yaleyā tamo, mosor ado tamo kayau musei disi fen, Jesus in dō fiya tar geid weim saaf don.

¹¹ Farisia tamo idi anī dile fen, idi Jesus nē dō fiya tar to difedin, “Ere nigin āgenei tise, takis yaleyā

tamo, mosor ado tamo kayau geid saaf doko?”

¹² Od anī Jesus karī ye fen, iron, “Idi bouweid biya bagai, dokta gein ileyā nigin to waud yenēdig, tamo dagi ado idim dogol, dokta gein ileyā nigin waud yenēdig.

¹³ Uleg fen, od enī dir ge fen, kaū ere yeif anī keleī youf, ‘Aya wau ifenēya anī orouf, sesewi fiya sā.’* Anī nigin, aya tamo madur anidi iweignēdiya nigin to asin, aya mosor adodo anidi iweignēdiya nigin asin.”

*Kuri Nigin Jesus To Difiyen
(Mak 2:18-22; Luk 5:33-39)*

¹⁴ Age ye mog, Jon naan igunēdiya tamo nē dō fiya tar disin, Jesus to difiyen, “Naig fe di, amā Farisia tamo geid kuri mau di, ogon dō fiya tar idi kuriya sak?”

¹⁵ Jesus aitedin yalen, “Tamo, kayau yalou fenē tar bun, ne tā tar disennek idi fau weim dibod ken, naig ī nigin waud gudū fouf? Dum sain wō ye di, an ne tā tar bun tamal yalelnēf bun anī, idi gama kuri douf.

¹⁶ “Tamo taka, gabar masak mata, gabar tubu ado baguf fen, to iwauf. Anī age fouf, gabar masak matam gabar tubu dī fe di, tubu kudef, awa kanouf.

¹⁷ Takag, tamo idi wain mata anī meme gabar† tubu anī bun to ditinēf. Age difouf, meme gabar kude fele di, wain oho yalauf. Meme gabar sane lauf. Age fiya sā, idi wain mata are meme gabar mata bun ditinēf. Age fe di, uru idi kabī ifenēdiya nigin biya difarauf.”

*Kayau Naal Laa Fen, Dagi Kayau Taka Ado
(Mak 5:22-43; Luk 8:41-56)*

¹⁸ Od enī Jesus fau wogō ye mog, Juda neid uub fō nē uyu irouya taka isin, Jesus wagen ibor bobou fe fen, iron, “Gama bagai neu barai laa fel. Ō uma fen, imā teten uno di, kayau naal baban kel mata ibodōf.”

¹⁹ Jesus fā yale, uruwom dile di, yogon dō fiya tar idig dilen.

²⁰ Dile mog, kayau taka ogō dagi faimud ado yar tuwelf iyon anī, Jesus dume dume isi fen, Jesus nē kolos iri kobū fen.

²¹ Kayau anī yogon kisi iron, “Aya de yogon kolos dogol kobū afouf, anī aya neu dagi sa kalauf.”

²² Jesus falei yelen, kayau anī ile fen, iron, “Nau barai, waū unois, ogon momoiya anim dagi sa kel konok.” Age ye mog bagai, kayau in dagi sa kelen.

²³ Jesus uyu irouya nē fō bun isour ilen, mala iran, tamo kayau musei kokū de, i de mog, iledin.

²⁴ Jesus iron, “Uyaleleg, kayau naal enī laa fiya sā, mulā yenek.” Age ye di, idi kasā difiyen.

²⁵ Tamo kayau mayarē irud laisi fen, Jesus aab namen ilen, kayau naal ima yale iroun. Age fe di, kayau naal fā yen.

²⁶ Nenerī anī wogō de di, teneub anī ganān bun iyokelen.

Jesus Tamo Towo El Fedin, Uru Meleid Ifofakeleya Ado Taka Ait Ifokeleya

²⁷ Jesus modoū anī itor ken, iyok ile mog, tamo uru meleid ifofakeleya Jesus dō difiyen, diweig diron, “Dawid Naal, amā nigin waū inō!”

²⁸ Jesus fō aaben ile di, tamo uru meleid ifofakeleya wagen dilen, Jesus idi to fedin, “Ā momoi gef, aya ā meleī el afe di, lo gouf nigin kisi feleya?”

Idi aiten dalen, “Ao, Odug.”

²⁹ Age de di, Jesus imam meleid kobū feid fen, iron, “Momoi gef kilei, ā nigin age feneif.”

³⁰ Idi neid meleid gama kelē delen. Jesus totol bagai katū feid fen, iron, “Enī nigin taka to urokenēgouf.”

³¹ Anī ere, idi kututū deis dile fen, Jesus age fen anī, teneub anī nē akor ganān bun od dinof diyon.

* **9:13:** Hosia 6:6 † **9:17:** Juda neid tobonunā, idi meme gabar nem darum diwadig.

³² Idi Jesus ditornē dile mog, tamo taka kaa sanem ait ifokelen anī Jesus wagen dirousin.

³³ Kaa sane iru di, iyan, tamo ait ifokeleya wogō yen. Tamo kayau guru difen ganan terē de fen, diron, “Kulu nem isi gama, Israel bun eig fiya taka to tailen.”

³⁴ Anī ere, Farisia tamo idi diron, “Are kaa sane neid mudur yana bunem, ī kaa sesen irudif.”

Kabī Tamo Musei Sā

³⁵ Jesus taun ganan fonō fonō ganan bun iyo ken, nedi uub fō bun ifelneīd, saa tano nē biya od wogō feid fen, dagi gariya fire fire ganan el fedin.

³⁶ Sain Jesus mala iran, tamo kayau musei guru difen anī ileid fen, idi nigin wau yun, ere nigin, idi morō adodo isennēdiya sā, idi sipsip marau sā age fiya gen.

³⁷ Anī yogon dō fiya tar irokenēdin, “Kabier saaf musei biya ima bure felen, anī ere, kabī tamo musei sā.

³⁸ Age fiya nigin, kusu fiya marau, Odug to wiyēg, kabī tamo susur fedī di, yogon kabier kususū fiya nigin dilauf.”

10

Jesus In Dō Fiya Tar Tuwelf Sur Fedin

(Mak 3:13-19; Luk 6:12-16)

¹ Jesus in dō fiya tar tuwelf iweignēdi di, wagen guru difen, kaa sesen irudiya, dagi gariya fire fire ganan el difediyouf nigin megeir ifenēdin.

² Eī aposel tuwelf yeneid, Simon (in yana Pita dedig), yogon tura Endru, Jems Sebedi naal, ne tura Jon,

³ Filip, Batolomyu, Tomas, taka Matyu takis yaleya tamo, Jems Alfeus naal, taka Tadeus,

⁴ Simon Selot,* taka Judas Iskariot, ī anī Jesus kiwai ifenen.

Jesus In Dō Fiya Tar Tuwelf Kabī Ifenēdin

(Mak 6:7-13; Luk 9:1-6)

⁵ Idi tuwelf enidi, Jesus fadim enī ado dō difouf nigin sur fedin: “Idi ibor fire Juda ibor sā wagedin to ulagauf, Samaria neid taun taka taka buneg to uleg.

⁶ Israel atun idi sipsip fō delen anidi bun dogol ulagauf.

⁷ Sain ā ulagauf, od enī anī wogō gef uyōg, ‘Saa tano mogo melsak.’

⁸ Dagi el wedig, gare den turī wedig, lepra dagi ado el wedig, kaa sesen urudig. Megeir anī ā na yaleya sā ege walegen, anī nigin, ege luwa wenēdigouf.

⁹ Ā gol moni, silwa moni, kapa moni be, āgenei kodolē taka to bagai ufeg.

¹⁰ Delē uyōgou fenē, delē iyōya nē faa sā, gabar uru, sendel uru, manig uru agog to guri gouf, tamo kabī dalef, idi de mala ereb lau difef anī difenēdiyadidig.

¹¹ “Narib gouf, taun be, fonō taka be bun ulegef, ā meleī unog, tamo ā nigin sere yeīf, yogon fō bun ubodōg, dum utorōg uleg.

¹² Ā fō anī bun ulegef, āgenei wau inosiya nē aanya wenēdigouf.

¹³ Fō anī bun tamo kayau biya diyeik, āgenei wau inosiya nē aanya an urofosis, idi age fiya sāf, āgenei wau inosiya nē aanya anī baban keg waleg.

¹⁴ Aib taka ī ā nigin to sere yeīf, āgenei od to karī youf, āgenei yeī aasu tu weleg fen, fō be taun anī utorōg ulagauf.

¹⁵ Aya momoi arokeneik, Sodom Gomora ado darau dalen anī wal fiya, es fouf naa anī bun, taun anī in darau odug bagai yalouf.

Kafī Fiya Fire Fire Fau Isiyouf

(Mak 13:9-13; Luk 21:12-17)

¹⁶ “Aya ā sur ayeik are, sipsip gaū kuī atun sur fiya gen. Anī nigin, ā gogour age fedig gen, kisi ed ge waleg fen, ago gouf, ninā kuburir gen, imatkesiya ubodōgouf.

* **10:4:** Juda neid kusī mala taka, idi Rom gawaman ado kusī dedig.

17 Æ tamo nigin lo walagauf, idi fau kaunsel imeid bun dinenei di, idi Juda neid uub fõ bun wagagã diyeif.

18 Idi aya nigin de fen, ã guri diyeif diroule, gawaman mudur, king ado wagedin difarnei ken, ã idi geid fen, haiden Israel sã anidi meleid bun, aya nigin wogõ gouf.

19 Anĩ ere, idi ã kot bun ifareya nigin gei diyeif, ã wauĩ to morõ ken, ere od tarõf, naig ta tarõf anĩ nigin to kisi fatuk walogouf. Sain anĩ bun, ã ereb od urõgouf nigin fau ifeneif.

20 Are ãgem to urõgouf, ãgenei Temeĩ nẽ Awa Uur ĩ yogo ã bunem wogõ youf.

21 “Tura fã youf, tura nigin kiwai fen, idegẽ di, laa bun inenẽf, tamag naal ado age difouf, kesu fã douf, idi neid sina tama nigin kiwai dino fen, idi dogo laa bun dinenẽdiyof.

22 Tamo ganan idi, aya nigin fau kiwai difeneif, anĩ ere, aib taka megeir ino ifar ile idikeleya bun ouf, Negur isennẽf.

23 Teneub taka bun, ã darau odug difeneif are, uyu takã uyag uleg. Aya momoi arokeneik, ã fau Israel neid taun ganan bun to uyõg udikeleg mog, Tamo Naal kel isiyouf.

24 “Skul kesu ĩ yogon tise to wal fouf, age fiya gen, ferfer ĩ yogon marau to wal fouf.

25 Skul kesu ĩ yogon tise genẽf, are de. Takag, kabĩ tamo ĩ yogon orowa genẽf, are de. Fõ anĩ tama yana dun Belsebub,† anĩ nigin, fõ anĩ tamo ganĩ be dibodok idi yeneid sane bagai dalef!

Negur Dogol Kumĩ Fiyẽya
(Luk 12:2-7)

26 “Age fiya nigin, ã idi to kumĩ wedig. Gama ereb ein dede fiya yenek, are fau lelek falauf, gama ereb iminẽyan yenek, are dum fau keleĩ youf.

27 Gama ereb aya gugum bun wogõ ayeik, are fau gaa lalan bun wogõ gouf bagai; gama ereb kosesẽyam

karĩ gef, dum fau fõ agaran ufareg fen, uweigig urõgouf bagai.

28 Idi bouwa dukesif, anĩ ere, malakanon yukesiya kisin sã anĩ to kumĩg. Anĩ ere, taka ĩ malakanon bouwa ado yũ orok fe, hel bun irãya kisi feleya anĩ dogol kumĩ gouf.

29 Fisisir uru ten toea nem na nigin sur gedig. Anĩ ere, ãgenei Temeĩ yogon wau to irõ mog, taka tenebur to kubũ youf.

30 Ægenei mudureĩ bun fatiyeĩg ganan iwes yalen.

31 Age fiya nigin, to kumĩg, ã Negur mala bun safina odug bagai, fisisir musei wal fediya.

Kristus Nigin Kurõ Fesiya Ado Wa Fiya

(Luk 12:8, 9)

32 “Aibem taka aya nigin tamo meleid bun kurõ falaisiyouf, ayag ĩ nigin neu Dei saa ilun ibodok wagen kurõ afalaisiyouf.

33 Anĩ ere, aibem taka aya nigin tamo meleid bun wa fouf, ayag ĩ nigin neu Dei saa ilun ibodok wagen wa afouf.

Wau Inosiya Sã, Anĩ Ere, Soworu
(Luk 12:51-53; 14:26, 27)

34 “Æ to kisi eig wog, aya tenebur ein wau inosiya irou isiya nigin asin gouf. Aya wau inosiya irou isiya nigin to asin, anĩ ere, aya soworu irou isiya nigin asin.

35 Anĩ nigin, aya tubi kobõ fiya nigin asin,

“Tamo ĩ tama nigin kiwai inouf, ne barai yogon sina nigin kiwai inouf, yanawau ĩ sina yana nigin kiwai inouf.

36 Tamo nẽ kiwai are, de tamo anĩ nẽ ibor bun tamalem fã de fen, kiwai difenẽf.’

37 “Aibem taka ĩ, yogon tama sina nigin wau fatuk ifen ken, aya nigin to age fef, ĩ aya dõ fiya nigin to kisi falauf. Aibem taka ĩ, yogon naal be, ne barai be wau fatuk ifen ken, aya

† 10:25: Belsebub are Satan nẽ yana taka.

nigin to age fef, ï aya dō fiya nigin to kisi falauf.

³⁸ Aibem taka ï, yogon aa tetek orowa to sef fen, aya dō fiyaf, areg aya dō fiya nigin to kisi falauf.

³⁹ Aib taka tenebur ein nē mata alouf ye fen imirek, yogon mata fō yalouf. Aib taka yogon mata aya nigin irailef, yogon mata kel yalouf.

*Mala Solo
(Mak 9:41)*

⁴⁰ “Tamo aibem ã yaleyeik, are aya yaleyaf, tamo aibem aya yaleyaf, are aib ï aya sur fiyan ï yalef.

⁴¹ Aibem taka ï, ï profet nigin ye fen, profet taka yalef, ï profet mala yalouf, aibem taka ï, ï madur tamo nigin ye fen, madur tamo taka yalef, ï madur tamo nē mala yalouf.

⁴² Aibem taka, naan medir kap tekelei, tamo yeneid sã anï taka ifen yãf, ere nigin, ï neu dō fiya tamo, aya ã momoi arokeneik, ï yogon mala solo to bagai wal fiyëf.”

11

*Jesus, Jon Naan Igunēdiya Tamo Ado
(Luk 7:18-35)*

¹ Jesus yogon dō fiya tamo tuwelf tai feid bure fel fen, anenem tokō fel, Galili taun taka taka bun ifelneïd fen, biya od wogō fediyouf nigin ilen.

² Age fe di, Jon naan igunēdiya tamo kalabus bun ibod ken, Kristus kabï agef yalef de di, od anï karï yen, Jon yogon dō fiya tar Jesus to difiyëf nigin

³ sur fedi di, dilen, to difiyen, “Tamo isiyouf den, ò ogo yeir de? Oo amã fau taka nigin tari mafouf?”

⁴ Jesus aitedin yalen, “Kekug uleg fen, ã wedereim karï gel, meleim ulegel anï Jon wogō wiyëg,

⁵ meleid ifofakelen kelë def, to diyon mogo diyok, lepra dagi adon mogo el fedin, wedereid daabun od karï def, gare den turï fedif, maleg bun biya od wogō fedif.

⁶ Tamo aya nigin wau to firagagaũ fef, Negur ï el fiyek.”

⁷ Jon nē dō fiya tamo ditornē dilele di, Jesus, tamo kayau guru difen anidi, Jon nigin irokenēdiya anï gariya inon, “Å ere bagai anï ulogouf nigin, gerere tuan ulegen? Å unin yaum walala fe di, ulogouf nigin ulegen de?

⁸ Anï sãf are, ere bagai ã ulogou fenē, ulegen? Tamo taka kolos biya bagai ifonun de? Sã, idi kolos biya bagai difonuk age fiya are, king nē fō bun dibodok.

⁹ Ba, ere bagai anï ã ulogou fenē, ulegen? Profet taka de? Are de yeir, aya ã arokeneik, ï profet wal fediya.

¹⁰ Tamo anï, ï nigin Negur nē Ito-toya bun eig ye itoton:

“ ‘Aya neu arũ tamo sur afe di, ï ket uyu ilauf,
im uyulil ogon naab dodok fouf.’* ”

¹¹ Aya ã momoi arokeneik, kayau onoudi kesu dalen idi atun an, taka nem Jon naan igunēdiya tamo to wal difiyen, anï ere, aib taka saa tanon yana naal bagai ado ï Jon wal fiya.

¹² Jon naan igunēdiya tamo in sain bunem isi gama, saa tano, megeir ado bilalaũ fedig, megeir ado tamom saa tano anï irou irouledig.

¹³ Profet ganan Moses nē Lo ado, saa tano nigin profet od wogō def disin, isi Jon bun daun.

¹⁴ Å walogou fenē wauï oroïf are, ï Eliya, ï fau isif ya anï.

¹⁵ Aib ï weder adouf, karï youf.

¹⁶ “Tamo kayau sain enei bun, idi nigin ere bunem aya kisi afouf? Idi simom maket modoũ bun dibod ken, abob diweignēdidig gen:

¹⁷ “ ‘Amã ã nigin kelel maun,
anï ere, ã to kui gen;

amã kanon seg malen,
anï ere, ã to wauï gudũ fen.’ ”

¹⁸ Anï Jon isin, saaf to yon, wain to yon, idi dirōdig, ‘Ï kaa sane ado.’

¹⁹ Tamo Naal isin, saaf yon, wain yon, idi dirōdig, ‘Eï saaf wan, wainei

* 11:10: Malakai 3:1

yedig, dobu irāya tamal, ī, takis ya-leya tamo, mosor tamo ado geid nugal difedig.’ Anī ere, kisi biya ī in tobonunā anī bunem, biya yaoref.”

Taun Tunī Waud Faleiya Sā Nigin Isisnēdin
(Luk 10:13-15)

²⁰ Jesus ī, taun tunī bun memelik musei inodin, anī ere, idi waud to falei den, anī nigin, Jesus ou fiyēdin.

²¹ “Korasin taun, ō malalon ado! Betsaida, ō malalon ado! Ā bun memelik musei anodin, age fiya gen anī Taia taun Saidon taun ado bun wō yem are, mogo kulu waud falei de fen, wau gudū fiya nē gabar difoun ken, aasur dibodom.

²² Anī ere, aya ā arokeneik, es fiya sain bun, morō Taia taun Saidon taun ado dalouf anī wal fiya, ā walougouf.

²³ Ō Kapenaum, ō yanā anī saa ilun iselauf de? Sā bagai, ō laa neid modoū bun usilauf. Memelik ō bun wō yen anī age fiya, Sodom taun an wō yem are, ī gamag eig fe di, ibodom.

²⁴ Anī ere, aya ā arokeneik, es fiya sain bun, morō Sodom yalouf anī wal fiya, ō walouf.”

Morō Ado Aya Bun Usi, Waū Unois
(Luk 10:21, 22)

²⁵ Sain anī bun, Jesus iron, “Dei, saa ado teneub nē Odug, aya ō yanā alesef, ere nigin, safina eneidi, kisi biya ado keleī adodo to dilouf nigin ō unokon, ago fen, simō dibodon anidi bun yaor won.

²⁶ Ariya, Dei, enī are ogon waū filolō fiya biya bunem agon.

²⁷ “Ereb ererb ganan, neu Dei ī aya bun inon. Taka nem Naal keleī sā, Dei yogo dogol. Taka nem Dei keleī sā, Naal yogo, tunī idi Naalum Dei ifelnēdiyof nigin igirnēdif anidim dogol keleī.

²⁸ “Ā ganan morō yei ken, sii yeik, wageun usig, ago ge di, aya wau inosiya afeneīf.

²⁹ Neu sū waleg, oroweī seg fen, aya bun keleī walougouf, ere nigin, aya molol fen, aya imatkesiya. Ago gouf, meleīkanon siwo inoya gurug fouf.

³⁰ Ere nigin, neu sū karika fen, neu morō yal bagai.”

12

Jesus, Ī Sabat Naa Nē Odug
(Mak 2:23-28; Luk 6:1-5)

¹ Sain anī Juda neid Sabat naa* bun, Jesus wit kabī atu atu iyok ilen. Jesus in dō fiya tar naū feid fen, wit tunī gei fiya gariya dino fen, don.

² Farisia tamo idi anī dileid fen, idi Jesus dirokenen, “Ulef! On dō fiya tamo tar idi, itāfiya difodul ken, Sabat naa bun oug difef.”

³ Jesus aitedin yalen, “Dawid in kusī tamo anidi geid naū fedi di, Dawid age fen anī, ā Negur nē Ito-toya bun to uwesegen de?

⁴ Ī Negur nē fō namen ilen, agef fen, ī in kusī tamo anidi geid, bret fateul anī don, anī idi age fiya kisi feleya sā, anī idi itāfiya difodul ken, age difen anī, prisem sā age difoū nē anī.

⁵ Oo ā Lo od anī to be uwesegen de? Are Sabat naa bun, pris tempel namen kabī dalef bunem naa anī didodok, anī ere, anī mosor sā.

⁶ Aya ā arokeneik, tekelei ī tempel wal fiya anī, are yeir.

⁷ Ā od enī, ‘Aya wau ifenēya anī orouf, sesewi fiya sā,’† anī nē gariya keleim are, ā tamo morō sā ege mosor ado to wiyēdigem.

⁸ Ere nigin, Tamo Naal yogo dogol Sabat naa nē Odug.”

Tamo Taka Ima Sitakā Gege Fefu Fiya

(Mak 3:1-6; Luk 6:6-11)

⁹ Jesus modoū anī itor ken, iyok ile, Juda neid uub fō namen ilen,

¹⁰ tamo taka ima sitakā gege fefu fen, ī an ibodon. Idi Jesus bouwa bun od dinou fenē nigin naab dimir

* 12:1: Sabat naa anī, Juda neid uub nē naa. † 12:7: Hosia 6:6

ken, abugā to difiyen, “Sabat naa bun tamo madur fiya anī idodōya sā de?”

¹¹ Jesus idi irokenēdin, “Ā anī taka, ā atun ī sipsip taka ado anī Sabat naa bun mekur isilauf, ā to uleg waleseg unenēgouf de?”

¹² Tamo ī sipsip wal fiya bagai! Anī nigin, biya anī Sabat naa bun age tafef, are idodōya sā.”

¹³ Age ye fen, ī tamo anī irokenen, “Imā fara wol.” Age ye di, ī ima fara fele di, oditekei ima madur len, age fe di, ima sitakā gen wō yen.

¹⁴ Anī ere, Farisia tamo idi dilelel fen, Jesus yukesiya nigin katō difen.

Kabī Tamo Negurem Igirnen

¹⁵ Idi neid kisi kelei ken, Jesus modoū anī itoron. Tamo kayau mu-sei ī dō difiyē di, ī idi neid dagi ganan el fedin,

¹⁶ tamo kayau ganan wedereid iroun, ī aib yeya anī to yaor difouf nigin.

¹⁷ Enī Negur, profet Asaia bunem eig ye wogō yen anī kisi falauf nigin, agef wō yen:

¹⁸ “Eī neu kabī tamo ayam agirnen, ī nigin aya wau laa fedig, ī nigin aya wau kulī yedig;

aya neu Awa Uur ī bun anouf, ī anī teneub ganan haiden bun Negur nē madur bagai anī kurō fesiyouf.

¹⁹ Ī to seye ye fen, ait bagam to iweig irōf; takam in ait naabur to karī youf.

²⁰ Werī felu reya ī to were fouf, takag, lalan komomor fe mog, ī to gare falauf, agef mog, Negur nē madur bagai anim ganan wal fouf.

²¹ In yana bun, teneub ganan haiden, idi neid waud an yenēf.”[‡]

Jesus Belsebub Ado Difiyen (Mak 3:20-30; Luk 11:14-23)

²² Tamo taka kaa sanem irou di, mala sigor ado ifofakelen, idi anī

dirousi di, Jesus ī el fiyen. Age fe di, ī mala kelē ye fen, od wogō yen.

²³ Tamo kayau adok waud bun terē de fen, diron. “Enī anī Dawid Naal de?”

²⁴ Anī ere, Farisia tamo idi karī de fen, diron, “Are kaa sane neid mudur Belsebub yana bunem dogol, tamo enī kaa sesen irudif.”

²⁵ Jesus idi neid kisi kelei ken, idi irokenēdin, “Tano ganan yogo kiwai ifen ken, fara fouf, are sane lauf, taun ganan bun be, fō ganan bun be, idi dogo fara difouf, idi to difarauf.

²⁶ Satan ī yogo Satan iruf, ī yogo nigin faraf, yogo kiwai ifenek, naig fe fen, anī yogon tano ifarauf?

²⁷ Are aya Belsebub yana bunem kaa sesen arudif, ere bunem āgenei tamo kayau kaa sesen dirudidig? Anī nigin, idim ā es diyeif.

²⁸ Anī ere, aya Negur nē Awa Uur bunem kaa sesen arudif are, Negur nē tano mogo ā bun isil.

²⁹ “Takag, taka megeir ado nē fō bun ile, in safina bē yalou fenē, are ī tamo megeir ado anī ket ifokel fen, gama ī in safina fō bun bē yalouf.

³⁰ “Taka ī aya to fedē fiyaf, ī neu kiwai, takag, taka ī aya ado to guru mafef are, ī firagagaū fef.

³¹ Anī nigin, aya ā arokeneik, mosor kono fiya ado ganan tamo bun wō yef, are yalelauf, anī ere, Awa Uur kono fiyek, are mosor to yalelauf.

³² Taka ī Tamo Naal nigin kiwai ifen ken, kobu yef are, in mosor yalelauf. Ani ere, taka ī Awa Uur Fateul nigin kiwai ifen ken, kobu yef are, in mosor to yalelauf, gama sain enī bun ado dumen isiyouf buneg to yalelauf.

Aa Taka Yogon Faat Ado (Luk 6:43-45)

³³ “Aa biya are faat biya yūdig, aa sane are faat sane yūdig, anī nigin, aa ganan faat bunem keleiyadig.

³⁴ Ā, gogour sane gere tar, naig fe di, ā sane anim ā biya nigin wogō

[‡] 12:21: Asaia 42:1-4

gouf? Ereb ā namein isokosef, are sigoreim kaaresi gef.

³⁵ Tamo biya, safina biya ī bun kuru fef anī irou isidig, age fe di, tamo sane, safina sane ī bun kuru fef anī irou isidig.

³⁶ Anī ere, aya ā arokeneik, tamo idi od kisi sā wogō den anī ganan, fau es fiya sain bun, idi fau dogo Negur mala bun, mugu mugu kurō difesiyouf.

³⁷ Anī nigin, ogon od bunem ō mosor sā yōf, ogon od bunem ō mosor ado yōf.”

Jona Nē Uris

(Mak 8:11, 12; Luk 11:29-32)

³⁸ Age fe di, Farisia tamo tunī, lo ifelnēdiya tamo tunī geid, idi Jesus dirokenen, “Tise, amā ō bun memelik nē uris taka mailau fenē.”

³⁹ Jesus aitedin yalen, “Sane se-seirā ibor, sain enei nē tamo kayau anī, memelik nigin to difef! Anī ere, taka to ifelneif, de profet Jona nē uris anim dogol ifelneif.

⁴⁰ Ere nigin, Jona naa towo bō towo, gau odug namen ibodon, age fiya gen, Tamo Naal naa towo bō towo, teneub akor ilon yenēf.

⁴¹ Niniwe tamo kayau fā de fen, es fiya naa bun, ibor enī, sain enei nē tamo kayau sane difiyēdiyof, ere nigin, idi mogo Jona wogō ye di, waud falei den, gama taka Jona wal fiya are yeir.

⁴² Kuin Saut tamal fā ye fen, es fiya naa bun, ibor enī, sain enei nē tamo kayau sane fiyēdiyof, ere nigin, kayau anī, King Solomon nē keleī biya karī youf nigin teneub idiyān tamal isin, gama taka King Solomon wal fiya are yeir.

Kaa Sane Kel Isiya Gen

(Luk 11:24-26)

⁴³ “Sain kaa sane tamo bun tamal ulō yeis fen, gerere tuan ile, si inoya modoū imirek ile to fotou fef.

⁴⁴ Agef fen, ī irok, ‘Aya fō atoron anī bun baban kelauf.’ Sain ī kel isif, fō anī daku, wāi difel fen, madur difen anī ilef.

⁴⁵ Anī nigin, ī ile fen, baban kaa sesen ī wal fiya sewen anī geif irou isif, age de fen, idi namen dile, an difaref. Age dife di, tamo anī gai sane bagai lef, uruwa bun ne tobonunā anī wal fiya. Age fiya bagai, sain enei nē tamo kayau, ibor sane enī gama difaref, idi tobonunā anī adouf.”

Jesus Sina, Tura Tar Geid

(Mak 3:31-35; Luk 8:19-21)

⁴⁶ Sain Jesus tamo kayau wogō feid mog, in sina tura tar geid serē difar fen, ī geid od wogō douf nigin orodin.

⁴⁷ Takam ī irokenen, “Ogon sinā turā tar geid serē difaref, idi ō geid od wogō dou fenē orodif.”

⁴⁸ Jesus aiten yalen, “Ai anī neu naai, ai anī neu turau tar?”

⁴⁹ In dō fiya tar bun imam ifelneid fen, ī iron, “Enidi anī neu naai, neu turau tar.

⁵⁰ Taka ī, neu Dei saa ilun ibodok anī nē oroya dōf age fef anī ī, neu turau, neu mainou, neu naai.”

13

Faat Irarāya Tamo Nē Yaab Od

(Mak 4:1-12; Luk 8:4-10)

¹ Naa de anī bun, Jesus aaben tamal kutū yeis ile, daliyou sirin ibodon.

² Guru fiya odug kalilī difiyē di, tamo kayau adok ubun difar mog, ī waag namen isil ibodon.

³ Agef fen, erēb erēb musei yaab od nem irokeneid fen, iron, “Kabī marau taka, faat irarāf nigin ilen.

⁴ Sain ī irarak ile mog, tunī naab luwen kuku ren, are ninā disi dakasin.

⁵ Tunī meein tuar kuku ren, an teneub badagar. Are kaisā bagai fokū den, ere nigin, teneub are badagar bagai.

⁶ Anī ere, sain gaa ise di, bali are ilala di, laasi yedin, ere nigin, idi warumutei sā.

⁷ Faat tunī malū duri atun kuku ren, are malū duri anī fā ye fen, bali sile feledin.

⁸ Faat tunī teneub biya bun kuku ren, are idi biya imadin, taka biya

hundred, taka biya siksti, taka biya teti age fef ilauf.

⁹ Aib ī weder adouf, karī youf.”

¹⁰ In dō fiya tar ī wagen disi to difiyen, “Ere nigin ō yaab od nem tamo kayau urokenēdif?”

¹¹ Jesus aitedin yalen, “Saa tano nē waa keleī youf nigin are mogo ā ifenein, anī ere, tamo kayau to ifenēdin.

¹² Ereb taka aib ī ado are, anī wal fiya ifenēf, anī ī musei adouf. Ereb taka aib ī sā, erab erab ī ado areg ī bun yalelauf.

¹³ Anī nigin, aya yaab od nem arokenēdif, ere nigin,

“Idi meledim diledig, anī ere, idi meleid fokōya sā,
idi wederedim karī dedig, anī ere, idi wedereid fokōya sā, to keleik.

¹⁴ Idi bun, Asaia nē profet od kisi felef:

“‘Ā wedereim karī gouf, anī ere, wedereī to fokō youf,
ā meleim ulogouf, anī ere, meleī to fokō youf.

¹⁵ Ere nigin, tamo kayau enei, idi waud katī felen,
idi wederedim karīya malai bagai,
age de fen, idi meleid difofakelen,

age fiya sam are, idi meledim dilem, wederedim karī dem ado,
idi waud fokō ye fen,

falei de di, aya idi el afedim.”*

¹⁶ Anī ere, āgenei meleī nigin el fedif, ere nigin, ā ulegēf, āgenei wedereī nigin el fedif, ere nigin, ā karī gef.

¹⁷ Anī aya ā momoi arokeneik, profet musei, madur tamo geid, ā ulegēf anī dilou fenē nigin waud yenen, anī ere, idi meledim to dilen, takag, karīya ā karī gef anī karī dou fenē nigin waud yenen, anī ere, idi wederedim to karī den.

Jesus Faat Irarāya Tamo Nē Yaab Od Faded Fen
(Mak 4:13-20; Luk 8:11-15)

¹⁸ “Yaab od bun, faat irarāya tamo nē gariya anī karīg:

¹⁹ Taka ī, saa tanon nē od karī ye fen, ī weder to fokō yef, sane taka isi, faat yogon wau bun iraran anī son fiyek. Are faat naab luwen iraran anī age fiya.

²⁰ Takag, faat meein tuar kubū yen are, tamo ī od karī ye fen, kaisā bagai ī od anī yale fen, wau bun kulī yef.

²¹ Anī ere, ī warumutei sā, anī nigin, ī sain meluk to ibodōf. Sain, biya od nigin morō be, kafī fiya be isif, ī kaisā bagai irofosisif.

²² Takag, faat taka malū duri atun kubū yen are, tamo ī od karī yef, anī ere, tenebur mata ibodōya nē sii fiya, safina ado ibodōya nē kisi fiya anidim, biya od sile fe di, anim biya to yūf.

²³ Takag, faat teneub biya bun kubū yen are, tamo ī od karī ye fen, fokō yef, are ī biya yūf, taka biya hundred, taka biya siksti, taka biya teti agef imauf.”

Lili Nē Yaab Od

²⁴ Jesus yaab od taka irokenēdin, “Saa tano ī, tamo taka yogon kabī bun, wit faat biya iraran gen.

²⁵ Anī ere, tamo adok mulaī den mog, yogon kiwai isin, lili wit kabier irara ken, agef yen ilen.

²⁶ Sain wit bali fokū ye fen, biya olili den, agef mog, lilig wowā den.

²⁷ “Marau nē kabī tamo, ī wagen disin diron, ‘Tamo biya, ō faat biya on kabier to uraran de? Lili anī nainenem disin?’

²⁸ “Ī aitedin yalen, ‘Kiwai takam age fen.’

“Ne kabī tamom to difiyen, ‘Amā mele anī kususu mafelauf anī ō oroyok de?’

²⁹ “Ī aitedin yalen, ‘Sā, ere nigin, lili kususu ge mā, ā wit ado kususu gouf.

³⁰ Malakaī, weim difar mog, fau kusu fiya sain bun. Sain anī bun, aya kususu fiya tamo arokenēdiyof: Lili ketem kurug fen, ufafāg, dum yakur

* 13:15: Asaia 6:9, 10

feid isaikalauf nigin; agog fen, wit kurug, neu kin gurig uleg.’”

*Masted Faat Yis Ado Nē Yaab Od
(Mak 4:30-32; Luk 13:18-21)*

³¹ Jesus yaab od taka irokenēdin: “Saa tano ī, masted faat tamo takam yale fen, yogon kabier itenen gen.

³² Anī ī faat ganan nigin naal bagai, anī ere, ī odugouf, ī kabier saaf ganan wal fediya aa wō youf. Age fe di, ninā ilun temeleid disi, were bun dibodōf.”

³³ Jesus baban yaab od taka irokenēdin: “Saa tano ī, yis kayau takam yale fen, flawa odug ado falei fe di, ganan gē yedig gen.”

³⁴ Jesus od enī ganan, yaab od nem tamo kayau wogō fiyēdin. Ī od ganan to kurō falaisi irokenēdin, yaab od nem dogol.

³⁵ Anī bunem, Negur profet bunem eig ye wogō yen anī, agef kisi felen:

“Aya yaab od bunem sigoroum kurō afesiyouf,
gariya bun teneub ino fen, ereb ereb inokakan anī aya yaor afouf.”†

Jesus Lili Nē Yaab Od Faded Fen

³⁶ Jesus tamo kayau itorneīd fen, fō namen ilen. In dō fiya tar ī wagen disi fen, diron, “Kabier lili nē yaab od anī, amā faded wamā.”

³⁷ Jesus aitedin yalen, “Tamo tekelei faat biya iraran, are Tamo Naal.

³⁸ Kabī are tenebur tamo kayau, faat biya anī, are Negur nē tano nē gere tar, lili are Satan nē gere tar,

³⁹ kiwaim lili iraran, are Satan. Kusu fiya are saa teneub ado idiyēf bun, kusus fiya tamo are idi engel.

⁴⁰ “Anī nigin, lili kusus feid, yā yakur feid isaikalauf, age fiya gen, saa teneub ado idiyēf bun, age foug.

⁴¹ Tamo Naal ī, yogon engel sur fediyouf, idi yogon tano bun ereb ereb ganan mosor dinodig ado, tamo kayau ganan sane age difedig gei difeid fen, dalelnēdiyof.

⁴² Idi yā mala bobo rouf bun dirarāf, an inā odug ado firi de fen, goboreid kikokō youf.

⁴³ Age fe di, madur tamo idi, gaa gen nedi Temeid nē tanon fula difoug. Aib ī weder adoug, karī youf.

*Safina Biya Bagai Inokon Ado
Maaī Tuwa Meli Bagai Pel Nē Yaab Od*

⁴⁴ “Saa tano ī, safina biya bagai kabier inokon gen. Tamo taka fotou fe fen, baban kabier inokon. Agef fen, wau al fef ile, safina adok ī ado anī, na nigin sur fe fen, akor anī na yalen.

⁴⁵ “Takag, saa tano ī, na yaleya tamo, maaī tuwa meli bagai pel biya, na nigin imirek gen.

⁴⁶ Ī meein medeīya taka moni odug nē anī fotou fe fen, ile, safina adok ī ado anī na nigin sur fe fen, meein medeīya anī na yalen.

Kakāg Nē Yaab Od

⁴⁷ “Takag, saa tano ī, kakāg daliyou bun gau bou fire fire gei fiya nigin dirādig gen.

⁴⁸ Sain kakāg isokose di, gau yaleya tamo dī dife, ubun ise di, anī idi dibod ken, gau biya gei de, karam namen difeid fen, sesen anī are dirarailen.

⁴⁹ Age fiya bagai, saa teneub ado idikalauf bun eig foug. Engel idi disi fen, idi madur tamo atun sesen anidi gei de dale,

⁵⁰ yā mala bobo ref bun dirarāf, an inā odug ado firi de fen, goboreid kikokō youf.”

⁵¹ Jesus to fedin, “Ā od enī ganan wedereī fokō yef de?”

Idi diron, “Yo, amā karī mauf.”

⁵² Jesus idi irokenēdin, “Anī nigin, lo ifelnēdiya tamo ganan saa tano nigin ifelnēdin are, idi fō tama gen, ī safina biya nē aaben tamal safina mata tubu ado irou isidig.”

Profet Yana Sā Gen

(Mak 6:1-6; Luk 4:16-30)

⁵³ Jesus yaab od eneidi bure fel fen, anenem iyok ilen.

† 13:35: Sam 78:2

⁵⁴ In fō gariyan isi fen, ī an tamo kayau dogo neid uub fō bun ifelnēdin, age fe di, idi terē den. Idi to difen, “Tamo eī, kisi biya ado memelik nē total enei, nain yalen?”

⁵⁵ Ī kapenta naal sã de? In sina Maria sã de? In tura tar Jems, Josef, Simon, Judas ado sã de?

⁵⁶ In main tar ganan, ada weim to tabodok de? Tamo enī enei ganan nain yalen?”

⁵⁷ Age de fen, idi ī kiwai difenen.

Anī ere, Jesus idi irokenēdin, “Profet taka ī, in fō gariyan ado in fō bun dogol, ī yana sã.”

⁵⁸ Ī an memelik musei to inon, ere nigin, idi to momoi den.

14

Jon Naan Igunēdiya Tamo Ula Gudū Fen

(Mak 6:14-29; Luk 9:7-9)

¹ Sain anī bun, Galili nē uyu irouya Herod Jesus nigin od karī ye fen,

² in kabī tamo irokenēdin, “Enī Jon naan igunēdiya tamo, ī laa fen anī kel fã yen! Anī nigin, memelik nē total ī bun kabī yalef.”

³ Kulu Herod, in tura Filip nē aiwa, Herodias nigin, Jon yale ifō, kalabus bun inenen.

⁴ Ere nigin, Jon ī irokenēdig, “Ō itãfiya ufodul ken, turã nē kayau walen.”

⁵ Herod Jon yukesiya nigin wau yenen, anī ere, tamo kayau kumī fedin, ere nigin, idi ī profet taka dedig.

⁶ Herod sina gō fen anī nē naa bun, Herodias nē barai seg kui ye fen, dole kenēdi di, Herod wau al bagai fen.

⁷ Age fe di, ī wau adok kuturol fen, ne barai ereb taka nigin to fouf, de anī bagai ifenēf yen.

⁸ In sinam weder te yabi di, ī iron, “Beī taka bun Jon naan igunēdiya tamo mudur uno fen, ein wanauf.”

⁹ King ī wau togun, anī ere, wau kuturol fen, tamo kayau meleid bun kurō fesin anī nigin, in oroya dōf anī

bagai ifenēf nigin wogō ye fen, tamo sur fe di,

¹⁰ Jon kalabus bun ula gudū fen.

¹¹ In mudur beī bun dino diroule, ne barai difenē di, ī sina gein irou ilen.

¹² Jon nē dō fiya tar disisi, in bouwa buru dale mū difen. Age de fen, idi dilen, Jesus dirokenen.

Jesus Faif Tausen Tamo Saaf Ifenēdin

(Mak 6:30-44; Luk 9:10-17; Jon 6:1-14)

¹³ Jesus, Herod Jon ula gudū fen anī karī ye fen, ī mugu bagai waag bun moilin ilen. Tamo kayau idi anī karī de fen, taun temeleid yedim dō difen.

¹⁴ Sain Jesus kutū yeis fen, mala iran, tamo kayau musei ileidin, ī idi nigin wau yu ken, idi neid dagi el fiyēdin.

¹⁵ Mogo bok isi di, in dō fiya tar Jesus wagen disisi diron, “Eī gerere tuan, sain mogo sa kelef. Tamo kayau susur wo di, dilalauf, ago di, idi fonō fonō dile fen, dogo neid saaf na dalouf.”

¹⁶ Jesus irokenēdin, “Idi ileya nigin kisi to yenēf. Saaf yōya nigin āgem wenēdigouf.”

¹⁷ Idi dirokenen, “Amã ein bret faif, gau uru ado dogol.”

¹⁸ Ī iron, “Wageun gurig urousig.”

¹⁹ Tamo kayau fisir bun dibodadãf nigin Jesus irokenēdin. Bret faif gau uru ado, imam yale, saa ilun itad fen, ī Negur de fiye ken, bret mumã fen. Agef fen, in dō fiya tar ifenēdi di, idim tamo kayau difenēdin.

²⁰ Idi ganan don anī kisi felen. Age fe di, in dō fiya tar, tamo kayau bret dokon, tunī ditoraran anī fito difen, karam tuwelf eweid gere fen.

²¹ Tamo bret don anī, idi faif tausen age fiya, kayau kesu geid iwesediya sã.

Jesus Naan Teteatu Iyon

(Mak 6:45-52; Jon 6:15-21)

²² Kaisã bagai, Jesus, in dō fiya tar waag bun idi ketem sitakã dilauf

nigin sur fedin. Age de mog, ĩ tamo kayau irudin.

²³ Jesus idi irud le fen, ĩ yogo arein kosē youf nigin iselen. ĩ an mugu ibod mog, bō irou isin.

²⁴ Anĩ ere, waag mogo teneub itoron gerō ifaren, yau odug fā ye di, moloun wī ye fen, waag yū di, ilef isif fen.

²⁵ Wef mog, Jesus daliyou teteatu idi gedin iyok ilen.

²⁶ Sain in dō fiya tar meleid diran, daliyou teteatu iyō mog, dile fen, idi tererē den. Idi diron, “Eĩ baraū,” kumī de fen, ui guru den.

²⁷ Anĩ ere, kaisā bagai Jesus irokenēdin, “Totol ufareg! Are ayam. To kumī wog.”

²⁸ Pita solof iron, “Odug, onom ouf are, urokana len, naan teteatu ō garan asiyouf.”

²⁹ Jesus iron, “Usi.”

Age fiyē di, Pita waag bun kutū yeis, naan teteatu Jesus wagen iyok ilen.

³⁰ Anĩ ere, ĩ yau ile fen, kumī ye di, gamai imutuk isil fen, iweig iron, “Odug, usenna!”

³¹ Kaisā bagai, Jesus ima iran, yalesne ken, irokenen, “Ō momoiya naal, ere nigin ō waū uru ado?”

³² Age ye fen, idi uru waag namen sosō de di, yau kee relen.

³³ Anĩ dile fen, idi waag namen difaren, Jesus nigin seli dabi diron, “Mmoi bagai, ō anĩ Negur Naal.”

Jesus Genesaret Oun Dagi Adodo El Fedin

(Mak 6:53-56)

³⁴ Sain idi daliyou sitakā dibal dilen, Genesaret teneub bun wō den.

³⁵ Tamo kayau fonō anĩ bun temeleid, Jesus kelei ken, idi fonō anĩ kalilī fiya fō fō ganan od dinon. Fonō fonō idi neid daga tamo guri difeid, Jesus wagen disi fen,

³⁶ idi daga tamo yogon gabar irig kobū difouf nigin, Jesus digonen.

Ganan idi ĩ kobū difen, daga fara feledin.

15

Amuyē Sā Ado Amuyē Ado (Mak 7:1-23)

¹ Sain anĩ bun, Farisia tamo tunĩ, lo ifelnēdiya tamo tunĩ geid, Jesus garan Jerusalem temeleid disi to difiyen,

² “Ere nigin on dō fiya tar, mudur ado neid tobonunā wal difedig? Idi neid imeid kulo fiya sā, saaf dōdig!”

³ Jesus solof irokenēdin, “Ere nigin ā āgenei tobonunēĩ dōg fen, Negur nē ĩtāfiya wal gedig?”

⁴ Ere nigin, Negur iron, ‘Ō sinā tamā yeneid wales,* ‘Aibem taka sina be tama be gelu fiyēf, ĩ laa bun dinenēf bagai.†

⁵ Anĩ ere, ā urōgedig, ‘Tamo taka, sina be, tama be idi bun irōf, ‘Ereb taka ō isennōya nigin ayam ifonōya anĩ, ayam Negur afenem,”

⁶ ĩ age fef anĩ bunem in tama yana seli kulō fiya nigin to age fouf, gedig. Āgenei tobonunā age fiya bunem Negur nē od to dō gedig.

⁷ Ā mala yaleya tamo! Asaia ĩ, ā nigin profet od eig ye wogō yen in od tutuk:

⁸ “Tamo kayau enidi, nedi sigoredim aya selu kulō difedig, anĩ ere, idi neid waud aya nigin gerō ifaref.”

⁹ Idi aya yanau dalesedig, are ege.

Idi neid ifelnēdiya are tamo nē keleĩ dogol dō difedig.‡ ”

¹⁰ Jesus tamo kayau iweig laisi, irokeneĩd fen, iron, “Karīg fen, wedereĩ fokōf.

¹¹ Ereb taka mayarem tamo awa kurē isilef anim, ĩ amuyē to ifenēdig, anĩ ere, erab taka namenem awa kurem ulō yesif anim, ĩ amuyē ifenēdig.”

¹² Age ye di, in dō fiya tar ĩ garan disi to difiyen, “Farisia tamo idi od

* 15:4: Eksodas 20:12; Diuteronomi 5:16 † 15:4: Eksodas 21:17; Levitikas 20:9 ‡ 15:9: Asaia 29:13

enī karī de fen, waud ò nigin to biyaf anī, ò karī wof de?”

¹³ Jesus aitedin yalen, “Aayū ganan, neu Dei saa ilun tamal im to itenanan, are warumutei ado kususufouf.”

¹⁴ Utornēdig; idi uyu irouya nigin meleid ifofakelen. Mala ifofakeleya tamo taka, mala ifofakeleya taka gim fiyēf are, idi uruwom mekur kuku douf.”

¹⁵ Pita iron, “Yaab od enī nē gariya faded wo urokanamā.”

¹⁶ Jesus to fedin, “Ā fau nene gef de?”

¹⁷ Ā to ulegedig de? Ereb taka awa gerinem te namen isilef are te ado iledig.

¹⁸ Anī ere, ereb taka awa bun wō yef are wauda bunem isedig anim, tamo amuyē ifenēdig.

¹⁹ Ere nigin, wauda bun tamal wō yef, are kisi sesen, tamo yukesiya, seseirā inoya, noli tobonunā, bē, kot bun idegēya od bou bun yūya, dumen od wogōya.

²⁰ Enī ganan anī tamo amuyē ifenēdig, anī ere, ima kulo fiya sā saaf doko anim, tamo amuyē to ifenēdig.”

Kanan Kayau Nē Momiya (Mak 7:24-30)

²¹ Jesus modoū anī itor ken, Taia Saidon ado neid teneub akoron ilen.

²² Haiden kayau Kanan tamal taka, melsā an tamal Jesus wagen isin iweig iron, “Odug, Dawid Naal, aya nigin malalon yō! Neu barai kaa sanem irou di, to biya bagai yenek.”

²³ Anī ere, Jesus od taka to solo fenen. Anī nigin, in dō fiya tar Jesus wagen disi, total bagai dirokenen, “Kayau sur wo di, ile, ere nigin, ī iweig fen, iweig fen, dō fadaf.”

²⁴ Jesus kayau aiten yalen, “Negur aya sur fiyan are, sipsip Israel atun fō delen anidi bun dogol.”

²⁵ Kayau anī isin, wagen ibor bobou fe fen, ī iron, “Odug, aya usenna!”

²⁶ Jesus aiten yalen, “Kesu nanaal neid saaf yale fen, gaū irarak kenēdiya are to biya.”

²⁷ Kayau anī iron, “Odug, are momoi, anī ere, gaū idig moroid tar tebol bun saaf dō di, momout kuku re di, dōdig.”

²⁸ Age ye di, Jesus aiten yalen, “Kayau, ò momoiya odug ado! Ogon waū irok agef ifonok.” Sain anī bun bagai, ī ne barai el felen.

Jesus Fo Tausen Tamo Saaf Ifenēdin

(Mak 8:1-10)

²⁹ Jesus an itor ken, Galili maaī yeri dō fen. Agef fen, ī arein isel ibodon.

³⁰ Tamo kayau musei wagen disin, yeid kirorōya, meleid ifofakelen, iborodim gogo dedig, aiteid ifofakelen, daga fire fire museig, Jesus ye gariyan guri dife dirou disi di, ī el fedin.

³¹ Aiteid ifofakelen od wogō den, iborodim gogo dedig madur feid difaren, yeid kirorōya diyon, meleid ifofakelen lo difen, anī ganan tamo kayau dile fen, terē den. Age fe di, idi Israel nē Negur yana dalesen.

³² Jesus, in dō fiya tar iweignēdi di, wagen disi di, irokenēdin, “Aya tamo kayau enidi nigin waud inaf, idi mogo aya geid naa towo dibodon, anī ere, gama ereb taka yōya sā. Aya, idi naū susur afedi di, dilauf anī to orouf, age afouf are, idi luwen kuku douf.”

³³ In dō fiya tar dirokenen, “Amā gerere tuan ein bret kisi feleya nain male fen, musei enī weit mafediouf?”

³⁴ Jesus to fedin, “Bret ganī ā ado?” Idi diron, “Bret sewen, gau nanaal teke tekelei ado.”

³⁵ Jesus tamo kayau tenebur dibodadāf nigin irokenēdin.

³⁶ Agef fen, Jesus, bret sewen gau ado, imam yale iroun, ī Negur de fiye ken, bret anī mumā feid fen, in dō fiya tar ifenēdi di, idi bagam tamo kayau difenēdin.

³⁷ Idi ganan don anī kisi felen. Dumen in dō fiya tar, tamo kayau

bret dokon, tuni ditoraran ani fito difen, karam sewen eweid gere fen.

³⁸ Tamo bret don ani idi fo tausen, kayau kesu geid iwesediya sa.

³⁹ Jesus tamo kayau susur feid, dilele di, i waag bun so ye, Magadan akoron ilen.

16

Farisia Tamo Sadusia Tamo Geid, Saa Ilun Ne Uris Nigin To Difen

(Mak 8:11-13; Luk 12:54-56)

¹ Farisia tamo Sadusia tamo geid, Jesus wagen disi, kisi difiye ken, saa ilun ne memelik taka meledin inouf nigin to difiyen.

² Jesus aitedin yalen, "Sain aragau isi di, a urogedig, 'Sain biyau fenē, ere nigin, saa giri yef,'"

³ bonimeidi, a urogedig, 'Gama uyē yau ado fouf, ere nigin, saa giri ye fen, budū iyokelef.' A saa bun es fiya nigin keleī bagai, ani ere, a ereb sain ne uris es fiya nigin kisi feleya sa.

⁴ Sain enei ne tamo kayau, ibor sane seseira inoya ne ani, memelik ne uris dimiredig, ani ere, taka to ifenediyouf, de Jona ne uris dogol ifenediyouf." Age ye fen, Jesus idi itorneid ilen.

Farisia Tamo Ado Sadusia Tamo Neid Yis

(Mak 8:14-21)

⁵ Sain idi daliyou sitaka dibal dilen, in do fiya tar bret yaleya nigin wedereid tu kelen.

⁶ Jesus idi irokenedin, "Lo welegei! Farisia tamo ado Sadusia tamo neid yis nigin, a lo welegei."

⁷ In do fiya tar idi dogo dogol katō de fen, diron, "I agef irok, ere nigin, ada bret to tarousil nigin."

⁸ Idi neid wogōya Jesus kelei ken, to fedin, "A momoiya naal bagai, ere nigin a bret sa ge fen, aug tutur wogō gef?"

⁹ A wedereī fau to fokō yef de? A to kari welegef, bret faif ani faif tausen don, age fe di, karam gani a kuru ge di, eweid gere fen?

¹⁰ Takag, bret sewen ani fo tausenem don, age fe di, karam gani a kuru ge di, eweid gere fen?

¹¹ A naig fe di, wedereī to fokō yef, aya bret nigin a to arokeneim de? Ani ere, a lo welegei, Farisia tamo ado Sadusia tamo neid yis nigin."

¹² Age ye di, idi mogo wedereid fokō yen, i yis bret bun dinodig ani nigin to wogō fedin, i Farisia tamo ado Sadusia tamo neid ifelnēdiya ani nigin wogō fedin.

Pita Kristus Nigin Kurō Fesin

(Mak 8:27-30; Luk 9:18-21)

¹³ Sain Jesus Sisaria Filipai nediwon isi fen, in do fiya tar to fiyēdin, "Tamo kayau Tamo Naal nigin ai dedig?"

¹⁴ Idi dirokenen, "Tuni dirok, o Jon naan igunēdiya tamo, tuni dirok, o Eliya, tuni dirok, o Jeremaia oo profet taka be."

¹⁵ Jesus to fedin, "Ba a uleg? Aya nigin a ai gef?"

¹⁶ Simon Pita aiten yalen, "O ani Kristus, O mata ibodōya Negur Naal."

¹⁷ Jesus solof iron, "El fiya o ado, Simon Jona ne naal, ere nigin, on keleī are tamo ne keleī bunem sa, are neu Dei saa ilun tamal in keleī bunem."

¹⁸ Ani nigin, aya o arokonok, o Pita,* meein eni teten neu sios anouf, laa ne megeir anim sios to wal fiyēf.

¹⁹ Aya saa tano ne ki o afonōf, ereb o tenebur ein ufok, are saa ilun ouneg ifōf, ereb o tenebur ein biru wof, are saa ilun ouneg biru fouf."

²⁰ Age ye fen, Jesus i Kristus yeya ani, aib taka to dirokenēf nigin, in do fiya tar wedereid iron.

Jesus Busuk Bun Laaf Fen, Mata Kel Fā Youf Yen

(Mak 8:31-9:1; Luk 9:22-27)

²¹ Sain ani bunem ilauf bun, Jesus yogo nigin in do fiya tar yaor fe irokenedin, i Jerusalem ilauf bagai, an darau musei, mudur adodo, pris odudug, lo ifelnēdiya tamo imeid

* 16:18: Pita, ani ne gariya, meein.

bun yalouf, an ĩ dukesiyouf, naa towo bure fele di, mata kel fã youf.

²² Pita Jesus yale, yerin irou ile ou fiyen, ĩ iron, “Odug, sã bagai! Enĩ ganan õ nigin to bagai wõ youf!”

²³ Jesus falei yel, Pita irokenen, “Satan, dumeun ule! Õ aya naabu-rau gudũ wof; on kisi are Negur nẽ sã, on kisi tamo nẽ dogol.”

²⁴ Age ye fen, Jesus in dõ fiya tar irokenẽdin, “Aib taka aya dõ fiyau fenẽ, ĩ yogon oroya lai fesil fen, ĩ yogon aa tetek faali fe fen, anĩ aya dõ fiyau.

²⁵ Ere nigin, aib taka yogon mata isennẽf nigin oro fef are, fõ yalauf, aib taka yogon mata, aya nigin irailauf are, mata anĩ gurug fouf.

²⁶ Tamo taka ĩ, teneub enĩ ganan kakarai fe fen, akorou yef, anĩ are, ĩ yogon malakanon irailauf, ere biya ĩ yalouf? Takag, tamo taka yogon malakanon nigin ere mala solof fen, ĩ kel yalouf?

²⁷ Tamo Naal, in Tama nẽ fula fiya medeĩya ado in engel geid disiyouf, agef fen, tamo mugu mugu ereb age fef anĩ kilei, ĩ mala solo age fiya bagai ifenẽdiyof.

²⁸ Aya momoi arokeneik, tunĩ ein difaref fau to gare de mog, idi Tamo Naal in tano bun isi di, dilouf.”

17

Jesus Bouwa Falei Fen

(Mak 9:2-13; Luk 9:28-36)

¹ Naa sigis bure fele di, Jesus, Pita, Jems, taka Jon Jems nẽ tura geif fen, idi mugu arei odug ilun diselen.

² An Jesus idi meleid bun bouwa falei felen. In nawa gaa gen fula felen, in kolos lalau fen, yal gen lalanan.

³ Agef mog, an idi meleid bun Moses, Eliya ado wõ de fen, Jesus weim wogõ den.

⁴ Pita Jesus irokenen, “Odug, ada ein ibodõya nigin biya bagai. Õ oroyõf are, aya salafat towo anouf, taka ogon, taka Moses nẽ, taka Eliya nẽ.”

⁵ Pita fau wogõ ye mog, lalo lalau bagai idi kerub fedin, ait taka lalo namen iron, “Eĩ neu Kesu, ĩ nigin aya wau laa fedig, ĩ nigin aya wau kulĩ yedig. ĩ karĩ wiyẽg!”

⁶ Anĩ in dõ fiya tar karĩ den, idi neweid kususur de fen, tenebur gurorõ de tererẽ den.

⁷ Anĩ ere, Jesus isin, kobũ feid fen, ĩ iron, “Fafãg, to kumĩg.”

⁸ Idi ditadsen, taka to dilen, Jesus dogol.

⁹ Idi arei bun diyok disi fen, Jesus idi irokenẽdin, “Ã ereb ulegel enĩ, aib taka to urokenẽg, fau Tamo Naal laa bun tamal kel fã ye di.”

¹⁰ In dõ fiya tar Jesus to difiyen, “Ere nigin lo ifelnẽdiya tamo dirõdig, ‘Eliya ĩ ketem isiyouf bagai’ dedig?”

¹¹ Jesus aitedin yalen, “Momoi bagai, Eliya isi fen, ereb ereb ganan madur fediyouf.

¹² Anĩ ere, aya ã arokeneik, Eliya mogo isi bure felen, idi anĩ ĩ nigin to kelei ken, ereb ereb ganan idi waud iron kilei, ĩ nigin mogo age difen. Age fiya gen, Tamo Naal idi imeid bun darau yalouf.”

¹³ Jesus age wogõ ye di, in dõ fiya tar idi wedereid fokõ yen, Jon naan igunẽdiya tamo nigin irok den.

Jesus Kesu Kaa Sane Ado El Fiyen *(Mak 9:14-29; Luk 9:37-42)*

¹⁴ Sain idi tamo kayau gedin disin, tamo taka Jesus wagen isi fen, ibor bobou fen.

¹⁵ ĩ iron, “Odug, neu kesu nigin malalon yõ. ĩ mir yuk sain, sane bagai firi ye fen, sain musei yãg iledig, naanũg iledig.

¹⁶ Aya, ĩ, on dõ fiya tar wagedin arou elen, anĩ ere, idi el fiyẽya kisi feleya sã.”

¹⁷ Jesus solof iron, “Sain enei nẽ tamo kayau, ibor enĩ, sane, momoiya sã, sain ganĩ aya ã geid tabodõf? Sain ganĩ aya ã nigin wau aukesilauf? Kesu wageun ein urousig.”

¹⁸ Jesus kaa sane ou fiyẽ di, kesu bun tamal ulõ yeis ile mog, kesu ĩ bou karika len.

¹⁹ Age fe di, in dō fiya tar mugun Jesus wagen disi to difiyen. “Ere nigin amā kaa sane iruya kisi feleya san?”

²⁰ Jesus irokenēdin, “Ere nigin, āgenei momoiya naal bagai nigin. Aya momoi arokeneik, ā momoiya naal masted faat age fiya adouf are, ā arei enī urokenēgouf, ‘Ein tamal godo urou ule, oun ufar,’ ago ge di, ī dōf age fouf. Ereb ereb ganān ā age fiya kisi feleya.”*

*Jesus Baban In Laa Nigin Iron
(Mak 9:30-32; Luk 9:43-45)*

²² Sain idi disi, Galili guru difen, Jesus idi irokenēdin, “Tamo Naal ī fau tamo imeid bun dinouf.

²³ Idi fau ī dukesiyouf, anī ere, naa towo bure fele di, ī fau baban mata kel fā youf.” Age ye di, in dō fiya tar waud morō gudū fesin.

Tempel Nē Takis

²⁴ Jesus in dō fiya tar geid, Kape-naum taun disi di, tempel takis ya-leya tamo, Pita wagen disi to difiyen, “Āgenei tise tempel nē takis to inodig de?”

²⁵ Pita iron, “Ariya, ī takis inodig.”

Sain Pita fō namen isi di, Jesus ket wogō yen, “Simon, ō ere kisi wof? Ai bunem tenebur nē king anidi takis daledig, idi neid kesu bunem de, oo tamo tunī bunem?”

²⁶ Pita solof iron, “Tamo tunī bunem.”

Jesus ī irokenen, “Anī nigin, kesu idi bunem sā.

²⁷ Anī ere, adam idi waud saneya to tafenēdiyof nigin, ō daliyoun ule, on mū urāf. Gau uruwa walouf anī awa gede fen, an silwa koin moni ulouf, wale fen, takis ogon ado neu nigin wenēdiyof.”

18

*Saa Tanon Odug Ibodōya Nigin
(Mak 9:33-37; Luk 9:46-48)*

¹ Sain anī bun, in dō fiya tar Je-sus wagen disi, to difiyen, “Aim saa tanon odug bagai ibodok?”

² Ī kesu naal taka iweignē isi di, idi atun ifarnen.

³ Agef fen, ī iron, “Aya momoi arokeneik, ā kesu nanaal gen falei gouf anī dogol, age fiya sāf are, ā saa tanon to bagai ulagouf.

⁴ Anī nigin, aib taka yogo nigin kuru kel fen, kesu enī genēf are, ī saa tanon odug bagai ibodok.

⁵ “Takag, aib taka kesu naal eig fiya, aya yanau nem yalef are, ī aya yaleyaf.

⁶ Anī ere, aibem taka age fe di, kesu aya nigin momoi def enidi taka, mosor bun kubū youf are, tamo anī meein odug guyutu bun ifo ken, maaīwō irāya nigin biya.

⁷ “Teneubur tamo kayau idi meleidlon ado, ere nigin, ereb to biya anī age fe di, tamo mosor bun dilalauf. Tobonunā age fiya bagai wō youf, anī ere, tamo nanī be bunem isif, ī malalon ado!

⁸ Ogon imam be, yem be mosor bun ineyōf are, gudū fen uraile. Ō imā tobega be, yē tobega ado mata bun ileya nigin biya bagai, ere nigin, imā totoū be, yē totoū adouf are, yā faimud ibodkeleya anī bun an dirāyōf.

⁹ Age fiya bagai, ogon malam mosor bun ineyōf are, ubodol uraile. Ō malā tekelei ado mata bun ileya nigin biya bagai, ere nigin, malā totoū adouf are, hel nē yā mala bun dirāyōf.

*Sipsip Fō Yeleya Nē Yaab Od
(Luk 15:3-7)*

¹⁰ “Ā lo welegei, kesu nanaal enidi taka to meleī irim gouf. Ere nigin, aya ā arokeneik, idi neid engel saa ilun dibodok, sain ganān neu Dei saa ilun ibodok no diledig.*

¹² “Ā ere kisi ado? Tamo taka ī wan handred sipsip ado, tekelei idi

* **17:20:** Itotoya tunī eig de ditoton: *kisi feleya.* ²¹ Anī ere, kaa sane eig fiya ege to ulō yeis ilauf, kurig fen, kosē ge di. * **18:10:** Itotoya tunī eig de ditoton: *diledig.* ¹¹ Fō delen anī kel yaleya nigin Tamo Naal isin.

atun fõ yalauf are, marau ï nainti-nain sipsip uya bun itorneïd fen, ile, tekelei fõ yelen anï to imirëf de?

¹³ Aya ã momoi arokeneik, ï fata fouf are, ï sipsip tekelei anï nigin wau kulïya odug, sipsip nainti-nain to fõ delen nigin anï nẽ kulïya wal fiya.

¹⁴ Age fiya bagai, ãgenei Temeï saa ilun ibodok, kesu nanaal enidi taka fõ yeleya nigin to orodig.

Turã Taka Mosor Inoyõf

¹⁵ “Ogon turã taka mosor inoyõf, ule ã uruwom atun dogol in kũ fenëya ufelnëf. Ì õ karï yõf, õ ogon turã mogo kel walel.

¹⁶ Anï ere, ï to karï yõf, baban tekelei be uru age fiya õ geid fen, ulagauf, ago di, ‘od ganan isennëya uruwom be, towom sigoredim kurõ difesiyouf anï megeir gouf.’†

¹⁷ Ì idi karï fediya nigin itorõf, sios urokenëf. Ì sioseg karï fiyëya nigin itorõf are, ï haiden be takis yaleya tamo sane gen unenëf.

¹⁸ “Aya ã momoi arokeneik, ereb taka ã tenebur ein ufokalagauf, are saa iluneg ifokalauf, ereb taka ã tenebur ein biru walagauf, are saa iluneg biru falauf.

¹⁹ “Baban, aya ã arokeneik, tenebur ein ã uruwom ereb taka nigin wauï tekelei fen, to gouf, neu Dei saa ilun ibodok, ï dõf ã nigin age fouf.

²⁰ Ere nigin, uruwom be, towom be, aya yanau nem guru difef, aya an idi geid mabodok.”

Kabï Tamo Wau To Yũdig Nẽ Yaab Od

²¹ Age ye di, Pita Jesus wagen isi, to fen, “Odug, neu turau aya nigin mosor inouf, sain ganï neu turau nẽ mosor nigin wederou tu kalauf? Wederou tu kelef ile, sewen daũ de?”

²² Jesus aiten yalen, “Aya õ arokonok, õ sewen dogol to agouf, sewenti anï are sewenem tobol wouf.

²³ “Anï nigin, saa tano ï, king taka, ne ferfer geid in wareg madur fiya nigin oron gen.

²⁴ King ï wareg madur fiya nigin gariya inon, tamo taka ï bun ten milion kina yalen anï, ï wagen dirou disin.

²⁵ Ì wareg anï yukesiya kisi feleya sã nigin marau iron, ï yogo ado in aiwa, in gere tar ado in safina ganana nigin sur fedi di, in wareg anï yukesiya kisi falauf yen.

²⁶ “Kabï tamo, marau wagen ibor bobou fe fen, igonen, ‘Õ aya nigin waũ unois fen, sain wana len, aya wareg anï ganana kisi afelkonõf.’

²⁷ Kabï tamo anï nẽ marau, ï nigin wau yu ken, wareg anï ganana lai fesil fen, itornë di, ilen.

²⁸ “Anï ere, kabï tamo anï oreis ile fen, ï yogon kabï tura taka fotou fen, ï bun wareg wan hundred kina ado. Ì ka fe, ula irou fen, iron, ‘Õ aya bun wareg walen anï kel wana!’

²⁹ “In kabï tura kubũ ye, ibor bobou fe fen, igonen, ‘Õ aya nigin waũ unois fen, sain wana len, aya wareg anï mala kela afonõf.’

³⁰ “Anï ere, ï to karï fiyen. Ì tamo yale irou, kalabus bun iran, are de wareg inouf anï dogol.

³¹ Anï kabï tura tar tunï, ï age fen anï dile fen, idi waud odug sanen, anï nigin, dile, idi neid marau ereb age fen anï ganana wogõ difiyen.

³² “Age de di, marau tamo, kabï tamo anï iweignë isi di, ï irokenen, ‘Õ kabï tamo sane. Aya ogon wareg ganana lai afonon, ere nigin, õ aya ugonan.

³³ Aya õ nigin wau inan gen, õ ogon kabï tura nigin waũ inõya san de?’

³⁴ In marau tamo name ise fen, darau ifenëya nigin kalabus lo fiya tamo imeid bun inenen, are de wareg ganana inouf anï dogol.

³⁵ “Age fiya bagai, neu Dei saa ilun ibodok, ã atun tureï tar neid mosor nigin wauï bun wedereï to tu kalauf are, ãg age yeïf.”

† 18:16: Diuteronomi 19:15

19

Tamo Kayau Ado Bagu Fiya Anī Fara Fiya

(Mak 10:1-12)

¹ Jesus od enidi wogō ye bure fel fen, Galili distrik itor ken, Judia distrik ilen, Jordan naan sitakã.

² Tamo kayau musei dō difiyē di, ī an idi dagi el fedin.

³ Farisia tamo tunī ī wagen disī, kisi difiye ken, idi to difiyen, “Tamo taka, yogon kayau gariya fire fire bun iruf anī, lo dō fiya de?”

⁴ Jesus aitedin yalen, “Ā Negur nē Itotoya to uweseg ulegen de? Gariya bun, Negur erēb erēb kare fedin ī, ‘tamo ino kayau ino fen,’* ”

⁵ Negur iron, ‘Anī nigin, tamo ī in sina tama itorneīd fen, in kayau ado bagu difouf, idi uruwom bouweid tekelei.’†

⁶ Age difef, idi uru sã, idi tekelei. Anī nigin, Negur tamo kayau ado bagu fedin anī, tamom to fara foug.”

⁷ Idi to difiyen, “Age fiyauf are, ere nigin Moses iron, tamo taka in kayau fara fiya nē pepa ifen ken, iru di, ilauf yen?”

⁸ Jesus idi irokenēdin, “Moses ī āgenei wauī totol anī ile fen, āgenei kayau iruya nigin to katū yein. Anī ere, gariya bun age fiya sã.

⁹ Aya ā arokeneik, aib taka in kayau seseirã inoya sã mog, kayau iru fen, kayau taka yalef are, ī seseirã inof.”

¹⁰ In dō fiya tar Jesus dirokenen, “Tamo kayau atun morō agef yenek nigin, ī kayau to yalouf are biya bagai.”

¹¹ Jesus irokenēdin, “Tamo ganān od enī dō fiya kisi feleya sã, teke tekeleim Negurem age fedif anidi dogol.

¹² Tunī idi, sineid namenem, bouweid kesu irouya nigin tutuk sã gō fedidig, tunī are tamom korō difedidig, tunī saa tano nigin kisi de fen, kayau to daledig. Tamo taka kisi

enī dō fiya nigin kisi falauf, dōf age foug.”

Jesus Kesu Nanaal El Fiya Ifenēdin

(Mak 10:13-16; Luk 18:15-17)

¹³ Jesus ima tetedin ino fen, kosē fiyēdiyof nigin, kesu nanaal ī wagen guri de dirousin. Anī ere, in dō fiya tar, idi guri de dirousin anidi ou difiyēdin.

¹⁴ Jesus iron, “Utornēdig len, kesu nanaal aya wageun disiyof, idi to katū wedig, ere nigin, saa tano are eig fediya neid.”

¹⁵ Age ye fen, ī ima tetedin inol fen, an tamal tokō fel ilen.

Tamo Gaū Safina Musei Ado

(Mak 10:17-31; Luk 18:18-30)

¹⁶ Tamo taka Jesus wagen isi to fiyen, “Tise, ere biya anī aya age afe fen, mata ibodkeleya alouf?”

¹⁷ Jesus aiten yalen, “Ō ere nigin erēb biya nigin aya to wiyaf? Tekelei ī dogol biya. Mata ibodkeleya bun ulau fenē, ō itāfiya dō woid.”

¹⁸ Tamo Jesus irokenen, “Itāfiya nanī bagai?”

Jesus iron, “Ō tamo taka to uke-siyof, seseirã to unouf, to bē walouf, ō taka nigin idegēya od to urōf,

¹⁹ ogon sinā tamā yeneid wale-sauf,‡ ō ogo nigin wau laa fef gen, nē tā niginē ago.’§ ”

²⁰ Tamo gaū iron, “Anī ganān aya dō afen, ere taka anī aya fau dō fiya sã?”

²¹ Jesus ī irokenen, “Ō madur bagai you fenēf, ule, ogon safina ganān na nigin sur wo fen, maleg tamo wenēdiyof, agouf, ō saa ilun safina biya adouf. Agol fen, usi, aya dō wiya.”

²² Od enī tamo gaū karī ye fen, ī wau morō fe di, itor ilen, ere nigin, ī safina musei ado.

²³ Age fe di, Jesus in dō fiya tar irokenēdin, “Aya ā momoi arokeneik, safina musei ado tamo, saa tanon ileya nigin malai bagai.

* 19:4: Jenesīs 1:27 † 19:5: Jenesīs 2:24 ‡ 19:19: Eksodas 20:12-16; Diuteronomi 5:16-20 § 19:19: Levitikas 19:18

24 Baban aya ã arokeneik, kamel ï gabar iwaya nẽ nil ku bun ileyã nigin karika bagai, safina musei ado tamo, Negur nẽ tano bun ileyã nigin malai bagai.”

25 Od enĩ in dõ fiya tar karĩ den, idi fatuk terẽ de fen, to difen, “Age fiyauf are, aim anĩ mata ibodkeleyã yaleyã kisi feleyã?”

26 Jesus idi lo feid fen, iron, “Tamo yogo bun age fiya kisi feleyã sã, anĩ ere, Negur yogo bun ereb ereb ganã age fiya kisi feleyã.”

27 Pita Jesus aiten yalen, “Amã ereb ereb ganã mator ken, õ dõ mayok! Ere anĩ amã nemã mala solo malouf?”

28 Jesus idi irokenẽdin, “Aya ã momoi arokeneik, ereb ereb ganã mata falei foug sain anĩ bun, Tamo Naal ï yogon king nẽ sia bun fulã fiya medeĩyã ado ibodõf, ã aya dõ wiyagef, ãg king nẽ sia tuwelf bun ubodõg fen, Israel ibor tuwelf es wedigouf.

29 Taka fõ be, tura tar be, main tar be, tama, sina, gere tar, kabĩ, aya yanau nigin itoron, idi ganã mala solo wan hundred wal fiya dalouf, mata faimud ibodkeleyã anĩ dalouf.

30 Anĩ ere, musei malabag dibodok, idi dumen dibodõf, musei dumen dibodok, idi malabag dibodõf.

20

Wain Kabĩ Tamo Neid Yaab Od

1 “Saa tano nẽ tobonunã are, teneub marau taka ï, bonimeĩ bagai ile fen, yogon wain kabier kabĩ dalouf nigin tamo oroi yaledin age fiya gen.

2 Kabĩ marau naa tekelei nigin ten kina afeneĩf ye di, idi ganã anĩ yo de di, in wain kabier sur fedin.

3 “Nain kilok bonimeĩ age fiya, ï ilen, tamo tunĩ maket modoũ bun ege difar mog, iledin.

4 ï idi irokenẽdin, ‘Ãg uleg, neu wain kabier kabĩ waleg, ago gouf, mala de afeneĩf.’

5 Age ye di, idi dilen.

“Ï baban gaa atun ado aragau tri kilok age fiya ile feneg, de age fen.

6 Aragau faif kilok age fiya, ï ilen, tunĩg fau difar mog, iledin. ï idi to fiyẽdin, ‘Ere nigin ã ege bagai gaa ganã ein ufaregel?’

7 “Idi aiten dalen, ‘Ere nigin, taka nem amã to oroi yalemam.’

“Ï idi irokenẽdin, ‘Ãg uleg, neu wain kabier kabĩ waleg.’

8 “Sain aragau di, wain kabĩ marau in kabĩ tamo neid orowa irokenen, ‘Kabĩ tamo uweigneĩd fen, dogo neid mala wenẽdiyof, dumen disil idi bun gariyã uno fen, ule, uyu disil bun ouf.’

9 “Kabĩ tamo aragau faif kilok age fiya kabĩ dalen disi fen, mugu mugu ten kina dalen.

10 Sain idi bonimeĩ nem ket iweigneĩdin anidi disin, idi kisi difen, amã idi wal fiya malouf den, anĩ ere, idig mugu mugu ten kina dalen.

11 Sain idi moni dalel fen, idi teneub marau nigin nauseir den.

12 Idi diron, ‘Tamo enidi dum bagai uweigneĩdi di, aua tekelei dogol kabĩ dalel, anĩ ere, amã, naa enĩ ganã bonimeĩ nem isi, gama yeiref, kabĩ total malel, gaa uruwa dõ famam, anĩ ere, õ amã idi geid ten kina dede wanamam.’

13 “Anĩ ere, kabĩ marau ï, idi neid taka solof irokenen, ‘Mou, aya õ sane to ayok. Õ ten kina nigin ada uruwom sigoroda to tekeleil de?’

14 Ogon kabĩ mala wale fen, ule. Aya õ afonom age fiya, tamo dum bagai oroi aleyen anĩ, de age fiya afeneĩf nigin wau irok.

15 Aya neu safina ereb taka age fiya nigin wau irok anĩ, aya to age afouf de? Aya neu biya age afef nigin, õ aya kiyeĩ wanaf de?’

16 “Anĩ nigin, idi dumen dibodok anidi malabag dibodõf, idi malabag dibodok anidi dumen dibodõf.”

*Jesus In Laa Nigin Irõ, Towo Fen
(Mak 10:32-34; Luk 18:31-34)*

17 Jesus Jerusalem iselau fenē, ī in dō fiya tar tuwelf mugu bagai gei feid fen, irokenēdin,

18 “Ada Jerusalem teselef, an Tamo Naal ī pris odudug, lo ifelnēdiya tamo imeid bun dinenēf. Idi ī laa fouf nigin bou bun od dūf.

19 Age de fen, idi ī haiden Juda sã anidi imeid bun dino di, kono difiyē, wagī difiye ken, aa tetek bun dukesiyouf. Naa towo bun, ī mata kel fã youf!”

Jems Jon Ado Neid Sineid, Ne Wau Iron Anī Jesus To Fiyen

(Mak 10:35-45)

20 Age fe di, Sebedi nē kesu uru, sineid geid Jesus wagen disin. Idi neid sineid ibor bobou fe fen, wau irok anī Jesus to fiyen.

21 Jesus to fiyen, “Ere anī ō orok?”

Kayau iron, “Ō urōf, neu kesu uru enī, ogon tano bun taka ima biyalē ibodōf, taka ima kilē ibodōf.”

22 Jesus idi irokenēdin, “Ã ereb to gef anī nē gariya, ā keleī sã, naan aya āf anī ā yōya kisi feleya de?”

Idi aiten dalen, “Amã kisi feleya.”

23 Jesus idi irokenēdin, “Ã momoi neu kap bun naan are wāgauf, anī ere, imau biyalē ibodōya be, kilē ibodōya are, ayam ifenēya kisi feleya sã. Modoū anidi are, neu Dei idi nigin dodok fen anidi neid.”

24 In dō fiya tar ten, od anī karī de fen, uru tura ado nigin seye den.

25 Jesus idi iweig laisi fen, iron, “Ã keleī, haiden idi dogo neid uyu irouya, tamo kayau lo fiya nigin total dinodig, idi dogo neid odudug, tamo kayau nigin megeir yaor difedig.

26 Anī ere, ā bun kisi to agef yenēf, ā atun aib taka odug ibodōf nigin orof, ī āgenei kabī tamo ibodōf.

27 Ā atun aib taka uyun ibodōf nigin orof, ī āgenei ferfer ibodōf.

28 Age fiya gen, Tamo Naal ī disennēf nigin to isin, anī ere, ī tamo kayau isenneīd fen, tamo kayau musei idi neid mosor anī fotokar yogon mata ifenēdiyof nigin isin.”

Tamo Uru Meleid Ifofakelen Anī Meleid Birikã Felen

(Mak 10:46-52; Luk 18:35-43)

29 Jesus in dō fiya tar geid Jeriko ditor dile mog, tamo kayau musei dō difiyen.

30 Tamo uru meleid ifofakelen naab yerin dibodon. Sain idi Jesus isi ilef yeya karī de fen, diweig diron, “Odug, Dawid Naal, amã nigin malalon yō!”

31 Tamo kayau idi ou difiyeīd fen, foro dalauf nigin dirokenēdin, anī ere, idi wade bagai diweig diron, “Odug, Dawid Naal, amã nigin malalon yō!”

32 Jesus dē yel fen, idi iweigneīd fen, ī to fedin, “Ere naig ayēif nigin ā oroyeik?”

33 Idi aiten dalen, “Odug, amã malamã fara wol kanamãf nigin oromak.”

34 Jesus idi nigin meleidlon fe fen, idi meleid kobū fedin. Kaisã bagai, idi meleid fara fele di, sã lo dife fen, idi Jesus dō difen.

21

Jesus Tamo Yana Ado Gen Jerusalem Namen Ilen

(Mak 11:1-11; Luk 19:28-40; Jon 12:12-19)

1 Idi Jerusalem kelē difiye ken, Moul Arei bun Betfage fonō wō den, Jesus in dō fiya tar uru sur feid fen,

2 ī idi irokenēdin, “Fonō wagein ifaref tokō weleg, ulō wesig fen, kaisã bagai donki ifōya naal ado uledigouf. Idi biru weledig fen, wageun gurig usig.

3 Taka nem ā ereb yeīf, ī urokenēgouf, Odug ī kabī ifenēdiyof fenē orof, ago ge di, kaisã bagai sur fediyof.”

4 Profet eig ye wogō yen anī kisi falauf nigin agef wō yen:

5 “Saion nē tamo kayau urokenēgouf, ‘Ulef, ogon king ō garan isif, imatkeis fen, donki bun ibodok, donki naal teten.’ ”*

* 21:5: Sekaraia 9:9

6 In dō fiya tar dilen, Jesus iron kilei age difen.

7 Idi donki naal ado dirousi di, tetedin idi neid gabar du difedi di, Jesus anī tetedin ibodon.

8 Tamo kayau musei, idi neid gabar naabur du difedin, tunī idi aa were kokour dife, naabur du difedin.

9 Tamo kayau uyu dilen ado, dume dō difen diweig diron, “Hosiana,† Dawid Naal bun!” “Odug yana bunem isif, ī el fiya ado!”‡ “Hosiana, saa ilun bagai!”

10 Sain Jesus Jerusalem ulō yesi di, taun anī bun tamo kayau ganan terē de fen, toti difen, “Tamo eī aim?”

11 Tamo kayau diron, “Eī Jesus, profet Nasaret taun Galili teneub bun tamal.”

Jesus Tempel Bun

(Mak 11:15-19; Luk 19:45-48; Jon 2:13-22)

12 Jesus tempel modoū bun ile, wō ye fen, na dale dile disi dife mog, an tamo kayau adok irudidin. Ī moni solo fediya neid tebol ado kuburir na sur fediya neid fatar eleg feledin.

13 Jesus idi irokenēdin, “Negur nē Itotoya irok, ‘Neu fō ī kosē nē fō douf,’§ anī ere, ā ‘bē tamo neid iminēya fō’* unogen.”

14 Meleid ifofakeleya, yeid kirorōya, Jesus wagen tempel bun disi di, ī el fedin.

15 Anī ere, Jesus ereb biya bagai age fe di, kesu nanaal tempel modoū bun diweig diron, “Hosiana, Dawid Naal bun,” age de di, pris odudug, lo ifelnēdiya tamo geid, idi anī dileid fen, seye den.

16 Idi Jesus to difiyen, “Kesu nanaal enidi ereb def, ō karī wof de?”

Jesus aitedin yalen, “Ariya, ā Negur nē Itotoya to uwesegen de?”

“‘Kesu momou kesu nanaal geid sigoreid bun selu kulō fiya nigin Negur idi wof de.’† ”

17 Agef fen, Jesus an tamal idi itorneīd, taun anī itor ken, Betani fonō ilen, an bō tekelei ibodon.

Aa Fig Gariri Kelen

(Mak 11:12-14, 20-24)

18 Bonimeī bagai, Jesus Jerusalem kel ile fen, naab luwen naū fen.

19 Mala irakelen, aa fig naab yerin ilen, Jesus iyok iselen fele fen, aa fig biya sā ege aarau dogol. Jesus aa fig irokenen, “Ō baban to bagai umauf!” Kaisā bagai, aa fig gariri kelen.

20 In dō fiya tar anī dile mā, idi terē de kulō de fen, diron, “Naig fe di, aa fig kaisā bagai gariri kelen?”

21 Jesus aitedin yale iron, “Aya ā momoi arokeneik, ā wauī momoi ge mā, wauī to ilef isi fouf, ā aa fig enī bun age afel dogol to ago gouf, sā arei enīg urokenēgouf, ‘Kusu fen, maaīwō irāyōf,’ are ī dōf age fouf.

22 Ā momoi gouf are, ereb taka nigin tog fen, kosē gouf, ā walogouf.”

Jesus Aim Igirnen Anī To Difiyen

(Mak 11:27-33; Luk 20:1-8)

23 Jesus tempel modoū namen ulō yeis fen, an tamo kayau od ifelneīd mog, pris odudug, tamo kayau neid mudur adodo, ī wagen disi to difen, “Ere igirīya bunem ō ereb ereb enī ago wof? Aim ō igirīya enī ifonon?”

24 Jesus aitedin yale iron, “Ayag to fiya tekelei afeneīf. Ā solog urokana-gauf are, ereb igirīya bunem ereb ereb enī age afef, aya ā arokeneīf.

25 Jon nē naan igunēdin, are nainenem isin? Are saa ilun tamal de, tamo bunem?”

Idi dogo dogol katō de fen, diron, “Ada ‘Ī saa ilun tamal,’ tauf, ī irōf, ‘Ba anī, ere nigin ā ī nigin to momoi wiyēgen?’

26 Anī ere, ada ‘Tamo bunem’ tauf, ada tamo kayau nigin kumī tafedif, ere nigin, tamo kayau idi ganan Jon nigin profet taka dedig.”

27 Anī nigin, idi Jesus ait solo de diron, “Amā keleī sā.”

† 21:9: Anī nē gariya, ‘Usennamā!’ Od anī tamo kayau Negur yana yaleseya nigin wogō dedig.

‡ 21:9: Sam 118:26 § 21:13: Asaia 56:7 * 21:13: Jeremaia 7:11 † 21:16: Sam 8:2

Age de di, Jesus iron, “Ago gouf are, ayag, ere igirīya bunem ereb ereb enī age afef anī to arokeneif.

Kesu Uru Bun Yaab Od

²⁸ “Ā ere kisi gef? Tamo taka ī naal uru adon. Tama ī kesu matu garan ile iron, ‘Neu kesu, gama wain kabier ule, kabī walouf.’

²⁹ “Ī aiten yalen, ‘Aya tuwauf,’ dum ī in kisi falei ye fen, ilen.

³⁰ “Agef fen, tama kesu taka garan ile, od tekelei anī irokenen. Kesu aiten yalen, ‘Dei, aya age afouf,’ anī ere, ī ileya sā.

³¹ “Idi uru atun, aim anī tama oron anī age fen?”

Idi aiten dalen, “Matum.”

Jesus idi irokenēdin, “Aya ā momoi arokeneik, takis yaleya tamo, kayau bouweid na nē sur difedig geid, ā atun, idi ketem Negur nē tano bun uyu dilauf.

³² Ere nigin, Jon naan igunēdiya tamo ī, madur ibodōya nē naab ifelneif nigin ā garan isin, ā ī nigin to momoi gen, anī ere, takis yaleya tamo, kayau bouweid na nē sur difedig geid, idi momoi den. Ā ī ulegeneg, ā wauī to falei ge fen, ī to momoi wiyēgen.

Tamo Kabī Lo Difedig Nē Yaab Od (Mak 12:1-12; Luk 20:9-19)

³³ “Yaab od taka nigin wedereī unog. Teneub marau taka ī yogon kabier aa wain itenen, ī kau ifō kalī felen, wain sumin asi fiya nigin ku yalen, kabī lo fiya nē fō inon. Agef fen, ī mala solo yalouf nigin wain kabī, kabī lo difedig tamo tunī imeid bun ino fen, uyu takā ilen.

³⁴ Sain biya bure fele di, teneub marau wain biya fito fiya nigin in ferfer susur fe di, kabī lo difedig tamo garan dilen.

³⁵ “Kabī lo difedig tamo, teneub marau nē ferfer dirouneid fen, taka dun, taka dukesin, taka meein tulu difen.

³⁶ Age dife di, teneub marau ferfer tunī sur fedin, are idi musei uyulil sur fedin wal fiya. Age fe di, kabī lo difedig tamo uruwa age difen gen, baban yogon ferfer bun age difedin.

³⁷ Dum bagai, teneub marau yogon naal idi garan sur fiyen. Ī iron, ‘Idi neu kesu nigin fau karī difiyēf.’

³⁸ “Anī ere, kabī lo difedig tamo, naal anī dile fen, idi abob dirokenen, ‘Eī inim wain kabī akorouf. Usig, ada ī taukeis fen, yogon akor talouf.’

³⁹ Age de fen, idi ī dale, wain kabī mayarē dira ken, dukesin.

⁴⁰ “Age fiya nigin, sain wain kabī nē marau isiyouf, ī kabī lo difedig tamo ere naig fediyouf?”

⁴¹ Idi Jesus aiten dalen, “Teneub marau, idi sane bagai sane ye fen, idenkesiyouf, ī wain kabī anī, kabī lo difedig tamo tunī imeid bun ino fen, na yaledi di, idi wain mayof sain bun fito de fen, yogon biya difenēf.”

⁴² Jesus idi irokenēdin, “Ā od Negur nē Itotoya bun yenek anī to uwe-segen de?

“ ‘Meein are fō inoya tamom sane de fen, ditoron anī, gama monog tor wō yen,

anī Odug yogo age fe di, malamā yun.’‡

⁴³ “Anī nigin, aya ā arokeneik, Negur nē tano ā bun tamal son yeī yale, tamo kayau idi aayū faat biya yūf anidi ifenēdiyof.

⁴⁴ Aib taka meein anī teten kubū youf, mered fe fisik fouf, takag, aib taka meein anī ī teten kubū youf, ī danīf aas lauf.”§

⁴⁵ Sain pris odudug, Farisia tamo geid, Jesus nē yaab od karī den, idi kelein, Jesus idi nigin wogō yen.

⁴⁶ Idi Jesus ironēya nigin naab dimiren, anī ere, idi tamo kayau nigin kumī den, ere nigin, tamo kayau idi Jesus nigin profet taka dedig.

‡ 21:42: Sam 118:22, 23 § 21:44: Itotoya tunī bun, itotoya 44 to ibodok.

22

Tamo Kayau Yalouf Bun Tar Nē Yaab Od (Luk 14:15-24)

¹ Jesus yaab od nem baban iro-
keneīd fen, iron:

² “Saa tano ĩ, king taka, ĩ naal
kayau yalouf nigin tar dodok fen age
fiya gen.

³ ĩ yogon ferfer sur fedī di, tamo
iweignēdin yogon tar bun disiyouf
nigin dirokenēdin, anī ere, idi isiya
ditoron.

⁴ “Ī baban ferfer tunī sur feid
fen, iron, ‘Idi aya aweignēdin anī
urokenēdig: Aya tar mogo saika
afel. Aya bulmakau yaro biya biya
ado adenen, ereb ereb ganān mogo
dodok afelel. Bagu fiya tar bun usig.’

⁵ “Anī ere, idi to karī difiyēdin,
idi diyalelen, taka yogon kabier ilen,
taka ĩ yogon bisnis kabī yalen.

⁶ Tunī idi ferfer dirouneīd fen,
tadū difiyeīd didenkesin.

⁷ Anī nigin, king name odug sane
fen, yogon kuśī tamo sur fedī di,
dilen, ferfer didenen anidi didenkeis
fen, nedi taun yā dinon.

⁸ “Agef fen, king, ne ferfer iro-
kenēdin, ‘Bagu fiya nē tar mogo
dodok afelel, aya tamo aweigneīd
fen, naa afenēdin anidi, dogo sane
age difen nigin, isiya kisi feleya sā.

⁹ Anī nigin, ā ulagauf, naab ka-
leyan aib aib uledigouf are, uro-
kenēdig len, idi tar bun disiyouf.’

¹⁰ Age ye di, ferfer dilelen, naab
naab diyō ken, tamo kayau dileid
fen, biya ado sane ganān gou difedin,
age dife di, tamo kayau ado bagu
difedidig nē guru fiya modoū bun
tamo kayau isokosen.

¹¹ “Age dife di, king namen isin,
tamo kayau fele fedin, an ĩ tamo taka
kolos biya ifonūya sā fotou fen.

¹² King ĩ to fiyen, ‘Mou, naig fe di, ō
bagu fiya nē naki sā anī guru fiya enī
namen usil?’ Tamo ĩ od sā ibodon.

¹³ “Age fe di, king yogon kabī tamo
irokenēdin, ‘Īma ye ado ufōg, ma-
yarē gugum bun urāg, an are wifirig
ye fen, gobora kikokō yediyouf.’

¹⁴ “Anī nigin, tamo kayau mu-
sei iweignēdif, anī ere, teke tekelei
igirnēdif.”

Sisa Bun Takis Inoya (Mak 12:13-17; Luk 20:20-26)

¹⁵ Age fe di, Farisia tamo dilen,
Jesus in od bun naig fe mog, talouf
de fen, od katō difen.

¹⁶ Age de fen, Farisia tamo, idi neid
dō fiya tar, Herod nē tamo tar geid,
Jesus wagen sur difedi di, dilen, idi
Jesus dirokenen, “Tise, amā keleī, ō
momoī wogōya nē tamo, anī ō Negur
nē naab momoī bagai ufelnēdidig, ō
tamom to wewu diyōdig, ere nigin, ō
idi yana ado be sā anī to es wedig.

¹⁷ Anī amā urokanamā, ogon kisi
ere wof? Sisa* takis ifenēya nigin
biya de, sā?”

¹⁸ Anī ere, Jesus idi neid namedin
kisi sane kelei ken, iron, “Ā meleid
yaleya tamo, ere nigin ā aya kisi
wiyagef?”

¹⁹ Takis ifenēya nigin koin moni
ufelnag.” Idi koin moni taka wagen
diroule di,

²⁰ Jesus idi to fedin, “Eī ai nawa nē
malakanon? Eī ai yana nē itotoya?”

²¹ Idi aiten dalen, “Sisa nē.”

Age de di, ĩ idi irokenēdin, “Ereb
Sisa nē are Sisa wenēg, ereb Negur
nē are Negur wenēg.”

²² Od enī idi karī de fen, terē den.
Age de fen, idi Jesus ditornē diya
dilelen.

Kel Fāya Bun Ai Nē Kayau Ibodōf? (Mak 12:18-27; Luk 20:27-40)

²³ Naa de tekelei anī bun, Sadusia
tamo idi dirōdig anī, laa bun tamal
to ke de fā dedig, dedig anidim, Jesus
wagen disi to difiyen.

²⁴ Idi diron, “Tise, Moses iron,
tamo taka kesu sā mog laa fef, in
tura waab yale fen, tura fotokar kesu
iroukenēf.

* 22:17: Rom neid king odug.

²⁵ Amã atun, tura tura sewen dibodon. Matu ï kayau yalen laa fen, ï kesu sã, anï nigin, ï, in kayau, ne tura itorkenen.

²⁶ Age fiya bagai, tura dô fiya ïg age fen, anï dô fiya tri ïg agef ile sewen adoken.

²⁷ Idikeleya bun, kayau ïg laa fen.

²⁸ Anï nigin, kel fãya bun, idi sewen anï atun, ï ai nê kayau bagai ibodôf? Ere nigin, idi ganan kayau anï dalen.”

²⁹ Jesus aitedin yale irokenêdin, “Ã od kũ wenêgef, ere nigin, ã Negur nê Itotoya ado Negur nê megeir keleï sã.

³⁰ Laa bun tamal kel fãya bun, an tamo kayau ado abob yalef ya sã, idi engel saa ilun difaref gen dibodôf.

³¹ Anï ere, laa bun tamal kel fãya nigin, Negur ã irokenein anï, ã to uwesegen de?

³² Negur iron, ‘Aya Abraham nê Negur, Isak nê Negur, Jakop nê Negur.’† ï laa neid Negur sã, ï mata ibodôya neid Negur.”

³³ Anï tamo kayau od enï karï de fen, ï agef ifelnêdin anï nigin terê den.

Ïtãfiya Odug Bagai Ganon Wal Fiya

(Mak 12:28-34; Luk 10:25-28)

³⁴ Jesus ï Sadusia tamo od bun sigoreid ifokelen anï karï de fen, Farisia tamo idi guru difen.

³⁵ Idi atun, lo keleï tamo takam Jesus kisi fiye ken, eig fiyê to fiyen,

³⁶ “Tise, ïtãfiya nanï anï, ganon wal fiya odug bagai Lo bun irok?”

³⁷ Jesus irokenen, “ ‘Õ, Odug ogon Negur waũ adok, malãkanon adok, kisi adok bunem, ï nigin waũ laaf.’‡

³⁸ Ïtãfiya enï ï matu, Lo bun ganon wal fiya odug bagai irok.

³⁹ Anï dô fiya are eig fiya, ‘Õ ogo nigin waũ laa fef gen, nê tã nigineg ago waũ laaf.’§

⁴⁰ Lo ado Profet neid od ganon, ïtãfiya uru enï teten difaref.”

Ai Nê Naal Anï Kristus? *(Mak 12:35-37; Luk 20:41-44)*

⁴¹ Sain Farisia tamo idi guru difesi di, Jesus idi to fedin,

⁴² “Kristus nigin ã kisi ai gef? Ai nê naal anï Kristus?”

Idi aiten dalen, “Dawid naal.”

⁴³ Jesus idi irokenêdin, “Dawid naig fe di, anï Awa Uurem irokenen, ï nigin ‘Odug’ yen?” ï nigin Dawid iron,

⁴⁴ “ ‘Negur neu Odug irokenen:

“Imau biya melem ubod mog,

ogon kiwai tar

on yê farume gô afalauf.” *

⁴⁵ Dawid ï nigin ‘Odug’ yen ouf are, naig fe di, Kristus ï Dawid naal ouf?”

⁴⁶ Taka nem, ï aiten yale solof irôya kisi feleya san, naa anï bunem ilen ganon, takam baban ï to fiyêya nigin kumï den.

23

Jesus Farisia Tamo Ado Lo Ifelnêdiya Tamo Ketê Fiyêdin

(Mak 12:38-40; Luk 11:39-52; 20:45-47)

¹ Dum Jesus, tamo kayau in dô fiya tar geid irokenêdin,

² “Lo ifelnêdiya tamo, Farisia tamo geid, Moses nê sia bun dibodôdig.

³ Anï nigin, ã idi karï wiyêdig fen, erëb idi ã ago gei de di, ã ago gouf. Anï ere, erëb idi age difef anï, ã to agog, ere nigin, idi dirôdig anï to dô de age difedig.

⁴ Idi morô odudug difofa ken, tamo kayau oroweid se difedig, anï ere, idi dogo bagai, morô enei dalesauf nigin imeid gege tekelei bagai gebeya nigin to orodidig.

⁵ “Idi erëb erëb ganon age difedig, are ege tamo meleid yaleya: Age de fen, idi tamo meleid yaleya nigin, lo ïtãfiya bokis naal odudug nuwa bun difeid fen, demeid bun ado imeid dã bun difofâdig, idi neid kolos nê malũ meluluk adodo dinodidig.

† 22:32: Eksodas 3:6 ‡ 22:37: Diuteronomi 6:5 § 22:39: Levitikas 19:18 * 22:44: Sam 110:1

6 Idi, saaf odudug bun ado Juda neid uub fõ bun, modoũ malabag ibodõya anĩ orodidig.

7 Idi maket modoũ bun, tamo kayau idim sere difiyeĩd fen, ‘O tise’ difediyouf anĩ orodidig.

8 “Anĩ ere, ã tise to diyeĩf, ere nigin, ã Tise tekelei dogol ado, ã adok tura tura.

9 Æ tenebur ein aib taka to dei gouf, ere nigin, ã Temeĩ tekelei dogol ado, ã saa ilun ibodok.

10 Æ mudur ado to diyeĩf, ere nigin, ã Mudur Ado tekelei dogol, are Kristus.

11 Æ atun, aib taka ganan wal fiya wõ you fenẽ, ã ãgenei kabĩ tamo ibodõf.

12 Ere nigin, aib taka ã yogo yana yalesef, ã lai fesilauf, aib taka ã yogo nigin lai fesilauf, ã yana adouf.

13 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ tamo kayau meleid bun saa tano nigin sukar unogedig. Æ aug namen to ulegedig, idi dilau fenẽ age difef, ã katĩ welegedig.*

15 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ, tamo tekelei waleg fen, ã ãgenei dõ fiya unenẽgouf nigin, teneub bun uyokeleg fen, maaĩ naab bun uyõgefeg ago gedig, agog fen, tamo ã anĩ ufelnẽge di, ã ãgenei dõ fiya wõ yef are, ã ã hel nẽ gere tar ubodõgef wal yeĩya sane bagai wõ yef.

16 “Mala ifofakeleya uyu irouya, ã nigin meleĩlon ado! Æ urõgedig, ‘Aib taka tempel yana bunem in od isen ken, total od irok, are ege, anĩ ere, aib taka tempel nẽ gol bunem in od isen ken, total od irok, ã dõf age foug.’

17 Æ neneya, meleĩ ifofakeleya! Ere anĩ odug, gol de, oo tempel gol fateul ifenẽdig anĩ?

18 Takag ã urõgedig, ‘Aib taka alta yana nem in od isen ken, total od irok, are ege, anĩ ere, aib taka sesewi fiya nẽ safina alta bun ifaref anĩ yana nem in od isen ken, total od irok, ã dõf age foug.’

19 Æ, mala ifofakeleya tamo! Ere anĩ odug, safina de, oo alta sesewi fiya fateul ifenẽdig anĩ?

20 Anĩ nigin, aib taka alta yana nem in od isen ken, total od irok, ã alta ado safina ganan alta teten ifaref anim in od isen ken, total od irok.

21 Taka ã tempel yana nem in od isen ken, total od irok, ã tempel ado, Negur tempel namen ibodok anim in od isen ken, total od irok.

22 Taka ã saa yana nem in od isen ken, total od irok, ã Negur nẽ king sia ado, Negur ã an ibodok anim in od isen ken, total od irok.

23 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ kabier tamal sako nanaaleg farag fen, ten tekelei unogedig, anĩ ere, ã, lo nẽ odug, are safina wal fiya anidi nigin to kisi gedig, are lo nẽ madur fiya, wau ifenẽya, wau momoiya. Æ anĩ adok to tai gedig. Æ teten nẽ anĩ dõg fen, dum nẽ anĩg tai gem, are dem.

24 Æ, mala ifofakeleya uyu irouya! Æ soloulã tar bun ibodok anĩ ulul nem yaleleya nigin kous gedig, anĩ ere, ã kamel tar bun ibodok anĩ utobogedig.

25 “Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ kap beĩ ado agara anĩ kulo gedig, anĩ ere, name bun amuyẽ isokos fen, taka nẽ safina yaleya nigin imeĩ su lai ge fen fe tetenem yaleya ado, akorou yeya aug naumeĩ nigin dogol yenek.

26 Farisia tamo, mala ifofakeleya! Kap beĩ ado name ket kulo wedig, ago ge di, teteneg fili youf.

* 23:13: Itotoya tunĩ eig de ditoton: *welegedig*. 14 *Lo ifelnẽdiya tamo, Farisia tamo geid, ã meleid yaleya tamo, ã nigin meleĩlon ado! Æ waab neid fõ sosoin wedig kuwesig fen, tamo kayau meleid yaleya kosẽ meluk ago gedig. Anĩ nigin, ã darau odug bagai walogouf.*

27 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ aau lalau nem matmat sigor naki fiya gen, teten lo fiya nigin biya bagai, namen anĩ are tamo gare den tuweid ado erēb erēb ganān amuyē isokosen.

28 Age fiya bagai, ãg teten tamo kayau meleid bun madur tamo gen ubodōgedig, anĩ ere, nameneĩ mala yaleya ado sane bagai isokosen.

29 “Lo ifelnēdiya tamo, Farisia tamo geid, ã meleid yaleya tamo, ã nigin meleĩlon ado! Æ profet neid matmat unog fen, madur tamo neid matmat garab wiyēgedig.

30 Æ urōgedig, ‘Ada tubuda tar dibodon sain bun, ada tabodom are, ada idi geid to bagu tafem, profet naudeid to filu fadam.’

31 Anĩ nigin, ã aug nigin yaor gef, ere nigin, ã idi profet didenkesin anidi neid ibor tar.

32 Ægenei tubuĩ tar neid mosor tobol ge di, isokosef!

33 “Æ gogour bagai! Æ gogour sane gere tar! Æ naig ge fen, hel nē es fiyauf bun tamal uyagauf?

34 Age fiya nigin, aya, profet, keleĩ biya tamo, tise ado ã bun sur afediyouf. Idi tunĩ udenkesigouf, tunĩ aa tetek bun udenēdigouf, tunĩ Ægenei uub fō bun wagagã gouf, fonō fonō idi darau wenēdig fen, urudigouf.

35 Anĩ nigin, madur tamo Abel nē naud bun ile, Sekaraia Berekia naal, ĩ tempel alta ado atun ã ukesigen, in naud bun, madur tamo neid naudeid ganān teneub enĩ iroun nigin, anĩ nē mala solo sane ã bun isiyouf.

36 Aya ã momoi arokeneik, mala solo kafĩ fiya enĩ ganān, tamo kayau sain enei bun dibodok anidi bun isiyouf.

Jesus Jerusalem Nigin Wau Laa Fen
(Luk 13:34, 35)

37 “O Jerusalem, Jerusalem, ò profet udenkeis fen, ò bun sur fedig

anidi meein meein wedidig, sain musei aya ò wau afon ken, ogon gerē tar kuru afedig, tataro sina momou waye farumen kuru fedig gen, anĩ ere, ã utorōgedig.

38 Ulogouf, Ægenei fō fonou lef.

39 Anĩ nigin, aya ã arokeneik, ã aya baban to uleyagauf ile, ã fau urōgouf, ‘Odug yana bunem isif, ĩ el fiya ado,’† sain anĩ bun, ã aya uleyagauf.”

24

Idikeleya Sain Nē Uris

(Mak 13:1-31; Luk 21:5-33)

1 Jesus tempel bun tamal kutū yeis, iyok ile mog, in dō fiya tar Jesus wagen disin, tempel fō tunĩ anĩ difelnen.

2 Jesus to fedin, “Æ enĩ ganān ulegef de? Aya ã momoi arokeneik, meein enĩ taka, meein tura teten to yenēf, anĩ adok fau isog irailauf.”

3 Jesus Moul Arein* ibod mog, in dō fiya tar mugun wagen disin dirokenen, “Urokanamã, ere sain enĩ wō youf? Ere uris bagai anĩ, on isiya nē ado idikeleya nē?”

4 Jesus aitedin yalen, “Takam to idegneĩf nigin lo weleg.

5 Ere nigin, musei aya yanau nem disi dirōf, ‘Aya Kristus,’ age de fen, idi tamo kayau musei didegnēdiyouf.

6 Æ kusĩ wōya karĩg fen, tamo sigoredim kusĩ nigin wogō douf anĩ karĩg gouf, ã anĩ nigin to terē gei. Ere erēb anĩ agef wō youf, anĩ ere, idikeleya sain fau dum isiyouf.

7 Teneub taka fã ye fen, ĩ teneub taka nigin kiwai ifenēf, tano taka ĩ tano taka nigin kiwai ifenēf. Naũ odug mimĩ ado, uyu taka taka bun wō youf.

8 Enei ganān, kayau kesu ibodōf nigin darau gariya inof gen.

9 “Sain age fouf bun, ã idi imeid bun ulagauf, darau odug laa bun dineneĩf, teneub ganān bun tamo kayau ã nigin to orodiyouf, ere nigin, aya yanau ã ado nigin.

† 23:39: Sam 118:26 * 24:3: ‘Oliv Arei’ dedig.

10 Sain anī bun, musei momoiya dudum difouf, idi dogo tutur abob kiwai difenēf, idi abob to orodiyouf.

11 Agef mog, idegēya profet musei wowā douf, idi tamo kayau musei didegnēdiyof.

12 Tobonunā sane anī fou yalauf nigin, tamo kayau musei wau laa fiya nigin folo rouf.

13 Anī ere, aib taka ī megeir ifar ile, idikeleya bun, Negur ī isennēf.

14 Saa tano nē biya od enī wogō difediyouf anim, teneub ganan bun tamo kayau wedereid irou fen, uris gen ifenēdiyof, anī gama idikeleya isiyouf.

15 “Sain ā log mog, ninir fonou inenēf,† are profet Daniel sigor bun wogō yen anī, Jerusalem fateul modoū bun ifarauf are (ani uweseg keleī youf),

16 idi Judia teneub bun dibodok, arein diya diselauf.

17 Taka ī yogon fō sokor ibodok, ī to kel isil, aaben ereb ereb gei fouf.

18 Taka ī kabier ibodok, yogon gabar yalouf nigin to kel ilauf.

19 Naa anī bun, kayau bouweid ado, kayau kesu su ifenek ado, idi meleidlouf adouf.

20 Feluk sain Sabat naa bun ado, ā to uyagauf nigin Negur kosē gouf.

21 Sain anī bun, morō odug biya isiyouf, morō age fiya gariya bun teneub inon isi gama, taka to wō yen, dum buneg taka to wō youf.

22 Negurem naa anī to godo falaisim are, taka to mata ibodom, tamo kayau igirnēdin idi nigin ye fen, naa anī godo falaisiyouf.

23 Sain anī bun, taka ā irokeneif, ‘Ulegēf, Kristus yeir!’ oo ‘Ī your!’ ā anī to momoi ge.

24 Fau idegēya Kristus, idegēya profet ado wō de fen, idi kisi falauf are, Negur igirnēdin anidig didegnēdiyof nigin uris odug memelik ado difelnēdiyof.

25 Karīg, aya tetunem ā arokenein.

26 “Anī nigin, takam ā irokeneif, ‘Kristus ī your, gerere tuan,’ ā to ulagauf, ‘Kristus ī yeir, aab namen,’ ā anī to momoi ge.

27 Gaa iseyanem kolimei fili ye di, ile, gaa ileyaneg iledig, age fiya bagai, Tamo Naal in isiyouf bun age fouf.

28 Nain be ereb bouwa buru waaif nē an, tum guru difouf.

29 “Morō sain anī bure fele di, kaisā bagai

“ ‘gaa gugum kalauf,
ogō to lalan youf,
saa ilun tamal barisa kuku rediyof,
saa nē megeir guyoyō douf.’

30 “Sain anī bun, Tamo Naal nē uris saa bun wō youf, teneub ganan bun tamo kayau waud gudū fouf. Idi Tamo Naal saa lalo bun, yogon fula fiya medeīya barikā megeir ado isi mog, dilouf.

31 Agef fen, ī yogon engel, taur ait odug ado susur fedi di, idi, yogon tamo kayau igirnēdin anidi, teneub akor ganan bun, saa akor ganan bun ado kuru difediyouf.

32 “Gama ā, aa fig bun keleī walogouf: Susu bonuf fen, aarau inodif, ā keleī, saneya melsak.

33 Age fiya nigin, ā anī ganan ulogouf are, ā keleī, in isiya mogo melsā, bobogē bagai ifaref.

34 Aya ā momoi arokeneik, tamo kayau sain enei nē idi to sa kel mog, enī ganan wowā youf.

35 Saa teneub ado sa kalauf, anī ere, neu od to bagai sa kalauf.

*Naa Sain Ado Takam To Keleī
(Mak 13:32-37; Luk 17:26-30, 34-36)*

36 “Taka nem, anī nē naa sain ado to keleī, saa ilun engel idig sā, Naal īg sā, Dei yogo dogol keleī.

37 Noa nē sain bun age fen age fiya bagai, Tamo Naal isiyouf bun age fouf.

38 Kuwei odug nē naa fau mog, tamo kayau saafei de fen, naanuei den, tamo kayau yalef, kayau tamo

† 24:15: Daniel 9:27; 11:31; 12:11

difenek difen, age de dile mog, Noa waag namen ilen.

³⁹ Idi ereb wō youf anī to keleī mog, kuwei isi, adok kuweir dilelen. Age fiya bagai, Tamo Naal ī isiyouf bun age fouf.

⁴⁰ Tamo uru idi kabier kabī dalef difarauf, tekelei yalouf, taka itornēf.

⁴¹ Kayau uru idi falawa falei dife mog, tekelei yalouf, taka itornēf.

⁴² “Age fiya nigin, meleī unog fen, log, ere nigin, ā keleī sā, naa nanī be bun āgenei Odug isiyouf.

⁴³ Ā keleī youf: Fō marau, bō ereb sain, bē tamo isiyouf keleī youf are, ī mata ibod ken, bē tamo in fō to narī fouf nigin ololo fouf.

⁴⁴ Age fiya nigin, āg saika gouf, ere nigin, Tamo Naal ī fau sain to isiyouf gouf bun isiyouf.

Ferfer Biya Ado Ferfer Sane (Luk 12:42-46)

⁴⁵ “Ferfer taka aim anī dō fiya kisi biya ado de? Ī yogon odugem, ī yogon odug nē fō bun anidi neid saaf, dogo neid sain kilei dōf ifenēdiyof nigin ima bun inon anī.

⁴⁶ Sain tamo odug kelouf bun, ferfer biya bagai age fe di, ilouf, tamo odug ī nigin biya fiyēf.

⁴⁷ Aya ā momoi arokeneik, tamo odug ī, yogon safina ganān ferfer anī ima bun inouf.

⁴⁸ Anī ere, ferfer taka sane ī wau bun irōf, ‘Neu tamo odug ilen, sain meluk biya gerō ibodok, ī kukula to isiyouf.’

⁴⁹ Age ye fen, ī, in kabī tura tar idenēdiya gariya ino fen, gama ī yogo, saaf biya naan biya, aai sē fiya tamo geid dōdig.

⁵⁰ Ferfer anī nē tamo odug, in isiya nē naa, ferfer to isiyouf ye fen, kisif mog, in isiya sain, ī keleī sā mog, isiyouf.

⁵¹ Tamo odug, ferfer anī gudūf fisik fe fen, mala yaleya tamo geid nedi modoū bun inenēf, an are wifirig ye fen, gobora kikokō yediyouf.”

25

Kayau Taulei Ten Idi Bun Yaab Od

¹ Jesus tobol fe iron, “Sain anī bun, saa tano ī, kayau taulei ten, idi neid lam gei de diyok dilen, tamo mois tarabā difiyēf age fiya gen.

² Faif idi kisi neneya ado di, faif idi kisi biya ado.

³ Kisi neneya ado, idi neid lam gei difen, anī ere, keresin to dalen.

⁴ Anī ere, kisi biya ado, keresin kulumā ado lam dalen.

⁵ Tamo mois kaisā to isin, idi adok mulā fedī di, denenan.

⁶ “Bō atun ait taka iweig iron, ‘Ulegēf, tamo mois mogo yeir, ulolō wesig fen, fotou wiyēg!’

⁷ “Kayau taulei ganān fafā de fen, lam wik koriri difeselen.

⁸ Kisi neneyam, kisi biya ado dirokenēdin, ‘Āgenei keresin tunī wanamāg, amā nemā lam gare felediyof fenē.’

⁹ “Kisi biya adodom, kisi neneya dirokenēdin, ‘Eo, keresin eī, ā ado amā ado to kisi falauf. Amam ifeneīya ban, uleg, oun keresin na nē dinodig bun, aug nigin na waleg.’

¹⁰ “Kisi neneya idi, keresin na nigin dile mog, tamo mois mogo isin. Kayau taulei idi ololo difiyen, weim bagu fiya nē tar bun, aaben dilelen. Age dife di, sukar kotū felen.

¹¹ “Dum, kisi neneya idig disin, idi diron, ‘Tamo odug, tamo odug, amā nigin sukar kā wo!’

¹² “Anī ere, tamo mois aitedin yalen, ‘Aya ā momoi arokeneik, aya ā keleī sā.’

¹³ “Age fiya nigin, ā lo weleg, ere nigin, naa kilok ado ā keleī sā.

Kabī Tamo Moni Gadō Fedin Nē Yaab Od (Luk 19:11-27)

¹⁴ “Takag, saa tano ī, tamo taka ī, uyu takā gerō naab ilau fenē nigin, ī yogon ferfer iweigneid fen, yogon safina kulatun de kenēf nigin, imeid bun inon age fiya gen.

¹⁵ Taka ī faif tausen kina ifenen, taka tu tausen kina ifenen, taka wan tausen kina ifenen, idi dogo mugu

mugu neid safina kulatun fiya nē keleĩ kilei kilei ifeneĩd fen, ĩ uyu takā gerō naab ilen.

¹⁶ Tamo faif tausen kina yalen, kaisā bagai ilen, moni kabĩ bun ino fen, baban faif tausen kina yalen.

¹⁷ Tamo tu tausen kina yalen, ĩg agef fen, baban tu tausen kina yalen.

¹⁸ Tamo wan tausen kina yalen, anĩ ere, ĩ ile, meku yale fen, tamo odug nē moni teneub kur inokelen.

¹⁹ “Sain meluk bure fele di, ferfer neid odug kel isi fen, moni ferfer mugu mugu ifenēdin anĩ, idi naig dife kabĩ difenen anĩ, faded de dirokenēf nigin ferfer ganan iweig laisin.

²⁰ Tamo faif tausen kina yalen, ĩ baban faif tausen kina taka ado irou isi fen, ĩ iron, “Tamo odug, ō aya faif tausen kina wanan, ulef, aya baban faif tausen kina taka ado.’

²¹ “In tamo odug ĩ irokenen, ‘Ō de agon, ō ferfer biya dō fiya biya bagai! Ō safina naal bun kulatun biya ubodon nigin, aya ō imā bun safina musei anouf. Usi fen, ogon tamo odug nē kulīya namen ubod!’

²² “Tamo tu tausen kina yalen, ĩg isi fen, ĩ iron, “Tamo odug, ō aya tu tausen kina wanan, ulef, aya baban tu tausen kina taka ado.’

²³ “In tamo odug ĩ irokenen, ‘Ō de agon, ō ferfer biya dō fiya biya bagai! Ō safina naal bun kulatun biya ubodon nigin, aya ō imā bun safina musei anouf. Usi fen, ogon tamo odug nē kulīya namen ubod!’

²⁴ “Age fe di, tamo wan tausen kina yalen, ĩ isi fen, iron, “Tamo odug, aya kelein, ō tamo totul ado, onom to utenen anĩ kusu wodig, onom faat to uraran anĩ fito wodig.

²⁵ Anĩ nigin, aya ō nigin kumĩ au fen, ele, ogon moni teneub kur anokelen. Ulef, ogon safina yeir.’

²⁶ “In tamo odug ĩ irokenen, ‘Ō, ferfer sane fō tamal! Ō kelein, ayam to atenen anĩ kusu afedig, ayam faat to araran anĩ fito afedig de?

²⁷ Ō kisi agom, neu moni benk bun uno di, benk im kabĩ yalekanam, ago

wom, sain aya kelauf bun, moni kabĩ yalen anĩ nē mala ado, moni ō benk wenen anĩ bagu fiya kel isin ado alem. Anĩ ō to agon.’

²⁸ “Age ye fen, ĩ ari fedin, ‘Wan tausen kina ĩ bun son ge fen, tamo ten tausen kina ado anĩ wenēg.

²⁹ Taka ĩ ereb ado, aya toru afouf, age fe di, ĩ musei adouf. Taka ĩ sã bagai, ereb taka ĩ adog, ĩ bun tamal son fouf.

³⁰ Ferfer sane anĩ mayarē gugum namen urāg, an are wifirig ye fen, gobora kikokō yediyouf.’

Sipsip Meme Ado

³¹ “Sain Tamo Naal, yogon fula fiya medeīya ado engel ganan geid disiyouf, ĩ in ibodōya modoũ fula fiya medeīya bun ibodōf.

³² Teneub ganan bun, tamo kayau ĩ wagen kuru difediyouf, age dife di, ĩ tamo kayau foi fediyouf, sipsip lo fiya tamo, sipsip meme ado foi fedig gen age fouf.

³³ ĩ sipsip ima biyalē inoid fen, meme ima kilē inodiyouf.

³⁴ “Agef fen, King ĩ, idi ima biyalē anidi irokenēdiyof, ‘Neu Deim el yeik ā, usig, āgenei akoreĩ waleg, gariya bun teneub inon bunem isi gama, tano āgenei nigin saika fen anĩ.

³⁵ Ere nigin, aya naũ fiya mog, ā yōya nē safina wanagen, aya naan ail fiya mog, ā naan yōya nigin wanagen, aya yaũ tamo abod mog, ā aabē urou uleyagen.

³⁶ Aya gemũ abod mog, ā gabar ufilaĩnagen, aya dagi abod mog, ā kulatun wiyagen, aya kalabus bun abod mog, ā usig ki wiyagen.’

³⁷ “Age ye di, madur tamo kayau aiten dalen, ‘Odug, ere sain ō naũ ubod mog, amā saaf mafonon, ō naan ail yō mog, naan mafonon?

³⁸ Ere sain ō yaũ tamo mailiyo ken, amā nemā fō bun maleyon, ō gemũ ubod mog, gabar mafilaĩnon?

³⁹ Ere sain ō dagi ubod mog, amā ō mailiyon, ō kalabus bun ubod mog, amā ki mayon?’

40 “King aitedin yale irōf, ‘Aya ā momoi arokeneik, ā neu turau tar yeneid sã enidi taka el wiyēgen, are aya el wiyagen.’

41 “Age ye fen, ī ima kilē anidig irokenēdiyof, ‘Gelu yein ā, wageun uyag uleg, yã mala fitotoleya faimud, Satan in engel geid idi nigin dodok fen anī, an uleg.

42 Ere nigin, aya naū abod mog, ā ereb taka to wanagen, aya naan ail fiya mog, ā naan to wanagen.

43 Aya yaū tamo abod mog, ā aabē to urou uleyagen, aya gemū abod mog, ā gabar to ufilānagen, aya dagi abodon, kalabus bun abod mog, ā to kulatun wiyagen.’

44 “Idig aiten dale dirōf, ‘Odug, ere sain ō naū ubodon, naan sã ubodon, yaū tamo ubodon, gabar sã ubodon, dagi ubodon, kalabus bun ubodon, amā ō to masennon?’

45 “King aitedin yale irōf, ‘Aya ā momoi arokeneik, ā neu idi yeneid sã enidi taka to el wiyēgen, are aya to el wiyagen.’

46 “Age ye di, idi darau faimud ibodkeleya nē bun dilauf, madur tamo kayau idi mata faimud ibodkeleya nē bun dilauf.”

26

Jesus Yukesiya Nigin Naab Dimiren

(Mak 14:1, 2; Luk 22:1, 2; Jon 11:45-53)

1 Jesus od enī ganan wogō ye bure fel fen, ī in dō fiya tar irokenēdin,

2 “Ā keleī, naa uru bure fele di, Pasa naa isiyof, age fe di, Tamo Naal idi imeid bun dino di, aa tetek bun dukesiyof.”

3 Dum pris odudug, tamo kayau neid mudur adodo, pris mudur ado in yana Kaiafas in fō bun guru difen.

4 An idi Jesus idegēya naab bun dale fen, dukesiyof nigin katō difen.

5 Idi diron, “Sifa inoya bun to age tafouf, age tafouf, tamo kayau idi seye de fen, kusī dalesauf.”

* 26:7: Meein alabasta nem dinon.

Betani An Kayau Taka Jesus Mudur Bun Moul Fi Felen
(Mak 14:3-9; Jon 12:1-8)

6 Jesus, Betani fonō an, Simon lepra dagi kulu adon in fō bun ibod mog,

7 kayau taka, Jesus wagen moul sumeī biya bagai moni odug nem anī, moul ifeya nē gulub* ado irou isin anī, Jesus tebol bun saaf yoko ibod mog, ī mudur bun moul fi felen.

8 Anī in dō fiya tar dile mā, idi nameid sane fen, diron, “Ere nigin enī sekil fef?”

9 Moul enei na odug nem sur fiyam are, moni anī yale maleg tamo ifenēdiyam.”

10 Anī Jesus kelei ken, idi irokenēdin, “Ā, ere nigin kayau enī wau morō wenēgef? Kayau enī aya bun biya bagai age fel.

11 Maleg idi ā geid faimud ubodōgouf, anī ere, aya ā geid faimud to tabodōf.

12 Sain kayau moul enī, neu bouwau bun fi felel are, mekur ainēf nigin dodok fiyal.

13 Aya ā momoi arokeneik, tenebur ein nain be biya od enī wogō douf, ereb kayau anī age fen anīg wogō douf. Age dife di, idi ī nigin dum dum wogō de fen, karī dalauf.”

Judas Jesus Kiwai Tamo Imeid Bun Inoya Nigin Yo Yen

(Mak 14:10, 11; Luk 22:3-6)

14 Agef fen, dō fiya tar tuwelf idi atun taka, yana Judas Iskariot tamal, pris odudug wagedin ile fen,

15 to fedin, “Sain aya ī imeī bun ano di, ere anī ā aya wanagauf nigin kisi gef?” Age ye di, idi teti silwa koin moni anī diweskene ken, difenen.

16 De anenem, Judas ī Jesus kiwai tamo imeid bun inoya nigin naab imirek ilen.

Odug Nē Bō Saaf
(Mak 14:12-26; Luk 22:7-23; Jon 13:21-30; 1 Korin 11:23-25)

17 Bret yis sã sifa inoya naa matu anĩ bun, in dõ fiya tar Jesus wagen disì to difiyen, “Õ amã nain anĩ Pasa saaf wãf nigin, amã dodok mafe konõf anĩ oroyok?”

18 Jesus iron, “Taun uleg, tamo taka wagen wõg fen, urokenëg, ‘Tise irok: Aya neu naa mogo melsã. Aya, neu dõ fiya tar geid, ogon fõ bun Pasa saaf male fen, sigigi mafouf.’ ”

19 Anĩ nigin, in dõ fiya tar, Jesus iron anĩ dõ de fen, Pasa saaf nigin dodok difen.

20 Aragau di, Jesus, in tuwelf geid, tebol bun saaf doko dibodon.

21 Idi saaf dokon, Jesus iron, “Aya ã momoi arokeneik, ã atun takam, aya kiwai tamo imeid bun ineyauf.”

22 Idi waud gudũf fen, mugu mugu wogõ fiyëya nigin gariya dinon, “Odug, momoi bagai, aya sã?”

23 Jesus aitedin yale iron, “Taka ã, amã uruwom imamã takai beĩ bun nu mafesil, im aya kiwai tamo imeid bun ineyauf.

24 Tamo Naal, ã nigin Negur nẽ Itotoya irok kilei, agef bagai ilauf. Anĩ ere, tamo ã Tamo Naal kiwai tamo imeid bun inof, ã malalon ado! ã sina to gõ fem, are dem.”

25 Age ye di, Judas, tamo ã Jesus kiwai tamo imeid bun inouf, iron, “Momoi bagai, aya sã, Rabi†?”

Jesus aiten yale iron, “Are õ ogo urok.”

26 Idi saaf dokon, Jesus bret yale, Negur de fiye ken, bret anĩ mumãf, in dõ fiya tar ifeneĩd fen, iron, “Bret enei waleg fen, wõg, eĩ neu bouwau.”

27 Agef fen, ã kap yale, Negur de fiye ken, kap anĩ ifeneĩd fen, iron, “Ã ganan, enĩ bun wõg.

28 Eĩ neu naudou bar itenëya nigin, are tamo kayau musei mosor yalel kenëdiyof nigin fi felef.

29 Aya ã arokeneik, aya baban wain enĩ to ãf, gaman ile, aya ã geid, neu Dei nẽ tano bun, wain mata tãf anĩ bun.”

30 Anĩ bure fele di, idi seg taka dalel fen, idi Moul Arei bun diselen.

Pitam Jesus Wa Fiyëf Nigin Jesus Iron

(Mak 14:27-31; Luk 22:31-34; Jon 13:36-38)

31 Jesus idi irokenëdin, “Bõ enĩ bun, ã ganan aya utornagau, ere nigin, are Negur nẽ Itotoya irok kilei:

“‘Aya sipsip marau aukesi di, sipsip ganan firagagaũ difouf.’ ‡

32 Anĩ ere, aya, laa bun tamal kel fã au fen, aya ket Galili uyu alauf.”

33 Pita, Jesus aiten yale iron, “Idi ganan õ ditornõfeg, aya are to bagai atornõf.”

34 Jesus Pita irokenen, “Aya õ momoi arokonok, bõ enĩ bun tataro kokorok yeya sã mog, õ aya nigin wa towo wouf.”

35 Anĩ ere, Pita Jesus irokenen, “Momoi ada uruwom gare tau mogoufeg, aya õ nigin to bagai wa afouf.” Age ye di, dõ fiya tar ganan, od tekelei anĩ diron.

Getsemane Oun

(Mak 14:32-42; Luk 22:39-46)

36 Age de fen, Jesus in dõ fiya tar geid, modoũ taka yana Getsemane dilen. An, ã idi irokenëdin, “Aya oun ele, kosẽ au mog, ein ubodõgouf.”

37 Jesus, Pita Sebedi gere tar uru gei feid fen, dile mã, ã wau gudũf fen, moro kalaisin.

38 Age fe di, ã idi irokenëdin, “Neu malaukanon tobega le fen, wau morõ gudũ falaisi, laa nẽ daũ bun ifaref. Ein ufareg fen, ã aya geid lo tafalauf.”

39 Naal godof iroule fen, kubũ ye, nawa tenebur kumokur fe fen, kosẽ yen, “Neu Dei, kisi falauf are, darau nẽ kap enĩ walel kanauf. Anĩ ere, neu oroya to dõ wouf, on oroya anĩ dogol dõ wo.”

40 Age fel fen, Jesus in dõ fiya tar gedìn kel isin, mulã den mog, ãledin, ã Pita to fiyen, “Tamo ã, aya geid aua tekelei lo fiya nigin to kisi feleya de?

† 26:25: Rabi, anĩ nẽ gariya, Juda neid tise. ‡ 26:31: Sekaraia 13:7

41 Æ, lo weleg fen, kosē gouf, are ã kisi yeīya bun to kubū gouf nigin. Uur are orof, anī ere, bouwa anī malegef.”

42 Æ, anī dō fiya, baban kel ile, kosē yen, “Neu Dei, kap enī bun aya to ãf are, ò kap enī yaleleya nigin kisi feleya sã, age foug, ò ogon oroya dō wouf.”

43 Æ kel isin, baban denena mog iledin, ere nigin, idi meleid morō gudū fesin.

44 Agef fen, ì idi itorneīd fen, baban kel ilen, kosē yen anim towo, od tekelei iron anī baban kosē yen.

45 Agef fen, ì in dō fiya tar gedin kel ile, idi irokenēdin, “Æ fau si unog fen, yenēyai gef? Ulegf, sain mogo melsã, Tamo Naal mogo mosor tamo imeid bun ilef.

46 Fafãg fen, teleg! Kiwai imeid bun inoya tamo yeir isif!”

Jesus Dirounen

(Mak 14:43-50; Luk 22:47-53; Jon 18:3-12)

47 Jesus fau wogō ye mog, in dō fiya tar tuwelf idi anī atun taka, Judas isin. Tamo musei dimig adodo seburer adodo ì geid disin. Pris odudug, tamo kayau neid mudur adodo idim sur difedi di, disin.

48 Gama Judas, Jesus kiwai tamon inoya tamo ì, Jesus yaor fiyēf nigin idi uris ifenēdin: “Tamo aya umã fiya bunem aan afiyēf anī, ì waleg.”

49 Judas, kaisã bagai, Jesus wagen ile iron, “O Rabi, fel!” Age ye fen, ì umã fiyen.

50 Jesus ì irokenen, “Mou, ereb wofon usif, are ago.”

Age ye mog, tamo Jesus wagen dile dirounen.

51 Age dife di, tamo Jesus weim difaren anidi takam, ima iran, dimig ul feis yalen, pris mudur ado nē ferfer weder salōf iran.

52 Jesus ì irokenen, “Ogon dimig in modoū bun uno, ere nigin, idi ganan dimig ul difeis dalef, dimig bun gare douf.

53 Æ kisi gef are, aya, neu Dei isen-nauf nigin aweignē di, ì kaisã bagai, engel musei biya, sewenti-tu tausen wal fiya imau bun inoya kisi feleya sã de?

54 Age afoug are, Negur nē Itotoya anī nigin iron enī ganan, naig fe kisi fel, agef wō youf?”

55 Sain anī bun, Jesus tamo musei irokenēdin, “Æ bē tamo walegedig gen, aya ã dimig adodo seburer adodo waleyagau fenē usigef de? Naa ganan, aya tempel fofomala bun abod ken, od afelnēdidig, anī ere, ã aya to urouyagen.

56 Anī ere, profet neid itotoya kisi falauf nigin, enī ganan wō yen.” Age ye di, in dō fiya tar ganan ditornē diyalelen.

Jesus Juda Kaunsel Neid Kot Mala Bun Ifaren

(Mak 14:53-65; Luk 22:54, 55, 63-71; Jon 18:13, 14, 19-24)

57 Idi Jesus dalen, pris mudur ado Kaiafas garan dirou dilen, an lo ifelnēdiya tamo, tamo kayau neid mudur adodo geid guru difen.

58 Anī ere, Pita, Jesus dume naal soso fiye ken, dōf tokō fel ile, pris mudur ado nē fofomalan wō yen. Æ namen ile fen, kabī tamo geid dibod ken, naig be difiyēf nigin lo fen.

59 Pris odudug, Juda neid kaunsel ganan geid, Jesus laa bun dinenēf nigin, bou bun idegēya od dinou fenē dimiren.

60 Musei wagen disi fen, disenneīd fen, idegēya od diraran, anī ere, Jesus laa bun dinenēf nigin od gariya taka to dilen.

Dum tamo uru wō den,

61 anidim diron, “Tamo enim iron, ‘Aya Negur nē tempel narī afel fen, naa towo bun baban anouf, are kisi feleya.’”

62 Age de di, pris mudur ado fã ye, ifar fen, Jesus irokenen, “Ò to solo urōf de? Eī ere od anī, tamo enidi ò nigin dirousif?”

63 Anī ere, Jesus mutū ifaren.

Pris mudur ado Jesus irokenen, “Õ mata ibodõya Negur mala bun urõf nigin, od arokonok. Õ momoi Kristus, Negur Naal be anĩ, amã urokanamãf.”

⁶⁴ Jesus aiten yalen, “Ao, õ ogo yer urok. Anĩ ere, aya ã ganan aro-keneik: Dum bun, Tamo Naal Negur megeir ado ima biyalem ibod ken, saa lalo bun isi mog, ã ulogouf.”

⁶⁵ Jesus age ye di, pris mudur ado karĩ ye fen, in kolos serek fe fen, iron, “Ĩ Negur kono fel! Ere nigin ada od megeir fiya nigin tamo baban tamirêf? Ulegef, ã gama Negur kono fel anĩ karĩ gel.”

⁶⁶ Anĩ ã ere kisi gef?”

Idi aiten dalen, “Ĩ laa bun ilauf.”

⁶⁷ Age de fen, idi, Jesus nawa bun disisne ken, imedim dun. Tunim wala fã de fen,

⁶⁸ diron, “Kristus, kurõ weis urokanamã, aim õ inok?”

Pita Jesus Nigin Wa Fen

(Mak 14:66-72; Luk 22:56-62; Jon 18:15-18, 25-27)

⁶⁹ Pita, pris mudur ado nẽ fõ fomalan ibod mog, kabĩ kayau momoul taka wagen isi iron, “Õg Jesus Galili tamal weim uyõgen.”

⁷⁰ Anĩ ere, ganan meleid bun ĩ waf fen, iron, “Õ od urok enĩ, aya keleĩ sã.”

⁷¹ Age ye fen, ĩ iyok ilen, bobog bun, an kayau momoul takam ile fen, tamo kayau an difaren idi iro-kenẽdin, “Tamo enĩ, Jesus Nasaret tamal ĩ geiden.”

⁷² ĩ baban waf fen, totol od iron, “Tamo are aya keleĩ sã!”

⁷³ Sain naal ile di, idi an difaren Pita garan dile fen, diron, “Momoi bagai, õ idi neid taka, on od wogõya bun ogo yaor yok.”

⁷⁴ Age de di, ĩ mogo yogo bouwa geluf fen, totol od irokenẽdin, “Tamo are aya keleĩ sã!”

Age ye mog, kaisã bagai tataro kokorok yen.

⁷⁵ Age fe di, Pita Jesus wogõ yen anĩ nigin weder fokõ yen, “Sain tataro kokorok yeya sã mog, õ aya nigin wa wo towo wouf.” Anĩ nigin, ĩ weder fokõ ye di, ĩ mayarẽ ile fen, inã odug yalen.

27

Judas ĩ Yogo Kosim Bun Ula Iseginen

(Mak 15:1; Luk 23:1, 2; Jon 18:28-32; Aposel 1:18, 19)

¹ Bonime bagai, pris odudug, tamo kayau neid mudur adodo geid, Jesus yukesiya nigin od difon.

² Idi ĩ difõ dale diroule, gawaman nẽ mudur Pailat ima bun dinon.

³ Anĩ Judas, Jesus kiwai ifenen, ĩ lof mog, Jesus dukesiyouf nigin ĩ bou bun od dun anĩ ile fen, ĩ kisif wau yu ken, teti silwa koin moni kel iroule, pris odudug, tamo kayau neid mudur adodo geid ifenẽdin.

⁴ Judas iron, “Aya mosor anon, ere nigin, ĩ mosor sã mog, ayam kiwai anon.”

Age ye di, idi aiten dalen, “Amã ere mayõf? Are ogon sakir.”

⁵ Judas moni irou ile, tempel namen irara ken, ilen. Anĩ ĩ iya ile, yogo kosim bun ula iseginen.

⁶ Pris odudug moni gei de fen, diron, “Lo to wal tafouf nigin, moni enĩ tempel nẽ kolekta bokis bun to ufeg, ere nigin, moni enĩ naud mala.”

⁷ Katõ fiya bure difel fen, moni anim, mis inoya tamo nẽ teneub anĩ na dale fen, yaũ tamo mumã difediyouf nigin, idi kisi difon.

⁸ Anĩ bunem, gamag teneub anĩ yana, Naud nẽ Mayã dedig.

⁹ Are profet Jeremaia nẽ od, eig ye wogõ yen anĩ kisi felen: “Idi teti silwa koin moni dalen, moni anĩ Israel tamo kayau ĩ nigin digiren.

¹⁰ Idi moni anim, mis inoya tamo nẽ teneub na dalen, Odug aya agef irokanan kilei.”*

* 27:10: Sekaraia 11:12, 13; Jeremaia 19:1-13; 32:6-9

Jesus Pailat Mala Bun Ifaren
(Mak 15:2-15; Luk 23:3-5, 13-25;
Jon 18:33-19:16)

¹¹ Jesus, Rom gawaman nē mudur Pailat, mala bun ifare di, gawaman nē mudur Pailat ī to fiyen, “Ō Juda neid king de?”

Jesus iron, “Are de yer, ō urok anī.”

¹² Sain pris odudug, tamo kayau neid mudur adodo geid, Jesus bou bun od dun, ī aitedin to yalen.

¹³ Pailat Jesus to fiyen, “Ō boū bun od dirarak to karī wof de?”

¹⁴ Anī ere, Jesus aiten to yalen, ī bou yūya od tekelei bagai nigin taka to solof iron. Age fe di, gawaman nē mudur, odug biya terē yen.

¹⁵ Gama gawaman mudur nē to-bonunā, Pasa sifa naa bun, tamo kayau, tamo taka kalabus bun digirī di, yalisnēdig.

¹⁶ Sain anī bun, idi kalabus tamo taka, yana sane bagai adon, ī yana Barabas.

¹⁷ Bonimeī, tamo kayau, Pailat nē fō bun guru difesi di, Pailat to fedin, “Nanī ā aliskeneīf anī oroyeik, Barabas de oo Jesus ī Kristus dedig anī?”

¹⁸ Ere nigin, ī yogo kelein, tamo kayau neid mudur adodo idi, kiyē bunem, Jesus ī ima bun dinon.

¹⁹ Pailat od es fiya modoū bun ibod mog, in aiwa od sur fen, “Tamo anī ī mosor sã, ī nigin ereb taka to ago wouf, ere nigin, aya, nor bō, ī nigin ami ken, morō odug ī nigin ailel.”

²⁰ Anī ere, pris odudug, mudur adodo geid, tamo kayau od irōya nigin wedereid diroun, are idi Barabas yalisnēya nigin ado, Jesus dukesiyouf nigin nonī douf nigin age difen.

²¹ Gawaman nē mudurem to fedin, “Aya ā aliskeneīf nigin, uru enidi ā nanī oroyeik?”

Idi aiten dalen, “Barabas anī.”

²² Pailat to fedin, “Age fiyauf are, aya, Jesus, Kristus dedig nigin, ere naig afouf?”

Idi ganan diron, “Aa tetek bun ūf!”

²³ Pailat to fedin, “Ere nigin? Ere mosor ī age fen?”

Anī ere, idi total bagai diweig diron, “Aa tetek bun ūf!”

²⁴ Pailat ī anī ile fen, ī od irōya nigin naab taka sã, anī tamo kayau idi total bagai dino fen, kusī dou fenē age dife di, ī naan yale fen, tamo kayau meleid bun ima kulof fen, ī iron, “Tamo enī naud aya bun sã, are āgenei sakir!”

²⁵ Tamo kayau ganan aiten dale diron, “Yogon naud utor len, amã bun ado nemã kesu tar bun yenēf!”

²⁶ Age de di, ī Barabas yalis ifenēdin. Agef fen, ī irō di, Jesus wagī de fen, ī aa tetek bun dūf nigin, kusī tamo imeid bun inon.

Kusī Tamo Jesus Diselinen
(Mak 15:16-20; Jon 19:2, 3)

²⁷ Gawaman mudur nē kusī tamo, Jesus dale gawaman mudur nē fō namen dile fen, an mayã taka, kusī tamo ganan gou difalaisi salili difiyen.

²⁸ Idi Jesus nē kolos dinukeis fen, kolos meluk giriya anī difounnen.

²⁹ Age dife fen, idi malū duri ado dale, teter tanak kori de fen, ī mudur bun kurū difen. Idi werī tibog dale, ima biyalē dino fen, wagen bobou de fen, diselinen. Idi diron, “Ō Juda neid king gai gai ibodōf!”

³⁰ Idi ī disisne ken, idi baban werī tibog ima bun tamal dale, mudur bun baba baban dun.

³¹ Idi diseline kel fen, kolos meluk giriya anī dinukeis, yogon kolos bagai anī baban difounnen. Age de fen, kusī tamom idi, ī aa tetek bun dūf nigin dirou diselen.

Jesus Aa Tetek Bun Dun
(Mak 15:21-32; Luk 23:26-43; Jon 19:17-27)

³² Sain idi mayã anī ditor diyok dile fen, idi Sairini tamal tamo taka fotou difen, yana Simon. Idi ī, Jesus nē aa tetek faali fouf nigin nugo difiyen.

³³ Idi disel, modoū yana Golgota (anī nē gariya, Mudur Tuwa nē Modoū) wō den.

34 Kusī tamo idi, an wain makik ado falei difen anī, Jesus yāf nigin difenen. Anī ere, ī yō ile fen, yōya nigin itoron.

35 Sain idi ī aa tetek bun du kel fen, idi aisaī dira kodē de fen, yogon kolos morou morou gadō difen.†

36 Age de fen, idi an dibod ken, lo difiye kelen.

37 Ī bou bun od dinon anī, idi yogon mudur ilun ditoton: EĪ JESUS, JUDA NEID KING.

38 Age de fen, kusī tamo idi, bē tamo urug, ī geid aa tetek bun didenen, taka yogon ima biyalē, taka yogon ima kilē.

39 Tamo kayau dile disi dife, Jesus kono difiye ken, kasā difiyē, mudureid dira ken,

40 idi diron, “Ō onom tempel narī wol fen, baban naa towo bun anouf won, ō ogo nigin usennēf! Ō Negur Naal wouf are, aa tetek bun tamal kutū weis!”

41 Age difiyen gen, pris odudug, lo ifelnēdiya tamo, tamo kayau neid mudur adodo, idi Jesus diselinen.

42 Idi diron, “Tunī anī isennēdin, anī ere, ī yogo nigin isennēya kisi feleya sā! Ī Israel nē king! Uturnēg len, gama aa tetek bun tamal kutū yesiyouf. Age fe di, ada ī nigin momoi tauf.

43 Ī Negur nigin momoi yedig. Ī irōdig, ‘Aya Negur Naal,’ anī nigin, Negur ī nigin orouf are, utornēg len, gama Negurem ī isennēf.”

44 Age difiyen gen, bē tamo Jesus geid, aa tetek bun didenen idig, ī nigin kono fiya od in bou bun diran.

Jesus Laa Fen

(Mak 15:33-41; Luk 23:44-49; Jon 19:28-30)

45 Tuwelf kilok gaa ado nē ile, tri kilok aragaun, gugum isin, teneub ganan kerub fen.

46 Tri kilok age fiya mog, Jesus wade bagai iweig iron, “Eloi, Eloi,

lama sabaktani?” –anī nē gariya, “Neu Negur, neu Negur, ere nigin ō aya utornal?”‡

47 Tunī an difaren, anī karī de fen, diron, “Ī Eliya iweignek.”

48 Kaisā bagai, idi atun takam gudu re ile, sponsŖ yalen, wain kai ado bun nu feis fen, tibog bun ino fen, Jesus yāf nigin ifenen.

49 Tunī ganan diron, “Gama utornēg, Eliya isi isennē mog, tailauf.”

50 Jesus baban ait odug nem iweig di, in uur ul fe yale di, laa fen.

51 Sain anī bun, gabar meluk odug tempel namen modoū fateul bun ibodon anī, serek fe uru fen, ilunenem irousil teneburen. Teneub yoūf fen, meein fara fedin.

52 Matmat bobog kā fedi di, tamo kayau fateul musei gare den idi, baban mata fafā den.

53 Idi matmat bunem fafā den anidi, Jesus kel fā ye di, Jerusalem fateul taun dile fen, tamo kayau musei meleid bun wowā den.

54 Kusī tamo tunī, idi neid orowa geid, Jesus tari difiyen, teneub yoū fe di, ereb ereb ganan wowā ye di, dile fen, fatuk bagai terē de fen, diron, “Momoī bagai, ī Negur Naal!”

55 Kayau musei an difaren, idi so del fen, lo difen. Idi Galili anenem Jesus aruna yaleya nigin dō difen anidi.

56 Idi atun Maria Magdala tamal, Maria Jems Joses ado neid sineid, taka Sebedi gere tar neid sineid.

Jesus Mū Difen

(Mak 15:42-47; Luk 23:50-56; Jon 19:38-42)

57 Aragau mog, safina ado tamo, Arimatea tamal, yana Josef isin, ī Jesus nē dō fiya tar anī nē taka.

58 Ī Pailat wagen ile, Jesus nē bouwa buru nigin to fiyē di, Pailat yo ye fen, Jesus nē bouwa buru ī ifenēya nigin, kusī tamo irokenēdin.

† 27:35: Itotoya tunī dum ditoton: *gadō difen, are od profet wogō yen anī kisi falauf nigin: “Idi neu gabar idi atun gadō de fen, neu kolos nigin aisaī dira ken, kodē den.”* (Sam 22:18) ‡ 27:46: Sam 22:1

Ŗ 27:48: Maaīwō tamal safina taka, ku nanaal musei ado naan dū fedig.

⁵⁹ Josef bouwa buru yale gabar lalau amuyē sā anim sile fen.

⁶⁰ Agef fen, ĩ yogon matmat mata sa bun ku yalen ani bun, Jesus nē bouwa buru inenen. ĩ meein odug wele fe di, isi, matmat awa ku katī fel fen, ilen.

⁶¹ Maria Magdala tamal, Maria taka ado, matmat wagen dibodon.

Kusī Tamo Matmat Lo Difen

⁶² Naa taka, Sabat naa nē dodok fiya naa anī bure fele di, pris odudug, Farisia tamo geid, Pailat wagen dilen.

⁶³ Idi diron, “Tamo Odug, amā karī maulef, idegēya tamo ĩ matan iyo ken, iron, ‘Naa towo bure fele di, aya laa bun tamal, baban mata kel fā auf.’

⁶⁴ Age fiya nigin, ō urō len, naa towo bun matmat total bagai tari difouf. Age fiya sāf, in dō fiya tar disi, bouwa buru bē dale mā, tamo kayau didegneīd fen, ĩ laa bun tamal kel fā yel douf. Idegēya dum isiyouf anī gai sane bagai, uruwa nē wal fiyauf.”

⁶⁵ Pailat iron, “Lo fiya tamo tekelei waleg. Uleg fen, ā, taka nem matmat bun ileya nigin, total bagai katī feleya nigin, ā keleī anī kilei bagai, matmat agog total bagai lo gouf.”

⁶⁶ Anī nigin, idi dile, matmat bun meein teten wō dū dino fen, lo fiya tamo anī dinenen.

28

Jesus Laa Bun Tamal Mata Kel Fā Yen

(Mak 16:1-10; Luk 24:1-12; Jon 20:1-10)

¹ Sabat naa bure fele di, uub nē naa matu bun bonimeī mumurei ado, Maria Magdala tamal, Maria taka ado matmat dilou fenē dilen.

² Sain anī bun kaisā bagai, mimī total ado wō yen, ere nigin, Odug nē engel saa ilun tamal isin, matmat bun ilen, meein welef yerin ile di, teten ibodon.

³ Agef fen, in lo fiya kolimeī filiya gen, in kolos lalau medeīya saa lalo lalau gen.

⁴ Matmat lo difen tamo, idi ĩ nigin kumī de, tererē de fen, laa tamo gen denenan.

⁵ Engel kayau irokenēdin, “To kumī wog, ere nigin, aya keleī, ā Jesus aa tetek bun dun anī umirnēgef.

⁶ ĩ ein sā, ĩ iron kilei, mogo laa bun tamal mata kel fā yel. Usig fen, ĩ yenen modoū uleg.

⁷ Agog fen, kaisā bagai uleg, in dō fiya tar urokenēdig: ‘ĩ laa bun tamal kel fā ye fen, ĩ ketem Galili ilef. An ā ĩ ulogouf.’ Aya mogo ā arokeneim.”

⁸ Age ye di, kayau idi, kaisā bagai matmat ditor dilen, kumī den, anī ere, waud kulīya ado, Jesus nē dō fiya tar dirokenēdiyou fenē nigin gududu den.

⁹ Age de mog, Jesus tarabā feid fen, iron, “Fel.” Idi ĩ wagen disin, in ye dirou fen, seli dabin.

¹⁰ Age dife di, Jesus idi irokenēdin, “Ā, to kumī wog, uleg fen, neu turau tar idi, Galili dilauf nigin urokenēdig; idi an aya dileyau.”

Matmat Lo Fiya Tamo Neid Od

¹¹ Kayau naab luwe dile mog, matmat lo difen tamo tunī, taun namen dile, pris odudug bun, ereb ereb ganan wō yen anī nigin od dinon.

¹² Pris odudug, mudur adodo geid, guru de, kisi katō de fen, idi kusī tamo moni odug difenēdin.

¹³ Idi, matmat lo difen tamo dirokenēdin, “Ā urōgouf, ‘Jesus nē dō fiya tar bō disi fen, mainana kel mog, in bouwa buru bē dalen’ gouf.

¹⁴ Od enī gawaman nē mudur bun ilauf are, amā faded mafiyē di, ā morō to walogouf.”

¹⁵ Anī nigin, kusī tamo moni dalen, idi diron kilei age difen. Od enī, Juda tamo kayau bun iyokelen, gamag agef yenek.

Jesus In Dō Fiya Tar Soosi Kabī Odug Ifenēdin

(Mak 16:14-18; Luk 24:36-49; Jon 20:19-23; Aposel 1:6-8)

¹⁶ Age fe di, in dō fiya tar ilewen Galili dilen, arei Jesus irokenēdin nē an dilen.

¹⁷ Sain idi Jesus dilen, idi seli dabinen, anĩ ere, tunĩ waud urun.

¹⁸ Age dife di, Jesus wagedin isin irokenēdin, “Megeir adok, saa ilun nē ado tenebur nē anĩ ganan, Negurem aya ifanan.

¹⁹ Anĩ nigin, ā, teneub ganan bun, tamo kayau ganan bun uleg fen, neu dō fiya tar unenādigouf, Dei yana nem, Naal yana bunem, Awa Uur Fateul yana bunem, idi naan ugunēdigouf.

²⁰ Agog fen, od aya ā arokenein anĩ ganan dō difouf nigin ufelnēdigouf. Momoi bagai, aya ā geid sain faimud tabodok, ile, sain idikalauf bun.”

Mak

*Jon Naan Igunēdiya Tamo Naab
Dodok Fenen
(Matyu 3:1-12; Luk 3:1-18; Jon
1:19-28)*

¹ Jesus Kristus, Negur Naal nigin, biya od gariya inoya.

² Profet Asaia nē itotoya bun ibodok:

“Aya neu arū tamo ī ket sur afe di, ī uyu ilauf,

ogon naab dodok foug.”*

³ “Ait taka gerere tuan iweig irok,

‘Odug nē naab dodok ge fen, madur wenēg.’ †

⁴ Age fiya nigin, Jon isin, tamo kayau gerere tuan od irokenēdi di, waud falei del, nedi mosor yaleleya nigin naan igunēdin.

⁵ Judia kalilī fiya, Jerusalem tamo kayau ganān, ī garan dilen. Idi neid mosor kurō difesi di, idi im Jordan naanū naan igunēdin.

⁶ Jon kamel siwi nem gabar diwan anī ifonūdig. Agef fen, gaar gabar nem lū diwan anim luwa gu fedig. Ī totobi nin te ado yōdig.

⁷ Eī enī yogon od iron, “Taka ī aya dumeun dō fiyauf, anī ere, in megeir neu wal fiya. Aya to biya nigin, iborou bobou fe fen, in ye su nē malū biru fiya kisi feleya sã.‡

⁸ Aya naan nem aguneik, anī ere, ī Awa Uur Fateulem iguneif.”

*Jesus Naan Igun Ado Ī Bun Kisi
Fiya Wō Yen*

*(Matyu 3:13-4:11; Luk 3:21, 22;
4:1-13)*

⁹ Sain anī bun, Jesus Nasaret taun oun Galili nediwom isi, Jonem Jordan naan igunen.

¹⁰ Jesus naanum fã yale fen, ī lof mog, saa tano kãf fen, Awa Uur kuburir gen, ī bun isi mog, ilen.

¹¹ Age fe di, ait taka saa ilunem isin, “Ō neu Kesu, ō nigin aya wau laa fedig, ō nigin aya wau kulī yedig.”

¹² Kaisã bagai, Awa Uurem sur fiyē di, gerere tuan ilen.

¹³ Ī gerere tuan an, naa foti ibod mog, Satanem kisi fiyen. Ī gaar kuñ geid difar mog, engel idim anī Ī disennen.

*Jesus Nē Dō Fiya Tar Uyulil
Iweignēdin*

(Matyu 4:12-22; Luk 4:14, 15; 5:1-11)

¹⁴ Jon kalabus bun dinenen ibod mog, Jesus Galili ile, Negur nē biya od anī kurō feis iron.

¹⁵ Ī iron, “Sain mogo isil. Negur nē tano mogo melsak. Wauñ falei wog fen, biya od enī nigin wauñ momoi gei!”

¹⁶ Jesus Galili maaī yeri iyo ken, Ī Simon, ne tura Endru ado, daliyou bun kakãg dirã mog, ileidin, ere nigin, idi gau yaleya tamo. ¹⁷ Jesus iron, “Usig, dō wiyag, aya ã tamo gei fiya nigin aneyeif.”

¹⁸ Sain anī bun bai, nedi kakãg ditor ken, Ī dō difiyen.

¹⁹ Sain Ī naal iyok ile fen, Ī Sebedi naal Jems, tura Jon ado, waag namen, idi neid kakãg dodok dife mog, ileidin.

²⁰ Kaisã bagai, Ī iweignēdin. Age fe di, idi temeid Sebedi, in kabī tamo oroi yaledin anidi geid waag bun ditorneid fen, Jesus dō difiyen.

Jesus Kaa Sane Irun

(Luk 4:31-37)

²¹ Idi Kapenaum taun dilen. Sain Juda neid uub naa Sabat wō ye di, Jesus Juda neid uub fō namen ile fen, od ifelnēdiya gariya inon.

²² Tamo kayau in od nigin terē den, ere nigin, Ī tamo yana adom gen ifelnēdin, Ī lo ifelnēdiya tamo gen sã.

²³ Agef mog bai, tamo taka kaa sanem ironen anī, nedi uub fō namen an kaī ye iron,

* 1:2: Malakai 3:1 † 1:3: Asaia 40:3 ‡ 1:7: Juda neid tobonunã anī, sain tamo yana ado isi di, idi neid kabī tamo in ye su nē malū biru difedig.

24 “Õ amã ere naig wamã fenê, Jesus Nasaret tamal? Õ amã daig wamã fenê nigin usil de? Aya õ nigin keleĩ, Negur nê Fateul bagai!”

25 Jesus total ado iron, “Foro wol! Ì namen tamal ulõ weis!”

26 Kaa sane, tamo anĩ total bagai yokũ fiyê, sur fiyê, ira ken, kaĩ ye, ulõ yesin.

27 Tamo kayau ganan terê de fen, abob toti difen, “Eĩ ere? Keleĩ mata, agef fen, total ado! Ì irõ di, kaa seseneg dõ difedig.”

28 Ì age fen anĩ nê od kaisã bagai, Galili kalilĩ fiya fonõ anĩ adok iyokenlen.

*Jesus Musei El Fedin
(Matyu 8:14-17; Luk 4:38-41)*

29 Sain Juda neid uub fõ ditor ken, kututũ desin, idi Jems Jon ado weim, Simon Endru ado neid fõ bun dilen.

30 Simon nê mam, Ì bouwa uruwa odug ado nigin fatarê yenen, anĩ idi Ì nigin Jesus dirokenen.

31 Anĩ nigin, Jesus kayau wagen ile, kayau ima yales irou isennê di, fã yen. Age fe di, bouwa uruwa anĩ kayau folo fiye kele di, kayau Ì aruneid yalen.

32 Aragau anĩ bun gaa kuru kel mog, tamo kayau dagi adodo, kaa sesen adodo ganan, Jesus wagen guri difeid, disin.

33 Taun anĩ nê tamo kayau ganan, fofomala anĩ bun guru difen.

34 Anĩ bun, Jesus, tamo kayau dagi fire fire adodo musei el fiyêdin, kaa sesen musei irudi di, diyawon. Anĩ ere, kaa sesen idi Ì nigin kelein. Anĩ nigin, idi to wogõ douf nigin sigoreid ifofan.

*Jesus Moilin Negur Kosê Fiyen
(Luk 4:42-44)*

35 Bonimeĩ bagai mumurei ado, Jesus fã yale, fõ itor, moilin ile, an Negur kosê fiyen.

36 Simon Ì, ne tã tar geid dimirne ken, dilen.

37 An fotou difiye ken, idi dirokenen, “Tamo kayau ganan õ dimirnok!”

38 Jesus aitedin yale iron, “Ada uyu takã talauf, fonõ melsã anĩ bun. Aya aneg od arõf, anĩ nigin aya asin.”

39 Age ye fen, Jesus Galili kalilĩ fiya ganan bun iyo ken, nedi uub fõ fõ bun od iro ken, kaa sesen irudi di, diyawon.

*Tamo Taka Lepra Dagi Ado
(Matyu 8:1-4; Luk 5:12-16)*

40 Tamo taka lepra dagi ado, Ì wagen isi, ibor bobou fe fen, igon, “Õ oroyõf are, el wiyauf.”

41 Jesus wau gudũf fen, ima irã, kobũ fiye ken, Ì iron, “Aya wau irok, õ bouwã biyaf!”

42 Age ye di, kaisã bagai lepra guruma Ì itornê di, bouwa biya len.

43 Jesus kaisã bagai total bagai weder irou fen, sur fiyê di, ilen:

44 “Karĩ welei, enĩ aib taka to urokenêf, anĩ ere, õ pris wagen ule, õ bouwã ufehnêf, õ bouwã biyal anĩ nigin Moses nê od irok anĩ dõ fen, sesewi fiya wenêf, anĩ bunem yaore di, tamo kayau dilouf.”

45 Anĩ ere, Ì iyok ile fen, kurõ feis irõ di, od anĩ iyokelen. Anĩ nigin, Jesus mal atun taun taka bun to iledig, Ì moilin ibodon. Anĩ ere, tamo kayau firen firen temeleid fau fau Ì wagen disidig.

2

Jesus Tamo Bouwa Ilolaisin Anĩ El Fiyen

(Matyu 9:1-8; Luk 5:17-26)

1 Naa tunĩ bure fele di, Jesus baban Kapenaum taun ile di, tamo kayau idi, Ì fõ taka bun ibodok yeya anĩ karĩ den.

2 Anĩ nigin, tamo kayau musei guru difen, fõ aaben ado fofomala dino dale di, modoũ san. Age dife di, Jesus od irokenêdin.

3 Jesus od irokeneid mog, tamo tunĩ tamo ilolaisin anĩ tamo aiwa ifenêyam faali de, dirou disin.

4 Idi Ì Jesus garan irou ileya kisi feleya sã, ere nigin, tamo kayau musei, anĩ nigin, idi Jesus ibodok nê fõ soko

anī korō difel fen, tamo gabgab bun yen mog, folo folō dife di, isilen.

⁵ Jesus idi neid momoiya ile fen, ī tamo ilolaisin irokenen, “Kesu, ogon mosor alelkonok.”

⁶ Age fe di, lo ifelnēdiya tamo tunī an dibodon, idi dogo namedin kisi difen,

⁷ “Ere nigin ī age irok? Ī kono fef! Taka nem mosor yaleleya to yenek, Negur yogo dogol.”

⁸ Kaisā bagai, Jesus yogon kisi bun, idi waudim kisi difen anī kelein. Agef fen, ī idi irokenēdin, “Ā ere nigin agog kisi gef?”

⁹ Tamo ilolaisin anī irokenēya nigin nanī anī karika, ‘Ogon mosor alelkonok’ de, ‘Fā wo, ogon gabgab wale fen, uyok ule’?

¹⁰ Anī ere, Tamo Naal ī tenebur ein mosor yaleleya nigin yana ado anī, ā keleī youf nigin...” Age ye fen, ī tamo ilolaisin anī irokenen,

¹¹ “Aya ō arokonok, fā wo, ogon gabgab wale fen, fō bun ule.”

¹² Ī fā yale, ganan meleid bun in gabgab yale iyok ilen. Age fe di, tamo kayau ganan terē de fen, Negur yana dales diron, “Ada kulu ereb eig fiya taka to tailen!”

Jesus Lewi Iweignen
(Matyu 9:9-13; Luk 5:27-32)

¹³ Jesus ī baban daliyou sirin ilen. Tamo kayau musei ī wagen disile di, ī od gariya ino ifelnēdin.

¹⁴ Ī iyok ile, Lewi, Alfeus naal, takis yaleya fō bun ibod mog, ile fen, irokenen, “Aya dō wiya.” Age ye di, ī fā yale, dō fiyen.

¹⁵ Jesus Lewi nē fō bun saaf yō mog, takis yaleya tamo musei, mosor adodo tamo kayau musei, ī, in dō fiya tar geid, weim saaf don, ere nigin, idi musei Jesus dō difiyen.

¹⁶ Sain lo ifelnēdiya tamo, Farisia tamo idi, Jesus ī takis yaleya tamo, mosor adodo tamo kayau geid, weim saaf doko dibod mog, dileid fen, idi

in dō fiya tar anī to difiyēdin, “Ere nigin ī takis yaleya tamo, mosor adodo tamo kayau geid weim doko?”

¹⁷ Anī karī ye fen, Jesus idi irokenēdin, “Dagi sã anidim dokta bun ileya nigin waud to yenek, dagi adodom dogol. Aya madur tamo anidi iweignēdiya nigin to asin, mosor adodo tamo anidi iweignēdiya nigin asin.”

Kuri Nigin Jesus To Difiyen
(Matyu 9:14-17; Luk 5:33-39)

¹⁸ Jon nē dō fiya tar, Farisia tamo geid, idi kuri den. Tamo tunī disi, Jesus to difiyen, “Naig fe di, Jon nē dō fiya tar, Farisia tamo nē dō fiya tar geid, idi kuri dedig, anī ere, ogon idi sã?”

¹⁹ Jesus aitedin yale iron, “Naig fe di, mois tamo ibod mog, in tamo tar idi kuri douf? Idi to age difouf, ere nigin, ī idi geid fau dibodok.

²⁰ Anī ere, naa fau isi di, anī bun mois tamo idi bun tamal yalelnē di, naa anī bun gama idi kuri douf.

²¹ “Tamo taka, gabar tubu, gabar masak mata ado baguf fen, to iwauf. Taka ī age fouf are, masak mata anim tubu arirī fe di, tubu kundef irailauf.

²² Takag age fiya, taka nem wain mata meme gabar* tubu bun to it-inēf. Ī age fouf are, wain anim age fe di, meme gabar gē ye fen, serek fouf. Age fe di, wain meme gabar ado sane lauf. Age fiya nigin, ī wain mata meme gabar mata bun itinēf.”

Jesus Ī Sabat Nē Odug
(Matyu 12:1-8; Luk 6:1-5)

²³ Sabat naa† taka bun, Jesus in dō fiya tar geid, wit kabī atu diyok dile fen, idi wit biya tunī fito difen.

²⁴ Age dife di, Farisia tamo idi Jesus dirokenen, “Ulef, ere nigin idi Sabat naa nē lo difodul ken, Sabat naa bun oug difef?”

²⁵ Jesus irokenēdin, “Sain Dawid, ne tã tar geid naũ fedi di, saaf lau

* 2:22: Juda neid tobonunã, idi meme gabar nem darum diwadig. † 2:23: Sabat naa anī, Juda neid uub nē naa.

de fen, Dawid age fen anī, ā to uwe-segen de?

²⁶ Abiata, pris mudur ado ibodon sain anī bun, Dawid ī Negur nē fō namen ile fen, bret fateul prisem dogol dōdig‡ an ibodon anī yokon, ī bret tunī, ne tā tareg ifenēdin.”

²⁷ Age ye fen, ī idi irokenēdin, “Tamo isennēya nigin Sabat naa inon, tamom Sabat naa anī isennēf nigin to inon.

²⁸ Anī nigin, Tamo Naal ī Odug, Sabat nēg ī Odug.”

3

Tamo Taka Ima Sitakā Gege Fefu Fiya

(Matyu 12:9-14; Luk 6:6-11)

¹ Sain taka, Jesus baban Juda neid uub fō bun ilen. Tamo taka ima sitakā gege fefu fen anī, an ibodon.

² Tamo tunī an difaren idi, Jesus bouwa bun od dinouf nigin naab dimiren, anī nigin, idi ī Sabat naa bun tamo anī el fiyē mog, dilouf nigin ololo difen.

³ Jesus tamo ima fefu fiya anī iro-kenen, “Ganan meleid bun fā, ufar.”

⁴ Age ye fen, Jesus idi to fedin, “Nanī anī Sabat naa bun lo dō fiya? Tobonunā biya age fiya anī de, to-bonunā sane age fiya anī; isennē di, mata ibodōya anī de, yukesiya anī?” Anī ere, idi nin kē delen.

⁵ Jesus seye ye fen, idi fele fedin, idi waud togun nigin, ī wau odug gudūf fen, tamo anī irokenen, “Ogon imā yaī wo.” Ī yaī fe di, in ima oditekei biya len.

⁶ Age fe di, kaisā bagai Farisia tamo idi kututū deis dile, Herod nē dō fiya tar weim, idi Jesus naig de dukesiyouf nigin od katō difen.

Tamo Kayau Musei Jesus Dō Difen

⁷ Jesus in dō fiya tar geid, daliyoun disile di, tamo kayau musei Galili temeleid dō difen.

⁸ Jesus ī ereb ereb ganan age fen anī karī de fen, tamo kayau musei Judia distrik, Jerusalem taun, Idumea distrik, Jordan naan kalilī fiya, Taia Saidon ado kalilī fiya adok, ī wagen disin.

⁹ Tamo kayau museim Jesus to sile difiyēf nigin, ī yogon waag naal taka dodok de yenēf nigin, in dō fiya tar irokenēdin.

¹⁰ Ere nigin, ī mogo musei el fedin. Anī nigin, idi dagi adodo Jesus kobū fiya nigin abob susur difedin.

¹¹ Kaa sesen Jesus dilef sain ganan, idi ī wagen kuku de, den ken, diweig dirōdig, “Ō Negur Naal.”

¹² Anī ere, Jesus, ī aib anī, to wogō douf nigin total bagai katū fedin.

Jesus Aposel Tuwelf Igirnēdin

(Matyu 10:1-4; Luk 6:12-16)

¹³ Jesus arei wala bun isel ibod ken, idi ī aib aib oron anī iweignēdin. Age fe di, idi ī wagen disin.

¹⁴ Jesus ī tuwelf gei fen, aposel wowā douf nigin igirnēdin, are idi Jesus geid fen, dum biya od wogō douf nigin fau sur fediyouf,

¹⁵ idi total dale fen, kaa sesen dirudiyouf nigin age fen.

¹⁶ Jesus tuwelf igirnēdin enidi, are Simon (Jesus ī yana yun Pita),

¹⁷ Jems Sebedi naal, tura Jon ado (Jesus idi yeneid yun Boaneges, anī nē gariya, Kolimei Gere Tar),

¹⁸ Endru, Filip, Batolomyu, Matyu, Tomas, Jems Alfeus naal, Tadeus, Simon Selot* taka,

¹⁹ Judas Iskariot, ī dum Jesus kiwai imeid bun inenen.

Jesus Belsebub Ado Difiyen

(Matyu 12:22-32; Luk 11:14-23; 12:10)

²⁰ Jesus ī, fō taka bun ile di, tamo kayau musei baban guru difen. Anī nigin, Jesus in dō fiya tar geid, saaf yōya kisi feleya san.

²¹ Jesus nē tura tar od anī karī de fen, idi ī dale diroulauf nigin dilen,

‡ 2:26: Lo bun, bret fateul anī, prisem dogol dōdig.

* 3:18: Juda neid kusī mala taka, idi Rom gawaman ado kusī dedig.

ere nigin, idi diron, “Ī neneya kisi ado.”

²² Age dife di, lo ifelnēdiya tamo Jerusalem temeleid disi diron, “Ī Belsebub ado, ĩ kaa sesen neid mudur yana bunem, kaa sesen iru-didig.”

²³ Anĭ nigin, Jesus idi iweigneĭd fen, yaab od nem irokenēdin, “Satan ĩ naig Satan iruwauf?”

²⁴ Tano tekelei anĭ, yogo faraf, kiwai ifenēf are, tano anĭ to ifarauf.

²⁵ Fō tekelei anĭ, yogo faraf, kiwai ifenēf are, fō anĭ to ifarauf.

²⁶ Takag, Satan ĩ yogo faraf, kiwai ifenēf are, ĩ to ifarauf, in sain mogo bure felef.

²⁷ Anĭ ere, taka nem tamo total ado nē fō bun safina gei fou fenē, tamo total ado ket ifokel fen, anĭ ĩ yogon fō bun bē yalouf.

²⁸ Aya ā momoi arokeneik, tamo neid mosor ganan ado kono difef are, fau yalel kenēdiyof.

²⁹ Ani ere, aibem taka Awa Uur Fa-teul kono fiyek, in mosor to yalelauf, in mosor anĭ faimud ibodkalauf.”

³⁰ Jesus od enĭ iron, ere nigin, idi dirōdig, “Ī kaa sane ado.”

*Jesus Nē Sina, Tura Tar Geid
(Matyu 12:46-50; Luk 8:19-21)*

³¹ Age ye di, Jesus nē sina, tura tar geid disin. Mayarē difar mā, idi Jesus dirokenēf nigin taka sur difen.

³² Tamo kayau musei ĩ salili difiyek dibodon, idi ĩ dirokenen, “Ogon sinā, turā tar geid, mayarē ō dimirnok.”

³³ Jesus to fedin, “Ai anĭ neu naai, neu turau tar?”

³⁴ Age ye fen, ĩ, salili difiyē dibodon idi lo feid fen, ĩ iron, “Enidi anĭ neu naai, neu turau tar!”

³⁵ Aib idi Negur nē oroya dō difedig anidi anĭ, neu turau, neu mainou, neu naai.”

4

*Faat Irarāya Tamo Nē Yaab Od
(Matyu 13:1-23; Luk 8:4-15)*

¹ Jesus baban daliyou sirin, gariya ino, od ifelnēdin. Tamo kayau guru

de, salili difiyen anĭ gai musei biya, anĭ nigin, tamo kayau adok ubun di-far mog, ĩ waag taka daliyou ifaren anĭ namen isil ibodon.

² Agef fen, erab erab musei yaab od nem ifelneĭd fen, iron,

³ “Karĭ gei! Kabĭ marau taka faat irarāf nigin ilen.

⁴ Sain ĩ irarak ile mog, tunĭ naab luwen kuku ren, are ninā disi dakasin.

⁵ Tunĭ meein tuar kuku ren, an teneub badagar. Are kaisā bagai fokū den, ere nigin, teneub are bada-gar bagai.

⁶ Anĭ ere, sain gaa ise di, bali are ilalaid, laasi yedin, ere nigin, idi warumutei sã.

⁷ Faat tunĭ malū duri atun kuku ren, are malū duri anĭ fã ye fen, sile feledin, anĭ nigin, biya to yun.

⁸ Faat tunĭ teneub biya bun kuku ren, are idi fokū yedin, oduduge di, biya imadin, taka biya teti, taka biya siksti, taka biya wan hundred, age fef ilauf.”

⁹ Age ye fen, Jesus iron, “Taka ĩ karĭya nigin weder ado, ĩ karĭ youf.”

¹⁰ Sain Jesus ĩ yogo ibod mog, yogon dō fiya tar tuwelf, tamo tunĭ salili difiyen anidi geid, yaab od nigin ĩ to difiyen.

¹¹ Jesus idi irokenēdin, “Negur tano nē waa are Negur mogo ifenein, anĭ ere, idi dumeitur onudi nigin, erab erab ganan yaab od bunem wogō yef,

¹² ere nigin,
“ ‘idi meledim diledig, anĭ ere, idi meleid fokōya sã,
idi wederedim karĭ dedig, anĭ ere, idi gariya keleĭ sã.

Age fiya sãf are, idi waud falei de di, mosor yalel kenēdiyof.* ”

¹³ Age ye fen, Jesus idi irokenēdin, “Ā yaab od enĭ wauĭ to fokō youf? Age fiyauf are, naig fe di, ā yaab od tunĭ nigin wauĭ fokō youf?

¹⁴ Faat irarāya tamo, biya od irarak.

* 4:12: Asaia 6:9, 10

¹⁵ Tamo tunī idi faat naab luwen kuku ren gen, an biya od iraran. Idi karī de mog, kaisā bagai Satan isi, biya od idi namedin iraran anī yaleledig.

¹⁶ Tunī idi faat meein tuar iraran gen, idi od anī karī de fen, kaisā bagai dale fen, waud bun kulī dedig.

¹⁷ Anī ere, idi warumutei sã, anī nigin, idi sain meluk to dibodōf. Sain, biya od nigin, morō be kafī fiya be isif, idi kaisā bagai dirofosif.

¹⁸ Tunīg faat malū duri atun iraran gen, idi biya od karī den.

¹⁹ Anī ere, tenebur mata ibodōya nē sii fiya, safina ado ibodōya nē kisi fiya, oroya fire fire isif anidim, biya od sile fe di, anim biya to yūf.

²⁰ Tunī faat teneub biya bun iraran gen, idi biya od karī den, dale di, anī biya yūf, taka biya teti, taka biya siksti, taka biya wan handred, age fef ilauf.”

Lam Yoki Bun (Luk 8:16-18)

²¹ Jesus idi irokenēdin, “Ã lam urou usig, beī kuren be fatar farumen unogouf de? Age fiya ban, ã lam yogon yoki bun to useginnēgouf de?”

²² Ereb ereb ganan iminēyan yenek anī ganan yaor fouf, ereb ereb ganan nar fen yenek anī ganan irou isi, biru fel fen, yaau du fouf.

²³ Taka ī karīya nigin weder ado, ī karī youf.”

²⁴ Jesus idi irokenēdin, “Ã od karī gef anī, ed ge kisi gouf, ã idi nigin kisi gef gen, ã nigineg age de kisi difouf, anī tobol feneif.

²⁵ Aib taka ī ado, wal fiya ifenēf, aib taka ī sã, ereb ereb ī ado anīg ī bun yalelauf.”

Faat Odugef Nē Yaab Od

²⁶ Takag Jesus iron, “Negur nē tano are eig fiya gen, tamo taka teneub bun faat irarak.

²⁷ Bō ado gaa ado, tamo ī mulaī yenek, fã ye iyok, faat fokū ye fen, odugef, anī ere, ī naig be fe odugef, ī keleī sã.

²⁸ Teneub yogo dogol biya inodig, uyulil bali, age fe di, turu, anī turu bun biya inodig.

²⁹ Biya bure fele di, kaisā bagai ī dimig gunō waila ado inodig, ere nigin, biya yaleya sain isif.”

Masted Faat Nē Yaab Od (Matyu 13:31, 32, 34; Luk 13:18, 19)

³⁰ Baban Jesus iron, “Negur nē tano, ere taka age fiya tauf? Ere bunem yaab tafouf?”

³¹ Ī masted faat age fiya. Ī faat memereis bagai ã teneub bun utenēgedig.

³² Anī ere, ī utenēge di, ī odugouf, ī kabier saaf ganan wal fediyouf, in beneir odudug irara ken, buri ino di, ninã ilun temeleid disi dibodōf.”

³³ Jesus yaab od age fediya musei bunem, tamo kayau idi keleī youf kisin, od wogō fiyēdin.

³⁴ Ī tamo kayau ereb od irokenēdiyoyou fenē, yaab od bunem dogol. Anī ere, ī mugu yogon dō fiya tar geidef are, ereb ereb ganan faded fedidig.

Jesus Yau Uyē Ado Irokenēdi Di, Kee Delen (Matyu 8:23-27; Luk 8:22-25)

³⁵ Naa anī bun aragau di, Jesus in dō fiya tar irokenēdin, “Ada daliyou sitakã talauf.”

³⁶ Idi tamo kayau ditorneid fen, Jesus waag bun ibod mog, idi ī dale dirou dilen. Waag tunīg weim dilen.

³⁷ Yau odug fã ye di, maaī fã ye, waag yu ken, maaī iflege di, waag namen isokosen.

³⁸ Jesus ī, waag ibun edē bun mulaī yen mog, idi ī turī difiyē dirokenen, “Tise, ada naanū talalau fenē, ō to kisi walef de?”

³⁹ Ī fã yen, yau sakã fiye ken, maaī irokenen, “Kee resig fen, dē weleg!” Age ye di, yau dē yele di, maaīg oditekei dē yelen.

⁴⁰ Jesus in dō fiya tar irokenēdin, “Ere nigin ã kumī wogef? ã fau momoiya sã de?”

41 Idi fatuk bagai kumĩ tererẽ de fen, abob toti difen, “Eĩ aim bagai? Ĩ irõ di, yau maaĩ adog ait dõ difef!”

5

Jesus Tamo Taka Kaa Sesen Musei Ado El Fiyen

(*Matyu 8:28-34; Luk 8:26-39*)

1 Idi naan daliyou dibal dile, Gerasa teneub bun wõ den.

2 Jesus waag bun tamal kutũ yesi di, tamo taka kaa sane ado, matmat bunem ĩ fotou fiyẽ fenẽ isin.

3 Tamo matmat bun ibodon anĩ, taka nem ĩ ifõya nigin kisi feleya sã, sen nemeg ifõya kisi feleya sã.

4 Ĩ sain musei sen nem, ye ima ado difofãdig, anĩ ere, ĩ sen kokour fel, yem ain weweur fedig. Taka nem totol ino fen, ĩ ifõ di, dẽ yeleya kisi feleya sã.

5 Sain ganan bõ ado gaa ado, ĩ matmat atun ado areineg iweig kaĩ ye fen, meinem yogo bouwa kokour fedig.

6 Ĩ mala irakelen, Jesus gerom ile fen, gudu ref ile, Jesus wagen kubũ ye, ibor bobou fen.

7 Ĩ ait odug nem iweig iron, “Õ aya ere naig wiyau fenẽ, Jesus, Negur Ilun Bagai nẽ Naal? Negur yana nem aya õ agonok, õ aya to daig wiyauf!”

8 Ere nigin, ĩ mogo kaa sane irokenen, “Õ tamo enĩ bun tamal ulõ weis!”

9 Age ye fen, Jesus ĩ to fiyen, “Õ yanã ai?”

Ĩ iron, “Aya yanau Ami, ere nigin, amã musei biya.”

10 Jesus idi akor anĩ bun tamal to irudiyouf nigin, ĩ baba baban Jesus igonen.

11 Melsã arei wala sirin, bor musei biya saaf doko difaren.

12 Kaa sesen Jesus digonen, “Amã bor atun susur wamãf, yo wamã di, idi namedin malalauf.”

13 Jesus idi yo fedi di, kaa sesen ulolõ deis disel, bor namedin dilelen. Bor, tu tausen age fiya, gududu de,

bebeig sane baurin daliyoun disil, naanũ gare desin.

14 Bor lo fiya tamo diya dile, od anĩ taun ado fonõ fonõ wogõ den. Age dife di, tamo kayau ereb wõ yen anĩ dilou fenẽ dilen.

15 Sain idi Jesus garan wõ den, idi meleid dirã, tamo kaa sesen museim dirounen anĩ, an garab yel, kisi biya ado ibod mog, dilen. Anĩ nigin, idi kumĩ den.

16 Tamo idi meledim dilen anidim, kaa sesenem tamo diroun anĩ ado bor age difen anĩ nigin, tamo kayau wogõ difiyẽdin.

17 Age dife di, tamo kayau, Jesus ĩ idi neid teneub anĩ itor ilauf nigin digonen.

18 Age de di, Jesus ĩ waag bun sõ ye mog, tamo kaa sesenem dalen anĩ, Jesus ado dilauf nigin nonĩ fiyen.

19 Jesus ĩ to awa yokon irokenen, “Õ fonõ ogon ibor tar gedin ulauf, Odug õ nigin age fen anĩ ado, ĩ naig fe fen, õ nigin wau yun anĩ, idi urokenẽdiyof.”

20 Age ye di, tamo anĩ itor ilen, Jesus ĩ nigin age fen anĩ, Dekapolis* teneub bun tamo kayau wogõ fiyẽdi di, idi ganan terẽ den.

Kayau Naal Laa Fen Ado Dagi Kayau Taka

(*Matyu 9:18-26; Luk 8:40-56*)

21 Jesus baban waag bun ibal, naan daliyou sitakã ilen, ĩ daliyou yerin ibod mog, tamo kayau musei disi salili difiyen.

22 Age de mog, Juda neid uub fõ lo fiya nẽ mudur taka, yana Jairus an isin. Ĩ Jesus ile fen, ĩ ye gariyan kubũ yen.

23 Ĩ igone ken, irokenen, “Nau barai naal oboim fef. Uma fen, imã teten uno di, ĩ biyal, matauf.”

24 Anĩ nigin, Jesus ĩ uruwom dilen.

Tamo kayau musei dõ difiyẽ, kitikiti de, susir difiyek dilen.

25 Kayau taka idi atun an ifaren, ogõ dagi faimud ado yar tuwelf iyon.

* 5:20: Anĩ nẽ gariya, Ten Taun.

²⁶ Kayau anī dokta musei bun ilen, anī ere, bouwa bun morō odug idi bun yalen. Agef fen, yogon safina ganan irailen. Anī ere, kayau ī bouwa biya leya ban sane len.

²⁷ Sain kayau ī Jesus nigin karī yen, ī Jesus dume dōf, tamo kayau atu ile, in kolos kobū fen,

²⁸ ere nigin, kayau ī kisi fen, “Aya in gabar dogol kobū afouf, are deuf, aya fau biyauf.”

²⁹ Kaisā bagai, kayau naud segē yelen. Age fe di, kayau ī yogo bouwa bun karī yen, are karika len.

³⁰ Kaisā bagai, Jesus in total ī bun tamal ul fe yale mog, karī yen. Ī tamo kayau atun falei yel, to fedin, “Aim neu kolos kobū fel?”

³¹ In dō fiya tar Jesus dirokenen, “Tamo kayau musei ō kiti diyok, ule fen anī, ō ‘Aim aya kobū fiyal?’ wof.”

³² Anī ere, Jesus ī aibem age fen anī ilouf nigin, fau fau fai yen.

³³ Age fe di, kayau ī yogo ereb age fen kelei ken, Jesus wagen isi, ye gariyan kubū yen. Ī kumī tererē ye fen, momoi od ganan Jesus irokenen.

³⁴ Jesus kayau irokenen, “Nau barai, ogon momoiya anim el yom. Waū unois ule, dagi anim to ifōyōf.”

³⁵ Jesus fau od wogō ye mog, tamo tunī, Juda neid uub fō lo fiya mudur Jairus nē fō bunem disin. Idi diron, “Nē barai mogo laa fel. Ere nigin ō tise fau morō wenek?”

³⁶ Jesus od idi diron anī idod ken, Juda neid uub fō lo fiya mudur anī irokenen, “To kumī wo, momoi dogol wo.”

³⁷ Jesus ī takam dō fediya nigin katū fedin, Pita, Jems, ne tura Jon idim dogol.

³⁸ Idi Juda neid uub fō lo fiya mudur nē fō bun ulō deis fen, Jesus mala iran, tamo kayau waud gudūf fen, inā legur mog, ile din.

³⁹ Jesus aaben ile fen, idi irokenēdin, “Ere nigin ā fatuk bagai inaī gef? Kayau naal ī laa fiya sā, ī mulā yenek.”

⁴⁰ Anī ere, idi Jesus kasā difiyen.

Age dife di, Jesus idi irud le fen, ī kesu nē sina tama ado, in dō fiya tar geid, kesu yenen nē namen dilen.

⁴¹ Jesus ī imalē yalesne ken, irokenen, “Talita kum!” (anī nē gariya, “Kayau naal, aya ō arokonok, fā wo!”).

⁴² Kaisā bagai, kayau naal fā yale iyon (ī yar tuwelf ado). Anī nigin, idi oditekei terē den.

⁴³ Anī ere, taka to diro ken, karī youf nigin, Jesus total bagai katū fedin. Agef fen, ī kayau naal saaf difenē di, yāf nigin irokenēdin.

6

Profet Taka Fō Gariyan Yana Sā (Matyu 13:53-58; Luk 4:16-30)

¹ Jesus an itor ken, in dō fiya tar geid yogon fō gariyan dilen.

² Sabat naa wō ye di, Jesus Juda neid uub fō bun ifelnēdiya gariya inon. Age fe di, musei ī karī difiye ken, terē de diron,

“Tamo enī ereb ereb enei nain gei fen? Eī ere kelei anī ī ifenen? Anī bunem ī memelikeg inodig.

³ Ī to kapenta de? Ī to Maria naal fen, Jems, Josef, Judas, Simon ado tureid de? In main tar ada to ein weim de?” Age de fen, idi ī kiwai difenen.

⁴ Jesus idi irokenēdin, “Profet taka ī, in fō gariyan, in sirag atun ado, in fō bun dogol, ī yana sā.”

⁵ Ī an memelik taka inoya kisi feleya sā, anī ere, ī dagi tamo teke tekelei dogol ima tetedin ino fen, el fedin.

⁶ Jesus idi neid momoiya to ile fen, terē yen.

Jesus In Dō Fiya Tar Tuwelf Sur Fedin (Matyu 10:5-15; Luk 9:1-6)

Agef fen, Jesus fonō fonō iyo ken, od ifelnēdin.

⁷ Jesus tuwelf iweignēdi di, idi ī wagen disin. Ī uru uru, sur feid fen, kaa sesen dirudiyouf nigin, idi megeir ifenēdin.

⁸ Ī fadim yu ken, iron, “Delē uyōgouf nigin ereb taka to walogouf, bret sã, kodol sã, moni sã, manig dogol.

⁹ Sendel ufonūg fen, gabar ufi-laīgef dogol, taka to walogouf.

¹⁰ Ereb sain ā fō bun ulagouf, an ubodōgef uleg, taun anī utorōgouf.

¹¹ Fonō taka bun ā to daleyēi ken, ā to karī diyeīf, sain ā fonō anī utorōg fen, yeī aas tu welege di, idi ā kiwai difenein anī keleīf.”

¹² Tamo kayau waud falei youf nigin, idi dile, od wogō den.

¹³ Idi kaa sesen musei diruid fen, tamo kayau dagi ado musei moul diguneīd, el difedin.

Jon Naan Igunēdiya Tamo Ula Gudū Difen

(Matyu 14:1-12; Luk 9:7-9)

¹⁴ King Herod Jesus nigin od karī yen, ere nigin, Jesus nē yana fō fō ganan karī den. Tunī diron, “Jon naan igunēdiya tamo, ĩ laa bun tamal kel fã yen, anī nigin, memelik nē totol ĩ bun kabī yalef.”

¹⁵ Tunī diron, “Ī Eliya.”

Tunī diron, “Ī profet taka, profet kulu temeleid taka gen.”

¹⁶ Anī ere, sain Herod od enī karī ye fen, ĩ iron, “Jon, tamo anī ayam ula gudū afen, ĩ laa fen anī kel fã yen!”

¹⁷ Ere nigin, kulu Herod ĩ irō di, Jon dale difo ken, kalabus bun dinenen. Are Herod yogo tura Filip nē kayau Herodias yalen nigin,

¹⁸ Jon Herod irokenēdig, “Ō turā nē kayau son won, are lo ufodulen.”

¹⁹ Herodias Jon nigin name sane fen, ĩ dukesiyouf nigin wau iron. Anī ere, ĩ kisi feleya sã,

²⁰ ere nigin, Herod Jon kumī fiye ken, ĩ, Jon anī madur fateul tamo ye fen, kulatun fedig. Sain Herod ĩ Jon nē od karī yedig, ĩ wau togudig, anī ere, ĩ in od kariya nigin orodig.

²¹ Dum sain biya wō yen, Herod ĩ sina gō fen anī nē naa bun, in kabī tamo odudug, in kusī mudur adodo,

Galili teneub bun uyu irouya tamo anidi nigin tar inon.

²² Sain anī bun, Herodias nē barai isi, seg kui ye fen, dole di, Herod in tamo tar geid waud al fen.

Anī nigin, king kayau momoul irokenen, “Ereb taka nigin waū iro ken, to wiyau, are ō afonōf.”

²³ Age ye fen, ĩ wau adok kuturol fen, kayau momoul irokenen, “Ereb taka nigin ō to wiyau, aya neu tano anī fara af, uru afe fen, sitakā ifonōya kisin anī afonōf.”

²⁴ Kayau momoul ile, sina irokenen, “Ere bagai nigin aya to afiyēf?”

Sina iron, “Jon naan igunēdiya tamo nē mudur nigin.”

²⁵ Ī kaisā bagai ile, king irokenen, “Aya gama bagai Jon naan igunēdiya tamo nē mudur, beī bun uno wanauf anī orouf.”

²⁶ King ĩ wau togun bagai, anī ere, in wau kuturol fen, tamo kayau meleid bun mogo iron nigin, ĩ kayau nē od yaleleya itoron.

²⁷ Anī nigin, king kaisā bagai ula gudū fedig kabī tamo, Jon nē mudur yale irou isiyouf nigin sur fiyen. Age fe di, ĩ ilen, kalabus bun Jon ula gudūf fen,

²⁸ mudur anī beī bun ino irou isin, kayau momoul ifenē di, ĩ bam yale, sina ifenen.

²⁹ Jon nē dō fiya tar anī karī de fen, disin, in bouwa dale, matmat bun mū difen.

Jesus Faif Tausen Tamo Saaf Ifenēdin

(Matyu 14:13-21; Luk 9:10-17; Jon 6:1-14)

³⁰ Aposel idi Jesus wagen guru de fen, idi ereb age difen ado difelnēdin anī adok, wogō difiyen.

³¹ Age de mog, tamo kayau musei dilef disif difen, anī bunem, idi saaf yōya kisin san. Anī nigin, Jesus idi irokenēdin, “Ā aug dogol usig, aya geid talauf, modoū taka motikeleyan an si tanouf.”

³² Anī nigin, idi dogo dogol waag dale diya, moilin dilen.

³³ Anĩ ere, tamo kayau musei lo difeid mog, dilen nigin, idi nigin kelei ken, taun ganan bun temeleid idi yedim gududu de dile, idi ket an wowā den.

³⁴ Sain Jesus wō ye fen, mala iran, tamo kayau musei ileidin, ĩ idi nigin wau yun, ere nigin, idi sipsip marau sã gen. Anĩ nigin, ĩ ereb ereb musei idi ifelnēdin.

³⁵ Sain anĩ bun, gaa mogo kuru kelen, anĩ nigin, in dō fiya tar ĩ garan disu diron, “Eĩ gerere tuan, sain mogo sa kekel.”

³⁶ Tamo kayau susur wodi di, di-lauf, ago di, idi fonō kalilĩ fiya fonō fonō dile fen, dogo yōya nigin saaf na gei difouf.”

³⁷ Anĩ ere, ĩ aitedin yale iron, “Idi dāf nigin ereb āgem wenēdigouf.”

Idi ĩ dirokenen, “Tamo kayau musei nigin, saaf na yaleya moni odug biya. Ada tele, bret bun moni odug age fiya tara ken, tafenēdi di, dāf de?”

³⁸ Jesus idi irokenēdin, “Bret ganĩ ã ado? Uleg ulogouf.”

Idi kelei ken, Jesus dirokenen, “Bret faif, gau uru ado.”

³⁹ Age de di, Jesus, tamo kayau ganan, mala fire fire, fisir biya bun dibodadāf nigin, in dō fiya tar irokenēdin.

⁴⁰ Anĩ nigin, idi mala bun dibodadan, tunĩ wan hundred, wan hundred, tunĩ fifti, fifti.

⁴¹ Jesus bret faif gau uru ado yale, saa ilun itad fen, ĩ Negur de fiye ken, bret mumā fen. Agef fen, ĩ in dō fiya tar ifenēdin, tamo kayau wagedin dinodiyouf nigin. ĩ gau urug agef tamo kayau atun foif ifenēdin.

⁴² Idi ganan don kisi felen.

⁴³ In dō fiya tar, tamo kayau bret gau ado dokon, tunĩ ditoraran anĩ fito difen, karam tuwelf isokosen.

⁴⁴ Faif tausen tamo anidim bret don.

*Jesus Naan Teteatu Iyon
(Matyu 14:22-33; Jon 6:15-21)*

⁴⁵ Kaisā bagai, Jesus, in dō fiya tar waag bun, idi ketem Betsaida dilauf

nigin, sur fedin. Agef fen, ĩ tamo kayaug irudin.

⁴⁶ Jesus idi itorneĩd fen, Negur kosē fiyēf nigin arein iselen.

⁴⁷ Aragau mog, waag daliyou atun ifaren, anĩ ere, Jesus ĩ yogo mugu teneub bun.

⁴⁸ Jesus in dō fiya tar total bagai ful dife mog, ileidin, ere nigin, yau odug biya wewu fedin. Maur oboi wele ye mog, Jesus daliyou teteatu idi gedin iyok ilen. ĩ wal fediyou fenē age fen.

⁴⁹ Anĩ ere, sain in dō fiya tar meleid diran, Jesus daliyou teteatu iyō mog, dile mā, idi kisi baraū de fen, idi ui guri den,

⁵⁰ ere nigin, idi ganan ĩ dile fen, kumĩ tererē den.

Kaisā bagai, Jesus idi irokenēdin, “Total unog! Are ayam. To kumĩ wog.”

⁵¹ Age ye fen, ĩ idi gediyouf nigin waag bun sō ye di, yau kee relen. Idi oditekei terē den,

⁵² ere nigin, idi bret bun waud to fokō yen, idi neid waud katĩ felen.

*Jesus Genesaret Oun Dagi Adodo
El Fedin
(Matyu 14:34-36)*

⁵³ Idi sitakā dibabal dale, Genesaret teneub bun wō de fen, an waag difokel difaren.

⁵⁴ Idi waag bunem kututū deis mog, tamo kayau enei Jesus yeya idi kelein.

⁵⁵ Idi Jesus an ibodok yeya karĩ def are, idi fonō anĩ kalilĩ fiya adok gududu de fen, dagi tamo gabgab ado guri difedi di, disin.

⁵⁶ Sain ganan, modoū fire fire bun, Jesus ilen, fonō fonō, taun tunĩ, taun dumeitur, tamo kayau idi maket modoū bun dagi tamo dinenēdin. Idi yogon gabar iri kobū difouf nigin Jesus nonĩ difiyen. Ganan idi ĩ kobū difen, dagi fara feledin.

7

*Amuyē Sā Amuyē Ado
(Matyu 15:1-20)*

1 Farisia tamo, lo ifelnēdiya tamo tunī geid, Jerusalem temeleid disi guru de fen, Jesus salili difiyen.

2 Idi lo difeid mog, in dō fiya tar tunī amuyē ado imeid kulo fiya sā saaf don.

3 (Fariaisia tamo ado Juda tamo kayau ganān, saaf kaisā to dōdig. Idi imeid ket kulo difel fen, saaf dāf, ere nigin, idi mudur adodo biyeid neid tobonunā dō difedig.)

4 Idi maket bun tamal ke douf, idi saaf kaisā to dāf, idi imeid kulo de fen bagai. Idi tobonunā musei tunīg dō difedig, kap, darum, ketel kulo fiya age fiya.)

5 Anī nigin, Farisia tamo, lo ifelnēdiya tamo geid, Jesus to difiyen, “Ere nigin on dō fiya tar, mudur adodo biyeid neid tobonunā to dō de fen, amuyē ado imeid kulo fiya sā saaf dōdig?”

6 Jesus idi irokenēdin, “Asaia ī, ā mala yaleya tamo nigin wogō yen, in od tutuk, are eig ye itoton:

“Tamo kayau enidi neid sigoredim aya selu kulō difedig, anī ere, idi waud aya nigin gerō ifaref.

7 Idi aya yanau dalesedig, are ege.

Idi tamo nē lo dogol anī difelnēdidig.* ”

8 Jesus idi irokenēdin, “Ā Negur nē itāfiya utorōg fen, tamo nē tobonunā anī urougēf.”

9 Age ye fen, ī idi irokenēdin, “Ā augeneī tobonunā dō fiya nigin ge fen, ā Negur nē itāfiya anī weleī sirin inoya keleī bagai!

10 Ere nigin, Moses iron, ‘Ō sinā tamā yeneid wales,’† ‘Aibem taka sina tama ado yeneid sane inouf, ī laa bun dineyēf.’‡

11 Anī ere, ā urōgedig, tamo taka sina tama ado nigin irōf, ‘Ereb taka ā isenneīya nigin ayam ifeneīya, anī Koban’ (anī nē gariya, ‘ayam Negur afenem’),

12 anī bunem, ā ī sina tama baban isennēdiya nigin katū wiyēgedig.

13 Anī nigin, tubuī tar neid tobonunā anī waleg uroug fen, Negur nē od tadū gedig. Agog fen, ā tobonunā fire fire musei ago gedig.”

14 Jesus baban tamo kayau iweignēdi di, wagen disi di, iron, “Ā adok aya karī wiyag, enei keleī youf.

15 Safina serē tamal tamo namen isilef anim, tamo amuyē to ifenēdig, anī ere, ereb taka tamo namenem wō yef anim, ī amuyē ifenēdig.”§

17 Jesus tamo kayau itorneīd fen, fō bun ile di, in dō fiya tar, yaab od enī nigin ī to difiyen.

18 Jesus idi irokenēdin, “Āg fatuk nene gef de? Ereb taka serē tamal tamo namen isiledig anim, amuyē to ifenēdig anī, ā to ulegedig de?

19 Ere nigin, safina are tamo wau bun to iledig, anī ere, te namen isiledig, anenem bou dōf isil, ulō yesidig.” (Age ye iron anī bunem, Jesus kurō feis, saaf ganān amuyē sā yen.)

20 Ī od tobol fe fen, iron, “Ereb tamo namenem ulō yesef anim, ī amuyē ifenēdig.

21 Ere nigin, tamo waud bunem kisi sesen wō yef, noli tobonunā, bē, tamo yukesiya, seseirā inoya,

22 neu mugu yeya, tobonunā sesen, idegēya, noli kisi, kiyeī, ne tā bou yūya, aya aya yeya, neneya tobonunā.

23 Tobonunā sesen enei ganān, tamo namen tamal ulō yesef anim, tamo amuyē ifenēdig.”

Sirofonisia Kayau Taka Nē Mo-moīya

(Matyu 15:21-28)

24 Jesus fonō anī itor ken, Taia* teneub bun ilen. Ī fō taka aaben ile fen, taka nem ī an ibodok yeya to keleī youf nigin wau iron. Anī ere, ī iminkel ibodōya nigin kisi feleya sā.

* 7:7: Asaia 29:13 † 7:10: Eksodas 20:12; Diuteronomi 5:16 ‡ 7:10: Eksodas 21:17; Levitikas 20:9 § 7:15: Itotoya tunī eig de ditoton: ifenēdig. 16 Taka ī karīya nigin weder ado, ī karī youf.

* 7:24: Taia are taun taka.

²⁵ Agef mog, kayau taka Jesus nigin od karī yen, ĩ, ne barai kaa sanem ironen anī isi fen, Jesus ye gariyan kubū yen.

²⁶ Kayau anī ĩ Grik† kayau, ĩ Siria nediwon Fonisia an sina gō fen. ĩ, kaa sane, ne barai bun tamal iruwauf nigin Jesus nonī fiyen.

²⁷ Jesus kayau irokenen, “Kesu nanaal idi ereb orodif anī, idi ket dāf, ere nigin, kesu nanaal neid bret yale, gaū irarakenēdiya, are to biya.”

²⁸ Kayau anī solof iron, “Odug, are momoi, anī ere, gaū idig, tebol farumen kesu nanaal neid saaf momout kuku re di, dōdig.”

²⁹ Age ye di, Jesus kayau irokenen, “Ago solo urok nigin, ō ule, kaa sane, nē barai mogo itornem.”

³⁰ Age ye di, kayau fō bun ilen, kaa sane, ne barai itornen anī, fatarē yen mog, ilen.

Jesus Tamo Taka Weder Sigor Ado Ifofakeleya El Fiyen

³¹ Jesus Taia teneub itor ken, Saidon teneub atu ilen, Dekapolis‡ teneub bun wō ye fen, Galili maaīwō isilen.

³² An tamo kayau, tamo taka weder daabu leya tutuk wogōya kisi feleya sā anī, Jesus wagen dirou disin. Idi tamo anī bun, ima teten inouf nigin Jesus nonī difiyen.

³³ Jesus, ĩ tamo kayau atun yale, firen irou ile fen, in ima gege, tamo anī nē weder kur inodin. Agef fen, Jesus salina ira ken, tamo anī nē bale kobū fen.

³⁴ Jesus saa ilun itad fen, si odug yale fen, ĩ irokenen, “Efata!” (anī nē gariya, “Fokō weid!”).

³⁵ Kaisā bagai, tamo nē weder fokō yedin, in bale karika le di, ĩ od atata fel wogō yen.

³⁶ Jesus, taka irokenēya nigin idi katū fiyēdin. ĩ baba baban irokenēdin, anī ere, musei wogō def dilen.

³⁷ Tamo kayau idi odug biya terē de fen, idi diron, “ĩ ereb ereb ganan

biya dogol age fen. ĩ age fe di, weder daabuya karī yef, sigor ifokeleya wogō yef.”

8

Jesus Fo Tausen Tamo Saaf Ifenēdin

(Matyu 15:32-39)

¹ Sain anī bun, baban tamo kayau musei guru difen. Idi ereb taka yōya nigin san, anī nigin, Jesus in dō fiya tar ĩ garan iweig laisi fen, irokenēdin,

² “Aya tamo kayau enidi waud inaf, idi mogo aya geid, naa towo ereb taka yōya sā.

³ Aya idi naū ado fonō susur afouf are, idi luwen kuku douf, ere nigin, idi tunī egerō temeleid disin.”

⁴ In dō fiya tar aiten dale, Jesus dirokenen, “Gerere tuan eig fiya, taka nem bret kisi feleya nain yale fen, idi ifenēdiyof?”

⁵ Jesus to fedin, “Bret ganī ā ado?”

Idi diron, “Sewen dogol.”

⁶ Jesus tamo kayau tenebur dibodadāf nigin irokenēdin. Agef fen, Jesus bret sewen geif iron, ĩ Negur de fiye ken, bret anī mumā feid fen, tamo kayau wagedin dinouf nigin, in dō fiya tar ifenēdi di, idi age difen.

⁷ Idi gau nanaaleg teke tekelei adon. ĩ gau anidi nigineg Negur de fiye ken, idi gadō difediyof nigin in dō fiya tar irokenēdin.

⁸ Tamo kayau don kisi felen. Dum in dō fiya tar, tamo kayau bret dokon, tunī ditoraran anī fīto difen, karam sewen isokosen.

⁹ Tamo fo tausen age fiya an difaren. Anī Jesus idi, nedi fonō fonō sur fedī di, ke de dilen.

¹⁰ Agef fen, Jesus in dō fiya tar geid, waag bun sosō de fen, Dalmanuta distrik dilen.

Farisia Tamo Saa Ilun Nē Uris Nigin To Difen

(Matyu 16:1-4)

† 7:26: Grik, idi ibor fire, Juda sā. ‡ 7:31: Anī nē gariya, Ten Taun.

¹¹ Farisia tamo disi, Jesus kisi difiye ken, saa ilun nē uris dilouf nigin to difiyen.

¹² Ī si odug yale fen, iron, “Ere nigin tamo kayau sain enī bun difaref eneidi, uris nigin aya to difiyaf? Aya ā momoi arokeneik, uris taka idi to dalouf.”

¹³ Age ye fen, ĩ idi itorneīd, waag bun kel sō ye, maaī sitakā ibal ilen.

Farisia Tamo Geid Herod Geneid Yis (Matyu 16:5-12)

¹⁴ In dō fiya tar bret taka to dalen, wedereid tu kelen. Bret tekelei dogol waag bun idi adon.

¹⁵ Jesus idi wedereid iron, “Ā, Farisia tamo geid Herod geneid yis nigin lo welegei.”

¹⁶ In dō fiya tar idi dogo dogol katō de fen, diron, “Ada bret sā nigin age yel.”

¹⁷ Idi neid wogōya Jesus kelei ken, idi to fedin, “Ere nigin ā bret to urougel nigin wogō gef? Ā fau ileya sā, wedereī fokōya sā de? Āgenei wauī total bagai lef de?”

¹⁸ Ā meleī ado, anī ere, ā to ulegedig de? Ā wedereī ado, anī ere, ā to karī gedig de? Ā to karī welegef de?

¹⁹ Sain aya bret faif, faif tausen tamo nigin mumā afen, ā karam ganī bun, bret tunī kuru ge di, isokosen?”

Idi aiten dalen, “Karam tuwelf.”

²⁰ “Sain aya bret sewen, fo tausen tamo nigin mumā afen, ā karam ganī bun, bret tunī kuru ge di, isokosen?”

Idi aiten dalen, “Karam sewen.”

²¹ Jesus idi irokenēdin, “Ā fau to kisi fokō yef de?”

Tamo Taka Mala Ifofakeleya Oun Betsaida El Fiyen

²² Idi Betsaida disin. An tamo kayau tunī, tamo taka mala ifofakeleya diroule fen, Jesus imam kobū fiyēf nigin nonī difiyen.

²³ Jesus, tamo mala ifofakeleya ima yale, sibof, fonō dumeitur dilen. Agef fen, ĩ tamo mala bun salina ira

ken, ima tamo mala bun ino fen, to fiyen, “Ere tau ulef?”

²⁴ Ī mala fara fel fen, iron, “Aya tamo kayau ailedif, idi aa gegen diyokesif.”

²⁵ Jesus baban in ima, tamo mala bun inon. Age fe di, tamo mala fara fele di, tutuk kelē yelen. Ereb ereb ganan ĩ yaor iledin.

²⁶ Jesus tamo anī in fō bun sur fiye ken, irokenen, “Fonō atu to ulauf.”

Pita Kristus Nigin Kurō Fesin (Matyu 16:13-20; Luk 9:18-21)

²⁷ Jesus in dō fiya tar geid, Sis-aria Filipai nediwon fonō fonō diyok dilen. Naabur ĩ to fedin, “Tamo kayau idi, aya nigin ai dedig?”

²⁸ Idi diron, “Tunī dirok, Jon naan igunēdiya tamo; tunī dirok, Eliya; tunī dirok, profet anidi taka.”

²⁹ Jesus to fedin, “Ba ā uleg? Aya nigin ā ai gef?”

Pita aiten yale iron, “Ō anī Kristus.”

³⁰ Age ye di, Jesus ĩ nigin taka to dirokenēf nigin, idi wedereid iron.

Jesus In Laa Nigin Iron (Matyu 16:21-28; Luk 9:22-27)

³¹ Age ye fen, Jesus gariya ino, idi ifelneīd fen, irokenēdin, Tamo Naal ĩ, darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ĩ dukesi di, naa towo bure fele di, kel fā youf.

³² Jesus od anī kurō fesi di, Pita Jesus yale, yerin irou ile, ou fiyen.

³³ Age fe di, Jesus falei yel, in dō fiya tar lo feid fen, ĩ Pita ou fiyen. Ī iron, “Satan! Dumeun ule. On kisi are Negur nē sā, on kisi tamo nē dogol.”

³⁴ Age ye fen, Jesus, tamo kayau in dō fiya tar geid iweigneīd fen, irokenēdin, “Aib taka aya dō fiyau fenē, ĩ yogon oroya lai fesil fen, yogon aa tetek faali fe, aya dō fiyau f.”

³⁵ Ere nigin, aib taka yogon bouwa buru mata ibodōf nigin oro fef, are fō yalauf, anī ere, aib taka yogon mata

bouwa buru, aya nigin ado biya od nigin ye fen, irailauf, are kel yalouf.

³⁶ Tamo taka ī, teneub enī ganan kakarai fe, akorou ye fen, in malakanon irailauf, ere biya ī yalouf?

³⁷ Takag, tamo taka, yogon malakanon nigin ere mala solof fen, ī kel yalouf?

³⁸ Aib taka, seseirā inoya,* mosor inoya nē tamo kayau eneidi bun, aya nigin ado neu od nigin mama foug are, sain Tamo Naal in engel fateul geid, Tama nē fula fiya medeīya ado disiyouf bun, īg ī nigin mama foug.”

9

¹ Age ye fen, ī idi irokenēdin, “Aya ā momoi arokeneik, tunī ein difaref, fau to gare de mog, idi Negur nē tano* megeir ado isi mog, dilouf.”

Jesus Bouwa Falei Felen (Matyu 17:1-13; Luk 9:28-36)

² Naa sigis bure fele di, Jesus, Pita, Jems, Jon anidi geif fen, idi mugu arei odug ilun diselen. An Jesus idi meleid bun bouwa falei felen. ³ In kolos lalau medeīya bagai, lalau anī tenebur ein taka nem kulo fe di, agef filiya kisi feleya sā.

⁴ Agef mog, an idi meleid bun, Moses Eliya ado wowā de fen, Jesus weim wogō den.

⁵ Pita Jesus irokenen, “Rabi,† ada ein ibodōya nigin biya bagai. Ada salafat towo tanouf, taka ogon, taka Moses nē, taka Eliya nē.”

⁶ (Ī wogōya tata fen, ere nigin, idi fatuk bagai kumī den.)

⁷ Agef mog, lalo isi, idi kerub feid fen, ait taka lalo bunem wō yen, “Eī neu Kesu, ī nigin aya wau laa fedig. Ī karī wiyēg!”

⁸ Kaisā bagai, idi fai den, aib taka to weim difar mog, dilen, Jesus dogol.

⁹ Idi arei nem diyok disi fen, Jesus ereb idi dilen anī, Tamo Naal laa

bun tamal fau fāya sā mog, taka to dirokenēf nigin, idi katū fedin.

¹⁰ Idi od anī dogo bun dogol ibod ken, ‘laa bun tamal kel fāya’ anī nē gariya nigin katō difen.

¹¹ Age de fen, idi Jesus to difiyen, “Ere nigin lo ifelnēdiya tamo, ‘Eliya ī ket uyu isi di, Mesia isiyouf,’ dedig?”

¹² Jesus aitedin yalen, “Momoi bagai, Eliya ket uyu isi fen, ereb ereb ganan madur fedif. Anī ere, ere nigin Tamo Naal ī darau musei yale fen, dudum difiyēf anī, Negur nē Itotoya bun ibodok?”

¹³ Anī ere, aya ā arokeneik, Eliya mogo isin, ī nigin Negur nē Itotoya bun yenek gen, ereb ereb ganan idi waud iron, ī nigin mogo age difen.”

Jesus Kesu Kaa Sane Ado El Fiyen (Matyu 17:14-21; Luk 9:37-43)

¹⁴ Sain idi, in dō fiya tar tunī ganan geredin disi fen, tamo kayau musei, idi salili difiyēid fen, lo ifelnēdiya tamo geid, od nem abob fe fe de mog, diledin.

¹⁵ Kaisā bagai, tamo kayau ganan Jesus isi mog, dile fen, idi fatuk bagai terē den, aan difiyēf nigin gududu de dilen.

¹⁶ Jesus idi to fiyēdin, “Ā ere nigin idi geid, od nem abob fe fe gef?”

¹⁷ Guru fiya atun, tamo takam aiten yale iron, “Tise, aya neu kesu, ō gein arou asil, ī kaa sanem irou di, ait ifokelen.

¹⁸ Sain ganan kaa sanem irouf, ī yū irā di, tenebur kubū ye, sali mokuf, gobora kikokō ye fen, bouwa teregein yedig. Aya on dō fiya tar kaa sane diruwauf nigin to afedin, anī ere, idi kisi feleya sā.”

¹⁹ Jesus solof iron, “Tamo kayau eneidi momoiya sā, sain ganī aya ā geid tabodōf? Sain ganī aya ā nigin wau aukesilauf? Kesu wageun urousig.”

²⁰ Age ye di, idi kesu anī, ī garan dirou disi di, kaa sane Jesus ile fen,

* **8:38:** Seseirā inoya, anī nē gariya ein, Negur fotokar waitou fire fire nigin momoiya. * **9:1:** Negur nē tano an, Negur yogo ereb ereb ganan lo fef. † **9:5:** Rabi, anī nē gariya, Juda neid tise.

kaisā bagai kesu yū iran. Kesu ī tenebur kubū ye, wele yef, yen ken, awa bun sali moku fen.

²¹ Jesus kesu nē tama to fiyen, “Sain ganī ī eig fiya ibodon?”

Ī aiten yale iron, “Ī kesu naalun gariya inon.

²² Sain musei, ī yukesiyou fenē nigin yā bun ado naanū irādig. Anī ere, ō ereb taka age fiya nigin kisi feleyauf are, amā nigin waū ino ken, usennamā.”

²³ Jesus ī irokenen, “‘Ō kisi feleyauf,’ wof de? Taka ī momoi youf, ereb ereb ganan age fiya nigin kisi feleya.”

²⁴ Kaisā bagai, kesu nē tama iweig iron, “Aya momoi auf, neu momoiya naal nigin usenna!”

²⁵ Age ye di, tamo kayau gududu de disi mog, anī Jesus ileid fen, ī kaa sane ou fiyen. Ī iron, “Ō daabuya ait ifokeleya kaa, aya ō arokonok, ī bun tamal ulō weis fen, baban ī namen to kel ulauf.”

²⁶ Kaa anī ui ye fen, kesu yū irā di, fatuk bagai tererē ye mog, ulō yeis ilen. Lo difen, kesu laa gen yenē di, musei diron, “Ī laa fel.”

²⁷ Anī ere, Jesus kesu anī ima irou fen, yalesnē di, ī ifaren.

²⁸ Jesus ī aaben ile ibod mog, in dō fiya tar mugun ī to difiyen, “Ere nigin amā kaa sane iruya nigin kisi feleya san?”

²⁹ Age de di, ī irokenēdin, “Eig fiya are, Negur kosē fiyēya‡ bunem dogol iyawauf.”

*Jesus Baban In Laa Nigin Iron
(Matyu 17:22, 23; Luk 9:43-45)*

³⁰ Idi modoū anī ditor ken, Galili distrik atu diyok dilen. Taka nem idi an yeya kariya nigin, Jesus to oron,

³¹ ere nigin, ī in dō fiya tar ifelnēdin. Ī idi irokenēdin, “Tamo Naal ī, fau kiwai tamo imeid bun dinouf. Idi fau ī dukesiyouf, naa towo bure fele di, ī fau kel fā youf.”

³² Anī ere, idi od enī nē gariya nene de fen, ī to fiya nigin kumī den.

Ai Anī Odug Bagai?

(Matyu 18:1-5; Luk 9:46-48)

³³ Idi Kapenaum taun disin. Jesus fō bun ibod ken, ī idi to fedin, “Ā naabur ere luwa urougel?”

³⁴ Anī ere, idi foro firi delen, ere nigin, naab luwen, aim anī idi atun odug bagai ibodok nigin luwa diroun.

³⁵ Jesus ibod ken, in dō fiya tar tuwelf iweig laisi fen, iron, “Taka ī uyu ifarau fenēf, ī gai dumen bagai youf. Agef fen, ī ganan neid kabī tamouf.”

³⁶ Ī kesu naal taka yale iroule, idi atun ifarnen. Ī imam yale koboi fiye ken, ī idi irokenēdin,

³⁷ “Aib taka aya yanau bunem, kesu naal eig fiya taka yalef are, ī aya yaleyaf. Aib taka ī aya yaleyaf are, ī aya dogol to yaleyaf, ī aya sur fiyan anīg yalef.”

*Taka Ī Ada Nigin Kiwai To Inof,
Are Neda
(Luk 9:49, 50)*

³⁸ Jon iron, “Tise, tamo taka, ō yanā nem kaa sesen iruid mog, amā mailen. Anī nigin, amā ī katū mafiyen, ere nigin, ī neda takam sā.”

³⁹ Anī ere, Jesus iron, “To katū wiyēg, taka ī neu yanau nem memelik inof are, ī kaisā bagai aya nigin sane irōya kisi feleya sā,

⁴⁰ ere nigin, taka ī ada nigin kiwai to inof, are neda.

⁴¹ Aya ā momoi arokeneik, taka ī, aya yanau nem, ā Kristus nē nigin ye fen, kap naan ado ifeneif are, ī in mala solo momoi bagai yalouf.

Mosor Bun Ineyēf

(Matyu 18:6-9; Luk 17:1, 2)

⁴² “Aibem taka age fe di, kesu aya nigin momoi def enidi taka, mosor bun ineyēf are, tamo anī meein odug guyutu bun ifo ken, maaīwō irāyam, are dem.

⁴³ Ogon imam mosor bun ineyōf, gudū wol. Ō imā tobega ado, mata bun ileyā nigin biya bagai, ere nigin,

‡ 9:29: Itotoya tunī eig de ditoton: kosē fiyēya ado kuriya.

ima totoũ adouf are, hel bun an yã faimud ibodkeleyan uleya nigin. §

⁴⁵ Age fiya gen, ogon yẽ anim, mosor bun ineyõf, gudũ wol. Õ yẽ tobega ado mata bun ileyã nigin biya bagai, ere nigin, yẽ totoũ adouf are, hel bun dirãyoõf.*

⁴⁷ Takag, ogon malã anim, mosor bun ineyõf, ubodol uraile. Õ malã tekelei ado Negur nẽ tano bun ileyã nigin biya bagai, ere nigin, malã totoũ adouf are, hel bun dirãyoõf,

⁴⁸ an
“idi neid mamat to gare dedig,
yãg to gare feledig.†

⁴⁹ Tamo ganã, yã tetedin sol gen tu difouf.

⁵⁰ “Sol ã biya, anã ere, in kai sa kalauf, naig wo di, baban kai youf? ã aug bun sol adouf, agog fen, abob nigin wau inosiya bun ubodõgouf.”

10

Tamo Kayau Ado Bagu Fiya Anã Fara Fiya

(Matyu 19:1-12; Luk 16:18)

¹ Jesus modoũ anã itor ken, Judia distrik nẽ akor anã atu ile, Jordan naan sitakã ilen. Baban tamo kayau mala odug ã wagen disi di, ã gai age fedig gen, od ifelnẽdin.

² Farisia tamo tunã disi, kisi difiye ken, to difiyen, “Tamo taka yogon kayau iruf anã, are lo dõ fiya de?”

³ ã aitedin yale iron, “Moses, anã nigin ere od wogõ yein?”

⁴ Idi diron, “Moses yo yen, are tamo bagu fiya anã fara fiya pepa itot fen, kayau od sã iru di, ilauf, yen.”

⁵ Jesus idi irokenẽdin, “Moses lo anã itotkenein, ere nigin, ãgenei wauã totol bagai agef yeneid.

⁶ Anã ere, gariya bun Negur ereb ereb ino fen, ‘tamo ino, kayau ino fen.’*

⁷ ‘Age fiya nigin, tamo ã in sina tama itorneid fen, in kayau ado bagu difouf,

⁸ age fe di, idi uruwom bouweid tekelei youf.† Age dife di, idi uru sã, idi tekelei.

⁹ Anã nigin, ereb Negur bagu fedin anã, tamom to fara fouf.”

¹⁰ Sain idi baban fõ bun dibod ken, in dõ fiya tar od enã nigin Jesus to difiyen.

¹¹ Jesus idi irokenẽdin, “Aib taka in kayau iru fen, kayau taka yalouf, ã kayau tubu morõ ifen ken, seseirã inouf.

¹² Age fiya bagai, kayau taka in aiwa itorne ken, tamo taka yalouf are, ã seseirã inouf.”

Kesu Nanaal Jesus Geid

(Matyu 19:13-15; Luk 18:15-17)

¹³ Tamo kayau, kesu nanaal Jesus wagen kobũ fediyouf nigin guri difeid disin, anã ere, in dõ fiya tar, idi ou difiyẽdin.

¹⁴ Jesus anã ile fen, wau sanen. ã idi irokenẽdin, “Utornẽdig len, kesu nanaal aya wageun disiyouf, idi to katũ wedig, ere nigin, Negur nẽ tano are eig fediya neid.

¹⁵ Aya ã momoi arokeneik, aib taka ã, Negur nẽ tano kesu naal age fiya gen to yalouf are, ã namen to bagai ilauf.”

¹⁶ Age ye fen, ã kesu nanaal koboi feid fen, in ima tetedin ino fen, el fiya ifenẽdin.

Tamo Gaũ Safina Musei Ado

(Matyu 19:16-30; Luk 18:18-30)

¹⁷ Jesus mogo naab iyok ile mog, tamo taka ã garan gudu ref isel, wagen kubũ ye, ibor bobou fe fen, ã to fiyen, “Tise biya, aya ere naig afouf anã, mata faimud ibodkeleya alouf?”

¹⁸ Jesus ã irokenen, “Ere nigin õ aya anã biya wiyaf? Aibem taka biya sã, Negur yogo dogol.

¹⁹ Õ ãtãfiya keleĩ: ‘Õ tamo taka to ukesiyouf, õ to seseirã unouf, õ to

§ 9:43: Itotoya tunã eig de ditoton: nigin, ⁴⁴ an idi neid mamat to gare dedig, yãg to gare feledig.

* 9:45: Itotoya tunã eig de ditoton: dirãyoõf, ⁴⁶ an idi neid mamat to gare dedig, yãg to gare feledig.

† 9:48: Asaia 66:24 * 10:6: Jenesis 1:27 † 10:8: Jenesis 2:24

bē walouf, ò taka nigin idegēya od to urōf, ò idegēya bunem safina to walouf, sinā tamā sigoreid dō wouf. †

20 Ī Jesus irokenen, “Tise, enei ganan, aya kesu naalun dō afef asin.”

21 Jesus ĩ lof ile, ĩ nigin wau laaf fen, iron, “Tekelei anī ò inī sã. Ule, ogon safina ganan na nigin sur wo fen, maleg tamo weneīd, agouf anī, ò saa ilun safina biya adouf. Ago wol fen, usi, aya dō wiya.”

22 Od anī bunem, nawa kuru kele fen. Ī wau morō ado ilen, ere nigin, ĩ safina musei ado.

23 Jesus falei yel fen, in dō fiya tar irokenēdin, “Safina musei ado tamo, Negur nē tano bun ileyā nigin gai malai bagai!”

24 In dō fiya tar, in od anī nigin terē den. Anī ere, Jesus baban iron, “Nau kesu tar, Negur nē tano bun ileyā nigin gai malai bagai!”

25 Kamel ĩ gabar iwaya nil ku bun ileyā nigin karika bagai, safina musei ado tamo Negur nē tano bun ileyā nigin malai bagai.”

26 Od anī bun, in dō fiya tar fatuk bagai terē de fen, abob toti difen, “Age fiyauf are, aim anī mata ibodkeleya yaleya kisi feleya?”

27 Jesus idi lo feid fen, iron, “Tamo bun are kisi feleya sã, anī ere, Negur bun kisi feleya. Ereb ereb ganan Negur bun kisi feleya.”

28 Pita Jesus irokenen, “Amā ereb ereb ganan mator ken, ò dō mayok!”

29 Jesus solof iron, “Aya ã momoi arokeneik, aib taka fō, tura tar, main tar, sina, tama, gere tar be, kabī, aya nigin ado biya od nigin itoron,

30 ĩ mala solo wan handred wal fiya, sain enī bun, (fō, tura tar, main tar, sina tar, gere tar, kabī anidi ado morōg) yalouf, ĩ dumen isiyouf buneg mata faimud ibodkeleya yalouf.

31 Anī ere, musei malabag dibodok, idi dumen dibodōf; musei dumen dibodok, idi malabag dibodōf.”

Jesus In Laa Nigin Irō, Towo Fen (Matyu 20:17-19; Luk 18:31-34)

32 Jesus uyu irou fen, idi Jerusalem naab diselen. Age fe di, in dō fiya tar idi terē de mog, idi dō difedin anī kumī den. Baban Jesus in dō fiya tar tuwelf firen gou feid fen, ĩ fau bouwa bun ere wō youf anī irokenēdin.

33 Jesus iron, “Ada Jerusalem teselef, an Tamo Naal ĩ pris odudug, lo ifelnēdiya tamo imeid bun dinenēf. Idi ĩ laa fouf nigin bouwa bun od dūf. Age de fen, idi ĩ haiden Juda sã anidi imeid bun dino di,

34 idi ketē difiyēf, disisnēf, wagī difiye ken, dukesiyouf. Naa towo bure fele di, ĩ kel fā youf.”

Jems Jon Ado Neid To Fiya (Matyu 20:20-28)

35 Sebedi gere tar, Jems Jon ado, Jesus wagen disin. Idi diron, “Tise, amā ereb taka nigin to mafe di, ò agouf anī oromak.”

36 Jesus idi irokenēdin, “Ā ere anī, aya age afeneīf nigin oroyeik?”

37 Idi aiten dale diron, “Ogon fula fiya medeīya bun, amā taka ogon ima biyalē ibodō di, taka ogon ima kilē ibodōf anī oromak.”

38 Jesus idi irokenēdin, “Ā ereb to gef anī nē gariya ã keleī sã, aya naan āf anī, ã yōya kisi feleya de? Agef mā, naan aya agūf anī, ã igūya kisi feleya de?”

39 Idi aiten dale diron, “Amā kisi feleya.” Age de di, Jesus idi irokenēdin, “Naa aya āf are, ã wāgauf, naan aya agūf are, ã ugūgouf,

40 anī ere, imau biyalē ibodōya, kilē ibodōya are, ayam ifenēya kisi feleya sã. Modoū anidi are, idi nigin saika fen anidi neid.”

41 In dō fiya tar ten od anī karī de fen, Jems Jon ado nigin seye den.

42 Jesus idi iweig laisi fen, iron, “Ā keleī, haiden neid uyu irouya def anī, tamo kayau lo fiya nigin total dinodig, idi dogo neid odudug, idi aruneid dalouf nigin megeir dinodig.

† 10:19: Eksodas 20:12-16; Diuteronomi 5:16-20

⁴³ Æ bun kisi to agef yenēf, ã atun, aib taka odug ibodōf nigin orof, ï āgenei kabī tamo ibodōf.

⁴⁴ Aib taka uyun ibodōf nigin orof, ï ganān neid ferfer ouf.

⁴⁵ Ere nigin, Tamo Naal ïg disennēf nigin to isin, anī ere, ï tamo kayau isenneīd fen, tamo kayau musei idi neid mosor anī fotokar, yogon mata ifenēdiyof nigin isin.”

Bartimeus Mala Ifofakelen Anī Mala Fara Felen
(Matyu 20:29-34; Luk 18:35-43)

⁴⁶ Age de fen, idi Jeriko disin. Jesus, in dō fiya tar, tamo kayau mala odug geid, taun anī ditor dile mā, tamo taka mala ifofakeleya, Bartimeus (Timeus naal), ï naab yerin nonī yef ibodon.

⁴⁷ Sain ï Jesus Nasaret tamal yeya anī karī ye fen, ï iweig iron, “Jesus, Dawid Naal, aya nigin malalon yō!”

⁴⁸ Age ye di, tamo musei sakā difiye ken, foro yalauf nigin dirokenen, anī ere, ï wade bagai iweig iron, “Dawid Naal, aya nigin malalon yō!”

⁴⁹ Jesus dē yel fen, iron, “Uweignēg.” Age ye di, idi tamo mala ifofakeleya diweignen, “Waū el fe fen, fā wale! Ì ò iweignok.”

⁵⁰ Age de di, ï yogon gabar sirilē iraille fen, fā yale, Jesus wagen isin.

⁵¹ Jesus ï to fiyen, “Aya ò ere age afonōf ani, ò oroyok?”

Tamo mala ifofakeleya iron, “Rabi, aya kelē au fenē.”

⁵² Jesus iron, “Ule, ogon momoiya anim el yom.” Kaisā bagai, ï kelē yel fen, Jesus dōf, naab dilen.

11

Jesus Tamo Yana Ado Gen Jerusalem Namen Ilen
(Matyu 21:1-11; Luk 19:28-40; Jon 12:12-19)

¹ Idi Jerusalem kelē difiye ken, Moul Arei* bun Betfage Betani ado

wō den, Jesus in dō fiya tar uru sur feid fen,

² Ì idi irokenēdin, “Fonō wageik anī bun uleg, an wōg fen, donki naal difon anī ulogouf, are aibem taka anī bun to iyon. Anī biru weleg fen, ein urou usig.

³ Taka nem to yeīf, ‘Ere nigin ã enī ago gef?’ youf are, urokenēgouf, ‘Odug orof nigin, fau mogo kaisā ein kel sur fouf.’”

⁴ Idi dile, donki naal naabur bobog ileyān difokelen ifar mog, fotou difen. Idi biru de mog,

⁵ tamo tunī an difaren anidim to difedin, “Æ ere naig gouf nigin, donki naal anī biru gef?”

⁶ Idi Jesus irokenēdin kilei, solo de dirokenēdin. Age de di, tamo ditornēdi di, dilen.

⁷ Idi donki naal anī Jesus wagen dirousi fen, idi neid gabar teten dirarā di, ï anī teten ibodon.

⁸ Tamo kayau musei, idi neid gabar naabur du difedin, age de mog, tunī idi kabier aa were aarau ado kokour difedin anī du difedin.

⁹ Tamo kayau uyu dilen ado dume dō difen, kakaī de diron,

“Hosiana!†”

“Odug yana bunem isif, are ï el fiyek!”‡

¹⁰ “Neda tamada Dawid nē tano isif, are el fiyek!”

“Hosiana, ilun bagai!”

¹¹ Jesus Jerusalem wō ye fen, tempel ilen. Ì ereb ereb ganān kii fedin, anī ere, sain bure felen nigin, ï in dō fiya tar tuwelf geid Betani dilen.

Jesus Aa Fig Isisnen
(Matyu 21:18, 19)

¹² We fele di, idi Betani ditor dile fen, Jesus naū fen.

¹³ Ì mala ira kel, aa fig aarau ile fen, ï faat ado be ye mā, ilouf nigin ilen. Ì non ilen, faat taka to ilen, aarau dogol, ere nigin, imaya sain sã.

* 11:1: ‘Oliv Arei’ dedig. † 11:9: Anī nē gariya, ‘Usennamā!’ Od anī tamo kayau Negur yana yaleseyā nigin wogō dedig. ‡ 11:9: Sam 118:25, 26

¹⁴ Age fiya ile fen, ĩ aa irokenen, “Taka nem õ bun faat baban to yãf.” Agef irõ mog, in dõ fiya tar karĩ den.

Jesus Tempel Waĩ Fen

(*Matyu 21:12-17; Luk 19:45-48; Jon 2:13-16*)

¹⁵ Jerusalem wõ de fen, Jesus tempel modoũ namen ile, na dale dile disi dife mog, an irudidin. ĩ moni solo fediya§ neid tebol ado, kuburir na nigin sur fediya neid bens eleg feledin.

¹⁶ Tamo ganan, tempel modoũ bun safina na nẽ iroulediya nigin katũ fiyẽdin.

¹⁷ Agef fen, Jesus ifelneĩd iron, “‘Neu fõ, teneub ganan nẽ kosẽya fõ douf,* are Negur nẽ Itotoya bun to yenek de?”

Anĩ ere, ã ‘bẽ tamo neid iminẽya fõ’† unogen.”

¹⁸ Age ye di, pris odudug, lo ifelnẽdiya tamo geid, od enĩ karĩ de fen, Jesus dukesiyouf nigin naab dimiren. Idi Jesus kumĩ difiyen, ere nigin, tamo kayau ganan in ifelnẽdin anĩ nigin terẽ den.

¹⁹ Aragau di, idi taun anĩ ditor dilen.

Aa Fig Gariri Kelen

(*Matyu 21:20-22*)

²⁰ Bonimeidi idi naab diyok dile fen, idi aa fig warei bunem gariri kelen anĩ dilen.

²¹ Pita weder fokõ yel fen, Jesus irokenen, “Rabi, ulef! Õ aa fig usisin, are gariri kelen!”

²² Age ye di, Jesus solof irokenẽdin, “Negur bun momoi wogei.

²³ Aya ã momoi arokeneik, aibem taka arei enĩ irokenẽf, ‘Õ kusu urã, maaĩwõ usil,’ age ye fen, ĩ wau to uru fen, momoi aya orok anĩ agef wõ youf, youf are, agef dõ fenẽf.

²⁴ Anĩ nigin, aya ã arokeneik, ereb taka nigin ã kosẽ bun tog fen, mogo malel ge, momoi gouf, are ãgenei youf.

²⁵ Sain ã ufareg kosẽg fen, ã takan nẽ sane nigin wauĩ bun yenẽf are, wedereĩ tu kalauf. Ago ge di, ãgenei Temeĩ saa tanon ibodok, ãgenei mosor nigin weder tu kalauf.”‡

Jesus Aim Igirnen Anĩ To Difiyen

(*Matyu 21:23-27; Luk 20:1-8*)

²⁷ Idi baban Jerusalem wõ den, Jesus tempel fofomalan iyok ile mog, pris odudug, lo ifelnẽdiya tamo, mudur adodo geid, ĩ wagen disin.

²⁸ Idi Jesus to difiyen, “Ere igiriya bunem, õ ereb ereb enĩ ago wof? Aim õ enĩ agouf nigin igirnon?”

²⁹ Jesus aitedin yale iron, “Aya to fiya tekelei afeneĩf. Solog urokanage di, ereb igiriya bunem ereb ereb enĩ age afef anĩ, aya ã arokeneĩf.

³⁰ Jon naan igunẽdin, are saa ilun tamal de, tamo bunem? Urokanag!”

³¹ Idi dogo dogol katõ de fen, diron, “Ada, ‘Saa ilun tamal,’ tauf, ĩ to fouf, ‘Age fe di, ere nigin, ã ĩ nigin to momoi gen?’

³² Anĩ ere, ada, ‘Tamo bunem,’ tauf...” (Idi tamo kayau kumĩ difedin, ere nigin, tamo ganan, Jon ĩ momoi bagai profet den.)

³³ Anĩ nigin, idi Jesus ait solo de diron, “Amã keleĩ sã.”

Age de di, Jesus iron, “Ayag ã to arokeneĩf, ereb igiriya bunem aya ereb ereb enĩ age afedif.”

12

Tamo Kabĩ Lo Difedig Nẽ Yaab Od

(*Matyu 21:33-46; Luk 20:9-19*)

¹ Age ye fen, Jesus yaab od nem idi irokenẽdin, “Tamo taka wain kabĩ yalen. ĩ kau ifõ kalĩ felen, wain sumin asi fiya nigin ku yalen, kabĩ lo fiya tamo neid fõ inon. Agef fen, ĩ mala solo yalouf nigin wain kabĩ,

§ 11:15: Tempel takis inoya nigin, moni serẽ tamal ado tempel moni solo difedig. * 11:17: Asaia 56:7 † 11:17: Jeremaia 7:11 ‡ 11:25: Itotoya tunĩ eig de ditoton: kalauf. ²⁶ ã wedereĩ to tu kalauf are, ãgenei Temeĩ saa tanon ibodok ĩg, ãgenei mosor nigin weder to tu kalauf.

kabī tamo tunī imeid bun ino fen, uyu takā ilen.

² Fito fiya sain, ī, kabī tamo taka, wain kabī lo fiya tamo gedin, wain biya tunī, idi bun gei foug nigin sur fen.

³ Anī ere, idi ī dale, du ken, sur difiyē di, ima sāsā ilen.

⁴ Age dife di, ī kabī tamo taka idi gedin sur fen. Idi tamo anī mudur bun du ken, mama difenē di, ilen.

⁵ Ī baban takag sur fen, areg idi dukesin. Ī musei tunīg sur fedin, age fe di, tunī diden ken, tunī didenkesin.

⁶ “Ī gama tekelei dogol sur fiya nigin ibodon, are yogo naal, ī yogon oboi bagai. Ī anī dumen bagai sur fiye ken, iron, ‘Idi neu kesu anī karī difiyēf.’

⁷ “Anī ere, kabī lo fiya tamo, idi abob dirokenen, ‘Eī ī akorouf. Usig, ada ī tau keis fen, akor eī nedauf.’

⁸ Anī nigin, idi ī dale, dukeis fen, wain kabī dumeitur diran.

⁹ “Age dife di, wain kabī marau naig foug? Ī isi, kabī lo fiya tamo idenkeis fen, wain kabī anī tamo tunī ifenēdiyof.

¹⁰ Ā Negur nē Itotoya enī to uwe-segen de?

“ Meein are fō inoya tamom sane de fen, ditoron,
meein anī gama monog tor wō yen,

¹¹ anī Odug yogo age fe di,
malamā yū yalen.* ”

¹² Age ye di, pris odudug, lo ifelnēdiya tamo, mudur adodo geid, Jesus irounēya nigin naab dimiren, ere nigin, idi kelein, ī idi nigin yaab od wogō yen. Anī ere, idi tamo kayau nigin kumī de fen, idi ī ditornē dilen.

Sisa Takis Ifenēya
(*Matyu 22:15-22; Luk 20:20-26*)

¹³ Dum idi, Farisia tamo tunī, Herod nē tamo tunī geid, Jesus garan in od bun kū fenē di, dirounēf nigin sur difedin.

¹⁴ Idi ī garan disi fen, diron, “Tise, amā keleī, ō momoi wogōya nē tamo.

Ō tamom to wewu diyōdig, ere nigin, ō idi yeneid ado be, sā anī to es wedidig. Ago fen, ō momoi bagai Negur nē naab ufelnamādig. Sisa† takis ifenēya nigin biya de, sā?

¹⁵ Amā mafenēf de, sā?”

Anī ere, Jesus idi neid namedin kisi sane kelei ken, iron, “Ere nigin ā aya nigin kor unogef? Koin moni taka urousig len, aya ailau fenē.”

¹⁶ Idi koin moni taka dirousi di, ī idi to fedin, “Eī ai nē malakanon? Eī ai yana nē itotoya?”

Idi aiten dale diron, “Sisa nē.”

¹⁷ Age de di, Jesus idi irokenēdin, “Sisa nē are Sisa wenēg, Negur nē are Negur wenēg.”

Age ye di, idi ī nigin terē den.

Kel Fāya Bun Ai Nē Kayau Ibodōf
(*Matyu 22:23-33; Luk 20:27-40*)

¹⁸ Sadusia tamo idi dirōdig, laa bun tamal to ke de fā dedig anī, Jesus wagen disi to difiyen.

¹⁹ Idi diron, “Tise, Moses itotkanaman, are tamo taka laaf fen, aiwa itornen, anī ere, kesu sā, tamo ī waab anī yale fen, tura nē kesu diroukenēf.

²⁰ Gama tura tura sewen dibodon. Matu ketem kayau yalen, anī ere, kesu yaleya sā mog, laa fen.

²¹ Matu dō fiya bagam waab anī yalen, anī ere, īg kesu sā mog, laa fen. Idi dō fediyag de age fen.

²² Tura tura sewen anidi adok, kesu taka to dalen. Dum kayau areg laa fen.

²³ Dum laa bun tamal kel fāya sain bun, ī ai nē kayau ibodōf, ere nigin, tura tura sewen anidi adok, ī dale dogolen?”

²⁴ Jesus aitedin yale irokenēdin, “Ā od kū wenēgef, ere nigin, ā Negur nē Itotoya ado Negur nē megeir keleī sā.

²⁵ Sain laa bun tamal kel fāya bun, an tamo kayau ado abob yalef ya sāf, idi engel saa ilun dibodok gen dibodōf.

²⁶ Gama, laa bun tamal fāya nigin, Moses nē od Negur nē Itotoya bun ibodok, are arein aa mata bun fotou

* **12:11:** Sam 118:22, 23 † **12:14:** Rom neid king odug.

fiyen Negur ï naig fe irokenen, ‘Aya Abraham nē Negur, Isak nē Negur, Jakop nē Negur’‡ anī to be uwesegen de?

²⁷ Ï laa neid Negur sā, anī ere, ï mata ibodōya neid. Ā fatuk bagai kũ wenēgef!”

Ïtāfiya Odug Bagai Ganan Wal Fiya

(*Matyu 22:34-40; Luk 10:25-28*)

²⁸ Lo ifelnēdiya tamo taka isi, idi od nem kusī de mog, karī fiyēdin. Jesus ï aiten, od biya irokeneid mog, karī ye fen, ï Jesus to fiyen, “Ïtāfiya ganan bun, ïtāfiya nanī anī ganan wal fiya?”

²⁹ Jesus iron, “Ïtāfiya ganan wal fiya are enī, ‘O Israel, karī wog, Odug neda Negur, Odug ï yogo tekelei.

³⁰ Õ, Odug ogon Negur ï nigin waũ adok, malākanon adok, kisi adok, megeir adok bunem, ï nigin waũ laaf.’§

³¹ Anī dō fiya are eig fiya, ‘Õ ogo nigin waũ laa fef gen, nē tā nigineg ago waũ laaf.’* Ïtāfiya uru enim, ganan wal fiya.”

³² Lo ifelnēdiya tamo anī Jesus irokenen, “Tise, õ de urok. Negur ï tekelei, taka to ibodok, Negur yogo dogol wof, anī bun momoi urok.

³³ Õ Negur nigin waũ adok, kisi adok, megeir adok bunem waũ laaf fen, õ ogo nigin waũ laa fef gen, nē tā nigineg ago waũ laafei yeya anim, yā bun sesewi fiya ado sesewi fiya fire fire ganan wal fiya.”

³⁴ Jesus tamo anī keleĩ ado aiten yale di, ile fen, Jesus ï irokenen, “Õ Negur nē tano nigin egerō sā.” Sain anī bunem ilen, taka nem baban to fiyēya nigin kumī den.

Ai Nē Kesu Anī Kristus?

(*Matyu 22:41-46; Luk 20:41-44*)

³⁵ Jesus tempel modoũ bun ifelnēid fen, ï to fedin, “Naig fe di, lo ifelnēdiya tamo, Kristus ï Dawid nē naal dedig?

³⁶ Dawid ï yogo Awa Uur Fateul bunem wogō ye fen, kurō falaisin:

“ ‘Negur, neu Odug irokenen,

“Imau biya melem ubod mog, ogon kiwai tar

on yē farumē gō afalauf.” ’

³⁷ Dawid yogo, ï nigin ‘Odug’ yef, naig fe di, ï Dawid naal ouf?”

Tamo kayau musei waud el fiya ado karī difiyen.

³⁸ Jesus ifelneid fen, iron, “Lo ifelnēdiya tamo nigin lo welegei. Idi gabar meluluk difonunakel diyo ken, maket modoũ bun aan difiyēdiyof anī orodidig.

³⁹ Age de fen, idi Juda neid uub fō bun, sia biyai biyai bun dibod ken, tar inoya bun modoũ malabag bun dibodōdig.

⁴⁰ Idi, kayau waab idegnēdiya bunem nedi fō sosoin de fen, meleid yaleya nigin meluk bagai kosē dedig. Tamo age fediya, mala solo sane bagai dalouf.”

Kayau Waab Nē Ofa

(*Luk 21:1-4*)

⁴¹ Jesus ofa moni bogis sitakā ibod ken, tamo kayau lo feid mog, idi moni tempel bogis bun dinon. Tamo kayau safineid adodo musei moni odudug diraran.

⁴² Anī ere, kayau waab maleg taka isi, kapa koin moni giriya nanaal bagai uru inon. Are tu toea dogol.

⁴³ Jesus in dō fiya tar iweig laisi fen, irokenēdin, “Aya ā momoi arokeneik, kayau waab maleg enī ï, ganan wal fediya, odug bagai bogis bun inol.

⁴⁴ Idi ganan dogo neid safineid bun tamal tunī dinon, anī ere, kayau maleg anī, ereb ereb adok ï isennēf anī ganan inon.”

13

Idikeleya Sain Nē Uris

(*Matyu 24:1-35; Luk 21:5-33*)

¹ Jesus ï tempel bunem kutū yeis mog, in dō fiya tar taka ï irokenen,

‡ 12:26: Eksodas 3:6 § 12:30: Diuteronomi 6:4, 5 * 12:31: Levitikas 19:18

“Ule, Tise! Ere meein odudug oug fediya! Ere fõ meli meli oug fediya!”

² Age ye di, Jesus ï irokenen, “Fõ odudug enĩ ganan uledif de? Meein enĩ taka to abob teten yenēf, anĩ adok fau isog irailauf.”

³ Jesus Moul Arein tempel sitakã ibod mog, Pita, Jems, Jon, Endru anidim mugun Jesus to difiyen,

⁴ “Ere sain enidi wõ youf? Ere uris bagai anĩ, enĩ ganan kisi falauf nigin wõ youf? Anĩ urokanamã.”

⁵ Jesus idi irokenēdin, “Takam idegneiya nigin lo weleg.

⁶ Musei aya yanau nem disi dirōf, ‘Aya Kristus,’ age de fen, musei didegnēdiyof.

⁷ Sain ã kusĩ nigin karĩg fen, tamo sigoredim kusĩ nigin wogõ douf anĩ karĩ gouf, ã to tererē gei. Ereb ereb anidi agef wõ youf, anĩ ere, idikeleya sain fau dum isiyof.

⁸ Teneub taka fã ye fen, ï teneub taka nigin kiwai ifenēf, tano taka ï, tano taka nigin kiwai ifenēf. Uyu taka taka bun mimĩ wõ ye fen, naũ isiyof. Age foug anĩ, kayau kesu gõ foug nigin darau gariya inodig age fiya.

⁹ “Ã aug nigin lo weleg. ã fau kaunsel imeid bun dinenei ken, uub fõ bun wagagã diyeif. Aya yanau nigin, ã gawaman mudur, king geid meleid bun ufareg fen, idi kurõ walaisig urokenēdigouf.

¹⁰ Biya od ketem teneub ganau bun iyokalauf.

¹¹ Sain ã gei diyeyi ken, kot bun dirouleyeif, ere mauf wog fen, to kisi musei waleg. Sain anĩ bun, ereb ifeneik anĩ wogõ gouf, ere nigin, are āgem to wogõ gouf, are Awa Uur Fateulem.

¹² “Turam, tura kiwai imeid bun ino di, dukesiyof, age fe di, tamam in kesu age foug. Kesum sina tama kiwai difeneid fen, laa bun dinenēdiyof.

¹³ Tamo ganau aya nigin ã kiwai difeneif, anĩ ere, taka ï megeir ifaref ile ile idikeleyanouf, Negur ï yalouf.

¹⁴ “Sain ‘ninin anĩ fonou inouf nigin’* ï an to ifarau nē anĩ ulogouf (anĩ uweseg, keleĩ youf), idi Judia distrik bun dibodok, arein diya diselauf.

¹⁵ Taka ï yogon fõ agaran ibodok, ï kutũ yeis, aaben ile, ereb ereb to yalouf.

¹⁶ Taka ï kabier ibodok, yogon gabar yalouf nigin to kel ilauf.

¹⁷ Naa anĩ bun, kayau bouweid ado, kayau kesu su difenēdif ado, idi meleidlon ado!

¹⁸ Feluk sain bun, anĩ to wõ youf nigin, ã Negur kosē wiyēgouf,

¹⁹ ere nigin, naa anidi bun morõ odug biya adouf, morõ age fiya, gariya bun Negur teneub inon bunem isi gama, taka to wõ yen, dum buneg taka to wõ youf.

²⁰ Odug morõ odug nē naa anĩ to guru falaisim, taka to ibodom. Anĩ ere, tamo kayau ï igirnēdin nigin, ï naa anĩ guru falaisin.

²¹ Sain anĩ bun, taka ã irokeneif, ‘Ulegēf, Kristus yeir!’ oo ‘Í your!’ ã anĩ to momoi ge.

²² Fau idegēya Kristus, idegēya profet ado, wõ de fen, idi kisi falauf are, Negur igirnēdin anidi didegnēdiyof nigin uris memelik ado dinodiyof.

²³ Anĩ nigin, lo welegei, sain anĩ fau mog, aya ã ereb ereb ganau aro-kenein.

²⁴ “Anĩ ere, naa anidi bun, morõ anĩ dõ fiya,

“ ‘gaa gugum kalauf,
age fe di, ogõ lalan to ifenēf,

²⁵ saa ilun tamal barisa kuku rouf,
saa nē megeir ganau guyoyõ douf.’†

²⁶ “Sain anĩ bun, tamo idi, Tamo Naal lalo bun yogon megeir odug fula fiya medeiya ado isi mog, dilouf.

²⁷ Agef fen, ï yogon engel susur fedid, yogon tamo kayau igirnēdin anidi, teneub akor ganau bun, gaa

* 13:14: Daniel 9:27; 11:31; 12:11 † 13:25: Asaia 13:10; 34:4

iseya nem ile gaa ileyan, gei de, kuru difediyouf.

²⁸ “Gama ã, aa fig bun keleĩ walo-gouf. Susu bonuf fen, aarau inodif, ã keleĩ, saneya melsak.

²⁹ Age fiya gen, ã ereb ereb anĩ wõ youf ulogouf, ã keleĩ, are mogo melsã bagai bobogẽ ifaref.

³⁰ Aya ã momoi arokeneik, tamo kayau sain enĩ bun dibodok eneidi to gare de mog, enĩ ganan wõ youf.

³¹ Saa teneub ado sa kalauf, anĩ ere, neu od to bagai sa kalauf.

Naa Sain Ado Takam To Keleĩ Youf (Matyu 24:36-44)

³² “Taka nem naa sain ado to keleĩ youf, saa ilun engel idig sã, Naal ãg sã, Dei yogo dogol.

³³ Mata ubodõg fen, lo weleg! Ereb sain anĩ wõ youf, ã to keleĩ youf.

³⁴ Are tamo fõ itor ileya gen. Ì yogon fõ itor ken, lo difouf nigin yogon ferfer imeid bun inon, idi mugu mugu kabĩ fire fire ifenēdin. Agef fen, Ì tamo bobog bun anĩ mala inof ibodõf nigin irokenen.

³⁵ “Anĩ nigin, mata ubodõg fen, lo welegei, ere nigin, ã keleĩ sã, ereb sain fõ marau kel isiyouf, aragau be, bõ atun be, tataro yũ mog be, wef mog be.

³⁶ Ì isi tarabã yeĩf, ã to wenēg mog, ileyēĩf, are deuf.

³⁷ Ereb aya ã arokeneik, aya adok ganan arokenēdif, ‘Lo weleg!’ ”

14

Kayau Taka Betani An Jesus Mudur Bun Moul Fi Felen

(Matyu 26:1-16; Luk 22:1-6; Jon 11:45-53; 12:1-8)

¹ Gama Pasa naa ado Bret Yis Sã Sifa naa, fau uru yen mog, pris odudug, lo ifelnēdiya tamo geid, Jesus idegēya naab bun dale dirou fen, dukesiyouf nigin naab dimiren.

² Idi diron, “Sifa sain bun to age tafouf, age tafouf are, tamo kayau seye de fen, kusĩ dalesauf.”

³ Jesus Betani an, Simon kulu lepra dagi adon tamo, in fõ bun saaf yoko ibod mog, kayau taka Ì wagen mouf sumeĩ biya bagai moni odug nem, nad* nem dogol dinon anĩ, gulub† ado irou isin. Agef fen, kayau gulub anĩ karãf fen, Jesus mudur bun mouf fi felen.

⁴ Age fe di, tunĩ an difaren are waud sane fen, abob dirokenen, “Ere nigin mouf enĩ sekil fef?”

⁵ Mouf enei yar tekelei nē dimig mala wal feseya nem sur fiyam, agef fen, moni anĩ yale, maleg tamo ifenēdiyam, are dem.” Age de fen, idi Ì totol bagai ou difiyen.

⁶ Jesus iron, “Utorñēg, ã ere nigin Ì wau morõ wenēgef? Kayau enĩ aya nigin biya bagai age fel.

⁷ Maleg idi faimud ã geid ubodõgouf, anĩ nigin, ã idi isennēdiya oroyeĩf, are sain musei. Anĩ ere, aya faimud ã geid to tabodõgouf.

⁸ Ì ereb age fiya kisin anĩ age fel. Ì mouf aya bouwau bun fi felel are, mekur ainēf nigin anĩ ketem dodok fel.

⁹ Aya ã momoi arokeneik, tenebur ein nain be, biya od enĩ wogõ douf, ereb kayau enĩ age fel anig wogõ douf. Age fe di, idi Ì nigin kisi difouf.”

¹⁰ Age ye di, Judas Iskariot, tuwelf anidi atun taka, Jesus kiwai ifen ken, pris odudug imeid bun inouf nigin wagedin ilen.

¹¹ Pris odudug idi od enĩ karĩ de, waud al fe fen, Ì moni difenēf nigin dirokenen. Anĩ nigin, Ì Jesus idi imeid bun inouf nigin naab imirek ilen.

Odug Nē Saaf

(Matyu 26:17-30; Luk 22:7-23; Jon 13:21-30; 1 Korin 11:23-25)

¹² Bret Yis Sã Sifa inoya naa matu anĩ bun, sain anĩ are idi neid to-bonunã, sipsip naal, Negur tubuid tar isennēdin anĩ kisi de fen, sesewi difedig anĩ, Jesus nē dõ fiya tar Jesus

* **14:3:** Fisir yana, fisir anĩ warumutei bun mouf daledig. † **14:3:** Meein alabasta nem dinon.

to difiyen, “Ō amā nain anī Pasa naa nē saaf wāf nigin, amā dodok mafouf anī oroyok?”

¹³ Age de di, Jesus in dō fiya tar uru sur feid fen, irokenēdin, “Taun uleg fen, tamo taka darum naan ado isi fotou yeif, ī dō gouf.

¹⁴ Ī fō taka namen ile di, uleg fen, gama ā fō marau eig wiyēg urokenēgouf, ‘Tise to fel: Aya neu dō fiya tar geid, Pasa naa nē saaf māf nigin aab nain ibodok?’

¹⁵ Ī aab odug ilun anī ifelneif, an ereb ereb dodok de bure difelen. An neda nigin dodok gouf.”

¹⁶ In dō fiya tar taun dile fen, Jesus iron kilei, ereb ereb age fiya dilen. Anī nigin, idi Pasa naa nē saaf dodok difen.

¹⁷ Aragau di, Jesus in dō fiya tar tuwelf geid, an wō den.

¹⁸ Idi tebol bun si dino, saaf dokon, Jesus iron, “Aya ā momoi arokeneik, ā atun takam aya kiwai imeid bun inoyauf, taka aya uruwom moko anim.”

¹⁹ Idi waud gudūf fen, mugu mugu dirokenen, “Momoi bagai, ayam sā de?”

²⁰ Jesus aitedin yale iron, “Ā tuwelf atun takam, taka ī, imamā uruwom beī bun nu mafef anim.

²¹ Tamo Naal ī nigin ditoton agef bai ilauf. Anī ere, tamo ī Tamo Naal kiwai tamo imeid bun inof, ī malalon ado! Ī sina to gō fem, are dem.”

²² Idi saaf dokon, Jesus bret yale, Negur de fiye ken, bret anī mumā fen. Agef fen, in dō fiya tar ifeneid fen, iron, “Waleg, eī neu bouwau.”

²³ Agef fen, ī kap yale, Negur de fiye ken, kap anī ifenēdin, age fe di, idi adok anī bun don.

²⁴ Jesus idi irokenēdin, “Eī neu naudou, ā Negur geid bar itenēya nigin, are tamo kayau musei nigin fi felef,

²⁵ aya ā momoi arokeneik, aya baban wain enī to āf, gaman ile, aya Negur nē tano bun wain mata āf bun.”

²⁶ Idi seg taka dalel fen, idi Moul Arei bun diselen.

Pitam Jesus Wa Fiyēf Nigin Jesus Iron

(*Matyu 26:31-35; Luk 22:31-34; Jon 13:36-38*)

²⁷ Jesus idi irokenēdin, “Ā fau adok uyalalagauf, ere nigin, Negur nē Ito-toya eig ye irok:

“ ‘Aya sipsip marau aū di, sipsip ganan firagagaū difouf.’

²⁸ Anī ere, aya kel fā auf bun, aya ket Galili uyu alauf.”

²⁹ Pita Jesus irokenen, “Ganan diyalalaufeg, aya sāf.”

³⁰ Jesus Pita irokenen, “Aya ō momoi arokonok, gama bō enī bun, tataro kokorok ye uru fiya sā mog, ō ogo aya nigin wa wo, towo wouf.”

³¹ Anī ere, Pita total bagai iron, “Momoi aya ō uruwom gare tauf nigin oufeg, aya ō nigin to bagai wa afouf.” Age ye di, idig ganan od de tekelei anī diron.

Getsemane Oun

(*Matyu 26:36-46; Luk 22:39-46*)

³² Idi modoū yana Getsemane dedig, an dilen. Age de fen, Jesus in dō fiya tar irokenēdin, “Ein ubodōg mog, aya kosē auf.”

³³ Ī, Pita, Jems, Jon anidi dogol geif fen, ī geid dilen. Agef fen, ī wau gūf fen, morō odug gudū fen.

³⁴ Jesus idi irokenēdin, “Neu malaukanon tobega le fen, wau morō gudū feis, laa nē daū bun ifaref. Ein ufareg fen, lo weleg.”

³⁵ Naal godof iroule fen, kisi falauf are, sain anī Jesus wal fiyēf nigin, ī tenebur kubū ye fen, kosē yen.

³⁶ Jesus iron, “Aba,‡ Dei, ereb ereb ganan, ō age fiya kisi feleya. Kap enī walelkana. Anī ere, neu oroya anī to dō wo, on oroya dō wo.”

³⁷ Age fel fen, Jesus in dō fiya tar gedin kel isin, mulā den mog, ileidin. Jesus Pita irokenen, “Simon, ō wenek de? Ō aua tekelei to mata ubodōf de?

‡ 14:36: Anī nē gariya, Aram od bun ‘Dei.’

³⁸ Ā, kisi yeīya bun to kubū gouf nigin lo weleg fen, kosē gouf. Uur are orof, anī ere, bouwa anī malegef.”

³⁹ Ī baban kel ile, uruwa kosē yen gen, dōf age fen.

⁴⁰ Ī kel isin, baban denena mog, ileidin, ere nigin, idi meleid morō gudū fesin. Idi ĩ ereb fiyēya nigin taka to kisi difen.

⁴¹ Jesus kel towo fe fen, in dō fiya tar irokenēdin, “Ā fau si unog fen, yenēyai gef? Bure! Sain mogo isil. Ulegef, Tamo Naal mogo mosor tamo imeid bun ilef.

⁴² Fafāg fen, teleg! Kiwai imeid bun inoya tamo yeir isif!”

Jesus Dirounen

(Matyu 26:47-56; Luk 22:47-53; Jon 18:3-12)

⁴³ Jesus fau wogō ye mog, tuwelf anidi atun taka, Judas wō yen. Tamo musei dimig adodo, seburer adodo, ĩ geid disin. Pris odudug, lo ifelnēdiya tamo, mudur adodo idim sur difedi di, disin.

⁴⁴ Gama Judas ĩ Jesus yaor fiyēya nē uris nigin, idi faded fiyēdin: “Tamo aya umā afouf anī, ĩ waleg fen, uroug uleg.”

⁴⁵ Judas kaisā bagai Jesus wagen ile iron, “Rabi!” Agef fen, umā fiyen.

⁴⁶ Tamo idi Jesus ka dife dirounen.

⁴⁷ Age dife di, tamo melsā difaren anī takam dimig ul feis yale, pris mudur ado nē kabī tamo weder salōf iran.

⁴⁸ Jesus iron, “Aya bē tamo gen, ā dimig adodo, seburer adodo, waleyagau fenē usigef de?”

⁴⁹ Naa ganan, aya ā geid tabod ken, tempel fofomala bun afelnein, anī ā aya to urouyagen. Anī ere, Negur nē Itotoya bun ibodok anī kisi falauf nigin.”

⁵⁰ Age ye di, ganan ditornē diyalelen.

⁵¹ Tamo gaū taka, gabar lalau dogol ifonun ĩ, Jesus dō fen. Sain idi Jesus ka dife di,

⁵² ĩ gabar inū iraille, gemū iyawon.

Jesus Juda Kaunsel Neid Kot Mala Bun Ifaren

(Matyu 26:57-68; Luk 22:54, 55, 63-71; Jon 18:13, 14, 19-24)

⁵³ Idi Jesus dale, pris mudur ado wagen diroulen. Age dife di, pris odudug, mudur adodo, lo ifelnēdiya tamo geid, ganan disi guru difen.

⁵⁴ Pita Jesus dume dōf, tokō fel ile, pris mudur ado nē fō fofomalan wō yen. An ĩ kabī tamo geid dibod ken, yā imidirek ibodon.

⁵⁵ Pris odudug, kaunsel ganan geid, Jesus laa bun dinenēf nigin bouwa bun od dimiren. Anī ere, taka to dilen.

⁵⁶ Musei Jesus bouwa bun idegēya od diraran, anī ere, idi neid od tekelei sā.

⁵⁷ Age de fen, tamo tunī fafā de fen, Jesus bouwa bun idegēya od enī diran,

⁵⁸ “Amā karī mafiyē mog, iron, ‘Aya tempel tamom dinon anī narī afel fen, naa towo bun, taka, are tamom to inouf anī anouf.’”

⁵⁹ Anī ere, idi neid od anīg tekelei sā.

⁶⁰ Age de di, pris mudur ado wagedin fā ye ifar fen, Jesus to fiyen, “Ō to solo urōf de? Eī ere od anī tamo enidi dirousi, ō boū bun duk?”

⁶¹ Anī ere, Jesus ĩ mutū ifar fen, to solof iron.

Baban pris mudur adom, ĩ to fiyen, “Ō Kristus, Negur Naal de?”

⁶² Jesus iron, “Aya im, ā Tamo Naal Negur megeir ado ima biyalem ibod ken, saa lalo bun isi mog, ulougouf.”

⁶³ Age ye di, pris mudur ado in kolos serek fe fen, to fen, “Ere nigin ada od megeir fiya nigin tamo baban tamirēf?”

⁶⁴ Ā kono fiya od mogo karī gel. Ā ere kisi gef?”

Idi ganan ĩ laa fouf nigin diron.

⁶⁵ Age de fen, tunī Jesus disisnē, mala difofakel fen, imedim dun. Age de fen, idi diron, “Aim inok kurō weis urō!” Age dife di, kusī tamo Jesus dale fen, dun.

Pita Jesus Nigin Wa Fen
(*Matyu 26:69-75; Luk 22:56-62; Jon 18:15-18, 25-27*)

⁶⁶ Pita fõ fofomalan tenebur ibod mog, pris mudur ado nē kabī kayau taka isin.

⁶⁷ Ī, Pita yā imidir mog, lo fel fen, iron,

“Ōg Jesus Nasaret tamal geiden.”

⁶⁸ Anī ere, ĩ waf fen, iron, “Ō od urok enī, aya keleĩ sã.” Age ye fen, ĩ bobogē iyok ilen.

⁶⁹ Kabī kayau anī Pita an ile fen, ĩ baban an difaren anī irokenēdin, “Tamo enī are idi neid taka.”

⁷⁰ Ī baban wa fen.

Sain naal ilele di, idi melsã difaren anidim Pita dirokenen, “Moi moi bagai, õ idi neid taka, ere nigin, õ Galili tamal.”

⁷¹ Ī mogo yogo bouwa geluf fen, totol od irokenēdin, “Tamo ã urōgef anī, aya keleĩ sã.”

⁷² Age ye mog, kaisã bagai, tataro baban kokorok yen. Age fe di, Pita Jesus od irokenen anī weder fokõ felen: “Tataro fau kokorok ye uru fiya sã mog, õ aya nigin wa wo, towo wouf.” Anī bunem, ĩ kusureis fen, inã yalen.

15

Jesus Pailat Mala Bun Ifaren
(*Matyu 27:1, 2, 11-26; Luk 23:1-5, 13-25; Jon 18:28-19:16*)

¹ Bonimeĩ bagai, pris odudug, mudur adodo, lo ifelnēdiya tamo, Juda neid kaunsel ganan geid, od difon. Idi Jesus difõ dale dirou, Pailat ima bun dinon.

² Pailat Jesus to fiyen, “Ō Juda neid king de?”

Jesus solof iron, “Are de yer, õ urok anī.”

³ Pris odudug ĩ bouwa bun od musei dun.

⁴ Anī nigin, Pailat baban Jesus to fiyen, “Ō to solo wo urõf de? Ereb ereb musei nigin bouwã bun od dinof anī ulef.”

⁵ Anī ere, Jesus fau od taka to solo fen. Age fe di, Pailat terē ye fen, kisi musei yalen.

⁶ Gawaman nē tobonunã are, Pasa Sifa inoya bun tamo kayau dirõ di, kalabus bun tamo taka dalisnēdig.

⁷ Tamo taka yana Barabas ĩ, tamo kusī dales fen, tamo didenkesin, kalabus bun dinenan anidi neid taka.

⁸ Tamo kayau mala odug dise, Pailat gai age fedig anī, age fenēdiyof nigin to difiyen.

⁹ Pailat to fedin, “Ã aya Juda neid king anī aliskeneĩf de?”

¹⁰ Pailat keleĩ, pris odudug idi kiyeĩ dino fen, Jesus ĩ ima bun dinon.

¹¹ Anī ere, pris odudug tamo kayau waud dale fen, dirokenēdi di, idi Jesus ban Barabas anī Pailatem yaliskenediyof nigin diron.

¹² Pailat idi to fiyēdin, “Juda neid king gedig anī, aya ĩ nigin naig afiyēf?”

¹³ Idi diweig diron, “Aa tetek bun ũf!”

¹⁴ Pailat idi to fiyēdin, “Ere nigin? Ere mosor ĩ age fen?”

Anī ere, idi totol bagai diweig diron, “Aa tetek bun ũf!”

¹⁵ Tamo kayau waud el foug nigin, Pailat Barabas yaliskenedin. Pailat irõ di, Jesus wagĩ difiye ken, aa tetek bun dũf nigin, kusī tamo imeid bun inon.

Kusī Tamo Jesus Ketē Difiyen
(*Matyu 27:27-31; Jon 19:2, 3*)

¹⁶ Kusī tamo idi, Jesus dale dirou gawaman mudur nē fõ aaben dile fen, kusī tamo ganan diweignēdi di, guru difen.

¹⁷ Idi gabar kadaũ difounkenen, age de fen, idi malũ duri ado dale, teter tanak kori de fen, ĩ mudur bun kurũ difen.

¹⁸ Age de fen, idi ĩ diweig dirokenen, “O, Juda neid king gai gai ibodõf!”

¹⁹ Baba baban idi werĩ tibog nem mudur bun du ken, disisenen. Idi iboreid bobou de, kususu de fen, ketē difiyen.

20 Idi ketē difiye kel fen, gabar kadaū dinukeis, yogon gabar bagai anī difounkenen. Age de fen, idi ī aa tetek bun dūf nigin dirou diselen.

Jesus Aa Tetek Bun Dun
(*Matyu 27:32-44; Luk 23:26-43; Jon 19:17-27*)

21 Tamo taka Sairini tamal, yana Simon, Aleksanda Rufus ado neid temeid, ī yogon fonom isi, luwen wal fediyoū mog, idi Jesus nē aa tetek faali foug nigin nugo difiyen.

22 Idi Jesus modoū yana Golgota (anī nē gariya, Mudur Tuwa nē Modoū) an dirou diselen.

23 Age de fen, idi Jesus darau naal to karī youf nigin wain marasin* taka ado falei de difenen, anī ere, ī to yon.

24 Idi ī aa tetek bun du ken, in gabar foi de fen, aibem ereb anī yalouf nigin aisaī kodē den.

25 Bonimei nain kilok bun, idi ī aa tetek bun dun.

26 Jesus bouwa yūya od eig de diton: JUDA NEID KING.

27 Idi bē tamo urug, ī geid aa tetek bun didenen, taka Jesus ima biyalē, taka ima kilē.†

29 Tamo kayau dile disi dife, kono difiye ken, kasā difiyē, mudureid dira ken, diron, “Ō, tempel narī afel fen, baban naa towo bun anouf, won,

30 ō ogo nigin usenne ken, aa tetek bun tamal kutū weis!”

31 Age difiyen gen, pris odudug, lo ifelnēdiya tamo geid, idi dogo dogol wogō de fen, ī ketē difiyen. Idi diron, “Ī tunī isennēdidig, anī ere, ī yogo isennēya kisi feleya sā!

32 Kristus enī, Israel neid King, utornēg len, gama aa tetek bun tamal kutū yeis len, tail fen, momoi tauf.” Idi ī geid aa tetek bun didenēdineg, ī kono difiyen.

Jesus Laa Fen
(*Matyu 27:45-56; Luk 23:44-49; Jon 19:28-30*)

* 15:23: Marasin nē yana, ‘mer (myrrh).’ † 15:27: Itotoya tunī eig de ditoton: kilē. 28 Age de fen, Negur nē Itotoya enei kisi felen, “Ī lo difodulēdig anidi geid bagu difedin.” (Asaia 53:12) ‡ 15:34: Sam 22:1 § 15:36: Maaīwō tamal safina taka, ku nanaal musei ado naan dū fedig.

33 Gaa atun tuwelf kilok bun, gugum isi, teneub ganam kerū fel ile, tri kilok aragaun.

34 Aragau tri kilok bun, Jesus wade bagai iweig iron, “Eloi, Eloi, lama sabaktani?” -ani nē gariya, “Neu Negur, neu Negur, ere nigin ō aya utornal?”‡

35 Tunī melsā difaren, anī karī de fen, idi diron, “Karīg, ī Eliya iweignek.”

36 Tamo taka gudu re ile, spons§ yalen, wain makik ado bun nu feis fen, tibog bun ino fen, Jesus yāf nigin ifenen. Agef fen, ī iron, “Gama utornēg. Eliya isi yaleisnē mog, tailauf.”

37 Jesus ait odug nem iweig fen, laa fen.

38 Tempel nē gabar faraf uru fen, ilunenem irousil teneburen.

39 Kusī tamo neid orowa, Jesus wagen an ifaren anī, in kaīya anī karī ye, in laa anī ile fen, iron, “Momoi bagai, tamo enī Negur Naal!”

40 Kayau tunī so del difar fen, lo difen. Idi atun, Maria Magdala, taka Maria, Jems naal bagai Joses ado neid sineid, taka Salome.

41 Galili an kayau enidi Jesus dō difiye ken, aruna dalen. Kayau musei, Jesus geid Jerusalem diselen anidig an difaren.

Jesus Mū Difen
(*Matyu 27:57-61; Luk 23:50-56; Jon 19:38-42*)

42 Naa are dodok fiya nē naa (naa anī bure fele di, Sabat naa wō youf). Aragau mog,

43 Josef, Arimatea tamal, ī kaunsel neid odug taka, ī yogo anī Negur nē tano tari fen, ī kumī sā Pailat garan ile, Jesus bouwa buru yalouf nigin to fiyen.

44 Pailat Jesus mogo laa fel ya anī karī ye fen, terē yen. Ī kusī tamo neid orowa iweigne ken, Jesus mogo be laa fel anī, ī to fiyen.

⁴⁵ Sain ĩ kusĩ tamo neid orowa bun laa fel ya karĩ ye fen, ĩ Jesus bouwa buru yaleya nigin Josef yo fiyen.

⁴⁶ Age fe di, Josef gabar lalau na yale fen, bouwa buru yaleis, gabar lalau anim sile fen. Agef fen, ĩ matmat sa bun ku dalen anĩ kur inenen. Gama ĩ meein wele fe di, matmat bobog katĩ felen.

⁴⁷ Maria Magdala, Maria Joses nẽ sina ado, ĩ dinenen modoũ anĩ dilen.

16

Jesus Mata Kel Fã Yen

(Matyu 28:1-8; Luk 24:1-12; Jon 20:1-10)

¹ Sabat naa bure fele di, Maria Magdala, Maria Jems sina, Salome anidim dile, Jesus bouwa bun wã difouf nigin, moul sumeĩ biya na gei difen.

² Uub nẽ naa matu bun* bonimeis bagai, we kurã fel mog, idi matmat bun naab diyok dile fen,

³ idi abob to difen, “Aim matmat bobog bun meein wele fel kanadauf?”

⁴ Age de fen, meleid diran, idi meein odug biya anĩ wele feleya dilen.

⁵ Idi meku namen dilen, tamo gaũ taka gabar lalau ifounkel, ima biya melem ibod mog, dile fen, terẽ den.

⁶ ĩ iron, “To terẽ wog, ã Jesus Nasaret tamal aa tetek bun dun anĩ umirnẽgef. ĩ mogo fã yel! ĩ ein sã. Idi ĩ dinenẽ yenen modoũ anĩ uleg.

⁷ Anĩ ere, uleg, in dõ fiya tar Pita geid urokenẽdig, ‘ĩ ketem Galili ilef. An ĩ ulogouf, ĩ irokenein kilei.’ ”

⁸ Idi terẽ de fen, waud firagagaũ felen, anĩ nigin, kayau idi ulolõ deis, meku ditor diyawon. Idi kumĩ den nigin, aib taka to dirokenen.

[Itotoya tunĩ kulu bagai od gariya dino fen, ditoton anĩ bun, Mak 16:9-20 to ibodok.]

Jesus Maria Magdala Bun Wõ Yen
(Matyu 28:9, 10; Jon 20:11-18)

* **16:2:** Are Sande.

⁹ Jesus, uub nẽ naa matu bun bonimeis bagai, fã ye fen, ĩ Maria Magdala bun ketem wõ yen, kulu Jesus kaa sesen sewen kayau anĩ bun irudin.

¹⁰ ĩ ile, idi Jesus geid diyon anidi, waud gudũf fen, marudim difen anĩ irokenẽdin.

¹¹ Idi, Jesus mata fã yel, kayau ĩ ilel ya anĩ karĩ de fen, waud to momoi den.

¹² Dum in dõ fiya tar uru naab diyok dile mog, Jesus bouwa fire bunem, idi atun wõ yen.

¹³ Age fe di, idi keku de disi, an difaren anidi dirokenẽdin, anĩ ere, idi nigineg to momoi den.

¹⁴ Dum idi Ilewen, saaf doko dibod mog, Jesus idi bun wõ ye fen, ou fiyẽdin, ere nigin, idi Jesus fã yel mog, dilen anĩ to momoi de fen, waud katĩ difelen nigin.

¹⁵ Jesus irokenẽdin, “Ã teneub ganan bun uleg fen, biya od tamo kayau ganan urokenẽdig.

¹⁶ Taka ĩ momoi ye fen, naan yalef are, ĩ kel yalouf, taka ĩ to momoi yef are, es fiya bun inenẽf.

¹⁷ Momoi def idi, uris enidi idi bun wõ youf, idi aya yanau nem kaa sesen dirudiyouf, idi od mata mata wogõ douf.

¹⁸ Idi imedim gogour dale dirudiyouf, takag, laa nẽ mũ sane dãf, to mũ idenẽdiyouf, takag, idi dagi tamo bun imeid dino di, dagi sa kalauf.”

Jesus Saa Ilun Irou Iselen

(Luk 24:50-53; Aposel 1:9-11)

¹⁹ Odug Jesus irokeneid bure fele di, Negur Jesus yale, saa ilun irou isel, Negur ima biyalẽ ibodok.

²⁰ Anĩ nigin, in dõ fiya tar dile, teneub ganan bun biya od wogõ den. Age dife di, Odug idi ado kabĩ yale di, uris bunem yogon od anĩ megeir fen.

Luk

Od Uyu Irouya

¹ Musei idi, amã atun ereb ereb wowã yen anĩ, ditotauf nigin age difen,

² are biya od nẽ kabĩ tamo uyulil dibod ken, meledim dilen anidi bun tamal, anĩ wogõ difaman.

³ Age fiya nigin, aya yug bagai, gariya bunem ereb wowã yen anĩ ganan amir ailen, are aya kisi afen, tamo odug Teofilus õ bun el fe, ito-toya nigin biya bagai aun,

⁴ anĩ bunem, õ ereb ereb difelnon are momoi yeya anĩ keleĩ youf.

Jon Naan Igunẽdiya Tamo Gõ Fiya Sã Mog, Anĩ Ket Wogõ Yen

⁵ Herod Judia nẽ king ibodon sain bun, pris taka ibodon, in yana Sekaraia, ĩ Abiya nẽ pris bun tamal taka, in aiwa Elisabet ĩg Aron nẽ ibor bun tamal.

⁶ Idi urom Negur mala bun madur dibodon, idi Odug nẽ ĩtãfiya ganan ado nun el de, tutuk dõ difedig.

⁷ Anĩ ere, idi urom kesu sã, ere nigin, Elisabet ĩ dali, kesu gõ fiya kisi feleya sã, agef fen, idi urom tubau bagai.

⁸ Sain taka bun, Sekaraia, ne kabĩ tura tar geid kabĩ dale mog, ĩ Negur nẽ pris kabĩ yale fen,

⁹ pris idi neid tobonunã bunem, Odug nẽ tempel namen ile fen, aa gaula sumeĩ biya tõ fiya nigin aisaĩ kodẽ bunem ĩ digirnen.

¹⁰ Aa gaula sumeĩ biya tõ fiya saine di, idi Odug yana dalesedig ganan mayarẽ kosẽ den.

¹¹ Agef mog, Odug nẽ engel, ĩ bun wõ ye, alta aa gaula sumeĩ biya tõ fiyadig anĩ ima biyalẽ ifaren.

¹² Age fe di, Sekaraia ĩ ile fen, ĩ terẽ ye mã, kumĩ ye fen, dẽ yelen.

¹³ Anĩ ere, engel ĩ irokenen, “Õ to kumĩ wo, Sekaraia, ogon kosẽya are Negur ĩ karĩ yen. Ogon aiwã Elisabet

ĩ, ogon kesu monog gõ foug, age fe di, in yana ù, Jon wouf.

¹⁴ ĩ bunem waũ kulĩya ado waũ al fiya õ bun ibodõf, age fe di, musei ĩ gõ foug bun waud al foug,

¹⁵ ere nigin, Odug mala bun ĩ yana odug adouf, ĩ wain be, aai naan totol falei difef anĩg to yãf, agef fen, ĩ sina namenem Awa Uur Fateulem aura fiyẽf.

¹⁶ Israel tamo kayau musei fau inim, Odug, nedi Negur wagen kel gurif irou ilauf.

¹⁷ Agef fen, ĩ Eliya nẽ uur ado megeir bunem, Odug fau ileya sã mog, ĩ ket uyu irou ile fen, temeid tar, naaluid tar nigin waud yenẽf nigin ado, fe temeleid idi madur ibodõya nẽ kisi biya bun ileya nigin falei fe fen, tamo kayau Odug nẽ anidi saika fediyouf.”

¹⁸ Sekaraia engel to fiyen, “Naig afe fen, aya enei keleĩ youf? Aya neu kayau ado urom mabodok masi, tubau bagaif.”

¹⁹ Engel aiten yale iron, “Aya Gabriel. Aya Negur mala bun afaredig, anĩ nigin, aya õ wogõ yõya nigin ado, biya od enei irokonõya nigin sur fiyal.

²⁰ Anĩ gama õ ait ufokol fen, od to wogõ wof ule, anĩ wõ youf naa bun, ere nigin, õ neu od to momoi wol, od enei are fau yogon sain bun bagai, kaũ wõ youf.”

²¹ Age fe di, tamo kayau Sekaraia tari de fen, idi ĩ sain meluk tempel namen ibodon nigin kisi musei dalen.

²² ĩ ulõ yesin sain bun, ĩ wogõ fiyẽdiya kisi feleya san. Age fe di, idi keleĩ, ĩ tempel namen mala seleulã kurãf fen, ereb taka ilel, ere nigin, ĩ imam dogol ifelneĩd fen, ĩ wogõya sã ibodok ilen.

²³ In kabĩ nẽ sain bure fele di, ĩ fõ bun kel ilen.

²⁴ Anĩ bure fele di, in aiwa Elisabet bou adon, agef fen, ogõ faif ĩ iminkel ibodon.

²⁵ ĩ iron, “Odugem enei age fanan. Naa eneidi bun, ĩ yogon oroya ado

wau ifenēya ifelnan, agef fen, neu mama tamo kayau atun yalelkanan.”

Jesus Gō Fiya Sā Mog, Anī Ket Wogō Yen

²⁶ Ogō sigis bun, Negur, engel Gabriel Nasaret taun, oun Galili teneub, sur fiyē di, ile,

²⁷ kayau taulei, tamo yana Josef, Dawid nē ibor bun tamalem yalouf nigin digirin gein ilen. Kayau taulei yana Maria.

²⁸ Engel ī gein ile fen, iron, “Fel, ō nigin Negur fatuk el yok. Odug ō ado ibodok.”

²⁹ Maria in od nigin wau fatuk togu fen, aanya enei naig fiya nigin ye fen, kisi musei yalen.

³⁰ Anī ere, engel ī irokenen, “Maria, ō to kumī wo, ō Negur nē wau el fiya gurug wol.

³¹ Ō fau kesu ado fen, kesu monog gō wouf, ago fen, yana ū, Jesus wouf.

³² Ī fau odug wō ye di, Negur Ilun Bagai Naal douf. Negur Odug yogo, king nē modoū tama Dawid nē anī, ī ifenēf.

³³ Age fe di, ī Jakop nē ibor bun king gai ibodkalauf, in tano to sa kalauf.”

³⁴ Maria engel to fiyen, “Aya fau mois, eī naig fe wō youf?”

³⁵ Engel ī aiten yale iron, “Awa Uur Fateul ō bun isiyouf, age fe di, Negur Ilun Bagai nē megeir kerub yōf. Anī bunem fateul bagai gō wouf are, yana Negur Naal douf.

³⁶ Ogon sirag Elisabeteg tubau mog, kesu yalouf, ī dali den, anī mogo ogō sigis ī bou ado ibodok.

³⁷ Ere nigin, ereb taka anī Negur bun malai sã.”

³⁸ Maria ī aiten yale iron, “Aya Odug nē kabī kayau, aya bun od sã, ō urok kilei od sã agef wō youf.” Age ye di, engel ī itornē ilen.

Maria Elisabet Ki Fiyen

³⁹ Sain anī bun, Maria dodok fel, kaisã bagai taun taka arei bun, Judia distrik nediwon ilen.

⁴⁰ An ī Sekaraia nē fō bun wō ye fen, Elisabet fel fiyen.

⁴¹ Sain Elisabet Maria nē fel ya anī karī ye fen, kesu sina namen ibodon anī okī yen, age fe di, Elisabet Awa Uur Fateulem aura fiyen.

⁴² Ī ait odugem iweig iron, “Kayau ganan atun, Negur ō el yok. Agef fen, kesu gō wouf anīg, Negur ī el fiyek!

⁴³ Anī ere, aya naig fiya bagai nigin, neu Odug nē sina anī aya bun isif?

⁴⁴ Ogon fel ya nē ait wederoun ile mog bagai, momou nameun al fe fen, okī yel.

⁴⁵ Kayau taka, ī ereb Odug ī irokenek are agef kisi fel wō youf, ye fen, momoi yef, are Negur ī el fiyek!”

Maria Nē Seg

⁴⁶ Age fe di, Maria iron:

“Neu malaukanon Odug yana yalesef,

⁴⁷ agef fen, neu uur Negur Isenaya nigin kulī yef,

⁴⁸ ere nigin, ī, aya yogon kabī kayau maleg nigin kisi fatuk yalen.

Sain enei bunem ilauf ganan, ibor ganan Negur ī el fiyen douf,

⁴⁹ ere nigin, Negur Megeir Barikā ī aya bun ereb odug age fel,

ī yana fateul ibodok.

⁵⁰ In wau yūya, ī nigin anini def bun tobol fouf,

ibor gama ibodok enei ado, dumen isiyouf idi buneg gai gai ibodkalauf.

⁵¹ Ī yogo imam kabī total odug biya age fedin,

ī idi neid kisi bun yeneid dalesef anī irudi di, firagagaū difen.

⁵² Ī yeneid adodo, nedi modoū bun yalelneid fen, maleg anī yalesnēdin.

⁵³ Ī idi naū fedif anī, ereb ereb biya ifeneid fen, idi safineid adodo daku irudin.

⁵⁴ Ī amā tubumā tar irokenēdin kilei, ī yogon kabī tamo Israel isennen,

⁵⁵ agef fen, Abraham ado in ibor nē tubu tar bun faimud,

wau yūya ifenēdiya nigin karī yeledig.”

⁵⁶ Maria, Elisabet ado ogō towo age fiya dibod ken, fō bun kel ilen.

Jon Naan Igunēdiya Tamo Gō Fen

⁵⁷ Elisabet nē kesu gō fiya sain wō ye di, ī kesu monog gō fen.

⁵⁸ Ī ne tā tar, in sirag tar geid, Negur nē wau yūya odug ifelnen anī karī de fen, idi weim waud al fen.

⁵⁹ Naa eit bun, idi mulū nigin kesu bou gudū fiya nigin disin, age de fen, ī yana dū, tama nē dait Sekaraia douf nigin age difen.

⁶⁰ Anī ere, ne sina aitedin yale iron, “Age fiya sã! Ī yana Jon ye yauf.”

⁶¹ Idi ī dirokenen, “Ogon sirag tar atun, yana age fiya taka sã.”

⁶² Age de fen, in tama bun kesu yana aib youf anī karī douf nigin, uris difenen.

⁶³ Age dife di, ī itotoya nē safina nigin to fiyēdin, agef fen, “Ī yana Jon,” ye itoto di, idi ganan terē den.

⁶⁴ Sain anī bun bagai, ī awa kakā ye di, bale faraf yale ulō yalaisi di, ī wogō ye fen, Negur yana yalesen.

⁶⁵ Ne tā tar terē de fen, anini den, age de fen, Judia neid arein, fonō fonō wogagā de fen, ereb wō yen anī ganan wogō den.

⁶⁶ Adok anī karī de fen, kisi musei dale fen, to difen, “Kesu enei naig fiya wō youf?” Ere nigin, Odug nē ima ī bun ibodon.

Sekaraia Nē Seg

⁶⁷ In tama Sekaraia Awa Uur Fa-teulem aura fiyē di, ī profet od eig ye wogō yen:

⁶⁸ “Odug seli tabiyouf, Israel neid Negur,

ere nigin, ī isi fen, in tamo kayau kafī fiya bun tamal kel gei fel.

⁶⁹ Ī yogon kabī tamo Dawid nē fō bun, isennadaya megeir ado yalesel ifaref,

⁷⁰ (are ī yogon profet fateul kulu temeleid sigoreid bun wogō den kilei).

⁷¹ Nemā kiwai tar ado, amā nigin to orodif anī imeid bun tamal, kel yalemāf.

⁷² Nemā tamamā tar nigin wau yūya anī ifelneid fen, ī yogon bar itenēya fateul anī karī yelen.

⁷³ Ī wau kuturol fen, nemā tamamā Abraham irokenen.

⁷⁴ Nemā kiwai tar imeid bun tamal kel gei famāf, agef fen, amā kumī sã ī aruna yaleya kisi falauf nigin.

⁷⁵ Amā nemā mabodok malauf bun, ī mala bun gai fateul bagai fen, madur bagai mabodōf nigin.

⁷⁶ “Age fe di, ō neu kesu, Negur Ilun Bagai nē profet douf, ere nigin, ō uyu urou fen, Odug nē naab dodok wouf.

⁷⁷ In tamo kayau neid mosor nigin wedereid tu kalauf bunem, kel yalediyouf nē keleī wenēdiyof.

⁷⁸ Are nemā Negur molol nem wau yūya bunem, anī bun gaa kurā fiya, saa ilunem amā bun isiyouf.

⁷⁹ Are idi gugum bun difaref ado, laa nē buri bun difaref anidi bun, fula fouf, age fe di, nemā yemā delē anidi bun madur marā di, wau inosiya bun malauf.”

⁸⁰ Age fe di, kesu biya fen, uur orib yen, ī gerere tuan ibodok ile, dum ī Israel tamo kayau meleid bun wō yen.

2

*Jesus Gō Fen
(Matyu 1:18-25)*

¹ Sain anī bun, Sisa* Ogastus, Rom teneub ganan bun, tamo kayau an temeleid anī yeneid yaleya nigin od inon.

² (Eī urug bagai, sain Kwirinius ī Siria nē gawaman mudur ibod mog, tamo kayau yeneid dalen.)

* 2:1: Rom neid king odug.

³ Anĩ nigin, ganan dogo dogo neid taun bun yeneid inoya nigin dilen.

⁴ Anĩ nigin, Josef ĩg, oun Galili teneub Nasaret taun bun tamal Judia iselen, Betlehem Dawid nẽ taun bun iselen, ere nigin, ĩ Dawid nẽ fonõ ado in ibor bun tamal.

⁵ ĩ Maria ado yeneid dinouf nigin diselen, ĩ Maria aiwauƒ nigin digirin, anĩ ĩ bou ado.

⁶ Idi an dibod mog, kesu gõ fiya sain wõ yen.

⁷ Age fe di, kesu monog matu gõ fen. Maria ĩ gabar nem silef fen, yaro neid beĩ bun inenen, ere nigin, tamo irouya fõ bun modoũ isokosen.

Gaar Lo Fediya Tamo, Engel Geid

⁸ An gaar lo fediya tamo, melsã fonõ yerin dibod ken, bõ nedi gaar lo difedin.

⁹ Age de mog, Odug nẽ engel idi bun wõ yen, age fe di, Odug nẽ fula fiya medeĩya kerub fedi di, idi kumĩ tererẽ den.

¹⁰ Anĩ ere, engel idi irokenẽdin, “Ã to kumĩ wog, aya od biya, tamo kayau ganan waud al fouf nigin arou asif.

¹¹ Ere nigin, gama Dawid nẽ taun bun, āgenei isenneĩya wõ yel, ĩ anĩ Kristus Odug.

¹² Enei ā bun uris. Ã momou taka gabar nem sile de fen, yaro neid beĩ bun dinenem yenek anĩ ulogouf.”

¹³ Kaisã bagai, engel musei saa ilun temeleid ulolõ deis, engel anĩ geid Negur yana dales diron,

¹⁴ “Negur ilun bagai bun fula fiya medeĩya, age fe di, tenebur ein tamo kayau ĩ el fedif bun, wau inosiya ibodõf.”

¹⁵ Sain engel idi ditorneĩd, saa ilun disele di, gaar lo fiya tamo abob dirokenen, “Odug ada irokanadal anĩ nigin, ada Betlehem teleg, ereb wõ yel anĩ taileg.”

¹⁶ Anĩ nigin, idi kaisã bagai dile, Maria, Josef ado diledin, momou yaro neid beĩ bun yen mog, dilen.

¹⁷ Idi ĩ dile fen, idi kesu anĩ nigin wogõ fiyẽdin anĩ od wogõ de diyon.

¹⁸ Age dife di, ganan karĩ den idi, gaar lo fiya tamo wogõ difiyẽdin anĩ nigin terẽ den.

¹⁹ Anĩ ere, Maria od anĩ ganan yale fen, waun ino fen, kisim dogol fen.

²⁰ Gaar lo fiya tamo keku de fen, idi wogõ fiyẽdin kilei, ereb idi karĩ den ado dilen anĩ ganan nigin, Negur seli dabi fen, yana dalesen.

Jesus Tempel Bun Dirou Dilen

²¹ Naa eit bun, ĩ mulũ ileyã saine di, ĩ yana dũ, Jesus den, yana are sina fau bou ado ya sã mog, engelem yun.

²² Idi neid nonorou lilik fiya naa, Moses nẽ Lo ifaref kilei anĩ bure fele di, Josef Maria ado, Jesus Jerusalem, Odug ifenẽya nigin dirou diselen,

²³ (are Odug nẽ Lo itotoya bun ibodok kilei, “Kesu matu monog wõ douf ganan, Odug wenẽdigouf”*),

²⁴ idi Negur sesewi fiya difenẽf nigin diselen, Odug nẽ Lo eig ye irok kilei, “kuburir uru be, kukutir balas uru be.”*

²⁵ Gama Jerusalem an tamo yana Simeon ibodon, ĩ madur bagai fen, Odug nigin karĩ yeledig. ĩ Israel waud inosiya dalouf anĩ tari fedig, Awa Uur Fateul ĩ bun ibodon.

²⁶ Awa Uur Fateulem, ĩ fau to laaf mog, Odug nẽ Kristus wõ ye di, ilouf nigin irokenen.

²⁷ Awa Uurem toli fiyẽ di, ĩ tempel nẽ modoũ bun ilen. Sain tama sina ado, Lo irok kilei age difouf nigin, kesu Jesus dirou dile di,

²⁸ Simeon imam ĩ yales fen, Negur yana yales iron:

²⁹ “Odug, õ uron kilei, õ gama ogon ferfer wau inosiya ado sur wo di, ilauf.

³⁰ Aya malaum bagai ogon isennẽya anĩ ailel.

³¹ Are ganan meleid bun saika won.

³² Are haiden Israel sã anidi bun, Negur nẽ oroya kurõ falaisiya nẽ lalan, ago di, are ogon

* 2:23: Eksodas 13:2, 12 * 2:24: Levitikas 12:8

tamo kayau Israel bun fula fiya medeïya.”

³³ Kesu tama sina ado, od anï karï de fen, kisi bun terefeit den.

³⁴ Age dife di, Simeon el fiya ifeneïd fen, sina Maria irokenen, “Kesu enï, Israel tamo kayau musei kuku douf, musei fafã douf nigin ado, ï daũ gen ifare di, ï dumen od sane dirõf nē uris wõ youf nigin igirnen.

³⁵ Anï bunem, musei waud bun dinokok are yaorouf. Age fe di, ogon malãkanon anïg dig otem borũ fouf.”

³⁶ Profet kayau takag ibodon, Ana, Fanuel ne barai, Aser nē ibor bun tamal. ï gai tubau bagai, ï tamo yale fen, aiwa ado yar sewen dibodon.

³⁷ Agef fen, ï waab ibodok ile, in yar eiti-fo. ï tempel to itoron, bõ ado gaa ado kuri ye fen, kosē ye, Negur yana yalesedig.

³⁸ Sain anï bun bagai, ï idi gein isel, Negur de fiye ken, Jerusalem tamo kayau kafï fiya bun tamal kel yalediyouf nigin ganan tari de difaren anidi, kesu anï nigin wogõ fiyēdin.

³⁹ Josef, Maria ado, Odug nē Lo irok anï ganan dõ de kisi fele di, idi baban ke de, Galili teneub oun, nedi taun Nasaret dilen.

⁴⁰ An, kesu ï biya fen, total adon, ï kisi biya barikan, agef fen, Negur nē wau ifenēya ï bun ibodon.

Jesus Kesun Tempel Bun Ilen

⁴¹ Yar ganan bun, in tama sina Pasa Sifa naa bun Jerusalem taun diledig.

⁴² Sain ï tuwelf yar mog, idi neid tobonunã dõ de fen, Sifa bun diselen.

⁴³ Sifa bure fele di, in tama sina fonõ ke de dile mog, kesu Jesus ï fau Jerusalem ibodon, anï ere, idi to kelein.

⁴⁴ Idi weim melef den, age de fen, naa tekelei diyon. Age dife fen, idi mogo nedi sirag tar bun ado, nedi tã tar atun dimirnen.

⁴⁵ Idi ï to dile mã, idi ï dimirnē fenē nigin, Jerusalem taun baban ke de dilen.

⁴⁶ Naa towo bure fele di, idi ï tempel modoũ bun ifelnēdiya tamo atun ibod, karï fiyeïd fen, to fiyeïd mog, fotou difiyen.

⁴⁷ Ganan ï karï difiyen are, in karïya nigin ado aiteid solo fen anï nigin, terefeit den.

⁴⁸ Tama sina ado ï dile fen, fatuk bagai terē den. Sina ï irokenen, “Neu kesu, ere nigin eig wamam? Aya tamã ado waumã morõ ken, mamirnom.”

⁴⁹ ï to fen, “Ere nigin ã aya umir-nagel? Aya neu Dei nē fõ bun abodõf ya, ã keleï sã de?”

⁵⁰ Anï ere, ï ereb irokenēdin are, idi to kelein.

⁵¹ Age dife di, ï weim Nasaret disil fen, sigoreid dõf el fen. Anï ere, in sina anï ganan yale, waun inon.

⁵² Jesus kisi biya ado bouwa orib yen, Negur ado tamo nē lo fiya bun biya len.

3

Jon Naan Igunēdiya Tamo Naab Dodok Fenen

(Matyu 3:1-12; Mak 1:1-8; Jon 1:19-28)

¹ Taiberius, Sisa mudur ibodon yar fiftin bun, Pontius Pailat ï Judia distrik nē gawaman mudur ibodon, Herod ï Galili distrik lo fen, ï tura Filip Ituria distrik ado Trakonitis distrik lo fen, age fe di, Lisantias ï Abilene distrik lo fen.

² Anas Kaiafas ado pris mudur dibodon sain bun, Negur nē od gerere tuan oun Jon, Sekaraia naal bun isin.

³ ï Jordan naan kalilï fiya ganan bun iyo ken, waud falei de fen, naan digũ di, mosor yalel kenēdiyof nigin biya od wogõ yen.

⁴ Are profet Asaia nē itotoya bun ibodok kilei: “Ait taka gerere tuan iweig irok, ‘Odug nē naab dodok ge fen, madur wenēg.

⁵ Uus ganan bun kurokirïya yoso fouf, arei ganan mudu ganan ado gudũ falaisi tenebur ouf. Naab goigul yedin, madur fouf, naab koũkï yediya yoso fediyof.

6 Age fe di, tamo kayau ganan, Negur nē tamo kayau kel gei fiya anī dilouf.’ ”*

7 Tamo kayau Jonem naan igunēdiyof nigin guru difen anidi Jon irokenēdin, “Ā, gogour sane gere tar! Negur nē didi isiyof anī wal ge fen, uyagauf nigin, aim irokenein?”

8 Wauī falei gef are, faat biya ū gouf. Ā aug nigin to eig ge urōg, ‘Abraham nemā tamamā.’ Aya arokeneik, meein enidi Negur sã irō di, Abraham gere tar wowā douf.

9 Safor aayū gariyan mogo ibodok, aayū ganan faat biya to yuk, are itu ira ken, yã malan irãf.”

10 Tamo kayau guru difen anidim to difen, “Age fiyauf are, amã naig mafouf?”

11 Jon aitedin yale iron, “Tamo ĩ gabar uru adouf are, aib ĩ sã anī taka ifenēf, takag, taka ĩ saaf adouf, areg de age fouf.”

12 Takis yaleya tamog, naan igūya nigin disin, idi to difen, “Tise, amã ere naig mafouf?”

13 ĩ irokenēdin, “Ā yaleya kilei anī to wal woseg waleg.”

14 Age fe di, kusī tamo tunī to difiyen, “Ba amã ere naig mafouf?” Age de di, ĩ iron, “Ā nedi moni nigin ge fen, to fefu wiyēdig fen, idegēya bunem tamo kayau bouweid bun od to ũg. Āgenei kabī mala walegedig anī bun dogol al gouf.”

15 Tamo kayau Kristus nigin tari difen, anī nigin, idi ganan waud bun Jon anī Kristus be de fen, kisi musei dalen.

16 Jon idi ganan aitedin yale irokenēdin, “Aya naan nem naan aguneik. Anī ere, taka ĩ in megeir neu wal fiya fau isif, aya to biya nigin, ayam in su nē malū biru felediya kisi feleya sã. ĩ Awa Uur Fateul yã ado nem naan iguneif.

17 ĩ es fiya nē fok iman ado, ĩ yogon mayã waī fouf, yogon wit biya are yogon ki bun kuruf fen, wit ido yã mala faimud bun an irãf.”

18 Agef fen, Jon od musei bunem, tamo kayau waud yale fen, biya od wogō fiyēdin.

19 Anī ere, Jonem, Herod tano anī nē mudur, tura nē aiwa Herodias nigin ado ereb ereb sane ganan age fen nigin ou fiyē di,

20 Herod mosor ganan mosor enei ado baguf fen, ĩ Jon kalabus bun inenen.

Jesus Naan Igun Ado In Ibor Nigin (Matyu 1:1-17; 3:13-17; Mak 1:9-11)

21 Sain Jonem tamo kayau ganan naan iguneid fen, Jesus ĩg naan igunen. Age fe di, Jesus kosē ye mog, saa kã fele di,

22 Awa Uur Fateul kuburir bouwa bun genem ĩ bun isin. Age fe di, ait taka saa ilunem isin, “Ō neu Kesu, ō nigin aya wau laa fedig, ō nigin aya wau kulī yedig.”

23 Gama Jesus yogo ĩ yar teti age fiya bun kabī gariya inon. Tamo kayau kisi difen, ĩ Josef naal den, Heli naal,

24 Matat naal, Lewi naal, Melki naal, Janai naal, Josef naal,

25 Matatias naal, Amos naal, Nahum naal, Esli naal, Nagai naal,

26 Mat naal, Matatias naal, Semen naal, Josek naal, Joda naal,

27 Joanan naal, Resa naal, Serubabel naal, Sieltiel naal, Neri naal,

28 Melki naal, Adi naal, Kosam naal, Elmadam naal, Er naal,

29 Josua naal, Elieser naal, Jorim naal, Matat naal, Lewi naal,

30 Simeon naal, Juda naal, Josef naal, Jonam naal, Eliakim naal,

31 Melea naal, Mena naal, Matata naal, Natan naal, Dawid naal,

32 Jesi naal, Obed naal, Boas naal, Salmon naal, Nason naal,

* 3:6: Asaia 40:3-5

33 Aminadab naal, Ram naal,
Hesron naal, Peres naal,
Juda naal,
34 Jakop naal,
Isak naal, Abraham naal,
Tera naal, Nahor naal,
35 Serug naal, Reu naal,
Peleg naal, Eber naal,
Sela naal,
36 Kainan naal,
Arpaksad naal, Sem naal,
Noa naal, Lamek naal,
37 Metusela naal, Enok naal,
Jared naal, Mahalalel naal,
Kenan naal,
38 Enos naal,
Set naal, Adam naal,
Negur naal.

4

Satan Jesus Kisi Fiye (Matyu 4:1-11; Mak 1:12, 13)

1 Jesus Awa Uur Fateulem aura fiye, Jordan naanum kel fen, Awa Uurem itonē, gerere tuan irou ilen.

2 An ĩ naa foti ibod mog, Satanem kisi fiye. ĩ sain anĩ bun ereb taka to yon, naa foti bure fele di, ĩ naũ fen.

3 Agef mog, Satanem Jesus iroke- nen, “Ō Negur Naal ouf are, meein enei urokenē di, bret falei fouf.”

4 Jesus Satan aiten yale iron, “Negur nē Itotoya bun eig ye irok, “Tamo bretem dogol to mata ifenēf.”**

5 Satan Jesus yale irou, modoũ ilun isel fen, kaisã bagai teneub enei nē tano ganan ifelnen.

6 Agef fen, Satan Jesus irokenen, “Aya ō teneub enei nē biya fiya megeir ado ganan afonōf, ere nigin, are aya ifanan, anĩ nigin, aya aib taka ifenēya orouf are afenēf.

7 Anĩ nigin, ō aya selu wabiyouf are, onou ganan are ogon ouf.”

8 Jesus Satan aiten yale iron, “Negur nē Itotoya bun eig ye irok, ‘Odug ogon Negur seli wabi fen, ĩ dogol aruna walouf.’**

9 Satan Jesus yale irou, Jerusalem taun ilen, an tempel fõ soko ilun bagai inenē, ifaren. Satan iron, “Ō Negur Naal ouf are, ogo einenem ufũ urã.

10 Ere nigin, Negur nē Itotoya bun eig ye irok:

“ ‘Negur ō nigin yogon engel ari fedi di,

kulatun diyōf,

11 idi ō imedim ololon daleyōf, age dife di, ō yē meein takam to itutu ouf.’**”

12 Jesus Satan aiten yale iron, “Eig ye irok, ‘Odug ogon Negur kisi fiya bun to unenē.’**”

13 Satan kisi fiya enei ganan bure fel fen, ĩ Jesus itorne ken, ĩ fau sain taka anĩ tari fen.

Nasaret Tamo Kayau Idi Jesus Dudum Difyen

(Matyu 4:12-17; Mak 1:14, 15)

14 Jesus Awa Uur nē megeir bunem Galili kel ilen, age fe di, ĩ nigin od Galili teneub fonō fonō ganan iyoke- len.

15 ĩ idi neid uub fõ fõ bun biya od ifelnēdi di, ganan ĩ yana dalesen.

16 ĩ Nasaret ilen, ĩ an biyan nē, agef fen, Sabat naa* bun, idi neid uub fõ namen ilen, gai age fedig gen. Agef fen, ĩ iwesauf nigin fã ye ifaren.

17 Age fe di, profet Asaia nē itotoya buk kori fiya anĩ difenen, age dife di, ĩ fara fel fen, eig ye itoton anĩ imiren:

18 “Odug nē Awa Uur aya bun ibodok, ere nigin, ĩ aya maleg anidi biya od wogõ afediyouf nigin, igirna fen,

mudurou bun mouf fi felen.

ĩ, aya kalabus bun difaref anidi karika dalouf nigin ado,

meleid ifofakeleya anidi meleid fara falauf nigin, kurõ afalaisiyouf nigin sur fiyan.

Tamo kayau tunim kiwai difeneĩd fen, morõ difenēdif anidi yalel kenēdiya nigin sur fiyan.

* 4:4: Diuteronomi 8:3 * 4:8: Diuteronomi 6:13 * 4:11: Sam 91:11, 12 * 4:12: Diuteronomi 6:16 * 4:16: Juda neid uub naa, are Sarere. * 4:19: Asaia 61:1, 2

19 Takag, Odug nē biya fiya nē yar anī kurō afalaisiyouf nigin sur fiyan.”*

20 Age yel fen, ī gaar gabar itotoya ado are korif fen, itotoya anī lo fedig tamo, kel ifen ken, ibodon. Juda neid uub fō anī bun difaren ganān bagai, Jesus lo difelen.

21 Age dife di, ī gariya ino fen, iro-kenēdin, “Gama naa enī bun, Negur nē Itotoya enei, āgenei karīya bun kisi felel.”

22 Ganān ī yana dales fen, ī sigoron, wau ifenēya od wogō yen anī nigin terē den. Age de fen, idi to difen, “Eī Josef naal anī sā de?”

23 Jesus idi irokenēdin, “Momoī bagai, aya nigin od enei tamo kayau musei wogō dedig wogō gouf, ‘Dokta, ō ogo ogon dagi el wo! Ereb Kape-naum taun oun agon karī maun anī, ogon fō gariyan ein ago wo.’ ”

24 Ī od tobol fe fen, iron, “Aya ā momoi arokeneik, profet taka ī yogon fō gariyan to karī difiyēf.

25 Aya ā momoi bagai arokeneik, Eliya nē sain bun, Israel oun kayau waab musei difar mog, yar towo ogō sigis saa katī fele di, teneub ganān bun uyē sā naū odug difaren.

26 Age de mog, Negur idi anidi taka bun Eliya to sur fen, anī ere, waab taka Sarefat oun Saidon teneub bun sur fen.

27 Takag, Israel oun profet Elisa nē sain bun, musei lepra dagi ado dibodon, anī ere, idi atun taka lepra dagi to loko felen, Naman, Siria tamalem dogol.”

28 Juda neid uub fō bun, ganān anī karī de fen, waud sanen.

29 Age de fen, idi fafā de fen, ī taun anī itor ilauf nigin dirun. Nedi taun are, arei bun nigin, siya sane bun dirāf nigin dirou dilen.

30 Anī ere, ī tamo kayau atu iyok ile fen, yogon naab ilauf nē anī dōf ilen.

*Jesus Kaa Sane Irun
(Mak 1:21-28)*

31 Agef fen, ī Kapenaum taun isilen, taun are Galili distrik bun

ibodok, an Sabat naa bun, ī tamo kayau ifelnēdiya gariya inon.

32 Idi ī ifelnēdin anī nigin terē den, ere nigin, in od wogōya are megeir ado.

33 Juda neid uub fō bun, tamo taka kaa sanem ironen anī an ibodon. Ī ait ilun feis iweig iron,

34 “O, Jesus Nasaret tamal, ō amā ere naig wamā fenē? Ō amā daū wamā fenē nigin usil de? Aya ō nigin keleī, Negur nē Fateul anī!”

35 Jesus total ado iron, “Foro wol! Ī namen tamal ulō weis!” Age ye di, kaa sane anī, tamo kayau ganān atun, tamo anī tou fiyē ira ken, ulō yeis ilen, tamo are bouwa to daū fen.

36 Tamo kayau ganān terē de fen, abob dirokenen, “Eī ere keleī eig fiya? Ī yana megeir adom irō di, kaa sesen ulō deis dilef.”

37 Anī bunem, ī nigin od teneub anī kalilī fiya ganān bun iyokelen.

*Jesus Musei El Fedin
(Matyu 8:14-17; Mak 1:29-39)*

38 Jesus Juda neid uub fō itor ken, Simon nē fō bun ilen. Simon nē mam, ī bouwa uruwa odug ado nigin yenen anī, isennēf nigin Jesus to difiyen.

39 Anī nigin, Jesus ī itirne ken, bouwa uruwa dagi ou fiyē di, itor-nen. Age fe di, kayau anī kaisā bagai fā yale, aruneid yalen.

40 Gaa kuru kel mog, tamo kayau, dagi tamo dagi gariya fire fire adodo ganān, Jesus wagen guri difeid disin, age dife di, idi mugu mugu bun ima tetedin ino fen, ī idi el fedin.

41 Kaa sesen, tamo kayau musei bun, ulolō deis fen, diweig diron, “Ō anī Negur Naal!” Anī ere, ī sakā fiyēid fen, to wogō douf nigin sig-oreid ifofan, ere nigin, idi keleī, ī Kristus.

42 Bonimeī gugum ado, Jesus moilin ilen. Tamo kayau ī dimirnek dile, ī ibodon nē disi fen, ī idi to itornēdiyof nigin katū difiyen.

43 Anī ere, ī iron, “Aya Negur nē tano nigin biya od, taun taka takag

wogō auf, ere nigin, aya anī nigin sur fiyan.”

⁴⁴ Age ye fen, ī Judia distrik oun Juda neid uub fō fō bun, biya od wogō yef iyon.

5

In Dō Fiya Tar Enidi Ket Jesus Iweignēdin

(Matyu 4:18-22; Mak 1:16-20)

¹ Naa taka bun, Jesus Genesaret daliyou* yerin ifaren. Agef mog, tamo kayau ī salili difiye ken, Negur nē od wogō ye di, karī de difar mog anī,

² ī mala ira kel, waag uru naan yerin difar mog, ilen, are gau yaleya tamom an ditor yen ken, nedi kakāg kulo difen.

³ Ī waag anidi taka bun sō yen, are Simon nē waag, agef fen, waag naanū naal godof irou ilauf nigin to fiyen. Agef fen, ī waag bun ibod ken, tamo kayau biya od ifelnēdin.

⁴ Sain ī wogōya bure fel fen, ī Simon irokenen, “Waag naan mala bun urou ule fen, gau yaleya nigin kakāg urofosil.”

⁵ Simon aiten yale iron, “Odug, amā bō odug kabī total malel, anī ere, ereb taka to malel. Anī ere, ō urok nigin aya kakāg baban arofos-ilauf.”

⁶ Sain idi age difen, idi gau musei bagai gei difen, age dife di, nedi kakāg serek fou fenē melsan.

⁷ Anī nigin, idi, nedi tā tar waag taka bun temeleid disi disennēdiyof nigin, gale difiyēdin, age dife di, disi, waag uru bun gau dife isokos fen, waag uru are dimutū fenē melsan.

⁸ Sain Simon Pita enī ile fen, Jesus iboron bobou fe fen, iron, “Odug, aya utorna ule, aya mosor nē tamo!”

⁹ Ere nigin, ī ne tā tar geid gau gei difen anī nigin, terefeit den.

¹⁰ Sebedi gere tar Jems Jon ado, are Simon ne kabī tura tar idig age difen. Age dife di, Jesus Simon irokenen, “Ō

to kumī wo, gama naa enī bunem ilauf ganan, ō tamo gei wouf.”

¹¹ Age fe di, idi neid waag fiteiwō didī dife di, isel fen, ereb ereb ganan ditorara ken, Jesus dō difen.

Tamo Lepra Dagi Ado

(Matyu 8:1-4; Mak 1:40-45)

¹² Jesus taun taka bun ibod mog, tamo taka lepra guruma barikā anī isin. Sain ī Jesus ile fen, ī tenebur kubū ye kumokur fe, Jesus igone ken, iron, “Odug, ō oroyōf are, el wiyauf.”

¹³ Jesus ima irā, tamo anī kobū fiye ken, iron, “Aya wau irok, ō bouwā biyauauf.” Age ye di, kaisā bagai, lepra dagi ī itornen.

¹⁴ Agef fen, Jesus tamo anī iroke- nen, “Ō aib taka to urokenēf, anī ere, ō pris wagen ule, ō bouwā ufelnef, ō bouwā biyal anī nigin Moses nē od irok anī dō fen, sesewi fiya wenēf, anī bunem yaore di, tamo kayau dilouf.”

¹⁵ Anī ere, ī nigin od fau fau iyok ilen, anī nigin, tamo kayau musei ī karī difiye ken, idi neid dagi yalel kenēdiyof nigin disin.

¹⁶ Anī ere, Jesus sain taka taka moilin ile fen, kosē yedig.

Jesus Tamo Bouwa Ilolaisin Anī El Fiyen

(Matyu 9:1-8; Mak 2:1-12)

¹⁷ Naa taka bun, ī biya od ifelneid mog, Farisia tamo, lo ifelnēdiya tamo geid, Galili distrik fonō ganan, Judia distrik ado Jerusalem temeleid idi an dibodon. Age de mog, dagi el fediyof nigin Odug nē megeir, ī bun ibodon.

¹⁸ Tamo tunī, tamo ilolaisin anī, gabgab bun faali de dirou disi, Jesus wagen dinenēf nigin fō namen dirou dilau fenē age difen.

¹⁹ Idi anī age fiya nigin naab taka to dilen, ere nigin, tamo kayau ino yalen, idi fō sokoron disel, soko korō difel fen, ī gabgab ado folo folō dife di, tamo kayau atun, Jesus wagen bagai isilen.

* 5:1: Are, Galili Maaī.

²⁰ Jesus idi neid momoiya ile fen, ï iron, “Mou, ogon mosor alelkonok.”

²¹ Farisia tamo, lo ifelnēdiya tamo geid, idi dogo namedin kisi difen, “Eï aim bagai, kono fiya od wogō yef? Taka nem mosor yaleleya to yenek, Negur yogo dogol.”

²² Jesus idi kisi difen anī kelei ken, to fen, “Ã ere nigin nameï bun agog kisi gef?”

²³ Od nanī anī aya wogōya nigin karika, ‘Ogon mosor alelkonok’ de, ‘Fã wale fen, uyok ule?’

²⁴ Anī ere, Tamo Naal ï tenebur ein mosor yaleleya nigin yana ado anī, ã kelei youf nigin...” ï tamo ilolaisin anī irokenen, “Aya ò arokonok, fã wo, ogon gabgab wale fen, fonō ule.”

²⁵ Age ye mog bagai, ï fã ye, idi wagedin ifaren, yogon yenen gabgab yale, Negur yana yalesef, fonō ilen.

²⁶ Ganan terē de fen, Negur yana dalesen. Idi waud bun terefeit ye fen, diron, “Ada gama tobonunã fire bagai tailel.”

Jesus Lewi Iweignen (Matyu 9:9-13; Mak 2:13-17)

²⁷ Enei bure fel fen, Jesus ile, takis yaleya tamo yana Lewi, an yogon takis yaleya fō bun ibod mog, ilen. Jesus ï irokenen, “Aya dō wiya.”

²⁸ Age ye di, Lewi fã ye, erēb erēb adok itor yen, Jesus dō fiyen.

²⁹ Agef fen, Lewi yogon fō bun, Jesus nē saaf odug yabi di, takis yaleya tamo musei, tunī geid weim saaf don.

³⁰ Anī ere, Farisia tamo, idi neid lo ifelnēdiya tamo geid, Jesus nē dō fiya tar bun nauseir den, “Ã ere nigin takis yaleya tamo, mosor adodo geid, saaf ado naan wōgef?”

³¹ Jesus idi aitedin yale iron, “Dagi sã anidim dokta nigin waud to yenēdig, dagi adodom dogol.

³² Aya madur tamo anidi iweignēdiya nigin to asin, mosor adodo tamo anidi waud falei douf nigin asin.”

Kuriya Nigin Jesus To Difiyen (Matyu 9:14-17; Mak 2:18-22)

³³ Farisia tamo idi ï dirokenen, “Jon nē dō fiya tar, idi kuri de fen, kosē dedig, Farisia tamo neid dō fiya tar idig age fiya, anī ere, ogon idi dobu dirak.”

³⁴ Jesus aitedin yale iron, “Mois ï fau ne tã tar weim dibod mog, ã ne tã tar idi kuriya nigin urokenēdigouf anī kisi feleya de?”

³⁵ Anī ere, naa fau isi di, anī bun mois tamo idi bun tamal yalelnē di, naa anidi bun idi kuri douf.”

³⁶ Jesus yaab od enei idi irokenēdin, “Taka nem gabar masak mata serek fe fen, gabar tubu bun to iwadig. ï age fouf are, ï gabar mata anī serek fouf, takag, gabar mata bun tamal masak are tubu anī ado to susu falauf.

³⁷ Takag, taka nem wain mata meme gabar* tubu bun to itinēf. ï age fouf are, wain mata anī, meme gabar gē ye fen, serek fouf. Age fe di, wain anī oho yeis fen, meme gabar sane lauf.

³⁸ Age fiya sã, wain mata, meme gabar mata bun itinēf.

³⁹ Agef fen, taka nem wain tubu yakas fen, mata to orodig, ere nigin, ï irok, “Tubu are de biya.””

6

Jesus ï Sabat Naa Nē Odug (Matyu 12:1-14; Mak 2:23-3:6)

¹ Sabat naa taka bun, Jesus in dō fiya tar geid, wit kabī atu diyok dile fen, in dō fiya tar wit biya tunī fito difen, imeid bun orok de fen, nedi ilo don.

² Farisia tamo tunim to difen, “Ã ere nigin Sabat naa bun ïtãfiya ufo-duleg fen, tobonunã enei ago gef?”

³ Jesus aitedin yale irokenēdin, “Sain Dawid, ne tã tar geid naū fedi di, age fen anī, ã to uwesegen de?”

⁴ ï Negur nē fō namen ile fen, bret fateul prisem dogol dōdig* an ibodon

* **5:37:** Juda neid tobonunã, idi meme gabar nem darum diwadig. * **6:4:** Lo bun, bret fateul anī, prisem dogol dōdig.

anī yokon, ī bret tunī ne tā tareg ifenēdin.”

⁵ Age ye fen, Jesus idi irokenēdin, “Tamo Naal ī Sabat naa nē Odug.”

⁶ Sabat naa taka bun, ī Juda neid uub fō bun ile, biya od ifelnēdin, sain anī bun, tamo taka ima biya melem gege fefu fiya anī an ibodon.

⁷ Farisia tamo, lo ifelnēdiya tamo geid, idi Jesus bouwa bun od dinouf nigin naab dimiren, anī nigin, idi ī Sabat naa bun dagi el fe mog, mailauf de fen, lololo difen.

⁸ Anī ere, Jesus idi neid kisi kelei ken, tamo ima gege fefu fiya anī irokenen, “Fā wo fen, ganan meleid bun ufar.” Age ye di, ī fā yale, an ifaren.

⁹ Age fe di, Jesus idi irokenēdin, “Aya ā to ayeik, nanī anī Sabat naa bun lo dō fiya? Biya age fiya anī de, sane age fiya anī, oo, isennē di, mata ibodōya anī de, daū fiya anī?”

¹⁰ Jesus idi ganan fele feid le fen, tamo anī irokenen, “Imā yaī wo.” Ī yaī fe di, in ima oditekei biya len.

¹¹ Anī ere, idi waud fatuk sane fen, mogo Jesus naig tafiyēf de fen, dogo tutur katō difen.

*Jesus Aposel Tuwelf Igirnēdin
(Matyu 10:1-4; Mak 3:13-19)*

¹² Anī sain bun naa taka, Jesus arein kosē youf nigin iselen, bō anī bun Negur kosē fiyen.

¹³ We fele di, bonime, Jesus in dō fiya tar wagen iweig laisi fen, idi atun tuwelf geif fen, idi anidi aposel wowā douf nigin igirnēdin.

¹⁴ Simon (Jesus ī yana yun Pita), in tura Endru, Jems, Jon, Filip, Batolomyu,

¹⁵ Matyu, Tomas, Jems Alfeus naal, Simon ī anī Selot* taka,

¹⁶ Judas ī Jems naal, Judas Iskariot, inim dum Jesus kiwai imeid bun in-enen.

*El Fiya Ado Malalon
(Matyu 4:23-5:12)*

¹⁷ Jesus idi geid weim disil, teneub uus bun difaren. In dō fiya tar musei

ado, tamo kayau musei biya, Judia distrik kalilī fiya ganan temeleid, Jerusalem temeleid, Taia Saidon taun ado neid ubun temeleid, an difaren,

¹⁸ tamo kayau anidi Jesus karī difiyē fenē nigin ado, idi neid dagi el fediyouf nigin, disin. Idi kaa sesenem morō difenēdin are el fedin.

¹⁹ Tamo kayau ganān ī kobū difiyē fenē age difen, ere nigin, megeir ī bunem isi fen, idi ganān el fedin.

²⁰ Jesus in dō fiya tar lo fiyeid fen, iron:

“Ā aib maleg are el yeik,
ere nigin, Negur nē tano are āgenei.

²¹ Ā gama naū ufaregef are el yeik,
ere nigin, ā nameī isokosauf.

Ā gama maruī isif are el yeik,
ere nigin, ā kasā gouf.

²² Tamo Naal nigin, tamo kayau sane diyeik, diruyei ken, kono diyeik,
ā yeneī sane dile fen, to orodif are,
Negur ā el yeik.

²³ “Naa anī bun, wauī kulī ye fen, wauī al fouf, ere nigin, āgenei mala solo odug oun saa ilun ibodok. Ere nigin, temeid tar profet nigin de age difedin.

²⁴ “Anī ere, safineī ado ā meleilon ado,
ere nigin, āgenei wauī isenneīya mogo walegel.

²⁵ Nameī gama isokosef ā meleilon ado,
ere nigin, ā naū ulagauf.
Gama kasā gef ā meleilon ado,
ere nigin, ā fau wauī gudūf fen,
maruī isiyouf.

²⁶ Ā nigin tamo ganān biya de fen, wogō def ā meleilon ado,
ere nigin, temeid tar idegēya profet nigin de age difedin.

*Kiwai Tar Nigin Wau Laa Fiya
(Matyu 5:38-48; 7:12a)*

²⁷ “Anī ere, ā aib aya karī wiyagef anī arokeneik: Āgenei kiwai tar nigin

* **6:15:** Juda neid kusī mala taka, idi Rom gawaman ado kusī dedig.

wauĩ laa fouf, ã kiwai difeneik anidi nigin biya ago gouf.

²⁸ Idi ã disisneik el fiya wenēdig, idi ã to biya diyeik anidi nigin kosē gouf.

²⁹ Tamo taka ogon walā sitakā fakā fouf, falei wel, walā sitakāg wenē. Tamo taka ogon saket yalouf are, ogon kolos yalouf nigineg to katū wiyē.

³⁰ Wenēdiyof nigin to diyok are, wenēdiyof, aib taka ogon safinā yalef are, anī baban kel yaleya nigin to urokenēf.

³¹ Ereb taka idim age difekeneif anī oroyeik age fiya gen, ãg idi bun ago gouf.

³² “Idi ã nigin waud laa fef anidi nigin dogol wauĩ laa fef are, ã nigin ere mala ado? Mosor adodo idig, idi nigin waud laa fef anidi nigin, waud laa fedig.

³³ Idi ã nigin biya diyeik anidi nigin biya ago gouf are, ã nigin ere mala ado? Mosor adodo idig age difedig.

³⁴ Idi anidi bun moni kel walogouf nigin kisig fen, moni wenēdigouf are, ã nigin ere mala ado? Mosor adodo idig, moni ganan kel yaleya nigin kisi de fen, mosor adodo tutur moni difenedidig.

³⁵ Anī ere, ãgenei kiwai tar nigin wauĩ laa fouf, idi nigin biya ago wedigouf, ereb taka kel yaleya nigin to kisig fen, wenēdigouf. Ago gouf are, ãgenei mala solo odug biyauf, agef fen, ã Negur Ilun Bagai nē gere tar wowã gouf, ere nigin, Negur ã idi to de difiyēdig sesen anidi ado, biya fiyēdidig.

³⁶ ãgenei Temeif wau yūdig gen, ãg idi nigin wauĩ ineif.

Ne Tã Es Fiyēya
(Matyu 7:1-5)

³⁷ “Taka to es wiyēg, to ago gouf are, ãg Negur to es yeif. Taka bouwa bun od to ũg, to ago gouf are, ãg Negur bouweif bun od to yūf. Mosor nigin wedereif tu kalauf, ago gouf are, Negur ãgenei mosor nigin weder tu kalauf.

³⁸ Wenēdig, ago gouf are, Negur ifeneif. Ima su karikauf, lai fesil fen, baban teten ino isokose di, yokū fe di, awa gere fasauf, ã nigin gogū fouf. Tunī es wedigef gen, Negur ãg agef es yeif.”

³⁹ Jesus yaab od eneig irokenēdin, “Mala ifofakeleya tamo taka, mala ifofakeleya tura itonēya kisi feleya de? Idi urom bebeigir to kuku douf de?

⁴⁰ Skul kesu in tise to wal fef, anī ere, taka ã keleif ganan yalef, yogon tise gen wō youf.

⁴¹ “Ō ere nigin turã mala teteur lo fen, ō ogon aa masak malã bun ibodok anī to ulef?

⁴² Ō ogo aa masak ogon malã bun to ule fen, naig fe di, turã nigin dogol urokenek, “Turau, utor len, aya ogon malã teteur alelkonōf”? Ō mala yaleya tamo, ō ogon malã bun ketem aa masak walel fen, anī malã kare kele di, turã bun mala teteur walelauf.

Aa Taka Yogon Faat Ado
(Matyu 7:16-20; 12:33-35)

⁴³ “Aa biya ã faat sane to imadig, aa sane are faat biya to imadig.

⁴⁴ Aa mugu mugu yogon faat bun, tamo ã keleif youf. Tamo kayau idi, wei biya barik bun to daledig, gira udum bun to daledig.

⁴⁵ Tamo biya ã, yogon wau bun ereb biya kuru fedig anī bunem, tobonunã biya yaor fedig, age fiya gen, tamo sane, yogon wau bun ereb sane kuru fedig anī bunem, tobonunã sane yaor fedig. Yogon wau bun isokosef, yogon sigor bun wogō yedig.

Fō Inoya Nē Keleif Tamo, Neneya Tamo Ado
(Matyu 7:24-27)

⁴⁶ “Ere nigin ã aya nigin ‘Odug, Odug,’ ge fen, aya orok anī to ago gedig?

⁴⁷ Taka ã wageun isi, neu od karif ye fen, dōf age fef, ã naig fiya anī aya ã afelneif.

⁴⁸ Ì fō inoya tamo taka, ku fatuk yale fen, meein teten fō gariya inon

gen. Sain kuwei isin, wĩ ye fen, fõ yun, anĩ ere, fõ anĩ yokũ fiya kisi feleya sã, ere nigin, fõ are total ado inon.

⁴⁹ Anĩ ere, taka ã neu od karĩ ye fen, to dõf age fef, ã tamo taka teneub bun fõ gariya sã inon gen. Sain kuwei wĩ ye fen, fõ yun, fõ anĩ kala fel, oditekei daũf irailen.”

7

Kusĩ Tamo Neid Orowa Nẽ Momoiya

(Matyu 8:5-13)

¹ Jesus tamo kayau karĩ douf nigin enei ganan wogõ bure fel fen, ã Kape-naum taun ilen.

² An kusĩ tamo neid orowa nẽ ferfer taka, in odug ã nigin wau laa fedig anĩ, dagi fen, laa fou fenẽ age fen.

³ Kusĩ orowa Jesus nigin karĩ ye fen, Juda neid mudur adodo Jesus garan susur fedi di, ã isi fen, yogon ferfer el fiyẽf nigin to difiyen.

⁴ Idi Jesus garan disi fen, total bagai digonen, “Tamo enei, õ enĩ agouf nigin kisi feleya bagai,

⁵ ere nigin, ã nemã tamo kayau nigin wau laa fedig, nemã uub fõg inon.”

⁶ Anĩ nigin, Jesus idi geid dilen.

Ã mogo fõ sirin mog, kusĩ orowa ne tã tar Jesus dirokenẽf nigin sur fedin, “Odug, õ kabĩ total to walouf, ere nigin, aya to biya nigin aya kisi afef, õ neu fõ bun to usiyouf.

⁷ Aya to biya nigin, aya õ garan isiya nigin to kisi afen. Anĩ ere, õ od urõ di, neu kabĩ tamo dagi fara falauf.

⁸ Ere nigin, aya yug nigin age fiya, ayag neu odug anĩ farumen abodok, kusĩ tamo idig aya farumeun dibodok. Aya taka enĩ arokenek, ‘Ule,’ afiyek, ã ilauf. Aya taka arokenek, ‘Õ usi,’ au di, ã isidig. Neu kabĩ tamo enĩ ago afiyek, ã anĩ age fedig.”

⁹ Kusĩ orowa od enĩ irõ di, Jesus karĩ ye fen, ã nigin terẽ yen, agef fen, tamo kayau dõ difiyen anidi bun falei yel iron, “Aya ã arokenek, aya

Israel bun, momoiya odug eig fiya taka to ailen.”

¹⁰ Age ye di, kusĩ tamo sur fedin anidi, fõ bun ke de dile fen, ferfer anĩ dagi sã ibod mog, fotou difen.

Jesus Kayau Waab Taka Nẽ Kesu Turĩ Fen

¹¹ Anĩ dumen, Jesus taun taka Nain ilen, in dõ fiya tar, tamo kayau musei, ã geid weim dilen.

¹² ã mogo taun bobog kelẽ fiyẽ mog, laa tamo taka faali de disin, laa tamo anĩ kayau waab nẽ kesu tekelei bagai, tamo kayau musei taun temeleid kayau waab geid.

¹³ Sain Jesus kayau waab anĩ fele fiyen, in wau ã nigin gudũf fen, iron, “To inã wale.”

¹⁴ Age ye fen, ã isel, dege kobũ fe di, faali difen idi, dẽ delen. ã iron, “Tamo gaũ, aya õ arokonok, fã wale!”

¹⁵ Laa tamo anĩ fã ye ibod ken, od yen, age fe di, Jesus tamo anĩ ã sina kel ifenen.

¹⁶ Age fe di, idi ganan kumĩ ado terefeit de fen, Negur yana dalesen. Idi diron, “Profet odug taka, ada atun wõ yel. Negur yogon tamo kayau isennẽdiyof nigin isil.”

¹⁷ Jesus nigin, od enei Judia distrik kalilĩ fiya ganan iyokelen. Jesus,

Jon Naan Igunẽdiya Tamo Ado

(Matyu 11:2-19)

¹⁸ Jon nẽ dõ fiya tar, enei ganan nigin Jon dirokenen. Jon idi uru iweigneid fen,

¹⁹ Odug eig de to difiyẽf nigin sur fedin, “Tamo isiyof den, õ ogo yeir de, amã fau taka nigin malamã manouf?”

²⁰ Tamo Jesus garan disi diron, “Jon Naan Igunẽdiya Tamo, õ to mayõf nigin amã sur famam, ‘Tamo isiyof den, õ ogo yeir de, amã fau taka nigin malamã manouf?’ ”

²¹ Sain anĩ bun bagai, Jesus, tamo kayau musei dagi adodo, darau adodo, kaa sesenem dirounẽdin el feid fen, meleid ifofakeleya el fedi di, kelẽ den.

²² Jesus solof irokenēdin, “Kekug uleg fen, ã wedereim karī gel, meleim ulegel anī Jon wogō wiyēg, meleid ifofakelen kelē def, to diyon mogo diyok, lepra dagi adon mogo el fedin, wedereid daabun od karī def, gare den turī fedif, maleg bun biya od wogō fedif.

²³ Tamo aya nigin wau to firagagaũ fef, Negur ī el fiyek.”

²⁴ Jon nē arū tamo ditornē dilele di, Jesus, tamo kayau guru difen anidi, Jon nigin irokenēdin, “Ã ere bagai anī ulogouf nigin, gerere tuan ulegen? Ã unin yaum walala fe di, ulogouf nigin ulegen de?

²⁵ Anī sãf are, ere bagai ã ulogou fenē, ulegen? Tamo taka kolos biya bagai ifonun de? Sã, idi kolos medeīya biya difoun ken, safineid inid adodo are, king nē fō bun dibodok.

²⁶ Ere bagai anī ã ulogou fenē, ulegen? Profet taka de? Ariya, aya ã arokeneik, ī profet wal fediya.

²⁷ Tamo anī, ī nigin eig ye itoton:

“ ‘Aya neu arū tamo sur afe di, ī uyu ilauf,

im ket ogon naab dodok fouf.’”

²⁸ Aya ã arokeneik, kayau onudi kesu dalen idi atun, taka nem Jon to wal difiyen, anī ere, aib taka Negur nē tanon yana naal bagai ado, ī Jon wal fiya.”

²⁹ (Tamo kayau ganan, takis yaleya tamog, sain idi Jesus nē od karī de fen, Negur nē naab anī biya den, ere nigin, idi Jonem naan igunēdin.

³⁰ Anī ere, Farisia tamo, lo keleī tamo geid, idi dogo nigin Negur nē oroya ditoron, ere nigin, idi Jonem naan to igunēdin.)

³¹ “Tamo kayau sain enei bun, idi nigin ere bunem aya kisi afouf? Idi ere gen?

³² Idi simō maket modoũ bun dibod ken, abob diweignēdidig gen:

“ ‘Amã ã nigin kelel maun, anī ere, ã to kui gen;

amã kanon seg malen, anī ere, ã to inã walegen.’

³³ Aya enei wogō auf, ere nigin, Jon naan igunēdiya tamo isin, bret to yon, wain to yon, ã urōgef, ‘Ī kaa sane ado.’

³⁴ Tamo Naal isin, saaf yon, naan yon, ã urōgef, ‘Eī dobu irāya tamal, ī, takis yaleya tamo, mosor tamo adodo geid, uyu kū difedig.’

³⁵ Anī ere, kisi biya ī, in dō fiya ganan bunem, biya yaorouf.”

Mosor Kayaum Jesus Bun Moul Fi Felen

³⁶ Farisia tamo takam, Jesus ī ado saaf dãf nigin iweignen, anī nigin, Jesus ī Farisia tamo anī nē fō bun ile fen, tebol bun ibodon.

³⁷ Taun anī bun, kayau taka mosor ado ibodōdig, Jesus Farisia tamo anī nē fō bun, saaf yoko yeya karī ye fen, kayau, moul sumeī biya bagai anī gulub* ado irou isin.

³⁸ Kayau ī Jesus dumen ye garan ifar, maru isi fen, Jesus ye lū fen. Agef fen, kayau yogon fatiyam Jesus ye waif, umã fe, moul sumeī biya bagai, ye bun fi felen.

³⁹ Sain Farisia tamo Jesus iweignen anim, enei ile fen, ī yogo kisi bun iron, “Tamo enei profet takauf, ī aibem kobū fiyek, ī ere kayau, ī mosor kayau taka anī, keleī youf.”

⁴⁰ Jesus ī irokenen, “Simon, aya ereb taka arokonōf.”

Ī iron, “Tise, urokana.”

⁴¹ Jesus iron, “Tamo uru, moni tamo taka bun wareg dalen, taka faif tausen kina, taka faif hundred kina.

⁴² Idi urom wareg ifenēya moni sã, anī nigin, moni tamo dogo neid wareg gudū felen. Gama nanim anī, moni tamo nigin wau fatuk laa fouf?”

⁴³ Simon solof iron, “Aya kisi afef, taka ī wareg odug yalen anī gudū fel kenen anim.”

Jesus iron, “Õ tutuk es wol.”

⁴⁴ Age ye fen, Jesus falei yel, kayau wage ifen ken, Simon irokenen, “Õ

* 7:27: Malakai 3:1 * 7:37: Meein alabasta nem dinon.

kayau enei ulef? Aya ogon fō bun asil. Ō yeu kulo fiya nē naan taka to wanal, anī ere, kayau ī yogon marum yeu lūf fen, yogon fatiyam waī fel.

⁴⁵ Ō to umā wiyal, anī ere, kayau enei, aya asour alel sain bun, ī yeu umā fel anī, fau fau umā fiyek.

⁴⁶ Ō mudurou bun moul to unol, anī ere, kayau ī moul sumeī biya bagai, yeu bun fi felel.

⁴⁷ Anī nigin, aya ō arokonok, kayau enī nē mosor musei yalelel, anī nigin, ī fatuk wau laa fen. Anī ere, aib taka mosor naal yalelen, ī wau laa fiya naal.”

⁴⁸ Age ye fen, Jesus kayau irokenen, “Ogon mosor alelkonok.”

⁴⁹ Tamo Jesus geid dibodon, tutur dogo dogol diron, “Eī aim, ī mosoreg yalelef?”

⁵⁰ Jesus kayau anī irokenen, “Ogon momoiya anim isennom, waū inosiya ado ule.”

8

Faat Irarāya Tamo Nē Yaab Od (Matyu 13:1-23; Mak 4:1-20)

¹ Anī dumen, Jesus taun ado fonō fonō iyo ken, Negur nē tano nigin, biya od wogō yen. In dō fiya tar tuwelf weim,

² kayau tunī idi kaa sesen iruid fen, dagi el fedin idig weim: Maria (Magdala tamal) ī bun kaa sesen sewen irudi di, diyan,

³ Joana Kusa nē kayau, Kusa ī Herod nē fō lo fiya tamo, Susana, musei tunī geid. Kayau eneidi, idi neid safineid nem disennēdin.

⁴ Tamo kayau taun ganan bun temeleid, Jesus garan disi, moku de mog, ī yaab od enei iron,

⁵ “Kabī marau taka, faat irarāf nigin ilen. Sain ī irarak ile mog, tunī naab luwen kuku ren, are teten diyon, ninā ilun temeledim dakasin.

⁶ Tunī meein tuar kuku ren, are bali fokū yeid fen, laasi yedin, ere nigin, idi lumi sā.

⁷ Faat tunī malū duri atun kuku ren, are malū duri, faat anī ado, odudug fen, malū durim sile feledin.

⁸ Faat tunī teneub biya bun kuku ren, are fokū yedin, biya imadin, gariya tekelei yogon biya wan handred iman, biya anim gariya anī wal fiya.”

Sain ī enī wogō ye fen, ī iweig iron, “Taka ī karīya nigin weder ado, ī karī youf.”

⁹ In dō fiya tar, yaab od enī nē gariya nigin, ī to difiyen.

¹⁰ Jesus iron, “Negur tano nigin, iminēya od nē keleī are, Negur ā mogo ifenein, anī ere, tunī bun aya yaab od nem wogō auf, anī bunem, “idi meledim diledig, anī idi meleid fokōya sā,

idi wederedim karī dedig, anī idi gariya keleī sā.”*

¹¹ “Yaab od anī nē gariya eig fiya. Faat are Negur nē od.

¹² Faat tunī naab luwen kuku ren are, tamo idi od karī den, Satan isi, biya od idi namedin ibodok anī yaleledig, anī bunem, idi to momoi de di, to isennēdiyof.

¹³ Faat tunī meein tuar iraran are, tamo idi od karī de fen, waud bun kulīya ado od daledig, anī ere, idi warumutei sā. Idi sain naal bagai momoi def, anī ere, kisi fiya isi di, fara furu de diyaleledig.

¹⁴ Faat malū duri atun kubū yen are, tamo idi od karī den, anī ere, idi diyok dile mog, tenebur mata ibodōya nē suwēya, safina ado ibodōya nē kisi, bouwa nē oroya anidim idi sile fedi di, idi faat to yūf.

¹⁵ Anī ere, faat teneub biya bun kubū yen are, tamo idi, kisi biya, karīya biya ado, waud bun ibodok, od karī de fen, kafī difelef, anī total difaref, faat biya yūf.

Lam Yoki Bun (Mak 4:21-25)

¹⁶ “Taka nem lam tōf fen, mis kur be, fatar farumen to inodig. Age fiya ban, ī yoki bun iseginē di, idi aaben disif, lalan dilouf.

* 8:10: Asaia 6:9

¹⁷ Ereb erab ganān iminēya yenek anī ganān yaor foug, erab erab ganān nar fen yenek anī ganān irou isi, biru fel fen, yaau du fe di, keleī youf.

¹⁸ Anī nigin, ā kisi el ge waleg fen, ā karī gouf. Aib taka ī ado, aya toru afoug, age fe di, ī musei adoug. Taka ī sā bagai, erab taka ī ado nigin ī kisi fef areg, ī bun tamal son foug.”

*Jesus Nē Sina, Tura Tar Geid
(Matyu 12:46-50; Mak 3:31-35)*

¹⁹ Jesus nē sina, tura tar geid, ī diloug nigin disin. Anī ere, idi ī wagen ileya kisi feleya sā, ere nigin, tamo kayau musei.

²⁰ Takam Jesus irokenen, “Ogon sinā, turā tar geid, ō dileyōf nigin serē difaref.”

²¹ Jesus solof iron, “Neu naai ado turau tar, are idi Negur nē od karī de fen, dō difef anidi.”

*Jesus Yau Uyē Ado Irokenēdi Di,
Kee Delen*

(Matyu 8:23-27; Mak 4:35-41)

²² Naa taka bun, Jesus in dō fiya tar irokenēdin, “Ada daliyou sitakā talauf.” Anī nigin, idi waag bun sō de dilen.

²³ Idi solī de mog, Jesus mulaī yenen. Yau odug daliyou bun isi di, maai waag namen isokosen. Idi morō odug fotou difen.

²⁴ In dō fiya tar dile, Jesus turī difiyē diron, “Odug, ada naanū talalau fenē!”

Ī fā yale, yau naan moloun wī yen ado, sakā fiyēdi di, yau uyē ado irorou kel, ganān dē delen.

²⁵ Jesus in dō fiya tar to fiyēdin, “Āgenei momoiya nain?”

Idi kumī terē de fen, abob toti difen, “Eī aim bagai? Ī yau ado naaneg irokenēdi di, ī ait dō difef.”

*Jesus Tamo Taka Kaa Sesen Musei
Ado El Fiyen*

(Matyu 8:28-34; Mak 5:1-20)

²⁶ Idi Galili tamal daliyou dibal, Gerasa teneub bun dilen.

²⁷ Sain Jesus ubun kutū yesin, taun anī bun tamal, tamo taka kaa sesen ado ī tarabā fiyen. Sain meluk, tamo

enei kolos sā, fō buneg to ibodōdig, anī ere, ī matmat bun ibodōdig.

²⁸ Ī Jesus ile fen, kaī ye, Jesus ye gariyan kubū ye, ī ait odugem iweig iron, “Ō aya ere naig wiyau fenē, Jesus, Negur Ilun Biya nē Naal? Aya ō agonok, ō aya to daig wiyauf!”

²⁹ Ere nigin, Jesus mogo kaa sane tamo anī bun tamal ulō yesiyoug nigin irokenen. Sain musei kaa sanem ironē di, ye ima ado, sen nem difofādig, age de fen, tari difiyēdig, anī ere, ī sen kokour fele di, kaa sanem wala ino di, moilin iledig.

³⁰ Age ye di, Jesus ī to fiyen, “Ō yana ai?”

Ī solof iron, “Aya yanau Ami,” ere nigin, kaa museim ī namen disilen.

³¹ Idi ku isil idīya sā modoū bun to sur fediyoug nigin, baba baban Jesus digonen.

³² Arei wala sirin, bor musei biya an saaf doko difaren. Kaa sesen idi, bor namedin dilauf nigin, Jesus digonē di, Jesus idi yo fedin.

³³ Kaa sesen, tamo anī bun tamal ulolō deis fen, bor namedin dilelen. Age dife di, bor gududu de, bebeig sane baurin daliyoun disil, naanū gare desin.

³⁴ Bor lo fiya tamo, erab erab wō yen anī dile fen, diya dile, od anī, taun ado fonō fonō wogō den.

³⁵ Age dife di, tamo kayau, erab wō yen anī dilou fenē dilen. Sain idi Jesus garan disin, kaa sesen tamo anī bun tamal diyalelen tamo anī, garab yel, kisi biya ado, Jesus ye gariyan ibod mog, dile fen, idi kumī den.

³⁶ Tamo idi meledim dilen anidim, kaa sesenem tamo diroun anī, naig be el fiyen anī, tamo kayau wogō difiyēdin.

³⁷ Age dife di, Gerasa teneub bun, tamo kayau ganān, Jesus itorneīd ilauf nigin, ī dirokenen, ere nigin, idi kumim lai fedin. Anī nigin, Jesus waag bun sō ye fen, itornēdin.

³⁸ Tamo ī bun tamal kaa sesen diyalelen anī, Jesus ado dilauf nigin

igonen, anī ere, Jesus ī sur fiye ken, iron,

³⁹ “Fonō kel ule fen, Negur ō nigin age fen anī wogō wouf.” Age ye di, tamo anī itor ilen, Jesus ī nigin age fen anī, taun ganān bun iyo ken, wogō yen.

Kayau Naal Laa Fen Ado Dagi Kayau Taka

(Matyu 9:18-26; Mak 5:21-43)

⁴⁰ Sain Jesus kele di, tamo kayau musei, ī aan difiyen, ere nigin, idi ganān ī nigin ololo difen.

⁴¹ Age de mog, Juda neid uub fō lo fiya nē mudur taka, yana Jairus isi, Jesus ye gariyan kubū ye fen, yogon fō bun ileyā nigin igonen,

⁴² ere nigin, ī ne barai tekelei bagai, ī kayau naal tuwelf yar age fiya, mogo laa fou fenē.

Jesus naab ile mog, tamo kayau musei kiti de fen, kafī difiyē genen.

⁴³ Kayau taka an ifaren, ogō dagi faimud ado, yar tuwelf iyon. Anī ere, taka nem ī to el fiyen.

⁴⁴ Kayau ī Jesus dume ise, in kolos iri kobū fen, age fe di, kaisā bagai, kayau nē naud segē yelen.

⁴⁵ Jesus to fen, “Aim aya kobū fiyal?”

Idi ganān wa dife di, Pita iron, “Odug, tamo kayau musei kiti de fen, kobū diyok

⁴⁶ Anī ere, Jesus iron, “Aibem aya kobū fiyal. Aya keleī, total aya bun tamal ul fe yalel.”

⁴⁷ Age ye di, kayau ī imin ken, ileyā kisi feleyā san, tererē ye fen, isi, Jesus ye gariyan kubū yen. Tamo kayau ganān meleid bun, ī ereb nigin Jesus kobū fiyem ado, naig be ī kaisā bagai biya lel anī, wogō yen.

⁴⁸ Age ye di, Jesus kayau irokenen, “Nau barai, ogon momoiya anim el yom. Waū inosiya ado ule.”

⁴⁹ Jesus fau od wogō ye mog, tamo taka, Juda neid uub fō lo fiya mudur Jairus nē fō bunem isin. Ī iron, “Nē barai mogo laa fel. Baban ō tise morō to wenēf.”

⁵⁰ Jesus od enei karī ye fen, Jairus irokenen, “To kumī wo, momoi dogol wo, ago di, kayau fau el fiyēf.”

⁵¹ Jesus Jairus nē fō bun wō ye fen, takam ī geid, aaben ileyā nigin katū fedin, Pita, Jon, Jems ado, kesu nē tama sina dogol.

⁵² Tamo kayau ganān, ī nigin waud gudūf fen, inā legur mog, Jesus iron, “To inā waleg. Kayau naal ī laa fiya sā, ī mulā yenek.”

⁵³ Idi Jesus kasā difiyen, idi keleī, kayau naal laa fel.

⁵⁴ Anī ere, Jesus ī ima yales fen, iron, “Neu kesu, fā wo!”

⁵⁵ Kayau nē uur kelen, age fe di, kaisā bagai, fā yale ifaren. Age fe di, Jesus, ī ereb taka ifen yōya nigin, idi irokenēdin.

⁵⁶ Kayau nē sina tama terefeit de di, ereb wō yel anī, taka to dirokenēf nigin, Jesus idi katū fedin.

9

Jesus In Dō Fiya Tar Tuwelf Sur Fedin

(Matyu 10:5-15; 14:1-12; Mak 6:7-29)

¹ Jesus in dō fiya tar tuwelf iweigneid fen, kuru fedin. Agef fen, ī, idi kaa sesen ganān dirudiyouf nigin ado, dagi el difediyouf nigin total ifeneid fen, megeir fedin.

² Ī, idi Negur nē tano nigin wogō douf nigin ado, dagi adodo el difediyouf nigin sur fedin.

³ Jesus idi irokenēdin, “Delē uyōgouf nigin ereb taka to walogouf, manig sā, faa sā, bret sā, moni sā, kolos uru to walogouf, tekelei dogol.

⁴ Fō nanī be bun sō gouf, an ubodōg ile, taun anī utorōgouf.

⁵ Tamo kayau ā to daleyēi ken, ā to karī diyēif, sain ā nedi taun anī utorōg fen, yeī aas tu welege di, idi ā kiwai difenein anī keleif.”

⁶ Anī nigin, idi fafā de, fonō fonō diyo ken, modoū ganān bun, biya od wogō de fen, tamo kayau dagi el difedin.

⁷ Galili lo fiya nē mudur Herod, anī ganān wō yef ilef anī, karī ye fen,

wau togun, ere nigin, tunim dirok, Jon ï laa bun tamal mata kel fã yen,

⁸ tunim dirok, Eliya wõ yen, age fe di, tuniḡ dirok, profet kulu temeleid anidi taka mata kel fã yen.

⁹ Anï ere, Herod iron, “Aya Jon ula gudũ afen. Enei aim, ï nigin kari auf?” Age ye fen, ï Jesus ileya nigin kisi fen.

Jesus Faif Tausen Tamo Saaf Ifenēdin

(Matyu 14:13-21; Mak 6:30-44; Jon 6:1-14)

¹⁰ Sain aposel idi keku den, idi age difen anï Jesus wogõ difiyen. Age de di, Jesus idi geif irou, idi mugu diya, taun taka Betsaida dilen.

¹¹ Anï ere, tamo kayau musei anï kelei ken, Jesus dõ difen. Jesus idi aan fiyeid, Negur nē tano nigin wogõ fiyeid fen, idi dagi el fiya nē anidi el fedin.

¹² Aragau di, in dõ fiya tar tuwelf, ï gein disi diron, “Tamo kayau susur wo di, idi fonõ kalilï fiya fonõ fonõ dile fen, saaf ado yenēya modoũ dilouf, ere nigin, ada ein gerere tuan tabodok.”

¹³ Jesus aitedin yale iron, “Idi dãf nigin ereb ägem wenēdigouf.”

Idi solo de diron, “Ada bret faif, gau uru ado dogol. Ada tele, tamo kayau enei ganan nigin saaf to na talouf, are kisi feleya sã.”

¹⁴ (Faif tausent tamo age fiya an dibodon.)

Anï ere, Jesus in dõ fiya tar irokenēdin, “Tamo kayau, mala fire fire fifti age fiya bun, ubodnēdig.”

¹⁵ In dõ fiya tar age dife di, ganandibodadan.

¹⁶ Jesus, bret faif gau uru ado yale, saa ilun itad fen, ï Negur de fiye ken, anï mumã fedin. Agef fen, ï in dõ fiya tar ifenēdin, tamo kayau wagedin gõ difouf nigin.

¹⁷ Idi ganandon kisi felen. In dõ fiya tar, tamo kayau bret gau ado dokon, tuni ifaren anï fito difen, karam tuwelf isokosen.

Pita Kristus Nigin Kurõ Fesin
(Matyu 16:13-28; Mak 8:27-9:1)

¹⁸ Sain Jesus mugun kosē yen, in dõ fiya tar idi ï weim. ï idi to fedin, “Tamo kayau idi, aya nigin ai dedig?”

¹⁹ Idi solo de diron, “Tuni dirok, Jon naan igunēdiya tamo, tuni dirok, Eliya, are tuniḡ dirok, profet kulu temeleid anidi taka mata kel fã yen.”

²⁰ Jesus to fedin, “Ba ã uleg? Aya nigin ã ai gef?”

Pita aiten yale iron, “Õ anï Negur nē Kristus.”

²¹ Age ye di, Jesus enei taka to dirokenēf nigin, idi wedereid totol iroun.

²² Age ye fen, ï iron, “Tamo Naal ï darau musei yale fen, mudur adodo, pris odudug, lo ifelnēdiya tamo idim dudum difiyēf. Age de fen, ï dukesi di, naa towo bure fele di, mata kel fã youf.”

²³ Age ye fen, Jesus idi ganan irokenēdin, “Aib taka aya dõ fiyau fenē, ï yogon oroya dudum fe fen, yogon aa tetek, naa ganand faali fe, aya dõ fiyau f.”

²⁴ Aib taka, yogon bouwa buru, mata ibodõf nigin oro fef, are fõ yalauf, anï aib taka yogon mata bouwa buru, aya nigin ye fen, irailauf, are kel yalauf.

²⁵ Tamo taka ï teneub eni ganand kakarai fe, akorou ye fen, ï yogo bou fõ yalauf be irailauf, ere biya ï yalauf?

²⁶ Aib taka, aya nigin ado neu od nigin, mama fouf are, sain Tamo Naal, in fula fiya medeïya, Tama nē ado, engel fateul neid fula fiya medeïya ado disiyouf bun, ïḡ ï nigin mama fouf.

²⁷ Aya ã momoi arokeneik, tuni ein difaref, fau to gare de mog, idi Negur nē tano dilouf.”

Jesus Bouwa Falei Felen
(Matyu 17:1-8; Mak 9:2-8)

²⁸ Jesus enei irokel fen, naa eit age fiya ilele di, ï, Pita, Jon, Jems yale, kosē youf nigin arei ilun diselen.

²⁹ ï kosē ye mog, yogon nawa falei felen, agef fen, yogon kolos, kolimei filiya nē lalan gen, wõ yen.

³⁰ Tamo uru, Moses Eliya ado,

³¹ fula fiya medeīya ado wowā de fen, Jesus geid wogō den. Idi Jesus teneub itorōf anī nigin wogō den, anī ī Jerusalem oun kisi falauf.

³² Pita ī, ne tā tar geid, mulā nigin meleid morō kelen, anī ere, idi oditekei meleid bi fel fen, idi Jesus nē fula fiya medeīya ado, tamo uru ī geid difaren anī dilen.

³³ Tamo idi Jesus ditornē mog, Pita Jesus irokenen, “Odug, ada ein ibodōya nigin biya bagai. Ada salafat towo tanouf, taka ogon, taka Moses nē, taka Eliya nē.” (Ī wogō yen anī, ī yogo keleī sã.)

³⁴ Age ye mog, lalo isi, idi kerub fedī di, idi lalo bun dilel mog, kumī den.

³⁵ Ait taka lalo bunem wō ye fen, iron, “Eī neu Kesu, ayam ī agirnen. Ī karī wiyēg.”

³⁶ Ait anī wogō yele di, idi Jesus mugu dilen. In dō fiya tar anidi, enei dogo bun dogol ibodon, idi ereb dilen anī, sain anī bun, taka to dirokenen.

*Jesus Kesu Kaa Sane Ado El Fiyen
(Matyu 17:14-18, 22, 23; Mak 9:14-27, 30-32)*

³⁷ Naa taka bun, idi arein tamal disī mog, tamo kayau musei Jesus tarabā difiyen.

³⁸ Guru fiya atun, tamo takam iweig iron, “Tise, aya ō agonok, ō neu kesu ulekanau, ere nigin, ī neu kesu tekelei bagai.

³⁹ Kaa sanem ironē di, ī terē adod ye, ui yedig. Kaa sanem kesu yū irā di, tererē ye fen, awa bun sali moku fedig. Agef fen, kaisā to folō fiye kele fen, ī bouwa daū fedig.

⁴⁰ Aya, on dō fiya tar kaa sane diruwauf nigin agonēdin, anī ere, idi kisi feleya sã.”

⁴¹ Jesus solof iron, “Sain enei bun, tamo kayau momoiya sã, sane bagai. Sain ganī aya ā geid tabod ken, ā nigin wau aukesilauf? Ogon kesu ein urousi.”

⁴² Kesu anī isi mog, kaa sanem kesu tenebur yū irā di, tererē yen. Anī ere, Jesus kaa sane ou fiyen, agef fen, kesu anī el fiye ken, ī tama kel ifenen.

⁴³ Age fe di, idi ganan, Negur nē megeir odug nigin terefeit den.

Idi ganan, Jesus age fen anī ganan nigin, terē de mog, Jesus in dō fiya tar irokenēdin,

⁴⁴ “Ereb aya arokeneīf anī wedereī unog. Tamo Naal ī fau kiwai tamo imeid bun dinou fenē.”

⁴⁵ Anī ere, idi od enī nē gariya nigin nene den. Idi nigin gariya anī inokon, anī nigin, idi od anī to kelei ken, ī to fiyēya nigin kumī den.

Ai Anī Odug Bagai?

(Matyu 18:1-5; Mak 9:33-40)

⁴⁶ Jesus nē dō fiya tar idi, aim anī idi atun odug ibodōf nigin, luwa diroun.

⁴⁷ Jesus idi neid kisi kelei ken, kesu naal taka yale iroule, ī sirin ifarnen.

⁴⁸ Agef fen, ī idi irokenēdin, “Aib taka, aya yanau bunem, kesu naal eig fiya taka yalef are, ī aya yaleyaf. Aib taka ī aya yaleyaf are, ī aya sur fiyan anī yalef. Ā ganan atun, taka ī naal bagai are, ī anī odug bagai.”

⁴⁹ Jon iron, “Odug, tamo taka, ō yanā nem kaa sesen iruid mog, amā mailen. Anī nigin, amā ī katū mafiyēf nigin age mafen, ere nigin, ī neda takam sã.”

⁵⁰ Anī ere, Jesus iron, “To katū wiyēg, taka ī kiwai to ifeneik, are āgenei.”

Samaria Tamo Kayau Jesus Kiwai Difenen

⁵¹ Jesus saa ilun yale irou iseleya nē naa dodole di, ī Jerusalem ileya nigin wau kuturolen.

⁵² Age fe di, ī arū tamo uyu sur fedī di, idi Jesus nē ereb ereb dodok fiya nigin, Samaria fonō dilen.

⁵³ Anī ere, tamo kayau an to aan difiyen, ere nigin, ī Jerusalem ilauf nigin age fen.

⁵⁴ Sain in dō fiya tar Jems Jon ado, anī dile fen, idi to difen, “Odug, ō

amã yã saa ilun tamal maweig di, isi, idi daũ fediyouf nigin oroyok de?”

⁵⁵ Anĩ ere, Jesus falei yel, ou fiyēdin,

⁵⁶ age de fen, idi fonō taka bun dilen.

Jesus Dō Fiyēya Bun Kafī Fiya Fire

(Matyu 8:19-22)

⁵⁷ Idi naab luwe dile fen, tamo taka Jesus irokenen, “Ō narib ulauf are, aya ō dō ayōf.”

⁵⁸ Jesus aiten yale iron, “Gaũ kuĩ idi, yenēya nē modoũ ku ado, ninã lalo bun diyok idi, uru ado, anĩ ere, Tamo Naal ĩ mudur inoya nē modoũ sã.”

⁵⁹ Jesus tamo takag irokenen, “Dō wiya.”

Anĩ ere, tamo iron, “Odug, fau de, folō wiya len, aya ele, neu dei mū afel fen.”

⁶⁰ Jesus ĩ irokenen, “Laa tamo idi, laa tutur abob mumã difouf. Anĩ ere, ō ule, Negur nē tano nigin wogō wo.”

⁶¹ Baban takag iron, “Odug, aya ō dō ayōf, anĩ ere, folō wiya len, kelau ele, neu ibor tar dabuo afiyeid fen.”

⁶² Jesus solof iron, “Taka ĩ dur bun ima ino fen, koriri yedig anĩ, Negur nē tano nigin kabĩ yaleya to kisi falauf.”

10

Jesus In Dō Fiya Tar Sewenti-tu Sur Fedin

(Matyu 11:20-27; 13:16, 17)

¹ Anĩ dumen, Odug sewenti-tu tamo igrneid fen, idi, ĩ taun ganan ado modoũ ilauf nē bun, uyulil uru uru susur fedin.

² Jesus idi irokenēdin, “Kabier saaf musei biya bure felen, anĩ ere, kabĩ tamo musei sã. Age fiya nigin, kabĩ marau, Odug to wiyēg, kabĩ tamo sur fedi di, yogon kabier dilauf.

³ Uleg! Aya ā sipsip naal gen, gaũ kuĩ atun sur ayeik.

⁴ Ā moni nē kodol be, faa be, su be to walogouf, agog fen, naab luwen taka to aan wiyēgouf.

⁵ “Fō taka aaben ulagauf, uruwa urōgouf, ‘Fō enei wau inosiya ado.’

⁶ Tamo taka wau inosiya nē anĩ an ibodōf are, āgenei wauĩ inosiya ĩ bun ibodōf, sãf are, ā bun kel isiyouf.

⁷ Fō anĩ bun ubodōgouf, saaf ado naan yōya nigin idi difeneif, are wāgauf, ere nigin, kabĩ tamo ĩ mala solo yaleya kisi feleya. Fō fō to walegef uyōg.

⁸ “Ā taun taka bun ulege di, idi ā aan diyeif, ā ereb wagein dinouf anĩ wāgauf.

⁹ Dagi adodo an difaref, el wiyēdig fen, idi urokenēdigouf, ‘Negur nē tano mogo ā nigin melsã.’

¹⁰ Anĩ ere, ā taun taka bun ulege di, idi ā to aan diyeif, naab toko tokō ge fen, urōgouf,

¹¹ ‘Āgenei taun nē aas yemã bun degē fen anīg, amã kema ā bun tu mafef. Anĩ ere, ā enei keleĩ youf bagai, Negur nē tano mogo melsã.’

¹² Aya ā arokeneik, es fiya naa anĩ bun, taun anĩ, in darau Sodom taun darau dalen anĩ wal fiya, yalouf.

¹³ “Korasin taun, ō malalon ado! Betsaida taun, ō malalon ado! Ā bun memelik musei anodin, age fiya gen anĩ, Taia ado Saidon taun bun wō yem are, mogo kulu waud falei de fen, wau gudū fiya nē gabar difoun ken, aasur dibodom.

¹⁴ Anĩ nigin, es fiya sain bun, ā, morō Taia ado Saidon taun dalouf anĩ wal fiya, walogouf.

¹⁵ Ō Kapenaum taun, ō yanã anĩ saa ilun iselauf de? Sã bagai, ō laa neid modoũ bun usilauf.

¹⁶ “Taka ĩ karĩ yeik, aya karĩ fiyaf, taka ĩ ā iruyeik, are aya iruyaf, anĩ ere, taka ĩ aya iruyaf, are ĩ aya sur fiyan anĩ iruf.”

¹⁷ Sewenti-tu tamo idi, kulīya ado keku de, disi diron, “Odug, ō yanã bunem kaa seseneg morō di, dō difen.”

¹⁸ Jesus solof iron, “Aya, Satan saa ilunem kolimei lalan gen kakur fen, kubū ye mog, ailen.

¹⁹ Aya, ā, gogour, ambei lalai wedig fen, kiwai nē total ganan wal

gouf nigin, megeir afenein. Ereb takam to tadū yeif.

²⁰ Anī ere, kaa sigoramā dō difel ge fen, to wauī kulī youf, anī ere, āgenei yeneī saa ilun itoton nigin, wauī kulī youf.”

²¹ Sain anī bun, Jesus, Awa Uur Fa-teul bunem, kulīya isokos fen, iron, “Dei, saa ado teneub nē Odug, aya ō yanā alesef, ere nigin, safina eneidi, kisi biya ado keleī adodo to dilouf nigin, ō unokon, ago fen, simō gen dibodon anidi bun yaor won. Dei, enī are ogon waū filolō fiya biya bunem agon.

²² “Ereb ereb ganan, Dei ī aya bun inon. Taka nem Naal ī ai ya nigin keleī sā, Dei yogo dogol keleī. Taka nem Dei ī ai ya nigin keleī sā, Naal yogo dogol ado, tunī idi Naalum Dei ifelnēdiyof nigin igirnēdif anidim dogol keleī.”

²³ Age ye fen, Jesus falei yel, in dō fiya tar lo feid fen, idi dogol iro-kenēdin, “Meleim ā ulegedif anī dilef are el fedif.

²⁴ Ere nigin, aya ā arokeneik, profet musei, king geid, ā ulegef anī dilou fenē nigin waud yenen, anī ere, idi meledim to dilen, idi ā karī gef anī karī dou fenē nigin waud yenen, anī ere, idi wederedim to karī den.”

Samaria Tamo Tobonunā Biya Ado Nē Yaab Od

²⁵ Sain taka bun, lo keleī tamo taka fā ye fen, Jesus kisi fiyen. Ī Jesus to fiyen, “Tise, aya naig afe di, mata faimud ibodkeleya anī alouf?”

²⁶ Jesus ī irokenen, “Negur nē Ito-toya bun Lo ere yef? Ō uwesedig anī, ere yōdig?”

²⁷ Lo keleī tamom Jesus solof iro-kenen, “ ‘Ō, Odug ogon Negur ī nigin waū adok, malākanon adok, ogon megeir adok, ogon kisi adok bunem, waū laaf yenēf.’* Takag, ‘Ō ogo nigin waū laa fef gen, nē tā nigineg ago waū laa fouf.’*”

²⁸ Jesus tamo anī irokenen, “Ō de tutuk solo wol. Enei ago di, ō mata ibodkeleya walouf.”

²⁹ Anī ere, lo keleī tamo ī, Jesus ī nigin keleī biya sā fiyēf anī itor ken, Jesus to fiyen, “Age fiyauf are, ai anī neu tā?”

³⁰ Jesus solof iron, “Tamo taka Jerusalem taun tamal Jeriko taun isil mog, bē tamo imeid bun ilen. Idi yogon kolos dinukeis dū di, laa gen yen mog, ditornē diyalelen.

³¹ Sain anī bun, pris taka naab tekelei anī dōf isilen, tamo are de ile fen, ī fasis fe tokō felen.

³² Age fiya gen, Lewi tamo takag modou anī bun isi, tamo are de ile fen, ī fasis fe tokō felen.

³³ Anī ere, Samaria tamo taka iyok isin, tamo yenen nē isi, wō ye, tamo anī ile fen, ī nigin wau yun.

³⁴ Ī wagen ilen, mouf wain ado gudū fiya bun fi fel fen, ifoke-nen. Agef fen, tamo are yales, yo-gon donki teten ino irou ilen, tamo irouya fō bun ino fen, kulatun fiyen.

³⁵ Naa taka di, ī tu silwa koin moni yalis, tamo irouya fō marau ifen ken, iron, ‘Kulatun wiyēf, sain aya kelauf bun, ō baban mala teten be uran, are aya kela afonōf.’

³⁶ “Ō kisi wof, towo eneidi atun, ai anī, bē tamo imeid bun ilen anī ī ne tā?”

³⁷ Lo keleī tamo solof iron, “Tamo ī nigin wau yun anī.”

Jesus ī irokeken, “Ule, ī age fen gen, ago.”

Marta Maria Ado Neid Fō Bun

³⁸ Jesus, in dō fiya tar geid, naab luwe dile fen, Jesus fonō taka bun wō yen, an kayau yana Marta yogon fō bun Jesus ilauf nigin, Jesus irokenen.

³⁹ Ī tura yana Maria, ī anī, Odug ye gariyan ibod ken, ī wogō yen anī karī yen.

⁴⁰ Anī ere, Marta ereb ereb dodok fiya anī bun kisi yen ken, Jesus wa-gen isi to fiyen, “Odug, neu turau itorna di, aya mugu kabī alef anī

* 10:27: Diuteronomi 6:5 * 10:27: Levitikas 19:18

nigin, ò to kisi wof de? Ì uroken, aya isenna!”

⁴¹ Age ye di, Odug aiten yalen, “Marta, Marta, ò ereb ereb musei nigin suwē wo fen, waũ morok,

⁴² anī ere, tekelei dogol ò nigin biya. Maria ì biya ani igirim, anī taka nem to yalelkenēf.”

11

Jesus Kosēya Nigin Ifelnēdin (*Matyu 6:9-13; 7:7-11*)

¹ Naa taka bun, Jesus modoũ taka bun kosē yen. Sain ì bure fele di, yogon dō fiya tamo takam Jesus irokenen, “Odug, amā kosēya nigin ufelnamā, Jon, ne dō fiya tar ifelnēdin gen.”

² Jesus idi irokenēdin, “Sain ā kosē gouf, eig ge urōgouf:

“ ‘Dei,
ò yanā fateul ibodōf,
ogon tano isiyouf.

³ Naa mugu mugu bun, naa anī nē saaf wanamāf.

⁴ Ganan amā bun mosor dinof, amā idi neid mosor nigin weder-amā tu kelef,
age fiya bagai, òg amā nemā mosor nigin wederē tu kel.

Ago fen, kisi famāya bun to uroulemāf.’ ”

⁵ Age ye fen, ì idi irokenēdin, “Āgenei taka ì, ne mou ado, anī bō atun ì gein ile fen, irokenēf, ‘Mou, bret towo nem usenna,

⁶ ere nigin, aya neu tā taka, aya bun delē isil, anī ere, aya ì yōya nē ereb taka sã.’

⁷ “Age ye di, ì aaben tamal anim irōf, ‘Aya kabī total to wana. Sukar mogo kotū felel, aya neu kesu tar geid mogo fataren mainek. Aya fā au fen, ereb taka ifonōya kisi feleya sã.’

⁸ Aya ā arokeneik, ì, ne mou nigin to fā ye fen, bret ifenēf, anī ere, tamo are kukīya sã kinī yei fiyē di, fā ye fen, ereb ì orof anī kilei ifenēf.

⁹ “Anī nigin, aya ā arokeneik, to gouf, agef ā ifeneif; umirēgouf, ā gurug gouf; godu godu gouf, ā sukar kā feneif.

¹⁰ Aibem taka to fouf, yalouf; aibem taka imirek, gurug fouf; aibem taka godu godu fouf, sukar kā fel kenēf.

¹¹ “Ā tama tar, aim āgenei kesu gau nigin to fef, anī ban gogour wenēgouf de?

¹² Takag, ì tataro faat nigin to fef, ì ambei wenēgouf de?

¹³ Ā sesenei bagai, anī ere, āgenei kesu safina biya biya anī ifenēdiya, ā kelei bagai youf are, āgenei anī wal fiya, Temei saa ilun ibodok, Awa Uur Fateul aib idi to difiyek, idi ifenēdiyof bagai!”

Jesus Belsebub Ado Difiyen (*Matyu 12:22-30, 43-45; Mak 3:20-27*)

¹⁴ Jesus ait ifokeleya nē kaa sane irun. Sain kaa sane iyawo di, tamo ait ifokelen od wogō yen, age fe di, tamo kayau musei terē den.

¹⁵ Anī ere, tamo tuni diron, “Are kaa sane neid mudur Belsebub yana bunem, ì kaa sesen irudif.”

¹⁶ Tunī Jesus kisi difiye ken, saa ilun tamal uris nigin to difen.

¹⁷ Jesus idi neid kisi kelei ken, idi irokenēdin, “Tano taka yogo kiwai ifen ken, fara fouf, are sane lauf, fō taka yogo kiwai ifen ken, fara fouf, are kubū youf.

¹⁸ Satan ì yogo kiwai ifen ken, fara fouf are, yogon tano naig fe ifarauf? Aya enī orok, ere nigin, ā urōgef, aya Belsebub yana bunem kaa sesen arudif.

¹⁹ Are aya Belsebub yana bunem kaa sesen arudif are, ere bunem āgenei dō fiya tar kaa sesen diru-didig? Anī nigin, idim ā es diyeif.

²⁰ Anī ere, aya Negur nē ima gege bunem kaa sesen arudif are, Negur nē tano mogo ā bun isil.

²¹ “Tamo megeir ado taka, ì waila kisi feleya ado yogon fō lo fef are, in safina are totoũ.

²² Anī ere, taka ì yogon megeir wal fiya anim ironē lai fiye ken, yogon waila ì anī bun total yaledig anī son fe fen, in safina gadō fouf.

23 “Taka ĩ aya to fedē fiyaf, ĩ neu kiwai, takag, ĩ aya ado to kuru mafef are, ĩ firagagaũ fef.

24 “Sain kaa sane tamo bun tamal ulō yeis fen, gerere tuan ile, si inoya modoũ imirek ile to fotou fef. Agef fen, ĩ irok, ‘Aya fō atoron anĩ bun baban kelauf.’

25 Sain ĩ kel isif, fō ani waĩ difel fen, madur difen anĩ ilef.

26 Anĩ nigin, ĩ ile fen, baban kaa sesen ĩ wal fiya sewen anĩ geif irou isif, age de fen, idi namen dile difaref. Age dife di, tamo anĩ gai sane bagai lef, uruwa bun nē tobonunā anĩ wal fiya.”

27 Jesus eneidi nigin wogō ye mog, tamo kayau atun kayau taka iweig iron, “Sinā ō gō yo ken, su ifonon, are ĩ el fiyek.”

28 ĩ solof iron, “Age fiya ban, Negur nē od karĩ de fen, dō difef anidi, el fedif.”

Jona Bun Uris (*Matyu 12:38-42*)

29 Tamo kayau guru fiya mala oduge di, Jesus iron, “Tamo kayau, gama sain enei bun dibodok, are sane bagai. Idi memelik nigin to difef, anĩ ere, taka to afenēdiyof, de profet Jona nē uris anĩ dogol afenēdiyof.

30 Jona are Niniwe taun tamo kayau bun uris, age fiya bagai, Tamo Naal ĩg sain enei nē tamo kayau bun uris.

31 Es fiya sain bun, Kuin Saut tamal fā ye fen, tamo kayau sain enei bun geid, idi neid mosor nigin kurō falaisiyof, ere nigin, kayau anĩ Solomon nē keleĩ karĩ youf nigin, teneub idiyan tamal isin, gama taka Solomon wal fiya are yeir.

32 Es fiya sain bun, Niniwe tamo kayau fā de fen, tamo kayau sain enei bun geid, idi neid mosor nigin kurō difalaisiyof, ere nigin, idi mogo Jona wogō ye di, waud falei den, gama taka Jona wal fiya are yeir.

Bouwa Nē Lam (*Matyu 5:15; 6:22, 23*)

33 “Taka nem lam tōf fen, to iminēyan be, beĩ kur inodig, age fiya ban, in yoki bun iseginēdig, age fe di, idi aabē disif anidi lalan dilouf.

34 Malā are bouwā nē lam. Ō malā biyauf are, ogon bouwā ganane g lalan barikāf. Anĩ ere, ō malā sesen lauf are, ogon bouwāg gugum kalauf.

35 Anĩ nigin, lalan ō ado anĩ gugum keleya nigin lo walauf.

36 Age fiya nigin, ogon boũ ganane lalan barikāf fen, siri sitakā to gugum ouf are, lam nē lalan ō bun so fe di, yaor ledig gen, bouwa ganane oditekei lalan ouf.”

Jesus Farisia Tamo Ado Lo Ifelnēdiya Tamo Isisnēdin (*Matyu 23:1-36; Mak 12:38-40*)

37 Sain Jesus wogō ye bure fele di, Farisia tamo takam ĩ, Jesus ado saaf dāf nigin iweignē di, aaben ile, tebol bun ibodon.

38 Anĩ ere, Farisia tamo ĩ, Jesus ima ketem kulo fiya sā, saaf nigin ibodon anĩ ile fen, terē yen.

39 Age fe di, Odug ĩ irokenen, “Farisia tamo ā, kap ado beĩ agara kulo gedig, anĩ ere, ā namein akorouya ado sanem barikā.

40 Ā neneya tamo! Negur agara inon anĩ, nameg to inon de?

41 Anĩ ere, ereb beĩ namen ibodok anĩ maleg wenēdigouf, ago ge di, ereb ereb ganane ā bun fliya ibodōf.

42 “Farisia tamo ā meleĩlon ado, ere nigin, ā āgenei edē, bakso ado, kabier tamal ereb ereb ganane farag fen, ten tekelei Negur wenēgedig, anĩ ere, ā lo es fiya ado Negur nigin wau laa fiya utorōgedig. Ā dum nē anĩ dōg fen, uruwa nē anĩg to utorōgem, are dem.

43 “Farisia tamo ā meleĩlon ado, ere nigin, ā Juda neid uub fō bun modoũ malabag ibodōya ado, maket modoũ bun tamo kayau idim sere diyeyik anĩ oroyeyik.

44 “Ā meleĩlon ado, ere nigin, ā tamo mekura dede fiya gen, tamo idi keleĩ sa ken, teten diyōdig.”

⁴⁵ Lo keleĩ tamo taka Jesus iroke-nen, “Tise, õ enei urõ di, õ amãg kono wamak.”

⁴⁶ Jesus solof iron, “Lo keleĩ tamo, ãg meleĩlon ado, ere nigin, ã tamo kayau, morõ idi faali fiya nigin malai bagai anĩ wenẽdigedig, anĩ ere, ã aug imeĩ gege tekelei idi isennẽdiya nigin to fitei yedig.

⁴⁷ “Ã meleĩlon ado, ere nigin, ã profet neid matmat unogedig, anĩ ere, ã tubuĩ tareni idi didenkesin.

⁴⁸ Anĩ nigin, ãgenei tubuĩ tar profet age difedin anĩ, ã megeir ge fen, yaor gef, ere nigin, idi profet didenkesin, ã idi neid matmat unogedig.

⁴⁹ Age fiya nigin, Negur yogon kisi biya bunem iron, ‘Aya fau idi bun profet, aposel ado sur afediyouf, age afe di, idi tunĩ didenkesin fen, tunĩ kafĩ fiya difenẽdiyouf.’

⁵⁰ Anĩ nigin, teneub inon gariya bunem isif, profet ganan neid naudeid fi felen anĩ nẽ mala solo, tamo kayau gama sain enei bun idim dalouf,

⁵¹ Abel nẽ naud bunem ile, Sekaraia ã tempel alta ado atun dukesin in naud bun. Aya ã momoi arokeneik, naud enĩ ganan nẽ mala solo, tamo kayau gama sain enei bun idim dalouf.

⁵² “Lo keleĩ tamo, ã meleĩlon ado, ere nigin, ã keleĩ nẽ ki walelegen, ã aug namen ileyã sa ken, ã idi namen dilef anidi neid sukar katĩ welegef.”

⁵³ Sain Jesus modoũ anĩ itoron, Farisia tamo, lo ifelnẽdiya tamo geid, ã bun kiwai total dino, to fiya fire fire musei to difiyen,

⁵⁴ ereb od wogõ youf bun dirounẽf nigin tari difiyen.

12

Weder Irouya Ado Tai Fiya (Matyu 10:26-33)

¹ Dirub kele di, tamo kayau tausen musei biya guru difen, anĩ bun idi abob tete tete lalai de difaren, age dife di, Jesus in dõ fiya tar ketem irokeneĩd fen, iron, “Ã, Farisia tamo

neid yis nigin lo welegei, are mala yaleya tobonunã.

² Gama ereb dede fiya yenek, are ganan fau lelek falauf, gama ereb iminẽyan yenek, are ganan fau yaorouf.

³ ã gugum bun wogõ gen anĩ, fau gaa lalan bun karĩ douf, ã aaben wedereim kosesẽ gen anĩ, fau fõ sokoronem kurõ difesiyouf.

⁴ “Neu mou tar, aya ã arokeneik, idi bouwa dukeis fen, anĩ dumen ereb taka baban age fiya kisi feleyã sã anidi to kumĩ wodig.

⁵ Anĩ ere, ã aib kumĩ wiyẽgouf anĩ afelneif: ã bouwa yukeis fen, dumen ã hel bun irãyeif nigin megeir ado anĩ kumĩ wiyẽgouf. Ariya, aya ã arokeneik, ã kumĩ wiyẽg.

⁶ Fisisir faif, tuwenti toea nẽ nem na nigin to sur gedig de? Anĩ ere, Negur ã anidi taka nigin to weder tu keledig.

⁷ Momoi, Negur ãgenei mudureĩ bun fatiyeĩ ganan iwes yalen. To kumĩ wog, ã fisisir musei wal fediya.

⁸ “Aya ã arokeneik, aibem taka, aya nigin tamo meleid bun kurõ falaisiyouf, Tamo Naal ãg, ã nigin Negur nẽ engel meleid bun kurõ falaisiyouf.

⁹ Anĩ ere, taka ã, aya nigin tamo meleid bun wa fouf, ayag ã nigin Negur nẽ engel meleid bun wa afouf.

¹⁰ Taka ã, Tamo Naal nigin kiwai ifen ken, kobu yef are, in mosor yalelauf. Ani are, taka ã, Awa Uur Fateul kiwai ifen ken, kono fiyek, in mosor to yalelauf.

¹¹ “Sain ã Juda neid uub fõ bun guri diyeĩ diroule, mudur adodo yeneid adodo meleid bun difarneif, an wauĩ moro ken, aug isenneif nigin naig mafouf, ere mauf, wog fen, to sii yeif,

¹² ere nigin, sain anĩ bun, Awa Uur Fateul ereb wogõ gouf nigin, ifelneif.”

*Neneya Tamo Safina Ado Nẽ Yaab
Od*

13 Tamo kayau musei atun, tamo takam Jesus irokenen, “Tise, neu turau urokenē di, amā urom akor foi mafouf.”

14 Jesus solof iron, “Aim aya ā atun es fiya tamo be, foi fiya tamo igiran?”

15 Age ye fen, Jesus idi irokenēdin, “Lo welegei, ereb ereb ganan bun akorouya anī lo welegei, tamo nē mata in safina musei bun to ibodok.”

16 Age ye fen, ī yaab od enei idi irokenēdin, “Tamo taka safina musei ado, nē teneub bun saaf musei yaledig.

17 Ī kisi yalen, ‘Aya naig afouf? Aya neu saaf inoya nē modoū sã.’

18 “Agef fen, ī iron, ‘Aya eig afouf anī de. Neu ki narī afeleid fen, odug nuwa anodiyouf, an neu saaf ado ereb ereb ganan anouf.

19 Age afel fen, aya yug nigin orōf, “Ō ereb ereb biyai biyai musei biya, yar musei nē unof. Ibodōya karika, saaf, naan wokon, waū el fouf.”

20 “Anī ere, Negur ī irokenen, ‘Ō neneya! Bō enei bun bagai, aya ogon mata alelkonōf. Age afe di, aim ogo nigin dodok won anī yalouf?’

21 “Taka ī yogo nigin, agef safina kuru fef, anī ere, Negur mala bun maleg ibodok, ī bun eig bagai fe, wō youf.”

To Osig

(Matyu 6:25-34)

22 Age ye fen, Jesus in dō fiya tar irokenēdin, “Age fiya nigin, aya ā arokeneik, ā āgenei bouweī mata ibodōf nigin to osig fen, ere saaf tāf gouf, ā āgenei bouweī nigin to osig fen, ere gabar tafilaīf gouf.

23 Mata anī saaf wal fiya, bouwa anī gabar wal fiya.

24 Ā kalog uledigedig, idi saaf to ditenēdig, idi saaf to u difedig, idi ki be, udū inoya modoū sã, anī ere, Negur ifoutnēdidig. Ā ninā anidi wal fediya bagai!

25 Ā takam yogon mata nigin osi ye fen, aua tekelei tobol fiya kisi feleya de?

26 Ā naal bagai enei age fiya kisi feleya sã nigin, ere nigin anī ā ereb ereb tunī nigin osi gef?

27 “Aa munī naig fe odugedig anī ulegedig. Idi kabī to daledig, to diwadig. Anī ere, aya ā arokeneik, kulu King Solomon yogon fula fiya medeīya bun naki gegē biya biya ifonun animeg, aa munī taka to wal fen.

28 Anī ere, Negur dubur aa munī gama dogol ifarauf, nile di, yā irāf anī, agef naki fediyouf are, ā idi wal fediya bagai, Negur naig fe ā ifounneīf, ā momoiya naal bagai ado!

29 Anī nigin, ā wauī ere saaf wāgauf be, ere naan wāgauf anī bun to unog, anī bun to osig.

30 Are haiden idi enī ganan nigin meleid dimirēdig. Āgenei Temeī ā lau gef anī ganan keleī.

31 Anī ere, Negur nē tano umirēg, ago ge di, safina eneidig ifeneīf.

32 “Musei sã ā, to kumī wog, ere nigin, āgenei Temeī, tano anī ā ifeneīya nigin wau al fen.

33 Āgenei safineī na sur ge fen, maleg wenēdigouf. Ā mugu mugu moni nē kodol to serek fouf anī uwagauf, agog fen, saa ilun nē safina biya biya to sa kalauf anī kuru gouf, an bē tamo non to isidig, tutū to dāf.

34 Āgenei safina biya biya ibodok nē an, wauīg an yenēf.

Jesus Kel Isiyouf Nigin Ololo Fiya *(Matyu 24:43-51)*

35 “Kabī nē naki ufonūg fen, āgenei lam tōg saika wog,

36 tamo idi, nedi odug, tamo kayau ado bagu fiya nē tar bunem kelouf nigin tari difedig, anī bunem, sain ī isi, sukar godu godu fe di, idi sã kaisā bagai ī sukar kā difelkenēf anidi gen ago gouf.

37 Ferfer anidi ololo dife mog, nedi odug isi ilediyouf anī, idi nigin deuf, aya ā momoi arokeneik, ī fau yogo kabī nē naki ifoun kel, ferfer tebol bun ibodneīd fen, isi, aruneid yalouf.

38 Ferfer anidi saika difel mog, nedi odug, bō atun be, we ado be isi ilediyof anī, idi nigin deuf.

39 Anī ere, ā enei keleī youf: Fō marau ī, sain nanī be bun, bē tamo isiyof anī keleī youf are, ī yogon fō lo fe di, to narī foug.

40 Āg saika gouf, ere nigin, Tamo Naal ī fau sain to isiyof gouf bun isiyof.”

41 Pita to fen, “Odug, ō yaab od enei amā nigin de, ganan nigin urok?”

42 Odug solof iron, “Ferfer taka aim anī, dō fiya biya, kisi biya ado de? Ī, yogon odugem ī yogon odug nē fō bun, anidi neid saaf dogo neid sain kilei, dōf ifenēdiyof nigin, ima bun inof.

43 Sain tamo odug kelouf bun, ferfer biya bagai age fe di, ilouf, tamo odug ī el fiyēf.

44 Aya ā momoi arokeneik, tamo odug ī, yogon safina ganan, ferfer anī ima bun inouf.

45 Anī ere, ferfer taka ī wau bun irōf, ‘Neu tamo odug isiya nigin sain meluk yalef,’ age ye fen, ī gariya ino, tamo ferfer ado kayau ferfer iden ken, ī yogo saaf biya naan biya yokon, aai sē fedig.

46 Ferfer anī nē tamo odug, in isiya nē naa ferfer to isiyof ye fen, kisif mog, in isiya sain ī keleī sā mog, isiyof. Tamo odug, ferfer anī gudūf fisik fe fen, momoiya sā geid, nedi modoū bun inenēf.

47 “Ferfer taka ī, yogon tamo odug nē oroya kelei ken, to dodok fef be, yogon odug orof anī to dōf age fef, ī fau wōf musei foug.

48 Anī ere, taka ī to kelei ken, darau yaleya nē anī age fef, ī musei to wō foug. Aib taka ī musei ifenen, ī bun musei yaleya nigin irokenēf, agef fen, taka ī lo foug nigin musei biya ifenen, ī bun musei biya yalouf nigin to fiyēf.

*Jesus Maur Gudū Fiya Nigin To Isin, Isoreya Nigin
(Matyu 10:34-36)*

49 “Aya tenebur yā arou asiyof nigin asin, yā mala kaur mogom are, aya arou bagai fiyam.

50 Anī ere, aya naan igūya taka fau alouf, anī nigin, aya wau fatuk morok ile, anī kisi falauf.

51 Ā kisi gef, aya tenebur ein maur gudū fiya arou asiyof nigin asin de? Sā bagai, aya ā arokeneik, isoreya nigin asin.

52 Gama ilauf bun, ibor tekelei bun, idi faif fara de fen, towom uru kiwai difenēdi di, urum towo kiwai difenēdiyof.

53 Idi fara de fen, tamam kesu kiwai ifenē di, kesum tama kiwai ifenēf, sina, ne barai kiwai ifenē di, ne barai sina kiwai ifenēf, sina yanawau kiwai ifenē di, yanawau kayau sina kiwai ifenēf.”

Sain Nigin Es Fiya (Matyu 16:2, 3)

54 Jesus tamo kayau musei irokenēdin, “Sain ā gaa ileyen budū fā ye di, uleg fen, ā kaisā bagai urōgedig, ‘Uyē isiyof,’ ago ge di, age fedig.

55 Takag, yau karag maaī ubunem fū fef, ā urōgedig, ‘Uruwa dō fadauf,’ are agef wō yedig.

56 Ā mala yaleya tamo! Teneub saa ado suma dinof anī uleg fen, es gouf nigin ā keleī. Naig fe di, sain enei nē suma es fiya nigin ā to kelei de?

57 “Ere nigin ā aug erob biya anīg to es gedig?

58 Ō ogon kiwai ado medistret bun uleg fen, naab luwen ogon kiwai ado od madur wouf, to agouf are, ī ō yale, es fiya tamo bun inenōf, age fe di, es fiya tamo ō polis bun inenō di, polis ō kalabus bun inenōf.

59 Aya ō arokonok, ō wareg ganan to unolauf are, ō kalabus bun to kutū wesiyof.”

13

Wauī Falei Gouf, Sāf, Inanakalauf
1 Sain anī bun, tunī an difaren anidim, Pailat Galili temeleid tunī neid

naudeid ado dogo neid sesewi fiya nē safina ekul fen anī, Jesus dirokenen.

² Jesus solof iron, “Ā kisi gef, Galili temeleid eneidi age de darau dalen nigin, idi neid mosor Galili temeleid ganan neid mosor wal fiya de?”

³ Aya ā arokeneik, sã bagai! Anī ere, ā wauī to falei gouf are, āg ganan inanakalauf.

⁴ Takag, Siloam fō meluk tamo kayau bun kubū ye fen, idi eitin idenkesin. Ā kisi gef, idi neid mosor, tamo kayau ganan Jerusalem taun difaref neid mosor wal fiya de?

⁵ Aya ā arokeneik, sã bagai! Anī ere, ā wauī to falei youf are, āg ganan inanakalauf.”

⁶ Age ye fen, Jesus yaab od enei iron, “Tamo taka, aa fig tekelei yogon wain kabier itenen, anī ĩ ile, faat nigin mala itoton, anī ere, taka to ilen.

⁷ Anī nigin, ĩ wain kabī lo fiya tamo irokenen, ‘Yar towo aya asi, aa fig enei bun faat nigin malau atoton, anī ere, taka to ailen. Utu urā! Ere nigin teneub gigiru yakasif?’

⁸ “Kabī lo fiya tamo solof iron, ‘Odug, baban yar tekelei utorkana len, aya gariyan ku kalī afel, yaro te anouf.

⁹ Yar taka bun biyauf, are deuf! Sãf are, utu urā.’ ”

Jesus, Kayau Taka Bagiya Fe Fesen, Sabat Naa Bun El Fiyen

¹⁰ Sabat naa taka bun, Jesus Juda neid uub fō taka bun od ifelnēdin.

¹¹ Kayau taka, yar eitin kaa sanem ironen nigin dagi ado, an ibodon. Kayau ĩ bagiya fe fesen, agef fen, ĩ madur ifareya kisi feleya sã bagai.

¹² Sain Jesus kayau anī lof fen, ĩ wagen iweigne ken, ĩ irokenen, “Kayau, õ ogon dagi bun tamal õ karika afonok.”

¹³ Age ye fen, Jesus ĩ bun ima ino di, kaisã bagai kayau ĩ madur le ifar fen, Negur yana yalesen.

¹⁴ Juda neid uub fō nē mudur, Jesus Sabat naa bun dagi el fiyen nigin, name sane fen, tamo kayau irokenēdin, “Kabī yaleya nigin naa

sigis ado. Anī nigin, naa anidi bun usig el yeif, Sabat naa bun sã.”

¹⁵ Odug ĩ irokenen, “Ā, mala yaleya tamo! Ā mugu mugu Sabat naa bun, āgenei bulmakau be, donki be difaredig modoū bun tamal birug fen, naan ifenēdiya nigin to gurig ulegedig de?”

¹⁶ Kayau enei, ĩ Abraham nē barai, ĩ Satanem sain meluk yar eitin ifokelen, ĩ ifōya anī bun tamal Sabat naa bun to karika afenēf de?”

¹⁷ Jesus od enei wogō ye di, yogon kiwai tar ganan mama fedin, anī ere, Jesus ereb ereb biya bagai age fen ganan nigin, tamo kayau musei ganan waud al fen.

Masted Faat Yis Ado Nē Yaab Od (Matyu 13:31-33; Mak 4:30-32)

¹⁸ Anī nigin, Jesus to fen, “Negur nē tano anī, ere taka gen? Ere bun aya kisi afe di, susu falauf?”

¹⁹ Are masted faat gen, anī tamo takam yale fen, yogon kabier itenen. Anī odug fen, aa wō ye di, ninã ilun temeleid disi, were bun dibodadan.”

²⁰ Baban ĩ to fen, “Negur nē tano anī, ere taka bun aya kisi afe di, susu falauf?”

²¹ Are yis gen, anī kayau takam yale fen, flawa odug ado falei fe di, ganan gē yen.”

Bobog Kidō (Matyu 7:13, 14, 21-23)

²² Jesus Jerusalem taun ilauf nigin naab luwen iyok ile fen, taun ado fonō fonō ile, od ifelnēdin.

²³ Takam Jesus to fiyen, “Odug, are teke tekelei dogol kel yalediyouf de?” Jesus idi irokenēdin,

²⁴ “Bobog kidō anī ileya nigin kabī total walogouf, ere nigin, aya ā arokeneik, musei idi namen dilauf nigin age difouf, anī ere, to kisi falauf.

²⁵ Sain fō marau fã ye fen, sukar inolalauf, ā serē ufareg fen, godu godu ge ugonēgouf, ‘Odug, sukar kã wanamãf.’

“Anī ere, ĩ solof irōf, ‘Aya ā keleī sã, ā nainenem usigen.’

26 “Age ye di, ã urōgouf, ‘Amã õ geid saaf naan ado ton, ago fen, õ nemã naab bun od ufelnamak uyon.’

27 “Anĩ ere, ĩ solof irōf, ‘Aya ã keleĩ sã, ã nainenem usigen. Ā sane ago gedig ganan, aya malau bun uyale-leg!’

28 “Sain Abraham, Isak, Jakop, profet ganan geid, Negur nẽ tano bun uledig fen, ã aug mayarẽ irarãyeĩf, an inã wifirig fen, goboreĩ kikokõ youf.

29 Tamo kayau gaa iseyan temeleid, gaa ileyan temeleid, yat temeleid, fa temeleid disi, Negur nẽ tanon tar bun idi neid modoũ dalouf.

30 Momi, an idi dumen dibodok fau malabag dibodõf, idi malabag dibodok fau dumen dibodõf.”

Jesus Jerusalem Nigin Wau Gudũ Fen

(Matyu 23:37-39)

31 Sain anĩ bun, Farisia tamo tunĩ Jesus garan disi dirokenen, “Modoũ enei utor ken, taka bun ule. King Herod ĩ õ inokesiyou fenẽ.”

32 Jesus solof iron, “Uleg, gaũ kuĩ anĩ urokenẽg, ‘Gama ado nil, aya kaa sesen aruid fen, tamo kayau el afediyouf, age afe fen, naa towo bun, aya neu kabĩ anĩ uyu katõ afalauf.’

33 Anĩ ere, aya gama, nil, arã toko tokõ afouf, momoi bagai profet taka Jerusalem taun to ito ken, firen laa fouf!

34 “O Jerusalem, Jerusalem, õ profet udenkeis fen, õ bun sur fedig anidi, meein meein wedidig, sain ganĩ aya õ wau afon ken, ogon gerẽ tar kuru afediyouf nigin age afedig, tataro sina momou waye farumen kuru fedig gen, anĩ ere, õ utorõdig!

35 Ulegouf, ãgenei fõ ã bun fonouf. Aya ã arokeneik, ã aya baban to uleyagauf ile, ã fau urōgouf, ‘Odug yana bunem isif ĩ el fiya ado.’* Sain anĩ bun, ã aya uleyagauf.”

* 13:35: Sam 118:26

14

Jesus Farisia Tamo Taka Nẽ Fõ Bun

1 Sabat naa taka bun, Jesus, Farisia tamo uyu irouya taka nẽ fõ bun, saaf yõya nigin ilen, idi an Jesus ololo difen.

2 Jesus wagen an, tamo taka bou didiã nigin darau yaledig anĩ ibodon.

3 Jesus, Farisia tamo, lo keleĩ tamo geid to fedin, “Sabat naa bun, dagi el fediya anĩ lo dõ fiya de, sã?”

4 Anĩ ere, idi mutũ difaren. Anĩ nigin, Jesus tamo anĩ yale, el fiye kel sur fiyẽ di, ilen.

5 Agef fen, ĩ idi to difen, “Ā taka, Sabat naa bun, kesu be, bulmakau be taka kuren isilauf, ã kaisã bagai to dĩ wasagauf de?”

6 Age ye di, idi od solof irõya kisi feleya sã.

7 Jesus, tamo tebol bun modoũ malabag anĩ gei dife di, ile fen, ĩ idi yaab od enei irokenẽdin,

8 “Tamo kayau ado bagu fiya nẽ tar bun, aib õ iweignõf are, modoũ malabag anĩ to walouf, ere nigin, tamo taka õ wal yõya iweignen be.

9 Age fouf are, ã uru iweigneim marau isi, õ irokonõf, ‘Ogon modoũ anĩ, tamo enei wenẽ.’ Age ye di, õ mama yo ken, modoũ dumen bagai anĩ walouf.

10 Anĩ ere, õ iweignõf are, modoũ dumen anĩ walouf, ago di, iweignom marau isiyouf, ĩ õ irokonõf, ‘Mou, modoũ biya bun godo urou usel.’ Age fe di, õ modoũ malabag anĩ wale di, ã iweigneim turã tar ganan meleid bun õ yanã odug adouf.

11 Ere nigin, aib taka yogo yana yalesef, fau lai fesilauf, aib taka ĩ yogo yana lai fesilef, Negur ĩ yana yalesauf.”

12 Age ye fen, Jesus fõ marau irokenen, “Sain õ gaa atun saaf be, bõ saaf wenẽdiyof fenẽ, ogon mou tar, naud turã tar, sirag tar be, nẽ tã tar safina inid adodo to uweignẽdiyof,

agouf, idi aba diweignōf, anī bun ō mala solo difonōf.

¹³ Anī ere, sain ō tar unouf, maleg, bouweid sesen, yeid kirorōya, meleid ifofakeleya anī uweignēdiyof,

¹⁴ agouf, Negur ō el yōf. Idi aba ō ke de difonōya kisi feleya sā, anī ere, madur tamo neid mata kel fāya bun, Negur ō mala solo ifonōf.”

Tar Odug Nē Yaab Od
(Matyu 22:1-10)

¹⁵ Tamo tebol bun weim dibodon anidi takam, od enei karī ye fen, ī Jesus irokenen, “Negur nē tanon tar bun tamo saaf yāf anī, ī el fiya ado.”

¹⁶ Jesus solof iron, “Tamo taka tar odug dodok fe fen, musei iweignēdin.

¹⁷ Tar sain bun, ī iweignēdin anidi irokenēdiyof nigin yogon ferfer sur fen, ‘Usig, gama ereb ereb ganan dodok felel.’

¹⁸ “Anī ere, idi ganan de tekelei gen galā od dinon. Uyulil ī iron, ‘Aya gama bagai kabī na alen, anī nigin, aya anī ailau fenē alauf. O malalon ado, aya to asiyouf.’

¹⁹ “Taka iron, ‘Aya bulmakau ten na alen, anī idi naig fiya anī ailau fenē elef. O malalon ado, aya to asiyouf.’

²⁰ “Takag iron, ‘Aya gama bagai kayau mata alen nigin, aya isiya kisi feleya sā.’

²¹ “Ferfer kel ile, ne odug od enei irokenen. Age fe di, fō marau name sane fen, yogon ferfer irokenen, ‘Kaisā bagai ule, taun nē naab odug, naab nanaal ado dō wo fen, maleg, bouweid sesen, meleid ifofakeleya, yeid kirorōya anidi guri urou usi.’

²² “Ferfer iron, ‘Odug, ō urom are mogo age afel, anī ere, modoū fau lolokā.’

²³ “Age ye di, odug yogon ferfer irokenen, ‘Naab uyok ule fen, fonō fonō naabur tamo kayau idi anī disiyouf nigin total bagai urokenēdi di, disi, neu fō isokosauf.

²⁴ Aya ā arokeneik, aya tamo idi aweignēdin anidi taka, neu tar bun saaf bagai to kobū de dilouf.’ ”

Kisi Es Wo Fen, Jesus Dō Wouf
(Matyu 10:37, 38)

²⁵ Tamo kayau musei, Jesus weim dile fen, ī falei yel, idi irokenēdin,

²⁶ “Taka ī aya gein isif, ne tama, sina, ne kayau, kesu tar, ne tura tar, main tar, yogon matag to itorōf are, ī neu dō fiya tamo wō youf nigin kisi feleya sā.

²⁷ Takag, taka ī yogon aa tetek to faali fe fen, aya dō fiyaf, ī neu dō fiya tamo wō youf nigin kisi feleya sā.

²⁸ “Ā taka, fō meluk taka inoya nigin orouf are, ī tetun ibod ken, fō inolauf nigin moni kisi feleya ado be anī es fouf, age fiya sā de?

²⁹ Ere nigin, ī fō gariya ino mā, inoleya to kisi falauf are, tamo kayau ganan anī dile fen, kasā difiye ken,

³⁰ dirōf, “Tamo enei fō kare fen, anī ere, inoleya kisi feleya sā.’

³¹ “Takag, king taka, king taka ado kusī douf nigin, ī ten tausen kusī tamo adom, king taka tuwenti tausen kusī tamo ado kusī disif anī, kusī bun wal fiyēya kisi feleya be sā be anī, tetun ibod ken, es fouf, age fiya sā de?

³² Ī to kisi falauf are, ī king taka fau gerō ifar mog, wowor fiya tamo sur fedī di, idi komo fiya nigin to difiyēf.

³³ Age fiya gen bagai, ā taka ī, ereb ereb ganan ī ado anī to itorōf are, ī neu dō fiya tamo wō youf nigin kisi feleya sā.

³⁴ “Anī nigin, sol ī biya, anī ere, in kai sa kalauf are, naig fe di, ī baban kai youf?

³⁵ Sol age fiya are, teneub ado falei fiya nigin ado, gaar te ado falei fiya nigin to biya, anī nigin dirailedig.

“Aib ī karīya nigin weder ado, utornē karī youf.”

15

Sipsip Fō Yelen Nē Yaab Od
(Matyu 18:12-14)

¹ Takis yaleya tamo, mosor adodo geid ganan, Jesus karĩ difiyēf nigin ĩ non disin.

² Anĩ ere, Farisia tamo, lo ifelnēdiya tamo geid, nauseir de fen, diron, “Tamo enei, mosor adodo aan fiyeĩd fen, weim saaf doko.”

³ Age de di, Jesus yaab od enei irokenēdin,

⁴ “Ã taka wan handred sipsip ado, anĩ tekelei iminkalauf are, ĩ nainti-nain sipsip yaorin itorneĩd fen, iminkelen anĩ imirek ile fotou fedig, age fiya sã de?”

⁵ Sain ĩ fotou fouf, ĩ wau adod fen, yale, benerin orowa sef,

⁶ fõ bun ilauf. Agef fen, ĩ ne mou tar ado, ne tã tar gou feid irõf, ‘Ã aya geid kulĩ tauf. Aya neu sipsip fõ yelen anĩ fotou afel.’

⁷ Aya ã arokeneik, age fiya gen bagai, mosor ado tamo taka wau falei yef bun, saa ilun kulĩya odug adouf anim, nainti-nain madur tamo baban faleiya nē sã idi nigin kulĩya wal fiya.

Silwa Koin Moni Iminkelen Nē Yaab Od

⁸ “Takag, kayau taka silwa koin moni ten ado, anĩ tekelei iminkalauf are, ĩ lam tõf, fõ waĩf fen, el fe imirek ile fotou fouf, age fiya sã de?”

⁹ Sain ĩ fotou fouf, ĩ ne mou tar ado, ne tã tar gou feid irõf, ‘Ã aya geid kulĩ tauf. Aya neu silwa koin moni iminkelen anĩ fotou afel.’

¹⁰ Age fiya gen bagai, aya ã arokeneik, mosor ado tamo taka wau falei yef ĩ nigin, Negur nē engel meleid bun kulĩya odug wõ yef.”

Kesu Fõ Yelen Nē Yaab Od

¹¹ Jesus tobol fe iron, “Tamo taka kesu uru adon.

¹² Ibuyem tama irokenen, ‘Dei, akor neu anĩ fara wana.’ Anĩ nigin, temeid yogon safina idi atun foi fen.

¹³ “Anĩ bure fel fen, sain meluk to ilele di, kesu ibuye, safina ĩ ado ganan kuruf yale irou, teneub taka bun gerõ biya ilen, an in safina tobonunã to biya bun daũ felen.

¹⁴ ĩ ereb ereb ganan daũ fele di, teneub anĩ bun naũ odug wõ yen, age fe di, ĩ bun lau fiya wõ yen.

¹⁵ Anĩ nigin, ĩ ile, fõ morou taka bun kabĩ yalouf nigin to fiyē di, fõ moroum ĩ bor saaf ifenēdiyof nigin yogon kabier sur fen.

¹⁶ ĩ naũ bagai nigin bor saaf dõ di, ĩg anĩ yõya nigin orodig, anĩ ere, takam ereb taka to ifenēdig.

¹⁷ “Ĩ kisi kelen sain, ĩ iron, ‘Neu dei ĩ kabĩ tamo musei ado, idi saaf barikã. Aya ein naum laa fiyau fenē!’

¹⁸ Aya fã au, neu dei garan kelau fen, ĩ arokenēf: Dei, aya saa ilun ado õ bun mosor anon.

¹⁹ Aya to biya nigin, neu kesu to wouf, ogon kabĩ tamo oroi waledin taka gen waleyauf.’

²⁰ Anĩ nigin, ĩ fã ye, tama gein ilen.

“Anĩ ere, ĩ fau gerõ iyok isi mog, tama ĩ kesu ile fen, ĩ nigin wau fatuk yũ di, kesu gein gudu ref ile, kakarai fiye ken, umã fiyen.

²¹ “Kesum tama irokenen, ‘Dei, aya saa ilun ado õ bun mosor anon. Aya to biya nigin, neu kesu to wouf.’

²² “Anĩ ere, tama ĩ yogon ferfer irokenēdin, ‘Gamanem kolos biya bagai waleg urousig, ĩ ufounnēg, ima gege bun sai unog fen, ye bun su unokenēg.

²³ Bulmakau lubu bou dĩa waleg urousig ukesig. Ada tar tano tokon, sigigi tafouf.

²⁴ Ere nigin, neu kesu enei laa fen anĩ baban matal, ĩ fõ yelen anĩ baban fotou tafiyem.’ Anĩ nigin, idi gariya dino sigigi difen.

²⁵ “Sain anĩ bun, kesu matu ĩ kabier ibodon. Dum ĩ iyok isi, fõ kelē fiye ken, fõ non kui de gurũ de mog, karĩ yen.

²⁶ Agef fen, ĩ kabĩ tamo taka iweigne ken, to fiyen, ‘Oun ere naig difef?’

²⁷ Kabĩ tamo ĩ aiten yale iron, “Turã kel isil, anĩ tamã bulmakau lubu bou dĩa yum, ere nigin, tamam ĩ bouwa totoũ biya bagai ado kel yalel.’

28 “Age ye di, tura matu name sane fen, fō bun ileyā nigin itoron. Age fe di, tama mayarē ile wowor fiyen.

29 Anī ere, kesu ī tama solof iro-kenen, ‘Ulefe, yar enei ganān aya ō sigor taka to wal afe fen, arunā alef asin. Anī ere, ō aya meme lubu taka wana di, neu mou tar geid to sigigi mafen.

30 Anī ere, ō naal enei are, ogon safina, kayau bouweid na nē sur difedig anidi bun daū fel fen, fonō isi di, ō bulmakau lubu bou dīya ukenem!’

31 “Tama iron, ‘Neu kesu, ō aya ado faimud tabodōdig. Safina ganān aya ado, are ogon.

32 Anī ere, ada sigigi tafe fen, wauda al fem bagai, ere nigin, turā enei laa fen anī baban matal, ī fō yelen anī baban fotou tafiyem.’”

16

Kabī Tamo Neid Orowa Tobonunā Sane Kisi Biya Ado Nē Yaab Od

1 Takag, Jesus in dō fiya tar iro-kenēdin, “Safina musei ado tamo taka, ī yogon kabī tamo neid orowam in safina daū fef yeya karī yen.

2 Anī nigin, ī iweignē ile di, to fiyen, ‘Eī ere od anī ō nigin karī auf? Ogon kabī walēn anī faded wo di, karī auf, ere nigin, ō baban kabī tamo neid orowa to ubodōf.’

3 “Kabī tamo neid orowa yogo nigin iron, ‘Gama aya naig afouf? Neu odug neu kabī yalelkanaf. Aya meku yaleya nigin totolou sã, agef mãg, aya nonīya nigin mama ado.

4 Aya naig be afouf are aya keleī, anī bunem sain aya neu kabī ein atorōf are, tamo kayau neid fō bun ileyā nigin aan difiyauf.’

5 “Age ye fen, ī, yogon odug bun wareg dalēn anidi mugu mugu iweignēdi di, disin. Ī tamo uyulil anī to fiyen, ‘Ō neu odug bun wareg ganī walēn?’

6 “Ī aiten yale iron, ‘Eit handred galēn aa oliv moul alēn.’” Kabī tamo neid orowa ī irokenen, ‘Ogon wareg

ditoton wale, kaisā ubod ken, fo handred utot.’

7 “Age ye di, ī uyulil dō fiyen anī to fiyen, ‘Ba ō wareg ganī walēn?’

“Ī solof iron, ‘Wan handred wit bek alēn.’

“Kabī tamo neid orowam ī irokenen, ‘Ogon wareg ditoton wale, eiti utot.’

8 “Yogon odug ī, kabī tamo neid orowa idegēya tamal, ī kisi el fe yale fen, age fen nigin, yana yalesen. Ere nigin, tamo kayau teneub enei bun temeleid kisi el de dale fen, ereb dogo neid nigin tamo kayau lalan bun temeleid wal fediya age difedig.

9 Aya ā arokeneik, teneub enei nē safina bunem ā aug nigin neī mou tar waledigouf, anī bunem, sain safina sa kalauf, mata gai ibodkeleya bun aan diyeīf.

10 “Taka ī ereb naal bagai el fe lo fef, odug buneg agef lo fouf, taka ī naal bagai bun idegek, odug buneg idegēf.

11 Anī nigin, ā tenebur enei nē safina to el ge lo gen ouf are, aim ā momoi nē safina lo fiya nigin in-eneīf?

12 Ā takan nē safina to el ge kulatun gen ouf are, aim anī ā safineī ifeneīf?

13 “Kabī tamo takam odug uru bun to kabī yalouf. Taka nigin to wau yen ken, taka nigin wau laa fouf be, taka anī aruna yale fen, taka anī to awa yāf. Ā Negur nigin ado moni nigin aruna yaleya kisi feleya sã.”

14 Farisia tamo moni nigin waud laa fedig anī, od enei ganān karī de fen, Jesus kasā difiyen.

15 Age dife di, Jesus idi irokenēdin, “Ā bagai anī, tamo meleid bun, ā aug nigin biya age mafef gedig, anī ere, Negur ī wauī keleī bagai. Tamo ereb nigin waud fatuk difenek, are Negur mala bun ninir bagai.”

Ifelnēdiya Od Tobol Fiya

16 “Lo nē od ado, profet neid od wogō def disi, Jon bun daun. Sain anī bunem, Negur nē tano nigin biya od wogō def disif, age fe di, ganān

namen ileyā nigin mugu mugu teĩbir def.

¹⁷ Saa teneub ado iminkeleya nigin are karika, anĩ ere, Lo bun itotoya togo fiya naal bagai taka to iminkalauf.

¹⁸ “Taka ĩ aiwa iru fen, kayau taka yalouf are, ĩ seseirā inof, taka ĩ kayau tamo takam irun anĩ yalouf are, ĩ seseirā inof.

Safina Musei Tamo Ado Lasarus

¹⁹ “Safina musei ado tamo taka, naa ganān bun kolos naki biya, saaf biya, ibodōya biya ibodōdig.

²⁰ Maleg taka yana Lasarus, gurumam barikā, safina musei ado tamo ne bobogē yenēdig.

²¹ Agef fen, ĩ, safina musei ado tamo nē tebol bunem kuku ref anĩ yāf nigin orodig. Gaūg disi, guruma seum difedig.

²² “Dum maleg tamo laa fe di, engelem Abraham wagen dirou diselen. Safina musei ado tamog laa fe di, mū difen.

²³ Laa neid modoũ bun, safina musei ado tamo darau odug yale fen, ĩ gerō mala irakel, Lasarus Abraham wagen ibod mog, ilen.

²⁴ Agef fen, ĩ Abraham iweigne ken, iron, ‘Dei Abraham, aya nigin waũ ino ken, Lasarus sur wiyē di, ima gege uyum naan kobũf fen, irosi baleu felu kouf, ere nigin, aya yā enei bun darau odug alef.’

²⁵ “Anĩ ere, Abraham aiten yale iron, ‘Kesu, õ mata ubodon sain, õ ereb ereb biya wale mog, Lasarus ĩ ereb ereb to biya yalen, anĩ karĩ wo, anĩ ere, gama ein ĩ wau wā fe di, õ darau odug bun ubodok.

²⁶ Takag, enei ganān teten, amā ā geid atun meku odug inon, anĩ bunem, idi ein tamal ā gein isiya nigin kisi feleya sã, takam an tamal amā gein ibal isiya nigineg kisi feleya sã.’

²⁷ “Ĩ aiten yale iron, ‘Age fiyauf are, Dei, aya õ agonok, neu dei nē fõ bun Lasarus sur wiyē di, isilauf,

²⁸ ere nigin, aya turau tar faif dibodok. Utornē len, wedereid

irouwauf, age fe di, idig darau odug nē modoũ enei bun to disiyouf.’

²⁹ “Abraham solof iron, ‘Idi Moses nē itotoya ado profet neid itotoya ado, utorneĩd len, idi anidi bun wedereid dinouf.’

³⁰ “Ĩ iron, ‘Age fiya sã, Dei Abraham, laa bun tamal takam idi bun isilauf are, idi waud falei youf.’

³¹ “Anĩ ere, Abraham tamo anĩ irokenen, ‘Idi Moses nē od ado profet neid od nigin to wedereid dinouf are, laa bun tamal takam fā ye fen, idi irokenēdiyofeg to karĩ douf.’ ”

17

Jesus Mosor Ado Momoiya Nigin Ifelnēdin

(*Matyu 18:6, 7, 21, 22; Mak 9:42*)

¹ Jesus in dõ fiya tar irokenēdin, “Ereb ereb tamo mosor bun inenēdiyof anĩ isiyof bagai, anĩ ere, tamo nanĩ be bunem isif, ĩ malalon ado.

² Taka ĩ nanaal enidi taka mosor bun inenēya ban, ĩ meein odug guyutu bun ifo ken, maaĩwõ irāya nigin biya bagai.

³ Anĩ nigin, ā lo welegei. “Õ turā mosor inouf, ou wiyēf, anĩ ĩ falei youf are, õ in mosor nigin wederē tu kel.

⁴ ĩ naa tekelei bun, õ bun mosor ino sewen fouf, ĩ õ gein isi, sewen fe irõf, ‘Aya awaul,’ õ in mosor nigin wederē tu kel.”

⁵ Aposel idi Odug dirokenen, “Nemā momoiya odug wouf!”

⁶ Jesus solof iron, “Ã momoiya naal, masted faat gen adouf are, aa enei urokenēgouf, ‘Kusu wale, usil maaĩwõ ufarau,’ ago ge di, ā sigoreĩ dõ fouf.

⁷ “Ã taka, yogon ferfer kabier teneub yũf be, sipsip lof fen, kabierem isi mog, ne maraum tau, ‘Kaisã bagai saaf yõya nigin usi ubod,’ fiyēf de?

⁸ Age fiya ban, ĩ eig youf, ‘Neu saaf dodok wol fen, õ naki wol, arunau wale, akas bure afele di, gama õ saaf ado naan wāf.’

9 Ī irokenē di, dōf age fen nigin, maraum ferfer tau de wiyal fiyēf de?

10 Anī nigin, ā ereb ereb irokeneik anī ganān dōg, ago weleg fen, āg eig ge urōgouf, ‘Amā ferfer to biya, amā nemā kabī anī dogol malel.’ ”

Jesus Tamo Ten Lepra Dagi Adodo El Fedin

11 Jesus Jerusalem ileyā nigin, Samaria ado Galili distrik daū atu iyok ilen.

12 Ī fonō taka bun ile mog, tamo ten lepra dagi adodo, ĩ fotou difiyen. Idi gerom difar fen,

13 aiteid odug nem diweig diron, “Jesus, Odug, amā nigin malalon yō!”

14 Sain ĩ idi ileid fen, iron, “Uleg, aug bouweī pris ufelnēdigouf.” Age ye di, idi dile mog, bouweid biya len.

15 Idi neid taka bouwa biya len anī ile fen, kel isi, ait odugem Negur yana yalesen.

16 Jesus ye gariyan kubū ye yen ken, de wiyal fiyen, ĩ Samaria tamal.

17 Age fe di, Jesus to fen, “Ten ganān to biya ledin de? Tamo nain idi nain difaref?”

18 Takam to kel isi, Negur yana yalesel, yaū enei dogol de?”

19 Jesus age ye fen, ĩ irokenen, “Fā wale fen, ule, ogon momoiyam ō el yom.”

Jesus Negur Nē Tano Nigin Wogō Yen

(Matyu 24:23-28, 37-41)

20 Sain taka, Farisia tamom, Negur nē tano ere sain isiyouf nigin Jesus to difiyē di, Jesus solof iron, “Negur nē tano, malam ileyā kisi feleyā sā bunem isidig,

21 tamo to ‘Eī yeir,’ be, ‘Your oun,’ be douf, ere nigin, Negur nē tano are ā atun ibodok.”

22 Age ye fen, Jesus yogon dō fiya tar irokenēdin, “Sain isi di, Tamo Naal nē naa taka ileyā nigin oroyeīf, anī ere, ā anī to ulogouf.

23 Tamom dirokeneīf, ‘Ī your!’ be, ‘Ī yeir!’ douf. Ā, to uleg, idi to dō wedig.

24 Ere nigin, Tamo Naal, yogon naa bun, kolimei filiya lalan saa gariyanem irou, idikeleyan isiledig gen.

25 Anī ere, uruwa ĩ darau musei yale di, tamo kayau sain enei bun dibodok anidi ĩ dudum difiyēf.

26 “Noa nē sain bun age fen gen, age fiya bagai Tamo Naal nē sain buneg age fouf.

27 Tamo kayau saafei de fen, naanuei den, tamo kayau yalef, kayau tamo difenek difen, age de dile mog, Noa waag namen ilen. Agef mog, kuwei isi fen, idi ganān daū fedin.

28 “Lot nē sain buneg de age difen, tamo kayau saafem, naanem difen, na dalef, na sur difef, saaf ditēn, fō dino mog, difen.

29 Anī ere, naa Lot Sodom taun itor ilen bun, yā ado meein salfa, saa bunem uyē gen kukur fen, idi ganān daū fedin.

30 “Age fiya gen bagai, Tamo Naal yaorouf nē naa bun, agef wō youf.

31 Naa anī bun, taka ĩ yogon fō agaran ibod mog, in safina namen ibodok anī yalouf nigin to kel isilauf. Age fiya bagai, taka ĩ kabier ibodok, yogon safina yalouf nigin to kel ilauf.

32 Lot nē kayau bun kisi gouf!

33 Taka ĩ yogon mata yalouf nigin kisi fouf, ĩ mata anī fō yalauf. Taka ĩ yogon mata anī itorōf are, ĩ yogon mata irou kafī falauf.

34 Aya ā arokeneik, bō anī bun, tamo uru idi fatar tekelei bun denēf, tekelei yalouf, taka itornēf.

35 Kayau uru idi wit ditutu mog, tekelei yalouf, taka itornēf.”*

37 Idi to difen, “Odug, ō urok anī nain wō youf?” Jesus idi irokenēdin, “Nain be laa yenek nē an, tum guru difouf.”

* 17:35: Itotoya tunī eig de ditoton: itornēf. 36 Tamo uru idi kabier difarauf, tekelei yalouf, taka itornēf.

18

Kayau Waab Tuwa To Yu Kelen Nē Yaab Od

¹ Age ye fen, Jesus, in dō fiya tar idi faimud kosēya nigin tuweid to yūf anī ifelnēdiyof nigin, yaab od taka irokenēdin.

² Ī iron, “Taun taka bun, es fiya tamo taka ibodon, Ī Negur to kumī fiyēdig, tamog to iwesnēdig.

³ Taun anī bun an, kayau waab taka ibodon, Ī es fiya tamo bun toku kel fen, yogon kiwai mala solo ifenēf nigin irokenēyai yedig.

⁴ “Es fiya tamo Ī kaisā to karī fiyen, anī ere, dum Ī yogo nigin iron, ‘Aya Negur to kumī afiyek, tamog to awesnēdif,

⁵ anī ere, kayau waab enei toku morō ifanaf nigin, in morō anī ail fen, kayau Ī irok anī age afouf, anī bunem Ī to kel fen, morō ifanauf!’ ”

⁶ Jesus age ye fen, iron, “Es fiya tamo sane, ereb Ī iron anī karīg.

⁷ Negur yogon igirnēdin anidi, bō ado gaa ado diweig dirokenēdig nigin, Ī lo nē madur fiya to ifenēdiyof de? Ī sain meluk to karī fiyēdiyof de?

⁸ Aya ā arokeneik, Ī kaisā bagai lo nē madur fiya ifenēdiyof. Anī ere, Tamo Naal isiyof sain bun, tenebur ein Ī momoiya fotou fouf de?”

Farisia Tamo Taka, Takis Yaleyā Tamo Ado Nē Yaab Od

⁹ Tunī idi dogo nigin amā madur bagai de fen, tunī meleid irim lai difedidig anidi bun, Jesus yaab od eneig irokenēdin,

¹⁰ “Tamo uru tempel bun kosē douf nigin diselen, taka Farisia tamo, taka takis yaleyā tamo.

¹¹ Farisia tamo ifar fen, yogo nigin kosē yen, ‘Negur ō de ayok, aya tamo tunī gen sā, bē diledig, sane age difedig, seseirā dinodig, takis yaleyā tamo enei geneg sā.

¹² Aya uub tekelei bun naa uru kuri au fen, ereb ereb ganān aya alef anī, ten teke tekelei ō afonōdig.’

¹³ “Anī ere, takis yaleyā tamo Ī so rel ifaren. Ī saa iluneg to itad fen, anī ere, Ī akor yu ken, iron, ‘Negur, aya nigin waū inōf, aya mosor temelou.’

¹⁴ “Aya ā arokeneik, Farisia tamo anī sā, takis yaleyā tamo enei, Negur mala bun Ī madur fen, fō bun ilen. Ere nigin, taka Ī yogo yana yalesef, Negur Ī yana lai fouf, taka Ī yogo yana lai fef, Negur Ī yana yalesauf.”

Kesu Nanaal Jesus Geid

(Matyu 19:13-15; Mak 10:13-16)

¹⁵ Takag, tamo kayau, Jesus kesu momoug kobū fediyof nigin Ī wagen guri difeid disin. Age dife di, in dō fiya tar anī dile fen, idi ou difiyēdin.

¹⁶ Anī ere, Jesus kesu Ī wagen iweigneid fen, iron, “Utornēdig len, kesu nanaal aya wageun disiyof, idi to katū wedig, ere nigin, Negur nē tano are eig fediyā neid.

¹⁷ Aya ā momoi arokeneik, aib taka Ī, Negur nē tano, kesu naal age fiya gen to yalouf are, Ī Negur nē tanon to bagai ilauf.”

Uyu Irouya Tamo Safina Musei Ado

(Matyu 19:16-30; Mak 10:17-31)

¹⁸ Uyu irouya tamo taka Jesus to fiyen, “Tise biya, aya ere naig afe fen, mata faimud ibodkeleya alouf?”

¹⁹ Jesus Ī irokenen, “Ere nigin ō aya anī biya wiyaf? Aibem taka biya sā, Negur yogo dogol.

²⁰ Ō Ītāfiya keleī: ‘Ō seseirā to unouf, ō tamo taka to ukesiyof, ō to bē walouf, ō taka nigin idegēya od to urōf, sinā tamā yeneid walesauf.’*”

²¹ Age ye di, Ī iron, “Enei ganān aya kesu naalun dō afef asin.”

²² Jesus enei karī ye fen, Ī irokenen, “Ō fau tekelei anī inī sā. Ogon safina ganān na nigin sur wo fen, maleg tamo weneid, agouf anī ō saa ilun safina biya adouf. Ago wol fen, usi, aya dō wiya.”

* 18:20: Eksodas 20:12-16; Diuteronomi 5:16-20

²³ Anĩ ere, ĩ od enei karĩ ye fen, wau fatuk gudũ fen, ere nigin, ĩ safina musei biya ado.

²⁴ Jesus ĩ lege fiye ken, iron, “Safina musei adodo tamo, Negur nē tano bun ileyā nigin, gai malai bagai!

²⁵ Momoi, kamel ĩ, gabar iwaya nē nil ku bun ileyā nigin, karika bagai, safina musei ado tamo, Negur nē tano bun ileyā nigin, malai bagai.”

²⁶ Idi od anĩ karĩ de fen, to difen, “Age fiyauf are, aim anĩ mata ibodkeleya anĩ yaleyā nigin kisi feleya?”

²⁷ Anĩ ere, Jesus solof iron, “Ereb tamom age fiya nigin kisi feleya sã anĩ, Negur age fiya nigin kisi feleya.”

²⁸ Pita Jesus irokenen, “Ulef, amã õ dõ mayõf nigin, ereb ereb ganā amã ado anĩ matoron!”

²⁹ Age ye di, Jesus idi irokenēdin, “Aya ā momoi arokeneik, aib taka fõ, kayau, tura tar, sina tama tar be, gere tar, Negur nē tano nigin itoron,

³⁰ ĩ mala solo musei bagai sain enĩ bun yalouf, ĩ dumen isiyouf buneg mata faimud ibodkeleya yalouf.”

Jesus In Laa Nigin Irõ, Towo Fen (Matyu 20:17-19; Mak 10:32-34)

³¹ Age ye fen, Jesus, in dõ fiya tar tuwelf firen geif iroule irokenēdin, “Ulegef, ada Jerusalem teselef, ereb ereb ganā Tamo Naal nigin profet ditoton anĩ, fau kisi falauf.

³² ĩ fau haiden Israel sã anidi imeid bun ilauf. Idi ĩ fau diselinēf, kono difiyēf, disisnēf, wagĩ difiye ken, duke-siyouf.

³³ Naa towo bun, ĩ fau baban mata kel fã youf.”

³⁴ Anĩ ere, dõ fiya tar, enei ganā taka to kelein. Od anĩ nē gariya idi bun iminen, agef fen, idi ĩ ereb nigin irok anĩ to kelein.

Maleg Tamo Mala Ifofakeleya Anĩ Mala Fara Felen (Matyu 20:29-34; Mak 10:46-52)

³⁵ Sain Jesus Jeriko kelē fiyē mog, tamo taka mala ifofakeleya, naab yerin nonĩ yef ibodon.

³⁶ ĩ tamo kayau musei disi dilef ya karĩ ye fen, ereb wõ yef anĩ nigin to fedin.

³⁷ Idi ĩ dirokenen, “Jesus Nasaret tamal isi ilef.”

³⁸ Age de di, ĩ iweig iron, “Jesus, Dawid Naal, aya nigin malalon yõ!”

³⁹ Tamo uyu dilen anidim sakã difiye ken, foro yalauf nigin dirokenen, anĩ ere, ĩ wade bagai iweig iron, “Dawid Naal, aya nigin malalon yõ!”

⁴⁰ Jesus dē yel fen, tamo ĩ wagen dirou disiyouf nigin irokenēdin. ĩ isi melsã di, Jesus ĩ to fiyen,

⁴¹ “Aya õ ere age afonõf ani, õ oroyok?”

Tamo anĩ solof iron, “Odug, aya malau kelē yalau fenē.”

⁴² Age ye di, Jesus ĩ irokenen, “Malã fara wol, ogon momoiya anim el yom.”

⁴³ Kaisã bagai, ĩ mala fara fel fen, Jesus dõf, Negur yana yalesen. Tamo kayau ganā anĩ dile fen, idig Negur yana dalesen.

19

Sakeus, Takis Yaleyā Tamo

¹ Jesus Jeriko taun wõ ye fen, atu iyok ilen.

² Tamo taka yana Sakeus an ibodon. ĩ takis yaleyā tamo neid mudur, safina musei ado.

³ ĩ Jesus ĩ ai bagai anĩ ilouf nigin oron, anĩ ere, ĩ tobega tamo nigin ĩ kisi feleya sã, ere nigin, tamo kayau musei dinonolnen.

⁴ Anĩ nigin, ĩ ket gudu ref ile, Jesus ilouf nigin aa fig ilun sõ yen, ere nigin, Jesus naab anĩ dõf, are isi ilauf.

⁵ Sain Jesus modoũ anĩ bun ulõ yeis fen, mala ilun ira ken, ĩ irokenen, “Sakeus, kaisã bagai kutũ weis. Gama aya ogon fõ bun abodõf bagai.”

⁶ Age ye di, ĩ kaisã kutũ yeis fen, wau sere fiya ado Jesus aan fiyen.

⁷ Tamo kayau ganā enei dile fen, kosesē kurã den, “ĩ mosor ado tamo nē fõ bun mogo ilef.”

⁸ Anĩ ere, Sakeus ifar fen, Jesus irokenen, “Oduḡ, ulef! Gama yeir aya neu safina atun fara afe fen, sitakã maleḡ tamo afenēdiyof, aya ideḡya bunem tunĩ neid safina alen are, aya idi mugu mugu mala solo aiwa ifenēya teten ano fen, afenēdiyof.”

⁹ Age ye di, Jesus ĩ irokenen, “Gama kel yaleya anĩ fõ enei bun isil, ere nigin, tamo enĩ, ĩḡ Abraham naal taka.

¹⁰ Ere nigin, Tamo Naal fõ delen anidi imirneĩd fen, kel gei fof nigin isin.”

Ferfer Ten Moni Imeid Bun Inon Nē Yaab Od

(Matyu 25:14-30)

¹¹ Idi od enei karĩ de mog, Jesus tobol fe, yaab od taka irokenēdin, ere nigin, ĩ mogo Jerusalem melsã ifaref, anĩ nigin, tamo kayau Negur nē tano kaisã bagai wõ youf de fen, kisi difen.

¹² Anĩ nigin, ĩ iron, “Tamo taka yana odug ado, ĩ king dinenē di, kel isiyof nigin fõ takã gerõ bagai ilen.

¹³ Anĩ nigin, ĩ yogon ferfer ten iweig laisi fen, moni wan tausen kina mugu mugu ifeneĩd fen, irokenēdin, ‘Moni enei kabĩ wenēḡ mog, aya ke-lauf.’

¹⁴ “Anĩ ere, yogon tamo tar kiwai difen ken, eig de dirõf nigin ĩ dumen arũ tamo sur difen, ‘Amã tamo enei nemã king wõ youf nigin to oromak.’

¹⁵ “Anĩ ere, ĩ king yana yale fen, fonõ kel isin. Agef fen, ĩ, ferfer moni ifenēdin idi moni ado naig de kabĩ dalen anĩ ilouf nigin, iweignēdi di, disin.

¹⁶ “Tamo uyu ĩ isi iron, ‘Oduḡ, aya ogon wan tausen kina bun, ten tausen kina taka alen.’

¹⁷ “Age ye di, yogon odug solof irokenen, ‘Õ ferfer biya, õ de agon! Õ safina naal bagai bun kabĩ biya walen nigin, taun ten lo weid.’

¹⁸ “Ĩ dõ fiya taka isi iron, ‘Oduḡ, aya ogon wan tausen kina bun, faif tausen kina taka alen.’

¹⁹ “Age ye di, yogon odug ĩḡ irokenen, ‘Õ taun faif lo weid.’

²⁰ “Age fe di, ferfer taka isi iron, ‘Oduḡ, ogon moni yeir. Aya moni anĩ gabar masak nem sile afe fen, anokon.

²¹ Aya õ nigin kumĩ aun, ere nigin, õ tamo total ado. Õ ereb to unokon anĩ waledig, onom to utenen anĩ kusu wodig.’

²² “Yogon odug ĩ irokenen, ‘Aya ogon od bunem es ayõf, õ ferfer sane! Õ kelein, aya tamo total ado, ayam to anokon anĩ aledig, ayam to atenen anĩ kusu afedig de?’

²³ Ere wo fen, neu moni benk bun to unon? Ago wom are, sain aya kelauf bun, moni kabĩ yalen anĩ nē mala ado, moni õ benk wenen anĩ bagu fiya kel isin ado alem.’

²⁴ “Age ye fen, odug idi difaren anidi irokenēdin, ‘Yogon moni son ge fen, tamo ten tausen kina ado anĩ wenēḡ.’

²⁵ “Age ye di, idi ĩ dirokenen, ‘Oduḡ, ĩ mogo ten tausen kina ado!’

²⁶ “Oduḡ solof iron, ‘Aya ã aro-keneik, taka ĩ ado, aya teten anouf, anĩ ere, taka ĩ sã bagai, ereb taka ĩ ado areḡ, ĩ bun tamal son fof.’

²⁷ Anĩ ere, neu kiwai tar, aya nedi king ibodõya nigin to orodin anidi, ein wageun gurig urousig fen, malau bun udenkesig.’”

Jesus Tamo Yana Ado Gen Jerusalem Ilen

(Matyu 21:1-11; Mak 11:1-11; Jon 12:12-19)

²⁸ Jesus od enei wogõ yel fen, Jerusalem iseleya nigin, ĩ ketem uyu iselen.

²⁹ Jesus Moul Arei* bun Betfage ado Betani fonõ kelē fiye ken, in dõ fiya tar uru sur feid irokenēdin,

³⁰ “Fonõ wageik anĩ bun uleg, an wõḡ fen, donki naal difon anĩ ulogouf, are aibem taka anĩ bun to iyon. Anĩ biru weleg fen, ein urou usig.

³¹ Taka nem to yeĩf, ‘Ere nigin ã anĩ biru gef?’ urokenēḡouf, ‘Oduḡ anĩ kabĩ ifenēf nigin.’”

* 19:29: ‘Oliv Arei’ dedig.

³² Anĩ nigin, uyu sur fedin idi dile, Jesus irokenēdin kilei bagai anĩ fotou difen.

³³ Idi donki naal biru de mog, anĩ nē marau tamo idi to difiyēdin, “Ā ere nigin donki naal anĩ biru gef?”

³⁴ Idi ĩ solo de dirokenen, “Odug anĩ kabĩ ifenēf nigin.”

³⁵ Idi donki naal anĩ Jesus wagen dirousi fen, idi neid gabar teten dirara ken, ĩ anĩ teten dinenē ibodon.

³⁶ Jesus iyok ile mog, tamo kayau idi neid gabar naabur du difedin.

³⁷ Sain ĩ iyok isi, naab Moul Arei bunem isileya non, in dō fiya tar ganan, memelik ganan inodin dilen nigin, waud al fiya ado aiteid odug nem Negur yana dalesen:

³⁸ “King, Odug yana bunem isif, are ĩ el fiya ado!”*

Saa ilun wau inosiya ado, ilun bagai fula fiya medeĩya ado!”

³⁹ Tamo kayau atun, Farisia tamo tunĩ Jesus dirokenen, “Tise, ogon dō fiya tar sakã wiyeĩd!”

⁴⁰ Anĩ ere, Jesus solof iron, “Aya ā arokeneik, idi foro dalauf are, meein eneidi diweig dirōf.”

⁴¹ ĩ Jerusalem kelē fiye ken, taun anĩ ile, wau gudũ fe di, inã yale,

⁴² iron, “Ō Jerusalem naa enei bun, ō nigin erebem waũ inosiya irou isif anĩ ō keleim, are dem, anĩ ere, gama ō malã bun iminek.

⁴³ Sain taka ō bun isiyouf, ogon kiwai tar, ō bun teneub mudu dino, salili diyokel, afi diyokalauf.

⁴⁴ Idi ō tenebur dale dirāyōf, ō ado gerē tar ogon kau namen difaref geid. Idi meein taka taka teten ditorō di, to ibodōf, ere nigin, Negur ō bun isin nē naa anĩ to ulegen nigin.”

Jesus Tempel Bun
(Matyu 21:12-17; Mak 11:15-19; Jon 2:13-22)

⁴⁵ Jesus tempel modoũ bun ile, idi ereb ereb na nigin sur de mog, an irudidin.

⁴⁶ Agef fen, Jesus idi irokenēdin, “Negur nē Itotoya bun ibodok, ‘Neu fō are, kosēya nē fō ibodōf,’* anĩ ere, āgem ‘bē tamo neid iminēya fō’* unogen.”

⁴⁷ Naa ganan Jesus tempel bun ifelnēdidin. Anĩ ere, pris odudug, lo ifelnēdiya tamo, tamo kayau neid mudur adodo geid, Jesus dukesiyouf nigin naab dimiren.

⁴⁸ Anĩ ere, idi age difouf nigin naab taka to dilen, ere nigin, tamo kayau ganan in od anĩ diroun.

20

Jesus Aim Igirnen Anĩ To Difiyen
(Matyu 21:23-27; Mak 11:27-33)

¹ Naa taka bun, Jesus tempel bun tamo kayau ifelneĩd fen, biya od wogō yen. Agef mog, pris odudug, lo ifelnēdiya tamo, mudur adodo geid, ĩ gein disin.

² Idi diron, “Aim ō igirnō di, ō ereb ereb enĩ ago wof anĩ urokanamã. Aim ō igirnon?”

³ Jesus aitedin yale iron, “Ayag to fiya taka afeneĩf. Solog urokanag,

⁴ Jon naan igunēdin are saa ilun tamal de, tamo bunem?”

⁵ Idi dogo dogol katō de fen, diron, “Ada, ‘Saa ilun tamal,’ tauf are, ĩ to fouf, ‘Ere nigin ā ĩ nigin to momoi wiyēgen?’

⁶ Anĩ ere, ada, ‘Tamo bunem,’ tauf are, tamo kayau ganan meeinem dinadauf, ere nigin, idi Jon ĩ profet den.”

⁷ Anĩ nigin, idi solo de diron, “Ī nain be tamal are amã keleĩ sã.”

⁸ Age de di, Jesus iron, “Ayag ā to arokeneĩf, aim aya igirna di, aya ereb ereb enĩ age afedif.”

Tamo Kabĩ Lo Difedig Nē Yaab Od
(Matyu 21:33-46; Mak 12:1-12)

⁹ Jesus tobol fe, yaab od enei tamo kayau irokenēdin, “Tamo taka wain kabĩ yale, ĩ mala solo yalouf nigin wain kabĩ, kabĩ tamo tunĩ imeid bun ino fen, sain meluk uyu takã ilen.

* 19:38: Sam 118:26 * 19:46: Asaia 56:7 * 19:46: Jeremaia 7:11

¹⁰ Fito fiya sain, ĩ ferfer taka wain kabĩ lo fiya tamo gedin, wain biya tunĩ difeněf nigin sur fen. Anĩ ere, idi ĩ du ken, sur difiyě di, ima sāsā ilen.

¹¹ ĩ ferfer taka sur fen, anĩ ere, idi tamo anĩg du ken, mama difeně di, ima sāsā ilen.

¹² ĩ baban takag sur fe di, idi ĩg darau difen ken, dumeitur diran.

¹³ “Age dife di, wain kabĩ marau iron, ‘Aya ere naig afouf? Aya neu kesu, oboiyou, sur afouf. Idi ĩ anĩ karĩ difiyěf be.’

¹⁴ “Anĩ ere, kabĩ lo fiya tamo idi ĩ dile fen, abob dirokenen. Idi diron, ‘Eĩ ĩ akorouf. Ada ĩ taukeis fen, akor eĩ nedauf.’

¹⁵ Anĩ nigin, idi ĩ wain kabĩ dumeitur dira ken, dukesin.”

Age dife di, wain kabĩ marau naig fediyouf?

¹⁶ ĩ isi, kabĩ lo fiya tamo idenkeis fen, wain kabĩ anĩ tamo tunĩ ifenědiyof.”

Sain tamo kayau od enei karĩ de fen, idi diron, “Enei to bagai agef wō youf!”

¹⁷ Anĩ ere, Jesus idi lo feid le fen, to fedin, “Age fiyauf are, ere gariya nigin Negur nē Itotoya bun eig ye irok:

“ ‘Meein are fō inoya tamom sane de fen, ditoron, meein anĩ gama monog tor wō yen’*?”

¹⁸ Aib taka meein anĩ teten kubũ youf, mereb fe fisik fouf, takag, aib taka meein anĩ ĩ teten kubũ youf, ĩ danĩf aas lauf.”

¹⁹ Lo ifelnědiya tamo, pris odudug geid, Jesus kaisā bagai ironěya nigin naab dimiren, ere nigin, idi kelein, ĩ idi nigin yaab od enei wogō yen. Anĩ ere, idi tamo kayau nigin kumĩ den.

Sisa Takis Ifeněya

(Matyu 22:15-22; Mak 12:13-17)

²⁰ Anĩ nigin, idi Jesus ololo difiye ken, kofo tamo sur difedin, kofo tamo idi idegěya bun madur tamo

gen dilen. Idi Jesus ereb od wogōya bun kũ feně di, diroune ken, Rom gawaman mudur nē lo fiya ado megeir bun dineněf nigin kisi difen.

²¹ Anĩ nigin, kofo tamo Jesus to difiyen, “Tise, amā keleĩ, ogon wogōya ifelněya ado madur. Ō takam in oroya dō wouf nigin wewu yō di, in oroya dō fen, taka wau morō to wenědig, anĩ ere, ō momoi bun Negur nē naab ufelnamādig.

²² Amā Sisa takis mafeněf anĩ lo dō fiya de, sã?”

²³ Anĩ ere, Jesus idi namedin idegěya anĩ ile fen, irokenědin,

²⁴ “Koin moni taka ufelnag. Ai nē malakanon ado itotoya anĩ bun ibodok?”

²⁵ Idi aiten dale diron, “Sisa nē.” Age de di, Jesus idi irokenědin, “Age fiyauf are, Sisa nē are Sisa weněg, Negur nē are Negur weněg.”

²⁶ An Jesus mal atun wogō yen bun, idi ĩ ironěya kisi feleya sã. Idi ĩ solof iron anĩ bunem terefeit de fen, foro delen.

Mata Kel Fāya Bun Ai Nē Kayau Ibodōf?

(Matyu 22:23-33; Mak 12:18-27)

²⁷ Sadusia tamo idi dirōdig, laa bun tamal mata to ke de fã dedig, dedig anĩ tunim, to fiya eig fiya ado Jesus wagen disin.

²⁸ Idi diron, “Tise, Moses itotkanaman, are tamo taka, ne tura laaf fen, aiwa itornen, anĩ ere, kesu sãf are, tamo ĩ kayau waab anĩ yale fen, tura nē kesu diroukeněf.

²⁹ Gama tura tura sewen dibodon. Matu ketem kayau taka yalen, anĩ ere, kesu yaleya sã mog, tamo laa fen.

³⁰ Matu dō fiya bagam kayau anĩ yalen, ĩ laa fe di,

³¹ ĩ dō fiya bagam kayau anĩ yalen, age de dile dile, tura tura sewen ganan kesu sã gare desin.

³² Dum kayau areg laa fen.

³³ Anĩ nigin, dum laa bun tamal mata kel fāya sain bun, ĩ ai nē kayau

* 20:17: Sam 118:22

ibodōf, ere nigin, tura tura sewen anidi adok ī dale dogolen?”

³⁴ Jesus aitedin yale iron, “Gama sain enei bun, tamo kayau yalef, kayau tamo yalef ya ibodok.

³⁵ Anī ere, sain anī bun, idi laa bun tamal mata kel fāya sain bun dibodōf nigin kisi feleya anidi, an tamo kayau yalef, kayau tamo yalef ya sāf,

³⁶ idi baban gare deyag kisi feleya sā, ere nigin, idi engel gen. Idi laa bun tamal mata ke de fā def nigin, idi Negur nē gere tar.

³⁷ Anī ere, arein aa yā wō yen nigin Negur nē Itotoya bun, Moseseg tamo gare den anī mata ke de fā douf nigin ifelnen, ere nigin, ī Odug nigin iron, ‘Abraham nē Negur, Isak nē Negur, Jakop nē Negur.’*

³⁸ Ī laa neid Negur sā, ī mata ibodōya neid Negur, ere nigin, ī bun ganan mata dibodok.”

³⁹ Lo ifelnēdiya tamo tunī aiten dale diron, “Tise, ō de urok!”

⁴⁰ Anī bunem idi kumī de fen, taka nem ereb taka nigin baban Jesus to, to fiyen.

*Ai Nē Kesu Anī Kristus?
(Matyu 22:41-23:7; Mak 12:35-40)*

⁴¹ Age dife di, Jesus idi irokenēdin, “Naig fe di, idi Kristus ī Dawid nē Naal dedig?”

⁴² Dawid ī yogo Buk Sam bun kurō falaisin:

“Negur neu Odug irokenen,
“Imau biya melem ubod mog,

⁴³ ogon kiwai tar

on yē inoya nē sawa anouf.” *

⁴⁴ Dawid ī nigin ‘Odug’ yef, age fiyauf are, naig fe di, ī Dawid naaluouf?”

⁴⁵ Tamo kayau ganan karī difiyē mog, Jesus in dō fiya tar irokenēdin,

⁴⁶ “Lo ifelnēdiya tamo nigin lo welegei. Idi gabar meluluk difonunakel diyo ken, maket modoū bun aan difiyēdiyof anī orodidig. Age de fen, idi Juda neid uub fō bun sia biyai biyai bun dibod ken, tar inoya

bun modoū malabag malabag bun dibodōdig.

⁴⁷ Idi kayau waab idegnēdiya bunem nedi fō sosoin difeid fen, meleid yaleya nigin meluk bagai kosē dedig. Tamo age fediya, mala solo darau sane bagai dalouf.”

21

*Kayau Waab Nē Safina Negur
Ifenēya*

(Mak 12:41-44)

¹ Jesus mala irā, tamo kayau safineid adodo, nedi kolekta moni tempel bogis bun dino mog, iledin.

² Takag, ī lof mog, kayau waab maleg taka isi, peni giriya moni nanaal uru inon.

³ Agef fen, Jesus iron, “Aya ā momoi arokeneik, kayau waab maleg enī ī, ganan wal fediya, odug bagai bogis bun inol.

⁴ Tamo kayau enei ganan, dogo neid safineid bun tamal, nedi kolekta moni dinon, anī ere, kayau anī, maleg bun ī mata ibodōf nē anī ganan inon.”

*Idikeleya Sain Nē Uris
(Matyu 24:1-35; Mak 13:1-31)*

⁵ In dō fiya tar tunī, tempel meein biya biya nem ado, safineid biyai Negur difenen anim, tempel naki difiyen anī nigin wogō den. Anī ere, Jesus iron,

⁶ “Ā ulegef enei nigin, sain fau isiyouf, meein enī taka to abob tete tete yenēf, anī adok fau isog irailauf.”

⁷ Idi to difen, “Tise, ere sain eneidi wō youf? Ere uris anī, eneidi kisi falauf nigin wō youf?”

⁸ Age de di, Jesus iron, “Takam to idegneif nigin lo weleg. Ere nigin, musei aya yanau nem disi dirōf, ‘Aya Kristus,’ takag, ‘Sain mogo melsak.’ Age de di, to dō wiyēdig.

⁹ Ā kusī nigin ado, kantri bun kiwai fen, gawaman narī difef ya karī gouf, ā to tererē gei. Ereb ereb enidi ketem wō youf bagai, anī ere, idikeleya anī, sain anī bun bagai to wō youf.”

* 20:37: Eksodas 3:6 * 20:43: Sam 110:1

10 Age ye fen, Jesus idi irokenēdin, “Teneub taka fā ye fen, ĩ teneub taka nigin kiwai ifenēf, tano taka ĩ tano taka nigin kiwai ifenēf.

11 Mimī odug wowā youf, naū odug ado dagi totul, modoū taka taka bun wowā youf, ereb ereb kumīya nē ado uris odudug, saa bun wowā youf.

12 “Anī ere, eneidi ganan fau to wō ye mog, idi kaka diyei ken, kafī fiya difeneif. Idi Juda neid uub fō bun ado kalabus bun dineneif. Age de fen, ā king ado gawaman mudur adodo meleid bun dirouleyeif, anī ganan aya yanau nigin de fen, age diyeif.

13 Naab enei bunem, ā idi meleid bun, aya nigin kurō wesigouf.

14 Anī ere, ā idi meleid bun aug isenneiya nigin dodok ge fen, to wogō gouf nigin ā kisi ketem ufokeleg.

15 Ere nigin, aya, od ado kisi biya, āgenei kiwai tar takam solof irōya be, kiwai ifenēya kisi feleya sā anī afeneif.

16 Anī ere, ā fau sineĩ temeĩ tarem, tureĩ tarem, sirag ado neĩ mou taremeg kiwai difenei ken, ā tunĩ laa bun dineneif.

17 Tamo ganan, aya yanau nigin de fen, ā kiwai difeneif.

18 Anī ere, mudureĩ bun, fatiyeĩ tekelei bagai to iminkalauf.

19 Megeir ifareya bunem, mata walogouf.

20 “Sain ā Jerusalem kusĩ tamom salili dife mog, ulogouf, ā keleĩ youf, Jerusalem fonou inenēya anī melsak.

21 Age fiya ulogouf, idi Judia distrik bun dibodok, arein diya diselauf, idi taun anī bun dibodok, anenem diyalalauf, idi taun yerin difaref, namen to dilauf bagai.

22 Ere nigin, sain enei are, Negur nē Itotoya bun ibodok ganan kisi falauf nigin darau ifenēya nē sain.

23 Naa anī bun, kayau bouweid ado, kayau kesu su difenek ado, idi meleidlon ado. Teneub anī bun, morō odug wō ye fen, Negur nē didi, tamo kayau enei bun isiyouf.

24 Idi dimig nem didenkeis, kalabus tamo gei difeid fen, teneub ganan bun diroulediyouf. Jerusalem fau haiden Israel sā anidim lalai difeid dile, haiden Israel sā anidi neid sain anī kisi falauf.

25 “Uris gaa bun, ogō bun ado, barisa bun wō youf. Tenebur ein, teneub ganan bun moloun fire bagai fā ye fen, maaĩ gugu re di, idi kisi gurū ye fen, nene douf.

26 Tamo kayau, teneub bun ere wowā youf de fen, kumī de, meleid waĩ youf, ere nigin, saa nē megeir guyoyō douf.

27 Sain anī bun, tamo idi, Tamo Naal lalo bun megeir ado fula fiya medeīya barikā isi mog, dilouf.

28 Ereb ereb enei gariya ino, wō ye di, ufareg fen, mudureĩ utadseg, ere nigin, kel yaleyeīya are melsak.”

29 Age ye fen, Jesus yaab od enei irokenēdin, “Ā aa fig ado aa ganan ulogouf.

30 Sain idi aarau ifiraūd mog, anī ā aug uleg fen, ā keleĩdig, saneya melsak.

31 Age fiya bagai, ereb ereb eneidi wō ye mog, ulogouf are, āg keleĩ youf, Negur nē tano are mogo melsak.

32 “Aya ā momoi arokeneik, tamo kayau sain enei bun dibodok anidi to gare de mog, ereb ereb eneidi ganan wō youf.

33 Saa teneub ado sa kalauf, anī ere, neu od to bagai sa kalauf.

34 “Lo walagauf, sāf are, saafei ge, aai naanuei ge fen, tenebur mata ibodōya nigin sii fiya anim, āgenei wauĩ bun kafī yeĩ di, ā keleĩ sā mog, Negur nē naa kor gen ā bun isiyouf.

35 Naa are, tenebur tamo kayau ganan bun wō youf.

36 Eneidi ganan wowā you fenē anī wal fiya kisi falauf nigin ado, Tamo Naal mala bun ufaragauf nigin, ā faimud ololo wog fen, kosē gouf.”

37 Naa ganan, Jesus tempel bun ifelneid fen, aragau ganan, Moul Arein isel fen, bō an ibodōdig.

³⁸ Age fe di, tamo kayau ganan, tempel bun karī difiyēf nigin, bon-imeī bagai disidig.

22

Judas Jesus Mudur Adodo Imeid Bun Inouf Nigin Yo Yen

(*Matyu 26:1-5; Mak 14:1, 2, 10, 11; Jon 11:45-53*)

¹ Gama Bret Yis Sā Sifa naa, Pasa naa dedig melsā di,

² pris odudug, lo ifelnēdiya tamo geid, Jesus yukesiya nigin naab dimiren, ere nigin, idi tamo kayau nigin kumī den.

³ Age fe di, Satan, Judas, Iskariot tamal dedig, tuwelf dō fiya tar atun taka, ī namen ilen.

⁴ Age fe di, Judas ile, pris odudug ado tempel lo fiya tamo neid uyu irouya bun wō ye fen, idi geid ī naig fe Jesus kiwai imeid bun inouf nigin katō difen.

⁵ Idi od enī karī de, waud al fe fen, ī moni difenēf nigin dirokenen.

⁶ Judas ī yo ye fen, tamo kayau to guru de mog, Jesus idi imeid bun inouf nigin naab imirek ilen.

Jesus In Aposel Geid Idikeleya Nē Bō Saaf Don

(*Matyu 26:17-35; Mak 14:12-31; Jon 13:21-30, 36-38*)

⁷ Anī dumen, Bret Yis Sā anī nē naa wō yen, anī bun idi Pasa naa nigin sipsip naal diden ken, sesewi difedig.

⁸ Jesus, Pita Jon ado sur feid fen, iron, “Uleg, ada Pasa naa nē saaf tāf nigin dodok wanadag.”

⁹ Idi Jesus to difiyen, “Ō, amā nain anī, Pasa naa nē saaf tāf nigin, dodok mafouf anī oroyok?”

¹⁰ Age de di, Jesus idi irokenēdin, “Taun wōg fen, tamo taka darum naan ado isi fotou yeif, ī fō bun ilauf anī dōg uleg.

¹¹ Agog fen, ā fō marau eig wiyēg urokenēgouf, “Tise ō irokonok: Aab nanī bun an, aya neu dō fiya tar geid, Pasa naa nē saaf māf?”

¹² Ago ge di, ī aab odug ilun anī ifelneif, an ereb ereb dodok de bure difelen. An neda nigin dodok gouf.”

¹³ Age ye di, idi dile, Jesus iro-kenēdin kilei ereb ereb age fiya dilen. Anī nigin, idi Pasa naa dodok difen.

¹⁴ Sain wō ye di, Jesus in aposel geid tebol bun dibodon.

¹⁵ Age de fen, Jesus idi irokenēdin, “Aya darau yaleya sā mog, ā geid Pasa naa nē saaf tāf anī orouf bagai.

¹⁶ Ere nigin, aya ā arokeneik, aya baban Pasa naa nē saaf to āf ile, anī fau Negur nē tano bun kisi falauf.”

¹⁷ Age ye fen, ī kap yale, Negur de fiye ken, iron, “Enei waleg fen, ā atun foig.

¹⁸ Aya ā momoi arokeneik, aya baban wain to āf ile, Negur nē tano isiyouf.”

¹⁹ Age ye fen, Jesus bret yale, Negur de fiye ken, mumā fen. Agef fen, ī in dō fiya tar ifeneid fen, iron, “Eī neu bouwau, ā nigin afeneik. Enei agog fen, aya nigin kisi gouf.”

²⁰ Age fiya bagai, saaf bure difel fen, Jesus kap yale, iron, “Kap enei, neu naudou bun, ā Negur geid bar itenēya mata, naudou are ā nigin fi felef.

²¹ Anī ere, taka aya kiwai imeid bun inoyauf, are ein tebol bun urom imamā manof.

²² Momoi, Tamo Naal ī nigin iron kilei agef ilauf, anī ere, tamo ī kiwai ifenek, ī malalon ado.”

²³ Age ye di, idi dogo dogol toti difen, idi atun aim bagai tobonunā enei age fouf.

²⁴ Takag, idi atun aim anī odug bagai ibodōf nigin luwa diroun.

²⁵ Age dife di, Jesus idi irokenēdin, “Haiden neid king, dogo neid tamo kayau lo difedig, idi dogo neid megeir tamo kayau bun yaor difedig, are ada biya difadauf dedig.

²⁶ Anī ere, ā age fiya anī to ago gouf. Age fiya ban, ā atun odug ibodok are, kesu naal gen ibodōf, takag, uyu irouya tamo ī, aruna ya-leya tamo gen ibodōf.

27 Ai anī odug, taka tebol bun ibodok anī de, taka ī aruna yalef anī? Taka ī tebol bun ibodok anī sã de? Anī ere, aya ã atun aruna yaleya tamo gen abodok.

28 ã anī, neu kisi fiya isi di, aya bun toku ufaregen.

29 Neu Dei tano aya ifanan gen, ayag tano ã afeneik.

30 Age afe di, ã neu tanon, tebol bun saaf ado naan wāgauf, king nē sia bun ubodōg fen, Israel ibor tuwelf es gouf.

31 “Simon, Simon, tamo wit biya ado wit ido foi fiya nigin age fedig gen, Satan ī āgenei momoiya kisi yeī fenē nigin to fen.

32 Anī ere, aya, Simon ò nigin ogon momoiya to urofosiyouf nigin kosē aun. Anī nigin, sain ò kelouf, turā tar megeir wediyouf.”

33 Anī ere, Pita aiten yale iron, “Odug, aya ò ado kalabus bun ado, laa bun ileya nigin dodok afel.”

34 Age ye di, Jesus iron, “Pita, aya ò arokonok, gama fau tataro kokorok yeya sã mog, ò wa fen, aya nigin keleī sã wo, towo wouf.”

35 Age ye fen, Jesus idi to fedin, “Sain aya ã moni nē kodol, faa be, su sã sur ayein, ã ere taka lau gen de?” Idi solo de diron, “Sã.”

36 Age de di, Jesus idi irokenēdin, “Anī ere, gama taka ī moni nē kodol adouf, yalouf, faag age fiya, taka ī dimig sã, yogon gabar na nigin sur fe fen, taka na yalouf.

37 Negur nē Itotoya bun eig ye ibodok, ‘Ī tamo sesen geid bagu difedin.’* Aya ã arokeneik, enei aya bun kisi fel, agef wō youf. Ariya, aya nigin itoton are mogo kisi felef.”

38 In dō fiya tar diron, “Ulef, Odug, dimig uru yeir.” Age de di, ī iron, “Are de.”

*Jesus Moul Arein Kosē Yen
(Matyu 26:36-46; Mak 14:32-42)*

39 Agef fen, Jesus aabē tamal ulō yeis fen, gai age fedig gen, Moul

Arein iselen, age fe di, in dō fiya tareg ī dō difiyen.

40 Modoū anī bun wō de fen, Jesus in dō fiya tar irokenēdin, “Kisi fiya bun to kubū gouf nigin kosē wog.”

41 Jesus yogon dō fiya tar itorneīd, meein irā di, ile kubū youn age fiyan ile, ibor bobou fe fen, kosē yen,

42 “Dei, ò oroyōf are, kap enī aya bun walelauf. Anī ere, neu oroya to dō wouf, on oroya dō wo.”

43 Engel taka saa ilun tamal, ī bun wō ye fen, megeir ifenen.

44 Age fe di, Jesus wau morō fatuk fe di, ī total bagai kosē yen, age fe di, maab, naud isidig gen, tenebur kuku ren.

45 Ī kosē yel fen, fã ye, in dō fiya tar gedin kel ile, waud gudū falaisil, den mog, iledin.

46 Agef fen, Jesus idi to fedin, “Ere nigin mulaī wenēgef? ã kisi fiya bun to kuku gouf nigin fafāg fen, kosēg.”

*Jesus Dirounen
(Matyu 26:47-56; Mak 14:43-50;
Jon 18:3-11)*

47 Jesus fau wogō ye mog, tamo musei disin, tuwelf in dō fiya tar idi anī atun taka, Judas dedig inim uyu iroukenēdin. Ī Jesus umā fiyēf nigin non ilen.

48 Anī ere, Jesus ī to fiyen, “Judas, ò umāya bunem Tamo Naal kiwai wenēf de?”

49 Sain Jesus nē dō fiya tar, ereb wō you fenē age fe di, dile fen, idi diron, “Odug, amā nemā dimig nem madenauf de?”

50 Age de fen, idi takam, pris mudur ado nē ferfer weder biyalē anī salōf iran.

51 Anī ere, Jesus iron, “Baban enei to ago gouf!” Age ye fen, ī tamo anī nē weder kobūf fen, el fiyen.

52 Agef fen, Jesus, pris odudug, tempel lo fiya tamo neid uyu irouya geid, mudur adodo, ī nigin disin anī irokenēdin, “ã bē tamo ounēgouf gen, ã dimig adodo seburer adodo usigef de?”

* 22:37: Asaia 53:12

⁵³ Naa ganan, aya ã geid tempel bun tabodon, anĩ ere, ã aya bun imeĩ taka to unogen. Anĩ ere, eĩ ãgenei sain, are gugum irouneik nigin.”

Pita Jesus Nigin Wa Fen

(*Matyu 26:57, 58, 69-75; Mak 14:53, 54, 66-72; Jon 18:12-18, 25-27*)

⁵⁴ Idi Jesus dale, diroune ken, pris mudur ado nẽ fõ bun dirou dilen. Pita ã so rel fen, dumeid dõ fen.

⁵⁵ Anĩ ere, sain idi fofomala atun yã kũ de dibodon, Pita ãg an weim dibodon,

⁵⁶ Kabĩ kayau momoul taka, Pita yã sirin ibod mog, ilen. Kayau momoul anĩ Pita lo fel fen, iron, “Tamo eneig ã geid.”

⁵⁷ Anĩ ere, Pita waf fen, iron, “Kayau, aya ã keleĩ sã.”

⁵⁸ Sain naal ile di, taka nem ã ile fen, iron, “Õg idi neid taka.”

Anĩ ere, Pita iron, “Mou, aya sã!”

⁵⁹ Aua tekelei age fiya ile di, taka bagam ã nigin total iron, “Momoi bagai, tamo eneig ã geid diyon, ere nigin, ãg Galili tamal.”

⁶⁰ Anĩ ere, Pita aiten yale iron, “Tamo, õ urok anĩ aya keleĩ sã!” ã irõ mog bagai, tataro kokorok yen.

⁶¹ Odug falei yel, Pita lo felen. Age fe di, Pita Jesus wogõ fiyen anĩ nigin weder fokõ yen, “Gama fau tataro kokorok yeya sã mog, õ aya nigin wa wo, towo wouf.”

⁶² Age fe di, ã mayarẽ ile fen, inã fatuk yalen.

Kusĩ Tamo Jesus Diselinen

(*Matyu 26:67, 68; Mak 14:65*)

⁶³ Tamo Jesus dirounen idi, ã diseline ken, wagĩ difiyen.

⁶⁴ Age dife fen, idi Jesus mala difofakel fen, to difiyen, “Kurõ weis urokanamã! Aim õ inok?”

⁶⁵ Age de fen, idi kono fiya od musei dirokenen.

Jesus Juda Kaunsel Neid Kot Mala Bun Ifaren

(*Matyu 26:59-66; Mak 14:55-64; Jon 18:19-24*)

⁶⁶ We fele di, tamo kayau neid mudur adodo neid kaunsel, are pris

odudug, lo ifelnēdiya tamo geid, weim guru de mog, Jesus idi gedin dirou dilen.

⁶⁷ Idi diron, “Õ Kristus ouf are, amã urokanamã.”

Anĩ ere, Jesus aitedin yale iron, “Aya ã arokeneif are, ã to momoi gouf,

⁶⁸ agef fen, aya ã to ayeifeg, ã to solog urõgouf.

⁶⁹ Anĩ ere, gama sain enei bunem ilauf ganan, Tamo Naal ã, Negur megeir ado ima biyalem ibodõf.”

⁷⁰ Age ye di, idi ganan to difiyen, “Age fouf are, õ anĩ Negur Naal de?”

ã aitedin yale iron, “ã de urõgef, aya anĩ.”

⁷¹ Age ye di, idi diron, “Ere nigin ada, ã nigin od megeir fiya nigin tamo baban tamirëf? Ada ã sigoron bagai karĩ taul.”

23

Jesus Pailat Herod Ado Meleid Bun Ifaren

(*Matyu 27:1, 2, 11-26; Mak 15:1-15; Jon 18:28-19:16*)

¹ Age de fen, guru fiya ganan fã de, Jesus Pailat bun dirou dilen.

² Age de fen, idi mogo gariya dino, ã bouwa bun od du ken, diron, “Amã, tamo enei nemã tamo kayau ganan idegēya bunem sanen guri feid irou ile mog, mailen. ã Sisa takis ifenēya nigin katũ fiyeid fen, ã yogo nigin aya Kristus, aya king yen.”

³ Anĩ nigin, Pailat Jesus to fiyen, “Õ Juda neid king de?” Jesus solof iron, “Are de yer, õ urok anĩ.”

⁴ Age ye di, Pailat ã, pris odudug, tamo kayau geid irokenēdin, “Aya tamo enei bou bun mosor taka to ailel.”

⁵ Anĩ ere, idi total dinon, “ã Judia distrik ganan bun, in ifelnēya bunem tamo kayau waud yalen. ã Galili an gariya ino fen, tokõ fel eineg isin.”

⁶ Pailat anĩ karĩ ye fen, ã Galili tamal be anĩ to fen.

⁷ Pailat ã, Jesus Herod nẽ tano bun tamal yeya kelei ken, Herod gein sur

fen, Herod ĩg sain anĭ bun Jerusalem ibodon.

⁸ Herod Jesus ile fen, wau fatuk kulĭ yen, ere nigin, sain meluk bagai ĩ ileya nigin oron. ĩ nigin karĭ yen nigin, Herod ĩ Jesus bun memelik tunĭ ilouf nigin age fen.

⁹ Herod Jesus musei bagai to fiyen, anĭ ere, Jesus taka to solof iron.

¹⁰ Pris odudug, lo ifelnēdiya tamo geid an difaren, ĩ bou bun od total bagai dinon.

¹¹ Age dife di, Herod yogon kusĭ tamo geid, Jesus kasā difiye ken, kono difiyen. Age dife fen, kolos biya difounne ken, Pailat wagen sur difiyē di, kel ilen.

¹² Naa anĭ bun, Herod Pailat ado nival dun, uruwa bun idi uruwom kiwain.

¹³ Pailat ĩ, pris odudug, mudur adodo, tamo kayau geid iweigneĭd fen,

¹⁴ irokenēdin, “Ā tamo enei, tamo kayau waud yale fen, sane nigin weleid inon ge fen, waleg, urou usigel. Aya ā meleĭ bun to afiyem, anĭ ere, ā ĩ bou bun od unogen anĭ, tamo enei bun gariya taka to ailel.

¹⁵ Herod ĩg age fiya, anĭ nigin, ĩ kel sur fe di, ada gein isil. Anĭ ulogouf, ĩ yukesiya nigin ereb sane taka to age fen.

¹⁶ Anĭ nigin, aya darau dogol afen ken, atornēf.”*

¹⁸ Anĭ ere, idi sigoreid takai fen, diweig diron, “Tamo enei ukesiyouf! Barabas walis kanamā!”

¹⁹ (Barabas ĩ anĭ taun oun kusĭ yales fen, tamo yukesin nigin, kalabus bun dinenen.)

²⁰ Pailat, Jesus yalishnēya nigin baban total bagai irokenēdin.

²¹ Anĭ ere, idi baba baban diweig diron, “Aa tetek bun ũf! Aa tetek bun ũf!”

²² Age de di, Pailat ĩ irō, towo fen sain bun anĭ irokenēdin, “Ere nigin? Tamo enei, ere mosor inon? Aya ĩ yukesiya nē gariya anĭ, ĩ bun taka to

ailel. Anĭ nigin, aya ĩ darau afen ken, atornēf.”

²³ Anĭ ere, idi aiteid odudug fen, ĩ aa tetek bun yŭf nigin, baba baban dirokenen. Age dife di, dogo neid aitedim, Pailat nē od lai difiyen.

²⁴ Anĭ nigin, Pailat, nedi oroya dō fiya nigin kisi yale fen, irokenēdin.

²⁵ Pailat ĩ, tamo kusĭ yales fen, tamo yukesi di, kalabus bun dinenen ĩ nigin tamo kayau to difiyen anĭ, yalishne ken, dogo neid oroya dō difouf nigin Jesus ifenēdin.

Jesus Aa Tetek Bun Dun
(*Matyu 27:32-44; Mak 15:21-32; Jon 19:17-27*)

²⁶ Idi Jesus dirou dile fen, Simon Sairini tamal, ĩ yogon fonom isi mog, luwen ĩ dale, aa tetek orowa se dife di, faali fe, Jesus dō fen.

²⁷ Tamo kayau musei, kayau idi ĩ nigin waud gudŭf fen, inā dalen geid, dō difiyen.

²⁸ Anĭ ere, Jesus idi bun falei yel, idi irokenēdin, “Jerusalem nē barai tar, aya nigin inā to waleg, ā aug nigin ado gereĭ tar nigin inā waleg.

²⁹ Ere nigin, sain fau isiyouf bun, idi dirōf, ‘Kayau dali, kayau fau kesu gō fiya sā, kayau kesu su ifenēya sā anidi el fedif!’

³⁰ Age de fen,
“ ‘idi arei dirokenēdiyof, “Teteman kukug!”

are mu du dirokenēdiyof,
“Kerub wamāg!” ”*

³¹ Tamo, aa mata mog, enei age difedif are, meti youf sain bun, ere wō youf?”

³² Lo wal fiya tamo uru idig, ĩ geid laa bun dinenēdiyof nigin dirou dilen.

³³ Sain idi modoŭ yana Mudur Tuwan dedig wō de fen, an Jesus aa tetek bun dun, lo wal fiya tamo uru geid, taka biya melem, taka ki melem.

³⁴ Age dife di, Jesus iron, “Dei, idi neid mosor nigin weder tu kel, ere

* **23:16:** Itotoya tunĭ eig de ditoton: atornēf.” ¹⁷ Gama ĩ, kalabus bun tamal tamo taka, Sifa bun yalis kenēdiyof bagai. * **23:30:** Hosia 10:8

nigin, idi keleĩ sa ken, enei age difef.” Age fe di, idi aisaĩ kodẽ de fen, yogon kolos idi atun foifu difen.

³⁵ Tamo kayau difar fen, lo difeid mog, mudur adodomeg ĩ kasã difiyẽ diron, “Ĩ tunĩ isennẽdin, ĩ Kristus Negur igrnen ouf are, utornẽg len, yogo bouwa isennẽf.”

³⁶ Kusĩ tamog dise fen, diselinen. Idi wain makik ado difen ken,

³⁷ diron, “Õ Juda neid king ouf are, ogo boũ usennẽf.”

³⁸ ĩ muduren itotoya eig ya yenen: EĨ JUDA NEID KING.

³⁹ Lo wal fiya tamo aa tetek bun difaren anĩ takam, Jesus kono fiyẽ iron, “Õ Kristus ouf are, õ ogo usenne ken, amã usennamãf!”

⁴⁰ Anĩ ere, lo wal fiya tamo taka im, ne tã ou fiye ken, iron, “Õ kafĩ fiya tekelei walef, anĩ ere, õ Negur to kumĩ wiyek de?”

⁴¹ Ada urom darau talef, are de, ere nigin, ada urom sane age tafen anĩ mala solo. Anĩ ere, tamo enei ereb sane to age fen.”

⁴² Age ye fen, ĩ Jesus irokenen, “Jesus, sain õ ogon tano bun usel fen, aya karĩ wiyalauf.”

⁴³ Age ye di, Jesus tamo anĩ iroke-nen, “Aya õ momoi arokonok, gama õ aya ado paradis bun tabodõf.”

Jesus Laa Fen

(*Matyu 27:45-56; Mak 15:33-41; Jon 19:28-30*)

⁴⁴ Gaa atun tuwelf kilok age fiya bun, teneub ganan bun gugum kelef ile, tri kilok aragaun,

⁴⁵ ere nigin, gaa mala ifokelen. Age fe di, tempel nẽ gabar anĩ atusil serek fe, uru wõ yen.

⁴⁶ Jesus ait odug nem iweig iron, “Dei, neu uur õ imã bun anof.” Agef iro ken, ĩ oboi irour yalen.

⁴⁷ Kusĩ tamo neid orowa, Jesus age fiya ile fen, Negur yana yales iron, “Momoi, tamo eĩ madur tamo.”

⁴⁸ Tamo kayau ganan idi lo fiya nigin guru difen, ereb anĩ wõ ye di,

meledim dilen, are idi waud gudũf fen, akoreid du ken, firagagaũ difen.

⁴⁹ Anĩ ere, idi Jesus keleĩ anidi ganan, idi atun kayau Galilim ĩ dõ de disin anidig, so del difar fen, eneidi wõ ye di, lo difen.

Jesus Mũ Difen

(*Matyu 27:57-61; Mak 15:42-47; Jon 19:38-42*)

⁵⁰ Tamo taka yana Josef, ĩ kaunsel taka, madur tamo biya bagai,

⁵¹ anĩ nigin, ĩ idi neid tobonuneid ado od difon anĩ nigin to yo yen. ĩ Judia distrik bun Arimatea taun tamal, ĩ Negur nẽ tano isiyouf anĩ tari fen.

⁵² Josef ĩ, Pailat gein ile, Jesus bou buru yalouf nigin to fiyen.

⁵³ Agef fen, ĩ Jesus bou buru yale, irou isil, gabar lalau nem silef fen, matmat sa bun ku dalen an inenen, ku anĩ bun an taka to dinenen.

⁵⁴ Naa anĩ dodok fiya naa, Sabat naa mogo gariya inou fenẽ melsã.

⁵⁵ Kayau Jesus geid Galilim disin, Josef dõ de, matmat ado, Jesus bouwa buru naig de dinof anĩ, lo difen.

⁵⁶ Age difel fen, idi fonõ dile, bou wã fiya nẽ marasin ado moul sumeĩ biya bagai dodok difen. Anĩ ere, idi Sabat naa nigin ĩtãfiya dõ de fen, si dinon.

24

Jesus Mata Kel Fã Yen

(*Matyu 28:1-10; Mak 16:1-8; Jon 20:1-10*)

¹ Uub nẽ naa matu bun* bonimeĩ bagai mumurei ado, kayau idi, bou wã fiya nẽ marasin dodok difen anĩ dale fen, matmat bun dilen.

² Age dife fen, idi matmat bun meein wele feleya dilen.

³ Anĩ ere, sain idi meku namen dilen, idi Odug Jesus nẽ bouwa buru an to dilen.

⁴ Idi enei nigin kisi musei dale mog bagai, tamo uru kolos medeĩya barikã siridin difaren.

* **24:1:** Are Sande.

⁵ Age dife di, kayau kumĩ de fen, kususu de, teneub lo difen, anĩ ere, tamo idi kayau dirokenēdin, “Ā ere nigin laa atun mata tamo umirnēgef?

⁶ Ī ein sã, ĩ mogo fã yel! Ī Galili oun ã geid ubodōg fen, irokenein anĩ, wedereĩ fokō youf,

⁷ ĩ iron, “Tamo Naal mosor adodo imeid bun dino di, ĩ aa tetek bun dukesiyouf, age dife di, naa towo bun, ĩ baban mata kel fã youf.’ ”

⁸ Age de di, kayau idi, in od anĩ wedereid fokō yen.

⁹ Sain idi matmat bunem ke de, disi fen, aposel ilewen tunĩ ganan geid, enei ganan wogō difiyēdin.

¹⁰ Kayau idi are Maria Magdala tamal, Joana, Maria Jems nē sina. Kayau anidi, kayau tunĩg geid, enei aposel wogō difiyēdin.

¹¹ Anĩ ere, idi kayau nigin to momoi den, ere nigin, kayau neid od, idi bun auya gen.

¹² Anĩ ere, Pita fã yale, matmat bun gudu re ilen. Ī ku bun itin, gabar lalau dogol yen mog, ilen, agef fen, ereb anĩ wō yen anĩ nigin, ĩ kisi musei yalef ile, yogon fō bun ilen.

*Emaus Naab Luwen
(Mak 16:12, 13)*

¹³ Naa de anĩ bun, idi neid tamo uru, fonō taka yana Emaus dilen, Jerusalem anenem Emaus are ilewen kilomita age fiya.

¹⁴ Idi urom, ereb ereb ganan wō yen anĩ abob dirokenek dilen.

¹⁵ Idi eneidi nigin diro ken, katō de dile mog, Jesus yogo isi, weim diyok dilen.

¹⁶ Anĩ ere, idi Jesus keleĩa nigin meleid ifofakelen.

¹⁷ Age dife di, Jesus idi to fedin, “Ā ere nigin naab luwen katō ge usigef?” Idi dē del fen, idi neweid wau gudū fiya ado agogon delen.

¹⁸ Idi taka yana Kleopas Jesus solof irokenen, “Ō ege Jerusalem nē ki tamo nigin, naa eneidi bun an ereb ereb wō yen anĩ, ō keleĩ sã de?”

¹⁹ Age ye di, Jesus idi irokenēdin, “Ere bagai?” Idi Jesus dirokenen, “Jesus Nasaret tamal nigin. Ī profet taka, Negur ado tamo kayau ganan meleid bun, od ado tobonunã bun megeir barikã.

²⁰ Pris odudug, neda mudur ado idim, ĩ laa bun dinenēf nigin imeid bun dino di, aa tetek bun dukesin.

²¹ Anĩ ere, amã waumã iron, im anĩ Israel tamo kayau kel gei fouf maun. Anĩ dogol sã, enei ganan wō yen are, gama naa eneim mogo naa towo ilef.

²² Takag, amã nemã kayau tunĩg, amã terē difamam. Gama bonimeĩ bagai, idi matmat bun dilel,

²³ anĩ ere, idi yogon bouwa buru to dilel. Idi dile, meleid seleulã kurãf fen, engel diledin, engel idi dirokenēdil, Jesus ĩ mata ibodok, difiyēdi di, disi, amã dirokanamam.

²⁴ Age de di, amã tunĩ matmat bun dile, kayau wogō del gen bagai dilel, anĩ ere, idi Jesus to dilel.”

²⁵ Jesus idi irokenēdin, “Ā neneya bagai, ã profet wogō den anĩ ganan, wauĩ bun momoiya nigin folo reya bagai!

²⁶ Kristus ĩ darau enei yale fen, yogon fula fiya medeĩa namen to ilauf de?”

²⁷ Age ye fen, ĩ Moses ado profet ganan neid itotoya bunem gariya ino fen, yogo nigin Negur nē Ito-toya ganan bun ibodok anĩ, idi faded fedin.

²⁸ Idi fonō dilef nē anĩ kelē difiye ken, Jesus tokō feleya nigin suma ino genen.

²⁹ Anĩ ere, idi total bagai dirokenen, “Amã geid tabodōf, ere nigin, gaa mogo kuru kelef, gugum irousif.” Anĩ nigin, Jesus idi geid dibodōf nigin namen ilen.

³⁰ Sain ĩ idi geid tebol bun dibod ken, ĩ bret yale, Negur de fiyē, mumãf fen, gariya ino ifenēdin.

³¹ Age fe di, idi meleid fara fele di, idi Jesus nigin kelein. Age dife di, ĩ idi meleid bun iminkelen.

³² Idi abob dirokenen, “Sain ĩ naab luwen wogō fada fen, Negur

nē Itotoya faraf ifelnadal mog, ada namedan wauda to tōf yalel de?”

³³ Age de fen, idi fā de dale, kaisā bagai Jerusalem keku de dilen, an idi aposel ilewen, tamo tunī idi geid, guru de difar mog, fotou difedi di,

³⁴ diron, “Are momoi! Odug fā ye fen, Simon bun wō yen.”

³⁵ Age de di, tamo uru ereb naab luwen wō yen ado, Jesus ī bret mumā fe di, idi Jesus nigin naig de kelein anī wogō den.

*Jesus In Dō Fiya Tar Bun Wō Yen
(Matyu 28:16-20; Mak 16:14-18;
Jon 20:19-23; Aposel 1:6-8)*

³⁶ Idi fau enei nigin wogō de mog, Jesus yogo idi atun ifar fen, irokenēdin, “Wau inosiya ā ado ibodōf.”

³⁷ Idi baraū mailef de fen, terē de fen, kumī den.

³⁸ Age dife di, Jesus idi irokenēdin, “Ere nigin ā wauī morō fef, ere nigin ā wauī bun kisi uru wō yef?”

³⁹ Aya imau yeu ado feleg. Eī aya yug bagai! Kobū wiyag fen, uleg. Baraū ī aya bouwau ado, tuwau ado uleyagef gen sã, ī bou sã, tuwa sã.”

⁴⁰ Jesus enei iro ken, ī ima ye ado ifelnēdin.

⁴¹ Age fe di, idi waud kulīya ado terēya bunem, fau waud to momoi de di, Jesus idi to fiyēdin, “Ā ereb yōya nē taka ein tau ado?”

⁴² Idi gau yā tamal masak taka difenen,

⁴³ age dife di, Jesus gau yale, meledin yon.

⁴⁴ Jesus idi irokenēdin, “Enei are, aya fau ā geid tabodon sain bun aro-kenein. Ereb ereb ganan, aya nigin Moses nē Lo bun, profet neid itotoya bun ado, Buk Sam bun ditoton anī ganan kisi falauf bagai.”

⁴⁵ Agef fen, Jesus idi Negur nē Itotoya keleī youf nigin, waud kā fenēdin. 4624

⁴⁶ Ī idi irokenēdin, “Negur nē Itotoya bun eig ye irok: Kristus ī fau darau yale fen, laa bun tamal naa towo bun mata kel fā youf,

⁴⁷ age fe di, wau faleiya ado, mosor nigin weder tu keleya nē od anī, fau ī yana bunem teneub ganan bun, Jerusalem anenem gariya dino fen, wogō de dilauf.

⁴⁸ Ā enei ulegen nigin kurō walaisi gouf.

⁴⁹ Aya esel fen, neu Dei sur afouf yen anī, ā bun sur afouf, anī ere, taun anī bun ubodōgef uleg, ā megeir saa ilun tamal anim ifounneif.”

Jesus Saa Ilun Iselen

(Mak 16:19, 20; Aposel 1:9-11)

⁵⁰ Sain Jesus idi gurif irou, Betani non dilen, an ī ima yales fen, el fiya ifenēdin.

⁵¹ Ī idi el feid le fen, ī itornēdi di, saa ilun irou iselen.

⁵² Age fe di, idi ī yana dales fen, waud kulīya odug ado, Jerusalem ke de dilen.

⁵³ Age de fen, idi tempel bun toku dibod ken, Negur yana dalesedig.

Jon

Od Anī Tamo Wō Yen

¹ Gariya bun Od anī ibodon, Od anī Negur ado dibodon, Od anī Negur.

² Gariya bun ī Negur ado dibodon.

³ Ī bunem ereb ereb ganan inon, Od anī sā bun ereb inodin taka to ibodok.

⁴ Mata ī bun ibodon, mata anī tamo neid fula fiya.

⁵ Fula fiya anī gugum bun lalan ifenek, anī ere, gugum ī fula fiya anī to kelein.

⁶ Tamo taka Negurem sur fe di, isin, ī yana Jon.

⁷ Ī fula fiya anī yaor fe, kurō fesiyouf nigin isin, are tamo kayau ganan ī bunem momoi douf nigin age fen.

⁸ Ī anī fula fiya sā, ī fula fiya anī kurō fesiyouf nigin isin.

⁹ Fula fiya bagai yogo tamo kayau ganan lalan ifenēdif, ī tenebur isin.

¹⁰ Ī teneub bun ibodon, are ī bunem teneub inon, anī ere, tamo kayau tenebur ein, ī to kelein.

¹¹ Ī yogon bagai anidi bun isin, anī ere, yogon bagai anidi ī to daleyen.

¹² Anī ere, idi ī daleyen, ī yana nigin momoi den anidi bun, Negur idi Negur nē gere tar wowā douf nigin igirnēdin.

¹³ Sina tama nē naud bunem to Negur gere tar wowā den, bouwa nē oroya bunem sā, tamo nē wau irōya buneg sā, anī ere, Negur yogo age fe di, wowā den.

¹⁴ Od anī tamo wō ye fen, ada atun ibodon. Ada yogon fula fiya medeīya tailen, fula fiya medeīya are Naal Tekelei Yogo Dogol nē, ī Tama bun tamal wau ifenēya ado momoi barikā isin.

¹⁵ Jon ī nigin kurō falaisi wogō yen. Ī igeig fen, iron, “Ī enei nigin aya arokenein, “Taka ī aya dumeun isif, ī aya wal fiyaya, ere nigin, ī ket ibodon.’ ”

¹⁶ In wau ifenēya barikā bunem, ada adok el fiya tale fen, anī teten el fiya musei talen.

¹⁷ Are Moses bunem lo anī talen, anī ere, wau ifenēya ado momoi anī, Jesus Kristus bunem isin.

¹⁸ Taka nem Negur to bagai ilen, anī ere, Negur Naal Tekelei Yogo Dogol, ī Tama wagen ibod ken, ī nigin yaor fen.

Jon Naan Igunēdiya Tamo Ī Yogo Nigin, Aya Kristus Sā, Yen

(Matyu 3:1-12; Mak 1:1-8; Luk 3:1-18)

¹⁹ Juda tamo Jerusalem temeleid idim, pris tunī, Lewi nē ibor geid sur difedi di, Jon ī aim yeya anī to difiyē di, Jon ī eig ye kurō fesin.

²⁰ Ī wa fiya sā, kurō falaisi, “Aya Kristus sā,” yen.

²¹ Idi ī to difiyen, “Age fiyauf are, ō ai? Ō Eliya de?”

Ī iron, “Aya ī sā.”

Idi diron, “Ō Profet amā tari mafef anim de?”

Ī iron, “Sā.”

²² Age ye di, idi diron, “Ō ai bagai? Ō amā urokanamā len, idi amā sur difaman anidi gein ke ma malauf. Ō ogo nigin ere wof?”

²³ Jon profet Asaia nē od bun solof iron, “Aya anī, ait taka gerere tuan igeig irok, ‘Odug nē naab madur gouf.’ ”*

²⁴ Farisia tamo tunī sur difedin anidim

²⁵ to difiyen, “Ō Kristus sāf, Eliya sāf, Profet anī sāf are, ere nigin naan ugunēdif?”

²⁶ Jon aitedin yale iron, “Aya naan nem naan agunēdif, anī ere, ā atun, taka ā keleī sā anī ifaref.

²⁷ Ī anī aya dumeun dō fiyaf, aya to biya nigin, in ye su nē malū biru fediya kisi feleya sā.”

²⁸ Enei ganan Betani oun Jordan naan sitakā, Jon naan igunēdin nē an wō yen.

Jesus, Negur Nē Sipsip Naal

* 1:23: Asaia 40:3

29 Naa taka di, Jon, Jesus wagen iyok isi mog, ile fen, iron, “Ulegef, Negur nē Sipsip Naal, ĩ tamo ganan neid mosor yaledidif!

30 Enei nigin au fen, oron, “Taka ĩ aya dumeun isif, ĩ aya wal fiyaya, ere nigin, ĩ ket ibodon.”

31 Aya yug ĩ keleĩ san, anĩ ere, aya asi, naan nem naan agunēdif nē gariya are, Israel tamo kayau bun ĩ yaor foug nigin.”

32 Age ye fen, Jon enei kurō feis iron, “Aya, Awa Uur saa ilun tamal kuburir gen isi, ĩ bun ibod mog, ailen.”

33 Aya ĩ to kelein, anĩ ere, taka ĩ, aya naan nem naan agunēdiyof nigin sur fiyan im irokanan, “Tamo anĩ, Awa Uur isi, ĩ bun ibod mog, ulouf, im Awa Uur Fateul nem naan igunēdiyof.”

34 Aya ailen nigin kurō afeis, ‘Eĩ Negur Naal,’ auf.”

Jesus In Dō Fiya Tar Uyulil Iweignēdin

35 Naa taka di, Jon, in dō fiya tar uru geid, baban an difaren.

36 ĩ, Jesus isi ile di, ile fen, ĩ iron, “Ulegef, Negur nē Sipsip Naal!”

37 Sain Jon nē dō fiya tar uru enei karĩ de fen, idi Jesus dō difiyen.

38 Jesus falei yel, idi ĩ dō difiyē mog, ile fen, to fedin, “Ā ere oroyeik?”

Idi diron, “Rabi (anĩ nē gariya, Tise), õ nain ubodōdig?”

39 ĩ iron, “Umag fen, ulogouf.”

Age ye di, idi dile, ĩ ibodōdig anĩ dile fen, naa anĩ bun, ĩ geid dibodon. Are aragau fo kilok age fiya.

40 Endru, Simon Pita ne tura ĩ, idi uruwom ereb Jon wogō yen anĩ karĩ de fen, Jesus dō difiyen anĩ taka.

41 Erebu uruwa Endru age fen are, ĩ tura Simon imir ile fen, irokenen, “Amã Mesia (anĩ Kristus) fotou mafen.”

42 Age ye fen, Endru, Pita Jesus wagen irou ile di,

Jesus Pita lo fiye ken, iron, “Õ Simon, Jon naal. Õ yanã Sifas douf” (Sifas falei fiyauf are, Pita).

Jesus Filip Nataniel Ado Iweignēdin

43 Naa taka di, Jesus Galili ileya nigin kisif fen, Jesus Filip fotou fiye ken, irokenen, “Aya dō wiya.”

44 Filip ĩ, Endru Pita ado geid, Bet-saida taun temeleid.

45 Filip Nataniel fotou fiye ken, ĩ irokenen, “Amã ĩ nigin Moses nē Lo bun itoton ado profet idig ditoton, Jesus Nasaret tamal, Josef naal anĩ, fotou mafen.”

46 Nataniel to fen, “Nasaret! Erebu biya taka, anenem wōya nigin kisi feleya de?”

Filip iron, “Usi ule.”

47 Sain Jesus Nataniel non iyok isi mog, ile fen, ĩ nigin iron, “Eĩ Israel tamo bagai, ĩ bun ereb idegēya taka sã.”

48 Nataniel Jesus to fiyen, “Naig wo fen, õ aya keleĩ?”

Jesus aiten yale iron, “Aya õ Filip iweignōya sã mog, aa fig farumen ubod mog, ailiyon.”

49 Age ye di, Nataniel Jesus irokenen, “Rabi, õ Negur Naal, õ Israel neid King.”

50 Jesus iron, “Aya õ aa fig farumen ailiyon aul nigin, õ momoi wof. Õ anĩ wal fiya ereb ereb odug ulouf.”

51 ĩ tobol fe iron, “Aya ã momoi bagai arokeneik, ã, saa bobog kã fele di, Negur nē engel Tamo Naal bun diselef disif dife mog, ulogouf.”

2

Jesus Irō Di, Naan Wain Falei Felen

1 Naa uru bure fele di, naa towo bun, tamo kayau ado bagu fiya, Galili distrik oun Kana fonō wō yen. Jesus sinag an ibodon.

2 Jesus in dō fiya tar geid idig, tamo kayau ado bagu fiya bun diweignēdin.

3 Sain wain sa kele di, sinam Jesus irokenen, “Idi wain taka sã.”

4 Jesus iron, “Kayau, õ ere nigin aya kababal wiyaf? Neu sain fau isiya sã.”

5 Jesus sina, kabĩ tamo irokenēdin, “Ereb ĩ irokeneĩf anĩ dōg, ago gouf.”

⁶ Nodin meein gulub sigis naan ifotūya nē difaren, are Juda neid to-bonuneid bun imeid kulo fiya nigin, idi teke tekelei 100 lita age fiya naan iroudig.

⁷ Jesus kabī tamo irokenēdin, “Gulub bun naan utinēdig.” Age ye di, idi ditineid eweid gere fesedin.

⁸ Age difele di, Jesus idi irokenēdin, “Gama tunī lolob ge fen, sifa marau uroule kenēg.”

Age ye di, idi age difen.

⁹ Sifa marau naan wain falei fen anī yō ilen. Ī wain anī nainenem be isin anī to kelein, anī ere, kabī tamo naan lolob difen idi kelein. Agef fen, sifa marau ĩ, kayau marau yerin iweignē, ile di,

¹⁰ irokenen, “Ganan idi wain biya anī ket dirousi di, tamo disif idi anī fatuk dō mog, to biya gen anī dum dirousidig, anī ere, ō biya bagai urou ubodom anī, gama bagai urousif.”

¹¹ Jesus memelik gariya inon are enei bun, oun Galili distrik Kana fonō. Anī bun, ĩ yogon fula fiya medeīya yaor fe di, yogon dō fiya tar dogo neid momoia ĩ bun dinon.

Jesus Tempel Waī Fen

(*Matyu 21:12, 13; Mak 11:15-17; Luk 19:45, 46*)

¹² Enei bure fele di, Jesus ĩ, sina, tura tar ado, yogon dō diya tar geid, Kapenaum disilen. An naa musei to dibodon.

¹³ Juda neid Pasa naa sain melsā mog, Jesus Jerusalem iselen.

¹⁴ Tempel modoū bun, tamo, bulmakau, sipsip ado, kuburir na sur difeid fen, tunīg tebol bun dibod ken, moni solo de mog, ile din.

¹⁵ Anī ile fen, ĩ malū nem wip inon, agef fen, tempel modoū bun tamal, sipsip ado bulmakau ganan irudi di, serē dilelen, ĩ moni solo fiya tamo neid koin moni daūf firagagaū fe fen, ĩ dogo neid tebol yale, falei feledin.

¹⁶ Idi kuburir na sur difen anī irokenēdin, “Eneidi ein waleledig, neu Dei nē fō anī maket modoū to unog!”

¹⁷ Dum in dō fiya tar, eig ye itotoya anī nigin wedereid fokō yen, “Ogon fō nigin wau itenēya anim nameun isainaf.”*

¹⁸ Age ye di, Juda tamo Jesus diro-kenen, “Ere memelik anī ufelnamā di, enei ganan agof anī nigin ō igirīya ado mauf?”

¹⁹ Jesus idi irokenēdin, “Tempel enei narī weleg len, naa towo bun baban alesauf.”

²⁰ Juda tamo diron, “Tempel enei dinon are, foti-sigis yar yalen, anī ō naa towo bun walesauf de?”

²¹ Anī ere, tempel ĩ wogō yen are, yogo bouwa nigin.

²² Ī laa bunem kel fā yen anī bure fele di, in dō fiya tar, ĩ iron anī, wedereid fokō yen. Anī bunem, idi Negur nē Itotoya ado Jesus wogō yen anī nigin momoi den.

²³ Gama ĩ Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ĩ yana nigin momoi den.

²⁴ Anī ere, Jesus ĩ yogo bagai, idi nigin to momoi yen, ere nigin, ĩ tamo ganan nigin keleī.

²⁵ Jesus ĩ, tamo takam taka nigin ĩ irokenēya anī kisi feleya san, ere nigin, ereb tamo name bun ibodok, ĩ yogo keleī.

3

Jesus Nikodemus Ifelnen

¹ Farisia tamo taka, yana Nikodemus ibodon, ĩ Juda uyu irouya neid kaunsel taka.

² Ī bō Jesus wagen isi fen, iron, “Rabi, amā keleī, ō tise Negur bunem usin. Ere nigin, taka nem Negur ĩ ado to ibodōf are, memelik ō unodif anī inodiya kisi feleya sã.”

³ Jesus aiten yale iron, “Aya ō momoi bagai arokonok, taka nem Negur nē tano to ilouf, ĩ baban mata gō fiyēf dogol.”

⁴ Nikodemus Jesus to fiyen, “Tamo ĩ biyan anī, sina naig fe baban gō fouf? Momoi bagai, ĩ sina namen baban ile di, gō fiyēya kisi feleya sã!”

* **2:17:** Sam 69:9

⁵ Jesus solof iron, “Aya ò momoi bagai arokonok, taka Ì, naan ado Awa Uurem mata to wõ youf are, Ì Negur nē tano bun ileya kisi feleya sã.

⁶ Bouwam gō fef are, bouwa nē, anī ere, Awa Uurem gō fef are, uur nē.

⁷ Õ neu od eig au wogō auf bun, kisi to gurū wouf, ‘Å de baban mata wõ gouf.’

⁸ Yau in oroya bun isi iledig. Õ ait dogol karī wodig, anī ere, ò nainenem isif be, nain be ilef, to keleī youf. Ganan idi Awa Uurem gogū fedif are, age fiya bagai.”

⁹ Nikodemus Jesus to fiyen, “Are naig fe, agef wõ youf?”

¹⁰ Jesus iron, “Õ Israel neid tise, anī ere, ò enei to keleik de?

¹¹ Aya ò momoi bagai arokonok, ereb amã keleī anī wogō mauf, age ma fen, ereb amã mailen anī kurō mafesif, anī ere, tamo kayau ã fau amã nemã od to walegef.

¹² Aya ã ereb tenebur tamal nē anī wogō ayeik, anī ere, ã to momoi gef, saa ilun tamal nē anī wogō ayeifeg, naig ge momoi gouf?

¹³ Aibem taka saa ilun to iselen, Tamo Naal saa ilunem isin yogo dogol.

¹⁴ Moses gerere tuan gogour yalosen, age fiya bagai, Tamo Naaleg age de dalesnēf.

¹⁵ Are ganan idi Ì nigin momoi def, mata faimud ibodkeleya adouf nigin.

¹⁶ “Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anī ifenēdin, are taka Ì, Ì nigin momoi youf are, to fõ yalauf, mata faimud ibodkeleya adouf nigin age fen.

¹⁷ Negur Ì, yogon Naal teneub enei bun, tamo kayau es fediya nigin to sur fen, Ì bunem tamo kayau teneub enei bun, kel gei fouf nigin sur fen.

¹⁸ Taka, Ì nigin momoi yef are, to es fiyek, anī ere, taka, Ì nigin momoiya sã are, Ì mogo es fiya bun ifaref, ere nigin, Ì Negur Naal tekelei bagai yana nigin to momoi yen.

¹⁹ Foi fiya eig fiya, fula fiya teneub enei bun mogo isin, anī ere, tamo idi dogo neid tobonuneid sane nigin, fula fiya ditor ken, gugum nigin waud laa fen.

²⁰ Tamo idi sane age difef are, lalan to orodidig, ere nigin, dogo neid tobonuneid sane anī yaoreya kumī de fen, lalan namen to disiyouf.

²¹ Anī ere, aib taka Ì momoi bun age fef, lalan namen isidig, age fe di, ereb Ì age fen are, Negur bunem age fen anī, yaor dilouf.”

Jon Naan Igunēdiya Tamo, Jesus Nigin Kurō Fesin

²² Anī bure fele di, Jesus in dō fiya tar geid, Judia teneub bun dilen, an Ì idi geid sain naal dibod ken, naan igunēdin.

²³ Joneg Ainon Salim non naan igunēdin, ere nigin, an naan musei bagai, anī nigin, tamo kayau naan igunēdiyof nigin toku disidig.

²⁴ (Are Jon fau kalabus bun to dinenē mog.)

²⁵ Jon nē dō fiya tar tunī, Juda tamo taka geid, dogo neid tobonuneid dō de fen, imeid kulo difedig anī nigin luwa diroun.

²⁶ Idi Jon wagen disi dirokenen, “Rabi, tamo ò uruwom Jordan naan sitakã ufareg fen, Ì nigin kurō weis uron, Ì naan igunēdif, age fe di, ganan Ì bun dilef.”

²⁷ Jon solof iron, “Tamo Ì, ereb saa ilun tamal ifenek anī dogol yalouf.

²⁸ Å aug aya oron anī sã kurō walaisi gef, ‘Aya Kristus sã, anī ere, aya Ì ket sur fiyan.’

²⁹ Mois kayau are, mois tamo nē. Mois nē mou Ì, bagu fiya bun ifar fen, karī fiyek, Ì mois tamo nē ait anī karī ye fen, kulīya odug ado. Kulīya are neu, anī gama kisi felef.

³⁰ Ì yana odug ise le di, aya yanau tenebur isilauf.

³¹ “Taka Ì ilunem isif, Ì ganan wal fiya, taka Ì tenebur tamal are, tenebur nē, anī nigin, tenebur nē anī wogō yedig. Taka Ì saa ilunem isif, Ì ganan wal fiya.

³² Ereb ī ilen ado karī yen anī, kurō falaisif, anī ere, yogon od taka nem to yalef.

³³ Taka ī yogon od yalen anim, Negur ī momoi bagai ye fen, anī megeir ifenen.

³⁴ Taka ī Negurem sur fiyen are, ī Negur nē od wogō yef, ere nigin, Negur ī Awa Uur idikeleya sã ifenek.

³⁵ Tama ī Naal nigin wau laaf fen, ereb ereb ganan ī ima bun inon.

³⁶ Aib ī Naal nigin momoi yef are, mata gai ibodkeleya ado, taka ī Naal nigin itorok are, ī mata to ilouf, Negur nē didi ī bun ibodok.”

4

Jesus Samaria Kayau Ado Wogō Den

¹ Jesus Jon wal fiye ken, in dō fiya tar musei geif naan igunēdif ya anī, Farisia tamo karī den.

² Anī ere, momoi bagai Jesusem naan igunēdiya sã, are in dō fiya tar anidim.

³ Sain Odug enei kelei ken, ī Judia distrik itor ken, baban Galili kel ilen.

⁴ Gama ī Samaria atu ilauf.

⁵ Anī nigin, ī Sikar taun oun Samaria, Jakop, ne naal Josef teneub kulu ifenen non, iyok isin.

⁶ An Jakop nē naan ifotokon tutuwō ibodon, Jesus naab meluk iyok isi, tuwa yu kele di, naan ifotokon tutuwō sirin ibodon. Are mogo gaa atun age fiya.

⁷ Agef mog, Samaria kayau taka naan ifotūya nigin isi di, Jesus kayau irokenen, “Aya naan tau wana di, āf.”

⁸ (In dō fiya tar, taun saaf na yaleya nigin dilelen.)

⁹ Samaria kayau Jesus irokenen, “Ō Juda tamo di, aya Samaria kayau. Naig fe di, ayam ō naan afon, wāf nigin to wiyaf?” (Juda tamo kayau idi, Samaria tamo kayau geid to uyu katō difedig.)

¹⁰ Jesus kayau irokenen, “Ō safina ege luwa Negur ifonok ado, aibem naan nigin to yok anī keleim are, ō ī

to wiyē di, mata ifenēya nē naan anī ifonom.”

¹¹ Kayau iron, “Odug, ō ifotūya nē safina sã, naan ī ilon bagai. Ō mata ifenēya nē naan are nain walouf?”

¹² Tamamã Jakop naan ifotok kanama ken, ī yogog gere tar ado gaareg anī bun don, ō ī wal fiya de?”

¹³ Jesus kayau aiten yale iron, “Ganan naan enei doko, idi baban naan ail fediyouf.

¹⁴ Anī ere, taka ī aya naan anī afenē di, yoko, ī baban to bagai naan ail fouf. Naan aya ī afenek, warur naan ī namen faimud ulo ulō yef yenē di, anim mata gai ibodkalauf.”

¹⁵ Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotūya nigin toku ein to kelauf.”

¹⁶ Ī kayau irokenen, “Ule, ogon tamo uroken ken, kel usig.”

¹⁷ Kayau iron, “Aya tamo sã.”

Jesus kayau irokenen, “Ō tamo sã wof are, ō tutuk urok.

¹⁸ Ere nigin, ō mogo tamo faif adon, tamo gama ō ado are, ogon aiwã sã. Ō ogo urom, are momoi bagai.”

¹⁹ Kayau iron, “Odug, aya ō ailiyok, ō profet taka.

²⁰ Amã tamamã tar, arei enei bun Negur yana dalesedig, anī ere, Juda ā urōgedig, Negur yana yaleseya modoū are oun Jerusalem dogol.”

²¹ Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf.

²² Samaria ā, ereb ā kelei sã anī yana walesegedig, amã ereb amã kelei anī yana malesedig, ere nigin, tamo kayau kel yaleya nē are, Juda ibor bun tamal.

²³ Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anī Dei ī imirnedif.

24 Negur ĩ uur, anĩ nigin, ĩ yana dalesedig idi, uur ado momoi bunem, yana dalesauf.”

25 Kayau iron, “Aya keleĩ, Mesia (Kristus dedig) fau isif. ĩ isiyouf sain bun, ereb ereb ganan faded famãf.”

26 Age ye di, Jesus kayau irokenen, “Aya inim yeir od ayok.”

Jesus Nē Dō Fiya Tar Keku De Disi, Jesus Geiden

27 Agef mog bagai, in dō fiya tar keku de disisi, Jesus kayau anĩ ado od de mog, dileid fen, terē den. Anĩ ere, taka nem to, to fiyen, “Ō ere oroyok?” be “Ō ere nigin ĩ ado od gef?”

28 Kayau, ne naan gulub itor yen, taun kel ile, tamo kayau irokenēdin,

29 “Umag, tamo taka, aya ereb ereb ganan age afef asin irokanal anĩ uleg. ĩ anĩ Kristus be.”

30 Idi taun ditor disisi, Jesus garan dilen.

31 Age de mog, in dō fiya tar Jesus total bagai dirokenen, “Rabi, ereb taka wō.”

32 Anĩ ere, ĩ idi irokenēdin, “Aya saaf ā keleĩ sã anĩ āf nigin ado.”

33 Age ye di, in dō fiya tar abob dirokenen, “Taka nem mogo saaf irousi ifenem de?”

34 Jesus iron, “Neu saaf are, aya sur fiyan in oroya dō afe fen, in kabĩ bure afalauf anĩ.

35 Ā eig ge to urōgedig de, ‘Ogō fo bure fele di, kusu fiya sain wō youf’? Aya ā arokeneik, meleĩ fara weleg fen, kabĩ onoudi ulogouf! Idi mogo kusu fiya nē mayo bure felen.

36 Kusu fiya tamo ĩ gama mala solo yalef, ĩ gama mata faimud ibodkeleya nē biya kusus fef, anĩ bun, itenēya tamo ado kusu fiya tamo waud al fouf.

37 Anĩ nigin, od enei momoi bagai, ‘Tamo takam itenēdig, tamo takam kusu fedig.’

38 Aya, ā kabĩ to walegen nē an, kusu fiya nigin sur ayein. Tunim kabĩ total dalen, anĩ ā idi neid maab mala anĩ kusu gen.”

Samaria Tamo Kayau Musei Momoi Den

39 Samaria tamo kayau, taun anĩ bun temeleid musei, ĩ nigin momoi den, ere nigin, kayau anĩ eig ye kurō fesin, “Ĭ ereb ereb ganan age afef asin anĩ irokanal.”

40 Anĩ nigin, Samaria tamo kayau ĩ gein disisi, ĩ idi geid dibodōf nigin total bagai dirokenē di, ĩ naa uru, idi geid dibodon.

41 In od bunem, musei fau fau momoi den.

42 Idi kayau anĩ dirokenen, “Amã ogon od bun dogol to momoi mauf, ere nigin, amã mug karĩ mau fen, amã keleĩ, tamo enei momoi bagai teneub ganan enei nē Isennēya.”

Jesus, King Nē Kabĩ Mudur Naal El Fiyen

43 Naa uru bure fele di, Jesus Galili ilen.

44 Jesus ĩ yogo iron, ‘Profet taka, yogon fō gariyan, ĩ yana sã.’

45 Sain ĩ Galili wō yen, Galili tamo kayau ĩ daleyen. Idi Jerusalem Pasa Sifa bun, ĩ ereb ereb age fen ganan dilen, ere nigin, idig an weim difaren.

46 Ĭ baban Galili distrik oun Kana fonō ki fen, kulu an ĩ naan wain falei felen. Sain anĩ bun, king nē kabĩ mudur taka nē naal Kapenaum taun an dagi yenen.

47 Tamo enei, Jesus Judia distrik tamal Galili isin anĩ karĩ ye fen, ĩ Jesus gein ile, ne naal laa melsã yenen anĩ, isi el fiyēf nigin igonen.

48 Jesus ĩ irokenen, “Ā memelik uris ado anĩ to ulogouf are, ā to bagai momoi gouf.”

49 King nē kabĩ mudur iron, “Odu, neu kesu fau laa fiya sã mog, ō usiyouf.”

50 Jesus ĩ irokenen, “Ō wadã ule. Ō naal fau mata ibodōf.”

Tamo anĩ, Jesus nē od momoi ye fen, ilen.

51 Ĭ fau naab iyok ile mog, yogon ferfer ĩ fotou difiye ken, yogon kesu mata ibodok anĩ wogō difiyen.

⁵² Age de di, ĩ gaa mala ganĩ bun, ne naal dagi karikan anĩ to fiyēdin. Idi ĩ dirokenen, “Bouwa uruwa, nor wan kilok aragau folō fiye kelen.”

⁵³ Age de di, tama ĩ kelein, sain anĩ bun bagai, Jesus irokenen, “Ō naal fau mata ibodōf.” Anĩ nigin, ĩ yogo, ne fō tura tar ganan geid, momoi den.

⁵⁴ Jesus Judia distrik bun tamalem Galili isi fen, memelik inon, are eneim anĩ uru.

5

Jesus Dagi Tamo Betesta Naan Kolili Fiyen El Fiyen

¹ Dum, Jesus Juda neid sifa bun Jerusalem iselen.

² Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anĩ sirin meein torem fō faif dinodin dibodok.

³ An dagi tamo kayau musei denenādig, meleid ifofakeleya, yeid kirorōya, bouweid ilolaisidin.*

⁵ Difaren nē an, tamo taka dagi ado ibodok ile, teti-eit yar yalen.

⁶ Sain Jesus ĩ an yen mog, ile fen, ĩ sain meluk dagi ado an yenen anĩ kelei ken, ĩ to fiyen, “Ō biya leya oroyok de?”

⁷ Dagi tamo iron, “Odug, sain naan moyō fe di, taka nem isenna di, naanũ isileya to ibodok. Aya asilauf au mog, taka ketem uyu wal fiya fen, isiledig.”

⁸ Age ye di, Jesus ĩ irokenen, “Fã wo! Ogon gogoũ wenēdig anĩ wale fen, uyok ule.”

⁹ Age ye di, tamo kaisã bagai dagi sa kele di, ĩ yogon gogoũ yale fen, iyok ilen.

Anĩ wō yen naa are, Sabat naa.

¹⁰ Anĩ nigin, Juda tamo idi, tamo dagi sa kelen anĩ dirokenen, “Naa eĩ Sabat naa.† Ō ogon gogoũ irouya nigin lo katũ yef.”

¹¹ Anĩ ere, ĩ aitedin yale iron, “Tamo ĩ el fiyal anim, ‘Ogon gogoũ wenēdig anĩ wale fen, uyok ule,’ fiyal.”

¹² Anĩ nigin, idi ĩ to difiyen, “Tamo enei nanim, ‘Ogon gogoũ wale fen, uyok ule,’ yom?”

¹³ Tamo el fiyen, ĩ aib ya anĩ nene yelen, ere nigin, Jesus ĩ an guru difen anĩ namen iwaikelen.

¹⁴ Dum Jesus tamo anĩ tempel bun fotou fiye ken, irokenen, “Ulef, ō baban biya lel. Baban mosor to uno, are ereb sane bagai uruwa nē wal fiya anĩ, ō bun to wō youf nigin.”

¹⁵ Tamo are ile, Juda tamo irokenēdin, ‘Aya el fiyal tamo are Jesus,’ yen.

Negur Naal Bunem Mata Ibodōya

¹⁶ Jesus Sabat naa bun enei age fedig nigin, Juda tamo idi ĩ morō difenen.

¹⁷ Jesus idi irokenēdin, “Neu Dei ĩ faimud kabĩ yalef isi, gama naa enei buneg kabĩ yalef, anĩ nigin, ayag kabĩ alef.”

¹⁸ Jesus age yen nigin, Juda tamo idi ĩ dukesiyouf nigin kabĩ total dalen, Sabat naa nē lo wal fiya bun nigin dogol sã, ĩ Negur nigineg neu Dei ye fen, aya Negur ado tekelei yen nigin.

¹⁹ Anĩ nigin, Jesus od enei idi irokenēdin, “Aya ã momoi bagai arokeneik, Naal ĩ yogon oroyam ereb taka to age fouf, ĩ Tama age fef anĩ dogol ile fen, ĩg age fedig, ere nigin, ereb Tama age fef are Naaleg age fouf.

²⁰ Tama ĩ Naal nigin wau laaf fen, ĩ ereb ereb age fedig anĩ ganan ifelnēf, anĩ bun ã terē gouf.

²¹ Tama ĩ laa turĩ feid fen, mata ifenēdidig, age fiya bagai, Naal ĩg aib ĩ orof anĩ mata ifenēdig.

* **5:3:** Itotoya tunĩ eig de ditoton: *ilolaisidin*. Idi naan moyō foug nigin tari difedig. ⁴ Sain taka taka Odug nē engel taka isi, naan moyō fedig. Taka ĩ moyō mugu mugu ile fen, ĩ ket naanũ isilef, ĩ ereb dagi ado are el feledig. † **5:10:** Sabat naa anĩ, Juda neid uub nē naa.

22 Tama ĭ aib taka to es fiyēf, anĭ ere, ĭ es fiya kabĭ ganan Naal bun inon,

23 are tamo kayau ganan idi Temeid yana dalesedig gen, Naal nagineg yana dalesauf nigin ĭ age fen. Taka ĭ Naal yana to yalesef, ĭ Tamam Naal sur fiyen anĭ yana to yalesef.

24 “Aya ā momoi bagai arokeneik, taka ĭ neu od karĭ ye fen, aya sur fiyan ĭ nigin momoi yef, ĭ mata faimud ibodkeleya ado fen, es fiya bun to ilauf. ĭ laa bun tamal ibal fen, mata bun ilen.

25 Aya ā momoi bagai arokeneik, sain fau isif, are mogo yeir isil, laa tamo Negur Naal nē ait karĭ douf, idi karĭ def anidi mata dibodōf.

26 Tama ĭ yogo bun mata ado, age fiya bagai, ĭ mata de anĭ Naaleg adouf nigin ifenen.

27 Agef fen, Tama ĭ Naal es fediyouf nigin megeir ifenen, ere nigin, ĭ Tamo Naal.

28 “Eig fiya bun to terē gouf, sain fau isif, ganan nedi matmat bun dibodok idi, yogon ait karĭ de fen,

29 ulolō desiyouf, idi biya age difen anidi mata dibodōf nigin fafā douf, idi sane age difen anidi es fedĭ di, hel bun dilauf nigin fafā douf.

30 Aya neu oroyam, ereb taka to naig be afouf. Aya karĭ auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anĭ ere, aya sur fiyan ĭ wau al fouf nigin au fen, age afedig.

Jesus Yogo Nigin Kurō Fesin

31 “Aya yug nigin aya mugu wogō auf are, neu wogōya are, momoi be sã be anĭ yaor sã.

32 Taka ĭ aya nigin kurō fesidig, agef fen, aya keleĭ, ĭ aya nigin kurō fesif are momoi.

33 “Ā Jon garan tamo tunĭ sur wedige di, ĭ aya nigin momoi od anĭ kurō falaisi irokenēdin.

34 Aya tamom aya nigin kurō fesif anĭ to aroudig, anĭ ere, aya ā isenneĭf au fen, od anĭ wogō aun.

35 Jon ĭ lam futur fen, lalan ifenen, age fe di, ā sain tobega bagai waleg fen, in lalan nigin wauĭ al fen.

36 “Neu kurō fesiya anĭ Jon nē wal fiya, ere nigin, kabĭ aya bure afalauf nigin Dei ifanan alef anim, Dei ĭ aya sur fiyan anĭ kurō fesif.

37 Dei ĭ sur fiyan ĭ yogo, aya nigin kurō fesin. Ā ĭ ait to karĭ gen, nog to ulegen,

38 in odeg ā bun to ibodok, ere nigin, ā sur fiyen anĭ ĭ nigin to momoi gedig.

39 Ā Negur nē Itotoya keleĭ youf nigin kabĭ total walegedig, ere nigin, ā kisi gef, anĭ bunem amã mata faimud ibodkeleya malef ge fen, ago gedig. Negur nē Itotoya enei, aya nigin kurō fesif.

40 Anĭ ere, ā mata yaleya nigin, aya wageun isiya utorōgedig.

41 “Aya tamom yanau dalesauf nigin to orok,

42 anĭ ere, aya ā nigin keleĭ. Aya keleĭ, ā wauĭ bun Negur nigin wauĭ laa fiya to ibodok.

43 Aya neu Dei yana bunem asin, anĭ ā aya to waleyagen, anĭ ere, aibem taka yogo yana bunem isif are, ā walogouf.

44 Ā abob yana yaleseya anĭ oroyei ken, yana yaleseya Negur Tekelei bunem isif anĭ to total unog walogouf are, ā naig ge momoi gouf?

45 “Anĭ ere, ā ayam Dei mala bun āgenei sane anĭ kurō afesiyouf ge fen to kisig. Āgenei sane kurō fesiya are Moses, ĭ bun āgenei wauĭ iseya unogedig anĭ.

46 Ā Moses nigin momoi gem are, aya nagineg momoi gem, ere nigin, im aya nigin itoton.

47 Anĭ ere, ereb ĭ itoton anĭ to momoi gef nigin, naig ge fen, aya wogō auf enei nagineg momoi gouf?”

6

Jesus Faif Tausen Tamo Saaf Ifenēdin

(Matyu 14:13-21; Mak 6:30-44; Luk 9:10-17)

¹ Enei dumen, Jesus Galili Maaĩ ub sitakã ibal ilen (Galili Maaĩ anĩ, yana taka Taiberias Maaĩ).

² Age fe di, tamo kayau musei ĩ dõ difiyen, ere nigin, ĩ dagi tamo kayau bun memelik ino di, meledim dilen.

³ Agef fen, Jesus arein isel, yogon dõ fiya tar geid dibodon.

⁴ Juda neid sifa inoya Pasa naa melsã mog.

⁵ Sain Jesus mala irakel, tamo kayau musei ĩ garan disi mog, ileid fen, ĩ Filip irokenen, “Ada tamo kayau eneidi dãf nigin, bret nain na talouf?”

⁶ ĩ Filip kisi fiye ken, enei to fen, ere nigin, Jesus ĩ ereb age foun nigin are ĩ keleĩ.

⁷ Filip Jesus aiten yalen, “Ogõ eit nẽ mala anim, idi mugu mugu nigin bret na talouf are, tunĩ to dõ dilouf.”

⁸ In dõ fiya tamo taka Endru, Simon Pita nẽ tura anĩ Jesus irokenen,

⁹ “Kesu taka yeir baali bret faif gau uru ado, anim musei ganan enei tau kisi falauf?”

¹⁰ Jesus iron, “Tamo kayau urokenẽdig len, dibod.” Modoũ anĩ bun fisir musei ado, an tamo dibodadan faif tausen age fiya.

¹¹ Gama Jesus bret anĩ geif, Negur de fiye ken, idi dibodadan neid oroya kilei, anĩ gadõ fedin. ĩ gau buneg de age fen.

¹² Idi ganan dõ kisi fele di, Jesus in dõ fiya tar irokenẽdin, “Tunĩ ditaram anĩ kurug. To sekil fiyauf.”

¹³ Anĩ nigin, baali bret faif anĩ idi dokon, masak tunĩ ifaredin anĩ kuru dife di, karam tuwelf isokosedin.

¹⁴ Tamo kayau memelik inon anĩ dile fen, idi diron, “Momoi bagai, enei are Profet teneub enei bun isiyouf ya anĩ.”

¹⁵ Idi disi, Jesus king ibodõf nigin nugo difiyef ya anĩ, ĩ kelei ken, baban mugu arein kel iselen.

Jesus Naan Teteatu Iyon

(Matyu 14:22-33; Mak 6:45-52)

¹⁶ Gugumek isi di, yogon dõ fiya tar daliyoun disilen.

¹⁷ An idi waag taka bun sosõ de daliyou dibal fen, Kapenaum luwe dile mog, mogo gugumen, anĩ Jesus fau idi garan to isin.

¹⁸ Yau total isi di, maaĩ moloun wĩ yen.

¹⁹ Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumĩ tererẽ den.

²⁰ Anĩ ere, ĩ idi irokenẽdin, “Are ayam, to kumĩ wog.”

²¹ Age ye di, ĩ waag bun dalesnẽf nigin waud yenen, kaisã bagai, idi dilauf nẽ waud iron ub anĩ bun, waag goro fen.

²² Naa taka di, tamo kayau daliyou ub sitakã difaren idi kelein, waag tekelei dogol an ibodon, anĩ Jesus in dõ fiya tar geid to sõ den, idi dogo dogol dilen.

²³ Waag tunĩ Taiberias temeleid, Odug, bret Negur de fiye ken, tamo kayau ifeneid don modoũ anĩ non, goro difen.

²⁴ Tamo kayau, Jesus in dõ fiya tar geid an to dibodon anĩ kelei ken, idi waag sosõ de fen, Jesus dimirnẽf nigin Kapenaum dilen.

Jesus Mata Nẽ Bret

²⁵ Sain tamo kayau idi, daliyou sitakã Jesus fotou dife fen, idi ĩ to difiyen, “Rabi, ere sain õ ein usin?”

²⁶ Jesus aitedin yalen, “Aya ã momoi bagai arokeneik, ã aya umirnagef, ã memelik ulegen nigin sã, anĩ ere, ã bret ifoutneĩ di, wõg eweĩ gere fen nigin.

²⁷ Saaf sane ledig anĩ nigin to kabĩ waleg, anĩ ere, saaf to sane le fen, mata faimud ibodkeleya bun ibodõdig anĩ nigin kabĩ waleg, are Tamo Naalem ifeneif. ĩ dogol Tama Negurem igrne ken, yoya nẽ megeir ganan ifenen.”

²⁸ Age ye di, idi ĩ to difiyen, “Amã Negur nẽ kabĩ malouf nigin, naig bagai mafouf?”

29 Jesus solof iron, “Negur nē kabī are yeir, Negurem sur fiyen ī nigin momoi gouf.”

30 Anī nigin, idi ī to difiyen, “Ere memelik bun uris wanamā di, mail fen, ō momoi mayōf? Ere anī ō unouf?”

31 Amā nemā tubumā tar gerere tuan mana don, Negur nē Itotoya bun eig ye yenek kilei, ‘Ī idi saa ilun tamal bret dāf nigin ifenēdin.’* ”

32 Jesus idi irokenēdin, “Aya ā momoi bagai arokeneik, Moses im bret saa ilun tamal to ifenein, anī ere, neu Dei ī yogo bret kaū bagai saa ilun tamal ifeneik.”

33 Ere nigin, Negur nē bret saa ilun tamal isi fen, teneub enei mata ifenek.”

34 Idi diron, “Odug, gama ilauf enei bun bret anī wanamā.”

35 Jesus idi irokenēdin, “Aya anī mata nē bret. Taka ī aya bun isif, to bagai naū ilauf, taka ī aya nigin momoi yef, to bagai naan ail fouf.”

36 Anī ere, aya ā arokenein kilei, ā mogo uleyagen, anī fau to momoi gef.

37 Idi ganan Deim ifanaf, aya bun disiyouf, taka ī aya bun isif, aya to bagai aruwau.

38 Aya saa ilun tamal asin, aya neu oroya dō afouf nigin sã, anī ere, aya sur fiyan nē oroya dō afouf nigin.

39 Aya sur fiyan nē oroya are yeir, idi ganan ī ifanan taka to folō afalauf, anī ere, aya idikeleya naa bun alesnēdiyof.

40 Neu Dei nē oroya anī, taka ī Naal ile fen, ī nigin momoi yef, mata faimud ibodkeleya yalouf, idikeleya naa bun aya alesnēf.”

41 Od enei Juda tamo karī de fen, ī nigin nauseir den, ere nigin, Jesus iron, “Aya bret saa ilun tamal asin.”

42 Idi diron, “Eī Jesus sã de? Josef naal, in sina tama ado ada keleī. Naig fe di, ī irok, ‘Aya saa ilun tamal asin?’”

43 Jesus solof iron, “Ā aug to nauseir gouf.

44 Taka yogon oroyam, aya wageun isiya kisi feleya sã, anī ere, Dei aya sur fiyan inim, ī namen kabī yale fen, aya garan irou isiyouf. Age fe di, idikeleya naa bun, aya ī alesnēf.

45 Profet neid itotoya bun eig ye yenek, ‘Idi ganan Negurem ifelnēdiyof.’† Taka ī Dei karī fiye ken, ī bun keleī yalef, aya bun isidig.

46 Taka nem Dei to ilen, Negur bunem isin im dogol. Ī yogo dogol Dei ilen.

47 Aya ā momoi bagai arokeneik, taka ī momoi yef, mata faimud ibodkeleya ado.

48 Aya mata nē bret.

49 Āgenei tubuī tar gerere tuan mana don, anī ere, idi gare den.

50 Anī ere, bret enei saa ilun tamal isif, are tamo yāf, to laa fouf.

51 Aya mata ibodōya bret, are saa ilun tamalem isin. Taka ī bret enei yoko, ī mata faimud ibodōf. Bret enei aya bouwau, are teneub ganan bun, tamo kayau mata dalouf nigin afenēdiyof.”

52 Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwa ifanada tāf?”

53 Jesus idi irokenēdin, “Aya ā momoi bagai arokeneik, ā Tamo Naal nē bouwa to wāgauf, in naud to wāgauf are, ā namein mata to ibodok.

54 Taka ī neu bouwau yokon, neu naudou yoko, ī mata faimud ibodkeleya ado, anī aya fau idikeleya naa bun alesnēf.

55 Ere nigin, neu bouwau are saaf bagai, neu naudou are naan bagai.

56 Taka ī neu bouwau yokon, neu naudou yoko, ī aya nameun ibodok, aya ī namen abodok.

57 Mata ibodōya Dei aya sur fiya di, aya Dei bunem mata abodok gen, taka ī aya yōyaf, aya bunem mata ibodōf.

* **6:31:** Eksodas 16:4; Nehemaia 9:15; Sam 78:24, 25 † **6:45:** Asaia 54:13

⁵⁸ Bret enei saa ilun tamal isin. Ægenei tubuī tar mana don are gare desin, anī ere, taka ī bret enei yoko, faimud mata ibodkalauf.”

⁵⁹ Ī od enei Kapenaum taun an, Juda neid uub fō bun ifelneīd fen, wogō yen.

In Dō Fiya Tar Musei Jesus Ditor- *nen*

⁶⁰ Od enei karī de fen, in dō fiya tar musei diron, “Ifelnadaf eī totol bagai. Aim anī keleī youf?”

⁶¹ In dō fiya tar od enei nigin nau-seir de di, Jesus anī keleī ken, idi irokenēdin, “Od enei ā morō ifeneik de?”

⁶² Ba, Tamo Naal ī ibodon nē kel isel mog ulogouf are, ā ere kisi gouf?

⁶³ Awa Uurem mata ifenēdig, bouwa are gorō. Od aya wogō ayein are Uur, od anī mata ifenēdig.

⁶⁴ Anī ere, ā tunī momoiya sã.” Ere nigin, Jesus idi nigin gariya bun keleīn, aiyaim ī nigin to momoi den, aim ī nigin kiwai inouf.

⁶⁵ Ī od tobol fe iron, “Anī nigin, aya od enei arokenein, Dei ī nigin wau to yalouf, ī aya bun isiya kisi feleya sã.”

⁶⁶ Od enei bunem, in dō fiya tar musei keku den, baban Jesus to dō difiyen.

⁶⁷ Jesus in dō fiya tar tuwelf to fedin, “Āg aya utornag ulagauf de?”

⁶⁸ Simon Pita solof iron, “Oduḡ, amā ai bun malauf? Õ mata faimud ibodkeleya nē od ado.

⁶⁹ Amā momoi mau fen, keleī, ò anī Negur nē Fateul.”

⁷⁰ Age ye di, Jesus idi irokenēdin, “Tuwelf ā ayam to agirnein de? Anī ere, ā atun taka are Satan.”

⁷¹ (Ī Judas, Simon Iskariot naal nigin kisif fen, iron. Idi tuwelf anī taka Judas, fau dum Jesus kiwai ifenen.)

7

Jesus Salafat Nē Sifa Bun Ilen

¹ Enei dumen, Jesus Galili an iyon, Judia distrik so fiyen, ere nigin, an Juda tamo ī dukesiyouf nigin ololo difen.

² Anī ere, Juda neid Salafat nē Sifa naa melsā dī,

³ Jesus tura tarem ī dirokenen, “Õ ein utor ken, Judia ulauf, ago di, oḡon dō fiya tar, memelik uno dī, dilouf.

⁴ Tamo taka ī, tamo kayau meleid bun mala yaor wō you fenē, ī iminēyan kabī to yaledig. Õ eneidi agof, ò oḡo tamo kayau ganan ufelnēdiyof.”

⁵ Ī yogon tura tar bagaig, ī nigin to momoi den.

⁶ Anī nigin, Jesus idi irokenēdin, “Aya neu sain bagai fau isiya sã, ā nigin sain ganan kisi feleya bagai.

⁷ Tenebur tamo kayau idi, ā to kiwai difeneik, aya nigin kiwai, ere nigin, ereb sane age difef anī kurō afesidig.

⁸ Ā Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.”

⁹ Jesus od enei wogō yel fen, Galili distrik an ibodon.

¹⁰ Anī ere, tura tar Sifa bun diselel mog, īḡ iselen, anī ere, mala yaor sã, iminēyan.

¹¹ Sifa bun, Juda tamo idi, ī nigin meleid dino fen, to difen, “Tamo are nain?”

¹² Tamo kayau atun, ī nigin fatuk bagai kosesē kurā den. Tunī diron, “Ī tamo biya.”

Tunī solo de diron, “Eo, ī tamo kayau idegnēdidig.”

¹³ Anī ere, taka nem ī nigin yaor to kurō fesin, ere nigin, idi Juda tamo nigin kumī den.

Jesus Sifa Bun Ifelnēdin

¹⁴ Sifa mogo atusil ifar mog, Jesus tempel modoū bun isel fen, od ifelnēdin.

¹⁵ Juda tamo idi terē de fen, diron, “Tamo enei tai fiya yaleya sã mog, naig fe fen, keleī eig fiya ado?”

¹⁶ Jesus solof iron, “Neu ifelnēya are neu sã, aya sur fiyan ī bunem isif.

¹⁷ Taka ī Negur nē oroya dō fiya nigin orof are, neu ifelnēya Negur bunem isif be, aya neu oroya nem wogō auf be anī, ī keleī youf.

18 Taka ï yogon kisim wogõ yef are, ï yogo yana yaleseya nigin age fef, anï ere, taka ï sur fiyen nê yana yaleseya nigin kabï yalef, tamo are momoi nê. Ï bun idegëya taka sã.

19 Moses lo anï to ifenein de? Anï ere, ã atun, taka nem lo to dõ fedig. Ere nigin ã aya unakesigouf nigin ago gef?”

20 Tamo kayau solo de diron, “Õ kaa sane ado. Aim õ inokesiyouf nigin age fef?”

21 Jesus idi irokenëdin, “Aya memelik taka ano di, ã ganan terë gen.

22 Anï ere, Mosesem mulû ileyã ifenein nigin, ã kesu Sabat naa bun mulû ileyã wenëgedig (mulû ileyã are, Moses bunem to isin, teneub te bunem isin).

23 Moses nê lo to wal gouf nigin, Sabat naa bun kesu nê mulû ileyã wenëgedig, ere nigin aya Sabat naa bun, tamo bou adok el afe di, ã aya nigin nameï sanedig?

24 Mala yaor anï dogol uleg fen, to es gei, tutuk bagai el ge, es gei.”

Jesus Anï Kristus De?

25 Sain anï bun, Jerusalem tamo kayau tunï diron, “Tamo enei are idi ï dukesiyouf nigin age difef anï sã de?

26 Ï de yeir, mal atun wogõ ye di, ereb od taka to dirokenek. Mudur adodo idi, ï anï Kristus ya anï mogo tutuk keleï de?

27 Anï ere, tamo enei nain be tamal, are amã keleï. Sain Kristus isiyouf, taka nem ï nainenem be isif to keleï youf.”

28 Age de di, Jesus fau tempel modoũ bun ifelneïd fen, iweig iron, “Are de, ã aya nigin keleï, aya nainenem asin are ã keleï. Aya ein neu oroyam to asin, anï ere, ï aya sur fiyan are momoi. Æ ï keleï sã,

29 anï ere, aya ï keleï, ere nigin, aya ï bun tamal, im aya sur fiyan.”

30 Od enei bun, idi ï dirounëf nigin age difen, anï ere, taka nem ï bun ima to inon, ere nigin, yogon sain fau isiya sã.

31 Anï ere, tamo kayau musei fau ï nigin momoi de fen, diron, “Sain Kristus isiyouf, ï memelik tamo enei inodif anï wal fiya inodiyouf de?”

32 Tamo kayau ï nigin age de, kos-esë kurã de mog, Farisia tamo idi karï den. Age de fen, pris odudug Farisia geid, tempel lo fiya tamo Jesus dalouf nigin sur difedin.

33 Jesus iron, “Aya ã geid sain modeg tabodok, age afe fen, aya ï aya sur fiyan bun alauf.

34 Æ aya umirnagau, anï ere, ã to fotou wiyagau. Aya abodõf nê an, ã isiya kisi feleyã sã.”

35 Juda tamo abob dirokenen, “Tamo enei nari bagai ile di, anï ada ï to fotou tafouf? Ada neda tamo kayau firagagaũ difen, Grik tamo kayau atun dibodok nê an, ï ile fen, Grik tamo kayau ifelnëdiyof de?

36 Ere gariya nigin ï iron, ‘Æ aya umirnagau, anï ere, ã to fotou wiyagau. Aya abodõf nê an, ã isiya kisi feleyã sã?’”

37 Sifa naa odug idikeleyã bun, Jesus ifar fen, iweig iron, “Taka ï naan ail fouf, aya bun isi fen, naan yãf.

38 Taka ï aya nigin momoi yef, Negur nê Itotoya iron kilei, warur naan ï namenem ulo ulõ yef yenëf.”

39 Ï od enei Awa Ur nigin wogõ yen, are idi Jesus nigin momoi den anidi fau dalouf. Sain anï bun, Awa Ur isiya san, ere nigin, Jesus fau fula fiya medeïya yaleya sã.

40 Od enei karï de fen, tamo kayau tunï diron, “Momoi bagai, tamo enei Profet ada tari tafef anï.”

41 Tunï diron, “Ï Kristus.”

Tunïg diron, “Kristus ouf are, naig fe fen, Galilim isiyouf?”

42 Kristus Dawid nê ibor bunem, Betlehem taun Dawid ibodon nê anenem isiyouf, anï Negur nê Itotoya to irok de?”

43 Anï nigin, tamo kayau Jesus nigin fara furu difen.

44 Tunï Jesus ka difiyëf nigin age difen, anï ere, taka nem ï bun ima to inon.

Juda Neid Mudur Adodo Momoiya Sã

⁴⁵ Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ã ã to urou usigel?”

⁴⁶ Tempel lo fiya tamo solo de diron, “Taka nem, tamo enei wogõ yedig gen to wogõ yedig.”

⁴⁷ Farisia tamo solo de diron, “Ï ãg idegnein de?”

⁴⁸ Mudur adodo Farisia tamo geid atun, taka ã nigin momoi yen de?”

⁴⁹ Sã, anĩ ere, tamo kayau eneidi idi lo keleĩ sã, idi Negurem gelu fedif.”

⁵⁰ Nikodemus, idi neid taka, tetunem Jesus garan ilen, ã irokenedin,

⁵¹ “Ada neda lo bun, taka ã ereb age fef anĩ ileyã nigin ketem karĩ tafiye ken, es tafedig. Age fiya sã de?”

⁵² Idi solo de diron, “Õg Galili tamal de? Umir ken, fau keleĩ youf, profet taka Galilim to isif.”

[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]

⁵³ Age de fen, idi mugu mugu dogo neid fonõ fonõ dilen.

8

¹ Anĩ ere, Jesus Moul Arei bun iselen.

² Bonimeĩ mumurei ado, ã baban tempel modoũ bun wõ yen, an tamo kayau garan guru de salili difiyẽ di, ã ifelnediyouf nigin ibodon.

³ Lo ifelnediya tamo Farisia tamo geid idi, kayau taka noli ye mog, dale dirou disi, guru fiya mala bun dinenẽ di, ifaren.

⁴ Age dife fen, Jesus dirokenen, “Tise, kayau enei noli tobonunã ino di, malel.

⁵ Lo bun, kayau age fediya meein tulu fiya nigin Moses irokanaman. Gama õ ere wof?”

⁶ Idi ã bou bun od yũya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton.

⁷ Idi ã to difiyẽtu di, ã fã ye, saules fen, irokenedin, “Ã atun, aib taka ã mosor sãf, ã ketem kayau bun meein irãf.”

⁸ Baban ã obũ yeis fen, teneub bun itoton.

⁹ Idi od anĩ karĩ de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anĩ ado dogol ditornedin.

¹⁰ Jesus saules fen, kayau to fiyen, “Kayau, idi nai difef? Idi takam baban õ bun od to yuk de?”

¹¹ Kayau iron, “Odug, takam to age fef.”

Jesus iron, “Ayag õ boũ bun od to auk. Ule fen, sain enei ilauf garan, mosor baban to uno.”

Jesus Nẽ Wogõya Are Momoi

¹² Jesus baban tamo kayau irokenedin fen, ã iron, “Aya tenebur enei nẽ fula fiya. Taka ã aya dõ fiyauf, ã gugum namen to bagai iyõf, anĩ ere, ã mata nẽ fula fiya adouf.”

¹³ Age ye di, Farisia tamo idi Jesus dirokenen, “Õ ogo nigin wogõ wof, anĩ nigin, ogon wogõya are, momoi be sã be anĩ yaor sã.”

¹⁴ Jesus solof irokenedin, “Aya yug nigin wogõ auf, anĩ ere, neu wogõya are momoi, ere nigin, aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã.

¹⁵ ã tamo nẽ tobonunã bunem es gedig, aya aib taka to es afedig.

¹⁶ Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref.

¹⁷ Ægenei Lo bun itotoya irok, tamo urom wogõ tekelei dinof, are momoi.

¹⁸ Aya yug nigin kurõ afalaisidig, age afe di, Dei aya sur fiyan ã, aya nigin kurõ fesidig.”

¹⁹ Age ye di, idi Jesus dirokenen, “Õ tamã nain?”

Jesus solof iron, “Ã aya nigin ado neu Dei nigineg keleĩ sã. ã aya nigin keleim are, neu Dei nigineg keleim.”

20 Ī tempel bun kolekta inoya nē modoũ non ifelneĩd fen, od enei wogõ fiyēdin. Anĩ ere, takam ĩ to ima ka fen, ere nigin, in sain fau isiya sã.

21 Jesus baban idi irokenēdin, “Aya atorneĩ di, ã umirnagauf, agog fen, ã āgenei mosor bun gare gouf. Aya elef nē an, ã isiya kisi feleya sã.”

22 Anĩ bunem, Juda tamo idi diron, “Ī yogo bouwa yukesiyouf de? Anĩ nigin, ĩ, ‘Aya elef nē an, ã isiya kisi feleya sã,’ yef de?”

23 Anĩ ere, Jesus tobol fe fen, irokenēdin, “Ā tenebur temeļĩ, aya ilun temelou. Ā teneub enei nē, aya teneub enei nē sã.

24 Anĩ nigin, aya, ã āgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai āgenei mosor bun gare gouf.”

25 Age ye di, idi ĩ to difiyen, “Ō ai?”

Jesus idi irokenēdin, “Aya aib anĩ, mogo gariya bunem arokeneik asin.

26 Aya ã nigin wogõya musei ado, es fiya nigineg musei. Anĩ ere, sur fiyan ĩ, momoi bagai, anĩ nigin, ereb aya ĩ bun karĩ aun anĩ, tamo kayau tenebur ein arokenēdif.”

27 Idi, ĩ Tama nigin irokenēdif ya anĩ, to kisi fokõ yen.

28 Anĩ nigin, Jesus iron, “Sain ã Tamo Naal walesagauf bun, aya yug nigin aya im audig anĩ, ã keleĩ youf, aya neu oroyam ereb taka to age afedig, anĩ ere, aya Dei ifelnan anĩ dogol wogõ audig anĩ, ã keleĩ youf.

29 Aya sur fiyan ĩ, amã urom mabodok, ĩ mugu to itornal, ere nigin, aya faimud, ereb ĩ wau al fouf anĩ, age afedig.”

30 Age wogõ ye di, musei ĩ nigin momoi den.

Abraham Gere Tar

31 Jesus, Juda tamo ĩ momoi difiyen anidi irokenēdin, “Aya afelnein anĩ uroug tokõ walagauf are, ã momoi bagai neu dõ fiya tar.

32 Agog fen, ã momoi anĩ keleĩ youf, momoi anim kafĩ fiya bun tamal yalelneĩf.”

33 Idi aiten dale dirokenen, “Amã Abraham nē ibor nē tubu tar, amã aib taka nē ferfer to mabodon. Ere wo fen, amã kafĩ fiya bun tamal yalelnamãya nigin urok?”

34 Jesus aitedin yale iron, “Aya ã momoi bagai arokeneik, taka ĩ mosor inof are, ĩ mosor nē ferfer.

35 Ferfer ĩ, ibor anĩ bun gai ibodkeleya modoũ sã, anĩ ere, modoũ are naal nē faimud ibodkalauf.

36 Anĩ nigin, Naal ĩ kafĩ fiya bun tamal yalelneĩf are, ã momoi bagai karika lauf.

37 Ā Abraham nē ibor nē tubu tar are, aya keleĩ. Anĩ ere, ã aya unakesigouf nigin dodok gef, ere nigin, ã neu od nē modoũ namein to ibodok.

38 Ereb aya Dei mala bun ailen anĩ, aya ã arokeneik, āg ereb āgenei temeĩ bun karĩ gen anĩ ago gedig.”

39 Idi aiten dale dirokenen, “Abraham ĩ tamamã.”

Age de di, Jesus iron, “Ā Abraham gere tarem are, Abraham age fedin anĩ ago gem.

40 Gama ã, aya Negur bun momoi anĩ karĩ au fen, arokenein anĩ, unakesigouf nigin naab umirēgef. Abraham ĩ to age fen.

41 Ā temeĩ age fedig anĩ ago gef.”

Age ye di, idi Jesus dirokenen, “Amã seseirã inoya naab bun temelamã sã. Nemã Tamamã are Negur yogo dogol.”

Satan Gere Tar

42 Jesus idi irokenēdin, “Negur ĩ Temeim are, ã aya nigin wauĩ laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan.

43 Ere nigin neu od nigin wauĩ to fokõ yef? Are aya wogõ auf anĩ, ã kariya kisi feleya sã nigin.

44 Ā, temeĩ Satan nē, anĩ nigin, ã temeĩ nē oroya dõ fiya nigin oroyeik. Ī gariya bunem isin, ĩ yukesiya kaa, momoi to iroudig, ere nigin, ĩ namen momoi sã. Ereb sain ĩ idegēya od wogõ yedig, ĩ yogon od bagai wogõ yedig, ere nigin, ĩ kori tamal, idegēya tama.

45 Anĩ ere, aya momoi anĩ wogõ audig nigin, ã to momoi wiyagedig!

46 ã takam, aya neu mosor anĩ tau kurõ fesiya kisi feleya? Aya momoi wogõ auf are, ere nigin ã to momoi wiyagef?

47 Aib ĩ Negur nẽ, ĩ Negur ereb yef anĩ karĩ yedig. ã to karĩ gef anĩ nẽ gariya are, ã Negur nẽ sã nigin.”

Jesus Yogo Nigin Iron

48 Juda tamo aiten dale dirokenen, “Amã õ Samaria tamal, kaa sanem ironon mauf are, momoi to morok de?”

49 Jesus solof iron, “Aya kaam to ironan, anĩ ere, aya neu Dei yana seli abidig, ã aya selu to wabigedig.

50 Aya yug nigin fula fiya medeĭya to amirek, anĩ ere, taka ĩ anĩ imirek are ibodok, ĩ anĩ es fiya tamo.

51 Aya ã momoi bagai arokeneik, taka ĩ neu od irou kafĩ falauf are, ĩ laa to bagai gurug fouf.”

52 Juda tamo, anĩ bun Jesus dirokenen, “Gama amã keleĩ, õ kaa sanem ironon! Abraham laa fen, profeteg gare den, anĩ ere, õ, taka ĩ ogon od irou kafĩ falauf are, ĩ laa to bagai kobũf ilouf, wof.

53 Õ tamamã Abraham wal fiya de? ĩ laa fen, profeteg age difen. Õ kisi wof, õ ai?”

54 Jesus aitedin yale iron, “Aya yug selu alesauf are, neu seli alef are ege. Neu Dei, ĩ anĩ ãgenei Negur gef, ĩ aya yanau yalesedig.

55 ã ĩ keleĩ sã, anĩ ere, aya ĩ keleĩ. Aya ĩ keleĩ sã auf are, aya ã gen idegẽya tamouf, anĩ ere, aya ĩ keleĩ bagai, in od dõ afedig.

56 Temeĩ Abraham ĩ, neu naa anĩ ilouf nigin kisif fen, wau al fen. ĩ anĩ mogo ile fen, kulĩ yen.”

57 Anĩ nigin, Juda tamo Jesus dirokenen, “Õ fau yar fifti yaleya sã, anĩ õ mogo Abraham ulen de?”

58 Jesus idi irokenẽdin, “Aya ã momoi bagai arokeneik, Abraham gõ fiya sã mog, aya abodon.”

59 Anĩ nigin, idi ĩ meein tulu difouf nigin meein gei difen, anĩ ere, Jesus bouwa inokel fen, tempel modoũ bun tamal iya ilen.

9

Jesus Tamo Taka Mala Ifofakeleya Gõ Difiyen Anĩ El Fiyen

1 Jesus iyok ile fen, tamo taka mala ifofakeleya gõ difen anĩ ilen.

2 In dõ fiya tar Jesus to difiyen, “Rabi, aim mosor ino di, ĩ mala ifofakeleya gõ difen, tamo enei yogo de, sina tamam de?”

3 Jesus aitedin yale iron, “Tamo eneimeg sã, sina tama adomeg sã, anĩ ere, Negur nẽ kabĩ ĩ bunem yaorouf nigin eig fiya wõ yen.

4 Eĩ fau gaa ado, aya sur fiyan in kabĩ talouf bagai. Bõ fau isif, sain anĩ, taka nem kabĩ yaleya kisi feleya sã.

5 Sain aya tenebur abodok, aya teneub enei nẽ fula fiya.”

6 Age wogõ yel fen, ĩ tenebur isis fen, salina buru ado falei fe fen, tamo mala bun inon.

7 Jesus ĩ irokenen, “Ule, Siloam naan kukor ugũ” (Siloam nẽ gariya, are ‘Sur fiyen’). Anĩ nigin, tamo ile, naan igun, agef fen, mala kelẽ yel, fõ bun isin.

8 In fõ tura tar ado, idi ĩ nonĩ ye mog diledig anidi diron, “Tamo de eneim ibod ken, nonĩ yedig anĩ sã de?”

9 Idi tunĩ diron, “Im.”

Tunĩ diron, “Im sã, taka ĩ genem.”

Anĩ ere, ĩ yogo iron, “Aya de tamo anim.”

10 Idi ĩ dirokenen, “Naig fe di, õ malã kelẽ yeledin?”

11 ĩ aitedin yale iron, “Tamo yana Jesus dedig im, buru falei fe fen, malau uru bun inodin. ĩ, aya ele, Siloam naan agũf nigin irokanan. Anĩ aya ele, naan agun, age afe fen, aya malau kelẽ aun.”

12 Idi ĩ to difiyen, “Tamo are nain?”

ĩ iron, “Aya keleĩ sã.”

Farisia Tamo Idi Mala El Fiyen Nē Gariya Dimiren

¹³ Idi tamo mala ifofakelen anī, Farisia tamo gedin dale dirou disin.

¹⁴ Jesus buru falei fe fen, tamo mala el fedin nē naa are Sabat naa.

¹⁵ Anī nigin, Farisia tamo idig, ī naig fe fen, mala kelē yedin anī to difiyen. Tamo are irokenēdin, “Ī malau buru inodin, age fe di, agun, anī aya gama kelē auf.”

¹⁶ Farisia tamo tunī diron, “Tamo enei Negur bun tamal sā, ere nigin, ī Sabat naa to dō fef.”

Anī ere, tunī diron, “Naig fe di, mosor tamo memelik age fediya in-oya kisi feleya?” Anī nigin, idi fara difen.

¹⁷ Idi baban tamo mala ifofakelen anī dirokenen, “Ī ō malā el fen anī, ō ī nigin ere wof?”

Age de di, ī iron, “Ī profet.”

¹⁸ Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin.

¹⁹ Idi to difen, “Eī ā naaluī de? De ī anī mala ifofakeleya gō mafen gef? Naig fe di, ī gama sā mala kelē yelef?”

²⁰ Sina tama diron, “Amā keleī, ī nemā kesu, anī ī mala ifofakeleya gō mafen.

²¹ Anī ere, ī naig fe fen, gama sā lo fef, aim ī mala el fedin anī, amā keleī sā. Yogo to wiyēg, ī biya, yogo nigin wogō youf.”

²² Sina tama idi, Juda tamo kumī difiyeid fen, age de diron, ere nigin, Juda tamo idi mogo od difon, aib taka Jesus anī Kristus youf are, Juda neid uub fō bun dalelnēf.

²³ Age fiya nigin, sina tama eig de diron, “Ī biya, yogo to wiyēg.”

²⁴ Baban Juda tamo idi, mala ifofakelen anī diweigne ken, diron, “Negur yana wales fen, momoi nē od dogol urōf, amā keleī, tamo are mosor tamal.”

²⁵ Ī solof iron, “Ī mosor ado be sā be, aya keleī sā. Tekelei aya keleī are, aya malau ifofakelen, anī ere, gama lo afedig.”

²⁶ Age ye di, idi ī to difiyen, “Ī ō ere naig yon? Naig fe di, ō malā birikā fedin?”

²⁷ Ī aitedin yale iron, “Aya ā mogo arokenein, anī ere, ā to karī gen. Ere nigin ā baban karī gou fenē? Āg in dō fiya tar wowā gou fenē de?”

²⁸ Age ye di, idi kono difiye ken, diron, “Ō tamo enei nē dō fiya taka! Amā are Moses nē dō fiya tar!”

²⁹ Negur Moses wogō fiyen are amā keleī, anī ere, tamo enei nigin, ī nainenem isin areg, amā keleī sā.”

³⁰ Tamo anī aitedin yale irokenēdin, “Ago ge di, terē auf. Ī nainenem isin, ā keleī sā, anī ere, aya malau birikaū fedin.

³¹ Amā keleī, Negur ī mosor dinodidig anī to karī fiyēdidig, anī ere, taka ī Negur anini fiye ken, Negur nē oroya dō fef are, Negurem ī karī fiyēdig.

³² Gariya bunem isi gama, taka nem, tamo mala ifofakeleya gō difen anī birikā fedin yeya to karī yedig.

³³ Tamo enei Negur bun tamal sam are, ī ereb taka to naig fem.”

³⁴ Age ye di, idi diron, “Ō mosor barikā gō diyon, naig fe di, ō amā ufelnamak?” Age de fen, idi ī mayarē diru dirā di, isin.

Uur Bun Mala Ifofakeleya

³⁵ Jesus, idi tamo anī serē diran yeya anī karī yen. Jesus ī fotou fiye ken, iron, “Ō Tamo Naal nigin momoi wof de?”

³⁶ Tamo to fen, “Odug, ai anī ī? Urokana di, aya ī nigin momoi auf.”

³⁷ Jesus iron, “Ō gama ī ulel, de ī anī urom wogō gef.”

³⁸ Age ye di, tamo iron, “Odug, aya momoi auf.” Agef fen, ī Jesus seli yabin.

³⁹ Jesus iron, “Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin.”

⁴⁰ Farisia tamo tunī Jesus geid difaren anī, agef wogō ye di, karī de

fen, to difen, “Ere? Amāg malamā ifofakeleya de?”

⁴¹ Jesus iron, “Ā momoi bagai meleī ifofakeleyam are, ā mosor sam, anī ere, gama ā malamā kelē yef gef, anī nigin, āgenei mosor fau ibodok.

10

Sipsip Lo Fiya Tamo Yogon Sipsip Geid

¹ “Aya momoi bagai arokeneik, tamo taka ī, sipsip nē kauwor bobog bunem to ilauf, anī ere, naab taka bunem gar ye isilaufer are, ī bē tamo, bē yaledig.

² Tamo ī bobog bunem ilef are, ī yogo sipsip marau.

³ Lo fedig tamo ī bobog kāf kenēdidig, age fe di, sipsip ī ait karī dedig. Ī yogon sipsip yana yaleid fen, mayarē guri feid, irouledig.

⁴ Sain ī yogon ganam mayarē guri feid iroule fen, ī ketem uyu iledig, age fe di, yogon sipsip dō difedig, ere nigin, idi yogon ait keleī.

⁵ Anī ere, idi tamo urug to dō difedig, idi ī mā diyawauf, ere nigin, ī ait urug nigin idi keleī sā.”

⁶ Jesus yaab od enei nem wogō fiyēdin, anī ere, ī idi ereb gariya nigin irokenēdin anī, idi to kelein.

⁷ Anī nigin, Jesus baban iron, “Aya ā momoi bagai arokeneik, aya sipsip neid bobog.

⁸ Ganam uyulil disin are, idi bē tamo, bē daledig, anī ere, sipsip idi to karī difiyēdin.

⁹ Bobog are aya, taka ī aya bunem isiyouf are, mata kel yalouf. Ī namen isi fen, ulō yeis ilauf, agef fen, fisir yōya nē fotou fouf.

¹⁰ Bē tamo are bē nigin, yukesiyouf nigin ado, narī fouf nigin dogol isif, aya idi mata dale fen, barikāuf nigin asin.

¹¹ “Aya sipsip lo fiya tamo biya, sipsip lo fiya tamo biya, yogon mata sipsip nigin itorōdig.

¹² Oroī tamo are ī sipsip marau sā. Anī nigin, ī gaū kuī isi di, ile fen,

sipsip itorarā iyadig. Age fe di, gaū kuī sipsip kaka feid fen, firagagaū fedidig.

¹³ Tamo are iyadig, ere nigin, ī oroī tamo, sipsip nigin to karī yedig.

¹⁴ “Aya sipsip lo fiya tamo biya, aya neu sipsip keleī, neu sipsip idi aya keleī,

¹⁵ are Dei ī aya keleī, aya Dei keleī gen. Anī nigin, aya neu mata sipsip nigin atorok.

¹⁶ Aya sipsip tunī ado, are sipsip kau enei bun temeleid sā, aya idig de guri afeid, arou asiyouf. Idig aitou karī douf, age fe di, idi uū tekelei, sipsip lo fiya tamo tekelei youf.

¹⁷ Neu Dei, aya nigin wau laa fef nē gariya are, aya neu mata baban kel yalouf nigin anī atorok.

¹⁸ Taka nem neu mata to son fiyaufer, anī ere, aya neu oroyam neu mata atorok. Aya neu mata itorōya nigin megeir ado, kel yaleya nigineg megeir ado. Od enei neu Dei bun tamal alen.”

¹⁹ Juda tamo od enei nigin baban fara difen.

²⁰ Musei idi diron, “Ī kaa sane ado, agef fen, wadak. Ere nigin ī karī wiyēgef?”

²¹ Anī ere, tunī diron, “Wogōya enei are, tamo kaa sane ado nē sā. Kaa sane ī mala ifofakeleya birikā feleya kisi feleya de?”

Juda Tamo Idi To Momoi Den

²² Sain anī bun, Negur bun Kel Inoya nē Sifa naa Jerusalem wō yen. Are saneya sain.

²³ Anī Jesus tempel modoū bun, Solomon nē Waranda dō fef iyon.

²⁴ Juda tamo guru de, Jesus salili difiye ken, dirokenen, “Sain ganī amā lo wamā di, nene mauf? Ō Kristus ouf are, amā el wo, faded wamāf.”

²⁵ Jesus aitedin yale irokenēdin, “Aya mogo arokenein, anī ere, ā to momoi gef. Memelik neu Dei yana nem anodif, are aya nigin irok.

²⁶ Anī ere, ā to momoi gef, ere nigin, ā neu sipsip sā.

²⁷ Neu sipsip aya aitou karī dedig, aya idi keleī, anī nigin, idi aya dō difiyadig.

²⁸ Aya idi mata faimud ibodkeleya afenēdidig, age afe di, idi to bagai inanakalauf. Takam idi imaun tamal to sosoin fiyauf.

²⁹ Neu Dei idi aya ifanan ī, ereb ereb ganan wal fiya. Takam idi neu Dei ima bun tamal son fiya kisi feleya sã.

³⁰ Aya Dei ado tekelei.”

³¹ Juda tamo baban ī meein tulu difiyēf nigin, meein gei difen.

³² Anī ere, Jesus idi irokenēdin, “Aya Dei bun tamal, ā memelik odudug musei afelnein. Anidi atun nanī anī nigin, ā aya meein tulu wiyagau fenē?”

³³ Juda tamo aiten dale diron, “Amã anidi taka nigin meein to tulu mayōf, anī ere, Negur kono fiya nigin, ere nigin, ō tamo maug anī, ‘aya Negur’ wof.”

³⁴ Jesus idi aitedin yale irokenēdin, “Āgenei Lo bun itotoya anī to ibodok de, ‘Aya aron, ā waitou’*?”

³⁵ Negur nē od idi bun isin are, Negur idi anī waitou yen. Negur nē Itotoya are narī fiya kisi feleya sã.

³⁶ Age yen ouf are, Dei yogon bagai igrina fen, ein tenebur sur fiyan anī, aya Negur Naal aul anī, ere nigin aya kono afel wiyagef?

³⁷ Aya ereb neu Dei age fedig anī, to age afef are, aya to momoi wiya-gauf.

³⁸ Anī ere, aya age afe di, ā neu od to momoi goufeg, memelik anodif anī momoi gouf, anī bunem Dei aya bun ibodok, aya Dei bun abodok ya anī, ā karīg fen, keleī youf.”

³⁹ Idi baban Jesus ka difiyēf nigin age difen, anī ere, ī oreis iyawon.

⁴⁰ Agef fen, Jesus ī, Jordan naan sitakã, uruwa bun Jon naan igunēdin modoũ bun, kel ile, an ibodō di,

⁴¹ tamo kayau musei ī garan disi diron, “Jon memelik taka to inon, anī

ere, Jon tamo enei nigin wogō yen ganan, are momoi.”

⁴² Age de fen, an musei idi Jesus nigin momoi den.

11

Lasarus Laa Fen

¹ Gama tamo Lasarus dedig dagin. Ī Betani tamal, Maria ī tura Marta ado neid fonō.

² Maria de anim, kulu moul sumeī biya ado, Jesus bun fi fel fen, fatiyam Jesus ye waī fen. Ī main Lasarus gama dagi yenek.

³ Anī nigin, main tar Jesus garan od sur difen, “Odug, ī nigin waũ laa fedig are dagi.”

⁴ Jesus ī enei karī ye fen, iron, “Dagi eneim to laa ilauf, are Negur nē fula fiya medeīya nigin, anī bunem, Negur Naal yana dalesauf.”

⁵ Marta, tura ado, maineid Lasarus nigin, Jesus wau laa fen.

⁶ Anī ere, Jesus ī Lasarus dagi yenek ya karī ye fen, ī ibodon nē an baban naa uru ibodon.

⁷ Anī bure fele di, Jesus in dō fiya tar irokenēdin, “Ada Judia distrik baban keku tagauf.”

⁸ Anī ere, idi diron, “Rabi, ō gama bagai Juda tamo meein tulu diyōf nigin age difen, anī ō an kel ulau fenē de?”

⁹ Jesus irokenēdin, “Gaa tekelei bun aua tuwelf to ado de? Anī ege aa luwan to ilalauf. Tamo ī gaa ado iyok, ī ye to tũ fedig, ere nigin, ī teneub enei nē lalan anim lo fedig.

¹⁰ Sain ī bō iyōf are, ye tũ fouf, ere nigin, ī lalan sã.”

¹¹ Enei irokel fen, Jesus idi irokenēdin, “Neda mou Lasarus ī mulã yenek, anī ere, aya turī afiyēf nigin an elef.”

¹² In dō fiya tar Jesus solo de dirokennen, “Odug, ī yenek are, ī fau karikauf.”

¹³ Lasarus laa fen nigin Jesus iron, anī ere, in dō fiya tar kisi difen, ī mulã yenēya maug bagai nigin irok den.

* **10:34:** Sam 82:6: Negur ī od enei Juda nē es fiya tamo ifenēdin.

14 Anī nigin, Jesus idi faded feid, irokenēdin, “Lasarus laa fen.

15 ã nigin au fen, aya an to abodon anī nigin, aya wau al fef, ere nigin, anī bunem ã momoi gouf. Anī ere, ada ã gein talauf.”

16 Anī nigin, Tomas Didimus dedig, dō fiya tar tunī ganan irokenēdin, “Weim gare tauf nigin, adag talauf.”

Jesus Lasarus Main Tar Waud Wã Fen

17 Sain Jesus ile wō yen are, Lasarus mogo matmat bun naa fo ilelen anī karī yen.

18 Betani are Jerusalem melsã, tri kilomita age fiya.

19 Juda tamo kayau musei, Marta Maria ado maineid laa fen anī, waud yo difouf nigin idi gedin disin.

20 Marta Jesus isif ya karī ye fen, Jesus fotou fouf nigin ilen, anī ere, Maria ã fō bun ibodon.

21 Marta Jesus irokenen, “Odug, ò ein udobom are, mainou to laa fem.

22 Anī ere, aya keleĩ, gamag ò ereb taka nigin Negur urokenēf are, ifonōf.”

23 Jesus Marta irokenen, “Nē main baban kel fã youf.”

24 Marta Jesus aiten yale iron, “Aya keleĩ, idikeleya naa kel fãya sain bun, ã baban kel fã youf.”

25 Jesus ã irokenen, “Aya dogol kel fãya nē ado mata nē. Taka ã aya nigin momoi yef are, ã mata ibodōf, laa foufeg, ã mata ibodōf.

26 Taka ã mata ibod ken, aya nigin momoi yef are, ã to bagai laa fouf. Ò enei momoi wof de?”

27 Marta Jesus irokenen, “Momoi, Odug, aya momoi auf, ò Kristus, Negur Naal, teneub enei bun usin.”

28 Ì agef irokel fen, ã kel ile, tura Maria iweigne ken, mugun irokenen. Ì iron, “Tise yeir, ã iweignok.”

29 Maria od enei karī ye fen, ã kaisã bagai fã yale, Jesus garan ilen.

30 Jesus fonō wōya sã, ã fau Marta fotou fiyen modoũ anī bun ibodon.

31 Juda tamo kayau, Maria geid, fō bun dibod ken, ã wau wã difenen, ã

kaisã bagai fã yale, ulō yeis ile di, dile fen, ã matmat bun inã yalouf nigin ilef de fen, dō difiyen.

32 Sain Maria Jesus ibodon nē modoũ anī bun wō ye, Jesus ile fen, ã ye gariyan kubũ ye fen, iron, “Odug, ò ein ubodom are, mainou to laa fem.”

33 Sain Maria inã yalen ado, Juda tamo kayau Maria geid disin idig inã dalen, Jesus anī ile fen, wau fatuk bagai gudũf morō fen.

34 Jesus to fen, “Ì nain mũ gen?”

Idi diron, “Odug, usi fen, ule.”

35 Jesus ã inã yalen.

36 Age fe di, Juda tamo kayau diron, “Ulegef, ã nigin fatuk bagai wau laa fen anī!”

37 Anī ere, idi tunī diron, “Ì tamo mala ifofakeleya birikã fedin, tamo eneig laa bun ileya nigin katī feleya to kisi feleyan de?”

Jesus Lasarus Laa Bun Tamal Turĩ Fen

38 Jesus baban wau fatuk bagai gudũf fen, matmat bun isin. Matmat are ku, meein nem bobog katī difelen.

39 Jesus iron, “Meein waleleg.”

Marta, laa tamo nē main iron, “Anī ere, Odug, are gama waai sane, ere nigin, ã an naa fo ibodon.”

40 Age ye di, Jesus iron, “Ò momoi wof are, Negur nē fula fiya medeĩa ulouf, to age ayon de?”

41 Anī nigin, idi meein are dalelen. Age dife di, Jesus itad fen, iron, “Dei, ò aya karī wiyal nigin, ò de ayok.

42 Aya kelein, ò faimud aya karī wiyadig, anī ere, aya tamo kayau yeir difaref nigin od enei orom, are idi onom aya sur wiyān anī momoi douf nigin.”

43 Jesus od enei wogō yel fen, ait odug nem iwegin, “Lasarus, ulō weis!”

44 Laa tamo, ye, ima gabar masak nem filu difen ado, nawa gabarem sile difen ulō yesi di,

Jesus idi irokenēdin, “Gabar waleleg fen, utornēge di, ile.”

Jesus Dukesyounf Nigin Od Difon
(*Matyu 26:1-5; Mak 14:1, 2; Luk 22:1, 2*)

⁴⁵ Anĩ nigin, Juda tamo kayau musei Maria gein disin, Jesus ereb age fen anĩ dile fen, ĩ nigin momoi den.

⁴⁶ Anĩ ere, idi tunĩ Farisia tamo gedin dile fen, Jesus ereb age fen anĩ dirokenēdin.

⁴⁷ Anĩ nigin, pris odudug Farisia tamo geid, katō difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif.

⁴⁸ Ada lo tafe di, ĩ enei eig fef ilauf are, tamo ganan ĩ nigin momoi douf, age dife di, neda ibodōya ado teneub, Rom tamom disi dalouf.”

⁴⁹ Age de di, idi atun taka, yana Kaiafas, ĩ yar anĩ bun pris neid mudur ibod ken, wogō yen, “Ā ereb taka keleĩ sã!

⁵⁰ Tamo kayau ganan inanakalauf ban, tamo tekeleim tamo kayau nigin laa fouf, are ã nigin deuf anĩ, ã to kisi gef.”

⁵¹ ĩ yogon kisi bunem od enei to iron, anĩ ere, ĩ yar anĩ bun pris neid mudur ibodon nigin, profet od wogō yen, Jesus Juda tamo kayau ganan nigin laa fouf yen.

⁵² Are Juda tamo kayau nigin dogol sã, Negur gere tar firagagaũ difen anidig, guri feid ırousi kuru fedi di, idi tekelei youf nigin, Jesus laa fouf yen.

⁵³ Anĩ nigin, naa anĩ bunem ilen, idi Jesus dukesyounf nigin naab dimiren.

⁵⁴ Age dife di, Jesus ĩ, Juda tamo kayau meleid bun mala yaor to iyon, ĩ an iminkele fen, teneub akor taka, gerere tuan melsã, fonō yana Efraim ilen, an yogon dō fiya tar geid dibodon.

⁵⁵ Sain anĩ Juda neid Pasa naa melsã, musei fonō fonō temeleid, dogo neid nonorou lilik fiya nigin, Pasa naa wōya sã mog, Jerusalem diselen.

⁵⁶ Idi Jesus nigin meleid dinof diyon. Idi tempel modoũ bun difar

fen, abob to difen, “Ā ere kisi gef? ĩ Sifa bun to isiyounf de?”

⁵⁷ Anĩ ere, pris odudug Farisia tamo geid, taka nem Jesus nain be ibodok ya anĩ ile fen, irokenēdi di, dirounēf nigin wedereid diroun.

12

Betani Oun Jesus Ye Bun Maria Moul Fi Felen

(*Matyu 26:6-13; Mak 14:3-9*)

¹ Pasa nē naa wōya nigin, naa sigis fau ibod mog, Jesus Betani wō yen, an Lasarus ibodon, ĩ Jesusem laa bun tamal turĩ fiyen.

² An Jesus nigin waud el fe fen, bō saaf dabin, anĩ Marta aruna yalen. Idi Jesus geid tebol bun dibodon atun, Lasarus ibodon.

³ Age de mog, Maria moul sumeĩ biya, hap lita nad nem dinon, are moni odug nē anĩ yale fen, Jesus ye bun fi fel fen, fatiyam ye waĩ fen. Age fe di, moul sumeĩ biyam, fō anĩ ino yalen.

⁴ Anĩ ere, Judas Iskariot, in dō fiya taka, fau dum im Jesus kiwai imeid bun inouf, im iron,

⁵ “Ere nigin moul sumeĩ biya enei, na nigin sur fe fen, moni anĩ maleg tamo to ifenēdiyam? Are yar tekelei bun, kabĩ tamo nē mala yaledig kilei.”

⁶ ĩ maleg tamo nigin kisif fen, enei to iron, ĩ yogo bē tamo nigin age yen. ĩ moni nē kodol lo fiya tamo, moni nē kodol bun dinodig are bē yaledig.

⁷ Anĩ nigin, Jesus iron, “Kayau are utornēg, ĩ aya mũ difiyauf naa nē nigin, moul sumeĩ biya enei irouwauf.

⁸ Maleg idi, ã geid sain faimud ubodōgouf, anĩ ere, aya, ã geid sain faimud to tabodōf.”

⁹ Age de mog, Juda tamo kayau musei, Jesus an ibodok ya keleĩ ken, disin, are ĩ nigin dogol sã, Lasarus Jesusem laa bun tamal turĩ fiyen ĩg dilouf nigin.

¹⁰ Anĩ nigin, pris odudug Lasarus ĩg dukesyounf nigin naab dimiren,

11 ere nigin, Lasarus bunem, Juda tamo kayau musei Jesus garan dile fen, ï nigin momoi den.

Jesus Tamo Yana Ado Gen Jerusalem Ilen

(*Matyu 21:1-11; Mak 11:1-11; Luk 19:28-40*)

12 Naa anï ile di, tamo kayau musei Sifa bun disin, Jesus Jerusalem isif ya anï karï den.

13 Idi pam aarau anã aarau gen anï guri de, Jesus tarabã difiyëf nigin dile fen, diweig diron,

“Hosiana!”*

“Odug yana bunem isif, ï el fiya ado!”†

“Israel neid King, ï el fiya ado!”

14 Jesus donki naal fotou fe fen, teten ibodon, are Negur nẽ Itotoya eig ye irok kilei,

15 “To kumïg, Saion nẽ tamo kayau, uleg, ãgenei king,

donki naal teten ibod ken, isif.”‡

16 Uruwa bagai, in dõ fiya tar, enei ganan nigin wedereid fokõya san. Dum Negur Jesus fula fiya medeïya ifenẽ di, enei ï nigin ditoton ado, enei tamo kayau ï bun age difen anï, wedereid fokõ yen.

17 Tamo kayau Jesus geid difar fen, ï Lasarus matmat bun tamal iweigne ken, laa bun tamal turï fe di, lo difen idim wogagã def, dile di, od iyokelen.

18 Tamo kayau musei, Jesus memelik anï inon karï den nigin, ï fotou difiyëf nigin dilen.

19 Age dife di, Farisia tamo idi abob dirokenen, “Ulegef, ada kabï ege talegef. Lo gouf are, tamo kayau ganan ï dõ difiyek!”

Jesus Yogon Laa Nigin Iron

20 Sifa bun Negur yana dalesauf nigin diselen idi atun, Grik tunï difaren.

21 Idi Filip Betsaida tamal Galili teneub bun, ï garan disi fen, to difiyë diron, “Tamo biya, amã Jesus mailau fenë.”

22 Age de di, Filip ile, Endru iroken ken, uruwom Jesus dirokenen.

23 Jesus idi irokenëdin, “Negur Tamo Naal fula fiya medeïya ifenëf nigin, sain anï mogo yeir isil.

24 Aya ã momoi bagai arokeneik, wit faat taka teneub bun kubũ ye fen, to burauf are, faat tekelei dogol agef ibodõf, anï ere, ï burauf are, faat musei wowã douf.

25 Tamo ï yogon mata nigin wau laa fef are, ï mata anï itornëf, anï ere, tamo ï teneub enei bun, yogon mata atorok bagai ye fen, itorok are, ï irounek ile, mata ibodkeleya bun ilauf.

26 Taka ï aya arunau yalef, ï aya dõ fiyauf bagai. Aya abodok nẽ an, neu kabï tamo ïg an ibodõf. Taka ï arunau yalef, neu Dei ï yana yale-sauf.

27 “Gama neu wau morok, anï aya ere auf? ‘Dei sain enei bun usenna,’ auf de? Sã, gariya enei nigin bagai, sain enei bun asin.

28 Dei ogo yanã selï kulõ!”

Age ye di, ait taka saa ilunem isin, “Aya mogo anï selu abin, aya baban anï selu abiyouf.”

29 Tamo kayau an difaren anï karï de fen, diron, kolimei den, tunï diron, engel takam wogõ fiyem.

30 Jesus iron, “Ait enei, ã isenneï di, momoi gouf nigin, aya nigin sã.

31 Gama Negur ï, teneub enei nẽ tamo kayau es fedif, gama teneub enei nẽ mudur iruwauf.

32 Anï ere, aya tenebur tamal dalesnauf sain, aya tamo ganan aya bun, didï afediyouf.”

33 Jesus yogo naig fe, laa fouf anï ifelnëdiyof nigin, od enei wogõ yen.

34 Tamo kayau aiten dale diron, “Lo bun amã Kristus gai gai ibodõf ya anï karï maun, naig fe di, õ urok, ‘Tamo Naal ï dalesnëf bagai?’ Ai anï Tamo Naal?”

35 Age de di, Jesus idi irokenëdin, “Sain naal bagai ã lalan adouf. ã lalan ado mog, uyõg, anï bunem

* 12:13: Anï nẽ gariya, ‘Usennamã!’ Od anï tamo kayau Negur yana yaleseya nigin wogõ dedig.

† 12:13: Sam 118:25, 26 ‡ 12:15: Sekaraia 9:9

gugum to irousi kerū yeif. Tamo ī gugum bun iyok, ī naib ilef are keleī sã.

³⁶ ã lalan ado mog, āgenei momoiya lalan bun unog, ago gouf, ã lalan gere tar wowã gouf.” Jesus od enei wogō yel fen, ī itorneīd ile, iminkelen.

Juda Tamo Kayau Jesus Nigin Fau To Momoi Den

³⁷ Jesus idi meleid bun memelik musei inodin, anī ere, idi fau ī nigin to momoi den.

³⁸ Enei are profet Asaia nē od kisi falauf nigin wō yen:

“Odug, aim nemã od nigin momoi yen?

Aiyai bun Odug nē megeir yaor fen?”

³⁹ Gariya enei nigin, idi momoiya kisi feleya sã, ere nigin, Asaia baban od enei iron:

⁴⁰ “Negur idi meleid ifofa ken, waud ifofakelen, anī bunem, idi meledim ileya kisi feleya sã, waud fokōya kisi feleya sã, waud faleiya kisi feleya sã, age fiya sam, aya el afedim.”§

⁴¹ Asaia od enei iron, ere nigin, ī Jesus nē fula fiya medeīya ile fen, ī nigin iron.

⁴² Mudur adodo idi atun, museig ī nigin momoi den. Anī ere, Farisia tamo idim Juda neid uub fō bun dirudidiya nigin kumī de fen, dogo neid momoiya to yaor difen.

⁴³ Ere nigin, idi Negurem yeneid yaleseya ban, tamom yeneid dale-sauf anī orodidig.

⁴⁴ Jesus iweig iron, “Tamo ī aya nigin momoi yef, ī aya nigin dogol to momoi yef, ī aya sur fiyan nigineg momoi yef.

⁴⁵ Ī aya lo fiyaf, im aya sur fiyan anī ilef.

⁴⁶ Aya lalan anī, tenebur ein asin, are taka ī aya nigin momoi yef, ī gugum bun to ibodōf nigin age afen.

⁴⁷ “Taka ī neu od karī ye fen, to dō fef, aya ī to es afiyek, ere nigin, aya tamo kayau es fiya nigin to asin, aya kel gei fiya nigin asin.

⁴⁸ Taka ī aya itorna fen, neu od to irouf, ī nigin es fiya tamo ibodok. Od de wogō aun anim, idikeleya naa bun ī es fiyēf.

⁴⁹ Ere nigin, aya neu kisi nem to wogō aun, anī ere, Dei aya sur fiyan im, ere anī wogō auf, naig afe wogō auf anī, toli fiya di, wogō aun.

⁵⁰ Aya keleī, yogon si fiya are mata faimud ibodkeleya bun ileya nē, anī nigin, ereb aya wogō auf, Dei aya wogō auf nigin irokanan kilei bagai, aya wogō auf.”

13

Jesus In Dō Fiya Tar Yeid Kulo Fedin

¹ Pasa nē Sifa fau wōya sã mog, Jesus kelein, ī teneub enei itor ken, Tama garan ileya nē sain mogo wō yel. Ī yogon tamo tar tenebur ein dibodok anidi nigin wau laa fedig, ī idi nigin wau laa fen are iroule idikeleya bun.

² Bō saaf dō mog, Satanem Judas Iskariot, Simon naal namen Jesus kiwai imeid bun ifenēf nigin, kisi mogo ifenen.

³ Tama ī ereb ereb ganan, Jesus ima bun inon, ī Negur bunem isin anī, Negur bun kel ilef, are Jesus ī keleī.

⁴ Jesus saaf bun ibodon anī fã ye, yogon kolos teten inukeis fen, taul yale, luwa gu fen.

⁵ Age fel fen, ī naan yale, beī bun yu ken, yogon dō fiya tar yeid kulo fiya gariya inon, agef fen, taul luwa gu fen anim yeid waī fedin.

⁶ Jesus Simon Pita garan isi di, ī Jesus irokenen, “Odug, ò aya yeu kulo wou fenē de?”

⁷ Jesus Pita aiten yale irokenen, “Ereb aya age afef, ò gama keleī sã, anī ere, fau dum ò keleī youf.”

⁸ Pita iron, “Aya yeu to bagai kulo wouf.”

Jesus Pita irokenen, “Aya ò to kulo ayõf are, ò aya ado nigal fiya sã.”

⁹ Simon Pita Jesus irokenen, “Odug, agouf are, yeu dogol sã, imau mudurou adog kulo wouf.”

¹⁰ Jesus aiten yale iron, “Taka ï naan igukelel, ye dogol kulo fouf, bouwa ganan fliya. Å fliya ba, anï ere, å ganan sã.”

¹¹ Jesus ï aibem kiwai ifenëf anï keleï, anï nigin, ganan fliya sã yen.

¹² Jesus yeid kulof bure fel fen, yogon kolos ifounkel, yogon modoũ bun kelen. Agef fen, ï idi to fedin, “Aya ereb å bun age afel anï, å wed-ereï fokõ yef de?”

¹³ Å aya ‘Tise’ ado ‘Odug’ gedig, are tutuk, ere nigin, aya de anï.

¹⁴ Aya ågenei Tise ado Odug, å yeï kulo afel, anï nigin, åg abob ye kulo gouf.

¹⁵ Aya malakanon anokeneim, are å nigin age afel gen, åg ago gouf.

¹⁶ Aya å momoi bagai arokeneik, ferfer takam yogon odug to wal fiyëdig, arũ tamom ï sur fiyen to wal fiyëdig.

¹⁷ Gama å enei keleï, anï nigin, enei dõg ago gouf are, å el yeïf.

Jesus Ï Kiwai Imeid Bun Inenëf Nigin Iron

(Matyu 26:20-25; Mak 14:17-21; Luk 22:21-23)

¹⁸ “Aya å ganan nigin to wogõ auf. Aya agirnëdin idi, aya keleï, anï ere, enei are Negur në Itotoya bun yenek anï kisi falauf nigin, “Taka ï aya urom neu bret moko, ï aya kiwai ifana fen, dã fiyal.”*

¹⁹ “Anï fau to wõ ye mog, gama aya å arokeneik, anï bunem, anï wõ youf sain bun, aya de Im ya anï momoi gouf.

²⁰ Aya å momoi bagai arokeneik, taka ayam sur afe di, ï yalef are, ï aya yaleyaf, taka ï aya yaleyaf are, ï aya sur fiyan anï yalef.”

Jesus Judasem Kiwai Ifenëf Yen (Matyu 26:20-25; Mak 14:17-21; Luk 22:21-23)

²¹ Jesus od enei wogõ yel fen, ï wau moro ken, kurõ feis iron, “Aya å momoi bagai arokeneik, ågenei takam aya kiwai ifanauf.”

²² Yogon dõ fiya tar idi abob loli difen, ai nigin bagai wogõ yef de fen, nene den.

²³ Idi neid taka, dõ fiya taka Jesus ï nigin wau laa fedig ï, Jesus sirin ibodon.

²⁴ Simon Pita, dõ fiya tamo enei mudurem fiye ken, ï iron, “Ï ai nigin irok anï to wiyë.”

²⁵ Dõ fiya tamo anï, Jesus akoron mudur isen ken, to fen, “Odug, õ ai wof?”

²⁶ Jesus aiten yale iron, “Tamo bret enei beï bun nu afe fen, afenëf anï.” Age ye fen, ï bret nuf fen, Judas Iskariot, Simon naal ifenen

²⁷ Judas bret anï yale di, Satan ï namen ilen.

Jesus Judas irokenen, “Ereb agou fenë, kaisã bagai ago.”

²⁸ Anï ere, saaf bun dibodon anï takam, ere nigin Jesus od enei Judas irokenen anï, kisi to fokõ yen.

²⁹ Judas ï moni lo fiya tamo nigin, tunï kisi difen, Sifa në ereb ereb na yalouf nigin be, maleg ereb ereb ifenëdiya nigin be, Jesusem Judas irokenë di, ilef den.

³⁰ Judas ï bret yale fen, kaisã bagai oreis ilen. Sain anï bõ.

Pita Në Wa Fiya Nigin Jesus Iron (Matyu 26:31-35; Mak 14:27-31; Luk 22:31-34)

³¹ Judas iya ile di, Jesus iron, “Gama Tamo Naal fula fiya medeïya yale di, Negur fula fiya medeïya Tamo Naal bun yalef.

³² Negur fula fiya medeïya Naal bun yalef are, Negur ï fula fiya medeïya Yogo bun Naal ifenëf, fula fiya medeïya anï kaisã bagai Naal ifenëf.

* **13:18:** Sam 41:9

³³ “Neu kesu tar, aya ã geid sain naal bagai tabodõf. ã aya umir-nagauf. Aya Juda tamo arokenēdin kilei, gama ã arokeneik, aya elef nē an, ã isiya kisi feleya sã.

³⁴ “Aya ã itãfiya mata afeneik, abob nigin wauĩ laa foug. Aya ã nigin wau laa fedig kilei, ãg abob nigin wauĩ laa foug bagai.

³⁵ ã abob nigin wauĩ laa foug, anĩ bunem tamo ganan idi keleĩ youf, ã neu dõ fiya tamo tar.”

³⁶ Simon Pita Jesus to fiyen, “Odug, õ nai ulef?”

Jesus iron, “Aya elef nē an, õ gama aya dõ fiyaya kisi feleya sã, anĩ ere, õ fau dum dõ wouf.”

³⁷ Pita to fen, “Odug, ere nigin gama aya õ dõ yõya kisi feleya sã? Aya õ nigin neu mata atorõf.”

³⁸ Age ye di, Jesus iron, “Õ aya nigin ogon mata utorõf de? Aya õ momoi bagai arokonok, tataro fau kokorok yeya sã mog, õ aya nigin wa wo, towo wouf!

14

Jesus In Dõ Fiya Tar Neid Waud Wã Fen

¹ “ã wauĩ to morõ yeĩ. Negur nigin momoi gouf, aya nigineg momoi gouf.

² Neu Dei nē fõ bun aab musei ado, age fiya sam are, arokeneim. Aya eselef nē an, ãgenei modoũ dodok afouf.

³ Aya esel, ãgenei modoũ dodok afel fen, aya ã geid tabodõf nigin, aya kelau gei ayeĩf, are ãg aya abodok nē an ubodõgouf nigin.

⁴ Aya eselef nē naab anĩ, ã keleĩ.”

Negur Bun Ileya Naab, Jesus

⁵ Tomas Jesus irokenen, “Odug, õ narib ulef are, amã keleĩ sã, anĩ nigin, naig mafe fen, amã naab anĩ keleĩ youf?”

⁶ Jesus Tomas irokenen, “Aya dogol naab anĩ, aya dogol momoi anĩ, aya dogol mata anĩ. Taka ã naab taka bunem, Dei wagen to isiyouf, aya bunem dogol.

⁷ ã aya keleim are, ã neu Deig keleim. Gama sain enei bun ilauf, ã ã keleĩ, ã ulegel.”

⁸ Filip iron, “Odug, Tamada ufelnamã, anĩ amã nigin deuf.”

⁹ Jesus iron, “Filip, aya ã geid sain meluk tabodon, anĩ ere, õ aya keleĩ sã de? Taka ã aya ileyan are Dei ilen. Naig fe di, õ urok, “Tamada ufelnamã?”

¹⁰ Aya Dei bun abodok, Dei aya bun ibodok anĩ to momoi wof de? Od aya wogõ ayeik are, aya yug bun tamal sã, are Dei aya bun ibodok ã kabĩ yalef.

¹¹ Aya Dei bun abodok, Dei ã aya bun ibodok anĩ, momoi wiyagauf, sãf are, aya kabĩ aledig bun, momoi wiyagauf.

¹² Aya ã momoi bagai arokeneik, taka ã aya nigin momoi yef, erab aya age afedig, ãg age foug, enei age afedig anĩ wal fiyag age foug, ere nigin, aya Dei gein eselef.

¹³ ã erab taka nigin, aya yanau nem to gouf, aya age afouf, anĩ bunem, Dei ã Naal bun, fula fiya medeĩya yalouf.

¹⁴ Erab taka nigin, aya yanau nem to wiyagauf are, aya age afouf.

Jesus Awa Uur Fateul Sur Afouf Yen

¹⁵ “ã aya nigin wauĩ laa foug are, neu ã itãfiya anĩ dõ gouf.

¹⁶ Aya Dei arokenē di, ã Isenneĩya taka, ã geid gai gai ibodõf nigin ifeneĩf,

¹⁷ are momoi nē Awa Uur. Tenebur ein tamo kayau ã to dalouf, ere nigin, idi ã to dilef, to keleĩ. Anĩ ere, ã ã keleĩ, ere nigin, ã ã geid ibodok, ã bun ibodõf.

¹⁸ Aya ã madmad gen to atorneĩf. Aya ã gein asiyouf.

¹⁹ Sain naal bagai ile di, tenebur ein tamo kayau, aya to dileyauf, anĩ ere, ã uleyagauf. Aya mata abodok nigin, ãg mata ubodõgouf.

²⁰ Naa anĩ bun, aya neu Dei bun abodok, ã aya bun ubodõgef, aya ã bun abodok anĩ, ã keleĩ youf.

²¹ Taka ĩ neu ĩtāfiya irou dō fef, ĩ aya nigin wau laa fedig. ĩ aya nigin wau laa fedig anĭ, neu Dei ĩ nigin wau laa foug, ayag ĩ nigin wau laaf fen, aya yug ĩ bun yaor afoug.”

²² Age ye di, Judas taka (Judas Iskariot anĭ sã) iron, “Odug, ere nigin ō ogo, amã bun dogol ō yaorōf, tenebur ein tamo kayau bun sã?”

²³ Jesus iron, “Taka ĩ aya nigin wau laa fef, ĩ neu od dō foug. Neu Dei ĩ nigin wau laa foug, anĭ amã ĩ gein masi, weim mabodōf.

²⁴ Taka ĩ aya nigin to wau laa fef, ĩ neu od to dō foug. Od enei ã karĭ gef, are aya bun tamal sã, are Dei aya sur fiyan nē od.

²⁵ “Aya fau ã geid tabod ken, od enei ganan wogō ayein.

²⁶ Anĭ ere, Isenneĭya, Awa Uur Fateul anĭ, Deim aya yanau nem sur foug, Awa Uur Fateul ĩ, ereb ereb ganan ifelnei ken, aya arokenein anĭ ganan wedereĭ fokōf fen, kisi turĭ foug.

²⁷ Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sã. ã wauĭ to morō yei ken, kumĭg.

²⁸ “Aya eig au di, karĭ gel, ‘Aya ele fen, ã gein kelau asiyoug.’ ã aya nigin wauĭ laa fem are, aya Dei bun elef anĭ nigin, ã kulĭya adom, ere nigin, Dei ĩ aya wal fiyaya.

²⁹ Anĭ wōya sã mog, aya mogo arokeneim, anĭ bunem, agef wō ye di, ã momoi goug.

³⁰ Aya ã geid, sain meluk to wogō tauf, ere nigin, teneub enei nē mudur mogo isif. Anĭ ere, ĩ aya lai fiyaya nigin megeir sã,

³¹ anĭ ere, tenebur ein tamo kayau keleĭ bagai youf, are aya Dei nigin wau laa fef, anĭ nigin, neu Dei irokanan kilei bagai age afedig.

“Fafãg fen, modoũ enei tatorōg.

15

Aa Wain Gariya Ado Yogon Were

¹ “Aya aa wain bagai, neu Dei ĩ kabĭ marau.

² Were aya bun biya to yuk anĭ ganan, Deim kokour falauf, were biya yuk anĭ ganan, Deim dē fe di, biya musei imauf.

³ Aya od wogō ayein anim, ã amuyē sã, ã mogo filiya.

⁴ ã aya bun ubodōgoug, ayag ã bun abodōf. Were taka aa wain luwa ado to susu falauf are, yogo biya yūya kisi feleya sã. Age fiya bagai, ãg aya bun to ubodōgoug are, biya yūya kisi feleya sã.

⁵ “Aya aa wain gariya, ã were. Taka ĩ aya bun ibodō di, ayag ĩ bun abodōf are, ĩ biya musei imauf. Aya utornagoug are, ã ereb taka to ago goug.

⁶ Taka ĩ aya bun to ibodōf are, ĩ were diraile di, meti ledig gen. Were age fediya are gei de fen, yã dirarã di, isasaikediyoug.

⁷ ã aya bun ubodōge di, neu od ã bun ibodōf are, ereb taka oroyei ken, urokanage di, ifeneĭf.

⁸ Biya musei ũg fen, neu dō fiya tar wowã goug are, neu Dei ĩ fula fiya medeĭya yaloug.

⁹ “Neu Dei aya nigin wau laa fedig kilei, ayag ã nigin wau laa fedig. Gama ã neu wau laa fiya anĭ bun ubodōg.

¹⁰ Aya neu Dei nē ĩtāfiya dō afe fen, yogon wau laa fiya bun abodok kilei, ã neu ĩtāfiya dō goug are, neu wau laa fiya bun ubodōgoug.

¹¹ Aya enei arokeneim, are neu kulĭya ã namein ibod ken, ãgenei kulĭya barikãf nigin.

¹² Neu ĩtāfiya are yeir, aya ã nigin wau laa fedig gen, ãg abob nigin wauĭ laa foug.

¹³ Wau laa fiya enei wau laa fiya ganan wal fiya, are yogon mou tar nigin yogon mata itorok anĭ.

¹⁴ ã aya ereb ĩtāfiya arokenein anĭ dōg, ago goug are, ã neu mou tar.

¹⁵ Aya baban ã to ferfer ayeĭf, ere nigin, ferfer ĩ yogon tamo odug nē kabĭ keleĭ sã. Anĭ ere, aya ã neu

mou tar ayeim, ere nigin, ereb ereb ganan aya Dei bun karī aun anī, aya ā afelneim.

¹⁶ Āgem aya to ugirnagen, aya ā agirnei ken, uleg, biya ūg fen, biya anī ibodkalauf nigin ā ayein. Agog fen, aya yanau nem, ereb taka nigin Dei urokenēge di, ifeneif.

¹⁷ Enei anī neu itāfiya, abob nigin wauī laa fouf.

Tenebur Tamo Kayau, Dō Fiya Tamo Tar Nigin Kiwai Difenēdiyof

¹⁸ “Tenebur tamo kiwai difeneif are, aya ketem kiwai difanan anī, ā keleī youf.

¹⁹ Ā teneub enei nēf are, ā yogon nigin, ā nigin wau laa fouf. Anī ere, ā teneub enei nē sā, aya ā tenebur tamal gei ayei ken, agirnein. Anī nigin, tenebur ein ā kiwai difeneik.

²⁰ Aya od arokenein anī, ā karī walagauf, ‘Ferfer taka yogon odug to wal fedig.’* Idi aya darau difanan are, āg age de darau difeneif. Idi neu od dō difen are, idi āgeneig age de dō difouf.

²¹ Idi enei ganān ā bun age difouf, ere nigin, aya yanau ā ado, are aya sur fiyan idi ī keleī sā nigin.

²² Aya to asi fen, arokenēdim are, idi mosor sam. Anī ere, idi neid mosor nigin to galā dūf.

²³ Taka ī aya kiwai ifanaf, ī neu Deig kiwai ifenek.

²⁴ Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman.

²⁵ Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’†

²⁶ “Awa Uur Isenneīya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf.

²⁷ Āg agog kurō wesigouf bagai, ere nigin, ā aya geid fen, gariya bunem tasin.

16

¹ “Ā to felu rogouf nigin, od enei ganān mogo ā wogō ayeim.

² Idi ā Juda neid uub fō bun diruyeif. Takag, sain fau isiyouf bun, taka ī ā ideneīkeis fen, kisi fouf, Negur sesewi afiyek youf.

³ Idi enei age difouf, ere nigin, idi Dei keleī sā, aya nigineg keleī sā.

⁴ Aya enei mogo arokeneim, are sain isiyouf bun, ā wedereī aroul anī, karī walagauf nigin. Aya enei tetun to arokenein, ere nigin, aya ā geiden.

Awa Uur Fateul Nē Kabī

⁵ “Gama aya ī sur fiyan gein eselef, anī ere, ā takam to aya to fiyaf, ‘Ō nai ulef?’

⁶ Aya enei arokeneim nigin, ā fatuk bagai wauī gudū fef.

⁷ Anī ere, aya momoi arokeneik, aya āgenei biya fiya nigin eselef. Aya to eselauf are, Isenneīya anī ā bun to isiyouf, aya eselauf are, aya ī, ā bun sur afouf.

⁸ Sain ī isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kū fenēya anī yaor fe, faded fediyouf.

⁹ Mosor are, idi aya nigin to momoi def nigin.

¹⁰ Negur nē madur fiya are, aya Dei gein esele di, ā aya to uleyagauf nigin.

¹¹ Negur nē es fiya are, teneub enei nē mudur mogo es fiyen nigin.

¹² “Aya ā irokeneīya nigin musei biya, anī ere, ā gama keleīya kisi feleya sā.

¹³ Anī ere, sain momoi nē Awa Uur isiyouf bun, momoi nē anī ganān bun, im itoneif. Ī yogon kisim to wogō youf, ereb ī karī yef anī wogō youf, agef fen, ereb fau wō youf anī irokeneif.

¹⁴ Ī neu bun tamal yale fen, ā ifelneif, anī bunem, aya fula fiya medeīya ifanauf.

* 15:20: Jon 13:16 † 15:25: Sam 35:19; 69:4

¹⁵ Dei nē ganan are neu, anī nigin, aya arom, Awa Uur neu bun tamal yale fen, ã ifelneif aul.

¹⁶ “Sain naal bagai ile di, ã to uleyagauf, agef fen, baban sain naal bagai ile di, aya uleyagauf.”

In Dō Fiya Tar Waud Gudū Fef Are Fau Kulī Douf

¹⁷ In dō fiya tar tunī abob diroke-nen, “Ere gariya nigin eig ye irok, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?”

¹⁸ Idi anī fau fau wogō den, “Ī ere ye fen, ‘sain naal bagai’ yen? Ī irok anī, amā gariya keleī sā.”

¹⁹ Idi enei nigin Jesus to difou fenē mog, Jesus anī ile fen, idi irokenēdin, “Aya eig aul anī nē gariya nigin abob to wiyēgef de, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf?”

²⁰ Aya ã momoi bagai arokeneik, ã fau maruī isi fen, wauī gudū fouf, tenebur tamo kayau kulī de mog. Ā wauī gudū fouf, anī ere, āgenei wauī gudū fiya falei yel kulī youf.

²¹ Kayau kesu ibodō fenē darau fef, ere nigin, yogon naa wō yel, anī ere, yogon kesu wō ye di, darau weder tu kelef, ere nigin, kesu tenebur wō yel nigin kulī yef.

²² Āg age fiya, gama āgenei wauī gudū fiya nē naa, anī ere, aya baban ailiyeī di, ã kulī gouf, taka nem āgenei kulīya to yalelkeneif.

²³ Naa anī bun, ereb taka nigin ã to, to wiyagauf. Aya ã momoi bagai arokeneik, aya yanau bunem, ereb taka nigin neu Dei to wiyēgouf are, ifeneif.

²⁴ Uruwa bunem isi gama, aya yanau nem, ereb taka nigin to, to gen. To gouf, walogouf, ago gouf, ã kulīya barikāf.

²⁵ “Aya yaab od wogō audig, anī naa taka isiyouf bun, aya yaab od to wogō auf, anī ere, neu Dei nigin yaor arokeneif.

²⁶ Naa anī bun, aya yanau bunem to gouf. Aya ã nigin Dei to afiyēf ya anī to arokeneik,

²⁷ ere nigin, ã aya nigin wauī laaf fen, aya Negur bun tamal asin anī, momoi gedig nigin, Dei ã nigin wau laa fedig.

²⁸ Aya Dei bun tamal ulō aus fen, tenebur asin, gama aya teneub enei ator ken, Dei bun kelauf.”

²⁹ Age ye di, Jesus nē dō fiya tar diron, “Gama ō yaor wogō wof, yaab od nem sā.

³⁰ Gama amā mailef, ō ereb ereb ganan keleī, are taka nem to yōf anīg to tari wodig. Anī bunem, ō Negur bun tamal usin anī, momoi mauf.”

³¹ Jesus aitedin yale iron, “Ā gama momoi gef de?

³² Anī ere, naa fau isif, are mogo isil, anī bun, ã firagagaū yeī, āgenei fonō fonō yeif. Ā aya mugu utorna-gauf. Anī ere, aya mugu sā, ere nigin, neu Dei ĩ aya ado.

³³ “Ā aya bun wauī inosiya adouf nigin, od enei arokeneim. Tenebur ein ã morō adouf, anī ere, total ado ufaragauf! Aya teneub enei nē megeir mogo wal afen.”

17

Jesus Yogo Nigin Kosē Yen

¹ Jesus od enei wogō yel fen, saa ilun itad fen, kosē yen:

“Dei, naa mogo isil, fula fiya medeīya ō Naal wenē, ago di, ō Naal ō selī kulō foug.

² Are ō Naal, idi ganan ō wenen bun, mata faimud ibodkeleya ifenēdiyof nigin, tamo kayau ganan lo fediya nē megeir ō wenen.

³ Mata faimud ibodkeleya are yeir, ō momoi Negur tekelei ado Jesus Kristus ō sur won anī, idi keleī youf anī.

⁴ Kabī ō wanan anī adikelen bunem, tenebur ein aya ō bun fula fiya medeīya arou asin.

⁵ Dei, teneub kare fiya sā mog, ada urom fula fiya medeīya adon anī, ō malā bun fula fiya medeīya anī gama wana.

Jesus In Dō Fiya Tar Nigin Kosē Yen

⁶ “Aya teneub enei bun tamal ō wanan idi bun, ō yaor ayon. Idi ogon, anī ere, ō idi wanan, ago di, idi ogon od dō difedig.

⁷ Gama idi keleī, ereb ereb ganan aya wanan are ō bun tamal.

⁸ Aya od wanan anī afenēdi di, idi dalen. Aya ō bun tamal asin anī, idi momoi bagai kelein, idi onom aya sur wiyan anī momoi den.

⁹ Aya idi nigin kosē auf. Aya teneub enei nē tamo kayau nigin to kosē auf, anī ere, idi ō wanan anidi nigin kosē auf, ere nigin, idi ogon.

¹⁰ Neu ganan are ogon, ogon are neu. Idi bunem, aya fula fiya medeīya alel.

¹¹ Aya tenebur ein to abodōf, anī ere, idi fau tenebur dibodok, aya ō gein esef. Dei Fateul, ō yanā wanan nē megeir bunem, kulatun wediyouf, anī bunem, ada tekelei gen idig tekelei youf.

¹² Sain aya idi geid mabodon, ō aya yanā wanan anī bunem, kulatun afeid el afen. Taka to fō yelen, tamo ī fō yalauf nē dogol fō yelen, are Negur nē Itotoya kisi falauf nigin.

¹³ “Gama aya ō gein esef, neu kulīya idi namedin barikāf nigin, tenebur ein fau abod ken, od enei arok.

¹⁴ Aya ogon od afenēdi di, teneub enei nē tamo kayau idi kiwai difenēdin, ere nigin, gama aya teneub enei nē sã, age fiya gen, idig teneub enei nē sã.

¹⁵ Aya teneub enei bun tamal walelnēdiyof nigin to kosē auf, anī ere, wadāgen tamo sane isi fen, daū fediya nigin, kulatun wediyof anī kosē auf.

¹⁶ Aya teneub enei nē sã, age fiya gen, idig teneub enei nē sã.

¹⁷ Momoi bunem fateul unenēdiyof, ogon od are momoi.

¹⁸ Ō tenebur ein sur wiyan gen, ayag teneub enei bun sur afiyēdin.

¹⁹ Idi nigin, aya yug adok bagai afonok, are idig momoi bagai dogo

adok Negur difenēf nigin.

Jesus Momoiya Tamo Kayau Ganan Nigin Kosē Yen

²⁰ “Aya neu kosēya are idi nigin dogol sã, idi neid od bunem, aya nigin momoi douf anidi nigineg, aya kosē auf,

²¹ idi ganan tekelei youf nigin kosē auf, Dei ō aya bun ubodok, aya ō bun abodok gen, idig ada bun dibodō di, teneub enei nē tamo kayau, onom aya sur wiyan anī, momoi douf nigin.

²² Fula fiya medeīya ō wanan anī, idi afenēdin, are ada tekelei gen, idig tekelei youf nigin.

²³ Aya idi bun, ō aya bun, are idi tekelei youf nigin, anī bunem, onom aya sur wiya fen, aya nigin waū laa fedig gen, idi nigineg waū laa fedig anī, teneub enei nē tamo kayau keleī youf.

²⁴ “Dei, idi ō aya wanan anidi, aya abodok nē an, aya geid mabodōf anī orouf, are idi neu fula fiya medeīya dilouf nigin, fula fiya medeīya anī teneub kare fiya sã mog, ō aya nigin waū laaf fen, wanan anī.

²⁵ “Dei madur bagai, teneub enei nē tamo kayau idi ō keleī sã, anī ere, aya ō keleī, neu dō fiya tar idi, onom aya sur wiyan anī keleī.

²⁶ Aya ō anī afelnēdi di, idi ō keleī, ō nigin fau fau afelnēdif alauf, are ō aya nigin waū laa fiya anī, idi bun ibodōf ado, ayag idi bun abodōf nigin.”

18

Jesus Dirounen (Matyu 26:47-56; Mak 14:43-50; Luk 22:47-53)

¹ Jesus od enei wogō yel fen, ī yogon dō fiya tar geid, Kidron naan uus atu dilen. Kidron sitakā kabī taka ibodon, ī yogon dō fiya tar geid, kabī atu dilen.

² Kiwai tamo Judas ī modou anī keleī, ere nigin, sain musei Jesus in dō fiya tar geid an guru difedig.

³ Anī nigin, Judas, kusī tamo tunī ado, tempel lo fiya tamo tunī pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusī nē waila guri de fen, dilen.

⁴ Jesus, ī bun wō youf anī ganan kelein, ī iyok ile to fedin, “Ā ai umirnēgef?”

⁵ Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren.

⁶ Sain Jesus iron, “Aya im,” ye di, idi soso de dile, tenebur kuku den.

⁷ Jesus baban idi to fedin, “Ā ai umirnēgef?”

Idi diron, “Jesus Nasaret tamal.”

⁸ Jesus iron, “Aya ā arokeneim, aya im. Aya anī umirnagauf are, tamo eneidi utornēdig len, dile.”

⁹ Agef iron are, od Jesus wogō yen anī kisi falauf nigin, “Aya ō wanan anidi taka to folō afelen.”*

¹⁰ Age dife di, Simon Pita ī, dimig adon anī ul feis yale, pris neid mudur nē ferfer weder biya melem salōf iran. Ferfer anī yana Malkus.

¹¹ Age fe di, Jesus Pita irokenen, “Ogon dimig yogon modoū bun kel uno! Dei aya naan kap ifanan anī, aya to āf de?”

Jesus Anas Garan Dirou Dilen

¹² Age ye di, kusī tamo, nedi mudur, Juda neid tempel lo fiya tamo geid, Jesus dalen. Idi ī difo ken,

¹³ Anas garan ket dirou dilen, Anas ī, Kaiafas ne ten, yar anī bun Kaiafas ī pris neid mudur ibodon.

¹⁴ Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

Pita Jesus Nigin Wa Fen

(*Matyu 26:69, 70; Mak 14:66-68; Luk 22:55-57*)

¹⁵ Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī

nigin, ī Jesus ado, pris neid mudur nē fofomalan kau namen dilen.

¹⁶ Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, namen dilen.

¹⁷ Kabī kayau bobog lo fedig ī, Pita to fiyen, “Ōg be, in dō fiya tamo taka anī sā de?”

Pita iron, “Aya sā.”

¹⁸ Menig nigin, ferfer, tempel lo fiya tamo geid, yā kū de fen, salili de, bouweid diroron. Pita īg weim difar fen, bouwa iroron.

Pris Neid Mudur Jesus To Fiyen

(*Matyu 26:59-66; Mak 14:55-64; Luk 22:66-71*)

¹⁹ Fō namen, pris neid mudur, Jesus ī, in dō fiya tar nigin ado, yogon od tai fedin nigin to fiyen.

²⁰ Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyan taka to wogō aun.

²¹ Ere nigin anī aya to wiyaf? Idi aya wogō au di, karī difiyan onou idi to wiyēid. Ereb aya wogō aun, idi keleī.”

²² Jesus age ye irō di, tempel lo fiya tamo taka non ifaren anim, Jesus wala fāf fen, iron, “Pris neid mudur anī, ō ago urokenēdig de?”

²³ Jesus solof irokenen, “Aya ereb kū fenēya arom are, ō ereb kū fenēya anī urōf. Anī ere, aya momoi arom are, ere nigin ō walau fā wol?”

²⁴ Age ye di, Anas Jesus difon ado, pris neid mudur Kaiafas gein sur fen.

Pita Jesus Nigin Baban Wa Fen

(*Matyu 26:71-75; Mak 14:69-72; Luk 22:58-62*)

²⁵ Simon Pita bouwa irorouk ifar mog, idi ī to difiyan, “Ōg be, in dō fiya tamo taka anī sā de?”

Ī waf fen, iron, “Aya sā.”

²⁶ Pris mudur nē ferfer taka, ī Pitam weder salōf iran nē sirag anim

* 18:9: Jon 6:39

iron, “Aya ò ì urom kabier to ailiyeim de?”

²⁷ Pita baban waf mog, kaisā bagai tataro kokorok yen.

Jesus Pailat Mala Bun Ifaren
(*Matyu 27:1, 2, 11-31; Mak 15:1-20; Luk 23:1-25*)

²⁸ Age fe di, Juda tamo, Jesus Kai-fas bun tamal dale dirou, Rom gawaman mudur nē fō bun dilen. Are bonimeï bagai, Juda tamo idi Pasa nē saaf dāf nigin, kal sese de fen, gawaman mudur nē fō namen to dilen.

²⁹ Anī nigin, Pailat idi gedin ulō yeis isi fen, to fedin, “Ere od ā tamo enei bou bun unogouf?”

³⁰ Idi solo de diron, “Ī lo wal fiya tamo sam are, amā ò gein to marou masim.”

³¹ Pailat idi irokenēdin, “Ā aug ĭ waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.”

³² Are Jesus ĭ naig be fe, laa foug nigin wogō yen anī, kisi falauf nigin agef wō yen.

³³ Age de di, Pailat aaben kel ile, Jesus iweigne ken, to fiyen, “Ō Juda neid king de?”

³⁴ Jesus solof iron, “Ō ogon kisim od enei urok de, tunim be aya nigin ò dirokono?”

³⁵ Pailat solof iron, “Aya Juda tamo de? Ō ogon tamo kayaum pris odudug geid, aya bun dirousiyom. Ō ere taka tau agon?”

³⁶ Jesus iron, “Aya neu tano teneub enei nē sã. Aya neu tano teneub enei nem are, neu kabī tamo, Juda tamom aya to daleyauf nigin kusī dem. Anī ere, neu tano teneub enei nē sã.”

³⁷ Age ye di, Pailat Jesus irokenen, “Age foug, ò king de?”

Jesus solof iron, “Ō ogo yer urok, aya king. Enei nigin aya wō aun, are momoi anī wogō auf nigin, anī nigin, aya tenebur asin. Momoi nē ganan, aya karī difiyadig.”

³⁸ Pailat to fen, “Ere anī momoi?” Age yel fen, ĭ baban Juda tamo gedin serē ile, idi irokenēdin, “Aya ĭ bun mosor taka to ailef.

³⁹ Anī ere, āgenei tobonuneĩ eig fiya, Pasa naa bun, kalabus tamo taka aliskeneĩdig. Ā Juda neid king aliskeneĩf anī oroyeik de?”

⁴⁰ Idi baban diweig, solo de diron, “Sã, ĭ sã! Barabas anī wanamãf!” Barabas ĭ anī bē tamal.

19

Pailat Jesus Aa Tetek Bun Dūf Nigin Iron

¹ Age de di, Pailat Jesus yale fen, irō di, wagī difiyen.

² Kusī tamo malū duri ado dale, teter tanak kori de fen, ĭ mudur bun kurū difiyen. Idi gabar kadaū dale difounne ken,

³ idi baba baban ĭ wagen dile fen, diron, “O Juda neid king gai gai ibodōf!” Age de fen, wala fã difen.

⁴ Pailat baban serē kel isi fen, Juda tamo irokenēdin, “Ulegef, aya ĭ bun mosor taka to ailef anī, ā keleĩ youf nigin, ĭ ā gein arou asif.”

⁵ Sain Jesus malū duri kurū difiyen, gabar kadaū difounnen ado, serē isi di, Pailat idi irokenēdin, “Tamo are yeir!”

⁶ Pris odudug, tempel lo fiya tamo geid, ĭ dile fen, diweig diron, “Aa tetek bun ũf! Aa tetek bun ũf!”

Anī ere, Pailat idi irokenēdin, “Ā aug waleg, aa tetek bun ũg. Aya ĭ bun mosor taka to ailef.”

⁷ Juda tamo idi solo de diron, “Amã nemã lo ado, lo anī kilei ĭ laa foug, ere nigin, ĭ yogo aya Negur Naal yedig.”

⁸ Od enei Pailat karī ye fen, fatuk bagai kumī yen.

⁹ ĭ baban fō aaben kel ile fen, Jesus to fiyen, “Ō nain tamal?” Anī ere, Jesus aiten to yalen.

¹⁰ Pailat Jesus irokenen, “Ō aya od to urokanauf de? Aya ò kafī fiya bun tamal yalelnōya nigin megeir ado, ò aa tetek bun inōya nigin megeir ado anī, ò keleĩ sã de?”

11 Jesus solof iron, “Ilun tamal megeir ò to ifonom are, aya ogon megeir farumen to abodom. Anĩ nigin, tamo taka ĩ aya ò imã bun inenan, ĩ yogon mosor odug bagai, ogon wal fiya.”

12 Jesus Pailat age fiyē di, Pailat Jesus kafĩ fiya bun tamal yalishnēf nigin, naab imiren, anĩ ere, Juda tamo idi diweig diron, “Ò tamo enei utornē di, ilauf are, ò Sisa* nē mou sã. Taka ĩ yogo anĩ king yef, ĩ Sisa kiwai ifenek.”

13 Pailat od enei karĩ ye fen, Jesus serē yale irou isi fen, es fiya tamo nē sia, Meein Bedu dedig modoũ bun ibodon (Meein Bedu are, Hibru od nem yana Gabata).

14 Naa are Pasa Sifa nigin dodok fiya naa, gaa atun age fiya, naa anĩ ilele di, Pasa naa wō youf.

Pailat Juda tamo idi irokenēdin, “Āgenei king yeir.”

15 Anĩ ere, idi diweig diron, “Uru uraile! Uru uraile! Aa tetek bun ũ!”

Pailat to fen, “Aya āgenei king aa tetek bun aũf de?”

Pris odudug solo de diron, “Amã king taka sã, Sisa dogol.”

16 Anĩ nigin, Pailat Jesus aa tetek bun dũf nigin, idi imeid bun inon.

Jesus Aa Tetek Bun Dun

(*Matyu 27:32-44; Mak 15:21-32; Luk 23:26-43*)

Anĩ nigin, kusĩ tamo Jesus dalen.

17 ĩ yogon aa tetek faali fe, modoũ Mudur Tuwan (Hibru od nem Gologota dedig) iselen.

18 An idi Jesus aa tetek bun dun, tamo uru idig, ĩ geid aa tetek bun didenen, idi urom si sitakã, Jesus atun.

19 Pailat irō di, eig de ditot fen, aa tetek bun degē difen: JESUS NASARET TAMAL, JUDA NEID KING.

20 Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibru od nem, Rom od nem, Grik od nem.

21 Juda neid pris odudug Pailat dirokenen, “To ‘Juda neid King’ wo utot, anĩ ere, tamo enei yogo aya Juda neid king yen, ago utot.”

22 Pailat aitedin yale iron, “Ereb aya atoton, are de agef ibodōf.”

23 Sain kusĩ tamo Jesus aa tetek bun du ken, Jesus nē kolos gei difeid, aiwa adodo foi difen, are teke tekelei kusĩ tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokō feleya diwan.

24 Idi abob dirokenen, “Ada anĩ to serek tafouf, ada aisaĩ tara ken, aibem yalouf anĩ tailauf.”

Negur nē Itotoya eig ye irok anĩ kisi falauf nigin, agef wō yen,

“Neu kolos idi atun foi difeid fen, neu kolos meluk nigin aisaĩ diran.”†

Anĩ nigin, kusĩ tamo idi enei age difen.

25 Jesus nē aa tetek sirin, Jesus sina, sina nē tura, Maria Kolopas aiwa, Maria Magdala tamal an difaren.

26 Sain Jesus mala irã, sina ado in dō fiya tamo taka ĩ nigin wau laa fedig non difar mog, ileid fen, Jesus ĩ sina irokenen, “Kayau, ò naal yeir.”

27 Age ye fen, Jesus yogon dō fiya tamo irokenen, “Enei ogon sinã.” Naa anĩ bunem ilen, dō fiya tamo enei sinawau yale, yogon fō bun iroule, kulatun fiyen.

Jesus Laa Fen

(*Matyu 27:45-56; Mak 15:33-41; Luk 23:44-49*)

28 Anĩ dumen, Jesus keleĩ, erēb erēb ganan mogo gama bure felel, Negur nē Itotoya bun ibodok anĩ kisi falauf nigin, Jesus iron, “Aya naan ail fiyaf.”

29 Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron dinon.

30 Jesus wain makik anĩ yale fen, iron, “Gama bure.” Age yel fen, guyu kureis, yogon uur itoron.

* 19:12: Rom neid king odug. † 19:24: Sam 22:18

³¹ Gama naa are dodok fiya nē, we fele di, are Sabat naa, Sabat anī are, uub odug. Juda tamo idi, Sabat naa bun, bouweid aa tetek bun ifareya ditorōdig, anī nigin, idi yeid weweur difeid, bouweid gei difalaisiyouf nigin, Pailat dirokenen.

³² Anī nigin, kusī tamo disin, tamo taka ket ye weweur difen, takag age difen, idi Jesus geid, aa tetek bun didenen anidi.

³³ Anī ere, idi Jesus wagen disī fen, ī mogo laa fen anī dilen, anī nigin, idi ī ye to weweur difen.

³⁴ Anī fotokar, kusī tamo takam, ot nem Jesus siri gilī fe di, naud naan ado fi felen.

³⁵ Tamo enei ilen im wogō yen, yogon wogōya are momoi, ī keleī, ī momoi wogō yef, are āg momoi gouf nigin wogō yef.

³⁶ Negur nē Itotoya enei kisi falauf nigin agef wō yen, “Yogon tuwa taka to were fouf,”‡

³⁷ agef fen, Negur nē Itotoya takag irok, “Idi siri gilī difen tamo ī, idim dilouf.”§

Jesus Mū Difen

(*Matyu 27:57-61; Mak 15:42-47; Luk 23:50-56*)

³⁸ Anī dum, Josef Arimatea tamal, Jesus bouwa buru yalouf nigin Pailat irokenen. Josef ī, Jesus nē dō fiya tamo taka, anī ere, ī Juda tamo nigin kumī ye fen, iminēyan Jesus dō fen. Pailat yo ye di, ī isi, Jesus bouwa yalen.

³⁹ Josef ī Nikodemus ado fen, disin, kulu tamo anim, bō Jesus gein ilen. Nikodemus ī, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya.

⁴⁰ Idi urom Jesus bouwa dale, marasin ado gabar lalau nem filu difen. Juda neid tamo mū fiya tobonunā bunem age difen.

⁴¹ Jesus aa tetek bun dun nē modoū an, kabī taka ado, kabier an, ku mata taka ado, taka an to goro difen.

⁴² Naa are Juda neid dodok fiya nē naa nigin ado, tokō kug melsā nigin, idi Jesus an goro difen.

20

Matmat Gorō Ibodon

(*Matyu 28:1-8; Mak 16:1-8; Luk 24:1-12*)

¹ Uub nē naa matu Sande bun, bonimeī bagai gugum ado, Maria Magdala tamal matmat bun ile fen, mala irā, bobog bun meein yaleleya ilen.

² Anī kayau, Simon Pita, dō fiya taka Jesus ī nigin wau laa fedig anidi gedin gudu ref ile, irokenēdin, “Idi Odug matmat bun tamal dale diroulen, ī nain be dinon, ada keleī sā!”

³ Anī nigin, Pita, dō fiya tamo taka ado, matmat bun dilen.

⁴ Urom gududu den, anī ere, dō fiya tamo takam Pita wal fe, ī ket matmat bun wō yen.

⁵ Ī iti ken, fai yen, gabar lalau filu difen anī an yen mog, ilen, anī ere, ī kuren to ilen.

⁶ Age fe di, Simon Pita dum dō fiyen, wō ye fen, tokō fel, matmat kuren ile, gabar lalau filu difen an yen mog, ilen,

⁷ mū difen gabar Jesus mudur sile difen anīg ilen. Mudur sile difen gabar are, yogo fire kori fel, gabar lalau filu difen anī firen ibodon.

⁸ Age fe di, dō fiya tamo taka, ī ket matmat bun wō yen īg, kuren ilen. Ī ile fen, momoi yen.

⁹ (Jesus laa bun tamal kel fā youf ya, Negur nē Itotoya bun yenek anī, idi fau wedereid fokōya sā.)

Jesus Maria Magdala Tamal Bun Wō Yen

(*Matyu 28:9, 10; Mak 16:9-11*)

¹⁰ Age de fen, dō fiya tar, nedi fō bun ke de dilen.

¹¹ Anī ere, Maria matmat serē inā yalef ifaren. Ī inā ado inā ado iti ken, matmat namen fai yen.

‡ 19:36: Eksodas 12:46; Namba 9:12; Sam 34:20

§ 19:37: Sekaraia 12:10

¹² Agef fen, ĩ, engel uru kolos lalau adodo, Jesus yenen modoũ bun dibod mog, iledin, taka muduren, taka yen.

¹³ Idi ĩ to difiyen, “Kayau, õ ere nigin inã walef?”

Maria iron, “Idi neu Odug dale diroulen, ĩ nain be dinon anĩ, aya keleĩ sã.”

¹⁴ Age ye fen, ĩ falei yel, Jesus an ifar mog ĩlen, anĩ ere, are Jesusem ya anĩ to kelein.

¹⁵ Jesus iron, “Kayau, õ ere nigin inã walef? Õ ai anĩ umirnek?”

Maria kisi fen, ĩ kabĩ lo fedig anim ye fen, irokenen, “Tamo biya, onom ĩ wale uroulen ouf are, nain be unon anĩ, aya urokana di, aya ĩ alouf.”

¹⁶ Jesus ĩ irokenen, “Maria.”

Maria ĩ falei yel, Jesus wage ifen ken, Hibru od nem irokenen, “Raboni!” (anĩ nẽ gariya, Tise).

¹⁷ Jesus iron, “Aya to urouna, ere nigin, aya Dei gein fau kel iseleya sã. Anĩ ere, neu turau tar gedin ule urokeneĩd, ‘Aya neu Dei, āgenei Temeĩ, neu Negur, āgenei Negur bun kelau eselauf.’”

¹⁸ Anĩ nigin, Maria Magdala tamal, in dõ fiya tar gedin ile irokenẽdin, “Aya Odug ailel!” Age ye fen, Maria Jesus od enei irokenen anĩ, idi wogõ fiyẽdin.

Jesus In Dõ Fiya Tar Meleid Bun Wõ Yen

(*Matyu 28:16-20; Mak 16:14-18; Luk 24:36-49*)

¹⁹ Uub nẽ naa matu Sande aragau anĩ bun, Jesus nẽ dõ fiya tar, Juda tamo nigin kumĩ de fen, sukar kotũ difel, aaben guru de dibod mog, Jesus isi, idi atun ifar fen, iron, “Wau inosiya ã ado ibodõf!”

²⁰ Od enĩ irokel fen, ĩ ima siri ado idi ifelnẽdin. In dõ fiya tar idi, Odug dile fen, fatuk bagai kulĩ den.

²¹ Jesus baban iron, “Wau inosiya ã ado ibodõf! Dei aya sur fiyan gen, ayag ã sur ayeik.”

²² Age ye fen, idi bun fuu fiyeĩd fen, iron, “Awa Uur Fateul waleg.

²³ ã, tamo neid mosor nigin, wedereĩ tu kalauf are, idi neid mosor nigin weder tu kelef, ã idi neid mosor nigin, wedereĩ to tu kalauf are, idi neid mosor nigin weder to tu kelef.”

Jesus Tomas Mala Bun Wõ Yen

²⁴ Anĩ ere, Jesus in dõ fiya tar meleid bun wõ yen sain, tuwelf idi neid taka Tomas (yana taka Didimus), idi geid to ibodon.

²⁵ Anĩ nigin, dõ fiya tar tunim ĩ dirokenen, “Amã Odug mailen!”

Anĩ ere, ĩ idi irokenẽdin, “Aya yagon ima bun tuti ba to ailau, aya imau gege tuti ba bun to ano fen, aya imau siri bun to anouf, aya to momoi auf.”

²⁶ Uub tekelei ilele di, in dõ fiya tar baban fõ bun dibodon, are Tomas geid. Sukar kotũ difedin, anĩ ere, Jesus isi, idi atun ifar fen, iron, “Wau inosiya ã ado ibodõf!”

²⁷ Agef fen, Jesus Tomas irokenen, “Ogon imã gege ein uno, neu imau uleid. Imã urã siru bun uno. Waũ to ilef isif fouf, momoi dogol wo.”

²⁸ Tomas Jesus irokenen, “Neu Odug, neu Negur!”

²⁹ Age ye di, Jesus Tomas irokenen, “Õ malam aya uleyaf nigin, momoi wof. Idi meledim to dile fen, momoi def, are el fedif.”

³⁰ Jesus, in dõ fiya tar meleid bun, memelik musei inodin, are buk enei bun itotoya san.

³¹ Anĩ ere, Jesus ĩ Kristus, Negur Naal anĩ ã momoi ge fen, ĩ yana nigin momoiya bunem, ã mata walogouf nigin enei itoton.

21

Jesus Gau Yaleyã Bun Memelik Inon

¹ Anĩ dum, Jesus baban in dõ fiya tar gedin, Taiberias daliyoun* wõ yen. Anĩ eig fe wõ yen.

² Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dõ fiya tar uru anidim guru de dibodon.

* **21:1:** Yana taka are Galili Daliyou.

³ Simon Pita idi irokenēdin, “Aya gau nigin ayō fenē.” Idi diron, “Amāg ō geid talauf.” Anī idi dile, waag bun sosō den, anī ere, bō anī bun, gau taka to dalen.

⁴ Bonimeī bagai, Jesus maaī yerin ifaren, anī ere, dō fiya tar idi, Jesusem ya anī to kelein.

⁵ Ī idi iweig irokenēdin, “Mou tar, ā gau taka tau walegel?”

Idi aiten dalen, “Sā.”

⁶ Ī irokenēdin, “Waag siri biya melem kakāg urāg fen, tunī gei gouf.” Idi age difen sain, idi kakāg dī fiya kisi feleya san, ere nigin, gau musei biya.

⁷ Anī in dō fiya tamo Jesus ĩ nigin wau laa fedig ĩ, Pita irokenen, “Are Odugem!” Ī, “Are Odugem,” ye di, Simon Pita karī ye fen, ĩ kolos teten tamal inū inon anī yale, luwa guf fen, naanū ifū iran.

⁸ In dō fiya tar tunī ganān, waag bun disi, kakāg gau isokosen ado dī de dilen, ere nigin, are idi daliyou yeri gerō sā, handred mita age fiya.

⁹ Sain idi kutū desin, yā kaureya anī bun, gau yā bē bret tunī ado dilen.

¹⁰ Jesus idi irokenēdin, “Ā gau gama bagai walegel tunī urousig.”

¹¹ Simon Pita waag sō ye fen, kakāg dī falaisi, maaī yerin irousin. Kakāg are gau odudug isokosen, gau are 153, gai musei biya, anī ere, kakāg to kokour fen.

¹² Jesus idi irokenēdin, “Usig, saaf wōg.” In dō fiya tar kukī de fen, takam ĩ to, to fiyen, “Ō aim?” Idi keleī, are Odug yogo.

¹³ Jesus isi, bret yale fen, idi ifenēdin, gaug de age fen.

¹⁴ Jesus laa bun tamal kel fā ye fen, in dō fiya tar meleid bun wō yen are, gama eneim towo fen.

Jesus Pita Baban Wau Yalen

¹⁵ Sain idi saaf dakas fen, Jesus Simon Pita irokenen, “Simon Jon naal, ō aya nigin fatuk waū laa fef, tunī eneidi neid wal fiya de?”

Pita iron, “Odug, momoi, ō keleī, aya ō nigin wau laa fef.”

Jesus iron, “Neu sipsip momou ufoutneīd.”

¹⁶ Baban Jesus iron, “Simon Jon naal, ō aya nigin waū laa fef de?”

Pita solof iron, “Odug, momoi, ō keleī, aya ō nigin wau laa fef.”

Jesus iron, “Neu sipsip kulatun wiyēdiyof.”

¹⁷ Jesus Pita iroken towo fe fen, iron, “Simon Jon naal, ō aya nigin waū laa fef de?”

Pita wau moron, ere nigin, Jesus ĩ to fiyē towo fen, “Ō aya nigin waū laa fef de?” Pita iron, “Odug, ereb ereb ganān ō keleī, ō keleī, aya ō nigin wau laa fef.”

Jesus iron, “Neu sipsip ufoutneīd.”

¹⁸ Aya ō momoi bagai arokonok, sain ō gaun, ō naki rel, ogon oroya dō fen uledig, anī ere, sain ō tubau bun, imā walese di, taka nem ifōyo ken, ō to oroyok nē an irouleyōf.”

¹⁹ Pita naig be fe, laaf fen, Negur fula fiya medeīya ifenēf anī nigin, Jesus od enei iron. Age ye fen, Jesus Pita irokenen, “Aya dō wiya!”

²⁰ Pita falei yel fen, dō fiya taka Jesus ĩ nigin wau laa fedig anī, dō feid mog, ĩlen. (Tamo enei bō saaf yōya bun, Jesus akoron mudur isen ken, iron, “Odug, aim anī ō kiwai ifonōf?”)

²¹ Sain Pita tamo anī ile fen, Jesus to fiyen, “Odug, tamo enei ĩ naig fouf?”

²² Jesus solof irokenen, “Tamo enei mata ibod mog, aya kelauf anī aya orouf aufeg, ō nigin ere yok? Ō de aya dō wiyauf.”

²³ Enei nigin, dō fiya tar idi atun, od enei iyokelen, are dō fiya tamo enei to laa fouf den. Anī ere, Jesus, tamo anī to laa fouf ya nigin to iron, Jesus ĩ eig ye iron, “Tamo enei mata ibod mog, aya kelauf anī aya orouf aufeg, ō nigin ere yok?”

²⁴ In dō fiya tamo enei, anī ganān wogō ye fen, itoton. Amā keleī, in od are momoi.

²⁵ Jesus ï erēb erēb museig age
fen. Aya kisi afef, añ ganān buk
bun ditotlem are, teneub ganān bun
modoũ sam.

Aposel

Jesus Saa Ilun Yale Irou Iselen

¹ Teofilus, uruwa buk aya atoton anī bun, Jesus gariya ino, ereb ereb age fen ado ifelnēdif ile,

² aposel ī igrnēdin anidi Awa Uur Fateul bunem faded fiye keleid fen, Jesus saa ilun iselen nē naa bun, aya anī ganān nigin atoton.

³ Ī darau yale fen, laa fen, mata kel fā ye fen, tamo eneidi meleid bun wō yen, agef fen, idi ī mata ibodok ya anī momoi douf nigin, ereb ereb musei age fen. Naa foti anī namen, ī idi meleid bun wō ye fen, Negur tano nigin wogō fiyēdin.

⁴ Jesus idi geid saaf doko dibod ken, ī idi eig ye fadim yukenēdin, “Ā Jerusalem to utorōgouf, anī ere, ereb aya wogō au di, karī gen, are neu Dei ereb sur afouf yen anī tari gouf.

⁵ Are Jon ī naan nem dogol igunein, anī ere, naa tunī ilele di, ā Awa Uur Fateulem naan iguneif.”

⁶ Anī nigin, sain idi takai guru de dibod ken, idi ī to difiyen, “Odug, ō sain enei bun, Israel neid tano baban unouf de?”

⁷ Jesus idi irokenēdin, “Are Dei ī yogon megeir bunem, sain nanī be naa inon ibodok anī, ā to keleī youf.

⁸ Anī ere, ā fau sain Awa Uur Fateul ā bun isiyouf are, megeir walogouf, agog fen, ā aya age afen anī nigin wogōg fen, Jerusalem bun, Judia distrik ado Samaria distrik ganān bun ile, teneub idikeleya buneg, aya nigin wogō gouf.”

⁹ Ī enei irokel fen, idi meleid bun bagai, ī yale irou iselen, ī lalo bun iminkele di, to dilen.

¹⁰ Jesus ise le di, idi saa ilun ditad se, lo difef den mog, kaisā bagai tamo uru kolos lalau adodo, idi siridin difaren.

¹¹ Idi diron, “Galili tamo ā, ere nigin ein ufareg utadseg fen, saa ilun lo gef? Jesus enei ā bun tamal yale irou, saa ilun ise le, ā ī saa ilun isel mog, ulegel kilei bagai, agef ī kel isiyouf.”

Judas Fotokar Matias Digirin

¹² Age de fen, idi Moul Arei dedig bun tamal, Jerusalem keku de dilen, Moul Areinem Jerusalem ileya are wan kilomita age fiya, anī nigin, Sabat naa* bun iyōya kisi feleya.

¹³ Sain idi Jerusalem wō de fen, idi aab ilun dibodōdig nē an diselen, idi eneidim, Pita, Jon, Jems, Endru, Filip, Tomas, Batolomyu, Matyu, Jems Alfeus naal, Simon Selot† taka, Judas Jems naal.

¹⁴ Idi ganān guru de, waud tekelei dino fen, toku kosē dedig, kayau tunī geid, Maria Jesus sina, Jesus tura tar geid.

¹⁵ Sain anī bun, Pita, momoiya tamo kayau hundred tuwenti age fiya idi atun, ifar fen, iron,

¹⁶ “Turau tar, kulu Awa Uur Fateulem Dawid sigoron, Judas ī tamo uyu iroukenēdi di, Jesus dalen ī nigin wogō yen anī, Negur nē Itotoya bun ibodok, are de agef kisi felen.

¹⁷ Ī amā nemā taka, ī amā weim kabī enei malen.”

¹⁸ (Judas yogon sane bunem moni yale fen, teneub taka na yalen, an ī kubū ye mudur iten ken, yogon bouwa faraf fen, te galelei adok ulō yesin.

¹⁹ Age fe di, tamo kayau Jerusalem dibodon anī ganān, od anī karī den, anī nigin, teneub anī, dogo neid od nem yana dū Akeldama den, anī nē gariya, Naud Teneub.)

²⁰ Pita wogō tobol fe, irokeneg iron, “Buk Sam bun eig ye itoton,

“Yogon modoū are fonou inouf,

an taka nem to ibodōf,‡

takag,

“Taka nem ī fotokar yogon kabī yalouf.’§

* **1:12:** Sabat naa anī, Juda neid uub nē naa. † **1:13:** Juda neid kusī mala taka, idi Rom gawaman ado kusī dedig. ‡ **1:20:** Sam 69:25 § **1:20:** Sam 109:8

21 Anī nigin, Odug Jesus ada atun kabī yale ilef isif mog,

22 Jon naan igunēdin sain bunem ile, Jesus ada bun tamal, yale irou iselen sain bun, sain ganan ada weim tabodon anidi taka tagirnēf. Are idi eneidi atun, takam Jesus mata kel fāya nigin, ada geid od wogō tauf.”

23 Anī nigin, idi tamo uru dinenēdin, Josef Basabas dedig (yana taka Jastus), taka Matias.

24 Age de fen, idi kosē de fen, diron, “Odug, tamo ganan neid waud ō keleī, uru eneidi bun, ō aib ugin anī ufelnamā,

25 are Judas ī itor ken, yogon modoū bun ilen anī, ī fotokar aposel kabī yalouf nigin.”

26 Age de fen, idi aisaī dira ken, aisaī Matias wagen kubū yen, anī bunem, Matias ī aposel ilewen baguf weimen.

2

Awa Uur Fateul Pentikos Naa Bun Isin

1 Sain Pentikos naa* isi di, idi ganan modoū tekelei bun, guru de dibodon.

2 Idi an dibod mog, kaisā bagai, ait yau totol ado gugu redig gen, saa ilun tamal isi fen, fō aab ino yalen.

3 Idi ereb yā bale gen isi di, dile mog, fara furu feid, idi mugu mugu tetedin ibodon.

4 Age fe di, idi ganan Awa Uur Fateulem aura fiyēdi di, gariya dino, od fire fire bunem wogō den, Awa Uurem fiyēdi di, age difen.

5 Sain anī bun, Juda tamo Negur nigin momoi den idi, teneub ganan bun temeleid disi, Jerusalem dibodon.

6 Sain idi ait anī karī de fen, tamo kayau musei idi nene de fen, guru difen, ere nigin, idi mugu mugu dogo neid od bun wogō den anī karī den.

7 Idi fatuk bagai terē de fen, diron, “Tamo od wogō def eneidi ganan, Galili temeleid sā de?

8 Naig fe di, ada mugu mugu, idi neda od bunem wogō de di, karī tauf?

9 Ada fire firen temelada, Patia, Media, Elam kantri, Mesopotamia, Judia distrik, Kapadosia, Pontus, Asia provins,

10 Frigia, Pamfilia distrik, Isip kantri ado Libia distrik tunī Sairini taun non. Amā tunī Rom kantri temelamā, Juda temeleid ado haiden Juda neid momoiya bun falei maun,

11 Krit nuyo ado Arabia distrik. Ada mugu mugu neda od bun, Negur kabī odug age fen anī wogō de di, karī tauf.”

12 Idi terē de nene de fen, abob toti difen, “Eī ere gariya nigin?”

13 Anī ere, tunī idi weli difiyeid diron, “Idi wain fatuk domō.”

Pita Tamo Kayau Meleid Bun Wogō Yen

14 Pita aposel ilewen geid difar fen, ait odugem tamo kayau wogō fiyēdin, “Juda tamo kayau ado ā ganan Jerusalem ubodōgef, utorōg len, aya ā enei faded ayeif, kee releg fen, aya wogō auf anī karīg.

15 Ā kisi gef, tamo eneidi wain domō gef, age fiya sā, gama eī nain kilok bonimeī!

16 Anī ere, eī are Profet Joel eig ye wogō yen:

17 “ ‘Negur irok, idikeleya naa bun, aya neu Awa Uur, tamo kayau ganan bun gō afalauf.

Age afe di, āgenei kesu, kayau momoul ado, profet od wogō douf,

āgenei tamo gaū meleid bun se-leulā kurā fouf,

āgenei tamo tubau dimīdiyof.

18 Neu ferfer tamo ado kayau geid buneg,

aya neu Awa Uur naa anī bun gō afalaisi di,

idi profet od wogō douf.

19 Aya saa ilun, memelik fire fire afelnēdiyof,

tenebur ein uris anodiyof.

* 2:1: Naa anī are, Pasa naa bunem naa fifti ilele di, wō yedig.

- Naud, yã ado, kaau tubutubuya wõ youf.
- 20 Odug nẽ Naa odug fula fiya medeïya ado, fau to isi mog, gaa gugum kele fen, ogõ naud gen wõ youf.
- 21 Age fe di, aib taka ï, Odug yana yale iweignẽf are, Odug ï kel yalouf.†
- 22 “Israel tamo kayau, od enei karĩg, ã aug keleï, Negur ã atun, Jesus Nasaret tamal bunem memelik, ereb urug bagai ado, uris inodin, anĩ bunem Jesus ï Negurem sur fiyen anĩ, Negur ã ifelnein.
- 23 Tamo enei nigin, Negurem ereb ereb wõya sã mog, yogon keleï ado kisi bunem, ï ã imeï bun inon, age fe di, ã tamo sesenem disenneï di, ï laa foug nigin, aa tetek bun tuti nem ũgen.
- 24 Anĩ ere, Negur ï laa bun tamal turĩ fe di, mata kel fã yen, laa nẽ darau bun tamal yalelnen, ere nigin, laa anim ï ironẽya kisi feleya sã.
- 25 Are Dawid ï nigin iron:
“ ‘Odug sain faimud malau bun ifar mog, ailedig.
Ï aya imau biyalem ibodok nigin, aya to kumĩ au fen, terẽ auf.
- 26 Anĩ nigin, neu wau seref fen, sigorou seli abidig, aya, ereb Negur aya bun biya age foug anĩ tari afedig,
- 27 ere nigin, õ neu malaukanon to utornẽ di, bouwau laa neid modoũ bun ibodõf, õ ogon Fateuleg to utorõ di, bura lauf.
- 28 Õ mata bun ileya nẽ naab ufelna fen, õ malã bun kulïya barikã wiyauf.‡
- 29 “Turau tar, aya ã yaor aro-keneik, tubuda Dawid ï laa fe di, mũ difen. Yogon matmat, ada atun naa enei bun fau ibodok.
- 30 Anĩ ere, ï profet taka, anĩ nigin, ï keleï, Negur wau kuturol fen, Dawid yogon ibor nẽ tubu tar bun tamal

taka, yogon king nẽ sia bun inenẽf nigin irokenen.

31 Dawid ï ereb fau wõya sã mog, anĩ tetunem ile fen, Kristus mata kel fã youf nigin eig ye wogõ yen, ‘Ï laa neid modoũ bun to ibodõf, ï bouwag to bura lauf,’ yen.

32 Negur Jesus enei turĩ fe di, ï mata kel fã yen anĩ, amã ganan mailen.

33 Negur ï ima biyalem yalesnẽ di, Jesus ï, Tama bun Awa Uur Fateul Negur afeneïf yen anĩ yale fen, fi felen, are ã gama ulegef ado karĩ gef anĩ.

34 Dawid saa ilun to iselen, anĩ ere, ï iron,

“ ‘Negur neu Odug irokenen:

“Imau biya melem ubod mog,

35 ogon kiwai tar

ogon ye inoya nẽ sawa anodiyouf.” §

36 “Anĩ nigin, Israel tamo kayau ganan enei keleï bagai youf, Jesus enei ã aa tetek bun ukesigen anĩ, Negur yogo, Odug ado Kristus inenen.”

37 Tamo kayau od enei karĩ de fen, idi waud gudũ fe di, Pita aposel tunĩ ganan geid dirokenẽdin, “Turamã tar, amã naig mafouf?”

38 Pita solof irokenẽdin, “Ã mugu mugu wauĩ falei wog fen, Jesus yana bunem naan iguneï di, ãgenei mosor nigin weder tu kalauf, ago ge di, ege luwa are Awa Uur Fateul walougouf.

39 Promis od are ãgenei, ãgenei kesu tar ado, idi gerõ difaref ani ganan neid, are Odug neda Negur iweignẽdiyof anĩ ganan neid.”

40 Age ye fen, Pita od musei bun, idi wedereid irou fen, total irokenẽdin, “Ã aug isenneïf nigin, tamo kayau sane sain enei bun tamal urab uraileg.”

41 Yogon od dalen idi naan igunẽdin, age dife di, naa anĩ bun, tri tausen tamo kayau age fiya, idi neid bun tobol difen.

Momoiya Tamo Kayau Neid Uyu Kũ Fiya

† 2:21: Joel 2:28-32 ‡ 2:28: Sam 16:8-11 § 2:35: Sam 110:1

⁴² Idi aposel neid ifelnēdiya, uyu kũ fiya, saaf weim yōya, kosēya bun, idi neid kisi adok dino fen, age difen.

⁴³ Tamo kayau ganan terē de inid ifitin. Age dife di, aposel idi, uris ado memelik musei dinon.

⁴⁴ Momoiya tamo kayau ganan weim dibod ken, safineid ganan gadō difedig.

⁴⁵ Safineid na nigin sur difeid fen, taka ĩ lau fef anī difenēdig.

⁴⁶ Naa ganan idi toku waud tekelei fen, tempel modoũ bun guru difedig. Idi dogo neid fō fō bun, kulīya ado waud adok an yen ken, weim saaf dōdig.

⁴⁷ Idi Negur yana dalesedig, tamo kayau ganan, idi nigin biya di-fiyēdidig, age dife di, Odug naa ganan bun, tamo kayau kel gei feid fen, idi neid bun tobol fedig.

3

Pita Tamo Nonī Tamal Ye Ilolaisin El Fiyen

¹ Naa taka bun, Pita Jon ado, tri kilok aragau kosēya sain nigin, tempel bun diselen.

² Tamo taka sina namen ye ilolaisin gō fen, tempel bobog yana ‘Meli Bagai’ dedig an faali de diroulen, an naa ganan bun dinenē di, ibod ken, tempel bun dilef anidi moni nigin nonī fiyēdidig.

³ Sain Pita Jon ado, tempel namen dilau fenē age dife di, ileid fen, moni nigin irokenēdin.

⁴ Anī ere, Pita Jon ado, ĩ lo difel fen, Pita iron, “Amā lo wamā!”

⁵ Age ye di, ĩ ereb difanauf ye fen, lo feidlen.

⁶ Age fe di, Pita iron, “Silwa be gol are aya sã, anī ere, ereb aya ado anī, õ afonok, are Jesus Kristus Nasaret tamal yana bunem uyō.”

⁷ Age ye fen, Pita tamo ima biyalē yale iroune ken, isennē yalesnen, kaisã bagai tamo nē ye guyu toledin.

⁸ ĩ gurusã ye ifar fen, iyōya gariya inon. Agef fen, ĩ weim tempel namen

dilen, iyō, gurusã ye fen, Negur yana yalesen.

⁹ Tamo kayau ganan ĩ iyo ken, Negur yana yalese di, dile fen,

¹⁰ idi, im bagai tempel bobog yana ‘Meli Bagai’ dedig bun ibod ken, nonī yedig den. Idi ĩ bun ereb wō yen anī nigin, fatuk bagai terē de fen, inid ifitin.

Pita Tempel Bun Od Wogō Yen

¹¹ Solomon nē Waranda dedig an, nonīya tamo anī, Pita Jon ado irounēdi di, tamo kayau ganan terē de fen, gududu de, idi gedin disin.

¹² Pita anī ile fen, idi irokenēdin, “Israel tamo, ere nigin eneim ã terē yeik de? Ere nigin nemã megeir bunem be, nemã Negur aniniya bunem, tamo enei el mafiyen gen amã lo wamãglef?”

¹³ Abraham, Isak, Jakop idi neid Negur, tubuda tar neid Negur im, yogon kabī tamo Jesus fula fiya medeīya ifenen. Ā ĩ dukesiyouf nigin wenēdig fen, Pailat ĩ itornē di, ilauf nigin kisi ino mog, ã Pailat mala bun ĩ nigin wa gen.

¹⁴ Ā, ĩ Fateul Madur tamo anī wag fen, tamo yukesiya tamo anī yaliskeneif nigin urokenēgen.

¹⁵ Ā mata nē gariya anī ukesigen, anī ere, Negur ĩ laa bun tamal yalesnen. Amã enei mailen nigin wogō mauf.

¹⁶ Jesus yana nigin momoiya bunem, Jesus yana anim, tamo enei ã kelei ken, ulegedig anī total ifenem. Momoiya ĩ bunem isif anim, tamo enei ã ganan log mog, el fiye kelel.

¹⁷ “Turau tar, aya keleĩ, ã āgenei uyu irouya geid, keleĩ sã nigin ago gen.

¹⁸ Anī ere, enei wōya sã mog, Negur profet ganan bun wogō yen, are yogon Kristus darau yalouf bagai, anī Negurem agef kisi felen.

¹⁹ Anī nigin, wauĩ falei ge fen, Negur bun uleg, anī bunem āgenei mosor isasalauf. Ago gouf, wauĩ mata wōya nē sain Odug bunem isi fen,

²⁰ Negur, Kristus ã nigin igirin, are Jesus sur foug.

²¹ Jesus fau de saa ilun ibod mog, Negur ereb ereb ganan mata inouf nê sain wõ youf, kulu yogon profet fateul sigoreid bun Negur wogõ yen kilei.

²² Moses iron, ‘Odug ãgenei Negur, profet taka aya gen, tamo kayau ã atun wõ ye keneif. ã ereb irokeneif ganan, karĩ goug bagai.

²³ Taka nem profet anĩ to karĩ fiyef, ã tamo kayau atun gai gai gudũf irailauf.*

²⁴ “Age fiya gen, profet ganan Samuel bun gariya ino fen, isin idig, gama naa eneidi bun ereb wowã yef isin anĩ nigin wogõ den.

²⁵ ã profet neid gere tar, Negur ãgenei tubuĩ tar geid bar iteneya inon, ã bar iteneya anĩ nê gere tar. Negur Abraham irokenen, ‘Ogon ibor bunem, tamo kayau teneub ganan bun el fediyouf.’†

²⁶ Negur yogon kabĩ tamo yalesne ken, ãgenei sane bun tamal, ã mugu mugu ganan falei ge di, el yeif nigin, ã bun ket Jesus sur fen.”

4

Pita Jon Ado Juda Neid Uyu Irouya Meleid Bun Difaren

¹ Pita Jon ado, tamo kayau od dirokeneid mog, pris tunĩ, tempel lo fiya tamo neid mudur, Sadusia tamo tunĩ geid, idi gedin disin.

² Idi fatuk bagai waud moron, ere nigin, aposel idi tamo kayau difelneid fen, Jesus laa bun tamal mata kel fã yen anĩ wogõ den.

³ Idi Pita Jon ado dirouneid fen, aragau nigin idi kalabus bun dinenedi di, ile we felen.

⁴ Anĩ ere, od karĩ den idi musei momoi den, momoiya tamo faif tausen age fiya wõ den.

⁵ Naa taka di, nedi uyu irouya, mudur adodo, lo ifelnediya tamo geid, Jerusalem guru difen.

⁶ Pris neid mudur Anas an ibodon, Kaiafas, Jon, Aleksanda, pris mudur neid ibor tunĩ ganan idig an dibodon.

⁷ Idi Pita Jon ado guri de dirousi, atũ difeid fen, to difedin, “Ere megeir bunem be, ere yana bunem enei ago gen?”

⁸ Age de di, Pita Awa Uur Fateulem aura fiyen ã, idi irokeneidin, “Tamo kayau neid uyu irouya, mudur adodo!

⁹ Amã gama, tamo ye ilolaisin bun ereb biya age mafe di, naig fe el fiyen nigin to wamãgoug are,

¹⁰ ã, Israel tamo kayau ganan geid enei keleĩ youf, ã Jesus Kristus Nasaret tamal aa tetek bun ukesigen, anĩ ere, Negur ã laa bun tamal yalesnen, ã yana bunem, tamo ã meleĩ bun ifaref enei el fiyen.

¹¹ Tamo are

“ ‘meein fõ inoya tamo ãgem sane ge fen, utorõgen,

anĩ gama monog tor wõ yen.’* ”

¹² Taka bun tamo kel gei fiya to ibodok, ere nigin, ada kel gei fadauf nigin, saa farumen yana taka to tamo ifenedin.”

¹³ Pita Jon ado skul ileya sã, fonõ tamo, are idi kelein, anĩ ere, idi kumĩ sã wogõ de di, dile fen, terẽ den. Age de fen, idi kelein, tamo eneidim Jesus geid diyon.

¹⁴ Anĩ ere, tamo el difiyen anĩ, Pita Jon ado geid difar mog, dilen nigin, idi ereb od irõya nigin od sã.

¹⁵ Anĩ nigin, Juda uyu irouya neid kaunsel guru fiya anĩ ditor dilauf nigin, idi dirokeneid, ditor dile di, idi dogo dogol katõ difen.

¹⁶ Idi diron, “Tamo eneidi ere naig tafiyediyouf? Idi memelik enei fire bagai dinon anĩ, Jerusalem dibodok idi ganan keleĩ, are ada wa fiya kisi feleya sã.

¹⁷ Anĩ ere, enei, tamo kayau bun to iyokalauf nigin, tamo eneidi Jesus yana bunem taka to wogõ difiyef nigin, ada wedereid tarouwauf bagai.”

* **3:23:** Diuteronomi 18:15, 18, 19 † **3:25:** Jenesi 22:18; 26:4 * **4:11:** Sam 118:22

¹⁸ Age de fen, idi baban namen di-weigneĩd, disi di, Jesus yana bunem to bagai wogõ douf be difelnēdiyof nigin, totol bagai dirokenēdin.

¹⁹ Anĩ ere, Pita Jon ado solo de dirokenēdin, “Negur mala bun, Negur dõ fiya ban, ã dõ mayeĩf, are tutuk de, sã de anĩ, ã aug es wog.

²⁰ Ereb amã mailen, karĩ maun nigin, sigoramã ifõya kisi feleya sã.”

²¹ Uyu irouya idi baban kumĩ od difeneĩd le fen, folõ difeid le di, dilen. Uyu irouya idi darau ifenēdiya nigin kisi taka to dalen, ere nigin, tamo kayau ganan ereb wõ yen anĩ nigin, Negur yana dalesen.

²² Tamo memelik dino fen, el di-fiyen are, yar foti wal feseya.

Momoiya Tamo Kayau Neid Kosēya

²³ Sain Pita Jon ado dalisnēdi di, idi dogo neid tamo kayau bun keku de dile fen, pris odudug mudur adodo geid, od dirokenēdin anĩ ganan wogõ difiyēdin.

²⁴ Idi od anĩ karĩ de fen, idi aiteid tekelei dales fen, Negur kosē difiyē diron, “Odug ereb ereb ganan nē Marau, õ saa, teneub, maaĩ, anidi namen ereb ereb ganan unodin.

²⁵ Tamamã Dawid, ogon kabĩ tamo sigor bun Awa Uur Fateulem wogõ won:

“ ‘Ere nigin haiden idi Odug bun seye de fen,
tamo kayau idi kiwai nē kisi are ege bagai dinof?

²⁶ Tenebur nē king idi kusīya nigin dodok difef,

uyu irouya tamo guru de fen,
Odug bun ado

yogon Kristus bun kiwai dinof.’†

²⁷ Momoi, Herod, Pontius Pailat idim, haiden, Israel tamo kayau geid, taun enei bun guru de fen, ogon kabĩ tamo fateul Jesus õ ogo ugin ĩ kiwai difenen.

²⁸ Õ ogon megeir ado oroya bunem agef wõ youf wo fen, tetun ufon anĩ kilei, idi age difen.

²⁹ Odug, gama idi dogo neid kumĩ od dinon anĩ kisi fen, amã ogon ferfer, ogon od kumĩ sã megeir ado wogõ mauf nigin megeir wanamã.

³⁰ Imã ura ken, dagi el wo, ago fen, ogon kabĩ tamo fateul Jesus yana bunem memelik uris ado unodiyouf.”

³¹ Kosē de bure difel mog, idi guru difen nē modoũ anĩ guyoyõ fen. Age fe di, idi ganan Awa Uur Fateulem aura fiyeĩd fen, toli fedi di, kumĩ sã Negur nē od wogõ den.

Momoiya Tamo Kayau Dogo Neid Safina Weim Dile Dogolen

³² Momoiya tamo kayau ganan waud ado kisi tekelein. Taka nem, yogon safina taka to neu mugu yen, anĩ ere, ereb ereb ganan idi ado are weim dile dogolen.

³³ Aposel idi megeir odug nem, Odug Jesus mata kel fã yen nigin wogõ den, age dife di, Negur nē wau ifenēya odug, idi ganan bun ibodon.

³⁴ Age fe di, idi atun taka nem ereb taka to lau fen, ere nigin, teneub be fõ adodo anĩ na nigin sur difeid fen, moni dale dirou disi,

³⁵ aposel imeid bun dinodig, anĩ gadõ de fen, taka ĩ lau fef anĩ difenēdig.

³⁶ Josef, Lewi ibor taka, Saipras nuyo tamal, aposel idi ĩ anĩ Banabas dedig (anĩ nē gariya, Wau Yaleya Tamo),

³⁷ ĩ yogon teneub na nigin sur fe fen, moni yale, aposel imeid bun inon.

5

Ananias Safira Ado

¹ Tamo taka yana Ananias, aiwa Safira ado, nedi safina taka na nigin sur difen.

² ĩ, yogon aiwa anĩ ganan keleĩ mog, moni tunĩ yogon nigin irou fen, tunĩ anĩ yale iroule, aposel imeid bun inon.

³ Age fe di, Pita iron, “Ananias, naig fe di, Satan waũ bun isokose di,

† 4:26: Sam 2:1, 2

Awa Uur Fateul udegne ken, moni teneub nē walen anī tunī ogon nigin urouf?

⁴ Fau na sur fiya sã mog are ogonen, na nigin sur wol fen, moni areg ogonek. Ere nigin õ waũ bun enei ago wouf nigin kisi unol? Õ tamo to udegnēdil, are õ Negur udegnem.”

⁵ Ananias od enei karī ye fen, ī kubū ye laaf yenen. Ganan od enei karī den, idi kumī tererē den.

⁶ Age fe di, tamo gaũ gaũ disi, yogon bouwa sile de, faali de diroule, mū difen.

⁷ Tri aua age fiya ilele di, aiwa gober erēb wō yen anī keleī sa ken, isin.

⁸ Age fe di, Pita kayau to fiyen, “Urokana, õ aiwã ado teneub nē moni de enei kilei walegen de?”

Kayau iron, “Ao, de enei kilei dogol.”

⁹ Age ye di, Pita kayau irokenen, “Naig fe di, õ aiwã ado wauī tekelei fen, Odug nē Awa Uur kisi wiyēgel? Ulef, tamo idi ogon aiwã mū difel, idi neid yebureid yer bobogē, õg idi age de faali de dirouleyōf.”

¹⁰ Agef irokenē di, kaisã bagai, Pita ye gariyan, kayau are kubū ye laa fen. Age fe di, tamo gaũ namen disi, kayau laa fel dile fen, faali de diroule, aiwa mū difen sirin mū difen.

¹¹ Sios adok, tamo kayau ganān od enei karī den idi geid, fatuk bagai kumī den.

Aposel Idi Tamo Kayau Musei El Difedin

¹² Aposel idi tamo kayau atun memelik uris ado musei dinodin. Age dife di, momoiya tamo kayau ganān Solomon nē Waranda bun guru difedig.

¹³ Tamo kayau idi nigin yeneid dalesedig, anī ere, idi kumī de fen, taka nem idi geid to bagu difen.

¹⁴ Anī ere, tamo kayau musei Odug nigin momoi de di, momoiya tamo kayau baba baban tobol fef iselen.

¹⁵ Aposel age difef ya anī keleī ken, tamo kayau dagi adodo naabur guri

difedi di, fatar bun ado gogoũ bun dinenādin, are Pita ile di, yogon burig idi tunī bun irā di, el be fediyouf de fen, age difen.

¹⁶ Tamo kayau musei Jerusalem kalilī fiya taun temeideg, dogo neid dagi adodo, kaa sesenem darau difenēdin anidi guri de dirou disi di, idi ganān el difiyēdin.

Idi Aposel Darau Difenēdin

¹⁷ Age dife di, pris neid mudur ī, yogon katō tura tar are Sadusia tamo geid, kiyeī beberīdin.

¹⁸ Idi aposel dirouneīd fen, kalabus bun dinenēdin.

¹⁹ Anī ere, bō anī bun, Odug nē engel kalabus fō sukar kā feleid, gurif, mayarē disi fen, irokenēdin,

²⁰ “Ulagauf, tempel bun ufareg fen, tamo kayau mata enei nē od ganān urokenēdig.”

²¹ Idi irokenēdin kilei, bonimeī bagai idi tempel bun dile fen, tamo kayau ifelnēdiya gariya dinon.

Sain pris neid mudur, yogon katō tura tar geid disi di, idi Israel neid uyu irouya ganān neid guru fiya yana Sanhedrin dedig anī diroun, age de fen, idi aposel kalabus bun temeideg guri difeid dirou disiyouf nigin tamo sur difedin.

²² Anī ere, sain kabī tamo kalabus fō bun dilen, aposel an to diledin. Anī nigin, idi keku de dile dirokenēdin,

²³ “Amā kalabus fō kotū feleya ado lo fiya tamo bobog bun difar mog, mailedil, anī ere, sukar kā mafel fen, an taka nem to ibod mog maillel.”

²⁴ Od anī karī de fen, tempel lo fiya tamo neid mudur, pris odudug geid, nene de fen, enei bunem naig be fe wō youf de fen, sii fedin.

²⁵ Age de mog, taka nem isi iron, “Ulegef! Tamo kalabus bun unenēdigen idi tempel bun difar fen, tamo kayau difelnēdif.”

²⁶ Age ye di, tempel lo fiya tamo neid mudur, yogon kabī tamo geid, dile, aposel gei difeid fen, dirou disin. Idi to sibu difiyēid fen, daũ

difiyēdin, ere nigin, idi tamo kayau meein tulu difiyēdiya nigin kumī difiyēdin.

²⁷ Idi aposel gei de dirousi, Israel uyu irouya neid guru fiya meleid bun difarnēdi di, pris neid mudur idi to fiyeid

²⁸ iron, “Amā yana enei bunem to ufelnēdigouf nigin, totol bagai katū mayein, anī ere, ā wogō ge di, ā ufelnēdigen anī Jerusalem ganan bun iyokelen, ago ge di, tamo enei nē naud amā bouwamā bun unogef.”

²⁹ Pita aposel ganan geid aiten dale diron, “Amā tamo aiteid dō fiya ban, Negur ait anī dō mafouf bagai.

³⁰ Jesus laa fouf nigin aa bun useginnēgen, anī ere, tamada tar neid Negurem Jesus laa bun tamal yalesnen.

³¹ Ī Negurem yalesne ken, ima biyalē neda King, neda Kel Gei Fada inenen, are Negurem Israel tamo kayau waud falei fe di, nedi mosor weder tu kalauf nigin age fen.

³² Amā enei mailen anī yaor ma wogō mauf, Awa Uur Fateul, are Negur dō difef anidi ifenēdin, ĩg age fef.”

³³ Idi od enei karī de fen, idi seye de, didenkesiyouf nigin age difen.

³⁴ Anī ere, Farisia tamo taka yana Gamaliel, ĩ lo ifelnēdiya tamo, tamo kayau ganan ĩ yana dalesedig, ĩ guru fiya atun ifar fen, aposel idi sain naal mayarē dinenēdiyof nigin irokenēdin.

³⁵ Age dife di, ĩ idi irokenēdin, “Israel tamo, ā tamo eneidi ereb naig wiyēdigou fenē are, ā kisi el ge waleg le fen, ago gouf.

³⁶ Kulu sain taka bun, Teudas ĩ yogo anī tamo odug ye fen, wō yen, age fe di, fo handred tamo age fiya dō difiyen, anī ere, ĩ dukesi di, yogon dō fiya tar ganan firagagaū dife, ege sa kelen.

³⁷ Tamo enei dumen, Judas Galili tamal, tamo kayau yeneid iweseya sain bun wō ye fen, tamo kayau geif yalen, anī ere, ĩg dukesi di, yogon dō fiya tar ganan firagagaū difen.

³⁸ Anī nigin, enei nigin aya ā aro-keneik, tamo eneidi utornēdig len dile! Idi ereb kisi difef be, ereb age difef, are tamo bun tamal ouf are, fau sa kalauf.

³⁹ Anī ere, enei Negur bun tamal ouf are, ā tamo eneidi katū fiyēdiya kisi feleya sā, age fiya ban, ā aug Negur geid kusī gef anī ulogouf.”

⁴⁰ Age ye di, idi yogon od diroun. Idi aposel diweigneid, namen dile di, wagagā difedin, age de fen, idi baban Jesus yana bunem to wogō douf nigin dirokeneid fen, ditornēdi di, dilen.

⁴¹ Aposel idi kaunsel guru fiya anī ditor dile fen, kulī den, ere nigin, Negur kisi fen, are idi Jesus yana nigin mama dalouf nigin kisi feleya.

⁴² Naa ganan, tempel bun ado fō bun fō bun dile, toku difelneid fen, biya od wogō de, Jesus ĩ Kristus den.

6

Tamo Sewen Digirnēdin

¹ Sain anī bun, dō fiya tamo kayau musei di, Juda tamo kayau Grik od wogō dedig anidim, Juda tamo kayau Hibu od wogō dedig anidi nauseir difiyēdin, ere nigin, idi neid kayau waab naa ganan saaf gadō fiya bun ditornēdidig.

² Anī nigin, aposel tuwelf idim, dō fiya tamo kayau ganan kuru difeid fen, diron, “Amam Negur nē od wogōya kabī mator ken, saaf lo fiya kabī malouf, are to biya.

³ Anī nigin, turamā tar, ā atun tamo sewen Awa Uur ado kisi biya barikā nigin yeneid walesegedig anidi ugirnēdig. Kabī enei amā idi bun manouf.

⁴ Age ma fen, amā, kosēya ado od wogōya kabī bun dogol, kabī totol malouf.”

⁵ Od enei karī de fen, idi ganan yo den. Idi digirin, Stiwen, ĩ tamo momoiya ado Awa Uur Fateul barikā, taka Filip, Prokoros, Nikanor, Timon, Pamenas, Nikolas Antiok tamal ĩ Juda neid momoiya bun falei ye fen, Kristus nē momoiya yalen.

⁶ Age dife fen, idi, tamo anidi aposel wagedin dinenēdi di, aposel idi kosē del fen, imeid tetedin dinon.

⁷ Negur nē od iyokelen. Jerusalem an, dō fiya tamo kayau tobol fe, musei biya wowā den. Age dife di, pris musei idig momoiya anī dō difen.

Idi Stiwen Ka Difen

⁸ Stiwen ī, Negur nē wau ifenēya ado megeir barikā tamo, ī tamo kayau atun memelik uris ado odudug inodin.

⁹ Anī ere, fefeya yenen, Friman* dedig neid uub fō bun temeleid tamo, are idi Juda tamo Sairini ado Aleksandria taun temeleid ado, Silisia ado Asia provins bun temeleid anidim, Stiwen geid fefe den.

¹⁰ Anī ere, Stiwen ī kisi biya ado Awa Ur bunem wogō yen anī, idim wal fiyēya kisi feleya sā.

¹¹ Age fe di, idi iminēyan, tamo tunī eig de dirōf nigin waud dalen, “Stiwen ī Moses ado Negur nigin kono fiya od wogō ye di, karī maun.”

¹² Idi od anim, tamo kayau, uyu iroudiya tamo ado, lo ifelnēdiya tamo geid nameid dalesen. Age dife di, idi Stiwen ka dife, Juda uyu irouya tamo neid guru fiya bun diroulen.

¹³ Idi, tamo tunī idegēya od wogō douf nigin, guri de disi di, diron, “Tamo enei faimud sigor taka to ifōdig, Negur nē tempel enei nigin ado, Moses nē Lo nigin, kiwai od wogō yedig.

¹⁴ Ere nigin, amā karī mafiyē mog, ī iron, Jesus Nasaret tamal eneim, modoū enei narī fel fen, Moses nē tobonunā ifanadan anī falei foug yen.”

¹⁵ Ganan kaunsel guru fiya anī bun dibodon idi, Stiwen lo difelen, ī nawa engel nawa gen dilen.

7

Juda Uyu Irouya Neid Guru Fiya Meleid Bun Stiwen Wogō Yen

¹ Age de fen, pris neid mudur Stiwen to fiyen, “Od wogō den enei, are momoi de?”

² Stiwen solof iron, “Turau tar ado Dei geg, karī wiyag, tubuda Abraham Haran taun fau ileyā san, Mesopotamia ibod mog, fula fiya medēiya nē Negur ī bun wō yen.

³ Negur Abraham irokenen, ‘Ogon teneub ado ogon tamo kayau utorneid fen, teneub aya afelnōf nē an ulauf.’*

⁴ “Anī nigin, ī Kaldia teneub itor ken, Haran ile ibodon. Dum yogon tama laa fe di, Negur ī sur fiyē di, teneub gama ubodōgef enei bun ibodon.

⁵ Negur Abraham ein teneub taka to ifenen, teneub masak bagaig taka to ifenen. Anī ere, Negur, Abraham ī dumen yogon ibor nē tubu tar geid, teneub anī afenēdiyof yen, anī ere, sain anī bun Abraham ī kesu san.

⁶ Negur Abraham eig ye irokenen, ‘Ogon ibor nē tubū tar, yaū tamo teneub taka bun dibodōf, an idi ferfer dibodōf, fo handred yar to biya difiyēdiyof.

⁷ Anī ere, aya, idi ferfer dibod ken, aruneid dalef neid teneub darau afenēf, anī dumen, idi teneub anī bun tamal diya disi, modoū enī bun aya arunau dalouf.†

⁸ Agef fen, Negur Abraham bar itenēya nē uris, mulū anī ifenen. Age fe di, Abraham naal Isak wō ye, naa eit ilele di, mulū ifenen, dumen Isak naal Jakop wō yen, Jakop ī tubuda tar tuwelf neid temeid ibodon.

⁹ “Tubuda tar, Josef kiyeī difen ken, Josef Isip neid ferfer wō youf nigin, na nē sur difen. Anī ere, Negur ī adon,

¹⁰ agef fen, Negur Josef morō ganan bun isennen. Negur ī, Josef Isip nē king Farao mala bun, kisi biya ado wau ifenēya anī ifenē di, Farao ī, Josef Isip teneub ado yogon fō ganan lo fiya nigin uyu irouya inenen.

* 6:9: Are idi Juda tamo kulu ferfer dibodon, anī ere, idi gama ferfer sā. * 7:3: Jenesis 12:1

† 7:7: Jenesis 15:13, 14

11 “Age fe di, Isip teneub ado Kanan teneub ganan bun, naũ odug wõ ye di, morõ odug dalen, age fe di, tubuda tar saaf fotou fiya kisi feleya san.

12 Anĩ ere, Jakop, Isip oun saaf ado ya karĩ ye fen, tamada tar urug bagai sur fedin.

13 Idi baban dile di, Josef ĩ yogo nigin tura tar bun yaor fen, age fe di, Farao ĩ Josef nē ibor nigin kelein.

14 Anĩ dumen, Josef, tama Jakop ado yogon ibor ganan Isip dilauf nigin od sur fen, idi ganan sewenti-faif.

15 Age fe di, Jakop Isip ilen, an ĩ ado tubuda tar gare desin.

16 Idi neid bouweid keku de, Sikem taun guri de diroule, kulu Abraham Sikem oun, Hamor gere tar bun moni nem matmat na yalen anĩ bun mumã difen.

17 “Negur Abraham irokenen anĩ kisi falauf nigin sain dodol mog, Isip oun neda tamo kayau musei biya isoran.

18 Age dife di, king taka ĩ Josef nigin keleĩ sã, ĩ bagam Isip nē king wõ yen.

19 ĩ ada neda tamo kayau idegneĩd fen, darau ifenēdin, are tubuda tar nugo fiyēdi di, idi neid kesu momou sineid gogũ difedif anĩ, mayarē dirarã di, gare douf nigin age fen.

20 “Sain anĩ bun, Moses wõ yen, ĩ Negur mala bun kesu meli bagai. Ogõ towo, tama nē fõ bun kulatun difen.

21 Sain ĩ mayarē dinenē di, Farao ne baraim yalen, ĩ yogon kesu ouf nigin yale iroulen.

22 Moses ĩ, Isip neid keleĩ biya adok difelnē di, wogõya bun ado ereb ereb age fediya nigin, tamo megeir ado wõ yen.

23 “Moses ĩ yogon yar foti mog, ĩ Israel tura tar ki fediyouf nigin kisi fen.

24 Moses ĩ, idi neid taka Isip tamom to biya fiyē mog, ilen, anĩ nigin, ĩ Israel tura isenne ken, aba solof Isip tamo anĩ yukessin.

25 Moses kisi fen, yogon tamo kayau keleĩ youf, are Negurem idi kafĩ fiya bun tamal gei fediyouf nigin, ĩ itonek, anĩ ere, idi to kelein.

26 We fele di, Israel tamo kusĩ de mog, Moses wõ yen. ĩ, idi komo difouf nigin daũ gudũf fen, iron, ‘Are ã tutur, ere nigin ã abob darau wenēgef?’

27 “Anĩ ere, tamo ĩ, ne tã darau ifenen anim, Moses sur fiyē ira ken, iron, ‘Aim õ amã bun, uyu irouya ado es fiya tamo inenon?’

28 Õ nor Isip tamo ukesin gen, ayag ago unakesiyou fenē de?‡

29 Moses od enei karĩ ye fen, ĩ Midian teneub bun iya ilen, an ĩ yaũ tamo ibod ken, kesu monog uru adon.

30 “Yar foti ilele di, engel taka, gerere tuan Sinai Arei non, aa balai duri ado an yã bale namen, Moses bun wõ yen.

31 Moses anĩ ile fen, terefeit yen. ĩ tutuk ilouf nigin aa non iyok ile mog, ĩ Odug nē ait karĩ yen,

32 ‘Aya tubuĩ tar neid Negur, Abraham, Isak, Jakop idi neid Negur.’Š Moses kumĩ tererē ye fen, lo fiya itoron.

33 “Age fe di, Odug Moses irokenen, ‘Ogon sendel unukakã, ere nigin, modoũ õ ufaref nē are fateul teneub.

34 Momoi, aya neu tamo kayau Isip oun darau fatuk bagai dale mog, ailen. Aya idi neid kaĩya karĩ au fen, idi kafĩ fiya bun tamal alelnēdiyof nigin asin. Anĩ nigin, gama usi, aya sur ayõ di, Isip kel ulauf.’*

35 “Moses enei, idi kulu ĩ nigin eig de diro ken, ditoron, ‘Aim õ amã bun uyu irouya ado es fiya tamo inenon?’ De ĩ anĩ, Negurem idi uyu iroukenēdiyof nigin ado kafĩ fiya bun tamal yalelnēdiyof nigin, engel aa balai bun yã bale namen Moses mala bun wõ yen anĩ bunem sur fiyen.

36 Moses ĩ, tamo kayau Isip temeleid uyu iroukeneĩd fen, Isip an,

‡ 7:28: Eksodas 2:14 § 7:32: Eksodas 3:6 * 7:34: Eksodas 3:5, 7, 8, 10

Maaĩ Giriya bun ado, yar foti gerere tuan, memelik uris ado inodin.

³⁷ “Moses de anim, Israel tamo kayau eig ye irokenēdin, ‘Negur ĩ, āgenei tamo kayau bun tamal, profet taka aya gen sur feneĩf.’†

³⁸ ĩ, engel Sinai Arei bun wogō fiyen anĩ ado tubuda tar geid, gerere tuan tamo kayau guru fiya atun ibod ken, mata ibodōya od ifenēdi di, tobol fe isi, ā bun isiyouf nigin od anĩ yalen.

³⁹ “Anĩ ere, tubuda tar, Moses nē od dō fiya ditoron. Idi Moses anĩ ditor ken, Isip kel ilya nigin waud iron.

⁴⁰ Age de fen, idi Aron dirokenen, ‘Uyu diroukanamāf nigin, waitou uneye kanamādiyof. Ere nigin, Moses enei, Isip tamal gei famā irosin ĩ bun ereb wō yen are, amā keleĩ sã.’‡

⁴¹ Sain anĩ bun, idi idegēya waitou bulmakau lubu dinon. Idi anĩ bun sesewi dife fen, idi imedim dinon anĩ nigin seli dabiyou fenē, tar odug dinon.

⁴² Anĩ nigin, Negur idi itornēdi di, saa ilun nē megeir anĩ seli dabiyouf nigin folō feid len. Are profet neid buk bun itotoya yenek kilei:

“ ‘O Israel tamo kayau, ā gerere tuan
oun, foti yar bun, sesewi fiya
ado ofa wanagen,
anĩ ere, ā aya yanau to seli wabi-
gen.

⁴³ Ā idegēya waitou Molek nē salafat unog fen,
āgenei waitou Refan nē barisa
yana walesegen,
are idegēya waitou ā selid
wabidigouf nigin unodigen.

Anĩ nigin, aya ā āgenei teneub bun tamal alelnei ken, oun Babilon kantri ubodōgouf nigin sur ayeĩf.’§

⁴⁴ “Sain neda tubuda tar gerere tuan dibodon, idi Negur nē salafat adon, salafat anĩ bun Negur ibod

ken, od wogō yedig. Salafat are, Negur Moses irokenē di, Negur Moses ifelnen kilei bagai dinon.

⁴⁵ Neda tubuda tar, salafat dalen anĩ dirou fen, Josuam uyu irou di, Negur tubuda tar meleid bun haiden irud iraile, diya di, teneub anĩ dalen an salafat dirou disin. Salafat anĩ, teneub anĩ bun ibodon, ile Dawid nē sain bun.

⁴⁶ Negur Dawid isennē el fe di, Dawid wau el fen, anĩ Jakop nē Negur ibodōf nē modoũ, inim inouf nigin Negur irokenen.

⁴⁷ Anĩ ere, Dawid naal Solomon im, Negur nē fō inon.

⁴⁸ “Anĩ ere, Negur Ilun Bagai ĩ, tamo imedim fō dinof anĩ bun to ibodōdig, are profet eig ye irok kilei:

⁴⁹ “ ‘Odug irok, saa are neu king nē
sia,
teneub are yeu inoya nē sawa.

Ā ere fō anĩ aya unokanagauf?

Neu si inoya nē modoũ nain
ibodok?

⁵⁰ Aya imaum eneidi ganam to anodin
de?’*

⁵¹ “Ā uleĩ teregein yediya tamo, ā wauĩ ado wedereĩ fitok yukeledin! Ā āgenei tubuĩ tar gen, faimud Awa Uur Fateul dudum wiyēgedig!

⁵² Tubuĩ tar profet taka to darau difenen de? Tubuĩ tar idi, Madur Tamo anĩ fau isiyouf de fen, wogō den tamo anidig didenkesin. Are gama Madur Tamo anĩ kiwai wenēg fen, ukesigen.

⁵³ Ā, lo engel bunem kabĩ bun difenen anĩ walegen, anĩ ere, ā anĩ to dō gen.”

Stiwen Meein Tulu Difiyen

⁵⁴ Idi enei karĩ de fen, idi nameid fatuk bagai sane fen, ĩ nigin goboreid kikokō yedin.

⁵⁵ Anĩ ere, Stiwen, Awa Uur Fateulem barikã, saa ilun mala ira ken, Negur nē fula fiya medeĩya ado Negur ima biya melē Jesus ifar mog, ilen.

† 7:37: Diuteronomi 18:15 ‡ 7:40: Eksodas 32:1 § 7:43: Amos 5:25-27 * 7:50: Asaia 66:1, 2

⁵⁶ Agef fen, Stiwen iron, “Ulegef, aya saa kã fele di, Tamo Naal Negur ima biyalê ifar mog, ailef.”

⁵⁷ Age ye di, idi aiteid odugem kakaï de, imedim wedereid fitok du ken, idi adok ï garan gududu den.

⁵⁸ Idi taun tamal Stiwen dï de dirou dile, serê meein tulu difiyen. Age dife mog, Stiwen bou bun od dun idi, nedi kolos dinukaka ken, tamo gaũ yana Sol ï ye gariyan gõ difen.

⁵⁹ Idi Stiwen meein tulu difiyê mog, Stiwen kosê yen, “Odug Jesus, neu uur wale.”

⁶⁰ Age ye fen, ï ibor itenana ken, wade iweig iron, “Odug, mosor age difef enei mala solo to wenêdiyof.” ï agef irokel fen, laa fen.

8

¹ Sol ï Stiwen dukesiyouf nigin, idi geid waud tekelein.

Sol Sios Darau Ifenen

Naa anï bun, darau odug Jerusalem sios bun wõ yen. Age fe di, momoiya tamo kayau ganan firagagaũ dife, Judia ado Samaria distrik bun dilelen, aposel dogol Jerusalem difaren.

² Negur oroya dõ difedig tamo tunï Stiwen mũ difel fen, ï nigin waud fatuk gudũf, inã loguren.

³ Anï ere, Sol gariya ino, sios daũ fouf nigin age fen. ï fõ bun fõ bun ile fen, momoiya tamo kayau geif fen, kalabus bun inenêdin.

Filip Samaria Ilen

⁴ Momoiya tamo kayau firagagaũ de dilelen, idi dilelen nê an biya od wogõ den.

⁵ Filip Samaria neid taun taka bun ile fen, an Kristus nigin wogõ yen.

⁶ Tamo kayau, Filip nê od karï den ado ï memelik inodin anï dile fen, idi ganan Filip wogõ yen anï bun kisi fatuk dino, karï difiyen.

⁷ Tamo kayau musei bun tamal, kaa sesen kakaï de ulolõ deis diyalelen, ilolaisin musei ado yeid fefu fedin musei el fedin.

⁸ Anï nigin, taun anï bun kulïya odug adon.

Idegëya Waitou Kosê Fiyêdig Tamo Simon

⁹ Tamo taka yana Simon dedig an ibodon, ï taun anï bun idegëya kosê inodidig, anï bunem Samaria tamo kayau ganan terê fiyêdidig. ï yogo nigin anï, aya tamo odug yedig.

¹⁰ Age fe di, tamo kayau yeneid adodo, yeneid sãsã geid ganan, ï bun kisi fatuk dino karï difiye ken, diron, “Tamo enei, Negur nê megeir, Megeir Odug dedig anï.”

¹¹ Idi ï bun kisi fatuk dino karï difiyen, ere nigin, ï sain meluk idegëya kosê bunem terê fiyêdidig.

¹² Anï ere, sain Filip Negur nê tano ado Jesus Kristus yana nigin biya od wogõ ye di, idi in od momoi den, age dife di, idi naan igunêdin, tamo ado kayau geid.

¹³ Simon ïg momoi ye di, naan igunen. Agef fen, Filip nain be ilef are, ï dõ felef iyo ken, memelik uris ado odudug wõ yedin anï ileid fen, terê yen.

¹⁴ Aposel Jerusalem dibodon idi, Samaria tamo kayau, Negur nê od mogo dalen anï karï de fen, idi, Pita Jon ado, idi gedin sur difedin.

¹⁵ Idi an wõ de fen, Samaria tamo kayau Awa Uur Fateul dalouf nigin kosê den,

¹⁶ ere nigin, Awa Uur Fateul idi taka bun fau isiya san, idi Odug Jesus yana bunem naan igunêdin dogol.

¹⁷ Age dife fen, Pita Jon ado, imeid idi tetedin dino di, idi Awa Uur Fateul dalen.

¹⁸ Aposel imeid tamo kayau tetedin dino di, tamo kayau Awa Uur ifenêdin, Simon anï ile fen, aposel moni ifenêdiyof nigin agef fen,

¹⁹ iron, “Ayag megeir enei wanage di, taka teten imau ano di, Awa Uur Fateul yalouf.”

²⁰ Age ye di, Pita ï irokenen, “Ogon moni õ ado inanakalauf, ere nigin, õ Negur nê ege luwa, Awa Uur Fateul moni nem na yaleya kisi feleya wol.

21 Õ amã nemã kabī bun, amã geid katō tekelei sã, nemã kabī taka to walef, ere nigin, Negur mala bun waū tutuk sã.

22 Ani nigin, sane enei nigin waū falei wo fen, Odug bun kosē wo. Õ waū bun kisi agef yenek anī nigin Odug weder tu kalauf be.

23 Ere nigin, õ waū bun dirikeī bagai fen, mosorem ironok anī ailef.”

24 Age ye di, Simon solof iron, “Ereb ā wogō gel anī, aya bun to wō youf nigin, Odug kosē wiyēg.”

25 Pita Jon ado, Odug nē od kurō difeis fen, wogō difiyēdin, age difel fen, idi Jerusalem keku de, naab luwen Samaria fonō musei bun biya od wogō de dilen.

Filip Itiopia Tamo Ado

26 Odug nē engel Filip irokenen, “Fã wo fen, õ saut melem naab gerere tuan ibodok an ule, naab are Jerusalem isil, Gasa taun wō yen.”

27 Anī nigin, Filip fã ye fen, ilen, luwen Itiopia tamo faat korō feleya anī ī ket ile mog, fotou fiyen, tamo are Itiopia nē kuin Kandasi nē safina ganan lo fiya tamo, yana odug ado. Ī Negur yana yalesauf nigin Jerusalem ilen,

28 Ī karis bun ibod ken, kel yogon fonō naab yale ile fen, profet Asaia nē buk iwesef ilen.

29 Awa Uur Filip irokenen, “Karis anī garan ule fen, non ufar.”

30 Age ye di, Filip karis anī garan gududu ye isel, tamo anī profet Asaia nē buk iwes mog, karī ye fen, to fiyen, “Õ uwesef anī nē gariya keleī de?”

31 Ī iron, “Tamo takam to faded fiyauf are, naig fe di, aya keleī youf?” Anī nigin, Ī Filip isel, urom karis bun dibodōf nigin irokenen.

32 Faat korō feleya tamo are, Negur nē Itotoya bun yenek enei iwesen:

“Ī sipsip dukesiyouf nigin dirou dilen gen dirou dilen,
ī, sipsip momou siwi gudū fiya tamo wagen dē yeledig gen,
od taka to wogō yen.

33 Ī lai difiye ken, Ī to tutuk es difiyen. Taka nem yogon ibor nē tubu tar nigin to wogō youf,
ere nigin, yogon mata tenebur ein dalelen.”*

34 Faat korō feleya tamo Filip to fiyen, “Profet ai nigin enei wogō yef anī urokana, Ī yogo nigin de, tamo taka nigin?”

35 Age ye di, Filip Negur nē Itotoya enei bun gariya ino fen, Jesus nigin biya od wogō fiyen.

36 Idi naab diyok dile fen, naan taka bun disi fen, faat korō feleya tamo iron, “Ulef, naan yeir, erem anī aya naan igunauf nigin katū fiyaf?”†

38 Age ye fen, Ī karis irou dē yalauf nigin irokenen. Age fe di, Ī Filip ado kututū deis, naanū disil fen, Filipem naan igunen.

39 Sain idi naanū tamal disele di, Odug nē Awa Uur Filip yale irou ilen, age fe di, faat korō feleya tamo Filip baban to ilen, anī ere, Ī kulīya odug ado naab iyok ilen.

40 Anī ere, Filip Asdot taun wō ye, naab iyok ile fen, taun ganan bun biya od wogō yef ile, Sisaria taun wō yen.

9

Sol Wau Falei Yen (Aposel 22:6-16; 26:12-18)

1 Sain anī bun, Sol Ī fau fau Odug nē dō fiya tar idenkesiya nigin wau ifokel fen, kumī ifenēdif isin. Anī nigin, Ī pris neid mudur garan ile fen,

2 Damaskus taun oun Juda neid uub fō fō bun pas itotkenēdiyof nigin irokenen, are Ī an Odug nē naab dō difef anidi, tamo be kayau be, taka fotou fiyēf are, ifokel yale, Jerusalem irou ilauf nigin age fen.

* 8:33: Asaia 53:7, 8 † 8:36: Itotoya dum ditoton tunī eig ye irok: *fiyaf?*” 37 Age ye di, Filip Ī irokenen, “Õ waū adok momoi youf are, õ naan agunōf.” Faat korō feleya tamo solof iron, “Aya momoi auf, Jesus Kristus Ī Negur Naal.”

³ Sol ï ile Damaskus wõ you fenë mog, kaisã bagai, fula fiya taka saa ilun tamal, ï bun fulaf irailen.

⁴ Age fe di, ï tenebur kubũ ye isil fen, ait taka wogõ fiyë mog, karĩ yen, “Sol, Sol, ere nigin õ aya daig wiyaf?”

⁵ Age ye di, Sol to fen, “Odug, õ aim?”

Ï iron, “Aya Jesus, õ daig wiyaf anim.

⁶ Fã wale fen, taun ule, an õ ereb ago wouf nigin irokonõf.”

⁷ Tamo tunĩ Sol geid dilen idi, an terefeit de mã, mutũ difaren. Idi ait karĩ den, anĩ ere, aib taka to dilen.

⁸ Sol tenebur tamal fã yale, mala birikã felen, anĩ ere, ï ereb taka ileya kisi feleya san. Anĩ nigin, idi ima gim de, Damaskus diroulen.

⁹ Ï naa towo lo fiya kisi feleya san, agef fen, saaf ado naaneg to yon.

¹⁰ Damaskus an, dõ fiya tamo taka yana Ananias ibodon. Ï mala seleulã kurã fen sain, Odug ï irokenen, “Ananias!” fiyë di,

ï iron, “Odug, aya yeir.”

¹¹ Odug Ananias irokenen, “Fã wale, naab yana Naab Madur dedig an, Judas nẽ fõ bun ule fen, tamo taka Tasus tamal, yana Sol nigin to wouf. Ï kosë yef ibodok.

¹² Ï mala seleulã kurãf fen, tamo taka yana Ananias isi, baban mala lo fouf nigin ima teten ino mog, ilen.”

¹³ Ananias solof iron, “Odug, aya tamo enĩ nẽ od, Jerusalem oun ogon tamo kayau fateul daig fiyëdin, are museim mogo dirokana di, karĩ aun.

¹⁴ Ï, tamo kayau ganan õ yana seli dabidig anidi, kafĩ fiya bun inenëdiyof nigin, pris odudug bun tamal megeir yale fen, ein isin.”

¹⁵ Anĩ ere, Odug Ananias irokenen, “Õ ulauf, tamo enei are, neu yanau, haiden, dogo neid king ado, Israel tamo kayau bun irou ilauf nigin agirnen.

¹⁶ Ï aya yanau nigin darau naig be fiya yalouf are, fau aya yug afelnëf.”

¹⁷ Age ye di, Ananias fõ anĩ bun ilen, aaben ile fen, ima Sol teten ino fen, iron, “Turau Sol, Odug Jesus õ

ein usi mog, naabur õ bun wõ yen ï, õ baban malã kelë wol fen, Awa Uur Fateul aura yõf nigin sur fiyal.”

¹⁸ Kaisã bagai, Sol mala bun tamal, ereb gau genĩ gen anĩ kuku ralaisin, age fe di, ï baban mala kelë yelen. Ï fã yale di, naan igunen.

¹⁹ Age fel fen, saaf yõ di, ï bouwa baban total kel yalen.

Sol Ï Damaskus Ado Jerusalem An Biya Od Wogõ Yen

Sol ï, Damaskus an, naa tunĩ dõ fiya tar geid dibodon.

²⁰ Ï kaisã bagai gariya ino, Juda neid uub fõ fõ bun od wogõ ye iron, Jesus ï Negur Naal yen.

²¹ Idi ganan ï karĩ difiyen idi terë de fen, to difen, “Im anĩ, Jerusalem oun Jesus yana diweignëdig tamo kayau tadũ fedin anĩ sã de? Im anĩ, tamo kayau ifofã, pris odudug gedin irou ilauf nigin isin anĩ sã de?”

²² Anĩ ere, Sol nẽ od wogõya totolef ilen, agef fen, Jesus anĩ Kristus ye yaor fe, wogõ ye di, Juda tamo idi Damaskus dibodon anidi, yogon od solo fiyëya kisi feleya sã.

²³ Naa musei ilele di, Juda tamo idi, Sol yukesiya nigin kisi katõ difen,

²⁴ anĩ ere, Sol idi kisi dinon are kelein. Idi Sol dukesiyouf nigin, naa ganan bõ ado gaa ado, taun nẽ kau bobog bun ololo difiyen.

²⁵ Anĩ ere, bõ taka bun, in dõ fiya tar ï dale, karam bun dife fen, kau kurenem folo folõ dife di, tenebur isilen.

²⁶ Sain Sol Jerusalem ile fen, dõ fiya tar geid weim bagu difouf nigin age fen. Anĩ ere, idi Sol ï dõ fiya tamo taka wõ yen anĩ to momoi de fen, ganan ï nigin kumĩ den.

²⁷ Anĩ ere, Banabas ï Sol yale, aposel gedin iroule fen, Sol ï naab luwen Odug ile di, ï wogõ fiyen ado, Sol Damaskus oun, kumĩ sã Jesus yana bunem wogõ yen anĩ, aposel faded fedin.

²⁸ Anĩ nigin, Sol idi weim dibod ken, Jerusalem oun karika bagai iyo

ken, Odug yana bunem, kumĩ sã biya od wogõ yef iyon.

²⁹ Ì Juda tamo Grik od wogõ dedig anidi geid, od wogõ de fefe den, ani ere, idi Ì dukesiyouf nigin age difen.

³⁰ Kabĩ tura tar enei kelei ken, idi Ì dale, Sisaria taun dirou dilen, anenem Tasus taun sur de dirã di, ilen.

³¹ Anĩ nigin, sios an Judia, Galili ado Samaria teneub ganan bun, idi wau inosiya sain biya ado fen, megeir ifenēdin. Idi Awa Uur Fa-teul nem waud yalese di, Odug nigin aniniya ado dibodok dile di, momoiya tamo kayau musei len.

Ainias Dokas Ado

³² Pita Ì modoũ ganan iyokelen, agef fen, Ì Lida tauneg Negur nē tamo kayau ki fediyouf nigin ilen.

³³ Pita, an tamo taka yana Ainias bouwa ilolaisin, Ì yar eit fataren yenēyai yedig fotou fiyen.

³⁴ Pita Ainias irokenen, “Ainias, Jesus Kristus õ el yok. Fã wale fen, ogon bedu madur wo.” Kaisã bagai, Ainias fã yalen.

³⁵ Tamo kayau, Lida taun ado Saron fonõ dibodon idi ganan Ì dile fen, waud falei ye, Odug nigin momoi den.

³⁶ Jopa an, dõ fiya kayau taka, yana Tabita (anĩ Grik od bun Dokas dedig) ibodon. Ì faimud tobonunã biya inodidig ado maleg isennēdidig.

³⁷ Sain anĩ bun, Tabita dagi yale fen, laa fen. Ì laa fe di, yogon bouwa buru naan digune kel, fõ aab ilun dinenē di, yenen.

³⁸ Lida taun are Jopa taun non. Anĩ nigin, dõ fiya tar, Pita Lida ibodok yeya karĩ de fen, tamo uru sur dife di, Ì gein dile, total bagai dirokenen, “Kaisã bagai talauf!”

³⁹ Anĩ nigin, Pita idi geid dile, an ulõ yesi di, idi Pita fõ aab ilun dale dirou diselen. Kayau waab ganan an Pita salili difiye ken, idi inã dale fen, Dokas Ì fau matan ibod ken, kolos ado saket iwadin anĩ ganan difelnen.

⁴⁰ Anĩ ere, Pita idi ganan mayarē sur feid fen, Ì ibor bobou fe kosē yen. Agef fen, Ì falei yel, kayau nē bouwa buru irokenen, “Tabita, fã wale.” Kayau Ì mala birikã feid, Pita ile fen, fã yale ibodon.

⁴¹ Age fe di, Pita kayau ima irou yalesnē di, Ì fã ye ifaren. Age fel fen, Pita, momoiya tamo kayau ado kayau waab geid iweigneĩd fen, Dokas Ì mata kel fã yel anĩ ifelnēdin.

⁴² Pita enei age fen are, Jopa taun ganan od iyokelen, age fe di, tamo kayau musei Odug nigin momoi den.

⁴³ Pita Jopa an, gaar gabar el fiya tamo yana Simon dedig Ì ado, naa musei dibodon.

10

Konelius Pita Bun Od Sur Fen

¹ Sisaria taun oun, tamo taka yana Konelius ibodon, Ì wan handred kusĩ tamo neid orowa taka, ‘Itali kusĩ tamo mala’ dedig anĩ bun tamal.

² Ì Rom tamal, Juda tamo sã, anĩ ere, Negur yana yalesedig, agef fen, Ì yogon ibor adok geid, Negur nigin anini dedig. Ì Juda maleg tamo musei isennēdidig, takag, Ì toku Negur kosē fiyēdig.

³ Naa taka bun tri kilok aragau age fiya, Konelius Ì mala seleulã kurãf fen, Ì yaor bagai ilen, Negur nē engel isi fen, irokenen, “Konelius!”

⁴ Konelius kumĩ ado lo fiyekel fen, Ì to fen, “Odug, ere?”

Engel Ì irokenen, “Ogon kosē ado wau sã maleg tamo bun agodig are, Negur wagen sesewi fiya gen ise le di, Negur wau kulĩ yen.

⁵ Gama tamo tunĩ Jopa taun sur wodi di, dile, tamo taka yana Simon, Pita dedig dirou disiyouf.

⁶ Ì gaar gabar el fiya tamo Simon ado dibodok, Simon nē fõ are maaĩ yerin ibodok.”

⁷ Engel Konelius od wogõ fiyekel fen, Ì itornē di, Konelius yogon kabĩ tamo uru ado kusĩ tamo taka iweigneĩdin, kusĩ tamo are Negur yana yalesedig ado Konelius aruna daledig anidi taka.

⁸ Konelius ī, ereb wō yen anī ganan irokeneīd le fen, Jopa taun sur fedin.

Pita Mala Seleulā Kurāf Fen, Ilen

⁹ Naa anī ile di, idi naab diyok dile, Jopa taun kelē difiyē mog, Pita kosē youf nigin, fō sokoron iselen, are gaa atun age fiya.

¹⁰ Pita ī naū fe di, ereb taka yōya nigin oron. Saaf dodok dife mog, ī mulā fe di, yen mog, mala seleulā kurā fen.

¹¹ Ī, saa kā fele di, anenem ereb taka gabar odug gen, iri aiwa adodo kaleya bun irou fen, tenebur folō fele di, isil mog, ilen.

¹² Anī namen, gaar fire fire yeid imeid adodo, gaar luwedim diyōdig ado, ninā ilun temeleid dibodon.

¹³ Anī ait taka Pita irokenen, “Pita, fā wale, udenkeis fen, wō.”

¹⁴ Anī ere, Pita iron, “Odug, sā bagai! Aya sesen amuyē adodo yōya nigin katū difaman taka to bagai ōdig.”

¹⁵ Ait anī baban Pita wogō fiyen, “Ereb taka Negur ī amuyē sā inon anī, to amuyē ado wouf.”

¹⁶ Agef towo fe fen, kaisā bagai gabar kel yale, saa ilun irou iselen.

¹⁷ Pita mala seleulā kurāf fen, ilen anī nē gariya nigin, nene ye kisif mog, Konelius tamo sur fedin idi, Simon nē fō nain be ifaref anī to dife kelei ken, dile, fō bobogē difaren.

¹⁸ Idi diweig fen, Simon, yana taka Pita dedig an ibodok be anī to difen.

¹⁹ Pita ī mala seleulā kurāf fen, ilen anī nigin fau kisif mog, Awa Uur ī irokenen, “Simon, tamo towo ō dimirnok.

²⁰ Anī nigin, fā wale, tenebur kutū weis usil. Idi geid ileyā nigin to utor, ere nigin, ayam idi sur afedin.”

²¹ Pita kutū yeis isil fen, idi irokenēdin, “Aya anī umirnagef. Anī ā ere nigin usigel?”

²² Idi diron, “Amā Konelius kusī tamo neid orowa takam sur famā di, masil. Ī madur tamo, Negur nigin anini yedig. Juda tamo kayau ganān, ī tamo biya difiyēdig. Engel fateul, ō

Konelius nē fō bun ule fen, ō urōf anī Konelius karī youf nigin ī irokenen.”

²³ Age de di, Pita, idi bō anī bun an denēf nigin, aabē geif iroulen.

Pita Konelius Nē Fō Bun Ilen

We fele di, Pita ī fā yale, tamo anidi weim dilen. Jopa taun temeleid kabī tura tar tunīg, Pita geid weim dilen.

²⁴ Naa anī ile di, Pita Sisaria taun wō yen. Konelius idi tari feid fen, ī yogon sirag tar ado mou tar melsā difaref anidi geid iweig laisi difaren.

²⁵ Pita Konelius nē fō aaben isour iroule di, Konelius ī tarabā fiye ken, ī yogo lai feis, ye gariyan bobou fen.

²⁶ Anī ere, Pita ī yalesne ken, iron, “Ufar, ayag tamo maug.”

²⁷ Pita Konelius aaben wogō fiyek dile fen, tamo kayau musei guru difen anī iledin.

²⁸ Pita idi irokenēdin, “Ā aug kelei bagai, Juda tamo taka, haiden tamo taka ado nigal difouf be, ī ki fiyēf, are lo wal fiya. Anī ere, aya, tamo taka sane be, amuyē ado be, to age auf nigin, Negur aya mogo ifelnan.

²⁹ Anī nigin, aya uweignag fen, tamo sur wedigen sain, aya wau uruya sā asil. Anī nigin, aya to ayeik, ere nigin ā uweignagen?”

³⁰ Konelius iron, “Naa fo mogo ilelen, sain anī bun, aya neu fō bun sain eig fe mog, tri kilok aragau kosē aun. Kaisā bagai, tamo taka kolos medeīya ado, wageun ifar fen,

³¹ iron, ‘Konelius, Negur, ogon kosēya karī yen ado, maleg bun ogon wau sā ifenēya anī karī yelen.

³² Anī nigin, oun Jopa taun, tamo Simon, yana taka Pita dedig gein, tamo sur wo di, idi Pita ō bun isiyouf nigin dirokenēf. Ī gaar gabar el fiya tamo Simon nē fō maaī yerin ifaref an ibodok.’

³³ Anī nigin, aya kaisā bagai ō bun tamo sur afedin, ō usil are de agol. Odug, urokanamāf nigin irokonon anī ganān karī mauf nigin, amā ganān Negur mala bun gama yeir.”

³⁴ Age ye di, Pita iron, “Aya gama momoi bagai keleĩ, are Negur ĩ taka nigin dogol to wau yenēdig,

³⁵ anĩ ere, teneub ganan bun, tamo taka ĩ Negur nigin anini ye fen, to-bonunã biya age fedig are, Negur ĩ nigin wau yenek.

³⁶ Israel tamo kayau bun, Negur od sur fen anĩ ã keleĩ, biya od eig ye wogō yen, Jesus Kristus, ĩ ganan neid Odug, ĩ bunem maur gudū fiya wō yen.

³⁷ ã keleĩ, Jon naan igunēdiya nigin od wogō yele di, Galili distrik oun gariya ino fen, Judia distrik ganan bun ereb wō yen anĩ.

³⁸ ã keleĩ, Negur, Jesus Nasaret tamal bun, Awa Uur Fateul ado megeir fi fele di, Jesus iyo ken, tobonunã biya agef fen, Satan nē megeir farumen dibodok anidi ganan el fiyēdin, ere nigin, Negur ĩ ado ibodon.

³⁹ “Amã, Jerusalem ado Juda neid teneub bun, ereb Jesus age fen anĩ ganan malamã mailen. Idi ĩ aa tetek bun dū di, laa fen.

⁴⁰ Anĩ ere, Negur ĩ naa towo ilele di, laa bun tamal ĩ turĩ fiyē di, tamo kayau dilouf nigin age fen.

⁴¹ Anĩ ere, tamo kayau ganan ĩ dilouf nigin to age fen, Negur mogo igirnēdin anidim dogol dilouf nigin age fen, are amam Jesus laa bun tamal mata kel fã ye fen, weim saaf ado naan mon anim.

⁴² ĩ, amã tamo kayau biya od wogō mafiyēid fen, Jesus ĩ mata nē ado laa nē es fiya tamo ĩ Negurem igirnen anĩ, kurō mafesiyouf nigin irokanaan.

⁴³ Profet ganan ĩ nigin kurō difeis wogō den, are taka ĩ Jesus nigin momoi youf are, Jesus yana bunem yogon mosor nigin weder tu kalauf.”

⁴⁴ Pita ĩ fau od enei wogō ye mog, Awa Uur Fateul od karĩ den anidi ganan bun isin.

⁴⁵ Juda momoiya tamo mulū bun temeleid Pita geid disin idi, Negurem Awa Uur Fateul wau sã haiden buneg fi fele di, dile fen, terefeit den.

⁴⁶ Ere nigin, haiden idi od fire fire bun wogō de, Negur yana dales mog, karĩ den.

Age dife di, Pita iron,

⁴⁷ “Taka nem, tamo kayau eneidi naan igunēdiya nigin katū fediyouf de? Idi amã Awa Uur Fateul malen age fiya bagai dalel.”

⁴⁸ Anĩ nigin, Pita, idi Jesus yana bunem naan digunēdiyof nigin iro-kenēdin. Age fe di, Pita idi geid naa tunĩ dibodōf nigin idi Pita dirokenen.

11

Pita Age Fen Anĩ Faded Fiyēdin

¹ Aposel ado, momoiya tamo kayau Judia distrik ganan bun dibodon anidi, haiden idig Negur nē od dalen yeya anĩ karĩ den.

² Sain Pita Jerusalem isele di, Juda momoiya tamo mulū bun temeleid kekeir od diroken ken,

³ diron, “Ō haiden mulū to dilen neid fō bun ule fen, weim saaf wōgen.”

⁴ Age de di, Pita gariya ino, ereb ereb ganan wō yen anĩ dir fe faded fiyēdin,

⁵ “Aya Jopa taun abod ken, kosē au mog, aya mulam malau gelele fe, malau seleulã kurãf fen, ailen. Aya ereb taka gabar odug gen, iri aiwa adodo kaleya bun irou fen, saa ilun tamal, aya abodon nē an folō fele di, isil mog, ailen.

⁶ Aya anĩ fele afe fen, tenebur tamal gaar fire fire yeid imeid adodo, gaar kuĩ, gaar luwedim diyōdig ado, ninã ilun temeleid ailedin.

⁷ Agef fen, ait taka karĩ au mog, irokanaan, ‘Pita, fã wale, udenkeis fen, wō.’

⁸ “Anĩ ere, aya aron, ‘Odug, sã bagai! Aya sesen amuyē adodo yōya nigin katū difaman taka to bagai ō ailen.’

⁹ “Ait anĩ baban saa ilunem wogō yen, ‘Ereb taka Negur ĩ amuyē sã inon anĩ, to amuyē ado wouf.’

¹⁰ Agef towo fe fen, anĩ ganan baban kel dīf, saa ilun irou iselen.

11 “Sain anī bun bagai, tamo towo aya gein Sisariam sur difedin idi, fō aya abodōdig nē an wō den.

12 Awa Uur aya idi weim ileyā to atorōf nigin irokanan. Kabī turau tar sigis eneidig, aya weim mele, tamo anī nē fō namen melen.

13 Age mafe di, ī engel taka naig be fe fen, yogon fō bun wō ye fen, eig ye irokenen, ‘Jopa taun oun, Simon yana taka Pita dedig gein tamo sur woid.

14 Ō ado ogon ibor tar ganā kel gei yeīf nigin, ī od ō gein irou isiyouf,’ ye di, ilen anī irokanaman.

15 “Aya od gariya ano, wogō au mog, Awa Uur Fateul uruwa bun ada bun isin gen, idi buneg agef isin.

16 Age fe di, aya Odug eig ye iron anī, wederou fokō yen, ‘Jon ī naanem igunēdin, anī ere, ā Awa Uur Faulem iguneīf.’

17 Anī nigin, ada Odug Jesus Kristus nigin momoi tau di, Negur wau sā ege luwa ifanadan anī, idig ifenēdin anī youf are, aya ai nigin Negur naabura gudū afiyēf?”

18 Idi od enei karī de fen, idi kekeir od ditor ken, Negur yana dales diron, “Age fiyauf are, Negur ī haiden idig waud falei de fen, mata bun dilauf anī ifenēdin.”

Sios Oun Antiok Taun

19 Stiwen dukesin sain bun, kafī fiya wō ye di, momoiya tamo kayau firagagaū dife fen, tunī Fonisia distrik, Saipras nuyo ado, Antiok taun dile fen, Juda tamo kayau bun dogol biya od wogō difiyēdin.

20 Anī ere, idi tunī Saipras nuyo ado Sairini taun temeleid, Antiok taun dile fen, Grik tamo kayau buneg wogō de fen, Odug Jesus nigin biya od dirokenēdin.

21 Odug nē megeir idi adon, age fe di, tamo kayau musei momoi de fen, Odug bun falei den.

22 Od enei, Jerusalem taun oun sios bun iyokele di, idi Banabas Antiok taun sur difiyen.

23 Banabas an wō ye, Negur wau ifenēdin anī ilen, ī kulī ye fen, idi waud adok Odug bun momoi dibodōf nigin ganā waud yalesen.

24 Banabas ī tamo biya, Awa Uur Fateul ado momoiya barikā. Tamo kayau musei Odug bun geif iroulen.

25 Age dife di, Banabas Sol imirnēf nigin Tasus ilen.

26 Banabas Sol fotou fiye ken, Sol Antiok taun irou isin. Agef fen, Banabas Sol ado yar tekelei adok, sios geid dibod ken, tamo kayau musei difelnēdin. Antiok an, dō fiya tar anidi bun yana mata dun, are Kristen den.

27 Sain anī bun, profet tunī Jerusalem anenem Antiok disin.

28 Idi neid taka, yana Agabus fā ye fen, Awa Uur bunem profet od wogō yen, kadir odug Rom teneub ganā bun iyokalauf yen. (Sisa* Klodius nē sain bun, kadir enei wō yen.)

29 Dō fiya tar, idi mugu mugu, dogo neid megeir bunem, momoiya tamo kayau Judia distrik bun dibodon anidi disennēdiyof nigin, kisi difon.

30 Idi enei age de fen, moni wau sā Banabas Sol ado imeid bun dino, sios nē uyu irouya anidi bun sur difen.

12

Pita Kalabus Bun Tamal Yalisnen

1 Sain anī bun, King Herod sios bun temeleid tunī kafī fiya ifenēdiyof nigin, gei fedin.

2 Ī irō di, Jon tura Jems dimig nem dukesin.

3 Herod ī Jems laa fe di, Juda tamo kayau waud al fen anī ile fen, ī Pitag dalouf nigin ari fedin. Enei are, Bret Yis Sā Sifa sain bun wō yen.

4 Idi Pita dale di, ī kalabus bun inenen, ī kusī tamo mala aiwa adodo, mala mugu mugu kusī tamo aiwa adodom lo difouf nigin idi imeid bun inon. Herod ī, Pasa naa ilele di, ganā meleid bun, Pita kot bun inenēf nigin kisi yalen.

* 11:28: Rom neid king odug.

⁵ Anĩ nigin, Pita kalabus bun dinenẽ ibodon, anĩ ere, sios idi Pita nigin Negur totol bagai kosẽ difiyen.

⁶ Herod ã Pita fau nil kot bun ifauf ye mog, bõ anĩ bun, Pita sen uru nem ifokeleya ado kusĩ tamo uru atun mulã yenen, kalabus bobog lo fiya tamo, bobog tari de difaren.

⁷ Kaisã bagai, Odug nẽ engel wõ ye di, kalabus Pita ibodon aab namen fula felen. Agef fen, engel Pita siri yu ken, turĩ fiyẽ iron, “Gama nem, fã wale!” Age fe di, Pita ima bun tamal sen irokakakesin.

⁸ Age fe di, engel Pita irokenen, “Ogon let luwã gu fen, sendel ufounkel.” Age fele di, engel Pita irokenen, “Ogon kolos meluk ufounkel, dõ wiya.”

⁹ Pita engel dõf kalabus bun tamal ilen, anĩ ere, ã engel age fen are, momoi bagai be anĩ to kelein, ã malau seleulã kurã fe di, ailef yen.

¹⁰ Idi, kusĩ tamo kalabus bobog lo difedig uyulil ado anĩ dõ fiya, wal difeid fen, taun isileya ain bobog bun disi di, sukar are yogo kã fel kenẽdin, age fe di, idi ulolõ desin. Idi naab taka luwe diyok disil fen, kaisã bagai engel Pita itornen.

¹¹ Age fe di, Pita weder fokõf mã, iron, “Momoi bagai aya gama keleĩ, Odug engel sur fe di, aya Herod nẽ megeir bun ado Juda tamo idi ereb wõya nigin kisi difen anĩ ganan bun tamal yalelnal.”

¹² Enei nigin weder fokõ yel fen, Pita ã, Jon yana taka Mak dedig sina Maria nẽ fõ bun ilen, an tamo kayau musei guru de fen, kosẽ def dibodon.

¹³ Pita fõ sukar godu godu fe di, kabĩ kayau taka yana Roda dedig sukar kã foug nigin isin.

¹⁴ ã Pita ait karĩ ye fen, fatuk bagai kulĩ ye fen, ã sukar kã fiya sã, kel gudu ref ile fen, iron, “Pita yeir bobogẽ ifaref!”

¹⁵ Idi ã dirokenen, “Õ wadak.” Anĩ ere, kayau ã totol bagai ino fen, agef irõ di, idi diron, “Are Pita nẽ engel.”

¹⁶ Age de mog, Pita ã fau fau sukar godu godu fe di, idi sukar kã difel, Pita dile fen, terẽ den.

¹⁷ Pita foro dalauf nigin imam dogol fiyeĩd le fen, Odug ã kalabus bun tamal yalis irou isil anĩ faded fiyeĩd fen, iron, “Jems tura tar geid od enei urokenẽdigouf.” Age ye fen, Pita idi itorneĩd, uyu takã ilen.

¹⁸ Bonimeĩ di, kusĩ tamo Pita to dile fen, fatuk bagai nene de, abob to difen.

¹⁹ Herod Pita dimirnẽf nigin irokenẽdin, anĩ ere, idi ã to fotou difiyen. Age dife di, Herod kalabus lo fiya tamo Pita lo difen idi to fiyeĩd le fen, kalabus lo fiya tamo anidi didenke-siyouf nigin irokenẽdin.

Herod Laa Fen

Agef fen, Herod Judia distrik bun tamal Sisaria taun ile, sain naal an ibodon.

²⁰ Herod ã, Taia ado Saidon taun tamo kayau nigin name fatuk bagai sanen, anĩ ere, gama idi waud tekelei fen, Herod dilouf nigin disin. Uyulil idi Blastus, king nẽ ibodõya modoũ nẽ lo fiya mudur, ã idi isennẽdiyouf nigin dirokenẽ di, Blastus yo yen. Age de fen, idi Herod garan dile, maur gudũ fiya nigin dirokenen, ere nigin, idi king nẽ akor bun tamal saaf daledig.

²¹ Naa inon anĩ bun, Herod ã king nẽ kolos ifounkel, king nẽ sia bun ibod ken, tamo kayau od wogõ fiyẽdin.

²² Tamo kayau diweig diron, “Eĩ waitou ait, tamo nẽ sã.”

²³ Kaisã bagai, Odug nẽ engel Herod yũ iran, ere nigin, ã Negur yana to yalesen. ã mamatem dõ di, laa fen.

²⁴ Anĩ ere, Negur nẽ od bilalaũ fel iyokelen.

²⁵ Banabas Sol ado, dogo neid kabĩ bure difel fen, Jerusalem keku de disin, idi Jon, yana taka Mak dedig dale fen, weim disin.

13

Idi Banabas Sol Ado Sur Difedin

¹ Antiok sios bun, profet ado tise difaren, are Banabas, Simeon yana taka Karos dedig, Lusius Sairini taun tamal, Manain (ĩ king Herod ado bibiyedin) ado, Sol.

² Idi Odug yana dales fen, kuri de mog, Awa Uur Fateul idi iro-kenēdin, “Banabas Sol ado kabĩ aya agirkenēdin anĩ dalouf nigin, gadi weleid kanag.”

³ Anĩ nigin, idi kuri de kosē del, imeid idi tetedin dino fen, sur difedin.

Oun Saipras Nuyo

⁴ Awa Uur Fateul, Banabas Sol ado sur fedi di, idi Selusia taun dile fen, anenem waag dale, Saipras nuyo dilen.

⁵ Idi Salamis taun wō de fen, Negur nē od Juda neid uub fō fō bun wogō den. Jon idi isennēdiyof nigin, ĩ dale weim dilen.

⁶ Idi nuyo anĩ ganan atu diyok dile, Pafos taun wō den. Idi an idegēya kosē tamo taka, idegēya profet Juda tamal, yana Bar-Jesus dedig fotou difen.

⁷ Bar-Jesus ĩ nuyo anĩ nē gawaman mudur Segius Paulus ado dibodon. Segius Paulus ĩ tamo kisi biya ado. Gawaman mudur ĩ, Negur nē od karĩ youf nigin, Banabas Sol ado iweignēdin.

⁸ Anĩ ere, idegēya kosē tamo Elimas (yana are Grik od nem ‘idegēya kosē tamo’) idi naabureid gudū fe di, gawaman mudur to momoi youf nigin age fen.

⁹ Age fe di, Sol, yana taka Pol dedig, Awa Uur Fateul barikā, ĩ idegēya kosē tamo lo fiyekel fen, iron,

¹⁰ “Ō Satan naal, ō Negur nē madur fiya ganan nē kiwai! Idegēya ado sesen ganan, ō bun isokosef. Ō ere sain anĩ, Odug nē naab madur anĩ, idegēya bun falei fiyai wodig utorlauf?”

¹¹ Gama Odug ima, ō teten isif. Ō malā ifofakalauf, ō sain naal meluk, gaa lalan to ulouf.”

Kaisā bagai, budū ado gugum isi, kerub fiyē di, ĩ taka nem ima gim fouf nigin, ima ra yef iyon.

¹² Gawaman mudur ĩ agef wō yen anĩ ile fen, ĩ momoi yen, ere nigin, ĩ Odug nigin ifelnē di, ilen anĩ nigin terē yen.

Pisidia Distrik Nediwon Antiok Taun

¹³ Pol yogon kabĩ tura tar geid, waag dale, Pafosem, Pamfilia provins oun Perga taun dilen, an Jon idi itorneid fen, Jerusalem kel ilen.

¹⁴ Idi Perga taun anenem, Pisidia distrik nediwon Antiok taun dilen. Sabat naa bun, idi Juda neid uub fō bun dile dibodon.

¹⁵ Lo ado profet neid itotoya di-wesleid fen, Juda neid uub fō nē mudur adodo, Banabas Pol ado gein od sur dife fen, diron, “Turamā tar, ā tamo kayau waud yaleseya nigin od adouf are, wogōg.”

¹⁶ Pol fā ye, foro dalauf nigin imam fiyeid le fen, iron, “Israel tamo kayau ado, haiden Juda tamo kayau geid Negur nigin anini gedig ā, karĩ wiyag!”

¹⁷ Israel tamo kayau neid Negur, tubumā tar igrineid fen, idi Isip dibodon sain, Negurem age fe di, idi fulus difen. Negur ĩ megeir odug nem, idi Isip tamal gurif irou ilen.

¹⁸ Negur ĩ, foti yar age fiya gerere tuan, idi tobonunā sane age difen anĩ lolou fesif isin.

¹⁹ ĩ Kanan teneub bun, tamo ibor sewen adok dauf iraille fen, dogo neid teneub, yogon tamo kayau idi akorouf nigin ifenēdin.

²⁰ Enei ganan fo handred fifti yar age fiya ilelen.

“Enei bure fele di, Negur ĩ, Israel tamo kayau es fiya tamo ifenēdif ile, profet Samuel nē sain bun.

²¹ Anĩ bure fele di, tamo kayau king nigin dirō di, Negur, Sol Kis naal, Benjamin nē ibor bun tamal ifenēdin, Sol foti yar king ibodon.

²² Negur Sol yalelne ken, ĩ Dawid idi neid king inenen. Negur Dawid nigin eig ye iron, ‘Aya, Jesi naal

Dawid ī, tamo aya wau irok kilei anī ailen, ī ereb ereb ganān, neu oroya yenek anī dōf age foug.

²³ “Negur ī age afoug yen kilei, Dawid nē ibor nē tubu tar bun tamal, kel yaleya tamo Jesus Israel ifenēdin.

²⁴ Jesus fau isiya sã mog, Jon Israel tamo kayau ganān waud falei ye di, naan igunēdiyof nigin od wogō yen.

²⁵ Jon ī yogon kabī idikalau fenē mog, ī iron, ‘Aya nigin ā aim gef? Aya tamo ī tari gef anim sã. Anī ere, ī aya dumeun dō fiyaf, aya to biya nigin yogon su malū biru fediya kisi feleya sã.’

²⁶ “Turau tar, Abraham gere tar ado, haiden ā Negur nigin anini gedig, Negur tamo kayau kel yaleya nē od, amā bun sur fen.

²⁷ Jerusalem tamo kayau, dogo neid mudur adodo geid, Jesus ado, profet neid od Sabat naa ganān bun diwesedig anī to kelei ken, Jesus bouwa bun od dun, anī bunem profet neid od kisi fel wō yen.

²⁸ Idi Jesus dukesiyouf nigin, gariya taka to dilen, anī ere, idi ī dukesiyouf nigin, Pailat dirokenen.

²⁹ Idi Jesus nigin Negur nē Itotoya bun yenek anī ganān, dō de age difel fen, idi ī aa tetek bun tamal dalisne ken, matmat bun dinenen.

³⁰ Anī ere, Negur Jesus laa bun tamal kel turī fe di, mata kel fã yen.

³¹ Agef fen, Jesus, tamo idi, ī geid Galili teneub bun tamal Jerusalem dilen anidi bun, naa musei wō yen. Idi anidim gama, tamo kayau bun, ī nigin wogō def dilef.

³² “Amā biya od ā marokeneik, Negur tubumã tar age afoug fiyēdin are,

³³ Jesus kel turī fiyen anī bunem, amā idi gereneid tar kisi fel naman. Sam tu bun itotoya yenek kilei:

“ Ō neu Kesu,
aya gama ō Tamã wō aul.”*

³⁴ Negur ī laa bun tamal kel turī fiyē di, ī to bagai bura lauf nigin, Negur eig ye iron:

“ ‘Aya momoi bagai nē ado fateul nē el fiya, are aya Dawid afenēf aun anī, ā afeneif.’†

³⁵ Negur nē Itotoya taka buneg eig ye irok:

“ Ō ogon Fateul Tamo to utorō di, bura lauf.’‡

³⁶ “Dawid ī yogon sain bun, Negur nē oroya anī aruna yale fen, laa fen. Ī tubu tar geid mū dife di, bouwa bura len.

³⁷ Anī ere, Negurem laa bun tamal kel turī fiyen ī, bura leya san.

³⁸ “Anī nigin, turau tar, ā keleī youf, Jesus bunem mosor weder tu keleya nigin od wogō yeik.

³⁹ Tamo ganān Jesus nigin momoi def, mosor ganān yalelkeneid fen, madur fedif, anī ere, Moses nē Lo bunem, tamo neid mosor ganān yalelkeneid fen, madur fediya kisi feleya sã.

⁴⁰ Anī nigin, profet wogō den anī, ā bun to wō youf nigin lo weleg:

⁴¹ “ ‘Ulegef, ā kono fiya tamo!
Terēg fen, gare gouf,
ere nigin, aya āgenei sain bun ereb taka age afoug,
are taka nem irokeneifeg,
ā to bagai momoi gouf.’§ ”

⁴² Pol Banabas ado, Juda neid uub fō ditor dile mog, tamo kayau, Sabat naa taka bun, od enei baban tobol difoug nigin dirokenēdin.

⁴³ Tamo kayau dilele di, Juda tamo kayau musei ado, haiden Juda neid momoiya bun falei de fen, Negur nigin anini dedig musei idi, Pol Banabas ado dō difedin. Age dife di, Pol Banabas ado weim wogō de fen, idi Negur nē wau ifenēya bun toku dibodōf nigin waud dalesen.

⁴⁴ Sabat naa taka bun, taun dibodōdig anidi musei ganān, Odug nē od karī douf nigin guru difen.

⁴⁵ Anī ere, Juda tamo idi, tamo kayau guru difen anidi dileid fen, kiyeim aura fiyēdi di, Pol wogō yen anī nigin kiwai difen ken, kono di-fiyen.

* 13:33: Sam 2:7 † 13:34: Asaia 55:3 ‡ 13:35: Sam 16:10 § 13:41: Habakuk 1:5

⁴⁶ Age dife di, Pol Banabas ado kumĩ sã wogõ eig de diron, “Amã Negur nẽ od, ã bun ketem sã wogõ mayeim. Anĩ ere, ã Negur nẽ od utorõg fen, amã to biya nigin mata faimud ibodkeleya to malouf gen. Anĩ nigin, amã gama haiden gedin melef.

⁴⁷ Are Odug eig ye irokanaman: “ ‘Aya õ haiden neid lalan anenon, anĩ bunem, teneub idikelediya bun, tamo kayau usenneĩd, kel gei wediyouf.’* ”

⁴⁸ Haiden idi od enei karĩ de fen, waud kulĩ ye, Odug nẽ od seli dabin. Mata faimud ibodkeleya nigin igirnẽdin anidi ganan momoi den.

⁴⁹ Age dife di, Odug nẽ od, teneub anĩ ganan bun iyokelen.

⁵⁰ Anĩ ere, Juda tamo idi, haiden kayau yeneid adodo Negur nigin anini dedig ado, taun uyu irouya tamo anidi nameid dalesen. Idi Pol Banabas ado darau difenẽdiyof nigin, tamo kayau nameid dalese di, dogo neid teneub bun tamal dirudidin.

⁵¹ Anĩ nigin, Pol Banabas ado, idi neid tobonunã sane anĩ difelnẽdi di, keleĩ youf nigin, yeid aas tu difel fen, Ikonium taun dilen.

⁵² Dõ fiya tar idi, kulĩya ado Awa Uur Fateul barikan.

14

Oun Ikonium Taun

¹ Oun Ikonium taun, Pol Banabas ado, idi gai age difedig gen, Juda neid uub fõ bun dile fen, an tamo waud yaleya bun wogõ de di, Juda tamo kayau ado Grik tamo kayau musei momoi den.

² Anĩ ere, Juda tamo momoiya sã anidim, haiden idi nameid dalese di, haiden idi, momoiya tamo kayau kiwai difenẽdin.

³ Anĩ nigin, Pol Banabas ado, sain meluk an dibod ken, Odug nigin kumĩ sã wogõ den. Age dife di, Odug ã, idi memelik uris ado dinodiyof nigin, megeir ifenẽdin, anĩ bunem,

Odug yogon wau ifenẽya nẽ od anĩ megeir fen.

⁴ Tamo kayau taun temeleid faraf fen, tunĩ Juda tamo geideid, tunĩ aposel geid.

⁵ Age de fen, Juda tamo ado haiden, dogo neid uyu irouya geid, aposel to biya difiyeĩd fen, meein tulu difiyẽdiyof nigin age difen.

⁶ Anĩ ere, aposel idi anĩ kelei ken, idi diya, Likonia distrik nediwon Lистра taun, Derbe taun, anĩ kalilĩ fiya bun diyok dile fen,

⁷ an biya od wogõ den.

Oun Listra ado Derbe Taun

⁸ Oun Listra taun, tamo taka ye ilolaisin ibodon, ã sina namenem ye ilolaisin wõ yen, anĩ to iyõdig.

⁹ ã, Pol od wogõ ye mog, karĩ fiyen. Pol ã lo fiyekel fen, ã bouwa biya lauf nigin momoiya ado anĩ ile fen,

¹⁰ Pol ait odugem iweig iron, “Fã wale ufar!” Age ye di, ã gurusã ye, iyok ilen.

¹¹ Tamo kayau musei Pol age fen anĩ dile fen, Likonia od nem diweig diron, “Waitou tamo falei difel fen, ada gein disil!”

¹² Idi Banabas ã Sus difiye ken, Pol ã Hermes difiyen, ere nigin, Pol ã ait ado tamo.

¹³ Waitou Sus nẽ tempel, taun yerin ibodon. Waitou Sus nẽ pris, bulmakau bobõ gĩ fediya adodo, taun bobogẽ irou isin, ere nigin, ã tamo kayau musei geid, aposel sesewi fiya difenẽdiyof nigin age fen.

¹⁴ Anĩ ere, aposel Banabas Pol ado, anĩ karĩ de fen, dogo neid kolos serek difeid fen, tamo kayau musei atun gududu de dile diweig diron,

¹⁵ “Tamo kayau, ã ere nigin enei ago gef? Amãg tamo maug, ã gen. Amã ã gein biya od marou masif, are ã kaũ sã enei utorõg fen, mata ibodõya Negur ã, saa, teneub, maaĩ ado, anidi namen ereb ereb ganan inodin, ã bun falei gouf nigin marokeneik.

* 13:47: Asaia 49:6

¹⁶ Kulu Negur ī tamo kayau teneub ganan bun itornēdi di, dogo neid oroya dō difen.

¹⁷ Anī ere, Negur ī yogo nigin yaor fiya to itor ken, faimud ereb ereb biya age fedig anī bunem, yogo nigin yaor fedig. Ī saa bunem uyē ado, saaf dogo neid sain dōf fen, ifeneīdig. Ī saaf musei biya ifenei ken, wauī bun kulīya ifeneīdig.”

¹⁸ Od enei nemeg, tamo kayau musei aposel sesewi difenēdiyof nigin age difen, anī ere, aposel idi naabureid gudū difenēdiyof nigin lakī difen.

¹⁹ Age dife di, Juda tamo tunī, Antiok ado Ikonium taun temeleid disi fen, tamo kayau musei waud dalen. Age de fen, idi Pol meein tulu difiyē, laa fel de fen, taun yerin diror diroulen.

²⁰ Anī ere, dō fiya tar guru de, Pol salili difiyē di, ī fā yale fen, baban taun kel ilen. Naa taka di, ī Banabas ado Derbe taun dilen.

Aposel Siria Distrik Oun Antiok Taun Keku Den

²¹ Idi taun anī bun biya od wogō de fen, dō fiya tar musei dalen. Age difel fen, idi Listra, Ikonium ado, Antiok taun keku de dile,

²² dō fiya tar megeir difiyeīd fen, idi momoiya bun dibodōf nigin waud dalesen. Idi diron, “Ada Negur nē tano bun ileyā nigin, morō musei talouf bagai.”

²³ Pol Banabas ado, sios mugu mugu bun, uyu irouya digirneīd fen, kosēya ado kuriya bunem, Odug idi ī nigin momoi dedig, ī ima bun dinenēdin.

²⁴ Idi Pisidia distrik atu diyok dile, Pamfilia provins bun wowā den.

²⁵ Age de fen, idi Perga taun an od wogō del fen, Atalia taun disilen.

²⁶ Idi Ataliam waag dale, Antiok keku de dilen, kulu an, sios, kabī gama bure difelel anī nigin, aposel idi Negur nē wau ifenēya bun dinenēdin.

²⁷ Idi Antiok taun wowā de fen, sios kuru difeid fen, Negur idi

bunem ereb age fen anī ganan ado, Negur ī haiden momoi douf nigin sukar kā fen anī, wogō difiyēdin.

²⁸ Age dife fen, idi, dō fiya tar geid, sain meluk an dibodon.

15

Guru Fiya Oun Jerusalem

¹ Tamo tunī, Judia distrik bun temeleid Antiok taun disi fen, momoiya tamo kayau eig de difelnēdin, “Ā Moses nē tobonunā kilei, mulū to ulagauf are, ā kel gei yeīya kisi feleya sā.”

² Od enei nigin, idi Pol Banabas ado geid fatuk bagai fefe de fen, luwa diroun. Anī nigin, momoiya tamo kayau enei nigin Jerusalem disel fen, aposel ado uyu irouya geid to difiyēdiyof nigin, Pol Banabas ado momoiya tamo tunī geid digirneīdin.

³ Sios idi sur difedi di, Foniaia ado Samaria distrik atu dile fen, haiden idi Negur bun falei den anī dirokenēdin. Od eneim, momoiya tamo kayau ganan fatuk bagai kulī den.

⁴ Idi Jerusalem wō de di, sios, aposel geid, uyu iroudiya anidim idi aan difiyēdin. Age dife di, Negur idi bunem ereb age fen anī ganan, sios, aposel geid, uyu iroudiya wogō difiyēdin.

⁵ Age dife di, momoiya tamo tunī Farisia mala bun temeleid, fā de fen, diron, “Haiden idi mulū dile fen, Moses nē Lo dō difouf nigin dirokenēdiyof bagai.”

⁶ Age de di, aposel idi, uyu iroudiya geid, od enei nigin guru de katō difen.

⁷ Od musei sain meluk katō difen sain, Pita fā yale irokenēdin, “Turau tar, ā keleī, kulu, sain taka bun, haiden idi aya sigorou bun biya od karī de fen, momoi douf nigin, ā atun Negur aya igirnan.

⁸ Negur ī, tamo nē wau keleī, ī Awa Uur Fateul, ada ifanadan gen, haiden idig ifenēdin anī bunem, idig yaledin anī ifelnēdin.

⁹ Negur, ada ado idi geid atun daũ taka to inon, ere nigin, momoiya bunem ã waud kulo feledin.

¹⁰ Anĩ ere, ere nigin ã gama Negur kisi wiyẽg fen, morõ adag age fiya, tubuda tareg faali fiya kisi feleya san anĩ, dõ fiya tar tetedin unogouf nigin ago gef?

¹¹ Sã! Ada, idi agef kel gei fedif gen, neda Odug Jesus nẽ wau ifenẽya bunem, adag agef kel gei fadaf anĩ momoi tauf.”

¹² Tamo kayau ganan guru difen anidi ganan foro del fen, Banabas Pol ado, Negur idi bunem memelik ado uris fire fire haiden atun inodin anĩ wogõ de di, karĩ den.

¹³ Idi wogõ dele di, Jems ã iron, “Neu turau tar, karĩ wiyag.

¹⁴ Simon mogo faded fadal, are Negur ã yogo yana nigin ye fen, haiden atun tamo kayau yaledin anĩ bunem, ã urug bagai haiden nigin wau yenen anĩ ifelnadan.

¹⁵ Profet neid od are, enei ado susu felef, are Negur nẽ Itotoya bun eig ye irok kilei:

¹⁶ “Enei dumen, aya kelau fen, Dawid nẽ salafat kubũ yen anĩ baban alesauf.

Aya sesen ledin anĩ madur afeleid fen, baban anouf,

¹⁷ anĩ bunem, tamo kayau ganan atun tunĩ ado, haiden ganan neu nigin agirnẽdin geid, Odug dimirnẽf.*

¹⁸ Odug ã enei kulu bagai yaor fen, ã anĩ agef irok.

¹⁹ “Anĩ nigin, neu es fiya bun, ada haiden Negur bun falei def anidi, morõ to tafenẽdiyof.

²⁰ Age fiya ban, ada pas tatot fen, idi saaf idegẽya waitou bun sesewi difen anĩ to dãf nigin, noli tobonunã bun to dilauf nigin, yaro uleid kakã difeid fen, didenkesif anĩ to dãf nigin ado, yaro naud adodo to dãf nigin torokenẽdiyof.

²¹ Ere nigin, sain meluk bagai, Moses nẽ Lo taun ganan bun wogõ

de fen, Sabat naa ganan bun Juda neid uub fõ fõ bun diwesedig.”

Guru Fiya Nẽ Pas Haiden Momoiya Tamo Kayau Bun Sur Difen

²² Age ye di, aposel idi, uyu iroudiya ado, sios ganan geid, idi atun tamo tunĩ digirneid fen, Pol Banabas ado weim Antiok taun sur difediyof nigin kisi difon. Idi Judas (yana taka Basabas dedig) ado Sailas digirnẽdin, tamo uru anidi, momoiya tamo kayau atun, idi uyu iroya.

²³ Idi bun pas eig de ditoton anĩ sur difen:

Amã aposel, uyu iroudiya geid, ãgenei tureĩ tar,

haiden bun temeleĩ turamã tar Antiok taun, Siria ado, Silisia provins bun ubodõgef aan mayeik.

²⁴ Amã nemã tamo tunĩ, yoya to dale fen, dile, idi neid wogõya bunem gelele diyei ken, wauĩ morõ difenein anĩ, amã karĩ maun.

²⁵ Anĩ nigin, amã ganan kisi tekelei mano fen, tamo tunĩ magirneid fen, nemã oboimã tar bagai Banabas Pol ado geid ã gein sur mafedif.

²⁶ Banabas Pol ado idi, neda Odug Jesus Kristus yana nigin, dogo neid mata itorõya nigin to fese den.

²⁷ Anĩ nigin, amã matotkeneik anĩ sigoredim megeir fiya nigin, Judas Sailas ado sur mafedif.

²⁸ Awa Uur Fateul, amã geid, kisi tekelei fen, ã bun nun enei teten baban morõ taka to mafeneĩf nigin yo maun:

²⁹ ã saaf idegẽya waitou bun sesewi difen anĩ to wãgauf, yaro naud adodo to wãgauf, yaro uleid kakã difeid fen, didenkesif anĩ to wãgauf ado, noli tobonunã bun to ulagauf. ã enei adok irok kilei sese gouf are, ã nigin deuf.

Dabuo.

* 15:17: Amos 9:11, 12

³⁰ Tamo idi sur difedi di, Antiok taun disil, sios kuru difeid fen, pas anī difenēdin.

³¹ Tamo kayau pas anī diwes fen, waud yaleseya od anī nigin kulī den.

³² Judas Sailas ado, idi dogo profet, momoiya tamo kayau waud dales fen, megeir difenēdiyof nigin od fatuk wogō den.

³³ Idi an sain naal meluk dibodon, age dife di, momoiya tamo kayaum waud inosiya ado sur difedi di, idi sur difedin anidi gedin keku de dilen.†

³⁵ Anī ere, Pol Banabas ado Antiok dibodon, an idi tunī museig geid fen, Odug nē od difelneid fen, wogō den.

Pol Banabas Ado Waud Tekelei San

³⁶ Naa tunī ilele di, Pol Banabas irokenen, “Ada keku tau fen, taun ganan Odug nē od wogō tafiyēdin nē an turada tar ki tafiyēid fen, idi naig difef anī tailauf.”

³⁷ Banabas ī, Jon yana taka Mak dedig, idi geid dilauf nigin oron,

³⁸ anī ere, Pol ī weim dilauf are to biya ye kisi fen, ere nigin, Jon ī Pamfilia provins oun idi itorneid fen, idi geid kabī to dalef dilen.

³⁹ Idi fatuk bagai fe de fen, fara difen. Banabas ī Mak yale fen, waag bun Saipras nuyo dilen,

⁴⁰ anī ere, Pol ī Sailas igirnē di, momoiya tamo kayaum Odug nē wau ifenēya bun dinenēdi di, dilen.

⁴¹ Ī Siria ado Silisia provins atu ile fen, sios megeir fiyēdif ilen.

16

Timoti Ī Pol Sailas Ado Weim Dilen

¹ Pol ī Derbe taun isi fen, anenem Listra taun ilen, an dō fiya tamo taka yana Timoti ibodōdig, ī sina Juda tamal momoiya kayau, anī ere, ī tama Grik tamal.

² Momoiya tamo kayau Listra ado Ikonium taun temeleid, Timoti biya difiyēdig.

³ Pol ī Timoti ado dilauf nigin oron, anī nigin, ī, Juda tamo modoū anī bun dibodōdig anidi nigin, Timoti mulū inenen, ere nigin, idi ganan keleī, Timoti ī tama Grik tamal.

⁴ Idi taun mugu mugu bun diyok dile fen, oun Jerusalem aposel idi uyu iroudiya tamo geid, tamo kayau dō difouf nigin od difon anī wogō difiyēdif dilen.

⁵ Anī bunem, sios idi momoiya megeir dale fen, naa ganan momoiya tamo kayau ifagaf ilen.

Pol Mala Seleulā Kurāf Fen, Masedonia Tamo Taka Ilen

⁶ Pol yogon kabī tura tar geid, Frigia distrik ado Galesia provins bun diyok dilen, ere nigin, Awa Uur Fateul, idi Asia provins bun od wogōya nigin katū fiyēdin.

⁷ Idi Misia distrik nē daū bun disi fen, Bitinia provins bun dilauf nigin age difen, anī ere, Jesus nē Awa Uur ī katū fiyēdin.

⁸ Anī nigin, idi Misia distrik wal dife fen, Troas taun disilen.

⁹ Bō anī bun, Pol mala seleulā kurāf fen, Masedonia provins tamal tamo taka ifar fen, igonen, “Masedonia usi fen, usennamā,” fiyē mog, ilen.

¹⁰ Pol mala seleulā kurāf fen, anī ilen, age fel fen, amā kaisā bagai Masedonia provins malauf nigin dodok mafen, ere nigin, amā kisi mafen, Negur idi bun biya od wogō mauf nigin iweignaman.

Filipai Taun Oun Lidia Jesus Nigin Momoi Yen

¹¹ Troas taun anenem, amā waag bunem madur kilei Samotres nuyo melen, naa taka di, Neapolis melen.

¹² Anenem amā Filipai melen, Filipai are Rom gawamanem lo fedig, Masedonia provins bun taun anī uyu irouf. An naa tunī mabodon.

¹³ Sabat naa bun, amā taun mator ken, taun bobog serē naan yerin an, amā kosēya nē modoū mamirēf nigin

† 15:33: Itotoya tunī eig ye irok: dilen. ³⁴ Anī ere, Sailas ī an ibodōf nigin kisi fen.

melen. Amã mabod ken, kayau an guru difen anidi wogõ mafiyēdin.

¹⁴ Idi neid taka karī faman, kayau anī yana Lidia, Taiataira taun tamal, ī gabar kadaū na nigin susur fedig, ī Negur yana yalesedig. Odug, ī Pol nē od karī youf nigin wau bun sukar kāf kenen.

¹⁵ Kayau anī yogon ibor tar geid naan diguneīd kele di, ī yogon fõ bun malauf nigin irokanama ken, iron, “Aya Odug nigin momoi auf agef kisi gouf are, umag, neu fõ bun ubodõg.” Ī nugo famã di, amã dõ mafiyen.

Pol Sailas Ado Kalabus Bun

¹⁶ Naa taka bun, kosēya nē modoū bun mele mog, ferfer kayau momoul taka fotou faman, ī kaa sane ado, anī bunem ereb fau wõ youf anī wogõ yedig. Yogon marau tar, ī ereb fau wõ youf anī wogõ yedig anī bunem, moni musei daledig.

¹⁷ Kayau momoul enei, amã Pol geid dõ fama ken, iweig iron, “Tamo eneidi Negur Ilun Bagai nē ferfer tar. Idi ā isennēya walogouf nē naab dirokeneik.”

¹⁸ Kayau ī naa musei age fe di, Pol wau fatuk bagai moro ken, falei ye, kaa sane irokenen, “Jesus Kristus yana bunem, aya ī bun tamal ulõ we-siyouf nigin arokonok!” Sain anī bun bagai, kaa sane kayau anī itornen.

¹⁹ Ferfer kayau momoul nē marau tar, moni yaleya nē naab gudū fel-en anī kelei ken, Pol Sailas ado gei de didū difeid, maket modoū bun yeneid adodo tamo gedin dirouledin.

²⁰ Idi Rom neid lo es fiya tamo bun guri difeid dile fen, diron, “Tamo eneidi are Juda temeleid, idi neda taun bun morõ odug dinof.

²¹ Idi tobonunã difelnēdif are neda lo to irok anī, ada Rom tamo, anī nigin, ada tobonunã enei to talouf, to dõ tafouf.”

²² Age de di, tamo kayau, idi geid bagu de fen, Pol Sailas ado kiwai difenēdin. Age dife di, Rom es fiya tamo kolos dinukaka keneīd fen, wagagã difediyouf nigin dirokenēdin.

²³ Idi fatuk bagai wagagã difiyeīd kele fen, kalabus bun dinenēdin. Age dife fen, kalabus lo fiya tamo el fe lo fediyouf nigin dirokenen.

²⁴ Kalabus lo fiya tamo od anī yale fen, kalabus fõ aab namen ineneīd fen, yeid aam kotū feledin.

²⁵ Bõ atun age fiya, Pol Sailas ado Negur kosē difiye ken, seg dale mog, kalabus tamo ganan karī difiyēdin.

²⁶ Kaisã bagai, mimī odug fã ye fen, kalabus fõ gariya anī guyõ fen. Kaisã bagai, kalabus fõ nē sukar ganan kã feleid fen, kalabus tamo ganan bun sen irokaka kalaisi keledin.

²⁷ Kalabus lo fiya tamo irik yel fen, kalabus fõ nē sukar kã felediya ilen, agef fen, ī kisi fen, kalabus tamo diyalelel ye fen, yogon dimig ul feis, yogo bouwa yukesiyouf nigin age fen.

²⁸ Anī ere, Pol iweig iron, “Õ ogo bouwã to tū wo! Amã ganan yeir!”

²⁹ Kalabus lo fiya tamo yal nigin iweig fen, namen gudu ref ile, Pol Sailas ado yedin kubū ye, tererē yen.

³⁰ Agef fen, idi gurif irou, mayarē isi fen, to fiyēdin, “Tamo bibiyeī, aya naig afe fen, isennēya alouf?”

³¹ Idi diron, “Odug Jesus nigin momoi wouf are, õ isennõf, õ ogon ibor tar geid.”

³² Age de fen, idi Odug nē od, ī ado ganan yogon fõ bun dibodon anidi geid, wogõ difiyēdin.

³³ Sain anī bun bagai bõ, kalabus lo fiya tamo, Pol Sailas ado gurif iroule, bouweid gali gedin anī kulo fedin. Age fel fen, kaisã bagai ī yogon ibor tar ganan geid, naan digunēdin.

³⁴ Kalabus lo fiya tamo, idi yogon fõ aaben gurif iroule, saaf ifenēdin. Ī wau kulīya barikan, ere nigin, ī Negur nigin momoi yen, yogon ibor tar ganan geid.

³⁵ We fele di, Rom es fiya tamo, dogo neid kabī tamo anidi bun, kalabus lo fiya tamo gein od sur difen, “Tamo anidi walisneīd.”

³⁶ Age difiyē di, kalabus lo fiya tamo Pol irokenen, “Rom es fiya

tamo, ò Sailas ado alisneif nigin dirokana. Gama ã wadã ulagau. Wauĩ inosiya ado ulagau.”

³⁷ Anĩ ere, Pol kabĩ tamo irokenedin, “Amã Rom tamo ba, anĩ ere, idi to es difama ken, amã mal atun wagagã difaman. Age dife fen, amã kalabus bun dinenaman. Anĩ gama idi iminēyan dirumã fenē de? Sã! Idi dogo disi, dalisnama ken, dinenamãf.”

³⁸ Kabĩ tamo, od enei Rom es fiya tamo dirokenedin. Pol Sailas ado idi Rom tamo yeya anĩ karĩ de fen, idi kumĩ den.

³⁹ Idi Pol Sailas ado gedin bobo difiyediyouf nigin disi fen, kalabus bun tamal dalis dinenedin. Age dife fen, Rom es fiya tamo idi, Pol Sailas ado taun anĩ ditor dilauf nigin dirokenedin.

⁴⁰ Pol Sailas ado, kalabus bun tamal ulolõ deis fen, Lidia nẽ fõ bun dilen, idi an momoiya tamo kayau fotou difeid, waud dales le fen, ditorneid dilen.

17

Oun Tesalonika Taun

¹ Pol Sailas ado, Amfipolis ado Apolonia taun atu diyok dile fen, Tesalonika taun wõ den, an Juda neid uub fõ ibodon.

² Pol ã gai age fedig gen, Juda neid uub fõ bun ilen. Sabat naa towo bun, ã Negur nẽ Itotoya bun ibodok anĩ, tamo kayau geid katõ de, ifelneid fen,

³ Kristus ã darau yale fen, laa bun tamal mata kel fã youf bagai nigin, el fe faded fiyedin. Pol iron, “Jesus enei aya ã arokeneik are, ã anĩ Kristus.”

⁴ Juda tamo kayau tunĩ karĩ de, momoi de fen, Pol Sailas ado dõ difedin, Grik tamo kayau museig Negur nigin anini dedig ado, kayau yeneid adodo museig age difen.

⁵ Anĩ ere, Juda tamo, Pol Sailas ado kiyeĩ difeneid fen, maket modoũ bun tamo sesen tunĩ kuru difeid waud dalese di, tamo kayau guru difalasi fen, taun anĩ bun kakaĩ den. Idi Pol Sailas ado, tamo kayau bun

diroulediyouf nigin, Jeson nẽ fõ bun dile dimirnedin.

⁶ Anĩ ere, idi Pol Sailas ado to fotou difeid fen, Jeson momoiya tamo tunĩ geid didũ difeid, taun nẽ uyu iroudiya gedin dirouleid fen, diweig diron, “Tamo eneidi teneub ganan bun morõ difenedin anĩ gama yeir disin.

⁷ Age dife di, Jeson idi aan fiyeid fen, yogon fõ aaben gurif iroulen. Idi ganan Sisa nẽ lo difodul ken, king taka yana Jesus dedig ibodok, age de wogõ dedig.”

⁸ Tamo kayau ado, taun nẽ uyu iroudiya geid, od enei karĩ de fen, ninibur den.

⁹ Age dife fen, taun nẽ uyu iroudiya, Jeson ado tamo tunĩ geid kot na dalouf nigin dirokenedi di, na dalen, age difele di, ditornedi di, dilen.

Oun Berea Taun

¹⁰ Bo kele di, kaisã bagai momoiya tamo kayau, Pol Sailas ado Berea taun sur difedin. Idi an wõ de fen, Juda neid uub fõ bun dilen.

¹¹ An Berea tamo kayau idi, Tesalonika tamo kayau gen sã, idi wedereid dino fen, od karĩ dedig. Idi waud adod fen, od karĩ den, age de fen, idi Pol wogõ yen anĩ, momoi be dilouf nigin, naa ganan Negur nẽ Itotoya felei difedig.

¹² Juda tamo kayau musei momoi den, age fiya bagai, Grik kayau yeneid adodo musei ado Grik tamo museig momoi den.

¹³ Tesalonika taun an Juda tamo idi, Pol Negur nẽ od oun Berea tauneg irok ya karĩ de fen, idig an dile, tamo kayau nameid dalese di, seye den.

¹⁴ Age dife di, momoiya tamo kayau, kaisã bagai Pol maaĩ ubun sur difiyen, anĩ ere, Sailas Timoti ado idi an Berea taun dibodon.

¹⁵ Tamo tunĩ Pol dinenekel fen, weim Atens taun dilen, Pol ã, Sailas Timoti ado kaisã bagai ã gein disiyouf nigin, irokenedi di, idi keku de dilen.

Oun Atens Taun

16 Pol, oun Atens Sailas Timoti ado tari fedin, agef fen, ï idegēya waitou taun anī bun isokosen anī ile fen, wau fatuk moron.

17 Anī nigin, Pol ï, Juda tamo kayau ado, Grik tamo kayau Negur nigin anini dedig geid, Juda neid uub fō bun wageid yalouf nigin od solo difedin, ï naa ganan maket modoū bun, tamo kayau idi dilef disif difedig geideg, wageid yalouf nigin od solo difedin.

18 Epikurian ifelnēdiya tamo* tunī ado, Stoik ifelnēdiya tamo† tunīg, Pol geid fefe den. Idi tunī to difen, “Golē tamal enei, ere od wogō you fenē?” Tunī diron, “Ï yaū waitou nigin wogō yef be.” Idi age de diron, ere nigin, Pol ï Jesus nigin ado, laa bun tamal mata kel fāya nigin, biya od wogō yen.

19 Age fe di, idi Pol dale, taun uyu irouya neid guru fiya, yana Areopagus dedig, an dirou dile fen, diron, “Keleī mata enei urokanamak anī, amā tau keleī youf?”

20 Õ keleī mata bagai wederaman urou usif, ereb gariya nigin irok anī, amā keleī you fenē.”

21 (Atens tamo kayau ganan ado yaū tamo kayau an difaredig idi, sain ganan kisi mata mata nigin karī yei dedig, wogoī dedig, idi kabī taka to daledig.)

22 Age de di, Pol Areopagus guru fiya atun ifar fen, iron, “Atens tamo, ereb ereb ganan bun, ã waitou karī fiyēya nigin kisi fatuk unogedig anī ailef.

23 Ere nigin, aya ayo ken, ereb ereb yana walesegedig fele afedin, aya alta takag itotoya enei ado ailen: WAITOU, ADA KELEĪ SÃ ANĪ BUN. ã keleī sã anī yana walesegedig nigin, aya yaor afe arokeneik.

24 “Negur ï, teneub ado ereb ereb ganan anī namen difaref inodin, ï anī, saa ado teneub nē Odug nigin, ï tamo imedim tempel dinodin anī bun to ibodōdig.

25 Ï ereb taka to lau fedig, anī nigin, tamo imam ereb taka ifenēya kisi feleya sã, ere nigin, ï yogo tamo ganan mata, si neseya ado, ereb ereb ganan ifenēdidig.

26 Tamo tekelei bunem, ï tamo kayau fire fire ganan inodin, idi teneub adok ino yalouf nigin age fen. Ï dogo neid sain ifeneīd fen, idi ibodōya nē modoū daū fire fire ifenēdin.

27 Tamo ï dimirnēf nigin, imeid ra de dimirek dile, fotou difiyēf nigin be, ï age fen. Anī ere, ï ada mugu mugu bun gerō to ibodok.

28 ‘Ï bun ada mata tabod ken, telef tasif tafef, tabodok.’ Āgenei itotoya tamo tunīg eig de diron, ‘Ada yogon gere tar.’

29 “Age fiya bagai, ada Negur nē gere tar, anī nigin, ada kisi to eig tauf, waitou ï, gol nem, silwa nem, meein nem be, tamo nē kisim ado imam malakanon inodig age fiya, to tauf.

30 Tamo kayau Negur nigin to kelein sain, idi to kelei ken, age difedig anī, Negur to eweid yon, anī ere, gama ï, tamo kayau adok teneub ganan bun waud falei youf nigin irokenēdif.

31 Ï naa inon anī bun, ï tamo igirnen ï bunem, teneub ganan madur fiya bun es fouf. Negur ï laa bun tamal mata kel turī fe di, fã yen anī bunem, enei agef wō youf anī tamo ganan ifelnēdin.”

32 Laa bun tamal mata kel fāya nigin, Pol wogō yen anī karī de fen, tunī Pol kasã difiyen, anī ere, tunī diron, “Amā enei nigin baban karī mayō fenē.”

33 Age de di, Pol guru fiya anī itor ilen.

34 Tamo tunī Pol dō dife fen, momoi den. Idi atun, Dionisius, guru fiya yana Areopagus neid taka, kayau taka yana Damaris ado, tunī geid, dibodon.

* 17:18: Epikurian tamo idi bouwa buru nē oroya nigin al difedig. † 17:18: Stoik tamo idi bouwa buru nē oroya lai fiya nigin al difedig.

18

Oun Korin Taun

¹ Enei bure fel fen, Pol Atens taun itor ken, Korin taun ilen.

² Pol ï, an Juda tamo taka yana Akwila, Pontus provins tamal, fotou fiyen, Akwila ï aiwa Prisila ado Italim disi dibod dirubkelen, ere nigin, Sisa Klodius, Juda tamo kayau ganan Rom taun ditorõf nigin total od irokenëdin. Pol idi ilediyof nigin ilen.

³ Agef fen, Pol ï an idi geid dibod ken, weim kabï dalen, ere nigin, ïg idi gen salafat inoya tamo.

⁴ Sabat naa ganan, Pol Juda neid uub fõ bun, Juda tamo kayau ado Grik tamo kayau geid, od kuruwa difedig, are idi kisi falei de momoi douf nigin age fedig.

⁵ Sailas Timoti ado Masedoniam disi di, Pol ï Juda tamo kayau bun, Jesus ï anï Kristus fiyeïd fen, wogõ ye kurõ fesin, ï yogon sain adok kabï anï bun inon.

⁶ Anï ere, Juda idi Pol kiwai difen ken, kono difiyë di, ï so fiyeïd fen, yogon kolos tu fel fen, irokenëdin, “Å naudeï aug mudureï bun ibodõf! Aya to kababal fiyauf. Gama sain enei bunem ilef, aya haiden gedin alauf.”

⁷ Pol age ye fen, Juda neid uub fõ itor ken, Negur yana yalesedig tamo Titius Justus në fõ bun ilen, fõ are Juda neid uub fõ anï non.

⁸ Krispus, Juda neid uub fõ në mudur, ï yogon ibor ganan geid, Odug nigin momoi den. Korin tamo kayau museig biya od karï de fen, momoi den. Age dife di, naan dalen.

⁹ Bõ taka bun, Pol mala seleulã kurãf fen, Odug ï wogõ fiyë mog, karï yen, “To kumï wo, õ od wogõya tobol wof ulauf, ait to ufokalauf,

¹⁰ ere nigin, aya õ ado. Taka nem to ironokon, tadũ yõf, ere nigin, taun enei bun, neu tamo kayau musei dibodok.”

¹¹ Anï nigin, Pol ï yar tekelei ado ogõ sigis an ibod ken, tamo kayau Negur në od ifelnëdin.

¹² Galio ï Akaia provins në gawaman mudur ibod mog, Juda tamo kayau idi weim kori de, Pol kiwai difen ken, ï kot bun diroulen.

¹³ Idi diron, “Tamo enei neda lo wal fe fen, tamo kayau waud yale di, Negur yana, tobonunã fire bun dalesauf nigin age fef.”

¹⁴ Pol od wogõ you fenë mog, Galio ï Juda tamo kayau irokenëdin, “Juda tamo kayau ã, mosor be, tobonunã sane nigin urokanagauf are, aya ã karï yeïya nigin kisi feleya.

¹⁵ Anï ere, morõ enei, od nigin, yeneid nigin ado, ãgenei lo nigin of are, ã aug madur gouf. Aya age fediya to es afouf.”

¹⁶ Age ye fen, ï idi kot bun irudidin.

¹⁷ Age fe di, idi Juda neid uub fõ mudur Sostenes dale fen, kot fofomala bun dun. Anï ere, Galio to eweid yon.

Prisila, Akwila, Apolos Anidim

¹⁸ Pol ï oun Korin taun naa musei ibodon. Agef fen, ï momoiya tamo kayau itorneïd fen, Prisila Akwila ado weim waag dale, Siria distrik dilen. ï fau waag sõya sã mog, Senkria taun an yogon fatiya gudũ difelen, ere nigin, ï Negur mala bun wau kuturol fen, iron, age afouf yen.

¹⁹ Idi Efesus taun wowã den, an Pol, Prisila Akwila ado itornëdin. Pol ï yogo Juda neid uub fõ bun ile fen, Juda tamo kayau geid od kuruwa difen.

²⁰ ï idi geid sain naal meluk dibodõf nigin dirokenë di, itoron.

²¹ Anï ere, ï ilau fenë mã, idi irokenëdin, “Negur orouf are, aya kelauf.” Age ye fen, ï waag bun Efesus taun itor ilen.

²² Pol ï Sisaria taun kutũ yeis fen, Jerusalem isel, sios aan fiyëdin. Agef fen, ï Antiok taun isilen.

²³ Pol sain naal an Antiok taun ibodkele fen, anenem fã ye, Galesia provins ado Frigia distrik ganan bun iyo ken, dõ fiya tamo kayau ganan megeir fiyëdin.

²⁴ Sain anï bun, Juda tamo taka yana Apolos, Aleksandria fõ morou,

Efesus isin. Ī keleĩ biya ado tamo, Negur nē Itotoya bun ibodok anī nigin keleĩ biya bagai ado.

²⁵ Ī Odug nē naab anī difelnen, age dife di, ĩ total ado wogō ye fen, Jesus nigin tutuk bagai ifelnēdidig, anī ere, ĩ Jon nē naan igūya anī dogol kelein.

²⁶ Ī Juda neid uub fō bun, kumī sā od wogō yen. Prisila Akwila ado, ĩ wogō yen anī karī de fen, idi ĩ dogo neid fō bun dale diroule, Negur nē naab tutuk faded difiyen.

²⁷ Age difel fen, Apolos Akaia provins bun ilauf nigin age fe di, momoiya tamo kayau idi ĩ wau dales fen, Akaia teneub an dō fiya tamo kayau ĩ aan difiyēf nigin, pas ditokenēdin. Apolos an wō ye fen, Negur nē wau ifenēya bunem momoi den idi, fatuk bagai isennēdin.

²⁸ Ere nigin, ĩ Juda tamo kayau geid mal atun fefe de fen, od megeir ado nem lai feid fen, Negur nē Itotoya bun Jesus ĩ anī Kristus ya anī, agef ifelnēdin.

19

Pol Ī Oun Efesus Taun

¹ Apolos ĩ fau Korin taun ibod mog, Pol ĩ teneub atu iyok ile, Efesus taun wō yen. An ĩ, dō fiya tamo kayau tunī fotou fiyeĩd fen,

² to fiyēdin, “Ā momoi ge fen, Awa Uur Fateul walegen de?”

Idi ĩ dirokenen, “Sā, amā Awa Uur Fateul ibodok ya anīg to karī maun.”

³ Age de di, Pol idi to fedin, “Age fiyauf are, ere naan anī ā walegen?”

Idi ĩ dirokenen, “Jon nē naan igūya anī.”

⁴ Pol iron, “Jon nē naan igūya are wau faleiya nē naan igūya. Jon ĩ yogo, dumen tamo taka isif ĩ nigin momoi douf nigin, tamo kayau irokenēdin, tamo are Jesus.”

⁵ Idi od enei karī de fen, Odug Jesus yana bunem naan dalen.

⁶ Pol ima tetedin ino di, Awa Uur Fateul idi bun isin. Age fe di, idi od fire fire nem wogō de fen, profet odeg wogō den.

⁷ Idi ganan tamo tuwelf age fiya.

⁸ Pol Juda neid uub fō bun ile fen, an ogō towo bun, kumī sā od wogō yen, ĩ tamo kayau geid od kuruwa de, idi waud falei ye, Negur nē tano nigin momoi douf nigin age fen.

⁹ Anī ere, idi tunī waud total le fen, to momoi den. Age dife fen, idi mal atun Odug nē naab nigin od sesen diron. Anī nigin, Pol idi itorneĩd fen, dō fiya tamo kayau geif fen, naa ganan Tiranus nē ifelnēya fō bun od katō difen.

¹⁰ Enei age fen are yar uru ilelen, anī bunem, Juda tamo kayau ado, Grik tamo kayau ganan Asia provins an dibodon idi, Odug nē od karī den.

¹¹ Negur ĩ Pol bunem memelik fire bagai age fedin,

¹² are hankisip ado gabar masakeg, Pol bouwa kobū dife fen, dagi tamo bun diroule dinodi di, dagi el feledin, are kaa sesen idi ditornēdin.

¹³ Juda tamo tunī, kaa sesen dirudiyouf nigin diyōdig, idi kaa sesenem dirounēdin anidi bun Odug Jesus yana dale fen, idi eig de dirōdig, “Jesus ĩ nigin Pol wogō yedig, ĩ yana bunem, aya ō ulō wesiyouf nigin arokonok.”

¹⁴ Juda neid pris odug taka, Skeba nē gere tar sewen idig age difedig.

¹⁵ Naa taka bun, kaa sanem idi irokenēdin, “Aya Jesus keleĩ, aya Pol nigin keleĩ, anī ere, ā aiyaim?”

¹⁶ Age ye fen, tamo kaa sane ado tetedin gurusā ye, ganan lalai feid fen, fatuk bagai idenēdin. Age fe di, idi fō anī bun tamal, gemū naud adodo diyalelen.

¹⁷ Juda tamo kayau ado Grik tamo kayau Efesus taun dibodon idi, enei karī de fen, idi ganan fatuk bagai kumī de, Odug Jesus yana ilun bagai dalesen.

¹⁸ Tamo kayau momoi den musei disi, sane age difedig anī, mal atun yaor dife, kurō difesin.

¹⁹ Idi idegēya bunem kosē dedig musei, dogo neid buk kori fiya guri de dirousi, kuru de, mal atun yā diraran. Idi buk kori fiya anī nē mala

diwesen, are fifti tausen silwa moni* wō yen.

²⁰ Anī bunem, Odug nē od bilalaū fe fen, megeiref ilen.

²¹ Enei ganen agef wō ye le di, Pol Masedonia ado Akaia provins atu iyok ile anenem, Jerusalem ilauf nigin kisi yalen. Ī iron, “Aya an wō au fen, aya Romeg ki afouf.”

²² Age ye fen, ĩ yogon isennēya tamo uru, Timoti Erastus ado Masedonia provins bun sur feid fen, ĩ Efesus an Asia provins bun sain naal ibodon.

Efesus Taun Oun Kiwai Kuru Dalesen

²³ Sain anī bun, Odug nē Naab nigin, kiwai ado monēya odug wō yen.

²⁴ Silwa nem ereb ereb inoya tamo, yana Demetrius, ĩ silwa nem kayau waitou yana Artemis dedig anī nē tempel malakanon inodig, anī bunem yogon kabī tamo moni musei daledig.

²⁵ Demetrius ĩ, yogon kabī tamo tar ado, yogon kabī gen age fiya tutur iweig laisi fen, irokenēdin, “Tamo ā, ā keleī, ada kabī enei bun moni biya taledig.

²⁶ Anī ā gama uleg fen, karī gef, tamo Pol enei, ein Efesus ado mogo Asia provins ganen melsā bagai bun, tamo kayau musei waud yale fen, eig ye irok, tamo ima nem waitou inodif are anī waitou sã, yef.

²⁷ Are karīya sane yenek, ada neda moni kabī yana sane yalouf, takag, karīya sane yenek are, kayau waitou odug Artemis nē tempel are ege bagai kaū sãf. Age fe di, kayau waitou, Asia provins ganen bun ado teneub adok ganen bun, yana dalesedig, ĩ yana odug iseledig are lai difesilauf.”

²⁸ Idi od enei karī de fen, fatuk bagai seye ise di, kakaī de diweig diron, “Efesus neid Artemis ĩ odug bagai!”

²⁹ Age de di, taun anī bun ganen kuru dalesen. Tamo kayau idi, Gaius

Aristakus ado, are idi Masedonia temeleid Pol geid diyōdig anidi, kaka difeid, guru fiya nē fō odug namen, tamo tekeleim gudu ref ileya gen gududu den.

³⁰ Pol ĩ guru fiya atun ilauf nigin age fen, anī ere, dō fiya tamo kayau Pol katū difiyen.

³¹ Asia gawaman nē uyu irouya tunī, are Pol nē mou tar idig, Pol guru fiya nē fō anī bun to ilauf nigin digone ken, od sur difenen.

³² Guru fiya anī bun nene delen. Tunī od taka diweig dirō di, tunī od fire taka diweig diron. Musei ganen ereb nigin an guru difen anī, idi keleī san.

³³ Juda tamo kayau, Aleksanda, tamo kayau wagedin mal atun sur dife, isel ifare di, tamo kayau tunī ĩ dile fen, Aleksanda ĩ anī morō gariya den. Age dife di, Aleksanda ĩ tamo kayau meleid bun yogo bouwa isennēf nigin, ĩ foro dalauf nigin imam dogol fiyēdin.

³⁴ Anī ere, idi ĩ Juda tamo ya keleī ken, idi ganen aiteid tekelei dino fen, aua uru age fiya eig de diweig diron, “Efesus neid Artemis ĩ odug bagai!”

³⁵ Age de di, taun uyu irouya nē kabī tamo ĩ, tamo kayau foro weleg fiyēdi di, foro delen, age dife di, iron, “Efesus tamo ā, teneub ganen bun tamo kayau ganen, Efesus taun anī, Artemis odug nē tempel ado yogon malakanon saa ilunem isin anī nē kulatun fiya taun anī, idi to keleī de?

³⁶ Taka nem enei wa fiya kisi feleya sã, anī nigin, ā foro weleg fen, age fiya nigin to buroro gei.

³⁷ Tamo eneidi ereb taka tempel buneg to bē dalen, idi neda kayau waitoug to kono difiyen, anī ere, ā idi ein guri wedig urousigel.

³⁸ Age fiyauf are, Demetrius yogon kabī tura tar geid, tamo taka nigin nauseirya adouf are, kot ibodok, gawaman nē mudur adodo difaref. Idi an nauseirya anī diroulauf.

* 19:19: Silwa moni tekelei are, naa tekelei bun kabī tamo nē mala.

³⁹ Ā nauseir anī teten ereb taka manouf gouf are, tamo kayau neid kot guru fiya bun madur gouf.

⁴⁰ Gama wō yel enei nigin, kariya sane yenek, kuru talesel enei nigin are ada kot bun dinenadauf. Age difouf are, ada guru fiya sane enei nigin faded fiya kisi feleya sã, ere nigin, are gariya sã.”

⁴¹ Agef irokel fen, ĩ guru fiya anī irudin.

20

Pol Masedonia Ado Grik Teneub Atu Ilen

¹ Kuru anī bure fele di, Pol ĩ od ino di, dō fiya tamo kayau disin, age dife di, idi waud yales le fen, dabuo fiyēd lel, Masedonia provins ilen.

² Pol ĩ Masedonia provins atu iyok ile, wau yaleseya od musei tamo kayau irokenēdif ile, Grik kantri bun ulō yeis fen,

³ ĩ an ogō towo ibodon. ĩ waag bun Siria distrik bun ilauf nigin agef mog, Juda tamo idi, ĩ dukesiyouf nigin lalī difiyek anī karī yen. Anī nigin, ĩ Masedonia provins atu kel ilauf nigin kisi yalen.

⁴ Pirus naal Sopata Berea taun tamal, Aristakus, Sekundus Tesalonika taun tamal, Gaius Derbe taun tamal, Timoti, Tikikus Trofimus ado Asia provins temeleid anidim, Pol geid diyon.

⁵ Tamo eneidi idi ket Troas taun dile, an tari difaman.

⁶ Anī ere, Bret Yis Sã nē Sifa bure fele di, amã waag male, Filipai taun mator ken, naa faif ilele di, Troas taun wō mau fen, fata mafiyēdin, an naa sewen mabodon.

Troas Taun Oun Yutikus Laa Bun Tamal Kel Turī Fiyen

⁷ Uub nē naa matu bun, amã weim bret mumã mafouf nigin guru mafalaisin. Pol tamo kayau od wogō fiyēdif ile bō atunen, ere nigin, ĩ, we fele di, itornēdiyof nigin kisi fen.

⁸ Guru mafen nē aab ilun an, lam musei futu redin.

⁹ Tamo gaū yana Yutikus, yau yaleya bobog ilun sō yesel ibod ken, mulã kusu yalen. Pol od wogō yef ile mog, ĩ mulã kusu yalef ile yen kele fen, fō ilunenem tenebur kubū ye isilen. Age fe di, idi ĩ laa dalesnen.

¹⁰ Anī ere, Pol isil, tamo anī teten kubū ye, kakarai fiye ken, iron, “To terēg, ĩ mata!”

¹¹ Age ye fen, ĩ baban fō ilun isel, bret mumãf fen, yon. ĩ wogō yef ile we fele di, ĩ itorneid ilen.

¹² Tamo kayau, tamo gaū anī mata dale dirou, fō bun dile fen, waud el bagai fen.

Pol Efesus Sios Neid Uyu Irouya Dabuo Fiyēdin

¹³ Amã ket waag bun mele, sō mau fen, Asos taun melen, an Pol waag bun malouf nigin kisi mafen. Pol ĩ, amã age mafouf nigin tetun irokana-man, ere nigin, ĩ ye naab iyok ile, an ilauf yen.

¹⁴ ĩ oun Asos fotou famã di, amã ĩ waag bun male fen, Mitilin taun melen.

¹⁵ Anenem waag bun mele, we fele di, Kios nuyo non wō maun. Naa anī ile di, Samos taun mele wō maun, naa anī ile di, Miletus taun mele wō maun.

¹⁶ Pol ĩ, Asia provins bun an sain taka to ilauf nigin, waag bun Efesus wal fouf nigin kisi yalen, ere nigin, kisi falauf are, ĩ Jerusalem Pentikos naa bun wō youf nigin sibu yen.

¹⁷ Miletus taun an, Pol ĩ Efesus sios neid uyu irouya fata difiyēf nigin od sur fen.

¹⁸ Idi disi wō de di, ĩ irokenēdin, “Aya Asia provins bun, uruwa bagai asi wō au fen, aya ã geid tabod ken, sain ganan naig be afe abodon are ã keleĩ.

¹⁹ Juda tamo idi aya kiwai difana fen, kisi sane dinon anim fatuk bagai kisi fiyan, anī ere, aya wau aukesil, maru ado fen, Odug aruna alen.

²⁰ Ā keleĩ, aya ã isenneif nigin ereb taka wogōya bun to afon, are aya mal atun ado fō fō bun afelnein.

21 Aya Juda tamo kayau ado Grik tamo kayau idi waud falei ye, Negur bun dino fen, neda Odug Jesus nigin momoi douf nigin total bagai arokenēdin.

22 “Gama aya Awa Uurem toli fiyaf anī bunem, Jerusalem elef, an aya bun ereb wō youf are aya keleī sã.

23 Taun ganan bun Awa Uur Fateul, kalabus ado morō tari difiyaf anī nigin wederou irouf, anī dogol aya keleī.

24 Anī ere, aya neu naab adikalauf nigin ado, kabī Odug Jesus ifanan, are Negur nē wau ifenēya nē biya od wogōya kabī anī bure afalauf nigin dogol, kisi afef. Anī kisi afalauf are, aya neu mata are ege au fen, neu mata nigin to kisi afef.

25 “Aya ã atun ayo ken, Negur nē tano nigin wogō ayein, are gama aya keleī, ã atun takam baban to ileyau.

26 Anī nigin, naa enei bun, aya tutuk bagai yaor afe arokeneik, tamo ganan neid naudeid nigin, aya neu mosor sã.

27 Ere nigin, aya Negur nē oroya ganan yaor afe arokeneif nigin, taka to afokelen.

28 Æ aug nigin ado, sipsip ganan Awa Uur Fateulem lo wedigouf nigin imeī bun inon anī nigin, meleī adouf. Negur nē sios, ï yogon naud bunem na yalen anī nē sipsip lo fiya tamo ubodōgouf.

29 Aya keleī, aya atorneī mog, gaū kuī sane ã atun disi, sipsip daū difeildlauf.

30 Æ tutur buneg tamo tunī fã de, dō fiya tamo tunī momoi bun tamal didegneid fen, idi dō difediyouf nigin weleid dino diroulauf.

31 Anī nigin, ã lo welegei! Yar towo bun, bō ado gaa ado, maru ado ã mugu mugu ganan wedereī aroun anī karī walagau.

32 “Gama aya ã, Negur ado yogon wau ifenēya nē od bun, aneneik, od anim ã totalouf nigin megeir ifenei ken, yogon momoiya tamo tar ganan atun, in akor mata ibodkeleya anī ifeneif.

33 Aya takan nē silwa be, gol be, kolos yaleya nigin to wau yenen.

34 Æ aug keleī, aya imau eneim kabī ale di, aya neu kabī turau tar geid, ereb lau mafen anī ifanaman.

35 Ereb ereb ganan aya age afen anī bunem, aya ã afelnein, are ada kabī total age taf tale fen, anī bun tamalem maleg tasennēdiyof. Odug Jesus yogo eig ye iron anī karī taulauf, ‘Ifenēya are el fiya barikã, yaleya nē wal fiya.’ ”

36 Pol ï od enei wogō yel fen, ï ibor bobou fe, idi ganan geid kosē den.

37 Idi ï kakarai difiyē, umã difiye ken, ganan inã dalen.

38 Idi ï nawa baban to dilouf fiyēdin od anim waud gudū fen. Age dife fen, idi weim waag bun dinenen.

21

Pol Jerusalem Ilen

1 Amã dabuo mafiyeid matorneid fen, waag sō mau, Kos nuyo tokō mafelen. Naa anī ile di, amã Rodes nuyo mele fen, anenem Patara taun melen.

2 Amã waag taka Fonisia distrik bun ile mog, fotou mafe fen, waag anī sō mau melen.

3 Amã Saipras nuyo mail fen, wal mafe, anī ki melem Siria provins melen. Amã Taia taun kututū maun, ere nigin, an waag udū gei falaisiyof nigin age fen.

4 Amã an dō fiya tamo kayau fotou mafeid fen, weim naa sewen mabodon. Idi Awa Uurem Pol Jerusalem to ilauf nigin total bagai dirokenen.

5 Anī ere, nemã sain bure fele di, amã matorneid fen, delē mayon. Dō fiya tamo ganan dogo neid kayau kesu tar geid, taun tamal dinenamã, mele, maaī ubun ulō maus fen, an amã iboramã bobou mafe fen, kosē maun.

6 Amã abob dabuo mafiye ken, amã waag sō mau di, idi fonō keku de dilen.

7 Amã Taia taun anenem tokō mafel, Ptolemais taun kututū maun, an amã momoiya tamo kayau aan

mafiyeïd fen, idi geid naa tekelei mabodon.

⁸ Naa anï ile di, amã matorneïd mele, Sisaria taun wõ mau fen, an biya od wogõya tamo Filip nẽ fõ bun mabodon, ï kulu oun Jerusalem momoia tamo sewen digirnẽdin anidi taka.

⁹ Filip ï, ne barai tar aiwa adodo tamo sãsã, idi profet od wogõ dedig.

¹⁰ An naa tunï mabodon, age mã mog, profet taka yana Agabus Judia distrik bun tamal isin.

¹¹ ï amã garan isi, Pol nẽ lũ yale fen, yogo ye ima ado ifofa ken, iron, “Awa Uur Fateul eig ye irok, ‘Jerusalem oun Juda tamo idi lũ enei nẽ marau eig de difo ken, haiden imeid bun dinenẽf.’ ”

¹² Amã od enei karï mau fen, amã an tamo kayau geid Pol Jerusalem to ilauf nigin magonen.

¹³ Age mafe di, Pol iron, “Ã ere nigin inã walege di, aya wau gudũ fef? Aya Odug Jesus yana nigin, Jerusalem oun difõyauf nigin ado laa fiyauf nigineg, dodok afel.”

¹⁴ Amã ï wala inoya kisi feleya sa ken, folõ mafiye kele fen, moron, “Odug nẽ oroya anï kisi falauf.”

¹⁵ Age mafel fen, amã dodok mafel, Jerusalem meselen.

¹⁶ Dõ fiya tamo tunï Sisaria taun temeleid dinenama ken, Nason nẽ fõ bun mabodõf nẽ an dirouleman. Nason ï, dõ fiya tamo uruwa bun temeleid anidi taka, Saipras nuyo tamal.

Pol Jerusalem Wõ Yen

¹⁷ Amã Jerusalem wõ mau di, momoia tamo idi waud sere fiya ado aan difaman.

¹⁸ Naa anï ile di, amã Pol geid Jems mailauf nigin melen, sios uyu irouya ganan an difaren.

¹⁹ Pol idi aan fiyeïd fen, yogon kabï bunem Negur haiden atun ereb age fen anï, teke tekelei dir fenẽdin.

²⁰ Idi od enei karï de fen, Negur yana dalesen. Age dife fen, idi Pol dirokenen, “Turamã, õ ulef, ganï tausen Juda idi momoi den, anï ere,

idi ganan Moses nẽ Lo dõ fiya nigin waud total bagai yenek.

²¹ Õ, Juda idi haiden neid teneub bun difaref ganan, Moses nẽ Lo ditor ken, dogo neid kesu tar mulũ bun to dinenẽdiyof, dogo neid tobonunã to dõ difouf nigin ufelnẽdin ya anï, idi mogo karï den.

²² Idi õ usil ya anï fau karï douf. Age difouf are, ada ere naig tafouf?

²³ Anï nigin, amã marokonok anï, ago dõ wo. Tamo aiwa adodo Negur mala bun age mafouf bagai den, idi yeir amã geid.

²⁴ Tamo eneidi geid uleg fen, nonorou lilik fiya nẽ tobonunã bun ulagauf. Agog fen, na walekenẽdiyof, ago di, idi fatiyeid korerẽ difalauf. Ago ge di, õ nigin od enei are momoi sã, õ ogo Moses nẽ Lo dõ wedig anï, tamo kayau ganan keleï youf.

²⁵ Haiden tamo kayau idi momoi den anidi bun, amã kisi mafon anï matotkenẽdin, are idi saaf idegëya waitou bun sesewi difen anï to dãf, yaro naud adodo to dãf, yaro uleid kakã difeid fen, didenkesif anï to dãf ado, noli tobonunã bun to dilauf.”

²⁶ Naa anï ile di, Pol tamo anidi geif fen, ï yogo weim nonorou lilik difen. Age difel fen, ï tempel bun ile, ere sain nonorou lilik fiya naa bure fele di, idi mugu mugu sesewi difouf anï, pris keleï youf nigin irokenẽdin.

Rom Kusï Tamo Pol Dalen

²⁷ Naa sewen anï bure falau fenẽ mog, Juda tamo tunï Asia provins temeleid idi, tempel bun Pol dilen. Idi tamo ganan waud dalese di, seye de fen, Pol dale,

²⁸ diweig diron, “Israel tamo, usen-namãg! Tamo enei anï, neda tamo kayau, neda lo ado, modoũ enei nigin, od sane teneub ganan bun, tamo ganan ifelnẽdidig. Takag, ï Grik tamo tempel modoũ bun gurif isi di, fateul modoũ enei amuyẽ ifenen.”

²⁹ (Idi uruwa bun, Trofimus Efesus taun tamal, Pol ado an taun diledin, anï nigin, idi kisi difen, Trofimus

Pol im tempel modoũ namen iroulen den.)

³⁰ Taun tamo kayau ganan fafã de fen, naab uyu fire fire bunem gududu de disin. Idi Pol dale, tempel bun tamal dī de diror diroule di, kaisã bagai sukar kotũ difeledin.

³¹ Idi Pol dukesiyou fenē age de mog, od isel, Rom kusī tamo neid odug, Jerusalem taun tamo kayau ganan kuru dalesef ya anī karī yen.

³² Kaisã bagai, kusī tamo neid odug ī, kusī tamo neid orowa tunī ado kusī tamo geif fen, tamo kayau musei gedin gududu de disilen. Tamo kusī dalesen idi, kusī tamo neid odug ado yogon kusī tamo geid dileid fen, Pol dun anī folō difelen.

³³ Kusī tamo neid odug isi, Pol dale, sen uru nem difōf nigin iron. Age ye fen, Pol ī ai anī, ereb ī age fen anī ado nigineg, Juda tamo to fiyēdin.

³⁴ Tamo kayau musei atun, tunī od gariya fire diweig diron, tunim od gariya fire taka diweig diron. Kusī tamo neid odug ī, idi kuru dalesen nigin momoi od yaleya kisi feleya san anī nigin, ī Pol kusī tamo neid fō bun dirou dilauf nigin irokenēdin.

³⁵ Pol lata garan wō ye mog, tamo musei idi didid aus fele di, kusī tamom Pol faali difiyen.

³⁶ Tamo musei idi dō difeid fen, diweig diron, “Ukesig!”

Pol Tamo Kayau Musei Wogō Fiyēdin

³⁷ Kusī tamo idi, Pol kusī tamo neid fō aaben diroulau fenē mog, ī kusī tamo neid odug to fiyen, “Aya od taka tau arokonōf?”

Ī aba solof iron, “Ō Grik od wogō wodig de?”

³⁸ Ō Isip tamal sã de? Kulu gawaman kiwai wene ken, gerere tuan fo tausen kiwai tamo uyu urou ulen anī.”

³⁹ Pol iron, “Aya Juda tamo, Silisia provins oun Tasus taun tamal, taun yana ado nē fō morou. Utorna len, tamo kayau od arokenēdiyof.”

⁴⁰ Kusī tamo neid odug yo fiyē di, Pol lata bun ifar fen, tamo kayau

imam fiyēdin. Idi ganan foro dele di, Pol Hibru od nem irokenēdin,

22

¹ “Turau tar ado dei geg, gama aya yug nigin isennēya od enei karī wog.”

² Pol Hibru od nem irokenēdi di, karī de fen, idi fatuk foro delen.

Age dife di, Pol iron,

³ “Aya Juda tamo, Silisia provins oun Tasus taun an wō au fen, taun enei bun biyaun. Aya Gamaliel bun tubuda tar neid lo nigin tai fiya fatuk alen. Age afe fen, ā ganan gama ago gef gen, ayag Negur nigin kisi totol alen.

⁴ Aya Naab enei dō difedig tamo kayau, darau afeneid fen, adenkesin, tamo ado kayau gei afeid fen, kalabus araran.

⁵ Pris neid mudur ado, kaunsel neid uyu irouya ganan geideg, aya age afen anī nigin wogō douf. Aya tureid tar Juda idi oun Damaskus taun difaref anidi bun paseg idi bun ale fen, tamo kayau eneidi darau difenēdiyof nigin afofa ken, Jerusalem guri afeid alauf nigin an elen.

⁶ “Gaa atun age fiya, aya ele, Damaskus wō au fenē mog, kaisã bagai, lalan fula fiya taka saa ilun tamal aya bun fula felen.

⁷ Aya tenebur kubū au asil fen, ait taka wogō fiya mog, karī aun, ‘Sol, Sol, ere nigin ō aya daig wiyaf?’

⁸ “Aya to afen, ‘Odug, ō aim?’

“Ī solof irokanan, ‘Aya Jesus Nasaret tamal, ō daig wiyaf anim.’

⁹ Neu kabī turau tar fula fiya anī dilen, anī ere, idi ait wogō fiyan anī to karī den.

¹⁰ “Aya to afen, ‘Ere naig afouf?’

“Odug iron, ‘Fã wale fen, Damaskus taun ule, an ō ereb agouf nigin Negur igirkonon anī ganan irokonōf.’

¹¹ Neu kabī turau tar, imau gim de, Damaskus dirouleyan, ere nigin, lalan fula fiya anim malau gugum kelen.

12 “Tamo taka yana Ananias ileyauf nigin isin. Ī lo el fe dō fedig tamo, Juda idi an difaref ganan, Ī nigin biya difiyēdig.

13 Ī aya sirun ifar fen, iron, ‘Turau, Sol, ō malā kelē yalauf!’ Sain anī bun bagai, aya Ī ileyā kisi feleyan.

14 “Age afe di, Ī iron, ‘Tubuda tar neid Negur, ō yogon oroya keleī youf nigin, Madur Bagai Tamo anī ulouf nigin ado, Ī awa bun od karī wouf nigin igirnon.

15 Ō ereb ulen ado karī won anī, tamo ganan bun Ī nigin wogō wouf.

16 Anī gama ō ere tari wof? Fā wale, naan wale, Ī yana uweigne ken, ogon mosor kulo wol.’

17 “Aya Jerusalem kelau ele fen, tempel bun kosē au mog, malau seleulā kurāf fen,

18 Odug wogō ye mog, ailen. Ī aya irokanan, ‘Gama nem, kaisā bagai Jerusalem utor ule, ere nigin, idi aya nigin ogon od to karī douf.’

19 “Age ye di, aya oron, ‘Odug, idi dogo keleī, are aya Juda neid uub fō fō bun ele fen, ō nigin momoi den anidi kalabus bun aneneīd fen, adenēdidig.

20 Takag, ogon od wogō yedig tamo Stiwen naud fi felen sain bun, ayag an afaren, Ī dukesiyouf nigin wau iro ken, tamo idi Ī dukesin neid kolos tari afen.’

21 “Age au di, Odug irokanan, ‘Ule, aya haiden gedin gerō sur ayōf.’ ”

Pol Ī Rom Tamo Anī Kurō Fesin

22 Tamo kayau musei Pol karī difiyek dile, Ī od enei irō di, idi kakaī de fen, diweig diron, “Ukesig, tenebur tamal uraileg! Ī mata ibodōya to biya!”

23 Idi diweig diro ken, dogo neid kolos dinukakā dirara ken, aas ilun diraran.

24 Age dife di, kusī tamo neid odug, Pol kusī tamo neid fō bun dirou dilauf nigin irokenēdin. Tamo idi Pol eig de diweig dirokenen anī nē gariya keleī youf nigin, Pol wagī difiye ken, to difiyēf nigin, Ī irokenēdin.

25 Idi Ī wagī difiyēf nigin yaī difiyē mog, Pol kusī tamo neid orowa an ifaren anī irokenen, “Ā, Rom tamo, mosor ado be ya kelei sa ken, wagī fiya are lo dō fiya de?”

26 Kusī tamo neid orowa od enei karī ye fen, Ī kusī tamo neid odug garan ile fen, Ī irokenen, “Ō ere naig wou fenē? Tamo enei Ī Rom tamo.”

27 Kusī tamo neid odug Pol garan ile fen, to fiyen, “Ō urokana, ō Rom tamo de?”

Pol Ī iron, “Are momoi.”

28 Age ye di, kusī tamo neid odug iron, “Aya Rom tamo wō auf nigin, moni odugem na alen.”

Pol iron, “Anī ere, aya Rom tamo gō difiyan.”

29 Age ye di, tamo Pol to difiyēf nigin age difen idi, kaisā bagai folō difelen. Kusī tamo neid odug ĩg, Pol Ī Rom tamo, sen nem ifon anī weder fokō yel fen, kumī yen.

Juda Neid Uyu Irouya Guru Fiya Meleid Bun

30 Naa anī ile di, kusī tamo neid odug ĩ, Juda idi Pol bou bun od dun anī nē gariya tutuk bagai keleī youf nigin oron, anī nigin, Ī Pol yalisne ken, pris odudug ado Juda neid uyu irouya ganan guru difouf nigin irokenēdin. Agef fen, Ī Pol yale irousi, idi wagedin ifarnen.

23

1 Pol guru fiya anī lo feid le fen, iron, “Turau tar, aya Negur kabī ifanan anī, wau karētut bagai ado age alef asi, gama naa enei bun.”

2 Od enī irō di, pris neid mudur Ananias, tamo Pol non difaren anidi Ī sigor daū difouf nigin irokenēdin.

3 Age ye di, Pol Ananias irokenen, “Negur ō inō irāf, ō pen lalaum garaī naki fiya! Ō lo kilei es wiyauf nigin an ubodok, anī ere, ō lo wal wo fen, aya dinauf nigin urokenēdif!”

4 Tamo Pol non difaren anidim Ī dirokenen, “Ō Negur nē pris neid mudur kumī sā kono wiyek de?”

5 Age de di, Pol iron, “Turau tar, Ī pris neid mudur anī aya to kelein.

Are Negur nē Itotoya bun ibodok, 'Ogon tamo kayau neid uyu irouya nigin od sane to urōf.* "

⁶ Age ye fen, Pol idi tunī Sadusia tamo, tunī Farisia tamo anī kelei ken, uyu irouya neid guru fiya mala bun iweig iron, "Turau tar, aya Farisia tamo taka, Farisia tamo naaluid. Aya laa bun tamal mata kel fāya nigin wau iseya ado nigin, kot bun afaref."

⁷ Pol od enei irō di, Farisia tamo ado Sadusia tamo geid fefe de fen, guru fiya anī faraf uru fen.

⁸ (Sadusia tamo idi dirōdig, laa bun tamal mata kel fāya sã, engel sã, uureg sã, anī ere, Farisia tamo idi dirōdig, anī ganan are dibodok.)

⁹ Aiteid oduduge di, lo ifelnēdiya tamo tunī, idig Farisia bun temeleid fafã de fen, totol bagai fe de diron, "Amã tamo enei bun kũ fenēya taka to mailef. Ī uurem be engel takam be irokenen are, naig fiyauf?"

¹⁰ Fefeya anī ile, sane le di, kusī tamo neid odug Pol fisik difouf ye fen, kumī yen. Anī nigin, ĩ kusī tamo disil, imedin tamal totol ado son difeid, kusī tamo neid fō bun diroulauf nigin, irokenēdin.

¹¹ Bō anī bun, Odug Pol non ifar fen, iron, "Totol uno! Ō Jerusalem ein, aya nigin wogō wol gen, ō Rom ouneg ago wogō wouf."

Pol Dukesiyouf Nigin Naab Dimiren

¹² Bonime di, Juda idi guru de fen, Pol yukesiya nigin kisi katō difen. Pol yukesiya sã mog, idi saaf ado naan to dāf nigin waud kuturol fen, od difon.

¹³ Tamo foti wal fiya anidim, enei nigin kisi katō difen.

¹⁴ Idi pris odudug ado uyu iroudiya bun dile fen, diron, "Pol yukesiya sã mog, amã ereb taka to mǎf nigin waumã kuturol fen, od mafon.

¹⁵ Anī nigin, gama ā uyu irouya neid guru fiya geid, tamomoi ge fen, Pol nigin tutuk bagai keleī youf ge fen, ĩ ā gein dirou disiyouf nigin, kusī

tamo neid odug urokenēgouf. Amã, ĩ ein wōya sã mog, ĩ maukesiyouf nigin dodok mafef."

¹⁶ Anī ere, Pol main nē naal kisi enei karī ye fen, ĩ kusī tamo neid fō bun ile fen, Pol irokenen.

¹⁷ Age ye di, Pol kusī tamo neid orowa taka iweignē isi di, iron, "Tamo gaū enei wale, kusī tamo neid odug gein uroule. Ī od taka irokenēf nigin ado."

¹⁸ Anī nigin, ĩ kusī tamo neid odug garan yale iroule fen, iron,

"Kalabus tamo Pol iweigna fen, tamo gaū enei ō gein arou asiyouf nigin irokanal, ere nigin, ĩ od taka irokonōf nigin ado."

¹⁹ Kusī tamo neid odug, tamo gaū ima yale irou, yerin dile fen, to fiyen, "Aya ere od anī urokanau fenē?"

²⁰ Tamo gaū iron, "Juda idi waud tekeleil, tamomoi de fen, Pol nigin tutuk bagai keleī youf de fen, nil uyu irouya neid guru fiya mala bun, ĩ diroulauf nigin dirokonōf.

²¹ Are idi to karī wiyēdiyof, ere nigin, tamo foti wal fiya anidim ĩ nigin dimin ken, tari difef. Pol yuke-siya sã mog, idi saaf ado naan to dāf nigin waud kuturol fen, od difon. Idi dodok difel fen, Pol idi garan sur fiya nigin ogon yoya anī tari difef."

²² Kusī tamo neid odug tamo gaū anī weder irou fen, sur fen, "Ō enei urokanal anī, aib taka to urokenēf."

Pol Sisaria Taun Diroule Dininen

²³ Age fel fen, ĩ kusī tamo neid orowa uru iweigneid, disi di, iro-kenēdin, "Kusī tamo tu hundred ado, kusī tamo sewenti hos adodo, kusī tamo tu hundred ot adodo anidim, bō nain kilok Sisaria taun ulagauf nigin, dodok gouf.

²⁴ Pol teten ibod ken, Gawaman nē Mudur Feliks bun biya ile wō youf nigin, hos tunī dodok gouf."

²⁵ Ī pas eig ye itoton:

²⁶ Aya Klodius Lisias,

Odug Gawaman nē Mudur Feliks aan ayok.

* 23:5: Eksodas 22:28

²⁷ Tamo enei Juda tamom dale fen, dukesiyou fenē age difen, anī ere, aya neu kusī tamo geid masi masennen, ere nigin, aya ī nigin kelein, ī Rom tamo.

²⁸ Idi ī bun od dun anī, aya gariya keleī youf nigin, ī dogo neid uyu irouya guru fiya bun aroulen.

²⁹ Ī bun od dun are dogo neid lo nigin age difen, anī ere, ī laa fiya nē be, kalabus ilauf nē ereb taka to age fen anī aya kelein.

³⁰ Aya ī dukesiyouf nigin naab dimirek ya anī karī au fen, aya kaisā bagai ī, ō gein sur afiyen. Ī bou bun od dun idig, ō malā bun nedi morō yaor difouf nigin arokenēdin.

³¹ Anī nigin, kusī tamo idi irokenēdin kilei, dō def age difen, idi bō Pol dale dirou, Antipatris taun dilen.

³² We fele di, idi, kusī tamo hos adodo, Pol geid dilauf nigin dirokeneīd fen, idi kusī tamo neid fō bun keku de dilen.

³³ Kusī tamo hos adodo Sisaria taun wō de fen, pas anī gawaman nē mudur difen ken, Pol ī ima bun dinon.

³⁴ Gawaman nē mudur ī pas anī iwes fen, Pol ī teneub nanī bun tamal anī to fiyen. Gawaman nē mudur ī, Pol Silisia provins bun tamal anī keleī ken,

³⁵ Ī iron, “Aya ogon od, tamo ō bun od dun anidi ein disiyouf bun, karī auf.” Age ye fen, ī Pol Herod nē fō bun dinene ken, lo difouf nigin irokenēdin.

24

Pol Feliks Mala Bun Kot Fen

¹ Naa faif ilele di, pris neid mudur Ananias, uyu irouya tunī ado, lo keleī tamo yana Tertulus dedig geid, Sisaria taun disilen. Idi Pol bouwa bun od dūf nigin, gawaman nē mudur mala bun wō den.

² Anī Pol diweignē, isi di, Tertulus Feliks mala bun, Pol bun bou yūya

od anī gariya ino irokenen, “Amā ō farumen wau inosiyu sain meluk mabodok masin. Ogon lo fiya biya bun, neda teneub bun ereb ereb biya musei wowā den.

³ Odug Feliks, modoū ganan ado naab ganan bun, amā enei keleī ken, anī nigin fatuk bagai de mayok.

⁴ Anī ere, aya ogon sain to akasiy-ouf nigin, ō waū ino ken, sain naal bagai karī wamāf nigin arokonok.

⁵ “Tamo enei morō inoya tamo, teneub ganan bun, Juda tamo atun kuru yalesedig anī amā mailen. Ī Nasaret idegēya momoiya mala neid uyu irouya.

⁶ Ī tempeleg amuyē ifenēf nigin age fen, anī nigin, amā ī malen.

⁸ Ō* ogo tamo enei to wiyēf are, od ī bou bun manof anī ganan momoi bagai ya anī, ō keleī youf.”

⁹ Juda tamo idi, ī bou bun od yūya bun megeir dife fen, are momoi, den.

¹⁰ Gawaman nē mudur, Pol wogō youf nigin mudurem dogol fiyē di, Pol iron, “Aya keleī, yar musei ō teneub enei bun es fiya tamo ubodon, anī nigin, aya wau el fe fen, aya yug nigin megeir afouf.

¹¹ Malai sā, ō yaor bagai keleī youf, are naa tuwelf dogol mogo ilef, aya Negur yana alesauf nigin Jerusalem eselen.

¹² Aya bouwau bun od dun tamo idi keleī, aya aib taka ado tempel bun to fe maun be, Juda neid uub fō bun be taun nameneg, tamo kayau waud to alesen.

¹³ Idi gama aya bouwa bun od duk are momoi yeya anī, ō ifelnōya kisi feleya sā.

¹⁴ Anī ere, aya Naab idi idegēya dedig anī dō afe fen, tubuda tar neid Negur yana alesedig, are momoi auf. Aya Moses nē Lo ado, profet neid buk bun ditoton anī ganan nigin, momoi auf.

* **24:8:** Itotoya tunī eig de ditoton: malen. Age mafe fen, amā nemā lo kilei es mafiyēf nigin age mafen.

⁷ Anī ere, kusī tamo neid odug Lisias isi, ī imaman tamal total ado son faman. ⁸ Ageffen, ī, tamo ī bou bun od dun anidi, ō gein disiyouf nigin irokenēdin. Ō

¹⁵ Ayag tamo eneidi gen Negur bun wau iseya ado, are madur tamo ado tamo sesen laa bun tamal mata ke de fã douf anĩ.

¹⁶ Anĩ nigin, Negur mala bun ado tamo meleid bun, aya wau karētut abodōf nigin sain ganan kabĩ totol aledig.

¹⁷ “Aya yar tunĩ firen abodkele fen, aya neu tamo kayau maleg nigin safina wau sã ado, Negur bun sesewi fiya nẽ safina, Jerusalem arou asin.

¹⁸ Aya nonorou lilik afel fen, enei age afe mog, idi aya tempel modoũ bun fotou difiyan. Aya an tamo guru fiya mala taka geid san, katã san.

¹⁹ Anĩ ere, Juda tamo tunĩ Asia provins temeleid an difaren anidi, dogo bagai õ gein disi fen, bouwau bun od yũya idi adouf are, wogõ dem bagai.

²⁰ Sãf are, tamo eneidim, aya uyu irouya neid guru fiya meleid bun afaren sain, idi aya bun ereb mosor fotou difen anĩ wogõ douf.

²¹ Tekelei dogol, aya idi meleid bun afar fen, aweig aron, are eig fiya, ‘Laa bun tamal mata kel fãya anĩ nigin, aya gama ã melein kot bun afaref.’ ”

²² Age ye di, Feliks ĩ yogo, Naab anĩ nigin keleĩ bagai, ĩ kot gudũ fel fen, iron, “Kusĩ tamo neid odug Lisias isiyouf sain, aya ogon kot nigin od afōf.”

²³ ĩ, Pol lo difouf, anĩ ere, ĩ karika difen ken, yogon mou tar ĩ ereb lau fef anĩ kulatun difouf nigin yo fiyēdiyof nigin, kusĩ tamo neid orowa irokenen.

²⁴ Naa tunĩ ilele di, Feliks ĩ aiwa Drusila Juda kayau ado disin. ĩ Pol nigin od sur fe, isi fen, ĩ Kristus Jesus bun momoiya nigin wogõ ye di, karĩ yen.

²⁵ Pol ĩ Negur nẽ madur fiya nigin, tamo yogon oroya kulatun fiya nigin ado, es fiya fau isiyouf anĩ nigin dir fe di, Feliks ĩ kumĩ ye fen, iron, “Are de bure welef! Wadã ule. Sain biya adouf are, õ nigin od sur afouf.”

²⁶ De sain anĩ bun, Feliks ĩ, Polem moni ifenēf nigin oron, anĩ nigin, sain musei Feliks Pol nigin od sur fe fen, urom wogõ dedig.

²⁷ Yar uru ilele di, Porsius Festus, Feliks nẽ modoũ yalen. Anĩ ere, Feliks Juda tamo meleid yalouf nigin, Pol kalabus bun itornẽ ibodon.

25

Pol Festus Mala Bun Kot Fen

¹ Festus provins anĩ bun wõ ye, naa towo ilele di, ĩ Sisariam Jerusalem iselen,

² an pris odudug ado Juda neid uyu iroudiya geid, ĩ mala bun wõ de fen, Pol bou yũya od anĩ dirokenen.

³ Festus ĩ wau ifeneĩd fen, Pol Jerusalem sur fe di, ilauf nigin totol bagai dirokenen, ere nigin, idi naab luwen dimin ken, Pol dukesiyouf nigin dodok difen.

⁴ Age de di, Festus ĩ irokenēdin, “Pol oun Sisaria kalabus bun ibodok. Aya yug mogo an alau fenē.

⁵ Anĩ nigin, tamo anĩ ereb kũ fenen ouf are, āgenei uyu irouya tunĩ aya weim Sisaria mele fen, an ĩ bou yũya od wogõ douf.”

⁶ Festus ĩ idi geid, naa eit be ten dibodkele fen, Sisaria isilen. Naa anĩ ile di, ĩ es fiya modoũ bun ibod ken, Pol ĩ wagen dirousiyouf nigin irokenēdin.

⁷ Pol wõ ye di, Juda idi Jerusalem temeleid disin ĩ salili difiye ken, ĩ mosor sane bagai inon de fen, ĩ bou yũya od musei diron, anĩ ere, idi anĩ nẽ gariya to yaor difedin.

⁸ Age dife di, Pol yogo nigin isennēya od iron, “Aya Juda neid lo nigin, tempel nigin, Sisa nigin be, ereb kũ fenēya taka to age afen.”

⁹ Anĩ ere, Festus ĩ, Juda tamo ĩ nigin waud yenēf nigin wau iro ken, Pol irokenen, “Õ Jerusalem usel fen, boũ yũya od eneidi nigin an aya malaun kot bun ufarauf de?”

¹⁰ Pol iron, “Aya gama Sisa nẽ kot bun yeir afaref, ein aya kot difiyau. Õ ogo keleĩ bagai, aya Juda tamo bun kũ fenēya taka to anon.”

11 Anĩ ere, aya laa nẽ mosor taka anon ouf are, aya laa nigin to atorok. Anĩ ere, Juda tamo eneidi bouwau bun od dun anĩ momoi sãf are, aya taka nem idi imeid bun inenaya kisi feleya sã. Aya Sisa bun kot afouf.”

12 Festus ĩ, yogon lo keleĩ tamo geid, katõ difel fen, iron, “Õ Sisa bun kot afouf wol. Õ Sisa gein ulauf.”

Festus Pol Nigin King Agripa To Fiyen

13 Naa tunĩ ilele di, King Agripa Bernis ado, Festus aan difiyẽf nigin Sisaria taun disin.

14 Idi naa musei an dibodõ di, Festus Pol nigin king ado katõ de fen, ĩ iron, “Feliks ĩ, kalabus tamo taka ein itornen ibodok.

15 Aya Jerusalem ele di, pris odudug Juda neid uyu irouya geid, ĩ bun bou yũya od dirou disi fen, ĩ mosor ado afiyẽf nigin dirokanan.

16 “Anĩ ere, aya arokenẽdin, Rom neid tobonunã bun, tamo taka bou bun od duk ĩ, yogon kiwai tar meleid bun ifar fen, bou bun od dun anĩ nigin, yogo bou isennẽya od wogõya sã mog, are kaisã tamo anidi imeid bun to dinenẽf.

17 Idi aya weim ein masi fen, aya to foi aun, we fele di, aya es fiya modoũ bun abod ken, tamo are dale dirou disiyouf nigin arokenẽdin.

18 Yogon kiwai tar fã de wogõ den, anĩ ere, aya mosor kisi afen anĩ nigin taka to bou bun dun.

19 Anĩ ere, idi dogo neid momoiya nigin ado, laa tamo yana Jesus, Pol ĩ nigin mata ibodok yedig anĩ nigin, ĩ geid fefe den.

20 Aya enei nigin naig afe tutuk keleĩ youf au fen, nene aun, anĩ nigin, aya ĩ Jerusalem ile fen, bou bun od dun enei nigin an kot bun ifarauf nigin to afiyen.

21 Anĩ ere, Pol ĩ kusĩ tamom lo difiyẽ dile, fau dum Sisam es fiyẽf nigin irokanan. Anĩ nigin, aya ĩ lo difiyek dile, ĩ Sisa gein sur fiya nigin naab amir ken, sur afiyẽf sain bun anĩ nigin arokenẽdin.”

22 Age ye di, Agripa Festus irokenen, “Aya yug tamo enei karĩ afiyẽ fenẽ.” Festus iron, “Õ nil karĩ wiyẽf.”

Pol Agripa Mala Bun Ifaren

23 Naa anĩ ile di, Agripa Bernis ado, biya biyamã de disi, guru fiya fõ aaben, kusĩ tamo neid odudug, taun nẽ uyu iroudiya geid dilen. Festus irõ di, Pol aaben dirou disin.

24 Festus iron, “King Agripa ado tamo ganan weim tafaref ã, tamo enei ulegef. Juda tamo kayau ganan Jerusalem ado ein Sisaria, ĩ nigin total bagai dirokanan. Idi ĩ mata to ibodõf nigin diweig diron.

25 Aya, ĩ laa fouf nẽ ereb taka to age fen anĩ ailen. Anĩ ere, ĩ Sisa bun kot fouf nigin iron, anĩ nigin, aya ĩ Rom sur fiya nigin kisi afon.

26 Anĩ ere, aya ĩ nigin ereb od Sisa bun atotkenẽf anĩ yaor sã. Anĩ nigin, aya ã ganan meleĩ bun ĩ arou asil, King Agripa õ bun bagai, anĩ bunem aya ĩ to afiyẽ keleĩ ken, ĩ nigin ereb od itotoya nigin adouf be.

27 Ere nigin, aya kisi afef, kalabus tamo ĩ ereb mosor inon anĩ to yaor mog, sur afouf, are to biya.”

26

1 Age ye di, Agripa Pol irokenen, “Aya õ ogo nigin wogõ wouf nigin arokonok.” Anĩ nigin, Pol imam fe fen, yogo isennẽf nigin wogõ yen,

2 “King Agripa, bolẽ bagai, aya gama õ malã bun afar fen, Juda tamo aya bouwau bun od dun anĩ ganan nigin, aya yug isennauf nẽ od wogõ auf.

3 Bolẽ bagai auf, ere nigin, õ Juda neid tobonunã ado luwa irouya anĩ ganan keleĩ. Anĩ nigin, õ folo reis fen, karĩ wiyauf nigin agonok.

4 “Aya kesu naalun naig be afe abodon are, Juda tamo ganan keleĩ. Uruwa bun, aya neu teneub bun abodon, age afe fen, Jerusalemeg abodon are idi keleĩ.

5 Idi aya nigin sain meluk kelein, anĩ idi orodiyouf are, idi sã wogõ douf, are ada neda momoiya mala

bun, Farisia tamo idi lo total bagai dō difedig anidi neid taka abodon.

⁶ Negur ada tubuda tar bun age afouf bagai fiyēdin anī bun, aya wau iseya ado, anī nigin, aya gama kot bun afaref.

⁷ Negur age afouf bagai fiyēdin anī nigin, ada neda ibor tuwelf, gaa ado bō ado total bagai Negur aruna dales fen, anī kisi fele di, dilouf nigin waud iseya adon. O king, wau iseya enei nigin, Juda idi aya bouwau bun od duk.

⁸ Ere nigin ā, Negur laa tamo kel turī fiyek anī kisi feleya sã gef?

⁹ “Aya yugeg, Jesus Nasaret tamal yana kiwai afenēf nigin ereb ereb ganan age afouf aun.

¹⁰ Are aya Jerusalem an age afen. Pris odudug bun yoya ale fen, Negur nē tamo kayau musei kalabus bun anenēdin. Idi laa bun dinenēdin sain, ayag idi laa bun dinenēdiyof nigin yo aun.

¹¹ Sain musei, aya idi darau afenēdiyof nigin, Juda neid uub fō fō bun elen, age afe fen, idi Negur kono difiyēf nigin nugo afiyēdin. Aya idi nigin nameu sane bagai yen ken, aya idi kafī fiya afenēdiyof nigin yaū tauneg elen.

¹² “De anī nigin sain taka bun, aya pris odudug neid od ado, yoya bun Damaskus taun elen.

¹³ O king, gaa atun age fiya naab luwe ele mog, aya saa ilun tamal fula fiya taka, gaa nē medeīya wal fiya, aya neu kabī turau tar geid bun, fula felen anī ailen.

¹⁴ Amā ganan tenebur kuku mau fen, ait taka Hibru od nem eig ye irokana mog, karī aun, ‘Sol, Sol, ere nigin ō aya daig wiyaf? Ō aa waila ado bun yē urak are, ō nigin malai bagai.’

¹⁵ “Age ye di, aya to afen, ‘Odug, ō aim?’

“Odug iron, ‘Aya Jesus, ō daig wiyaf anim.

¹⁶ Gama ō fã wale yem ufar. Aya ō bun wō aul, ere nigin, ō neu kabī tamo wō wo fen, ō aya nigin ereb

ulen ado ereb afelnōf anī wogō wouf nigin agirnon.

¹⁷ Aya Israel tamo kayau bun ado haiden buneg asennōf. Aya idi bun ō sur ayok,

¹⁸ idi meleid fokō yel fen, gugum bun tamal lalan bun disiyouf ado, Satan nē megeir bun tamal Negur bun disiyouf, anī bunem idi neid mosor nigin weder tu keleya dale fen, aya nigin momoi de fen, fateuledin anidi atun dogo neid modoū gei difouf.’

¹⁹ “King Agripa, anī nigin, aya saa ilun tamal malau seleulã kurãf fen, ailen anī to adodon.

²⁰ Uruwa, oun Damaskus taun difaref anidi bun, Jerusalem ado Judia distrik ganan bun difaref anidi bun ado, haiden buneg, idi waud falei ye, Negur bun falei dife fen, ereb age difef bunem, idi waud falei yen anī yaor difouf nigin wogō aun.

²¹ Anī nigin, Juda idi tempel modoū bun daley a fen, dinakesiyof fenē nigin age difen.

²² Anī ere, Negur aya isennaf isi, gama naa enei bun, anī nigin, aya ein afar fen, nanaal ado odudug bun wogō auf. Aya Moses profet geid agef wō youf den anī to adod ken, wogō auf,

²³ are Kristus darau yale fen, ī ket laa bun tamal mata kel fã ye fen, Israel tamo kayau ado haiden geid bun, fula fiya anī nigin kurō fesiyof anī.”

²⁴ Pol yogo bouwa isennēf nigin od enei wogō ye di, Festus iweig iron, “Pol, ō wadã inok. Ogon keleī odug anim wadã bun irouleyok.”

²⁵ Pol iron, “Odug Festus, aya wadã sã. Ereb aya orok enei are momoi, gariya ado.

²⁶ King ī enei nigin keleī, anī nigin, aya kumī sã wogō ayok. Aya momoi auf, are enei taka ī mala bun to iminen, ere nigin, enei iminēyan to wō yen.

²⁷ King Agripa, ō profet ganan nigin momoi wof de? Aya keleī, ō momoi wof.”

²⁸ Age ye di, Agripa Pol irokenen, “Ō kisi wof, are sain tobega eig fiya bun aya Kristen wō auf nigin neu kisi falei wouf de?”

²⁹ Pol iron, “Sain tobega be, sain meluk, aya Negur kosē afiyēdig are ō nigin dogol sã, ganan gama aya karī wiyagef āg, aya gen wowã gouf nigin, anī ere, sen enei dogol anī to difōyeif.”

³⁰ Age ye di, king, gawaman nē mudur, Bernis ado, idi weim dibodon ganan fafã den.

³¹ Age de fen, idi aab ditor dile, abob diroken ken, diron, “Tamo enei ereb taka laa fouf nē be, kalabus ileya nē to age fef.”

³² Agripa Festus irokenen, “Tamo enei Sisa bun to kot fem are, ī yal-isnēya kisi feleyam.”

27

Pol Waag Bun Rom Ilen

¹ Amã* waag bun Itali kantri malauf nigin od difō di, Pol kalabus tamo tunī geid, kusī tamo neid orowa taka yana Julius ima bun dinenēdin, ī Sisa nē Kusī Mala bun tamal taka.

² Amã waag taka, Adramitium taun tamal Asia provins bun maaī ub ub ilau fenē agef mog, sō mau fen, melen. Aristakus, Tesalonika taun tamo oun Masedonia provins bun tamal, ī amã weim.

³ Naa ile di, Saidon taun wō maun. Julius ī Pol wau ifen ken, ī mou tar gedin ile fen, ereb ī lau fef anī difenēf nigin yo fiyen.

⁴ Anenem amã baban waag bun sō mau fen, Saipras nuyo wagenem melen, ere nigin, yau naaburamã gudū fen.

⁵ Amã Silisia ado Pamfilia maaī atu mele fen, Lisia provins bun Maira taun wō maun.

⁶ An kusī tamo neid orowa, Aleksandria taun tamal waag taka Itali kantri ilau fenē mog, ile fen, ī amã waag bun inenaman.

⁷ Amã naa musei, foinenem waag bun, Nidus taun non wōya nigin darau nem melen. Yau naaburamã gudū fe di, amã Krit nuyo uyu Salmone wal mafe fen, Krit nuyo wagenem melen.

⁸ Amã darau kininem maaī ub dō maf masil, modoū yana Basis Biya dedig, Lasea taun non an wō maun.

⁹ Naa musei ilelen, agef fen, waag bun ileya are mogo sane bagai len, ere nigin, naa are Kuriya Naa† dumen. Anī nigin, Pol wedereid iron,

¹⁰ “Tamo, aya ailef are, neda waag bun delē sanel fen, waag adoi, udū adoi, tamo adag daūf sa kalauf.”

¹¹ Anī ere, kusī tamo neid orowa, Pol wogō yen anī to karī ye fen, waag irouya tamo ado waag marau idi neid od dō fen.

¹² Basis are yau sain bun ifareya to biya nigin, musei ganan, waag bun tokō mafel, Finiks wō mau fen, an mabodōf nigin kisi difon. Finiks are Krit nuyo nē basis taka, gaa ileyan saut ado not melem wage ifenek.

Yau Uyē Ado

¹³ Yau saut melem foinenem fū fe di, idi neid oroya kilei agef wō yen anī kisi difen. Anī nigin, idi anka dī difesel fen, waag bun Krit nuyo maaī ub dō de dilen.

¹⁴ Sain meluk ileya sã mog, yau odug total ado, yana ‘Gaa iseyan not tamal’ dedig anī, fã ye fen, nuyo bunem fūf irou isilen.

¹⁵ Yau odug total ado waag yū di, waag yau bun ileya kisi feleya san. Anī nigin, amã waag ulum irouya matorō di, yaum irouleman.

¹⁶ Amã nuyo naal taka Kauda dedig dumenem wal mafe fen, isennēya nē waag naal darau nem dī mafen.

¹⁷ Tamo, isennēya nē waag naal, waag odug teten dalesel dino fen, gama idi malū nem waag odug anī to fara fouf nigin luwa filu difen. Idi waag, maaī kulum yana Sirtis bun

* **27:1:** Luk ī Pol geid, sain anī bun waag bun weim dilen. † **27:9:** Kuriya Naa anī, Israel tamo kayau mosor yaleleya nē naa.

sōya nigin kumī de fen, anka folō difesi di, yaum waag iroulen.

¹⁸ Yau fatuk bagai waag yuk ile, we fele di, idi udū tunī naanū diraran.

¹⁹ Naa anī ile di, idi imedim waag nē safina naanū diraran.

²⁰ Naa musei, gaa ado barisa to mailen, agef fen, yau odug total ado de agef yenen. Anī bunem, amā isennēya malouf nigin waumā iseya ganan sa kelen.

²¹ Tamo idi sain meluk saaf sã denek dilen nigin, Pol meledin ifar fen, iron, “Tamo ã, neu od Kriem waag bun to talauf nigin arokenein anī karī gem, are dem, ago gem are, daū fiya ado iraraileya enei to fotou gem.

²² Anī ere, aya total unogouf nigin total bagai arokeneik, ere nigin, āgenei taka to fō yalauf, waag dogol narī fouf.

²³ Nor bō, Negur, aya yogon, aya ī aruna aledig, yogon engel sirun ifar fen,

²⁴ iron, ‘Pol, to kumī wo. Õ de Sisa malan kot bun ufarau. Negur ò wau ifon ken, ganan ò geid waag bun ulegef idi neid mata ò ifonon.’

²⁵ Anī nigin, tamo, total unogouf, ere nigin, aya Negur bun momoiya anof, are ī irokanan kilei fau agef wō youf.

²⁶ Anī ere, ada nuyo taka bun sō tauf.”

Waag Narī Felen

²⁷ Naa fotin nē bō anī bun, amā fau Mediterenian Maaī bun yaum iroulemā mog, bō atun age fiya waag tamo idi teneub melsã melef ya anī kerē fedin.

²⁸ Idi naan nē mala es difouf nigin malū folō difele di, isil fen, naan nē mala foti mita dilen. Sain naal bagai dile fen, idi baban malū folō difele di, isil fen, naan nē mala teti mita dilen.

²⁹ Idi waag mein tuwa bun ileya nigin kumī de fen, idi waag dumen anka aiwa adodo folo folō difeledi di, disil fen, gaa nigin kosē den.

³⁰ Waag tamo idi, waag bun tamal diyalalau fenē nigin, idi isennēya

nē waag naal folō difele di, maaīwō isilen, tamomoi de fen, waag uyu bun anka dirarāf nigin de fen, age difen.

³¹ Age dife di, Pol kusī tamo neid orowa, kusī tamo geid irokenēdin, “Tamo eneidi waag bun to dibodōf are, ã isenneīya to walogouf.”

³² Anī nigin, kusī tamo idi, malū isennēya nē waag naal iroun anī gudū difele di, ilen.

³³ We kurā fiya sã mog, idi ganan saaf dāf nigin, Pol ī total bagai irokeneid fen, iron, “Naa fotin bun ã sii yei ken, saaf sã usigen, ã saaf taka to wōgen.

³⁴ Anī nigin, gama aya ã saaf wāgauf nigin total bagai arokeneik. ã mata ubodōgouf nigin wāgauf. ãgenei taka, mudur bun fatiya tekelei bagai taka to kusuf irāf.”

³⁵ Pol od enei wogō yel fen, idi ganan meleid bun, ī bret tunī yale, Negur de fiyekel fen, mūf gariya ino youn.

³⁶ Idi ganan waud yalese di, saaf don.

³⁷ Amā waag bun mafaren ganan gu feleya are 276.

³⁸ Idi dakas kisi fele di, idi waag karikauf nigin, wit ganan maaīwō diraran.

³⁹ Lalan ise di, teneub uyu nain be ya anī idi keleī san, anī ere, alelei ub mumul ado anī dilen, kisi falauf are, idi an waag dirou dilauf nigin kisi difon.

⁴⁰ De sain tekelei bun maaīwō anka kokour de ditorarā yen ken, malū waag uyu gadi fiya nē pul difon anī biru difeledin. Age difel fen, idi yau bun sel dalesel fen, yau difenē di, waag ubun irou ilauf nigin age difen.

⁴¹ Anī ere, maaī irak isi abob bun dūdig nē an, waag maaī kulum yu ken, anī teten sō yesen. Waag uyu degē fel fen, tonoya kisi feleya san, age fe di, waag ibu maaim yū di, faraf fisik fe irailen.

⁴² Kalabus tamo idi maaīwō to gaōgī de diyawauf nigin, kusī tamo idi didenkesiyouf nigin katō difen.

⁴³ Anĩ ere, kusĩ tamo neid orowa Pol isennēf nigin wau iro ken, kusĩ tamo idi dogo neid kisi to dō de age difouf nigin gudū felen. Idi yoyōya kisi feleya anidi, ketem waag bun tamal gurusā de fen, teneub bun dilauf nigin, ĩ ari fedin.

⁴⁴ Tunĩ ganan aa bun be, waag masasak bun an dilen. Anĩ bunem, idi ganan biya bagai totoũ teneub bun wowā den.

28

Malta Nuyo Ubun

¹ Amā biya bagai ubun wō mau fen, nuyo are yana Malta ya anĩ kelein.

² Tamo kayau an temeleid waud fatuk bagai difanaman. Uyē isi fen, feluken nigin, idi yā kū dife fen, amā ganan aan difaman.

³ Pol ĩ aa were gurif fen, yā teten ino mog, gogour sane yā uruwam iru di, Pol ima bun degē felen.

⁴ Tamo kayau an temeleid, gogour anĩ Pol ima bun kuuri ye mog, dile fen, idi abob dirokenen, “Tamo enei tamo yukesiya tamo bagai, ere nigin, ĩ maaĩwō tamal iyawol, anĩ ere, neda waitou Madur Fiya anim ĩ mata ibodōf nigin to oron.”

⁵ Age de di, Pol ĩ gogour wiri fe di, yā malan isilen, anĩ ere, ĩ bun ereb taka to wō yen.

⁶ Tamo kayau ĩ ima dī youf be, kaisā bagai kubū ye laa fouf de fen, kisi difen. Anĩ ere, idi sain meluk lo difef dile, ereb taka ĩ bun to wō yen anĩ dile fen, idi kisi falei del diron, ĩ waitou den.

⁷ Teneub akor melsā are, nuyo anĩ nē mudur, Publius nē teneub ibodon. ĩ aan fama ken, yogon fō bun gei famā iroule, naa towo el fe kulatun faman.

⁸ ĩ tama dagi di, fataren yenen, bouwa uruwa ado te fururū yalen. Pol ĩ ilouf nigin ile kosē yel fen, ima teten ino di, dagi fara felen.

⁹ Enei wō ye di, nuyo bun dagi tamo tunĩ ganan ĩ garan disi di, el feid ledin.

¹⁰ Idi naab fire fire bunem el difama ken, amā waag sō mauf nigin dodok mafe di, idi amā ereb ereb lau mafen anĩ difanaman.

Rom Wowā Den

¹¹ Ogō towo ilele di, amā, waag taka yau sain bun nuyo an si inon anĩ, sō mau fen, melen. Waag are Aleksandria taun tamal, anĩ uyu bun, waitou aina ado Kastor Polluks ado meleidkanon dinon.

¹² Amā Sirakus taun wō mau fen, naa towo an mabodon.

¹³ Anenem amā waag bun mele, Regium taun wō maun. Naa anĩ ile di, yau saut melem fā yen, baban naa anĩ ile di, amā Puteoli taun wō maun.

¹⁴ An amā momoiya tamo tunĩ fotou mafiyēdi di, idi geid naa sewen mabodōf nigin dirokanaman. Age mafel fen, Rom taun masin.

¹⁵ Momoiya tamo an, amā masif ya anĩ karĩ de fen, idi diyok disi, Apius Maket ado Tamo Yenēya Fō Towo bun an fotou difamāf nigin disin. Pol tamo anidi ileid fen, Negur de fiye ken, wau megeir yalen.

¹⁶ Amā Rom wō mau fen, Pol ĩ mugu kusĩ tamo takam tari fiyek dibodōf nigin yo difiyen.

Pol Oun Rom Kusĩ Tamom Tari Fe Mog, Biya Od Wogō Yen

¹⁷ Naa towo ilele di, Pol Juda neid uyu irouya iweig laisi, guru dife di, idi irokenēdin, “Turau tar, aya, neda tamo kayau ado, neda tubuda tar neid tobonunā to adodon, anĩ ere, aya Jerusalem oun daliya fen, Rom imeid bun dinenan.

¹⁸ Idi aya fele difiyale fen, dalisnau fenē age difen, ere nigin, aya laa nē mosor taka to anon.

¹⁹ Anĩ ere, Juda idi anĩ nigin kiwai dinon, aya neu tamo kayau nigin bouwa yūya od taka san, anĩ ere, naab taka san nigin Sisa bun kot afen.

²⁰ Gariya anĩ nigin, aya fotou ayei ken, ā geid wogō tauf nigin to ayein. Israel neid waud iseya anĩ nigin, aya sen enei nem difōyan.”

21 Idi diron, “Amã õ nigin Judia distrik bun tamal pas taka to malen, agef fen, turada tar idi anenem disin õ nigin od taka be, od sane taka to dirokanaman.

22 Anĩ ere, amã ogon kisi anĩ karĩ mauf nigin waumã irok, ere nigin, amã keleĩ, tamo kayau teneub ganan bun, ogon momoiya mala enei nigin kiwai od wogõ dedig.”

23 Idi Pol dilouf nigin naa taka dinon, naa anĩ bun, idi musei bagaim Pol ibodon nẽ an disin. Pol ã bon-imeĩ nem ile bõ, Negur nẽ tano nigin faded fiyeĩd fen, kurõ feis iro-kenẽdin, ã Moses nẽ Lo ado profet neid itotoya bun, Jesus nigin idi neid kisi falei ye fen, momoi douf nigin age fen.

24 Tunĩ Pol wogõ yen anĩ bun waud falei yen, anĩ ere, tunĩ to momoi den.

25 Pol idikeleya od enei wogõ ye di, idi dogo dogol fefe de fen, dilelen, “Awa Uur Fateul profet Asaia sigor bunem eig ye wogõ yen, are ã tubuĩ tar momoi bagai od anĩ wogõ fiyẽdin:

26 “ ‘Tamo kayau enei bun ule fen, urõ,
“ã wedereim karĩ gouf, anĩ ere, wed-ereĩ to fokõ youf,
ã meleim ulogouf, anĩ ere, meleĩ to fokõ youf.”

27 Ere nigin, tamo kayau enei, idi waud katĩ felen,
idi wederedim karĩya kisi feleya sã,
age de fen, idi meleid difofakelen,

age fiya sam are, idi meledim dilem,
wederedim karĩ dem ado,
idi waud fokõ ye fen,

falei de di, aya idi el afedim.’*

28 “Anĩ nigin, Negur nẽ isennẽya haiden bun sur fen anĩ, ã keleĩ youf. Age fe di, idi anĩg karĩ douf!”†

30 Yar uru adok, Pol ã yogon fõ na yaledig bun ibod ken, ã dilouf nigin disin ganan aan fiyẽdin.

31 Kumĩ sã ado kafĩ fiya sã, ã Negur nẽ tano nigin wogõ ye fen, Odug Jesus Kristus nigin ifelnẽdin.

* 28:27: Asaia 6:9, 10 † 28:28: Itotoya tunĩ eig de ditoton: douf! 29 Pol od enei wogõ yele di, Juda idi dogo tutur fatuk bagai fefe de fen, dilelen.

Rom

¹ Aya Pol, Kristus Jesus nē ferfer, aposel wō auf nigin iweigna fen, Negur nē biya od wogō auf nigin igirnan.

² Biya od anī, Negur kulu bagai yogon profet promis od irokenēdi di, Negur nē Itotoya Fateul bun ditoton,

³ are yogon Naal, neda Odug Jesus Kristus nigin, ī tamo nē ibor bun are, Dawid nē ibor bun wō yen,

⁴ agef fen, fateul nē Awa Uur bunem, ī laa bun tamal kel turī fiyen anim, Negurem Jesus ī Yogo Naal megeir barikā ado anī yaor kurō fesin.

⁵ Ī bunem, amā yogon yana seli kulō fiya nigin, haiden ganan atun temeleid, tamo kayau maweignēdi di, idi momoi de fen, dō difouf nigin, amā wau ifenēya ado aposel nē kabī malen.

⁶ Āg, Jesus nē tamo kayau wowā douf nigin iweignēdif anidi atun, ubodōgef.

⁷ Tamo kayau ganan Rom taun ubodōgef, Negur ā nigin wau laaf fen, tamo kayau fateul wō gouf nigin iweignein, ā bun pas enei atotof.

Wau ifenēya ado wau inosiya, neda Tamada Negur ado Odug Jesus Kristus bunem, ā bun isiyouf.

Pol Rom Ileya Nigin Bagai Wau Iron

⁸ Uruwa bagai, aya ā ganan nigin, Jesus Kristus bunem, neu Negur de afiyek, ere nigin, āgenei momoiya nigin teneub ganan bun od iyokelen.

⁹ Negur ī nigin aya wau adok iro ken, ī Naal nē biya od wogōya bun aruna aledig, ī ileya mog, aya ā nigin toku neu kosēya bun faimud karī auledig.

¹⁰ Age afe fen, gama Negur orouf are, naab kā fele di, aya ā gein asiyouf nigin aya kosē auf.

¹¹ Aya ā ileyeīya nigin bagai wau irok, are aya uur nē ege luwa tunī

megeir ifareya nē anī afeneīf nigin age afef,

¹² anī bunem, aya ā geid, mugu mugu āgenei momoiya ado neu momoiya bunem abob tasennēf.

¹³ Turau tar, aya ā enei to keleī youf anī to orouf, aya, sain musei, ā gein isiya nigin kisi afen, anī ere, aya age fiya nigin, naab katī feleif isi, gama enei bun, are aya, Juda sā anidi tunī ganan atun, age afen gen, ā atuneg gei ayeīf nigin age afen.

¹⁴ Negur aya isennan nigin, aya ī bun wareg ado. Anī nigin, Aya, tamo Grik od ado dogo neid tobonuneid keleī anidi ado, tamo Grik od ado dogo neid tobonuneid keleī sā anidi bun, kisi biya adodo, nene yedidiya buneg, wareg enei aūf.

¹⁵ Age fiya nigin, aya Rom taun ubodōgef ā buneg, biya od anī wogōya nigin kisi total alef.

¹⁶ Aya biya od nigin to mama fiyaf, ere nigin, are Negur nē megeir, tamo ganan momoi def, kel gei fouf nigin, Juda idi bun keteme di, Juda sā anidi idi buneg age fouf.

¹⁷ Ere nigin, biya od bun, Negur ī tamo kayau yogon mala bun madur bagai inenēdiya nē naab anī kurō fesif, Negur ī tamo kayau yogon mala bun madur bagai inenēdiya nē naab anī momoiya bunem dogol isif, are Negur nē Itotoya bun ibodok kilei, “Madur tamo momoiya bunem mata ibodōf.”*

Negur Nē Didi Tenebur Tamo Bun Isiyouf

¹⁸ Negur nē didi, saa ilun tamal, tamo idi dogo neid sanem momoi anī lai difedig anidi neid mosor ado sane ganan bun yaoref,

¹⁹ ere nigin, ereb Negur nigin idi keleī youf are, idi bun yaor, ere nigin, Negur ī idi bun anī yaor fen.

²⁰ Negur teneub saa ado kare fen sain bunem isi gamag, Negur nē tobonunā ileya kisi feleya sā anī, are in ibodkeleya megeir ado ī Negur ya anī, idi yaor diledig. Ereb Negur

* 1:17: Habakuk 2:4

inodin anī bunem idi keleī, anī nigin, tamo idi galā taka sã.

²¹ Idi Negur kelein, anī ere, idi ī Negur gen to yana dales fen, de difiyēdig, anī ere, idi neid kisi nene yel fen, idi neid waud neneya anī bunem dogo neid waud gugum kerū felen.

²² Idi amā kisi biya ado dedig, anī ere, idi neneya wowā de fen,

²³ idi to bura leya Negur nē fula fiya medeīya anī falei difel, bura leya nē tamo, ninā, gaar ado, gaar luwedim diyōdig imedim meleidkanon dinon anī bun dinon.

²⁴ Anī nigin, Negur idi itornēdi di, idi neid waud irōya sane dō de, noli mosor dino amuyē bun dile fen, idi neid bouwedim abob mama difenēdig.

²⁵ Idi Negur nē momoi anī falei difel, idegēya bun dinon, age de fen, idi Negur ereb ereb kare fen anī ban, ereb ereb Negurem kare fen idi yeneid anī dales fen, aruneid daledig. Negur ī faimud yana yaleseyauf. Momoi.

²⁶ Enei nigin, Negur idi mama nē oroya bun itornēdi di, dilen. Idi neid kayaug, Negur bagu fedin geid bouweid bagu fiya ditor ken, falei del, kayau tutur Negur bagu fediya sã anidi geid bouweid bagu difedig.

²⁷ Age fiya bagai, tamog Negur kayau ado bagu fedin anī ditor ken, idi abob bun noli nigin yā gā de genen. Tamo, tamo tunī geid mama tobonunā age dife fen, idi neid idodōya mala darau dogo ke de dalen.

²⁸ Idi Negur nigin keleī yaleya ditoron, anī nigin, Negur idi itornēdi di, idi neid kisi sanel fen, idi ereb ereb to age fiya nē anī age difedig.

²⁹ Idi tobonunā madur fiya sã fire fire ganan, sane, safina nigin neu dogol yeya ado, to ile oroya anim isokosen. Idi kiyeī, tamo yukesiya, kusī, idegēya ado, sanem barikā. Idi dumen od wogō dedig,

³⁰ idi bou yūya od wogō dedig, Negur dudum difiyēdig, idi kono difedig, idi akoreid dūdig, idi dogo yeneid dalesedig. Idi sane age fiya nigin naab dimirēdig. Idi sineid temeid tar sigoreid to dō difedig.

³¹ Idi kisi biya sã, momoiya sã, waud laa fiya sã, waud yūya sã.

³² Idi Negur nē lo keleī, are idi anī age difef laa gurug difouf, anī ere, idi anī dogol to age difef diledig, anī ere, idi tunī anī age difedig anidig waud difenēdidig.

2

Negur Nē Es Fiya Madur Bagai

¹ Anī nigin, ō galā taka sã, ō aib taka es wiyēdig, ereb taka bun es wiyek, ō ogo boū uk, ere nigin, ō taka es wiyek, ō ogog de ago wodig.

² Ada keleī, Negur nē es fiya idi age difef anidi bun isif, are momoi nē bun Negur es fedig.

³ Anī nigin, tamo ō aib, tunī age difef anidi es wiyeīd fen, ōg anī ago wodig, ō Negur nē es fiya anī wal afouf wof de?

⁴ Ō, Negur nē biya fiya ō waū faleiya bun irouyō isif anī to keleī ken, yogon biya fiya, molol ado, feseya sã, idi kisi feleya bagai anī, ō kono wof de?

⁵ Anī ere, ogon waū total ado ogon waū faleiya sã bunem, ō ogo nigin Negur nē didi wō youf naa bun walouf nigin didi kuru wof, sain anī bun Negur nē es fiya madur bagai anī yaorouf.

⁶ Negur ī “mugu mugu ereb age difen kilei ifenēdiyof.”*

⁷ Idi feseya sã ereb biya age difen bunem, fula fiya medeīya, yana ado, to bura leya dimirēdig anidi, mata ibodkeleya ifenēdiyof.

⁸ Anī ere, idi dogo nigin dogol kisi de fen dimirē di, idi momoi anī ditor ken, sane dō difedig anidi bun, didi ado seyeya wō youf.

⁹ Morō ado darau, tamo sane age difedig ganan bun wō youf, Juda idi

* 2:6: Sam 62:12; Proverb 24:12

bun keteme di, haiden idi buneg age fouf.

¹⁰ Anĩ ere, fula fiya medeĩya, yana ado, wau inosiya, idi biya age difedig ganan bun wõ youf, Juda idi bun keteme di, haiden idi buneg age fouf.

¹¹ Ere nigin, Negur ĩ Juda ado haiden, es fiya tekelei bunem es fediyouf.

¹² Idi Moses nẽ lo sa ken, mosor dinof gananeg, Moses nẽ lo sã daũ falauf, idi Moses nẽ lo farumen dibod ken, mosor dinof ganan, Moses nẽ lo nem es fediyouf.

¹³ Negur mala bun, idi lo karĩ dedig anidi madur bagai sã, anĩ ere, idi lo dõ difedig anidi, Negur mala bun madur bagai youf.

¹⁴ Haiden idi lo sã dogo neid kisim ereb ereb lo irok kilei age difedig, idi lo sã, anĩ ere, idi dogo, dogo nigin lo.

¹⁵ Idi ereb ereb lo irok anĩ dogo neid waud bun itoton anĩ yaor difef, anĩ nigin, dogo neid kisi es fiya waud bun ibodok animeg, are momoi anĩ, yaor fe di, dogo neid kisim dogo bouweid yu ken, isenneĩd mog fef.

¹⁶ Neu biya od, Jesus nigin tamo kayau arokenẽdif anĩ irok kilei, Negur Jesus Kristus bunem, tamo nẽ wau bun iminek anĩ es fouf naa bun, enei agef bagai wõ youf.

Juda Tamo Kayau Ado Lo

¹⁷ Õ ogo nigin aya Juda tamo wof; õ lo bun ufar fen, aya Negur ado nigal mauf wo fen, yanã walesef;

¹⁸ õ lom faded yõ di, õ Negur nẽ oroya kelei ken, ereb madur bagai anĩ õ biya wof;

¹⁹ õ ogo nigin momoi wof, are õ mala ifofakeleya neid ulum irouya tamo, õ idi gugum bun difaref anidi neid lalan,

²⁰ õ neneya tamo neid tai fiya tamo, õ momou neid tise, ere nigin, õ lo bun keleĩ ado momoi anĩ barikã,

²¹ age fiyauf are, õ tunĩ ufelnẽdidig, õ ogo to ufelnẽdig de? Õ to bẽ walegei wodig, õ ogo bẽ waledig de?

²² Õ to seseirã unoi wodig, õ seseirã unodig de? Õ idegẽya waitou anĩ to bagai oroyõdig, õ dogo neid tempel bun bẽ waledig de?

²³ Õ aya lo ado wo fen, yanã walesedig, õ lo ifodulũya bunem Negur mama wenẽdig de?

²⁴ Are Negur nẽ Itotoya bun ibodok kilei, “Ã bunem, haiden atun Negur yana kono difiyek.”†

²⁵ Õ lo dõ wof are, mulũ are isen-nok, anĩ ere, õ lo ufodulõf are, õ mulũ ileya sã gen wõ wof.

²⁶ Anĩ nigin, idi mulũ ileya sã anidim lo irok kilei dõ difouf are, idi mulũ ileyan gen to ilediyauf de?

²⁷ Taka ĩ mulũ to ile fen, lo dõf el fouf are, ĩ, õ lo itotoya ado fen, mulũ ulen, anĩ ere, õ lo ifodulũya tamo ye fen, to es yõf de?

²⁸ Tamo ĩ bouwam dogol Juda tamouf, ĩ Juda tamo bagai sã. Bouwam dogol mulũ ilef, areg mulũ bagai sã.

²⁹ Anĩ ere, tamo ĩ name bun Juda tamouf, ĩ Juda tamo bagai. Mulũ bagai are, Awa Uurem, waud bun age fedig, lo itotoya bunem sã. Tamo age fiya, tamo bunem yana yaleseya to yaledig, anĩ ere, Negur bunem yaledig.

3

Negur Age Afouf Yen Are ĩ De Age Fouf

¹ Age fiyauf are, tamo ĩ aya Juda tamo yef bun, ere biya yalouf? Mulũ bun ere biya adouf?

² Naab ganan bun musei! Uruwa bagai, Negur nẽ od idi kulatun difouf nigin imeid bun inon.

³ Juda tunĩ momoiya sãf are, naig fouf? Idi neid momoiya sã anim, Negur age fouf yen anĩ to age fouf de?

⁴ To bagai agef ilauf! Negur ĩ momoi bagai, age fe di, tamo ganan idegẽya temeleid tauf. Are Negur nẽ Itotoya bun ibodok kilei,

† 2:24: Asaia 52:5; Esekiel 36:22 * 3:4: Sam 51:4

“Are sain ò wogō wouf bun, ò madur bagai anī yaorouf, sain ò es diyōf bun, ò wal wediyouf nigin.”*

⁵ Anī ere, ada neda madur bagai sã anim, Negur nē madur bagai fatuk bagai yaor fouf are, ada ere tauf? Negur ī ada bun yogon didi ifanadauf nigin, ī madur sã tauf de? Aya tamo nē luwa irouya anī wogō auf.

⁶ To bagai agef ilauf! Age fiyauf are, Negur tamo kayau naig fe es fediyouf?

⁷ Taka nem monē ye fen, irōf, “Neu idegēya anim Negur nē momoi bagai anī yaau du fe di, anī bunem, yogon fula fiya medeīya odugouf are, ere nigin aya fau mosor tamal ya ani, bouwau bun inouf?”

⁸ Ere nigin to eig youf, “Biya anī wō youf nigin, ada sane age tafouf” youf? Tunī amam od enei wogō maudig de fen, amã bouwamã yūya od dirōdig. Negur idi es feid fen, mala solo ifenēdiyof.

Aibem Taka Madur Bagai Sã

⁹ Amã ere mauf? Juda amã haiden wal fediya de? Gai sã bagai! Amã mogo, Juda ado haiden geid ganan mosor farumen kilei kilei dibodok ya anī, moron.

¹⁰ Are Negur nē Itotoya bun ibodok kilei,

“Madur bagai taka to ibodok, tekelei bargaig sã;

¹¹ taka nem kisi fokōya sã, taka nem Negur imirēya sã.

¹² Ganan Negur nē naab fasis dife fen,

ganan sesen len; aibem taka to biya age fedig, tekelei bargaig sã.”†

¹³ “Idi neid uleidbanī, laa nē meku awa dede fiya sã gen; idi neid baleid idegēya wogō dedig.”‡

“Gogour sane nē mū sigoredin ibodok.”§

¹⁴ “Idi neid eweid, isisīya ado dirikeī bagai.”*

¹⁵ “Idi neid yeid, tamo didenkesiyof nigin tuninirya sã kaisã bagai dirādig;

¹⁶ idi neid iyōya bun, daū fiya ado morō dinodig,

¹⁷ age de fen, wau inosiya nē naab idi keleī sã.”†

¹⁸ “Idi neid meleid bun, idi Negur nigin kumī sã.”‡

¹⁹ Gama ada keleī, ereb lo irok are, idi lo farumen dibodok anidi irokenēdif, anī bunem, eweid ganan omutukul del fen, tenebur tamo kayau ganan Negur nē es fiya farumen dibodōf.

²⁰ Anī nigin, Negur ī, lo dō fiya bunem, ī mala bun taka ī madur bagai to youf. Age fiya nigin, lom ada mosor tanon anī yaor fadadig.

Madur Bagai Are Momoiya Bunem

²¹ Anī ere, gama Negur ī tamo kayau yogon mala bun madur bagai inenēdiya nē naab, are lo bunem sã anī yaor fen, are Lo ado profet neid wogōya bun kurō difesin.

²² Negur ī tamo kayau yogon mala bun madur bagai inenēdiya nē naab enei, Jesus Kristus nigin momoiya bunem, idi momoi def ganan bun isif. Juda ado haiden bun de tekelei,

²³ ere nigin, ganan mosor dinon, anī nigin, taka nem Negur fula fiya medeīya bun ibodok ī wagen ileya kisi feleya sã.

²⁴ Age dife di, Negur nē wau ifenēya anim, kel gei fiya Kristus Jesus na yaledin bunem isin anī bunem, idi ege bagai madur bagai inodif.

²⁵ Negur ī, Jesus nē naud bun momoiya bunem, Negur nē didi yof fen, tamo kayau neid mosor yalelkenēdiya kabī yalouf nigin, Negurem Jesus sesewi fouf nigin inenen. Ī yogo madur bagai ya anī yaor fiya nigin, enei age fen, ere nigin, in

† 3:12: Sam 14:1-3; 53:1-3; Eklisiastis 7:20 ‡ 3:13: Sam 5:9 § 3:13: Sam 140:3 * 3:14: Sam 10:7 † 3:17: Asaia 59:7, 8 ‡ 3:18: Sam 36:1

molol bunem, uruwa mosor dinon anī mala solo ifenēdiya sā itornēdin.

²⁶ Sain enei bun, ī yogo madur bagai ya anī, yaor fiya nigin age fen, are ī yogo madur bagai ye fen, taka ī Jesus bun momoiya ado ī madur bagai youf nigin age fen.

²⁷ Age fiyauf are, yana yaleseya anī nain? Yana yaleseya are sā. Ere gariya bunem? Lo dō fiya bunem de? Sā, momoiya bunem.

²⁸ Ere nigin, ada kelei, Negur ī tamo nē momoiya bunem madur bagai youf, lo dō fiya bunem sā.

²⁹ Negur ī Juda neid dogol de? Ī haiden neid sā de? Eo, ī haiden nedig Negur.

³⁰ Negur ī tekelei, ī mulū dilen anidi, momoiya bunem madur bagai youf, agef fen, mulū ileyā sāg, momoiya de tekelei anim madur bagai youf.

³¹ Age fiyauf are, ada momoiya eneim lo anī tadodōf de? Sā bagai. Age fiya ban, ada lo tarou kafī tafalauf.

4

Negur Abraham, Ne Momoiya Bunem Madur Bagai Yen

¹ Age fiyauf are, ada Juda tubuda Abraham, ere anī ī gurug fen nigin, ere tauf?

² Abraham yogon kabī bunem, madur bagai inenem are, Abraham ī yogo yana yaleseya nigin ereb taka adom, anī ere, Negur mala bun sā.

³ Negur nē Itotoya ere ye irok? “Abraham Negur nigin momoi ye di, Negur ī Abraham madur bagai yen.”*

⁴ Tamo taka ī kabī yalef, yogon mala solo are ege luwa ifenēya gen sā, are kabī mala.

⁵ Anī ere, tamo ī madur bagai wō youf nigin kabī to yale fen, Negur, ī dō fiya sā anidi madur fedidig, ī nigin momoi yef, Negur yogon momoiya are madur bagai yef.

⁶ Dawid īg, tamo kabī bunem sā, Negur madur bagai yen, tamo anī nē el fiya nigin wogō yen:

⁷ “Idi neid kū fenēya nigin weder tu keledig,
idi neid mosor yaleledig,
are el fedif.

⁸ Tamo ī yogon mosor nigin Odug to bagai iwesnēf,
ī el fiyek.”†

⁹ El fiya enei mulū ileyā neid dogol de? Sā, are mulū ileyā san neideg. Age fiya nigin, amā morōdig, Negur Abraham nē momoiya bunem ī madur bagai yen.

¹⁰ Ere sain bun Negur ī age yen? Ī mulū ilel mog de, mulū ileyā sā mog? Ī mulū ilel mog sā, ī mulū ileyā sā mog.

¹¹ Ī mulū ileyā nē uris, are ī fau mulū ileyā sā mog, momoiya bunem Negur madur bagai yen anī nē uris yalen. Anī nigin, ī mulū ileyā san momoi def ganān neid temeid, anī bunem, Negur idi madur bagai youf.

¹² Ī mulū ileyā nedig temeid, idi mulū dilen dogol sā, anī ere, idi tubuda Abraham ī mulū ileyā sā mog, momoiya ado iyon anī yebura dō de diyōdig anidi nedig.

¹³ Negur, Abraham ado in tubu tar irokenēdin, are Negurem ereb ereb ganān idi afenēdi di, akorediyouf yen anī, lo bunem sā, anī ere, madur bagai momoiya bunem isif anī bunem.

¹⁴ Idi lo dō difedig anidim, Negurem ereb ereb ganān idi afenēdi di, akorediyouf yen anī akorediyouf are, momoiya are ege ile di, ereb Negur iron are ege kilēf,

¹⁵ are lo didi irou isidig nigin. Lo sāf are, lo ifodulūyag sā.

¹⁶ Anī nigin, ereb Negur age afouf yen are, wau ifenēya bunem, kabī yalef ya anī yaorouf nigin, momoiya bunem isidig, are Negur ī, ege luwa Abraham nē ibor nē tubu tar ganān afenēdiyof yen anī, megeir fiya nigin age fedig, idi lo dō difedig anidi

* 4:3: Jenesis 15:6, 22 † 4:8: Sam 32:1, 2

bun dogol sã, anĩ ere, idi Abraham nẽ momoiya dõ difedig anidi buneg. Age fiya nigin, Abraham ã, ada ganan neda tamada.

¹⁷ Are Negur nẽ Itotoya bun ibodok kilei, “Aya õ teneub akor musei neid temeid anenon.”[‡] Negur mala bun, ã neda tamada, Abraham Negur nigin momoi yen, Negur ã tamo gare den mata ifeneĩd fen, ereb to ibodok anĩ iweig di, agef wõ yedig, Negur ã anĩ.

¹⁸ Wau iseya nigin gariya taka sã bun, Abraham in wau iseya bun momoi yen, are ã teneub akor musei neid temeid wõ youf nigin age fen, are Negur ã eig ye irokenen kilei, “Ogon ibor agef yenẽf.”[§]

¹⁹ In momoiya bun felu reya sã, ã hundred yar age fiya ibodon nigin, yogon bouwa anĩ laa gen ile fen, Sara kesu yaleya nigineg laa gen ilen.

²⁰ Anĩ ere, ereb ã Negur iron anĩ nigin to wau uru fen, in momoiya to ilef isi fen, anĩ ere, ã yogon momoiya megeir fe fen, Negur fula fiya medeĩya ifenen.

²¹ Abraham ã, ereb Negur age afouf yen anĩ age fiya nigin, ã megeir ado, ye fen, momoi bagai yen.

²² Anĩ nigin, Negur, Abraham nigin ã madur bagai yen.

²³ Od “Negur ã nigin madur bagai yen” are, ã nigin dogol to itoton,

²⁴ anĩ ere, Negur ada nigin madur bagai youf anĩ nigineg itoton, are ada, Negur, neda Odug Jesus tamo gare den bun tamal kel turĩ fiyen nigin, momoi tauf anĩ.

²⁵ Negur ã Jesus neda mosor nigin laa bun inene ken, ada madur bagai youf nigin, Jesus mata kel turĩ fiyen.

5

Maror Kulĩya Ado

¹ Anĩ nigin, momoiya bunem, Negur ada madur bagai yen nigin, ada neda Odug Jesus Kristus bunem, Negur ado maror bun tabodok.

² Neda momoiya bunem, Jesus Kristus ã, ada Negur nẽ wau ifenẽya

enei ada gama an tafaref anĩ namen irou ileda di, telen. Anĩ nigin, ada Negur nẽ fula fiya medeĩya nigin, wauda ise fen, kulĩ taudig.

³ Anĩ nigin dogol sã, ada neda morõ nigineg kulĩ taudig, ere nigin, ada keleĩ, morõ bunem feseya sã anĩ wõ yedig,

⁴ feseya sã anĩ bunem atĩya biya wõ yedig, atĩya biya bunem wau iseya wõ yedig.

⁵ Wau iseya anim ada to fõ fadadig, ere nigin, Awa Uur Fateul Negurem ifanadan anĩ bunem, in wau laa fiya ada wauda bun fi felen.

⁶ Ada fau maleg tabod mog, in sain bun bagai, Kristus ã, ada Negur dõ fiya sã anidi nigin laa fen.

⁷ Tamo takam, taka madur bagai nigin, laa fiya malai bagai, agef fen, tamo takam aib taka tobonunã biya ado nigin total ino fen, laa fouf be.

⁸ Anĩ ere, Negur ada nigin yogon wau laa fiya anĩ, enei bun ada ifel-nadaf, are ada fau mosor bun tabod mog, Kristus ada nigin laa fen.

⁹ Gama yogon naud bunem, Negur ada madur bagai yen nigin, ada ã bunem Negur nẽ didi bun tamal baban momoi bagai yalelkanadauf!

¹⁰ Sain ada Negur nẽ kiwai tamo tar tabod mog, yogon Naal nẽ laa bunem, ada ã geid komo fadan. Gama ada ã geid komo fadan nigin, baban momoi bagai, Kristus nẽ mata bunem ada kel gei fadauf!

¹¹ Enei dogol sã, anĩ ere, ada, ereb Negur neda Odug Jesus Kristus bunem age fen nigineg kulĩ taudig, are Jesus Kristus bunem, ada gama komo fiya talen.

Adam Bunem Laa Wõ Yen, Kristus Bunem Mata Wõ Yen

¹² Anĩ nigin, tamo tekelei bunem, mosor ket tenebur wõ ye di, laa mosor bunem wõ yen, age fiya bagai, ganan mosor dinon nigin, laa, tamo ganan bun wõ yen.

[‡] 4:17: Jenesis 17:5 [§] 4:18: Jenesis 15:5

¹³ Lo wōya sã mog, mosor tenebur ibodon. Anĩ ere, lo sãf are, mosor to iwesauf.

¹⁴ Anĩ ere, Adam nē sain bunem ile Moses nē sain bun, idi Adam age fen gen, to Negur nē ãtãfiya wal difen anidig laa farumen dibodon, Adam ã taka fau isiyouf nē malakanon.

¹⁵ Anĩ ere, Negur nē ege luwa are mosor Adam inon gen sã. Tamo tekelei nē mosor bunem musei gare den ouf are, Negur nē wau ifenēya ado ege luwa, tamo tekelei Jesus Kristus nē wau ifenēya bunem isin, naig fiya bagai tamo musei bun gogũ foug!

¹⁶ Takag age fiya, Negur nē ege luwa are, tamo tekelei nē mosor mala age fiya sã. Es fiya mosor tekelei dōf fen, mosor inon nigin bouwa bun od yūya irou isin, anĩ ere, ege luwa mosor musei dōf fen, madur bagai anĩ irou isin.

¹⁷ Tamo tekelei nē mosor bunem, laa anĩ, tamo tekelei anĩ bunem mudur ibodon ouf are, idi Negur bunem, wau ifenēya barikã ado, madur bagai anĩ nē ege luwa barikã dalef anidi, momoi bagai, tamo tekelei Jesus Kristus bunem, mata bun mudur dibodōf!

¹⁸ Anĩ nigin, mosor tekelei bunem, Negur tamo ganan mosor temeleid yen, age fiya gen, madur bagai tekelei age fen bunem, Negur tamo nigin madur bagai ye fen, tamo ganan nigin mata irou isin.

¹⁹ Tamo tekelei nē od wal fiya bunem, musei mosor adodo wowã den, age fiya gen, tamo tekelei nē dō fiya bunem, musei madur bagai wowã douf.

²⁰ Mosor ifageya nigin, lo isin. Anĩ ere, mosor ifaga di, Negur nē wau ifenēya fatuk bagai ifagan,

²¹ are mosor laa bun mudur ibodon gen, wau ifenēya madur bagai bunem mudur ibod ken, neda Odug Jesus Kristus bunem mata ibodkeleya irou isiyouf nigin age fen.

Mosor Bun Laa, Kristus Bun Mata

¹ Age fiyauf are, ada ere tauf? Negur nē wau ifenēya ifagauf nigin, ada mosorei tauf de?

² Sã bagai! Ada mosor bun gare taun; naig fe di, ada anĩ bun tau tabodōf?

³ Ada ganan Kristus Jesus bun naan talen, are yogon laa bun naan talen anĩ, ã to keleĩ de?

⁴ Anĩ nigin, ada, laa bun naan talen bunem, ã geid mū fadan, are Kristus, Tama nē fula fiya medeĩya nē megeir bunem, tamo gare den bun tamal kel turĩ fen gen, adag ibodōya mata bun mata tabodōf nigin age fen.

⁵ Ada yogon laa bun, enei gen ã geid bagu fadan ouf are, ada momoi bagai yogon kel fãya buneg, ã geid bagu fadauf.

⁶ Ada keleĩ, mosor nē bouwada yukesiyouf nigin, neda oroya tubu ã geid aa tetek bun yun, are ada mosor nē ferfer to tabodōf nigin age fen,

⁷ ere nigin, taka ã laa fen are, ã mosor nē megeir bun tamal yalalen.

⁸ Ada Kristus geid gare taun ouf are, adag ã geid mata tabodōf nigin momoi tauf.

⁹ Ere nigin, ada keleĩ, Kristus tamo gare den bun tamal, kel turĩ fiyen nigin, ã baban to bagai laa foug, ã laa nē megeirem baban to ironēf.

¹⁰ ã laa fen are, ã mosor nē megeir yukesiyouf nigin, sain tekelei bun dogol laa fen, anĩ ere, mata ã ibodok are, ã Negur bun mata ibodok.

¹¹ Age fiya bagai, ã aug nigin, mosor bun gareg fen, Kristus Jesus bunem, Negur bun mata ubodōgef anĩ kisi gouf.

¹² Anĩ nigin, ãgenei bouweĩ bura leya nē anĩ bun, mosor mudur ibodō di, ã in oroya sane anĩ dō gouf nigin to ago gouf.

¹³ ãgenei bouweĩ tunĩ, sane nē aruna yaleya nigin mosor bun to wenēgouf, anĩ ere, idi laa bun tamal kel turĩ fedin gen, ã aug Negur wenēg fen, ãgenei bouweĩ tunĩ, madur

bagai nē aruna yaleya nigin Negur bun wenēgouf.

¹⁴ Mosor āgenei odug to ibodōf, ere nigin, ā lo farumen sã, wau ifenēya farumen ubodōgef.

Madur Bagai Nē Ferfer

¹⁵ Age fiyauf are, naig fiya? Ada lo farumen sã, wau ifenēya farumen tabodok nigin, mosor tanouf de? Gai sã bagai!

¹⁶ Sain ā aug, taka sigor dōg fen, ferfer gen ĩ aruna walegef, ā taka sigor dō gef anī nē ferfer ubodōgef anī, ā to keleĩ de? Ā mosor nē ferfer ubodōgef, are laa bun irouleyeik, ā Negur dō fiya nē ferfer ubodōgef, are madur bagai bun irouleyeik.

¹⁷ Anī ere, ada Negur de tafiyēf, ere nigin, ā uruwa bun mosor nē ferfer ubodōgen, anī ere, ā tai fiya difenein anī, āgenei wauĩ adok dō gen.

¹⁸ Ā mosor bun tamal yalelneĩ di, madur bagai nē ferfer wō gen.

¹⁹ Aya, ā bouweĩ bun felu reya nigin, tamo nē tobonunã bunem wogō auf. Ā uruwa bun ferfer gen, āgenei bouweĩ, sane amuyē ado bun unogen, ago ge di, fatuk bagai sane len, age fiya gen, gama ā ferfer gen, āgenei bouweĩ, madur bagai bun unoge di, fateul bagai wō gouf.

²⁰ Sain ā mosor nē ferfer ubodōgen, ā madur bagai nē farumen to ubodōgen.

²¹ Sain anī bun, ereb ā gama mama yeik bun tamal, ā ere mala biya walegen? Anī ganan are, laa bun irou isif.

²² Anī ere, ā gama mosor bun tamal yalelneĩ di, Negur nē ferfer wō gen, anī nē mala biya are, fateul bun irouleyeik, anī nē kaũ are, mata faimud ibodkeleya.

²³ Ere nigin, mosor mala, are laa, anī ere, Negur nē ege luwa, are neda Odug Kristus Jesus bun mata faimud ibodkeleya.

7

Tamo Kayau Bagu Fiya Bun Od Malakanon

¹ Turau tar, aya, Moses nē lo keleĩ tamo ā arokeneik, lo are tamo mata ibodok sain bun dogol, ĩ bun megeir ado anī, ā to keleĩ de?

² Eig fiya gen, lo irok, kayau tamo aiwaf, ĩ tamo mata ibodok sain bun dogol ĩ aiwaf, anī ere, ĩ aiwa laa fouf are, kayau ĩ bagu fiya nē lo farumen to ibodōf.

³ Age fiya nigin, kayau ĩ aiwa monog fau mata ibod mog, ĩ baban tamo taka yalouf are, ĩ seseirã kayau douf. Anī ere, yogon tamo laa fouf are, lo anim kayau to ironē di, ĩ tamo taka yaloufeg, ĩ to seseirã kayau douf.

⁴ Anī nigin, neu turau tar, āg Kristus bouwa bunem lo bun gare gen, are ā, taka ĩ tamo gare den bun tamal kel turĩ fiyen anī nē wowāg fen, ada Negur bun faat biya taũf nigin ago gen.

⁵ Sain ada bouwa nē oroyam ironadan bun, lo anim mosor nē oroya turĩ fe di, mosor nē oroya anim bouwada bun kabĩ yalen, anī bun, ada laa nē faat taun.

⁶ Anī ere, gama ada ereb mogo ironadan bun gare taun nigin, ada lo bun tamal yalelnadan, anī nigin, ada Awa Uur nē naab mata bun aruna talef, naab tubu lo itotoya bun sã.

Mosor Ado Kusīya

⁷ Age fiyauf are, ada ere tauf? Lo anī mosor de? Sã bagai! Momoi, lo sam are, aya mosor are ereb yef anī to keleim. Ere nigin, taka nē safina ile to oroya nigin lo to age ye irom are,* aya taka nē safina ile to oroya nigin to keleim.

⁸ Anī ere, ĩtãfiya anim mosor modoũ ifenē di, aya nameun mosorem taka nē safina ile oroya fire fire ganan inodin. Ere nigin, lo sãf are, mosor are laa fen.

* 7:7: Eksodas 20:17; Diuteronomi 5:21

⁹ Uruwa aya lo sã bun mata abodon, anĩ ere, ãtãfiya isi di, mosor mata fã ye di,

¹⁰ aya laa fiyan. Lo anĩ mata irousiyouf aun, anĩ ere, ã momoi bagai laa irousin anĩ ailen.

¹¹ Ere nigin, ãtãfiya anim mosor modoũ ifenẽ di, mosorem aya idegna fen, ãtãfiya bunem laa bun inenan.

¹² Age fiyauf are, lo are fateul, ãtãfiya are fateul, madur fen, biya.

¹³ Age foug are, ereb biya anim aya bun laa irousin de? Sã bagai! Anĩ ere, mosor are mosor ya anĩ yaorouf nigin, mosorem ereb biya bunem aya bun laa irousin, are mosor ãtãfiya bunem mosor bagai wõ youf nigin age fen.

¹⁴ Ada keleĩ, lo are Negur bun tamal, anĩ ere, aya bouwa buru nẽ, mosor nẽ ferfer gen na nẽ sur fiyan.

¹⁵ Ereb aya age afef, are aya keleĩ sã. Ere nigin, ereb aya age fiya nigin orouf, are aya to age afedig, anĩ ere, ereb aya to orouf anĩ, aya age afedig.

¹⁶ Ereb aya age fiya nigin to orouf anĩ, aya age afoug are, aya lo are biya auf anĩ ifelnadaf.

¹⁷ Anĩ nigin, aya yug anĩ to age afef, anĩ ere, mosor aya nameun ibodok anim age fef.

¹⁸ Aya keleĩ, ereb biya taka, aya nameun, are mosor nẽ bouwau enei bun to ibodok. Ere nigin, aya ereb biya age fiya nigin orouf, anĩ ere, aya age fiya kisi feleya sã.

¹⁹ Ere nigin, ereb aya age afef, are ereb biya age fiya nigin orouf anĩ sã, anĩ ere, ereb sane aya age fiya nigin to orouf anĩ, aya faimud age afedig.

²⁰ Aya ereb to orouf anĩ age afoug are, ayam anĩ to age afef, anĩ ere, mosor aya nameun ibodok anim age fef.

²¹ Anĩ nigin, aya tobonunã eig fiya kabĩ yale mog, ailef: Sain aya biya age afou fenẽ di, sane anĩ aya ado ibodõdig.

²² Ere nigin, aya nameun Negur nẽ lo nigin wau kulĩ yedig,

²³ anĩ ere, aya lo taka anĩ bouwau tunĩ bun kabĩ yale mog, ailef, are neu kisi biya nẽ lo ado kusĩ de fen, aya, mosor, bouwau tunĩ bun kabĩ yalef anĩ nẽ lo nẽ kalabus tamo inenadig.

²⁴ O aya malaulon bagai! Aim anĩ aya laa nẽ bouwau enei bun tamal yalelnauf?

²⁵ Neda Odug Jesus Kristus age fen bunem Negur ada yalelnadan nigin ã de tafiyẽf!

Age fiyauf are, aya yug neu kisi bun are, Negur nẽ lo nẽ ferfer, anĩ ere, aya mosor nẽ bouwau enei bun, mosor nẽ lo nẽ ferfer.

8

Awa Uur Bunem Mata Ibodõya

¹ Anĩ nigin, idi Kristus Jesus bun dibodok anidi bun, mosor dinon nigin bou yũya taka gama to ibodok,

² ere nigin, Kristus Jesus bunem, mata nẽ Awa Uur nẽ lo anim, mosor ado laa nẽ lo bun tamal yalelnan.

³ Mosor nẽ bouwa felu reya nigin, lo anim age fiya nigin kisi feleya sã anĩ Negur age fen, are ã yogon Naal, mosor tamo nẽ bouwa gen bun, mosor yaleleya nẽ sesewi fiya ibodõf nigin sur fiyen anĩ bunem, Negur ã, mosor, mosor tamo nẽ bouwa bun ibodok anĩ nẽ megeir yukesin,

⁴ are madur bagai wõ youf nigin lo irok anĩ, bouwa nẽ oroya tator ken, Awa Uur nẽ oroya bun tabodõdig ada bun, kisi falauf nigin, Negur ã age fen.

⁵ Idi bouwa nẽ oroya bun dibodõdig anidi, dogo neid kisi are, ereb mosor nẽ bouwa orof anĩ bun yenẽdig, anĩ ere, idi Awa Uur nẽ oroya bun dibodõdig anidi, dogo neid kisi are, ereb Awa Uur orof anĩ bun yenẽdig.

⁶ Kisi mosor nẽ bouwa bun yenẽdig, are laa nẽ, anĩ ere, kisi Awa Uur bun yenẽdig, are mata nẽ ado wau inosiya nẽ,

⁷ ere nigin, kisi mosor nẽ bouwa bun inodig, are Negur kiwai ifenẽdig, are Negur nẽ lo farumen

to ibodōdig, ī age fiya nagineg kisi feleya sã.

⁸ Idi mosor nē bouwa bun dibodōdig anidi, Negur wau al fiya ifenēya kisi feleya sã.

⁹ Anī ere, Negur nē Awa Uur ā namein ibodōf are, ā mosor nē bouwam to ulum iroukeneif, anī ere, ā Awa Uurem ulum iroukeneif. Anī ere, taka ī Kristus nē Awa Uur sãf are, ī Kristus nē sã.

¹⁰ Anī ere, Kristus ā namein ibodōf are, āgenei bouweī mosor nigin laa foug, āgenei uur madur bagai nigin mata ibodok.

¹¹ Ī Jesus tamo gare den bun tamal, kel turī fiyen anī nē Awa Uur, ā namein ibodōf are, ī Kristus tamo gare den bun tamal, kel turī fiyen, yogon Awa Uur ā namein ibodok anī bunem, āgenei bura leya nē bouweī matag ifeneif.

¹² Anī nigin, turau tar, ada wareg ado, are ada mosor nē bouwa to dō tafouf, bouwa nē oroya bun to tabodōf.

¹³ Ā bouwa nē oroya bun ubodōgouf are, ā gare gouf, anī ere, Awa Uur bunem ā bouwa nē tobonunā anī ukesigouf are, ā mata ubodōgouf,

¹⁴ ere nigin, idi Negur nē Awa Uurem uyu iroukenēdif are, idi Negur nē gere tar.

¹⁵ Ā kumīya nē ferfer ineneīya nē uur to walegen, anī ere, ā Negur nē gere tar ineneīya nē Awa Uur walegen. Anī nigin, ī bunem ada taweig fen, “Aba,* Dei” taudig.

¹⁶ Awa Uur yogo, ada neda uur bun kurō falaisi, ada Negur nē gere tar yedig.

¹⁷ Ada in gere tar ouf are, ada ereb el fiya biya Negur ifanadauf nigin promis od iron anī talouf. Ada Kristus geid weim yogon fula fiya medeīyaq talouf nigin ada momoi bagai ī geid weim yogon darau talouf are, ada Kristus geid weim ereb el fiya biya Negur ifanadauf nigin promis od iron anī talouf.

Fula Fiya Medeīya Dumen Nē

¹⁸ Aya kisi afef, fula fiya medeīya ada bun yaorouf, are ada neda darau gama talef anī wal fiya bagai.

¹⁹ Ereb ereb ganan Negur inodin are, Negur yogo gere tar yaor fediyouf nigin, fatuk bagai tari difedig.

²⁰ Ere nigin, ereb ereb ganan Negur inodin are, Negur uruwa idi yogon oroya dō difouf nigin kisi fen anī idi to dō difedig, are dogo neid oroya bunem sã, anī ere, ī agef inodin anī nē oroya bunem. Anī ere, waud iseya ado,

²¹ are ereb ereb ganan Negur inodin, idig dogo bura leya nē kafī fiya bun tamal yalelneid fen, Negur nē gere tar neid fula fiya medeīya nē karika ibodōya bun gurif iroulediyouf.

²² Ada keleī, ereb ereb ganan Negur inodin, idi kesu gō fiya nē darau bun gen, gariya bunem osi def disi, gama sain enei bun bagaig, age difef.

²³ Anī dogol sã, anī ere, ada, Awa Uur, are dumen fula fiya medeīya ada talouf nē faat uyulil yūya anī talen, ada dugeg, Negur ada bouwada kel geif fen, ada yogon gere tar bagai ya anī yaor fe kurō falaisiyouf nigin, fatuk bagai tari tafe fen, namedan osi taudig.

²⁴ Ada kel gei fadan sain bun, ada wauda iseya enei talen. Anī ere, wau iseya malam ileya are, wau iseya bagai sã. Aim anī, ereb ī mogo ilef nigin wau isauf?

²⁵ Anī ere, ada ereb ada fau ileya sã nigin wauda isauf are, ada totol tano fen, tari tafouf.

²⁶ Age fiya gen, Awa Uur ī neda felu reya bun isennadadig. Ada ereb nigin kosē tauf anī ada keleī sã, anī ere, Awa Uur yogo od faded fiya kisi feleya sã anī, osi ye fen, ada nigin kosē yedig.

²⁷ Age fe di, Negur ada wauda fele fedig, ī Awa Uur nē kisi keleī, ere nigin, Awa Uur ī tamo kayau fa-

* 8:15: Anī nē gariya, Aram od bun ‘Dei.’

teul nigin Negur nē oroya kilei kosē yedig.

Ada Kusī Wal Difen Anidi Wal Fediya

²⁸ Ada keleī, ereb ereb ganan bun, Negur yogo nigin waud laa fedig anidi neid biya fiya nigin Negur kabī yaledig, idi yogon oroya kilei iweignēdin anidi.

²⁹ Idi Negurem mogo kelein anidi, Negur idi yogo Naal gen wowā douf nigineg mogo igirnēdin, are yogon Naal, tura tar musei atun, kesu matu wō youf nigin age fen.

³⁰ Agef fen, idi Negur igirnēdin anidig, ī iweignēdin, idi Negur iweignēdin anidig, ī madur bagai fiyēdin, idi Negur madur bagai fiyēdin anidig, ī fula fiya medeīya ifenēdin.

³¹ Age fiyauf are, ada enei nigin ere tauf? Negur ī nedauf are, aim anī ada daū fadaya kisi feleya?

³² Ī yogo Naal bagai nigin to katū ye fen, ada ganan nigin yogo Naal itornen anī, naig fe di, ī yogo Naal ado ereb ereb gananeg, ege kilē to ifanadauf?

³³ Aim anī, Negur igirnēdin anidi kot bun inenēdiyof? Negur yogo idi madur bagai fiyēdidig.

³⁴ Aim anī, idi mosor dinon ye fen, idi bouweid bun od yūf? Kristus Jesus ī mogo laa fen, agef feneg, ī kel turī fe di, matan, ī Negur ima biyalē ibod ken, ada nigineg kosē yedig.

³⁵ Aim anī, ada Kristus nē wau laa fiya bun tamal fara fadauf? Kafī fiya, morō, darau, naū, gemū, waila be, dimigem age foug de?

³⁶ Are Negur nē Itotoya bun ibodok kilei,

“Ō nigin amā naa tekelei adok laa gurug mafef;

amā sipsip didenkesiya nigin age fiya gen dileman.”†

³⁷ Anī ere, enei ganan bun, ada, ī ada nigin wau laa fen bunem, ada kusī wal difen anidi wal fediya tabodok.

³⁸ Aya momoi auf, laa, mata, engel, kaa sesen, ereb gama nē, ereb dumen nē, ereb megeir taka,

³⁹ ilun, kuren bagai be, ereb ereb ganan inodin bun ereb takam, Negur nē wau laa fiya, neda Odug Kristus Jesus bun ibodok anī bun tamal, ada fara fadaya nigin kisi feleya sã.

9

Negur Yogo Bagai Igin

¹ Aya Kristus bun momoi orok, aya idegēya sã, neu kisi es fiya wau bun ibodok, Awa Uur Fateul bunem, aya bun anī megeir fef,

² are aya fatuk bagai wau gudūf fen, aya faimud wau bun morō ado.

³ Ere nigin, aya, neu turau tar, neu ibor anidi nigin, aya yug isisna fen, Kristus bun tamal yalelnauf anīg, aya orouf.

⁴ Idi Israel tamo kayau. Negur nē gere tar ya anī dogo neid, Negur nē fula fiya medeīya anī, idi bun yaor fen, Negur ado bar itenēya, lo yaleya, tempel bun Negur yana yaleseya ado, ereb Negur age afoug ye fen igirin, are dogo neid.

⁵ Tubuid tar Abraham, Isak, Jakop are dogo neid, idi neid ibor anī isi isi Kristus wō yen, Kristus ī Negur, ganan ī farumen dibodok, faimud ī yana talesauf! Momoi.

⁶ Are Negur nē od irofosiya gen sã. Ere nigin, Israel ibor bun wō den anī, ganan Israel sã.

⁷ Idi Abraham nē ibor nē tubu tar ba, anī ere, ganan Abraham nē gere tar bagai sã. Age fiya ban, “Isak bunem, ogon ibor tar douf.”*

⁸ Are, tamo nē tobonunã nē naud bunem Abraham nē gere tar wowā den anidi ganan, Negur nē gere tar sã, anī ere, promis nē gere tar idi, Abraham nē ibor tar youf.

⁹ Negur nē promis od anī eig fiya, “Yogon sain bun bagai, aya kelauf, Sara kesu adouf.”†

† 8:36: Sam 44:22 * 9:7: Jenesis 21:12 † 9:9: Jenesis 18:10, 14

¹⁰ Anĩ dogol sã, anĩ ere, Rebeka nẽ gere tar tama tekelei ado, are tubuda Isak.

¹¹ Anĩ ere, kesu uru fau gõ fiya sã bun, ereb biya be sane be age fiya sã mog, Negur nẽ oroya anĩ, kabĩ bunem sã, iweignēdif ĩ bunem, yogon igirĩya bun ifarauf nigin,

¹² ĩ Rebeka irokenen, “Matu anĩ, ibuye nẽ aruna yaleyēf.”‡

¹³ Are Negur nẽ Itotoya bun ibodok kilei, “Aya Jakop nigin wau laa fen, anĩ ere, Esau to oroun.”§

¹⁴ Age fiyauf are, ada ere tauf? Negur madur sã de? Sã bagai!

¹⁵ Ere nigin, Negur Moses irokenen,

“Aya aib nigin wau yuk anĩ bun, wau yũya afenēf,

aya aib nigin wau irok, ĩ nigin wau yenēf.”*

¹⁶ Anĩ nigin, are, tamo nẽ oroya be kabĩ total yaleya bunem sã, Negur nẽ wau yũya bunem.

¹⁷ Negur nẽ Itotoya bun, Isip nẽ king Farao nigin eig ye irok, “Aya õ enei nigin bagai king anenon, are aya õ bun neu megeir yaor afe di, teneub ganan bun, neu yanau kurõ difalaisiyouf nigin age afen.”†

¹⁸ Anĩ nigin, Negur aib ĩ wau yũya ifenēya nigin orof bun, ĩ wau yũya ifenēdig, agef fen, ĩ aib nẽ wau katĩ feleya nigin orof bun, ĩ katĩ feledig.

¹⁹ ã takam aya irokanauf, “Age fiyauf are, ere nigin Negur fau ada bouwada bun od yuk? Aim anĩ yogon oroya katĩ felef?”

²⁰ Anĩ ere, tamo õ ai anĩ Negur od solo urokenēf? “Ereb kare fen anim ĩ kare fen anĩ, ‘Ere nigin eig wo unoyan?’ fiyēf de?”‡

²¹ Mis inoya tamo ĩ mafer de tekelei anim, mis uru, taka kabĩ biya ifenēya nẽ, taka kabĩ sane ifenēya nẽ, yogon oroyam inoya kisi feleya sã de?

²² Negur ĩ yogon didi anĩ yaor fe di, yogon megeir anĩ tamo kayau keleĩ

youf nigin wau iro ken, yogon didi idi bun ile, daũ feidlauf anidi nigin molol bunem loloum fedi di, sain meluk ibodon ouf are, ada ere tauf?

²³ Negur ĩ idi fula fiya medeĩya dalouf nigin dodok fe fen, yogon wau yũya ifenēdiyof anidi bun, yogon fula fiya medeĩya barikã anĩ yaor fiya nigineg wau iron ouf are, ada ere tauf?

²⁴ Ada buneg Negur iweignadan, Juda temeleid dogol sã, haiden buneg.

²⁵ Are Hosia nẽ itotoya buneg Negur wogõ yef kilei,

“Aya idi neu tamo kayau sã anidi, neu tamo kayau auf,

age afe fen, aya neu oboiyou sã anĩ, neu oboiyou auf,”§

²⁶ takag,

“Negur ‘Ã neu tamo kayau sã’ yen nẽ modoũ anĩ bun,

idi anĩ ‘Negur mata ibodõya nẽ gere tar’ youf.”*

²⁷ Asaia Israel nigin iweig iron,

“Israel tamo kayau maaĩ ubun mul gen musei bagai,

anĩ ere, musei sã dogol kel gei fediyouf.

²⁸ Ere nigin, Odug ĩ teneub bun,

yogon tamo kayau es fediyouf nẽ od ganan kaisã bagai dõf agef kisi falauf.”†

²⁹ Are Asaia mogo iron kilei,

“Odug saa ilun nẽ kusĩ tamo guri feid uyu iroudig anĩ,

neda ibor nẽ tubu tar tunĩ to itornēdim are,

ada Sodom gen wõ taum,

ada Gomora gen tabodom.”‡

Israel Tamo Kayau Momoiya Sã

³⁰ Anĩ nigin, ada ere tauf? Haiden idi madur bagai anĩ to dimiren anidi, momoiya bunem madur bagai anĩ dalen.

³¹ Anĩ ere, Israel idi madur bagai nẽ lo dõ difen, idi madur bagai anĩ yaleya sã.

‡ 9:12: Jenesis 25:23 § 9:13: Malakai 1:2, 3

‡ 9:20: Asaia 29:16; 45:9 § 9:25: Hosia 2:23

‡ 9:29: Asaia 1:9

* 9:15: Eksodas 33:19 † 9:17: Eksodas 9:16

* 9:26: Hosia 1:10 † 9:28: Asaia 10:22, 23

³² Ere nigin yaleya sã? Idi Negur nigin momoiya bunem dõ fiya sã, anĩ ere, lo dõ fiya bunem, Negur mala bun madur bagai dalouf nigin age difen nigin. Idi ye tũ fiya nẽ meein anim yeid tũ fen.

³³ Are Negur nẽ Itotoya bun ibodok kilei,

“Lo weleg, aya Saion oun tamo yeid tũ fiya nigin meein taka, idi kubũ douf nigin sa tuwa taka anof, age afe di, taka ã, ã nigin momoi youf, ã mama to bagai yalouf.”§

10

¹ Turau tar, aya Negur ã Israel kel gei fediyouf nigin wau iro ken, Negur bun kosẽ audig.

² Aya idi nigin kurõ afeis eig auf, idi Negur nigin kisi total dinodig, anĩ ere, idi neid kisi total are keleĩ bunem sã.

³ Ere nigin, idi madur bagai Negur bunem isif anĩ to kelei ken, dogo neid madur bagai anĩ dalouf nigin dimiren, age dife fen, idi, Negur tamo kayau yogon mala bun madur bagai inenẽdiya nẽ naab anĩ ditoron.

⁴ Kristus ã, idi momoi def ganan madur bagai wowã douf nigin, lo nẽ idikeleya wõ yen.

⁵ Moses ã madur bagai lo ganan dõ fiya bunem isif nigin eig ye itoton, “Tamo ã lo enei dõ fef, ã anĩ bunem mata ibodõf.”*

⁶ Anĩ ere, madur bagai momoiya bunem isif anĩ eig ye irok, “Õ waũ bun to eig wo urõf, ‘Aim anĩ saa ilun iselauf?’† ” (are, Kristus irou isiyouf nigin)

⁷ “oo ‘Aim anĩ teneub kur bagai isilauf?’‡ ” (are, tamo gare den bun tamal Kristus irou isauf nigin).

⁸ Anĩ ere, ã ere ye irok? “Od anĩ õ wagen ibodok, are ogon sigor bun, ogon waũ bun ibodok,”§ are

momoiya nẽ od amã wogõ maudig anĩ.

⁹ Are õ ogon sigorom, “Jesus ã Odug,” wo fen, õ waũ bun, Negur ã Jesus tamo gare den bun tamal kel turĩ fiyen anĩ, momoi wouf are, õ kel yaleyõf.

¹⁰ Are, taka ã wau bun momoi ye di, Negur ã madur bagai yef, age fe di, taka ã sigorom momoi auf ye di, Negurem ã kel yalouf.

¹¹ Are Negur nẽ Itotoya bun ibodok kilei, “Taka ã, ã nigin momoi youf, ã mama to bagai yalouf.”*

¹² Juda ado haiden bun fire fire sã, Odug de tekelei anĩ ganan nẽ Odug, ã idi diweignek ganan bun el fiya fatuk bagai ifenẽdidig,

¹³ are Negur nẽ Itotoya bun ibodok kilei, “Idi Odug nẽ yana dale diweignek ganan, Negurem kel gei fediyouf.”†

¹⁴ Age fiyauf are, naig fe di, idi ã nigin to momoi den anĩ diweignẽf? Naig de fen, idi to karĩ den anĩ nigin momoi douf? Taka nem to iro-kenẽdiyof are, naig de fen, idi karĩ douf?

¹⁵ Idi to sur fediyouf are, idi naig de fen, od wogõ douf? Are Negur nẽ Itotoya bun ibodok kilei, “Idi biya od diroulef anidi, yeid gai meli bagai!”‡

¹⁶ Anĩ ere, Israel tunĩ biya od anĩ to dalen. Idi age difen nigin, Asaia eig ye iron, “Odug, aim anĩ nemã od nigin momoi yen?”§

¹⁷ Anĩ nigin, momoiya anĩ biya od karĩya bunem isidig, biya od karĩya are Kristus nẽ od bunem isidig.

¹⁸ Anĩ ere, aya to afe; Idi to karĩ dedig de? Momoi, idi karĩ den, are Negur nẽ Itotoya bun ibodok kilei,

“Neu arũ tamo neid aiteid, teneub ganan bun iyokelen, dogo neid od teneub idikeleya bun ilen.”*

§ 9:33: Asaia 8:14; 28:16 * 10:5: Levitikas 18:5 † 10:6: Diuteronomi 30:12 ‡ 10:7: Diuteronomi 30:13 § 10:8: Diuteronomi 30:14 * 10:11: Asaia 28:16 † 10:13: Joel 2:32 ‡ 10:15: Asaia 52:7 § 10:16: Asaia 53:1 * 10:18: Sam 19:4

19 Baban aya to afef: Israel idi to kelein de? Uruwa bun, Negur Moses bunem iron,

“Aya tamo kayau yeneid sã idi bun age afe di, idi nigin ã kiyeĩ unogouf.

Aya tamo kayau keleĩ sã idi bun age afe di, idi nigin ã nameĩ saneuf.”†

20 Takag, Asaia kukĩya sã eig ye iron, “Idi aya to dimirnan, aya dileyau.

Idi aya nigin to fiya san anidi bun, aya yug yaor afouf.”‡

21 Anĩ ere, Israel nigin ã eig ye iron,

“Naa tekelei adok, aya tamo kayau dõ fiya sã, fe temeleid bun imau dõ au fen, tari afedif abodon.”§

11

Israel Idi Atun Musei Sã Dogol

1 Age fiyauf are, aya to afef: Negur ã yogon tamo kayau aulel fedin de? Sã bagai! Aya yug Israel temelou, Abraham nẽ ibor, Benjamin nẽ gĩ bun temelou.

2 Negur ã, yogon tamo kayau, ã mogo gariya bunem kelei ken igirnẽdin anidi to aulel fedin. Ereb Negur nẽ Itotoya bun Eliya nigin irok, are ã Negur ado, Israel idi nigin bou yũya od wogõ den anĩ, ã to keleĩ de?

3 “Odug, idi mogo ogon profet didnkeis fen, ogon alta narĩ difedin. Aya mugu dogol ditorna fen, idi aya dinakesiyouf nigin age difef.”*

4 Age ye di, Negur ere od solof irokenen? “Aya, aya yug nigin sewen tausen tamo idi idegẽya waitou Bal bun to iboreid bobou difen anidi, foi afen.”†

5 Age fiya gen, sain enei buneg, Negur wau ifenẽya bunem musei sã igirnẽdin anidi fau dibodok.

6 Igirĩya anĩ, Negur nẽ wau ifenẽya bunem isin, are tamo nẽ kabĩ bunem sã. Igirĩya anĩ tamo nẽ kabĩ bunem isin ouf are, Negur nẽ wau ifenẽya

anĩ, wau ifenẽya sa ken, mala ifenẽya yenem.

7 Anĩ nigin, ada ere tauf? Ereb Israel idi kabĩ totol dale fen, dimiren anĩ, idi to dalen, anĩ ere, Israel tunĩ musei sã Negur igirnẽdin anidim dogol dalen. Israel tunĩ ganan Negur waud ifofakelen.

8 Are Negur nẽ Itotoya bun ibodok kilei,

“Negur, idi kisi kurã fiya sã nẽ uur, meleid to dilouf nẽ ado, wedereid to karĩ douf nẽ anĩ ifenẽdin,

anĩ bunem isi gama naa enei bun.”‡

9 Takag, Dawid eig ye iron,

“Neu kiwai tar, idi neid sifa nẽ tebol bun, saaf dokon waud kulĩ yen sain bun,

idi suk bun gei difediyouf, idi kor bun gei difediyouf, idi neid el fiyam, dogo yeid tũ difouf nigin ado, mala solo fiya nẽ darau, idi bun wõ youf nigin aya orouf.

10 Dogo neid meleid gugum kele fen, to dilouf, dogo neid bagiyeid gai gai nigin fe fesilauf anĩ orouf.”§

Aa Taka Nẽ Were Aa Taka Bun Inoya

11 Age fiyauf are, aya to afef: Idi yeid tũ fe di, kubũ de fen, baban fãya kisi feleya sã de? Sã bagai! Anĩ fotokar, idi neid mosor nigin, kel gei fiya are haiden bun isin, are Israel idi kiyeĩ dinouf nigin age fen.

12 Anĩ ere, idi neid mosor nigin tenebur tamo kayau bun el fiya kisi feleya bagai wõ ye fen, idi neid kũ fenẽya nigin haiden bun el fiya kisi feleya bagai wõ youf are, idi neid gire fiya anim naig fiya el fiya kisi feleya bagai irusiyouf!

13 Aya ã haiden bun wogõ auf. Aya haiden bun aposel nigin, aya neu kabĩ nigin fatuk bagai yanau alesef,

† 10:19: Diuteronomi 32:21 ‡ 10:20: Asaia 65:1 § 10:21: Asaia 65:2 * 11:3: 1 King 19:10, 14 † 11:4: 1 King 19:18 ‡ 11:8: Diuteronomi 29:4; Asaia 29:10 § 11:10: Sam 69:22, 23

14 are aya neu Israel tamo kayau turĩ afeid, idi kiyeĩ dinouf bun, idi tunĩ kel gei afouf nigin age afef.

15 Negur idi aulel fedin bunem, tenebur tamo kayau idi Negur geid komo fiya dalen ouf are, sain Negur idi yalediyouf bun, ere anĩ wõ youf? Are idi tamo kayau ganan gare den bun tamal mata kel fã den gen ouf.

16 Wit uyulil faat yun anĩ bunem sesewi fiya nẽ bret dinof, anĩ nẽ masak fateul ouf are, bret gananeg fateul. Warumutei anĩ fateul ouf are, were gananeg fateul.

17 Were tunĩ kokour fele fen, õ oliv aa kuĩ nẽ were, oliv aa bun bagu yõ di, oliv aa nẽ warumutei bun saaf tekelei waledig,

18 anĩ nigin, Israel idi bun, õ haiden yanã to wales. Õ yanã walesauf are, enei kisi wo: Õ warumutei to usennek, anĩ ere, warumutei anĩ õ isennok.

19 Anĩ ere, õ eig wo urõf, “Aya aa anĩ bun bagu fiyauf nigin were kokour feledin.”

20 Are momoi. Ani ere, idi momoiya sã nigin kokour feledin, age fe di, õ momoiya bunem ufaref. Õ yanã to wales, anĩ ere, õ kumĩ wouf.

21 Ere nigin, Negur ã Israel idi oliv aa nẽ were bagai yalelnēdiyof nigin to katũ yen ouf are, ã õ nigineg to katũ youf.

22 Anĩ nigin, Negur nẽ molol ado wau itenēya nigin kisi gouf, ã idi kubũ den anidi bun wau itenen, anĩ ere, ã in molol bun toku ubodõgouf are, ã ã bun molol ibodõf. Anĩ ere, ã in molol bun to ubodõgouf are, ãg kokour yeikalauf.

23 Israel idi momoiya sã bun toku to dibodõf are, idi baban aa oliv bun bagu fediyouf, ere nigin, Negur ã baban idi bagu fediya nigin kisi feleya.

24 Õ ogon gariya oliv aa kuĩ bagai bun tamal kokour fele fen, ogon gariya sã oliv aa bagai kulatun fedig anĩ bun bagu yon ouf are, oliv

aa bagai nẽ were eneidi, naig fiya karika bagai dogo neid oliv aa bagai bun bagu fediyouf!

Israel Ganan Kel Gei Fediyouf

25 Turau tar, aya waa enei ã to keleĩ youf nigin to orouf, are ã aug nigin keleĩ biya ado to gouf nigin age afef. Waa are, Negurem Israel tunĩ waud ifofakelen, anĩ bunem idi dibodok disi mog, haiden idi Negurem igirnēdin anidi ganan Negur wagen disiyouf sain anĩ bun.

26 Age dife di, Israel ganan kel gei fediyouf, are Negur nẽ Itotoya bun ibodok kilei,

“Kel yaleya tamo Saion bun tamal isiyouf,

ã Jakob bun tamal Negur nẽ od dõ fiya sã nẽ tobonunã anĩ yalelauf.

27 Aya, idi geid bar itenēya nẽ enei atenēf,

anĩ bunem aya dogo neid mosor alelauf.”*

28 Biya od nigin, idi ã nigin kiwai, anĩ ere, Negur nẽ igirĩya nigin, idi tubuid tar nigin, Negur idi nigin wau laa fedig,

29 ere nigin, Negur nẽ ege luwa ado yogon igirĩya anĩ falei fiya kisi feleya sã.

30 ã uruwa bun Negur dõ fiya sã, anĩ ere, ã gama, Israel Negur dõ fiya sã nigin, Negur nẽ wau yũya walegen.

31 Age fiya gen, idig gama Negur dõ fiya sã, are Negur nẽ wau yũya ã ifenein anĩ bunem, idig gama Negur nẽ wau yũya dalouf nigin age fen.

32 Age fiya nigin, Negur ã tamo ganan, dõ fiya sã nẽ kafĩ fiya bun inenēdin, are ã idi ganan wau yũya ifenēdiyof nigin age fen.

Negur Yana Yaleseya Nẽ Od

33 O Negur nẽ kisi biya ado keleĩ biya, are kisi feleya bagai ilon bagai isilef.

Yogon es fiya anĩ imir ken, keleĩya kisi feleya sã,

* 11:27: Asaia 59:20, 21; 27:9; Jeremaia 31:33, 34

yogon delē iyōdig anī dir feleya kisi feleya sã.

³⁴ Are Negur nē Itotoya eig ye irok, “Aim anī Odug nē kisi kelein?

Aim anī ĩ ulum iroukenen?”†

³⁵ “Aim anī Negur ifenen nigin Negur ĩ aba kel ifenēf?”‡

³⁶ Ada keleĩ, od enei are momoi, ere nigin, erēb erēb ganān ĩ bun tamal isif, erēb erēb ganān ĩ bunem ibodok, erēb erēb ganān ĩ bun ilef.

Ī bun fula fiya medeīya faimud ibodōf! Momoi.

12

Mata Ibodōya Nē Sesewi Fiya

¹ Anī nigin, turau tar, aya, ã, Negur nē wau yūya ada ifanadan bunem to-tol bagai arokeneik, āgenei bouweĩ, mata ibodōya nē sesewi fiya, fateul ado Negur wau kulīya nē anī gen Negur wenēgouf. Enei anī, āgenei uurem Negur yana yaleseya.

² Tenebur enei nē oroya baban to dōg, anī ere, Negur āgenei kisi falei fe mata inoyeĩ di, āgenei kisi mata anī dō gouf, anī bunem, ã Negur nē oroya, are yogon biya nē, kulīya nē ado, kisi feleya nē oroya anī keleĩ youf.

³ Negur nē wau ifenēya bunem, aposel kabī yaleya nē yana aya ifanan nigin, aya ã ganān arokeneik: Taka ĩ yogo nigin kisi fouf anī to wal fe fen, kisi fouf, anī ere, momoiya Negur ifenen anī kilei, es fiya biya bun yogo nigin kisi fouf.

⁴ Ada bouwada tekelei bun fara fiya musei ado, anī ere, fara fiya ganān bun kabī tekelei sã,

⁵ age fiya gen, ada fara fiya musei, anī ere, Kristus bun, bouwada tekelei, fara fiya mugu mugu tunī ganān geid bagu fedif.

⁶ Negur wau ifenēya ada ifanadan kilei, ada Negur nē igirīya ege luwa fire fire ado. Tamo ĩ profet od wogōya nē igirīya ege luwa adouf,

utornēg len, ĩ yogon momoiya kilei wogō youf.

⁷ Ī aruna yaleya nē igirīya ege luwa adouf, utornēg len, ĩ aruna yalouf. Ī ifelnēya nē igirīya ege luwa adouf, utornēg len, ĩ ifelnēya kabī yalouf.

⁸ Ī wau yaleseya nē igirīya ege luwa adouf, utornēg len, ĩ taka nē wau yalesauf. Ī tunī lau fiya isennēya nē igirīya ege luwa adouf, utornēg len, ĩ wau sã ifenēdiyof. Ī uyu irouya nē igirīya ege luwa adouf, utornēg len, ĩ fō fiya sã uyu irouya kabī yalouf. Ī wau yūya ifelnēya nē igirīya ege luwa adouf, utornēg len, ĩ wau kulīya ado age fouf.

Wau Laa Fiya

⁹ Wau laa fiya are mala yaleya sã. Erēb sane anī seseg fen, erēb biya anī kafī weleg.

¹⁰ Ā abob bun tureĩ tar bagai nigin gen, wauĩ laa fiya bun wauĩ wenēgouf. Ā atun abob yana ketem ilun walesagauf.

¹¹ Ā to fō yei ken, kabī totol waleg. Āgenei uur nē totol bunem, Odug aruna walogouf.

¹² Wau iseya bun wauĩ kulī youf, morō bun megeir ufaragauf, toku kosē gouf.

¹³ Negur nē tamo kayau lau difef anidi wenēdigouf. Tamo urug waledigouf.

¹⁴ Idi ã darau difeneik anidi el fiya wenēdigouf, el fiya wenēdig fen, to usisnēdigouf.

¹⁵ Idi waud kulī yef geid kulī gouf, idi inā dalef geid inā walogouf.

¹⁶ Ā abob nigin wauĩ tekelei yenēf. Ā yeneĩ to walesagauf, anī ere, ã tenebur difaref geid nigal yūya nigin ago gouf. Ā aug nigin keleĩ biya ado to gouf.

¹⁷ Ā aib taka sane age yeik anī, aba sane to wiyēgouf. Tamo ganān meleid bun erēb madur age fiya nigin karī walagauf.

† 11:34: Asaia 40:13 ‡ 11:35: Job 41:11

18 Ā kisi feleyauf are, ganan geid wau inosiya bun ubodōgouf.

19 Neu oboiyau tar, ā aug mala solo to wenēdigouf, anī ere, Negur nē didi nigin modoū unogouf, ere nigin, Negur nē Itotoya bun eig ya ibodok, “Odug irok, mala solo ifenēya are neu. Ayam mala solo afenēf.”*

20 Age fiya ban, Negur nē Itotoya bun eig ya ibodok,

“Ogon kiwai naū fouf are, saaf wenē yāf,

ī naan ail fouf are, naan wenē yāf.

Anī agouf bun, ī yogon ereb sane age fen nigin mama sane falauf.”†

21 Ā sane anim to wal yeif, anī ere, āgem biya bunem sane anī wal gouf.

13

Gawaman Farumen Ibodōya

1 Tamo kayau ganan gawaman farumedin dibodōf, ere nigin, gawaman Negurem to inodin anī taka to ibodok. Gawaman gama dibodok are Negur yogo inodin.

2 Anī nigin, taka ī gawaman kiwai ifenek, ī ereb Negurem inon anī kiwai ifenek. Idi anī age difef, idi es fiya dogo bouweid bun dinouf.

3 Ere nigin, uyu irouya tamo, idi biya age difef anidi kumī to difiyēdidig, anī ere, idi sane age difef anidi kumī difiyēdidig. Uyu irouya ī ō to kumī ifonōf anī, ō oroyok de? Agouf are, ereb tobonunā biya anī ago wo di, ī ō yanā yalesauf.

4 Ere nigin, ī ogon biya fiya nigin Negur nē kabī tamo inenen. Anī ere, sane ago wouf, ō kumī wouf, ere nigin, ī dimig ege to irouf. Ī Negur nē kabī tamo, ī mala ifenēya tamo, idi sane age difef anidi bun Negur nē didi irou isif.

5 Anī nigin, ā gawaman farumen bagai ubodōgouf, are darau kumīya bunem dogol sã, Negur mala bun ada biya be sane es fiya nē kisi nigin agouf.

6 Anī nigin, ā takiseg unogedig, ere nigin, gawaman nē kabī tamo are Negur nē kabī tamo, idi dogo neid sain ganan gawaman kabī nigin difenēdig.

7 Ā ereb ganan ifenēya nigin yenek are wenēgouf, ā takis ifenēya nigin ouf, takis unogouf, ā safina yaleya nē takis ifenēya nigin ouf, safina yaleya nē takis unogouf, ā anini fiyēya nigin ouf, anini wiyēgouf, ā seli yabiya nigin ouf, seli wabigouf.

Abob Nigin Wauī Laaf, Naa Mogo Dodolef

8 Wareg taka to utorōge di, ibodōf, abob nigin wauī laa fiya nē wareg dogol ā atun ibodōf, ere nigin, taka ī ne tā nigin wau laa fef, ī lo dōf kisi felef.

9 Ītāfiya eig ye irok, “Seseirā to uno,” “Tamo to ukeis,” “Bē to ule,” “Taka nē safina to malā ile orouf,”* Ītāfiya eneidi ado ereb lo tunī ifaredif are, Ītāfiya tekelei eneim ganan irouf, “Ō ogo nigin waū laa fef gen, nē tā nigin ago waū laa fouf.”†

10 Wau laa fiya anim, ne tā bun sane to age fedig. Anī nigin, wau laa fiya are lo dōf kisi felef.

11 Anī nigin, sain enei nigin wedereī fokōf fen, enei ago gouf. Ā mulaī itorōya nē sain mogo isif, ere nigin, ada uruwa bun momoi taun bunem isi, gama ada neda kel gei fadaya nē sain anī melsak.

12 Bō are mogo sa kalau fenē, naa mogo wō you fenē. Anī nigin, ada gugum nē tobonunā tator, yerin gadi tafel fen, lalan nē tobonunā biya anī dō tafouf. Age tafe fen, ada, kusī nigin kusī nē naki total difonūdig gen, tobonunā biya anī, ada bun ibodōf nigin age tafouf.

13 Tamo kayau we feleyan lo difeid le di, tobonunā biya age difedig gen, ada tobonunā biya dō tafouf, bilāya ado naan yōya bun sã, noli tobonunā ado bouwa nē oroya nigin total sane

* 12:19: Diuteronomi 32:35 † 12:20: Proverb 25:21, 22 * 13:9: Eksodas 20:13-15, 17; Diuteronomi 5:17-19, 21 † 13:9: Levitikas 19:18

wau fāya bun sã, kusī ado kiyeī buneg sã.

¹⁴ Anī ere, Odug Jesus Kristus anī waleg, aug bun ufonūgouf, agog fen, bouwa nē oroya dō fiya nē kisi anī bun to ufaragauf.

14

Momoiya Felu Reya Ado Momoiya Totol

¹ Taka ī momoiya felu ref are waleg fen, yogon keleī ā geid tekelei sã nigin to monē wiyēgouf.

² Tamo taka in momoiya anim irō di, ī ereb ereb ganān yōya nigin age fedig, anī ere, tamo taka in momoiya felu reya, ī sako dogol yōdig.

³ Tamo ereb ereb ganān yōdig anim, ne tā sako dogol yōdig to kono fiyēf, age fe di, tamo ereb ereb ganān to yōdig anim, tamo ereb ereb ganān yōdig bou bun od to yūf, ere nigin, Negur ī yalen.

⁴ Ō ai anī taka nē kabī tamo es wof? Ī kubū be youf, ifar bēf, are yogon Odug bun ibodok. Anī nigin, ī ifarauf, ere nigin, Odug ī yogo, ī ifareya nigin age fiya kisi feleya.

⁵ Tamo taka ī, naa taka anī naa ganān wal fiya gen iledig. Tamo taka naa ganān are de kilei kilei iledig. Idi mugu mugu dogo neid kisi bun anī nigin waud ditenēf.

⁶ Taka ī naa taka anī odug gen ilef, Odug nigin ye fen, ī age fef. Age fiya gen, taka ī yaro muda yoko, Odug nigin ye fen, yoko, ere nigin, ī Negur de fiyek. Taka ī ereb ereb tunī yōya nigin itorok, ī Odug nigin ye fen, agef fen, Negur de fiyek.

⁷ Ere nigin, ada takam yogo nigin mata to ibodok, ada takam yogo nigin to laa fef.

⁸ Ada mata tabodok are, ada Odug nigin mata tabodok. Ada gare tauf are, ada Odug nigin gare tauf. Anī nigin, ada mata tabodok be, gare taufeg, ada Odug nē.

⁹ Gariya enei nigin, Kristus laaf fen, mata kel fã yen, are ī tamo gare

den ado tamo mata dibodok neid Odug ibodōf nigin age fen.

¹⁰ Age fiyauf are, ō ere nigin ogon turā es wiyek? Ō ere nigin ogon turā kono wiyek? Ada ganān Negur nē es fiya nē sia wagen tafarauf.

¹¹ Age fiya nigin, Negur nē Itotoya eig ya ibodok,

“Odug irok, aya momoi bagai mata abodok nigin,

iboreid ganān aya bun bobou difouf, baleid ganān kurō difeis, Negur yana dalesauf.”*

¹² Age fiya nigin, ada mugu mugu, ada dug nigin Negur kurō tafeis tarokenēf.

¹³ Anī nigin, ada abob es fiyēya tatorōf. Anī ban, ā tureī nē naab bun ereb naabura gudūf kenēya nē taka be, ye tūf kenēya nē taka to unogouf nigin lo walagauf.

¹⁴ Odug Jesus kisi fokō fel kana di, aya momoi bagai kisi afef, are saaf, Negur mala bun amuyē ado taka to ibodok. Anī ere, taka ī saaf taka amuyē ado youf are, ī yogo bun saaf anī amuyē ado.

¹⁵ Ereb ō woko anī bunem ogon turā ī wau morō wenēf are, ō waū laa fiya bunem to agof. Ereb ō woko anī bunem, turā Kristus ī nigin laa fen anī to daū wiyē.

¹⁶ Anī nigin, ereb ā biya gef anī, tamo kayau idi to sane douf nigin ago gouf.

¹⁷ Ere nigin, Negur nē tano are, saaf yōya ado naan yōya nē sã, anī ere, Awa Uur Fateul bun madur bagai, wau inosiya ado, kulīya nē.

¹⁸ Taka ī naab enei bunem Kristus aruna yalef, ī Negur wau kulīya ifenē di, tamo dile fen, biya douf.

¹⁹ Anī nigin, ada ereb maror inoya nigin ado abob yalesnēya nigin, kabī total talouf.

²⁰ Saaf bunem Negur nē kabī to daū gouf. Saaf ganān amuyē sã, anī ere, tamo ī saaf yōya bunem, ne tā, Negur nigin momoiya nē naab dōf mog ye isog yale di, kubū youf, are sanē.

* 14:11: Asaia 45:23

21 Õ, nē turā kubūya nigin yaro to wāf be, aai to wāf be, ereb takag to agouf, are biyauf.

22 Anī nigin, ereb ereb enei bun ogon momoiya naig be fe yenēf, are ò ogo ado Negur bun dogol ibodōf. Tamo ĩ, ereb ĩ momoi bagai kisi fen biya yef anī, age fef bun, ĩ yogo bou bun od to yuk are, Negur ĩ el fiyek.

23 Anī ere, tamo ĩ kisi toguf fen, saaf yoko, ĩ yogo bou bun od yuk, ere nigin, yogon saaf yōya are momoiya bunem sã. Ereb ereb ganan momoiya bunem isiya sã, are mosor.

15

1 Ada momoiya totol ado, idi momoiya totol sã neid morō faali tafouf. Ada dug wauda al foug nigin to age tafouf.

2 Ada mugu mugu, neda tã tar, idi neid biya fiya nigin ado idi yalesnēdiyof nigin, wau al fiya tafenēdiyof.

3 Ere nigin, Kristus ĩ yogog yogo wau al foug nigin to age fen, are Negur nē Itotoya eig ye irok kilei, “Idi ò kono diyon anidi neid kono fiya, aya bun isin.”*

4 Ereb ereb ganan kulu ditoton are, ada ifelnadauf nigin ditoton, are morō bun feseya sã ifareya bunem ado wau yaleseya Negur nē Itotoya ani ifanadaf anī bunem, ada wauda iseya adouf nigin age difen.

5 Negur, morō bun feseya sã ifareya ado wau yaleseya ifeneĩdig ĩ, ã Kristus Jesus dōg mog, ã atun wau tekelei nē uur ifeneĩf nigin aya orouf,

6 anī bun, wauĩ tekelei ado sigoreĩ tekelei bunem, ã Negur, neda Odug Jesus Kristus nē Tama fula fiya medeĩa wenēgouf.

7 Anī nigin, Negur yana fula fiya medeĩa bun iselauf nigin, Kristus ã yaleyen gen, ãg abob walogouf.

8 Aya ã arokeneik, Kristus ĩ, Juda neid kabĩ tamo wō yen, are Negur tubuda tar bun age afouf yen anī kilei bagai, Negur age foug anī, megeir fe ifelnēdiyof nigin ado,

9 haiden idi Negur nē wau yūya nigin, Negur fula fiya medeĩa difenēf nigin age fen, are Negur nē Itotoya bun ibodok kilei,

“Anī nigin, aya haiden atun ò yanã alesauf, aya ò yanã bun seg alouf.”†

10 Baban ĩ irok,

“O haiden ã, in tamo kayau geid wauĩ kulĩ ye.”‡

11 Baban,

“Haiden ã ganan, Odug yana waleseg!

Tamo kayau ã ganan, ĩ yana waleseg fen, seg waleg!”§

12 Baban, Asaia iron,

“Jesi nē warumutei bun bali mata fokū youf,

ĩ wō ye fen, teneub ganan nē mudur ibodōf,

haiden idi ĩ nigin waud isauf.”*

13 Wau iseya nē Negur, ã Negur momoi wiyēg mog, wau kulīya ado wau inosiya ganan, ã namein fi fele di, ise isokosauf, anī bunem, ã bun Awa Uur Fateul nē megeir bunem wauĩ iseya gogū foug nigin aya orouf.

Pol, Haiden Atun Kabĩ Tamon

14 Neu turau tar, aya yug momoi auf, ã aug tobonunã biya barikã, keleĩ barika ken, abob ifelnēya nigin kisi feleya bagai.

15 Anī ere, wau ifenēya Negur aya ifanan anī nigin, aya ã gariya tunĩ baban wedereĩ fokō youf nigin totol ado atokenein,

16 wau ifenēya anī bunem, aya haiden bun Kristus Jesus nē kabĩ tamo wō au fen, pris gen Negur nē biya od wogō auf, are haiden idi, Negur mala bun sesewi fiya biya, Awa Uur Fateulem fateuledin, wowã douf nigin age afef.

* 15:3: Sam 69:9 † 15:9: 2 Samuel 22:50; Sam 18:49 ‡ 15:10: Diuteronomi 32:43 § 15:11: Sam 117:1 * 15:12: Asaia 11:10

¹⁷ Anĩ nigin, aya Kristus Jesus bun, neu kabĩ Negur bun aledig nigin yanau alesef.

¹⁸ Aya ereb taka to wogõ au fen, ereb Kristus aya bunem age fen anĩ dogol wogõ auf, are aya ereb aya wogõ aun ado ereb aya age afen bunem, haiden idi uyu arou di, idi Negur sigor dõ difef anĩ, wogõ auf,

¹⁹ are aya Awa Uur nẽ megeir bunem, uris ado memelik nẽ megeir bun age afen. Anĩ nigin, aya Jerusalem anenem gariya ano fen, tokõ afel, Ilirikum provins ayo kele fen, Kristus nẽ biya od kisi feleya bagai yaor afen.

²⁰ Aya, idi Kristus keleĩ sã anidi bun, an biya od wogõ auf nigin, faimud kisi total aledig, are aya takam gariya inon anĩ bun, kabĩ to alouf nigin age afedig.

²¹ Are Negur nẽ Itotoya bun ibodok kilei,

“Idi ĩ nigin to karĩ den are dilouf, agef fen, idi to karĩ den are keleĩ youf.”†

²² Aya biya od modoũ age fediyen wogõya nigin sain musei aledig anim, aya ã gein isiya nigin sain musei naaburau gudũ fedig.

Pol Rom Taun Ki Ileya Nigin Kisi Fen

²³ Anĩ ere, gama aya kabĩ yaleya nigin, akor enei bun modoũ taka sa ken, aya yar musei ã gein isiya nigin kisi total aledig nigin,

²⁴ aya Spein alauf bun asi fen, ailiyeĩf nigin kisi afen. Aya ileya bunem ki ayei ken, aya ã geid sain naal uyu kũ ta tabod ken, ã neu delẽ nigin usennagauf nigin wau isef.

²⁵ Anĩ ere, gama aya Negur nẽ tamo kayau aruneid yaleya nigin Jerusalem elef.

²⁶ Ere nigin, Masedonia provins nẽ sios ado Akaia provins nẽ sios idi, Jerusalem oun Negur nẽ tamo kayau atun maleg anidi isennediya nigin waud al fen.

²⁷ Idi age fiya nigin waud al fen, momoi bagai idi, Juda idi bun wareg ado. Ere nigin, haiden idi, Juda idi neid uur nẽ el fiya dalen nigin, haiden idi Juda idi bun safina nẽ el fiya bunem wareg dũf.

²⁸ Anĩ nigin, aya kabĩ enei bure afel fen, idi isennẽya enei dalen anĩ ail fen, Spein ileya nigin asi fen, ki ayeĩf.

²⁹ Aya keleĩ, sain aya ã gein asiyouf bun, aya Kristus nẽ el fiya barikã ado asiyouf.

³⁰ Turau tar, neda Odug Jesus Kristus bunem ado Awa Uur nẽ wau laa fiya bunem, aya ã total bagai arokeneik, ã, neu kabĩ nẽ morõ bun, aya nigin Negur kosẽ wiyẽgouf bunem usennagauf.

³¹ Aya Judia teneub bun momoiya sã imedin tamal yalelna di, neu kabĩ Jerusalem oun Negur nẽ tamo kayau an anidim dirouwauf nigin kosẽ gouf,

³² ago ge di, aya Negur nẽ oroya bunem kulĩya ado ã gein asi fen, aya ã geid si tano fen, megeir alouf.

³³ Wau inosiya nẽ Negur ã ganen bun ibodõf. Momoi.

16

Pol Nẽ Aanya

¹ Aya nemã mainamã Foibe, Senkria taun nẽ sios neid kabĩ kayau biya ya anĩ, ã keleĩ youf nigin arokeneik.

² ã Negur nẽ tamo kayau ago wiyẽdigidig gen, ĩ Odug bun waleg fen, ĩ ã bun ereb lau fef anĩ usennẽgouf, ere nigin, ĩ tamo kayau musei isenneĩd fen, ayag isennan.

³ Kristus Jesus bun, neu kabĩ turau tar, Prisila Akwila ado, neu aanya wenẽdigouf.

⁴ Idi aya nigin laa uyu ditoron. Aya dogol sã, haiden neid sios ganen idi de difiyẽdif.

⁵ Sios idi neid fõ bun guru difedig anidig, neu aanya wenẽdigouf.

Neu oboiyou Epenetus, Asia provins bun Kristus nigin ĩ

† 15:21: Asaia 52:15

- ketem momoiya tamo wō yen anī, neu aanya wenēgouf.
- ⁶ Maria ā nigin kabī total yalen anī, neu aanya wenēgouf.
- ⁷ Neu sirag tar, Andronikus ado Junia* idi aya geid kalabus bun mabodon anidi, neu aanya wenēdigouf. Aposel atun idi ilun bagai difaref, aya momoiya sā mog, idi ketem Kristus nigin momoi den.
- ⁸ Ampliatus, Odug bun neu oboiyou, neu aanya wenēgouf.
- ⁹ Urbanus, Kristus bun neda kabī turada ado, neu oboiyou Stakis, neu aanya wenēdigouf.
- ¹⁰ Apeles ī nigin Kristus bun, tamo kayau biya difiyēdig anī, neu aanya wenēgouf. Idi Aristobulus nē ibor anidi, neu aanya wenēdigouf.
- ¹¹ Herodion, neu sirag, neu aanya wenēgouf. Idi Narsisus nē ibor Odug bun dibodok anidi, neu aanya wenēdigouf.
- ¹² Trifena ado Trifosa, kayau idi Odug bun kabī total daledig anidi, neu aanya wenēdigouf. Neu oboiyou Persis, kayau taka Odug bun kabī total yaledig anī, neu aanya wenēgouf.
- ¹³ Rufus Odug bun igirnen ado, yogon sina, īg aya neu naai, neu aanya wenēdigouf.
- ¹⁴ Asinkritus, Flegon, Hermes, Patrobas, Hermas ado, turada tar idi geid difaref anidi, neu aanya wenēdigouf.
- ¹⁵ Filologus, Julia, Nereus ī main ado, Olimpas ado, Negur nē tamo kayau ganan idi geid difaref anidi, neu aanya wenēdigouf.
- ¹⁶ Abob fateul bunem umā wiyēg fen, aan wiyēgouf. Kristus nē sios ganan ā bun aanya sur difef.
- ¹⁷ Turau tar, idi, ā Negur nigin keleī walegen anī, ditor ken, ā fara diyei ken, naabureī gudū difedig anidi lo walagauf nigin, aya ā total bagai arokeneik. Idi sese wedigouf.
- ¹⁸ Ere nigin, tamo age fediya are, neda Odug Kristus aruna to daledig, anī ere, idi dogo neid oroya aruna daledig. Od dan biya ado mala yaleyā nē od bunem, idi tamo kisi sā gen anidi didegnēdidig.
- ¹⁹ Tamo ganan āgenei Negur nē od dō fiya biya anī karī den, anī nigin, aya ā nigin wau fatuk bagai kulī yef, anī ere, aya ā ereb biya nigin kisi biya waleg fen, sane nigin soso gouf anī orouf.
- ²⁰ Wau inosiya nē Negur, mogo melsā Satan ā yeī farumen orok fouf. Neda Odug Jesus nē wau ifenēya ā bun ibodōf.
- ²¹ Timoti, neu kabī turau, yogon aanya ā bun sur fef. Neu sirag tar, Lusius, Jeson ado, Sosipater idig age difef.
- ²² Aya, Tertiussem pas enei atotof, Odug bun neu aanya ā bun sur afef.
- ²³ Gaius ī, aya ado ein sios ganan isennēdidig, yogon aanya ā bun sur fef. Erastus ī taun nē moni lo fiya tamo ado, neda turada Kwartus, idi neid aanya ā bun sur difef.†
- ²⁵ Negur ī, neu biya od ado Jesus nigin wogōya anī bunem, ā yalesneīya kisi feleya. Biya od nē waa kulu bagai iminēyan ibodon,
- ²⁶ anī ere, Negur mata ibodkeleya anī, profet irokenēdi di, ditoton anī bun, kurō falaisi gama yaoren, are teneub ganan ī nigin momoi de fen, dō difouf nigin age fen.
- ²⁷ Negur ī yogo dogol kisi biya barikā, Kristus Jesus bunem fula fiya medeīya faimud ī bun ibodkalauf! Momoi.

* **16:7:** Yana enī kayau nē yana. Itotoya tunī dum ditoton, are Junias den. Junias are tamo nē yana.

† **16:23:** Itotoya tunī eig de ditoton: *sur difef.* ²⁴ *Ada neda Odug Jesus Kristus nē wau ifenēya, ā ganan bun ibodōf. Momoi.*

1 Korin

¹ Aya Pol, Negur nē oroyam Kristus Jesus nē aposel wō auf nigin iweignan, neda turada Sostenes ado,

² Korin oun Negur nē sios ā bun, pas enei matotkeneik. Ā Kristus Jesus bun fateulei fen, fateul ubodōgouf nigin iweignein, are tamo kayau ganan fire firen difar fen, neda Odug Jesus Kristus, idi neid Odug ado neda Odug ĩ yana dalesedig anidi geid weim iweignein.

³ Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

Pol Negur De Fiye

⁴ Aya wededem ā nigin Negur de afiyēdig, ere nigin, yogon wau ifenēya Kristus Jesus bun ā ifenein.

⁵ Ere nigin, Jesus bunem ereb ereb ganan bun, ā kisi feleya ifenein, are āgenei wogō ganan ado keleĩ ganan bun,

⁶ ere nigin, Kristus nigin neda wogōya, ā bun megeir ifaren.

⁷ Anĩ nigin, ā neda Odug Jesus Kristus yaorouf nigin wauĩ fatuk unog fen, tarig mog, ā Awa Uur nē ege luwa taka to lau gef.

⁸ Jesus ā total irouyeik ile, idikeleya bun ilauf, anĩ bunem, neda Odug Jesus Kristus isiyouf nē naa bun, ā bouweĩ od sãf.

⁹ Negur ĩ, yogon Naal Jesus Kristus, neda Odug geid, ā nigal gouf nigin iweignein, ĩ ereb yef, de age fouf bagai.

Sios Atun Fara Fiya

¹⁰ Turau tar, aya neda Odug Jesus Kristus yana bunem total bagai arokeneik, are ā atun fara fiya taka to ibodōf nigin, ā ganan abob nigin wauĩ tekelei yen ken, ā wauĩ ado kisi tekelei bagai ubodōgouf.

¹¹ Neu turau tar, tunĩ Kloe nē ibor bun tamal dirokanan, are ā atun luwa irouya ibodok.

¹² Aya enei wogō auf, are eig fiya, ā atun takam irok, “Aya Pol dō afef,” takam irok, “Aya Apolos dō afef,” takam irok, “Aya Pita dō afef,” takag irok, “Aya Kristus dō afef.”

¹³ Kristus ĩ fara furu fen de? Aya Pol ĩ, ā nigin aa tetek bun dun de? Ā aya Pol yanau bunem naan digunein de?

¹⁴ Aya Negur de afiyek, are aya ā taka to naan agunen, Krispus ado Gaius dogol naan agunēdin.

¹⁵ Anĩ nigin, taka nem to irōf, “Aya Pol yana nem naan agun.”

¹⁶ (Momoĩ, aya Stefanas nē ibor tareg naan agunēdin, anĩ teten, takag naan agunen be anĩ, to kisi afef.)

¹⁷ Ere nigin, Kristus ĩ aya naan agunēdiyof nigin to sur fiyan, anĩ ere, biya od wogō auf nigin sur fiyan, are Kristus nē aa tetek nē megeir to yalelauf nigin, tamo nē kisi biya wogōya anĩ bunem sã.

Kristus ĩ, Negur Nē Kisi Biya Ado Megeir

¹⁸ Jesus aa tetek bun laa fen ya od anĩ, idi inanakelediyof anidi bun are neneya, anĩ ere, ada isennadaf bun, od are Negur nē megeir.

¹⁹ Ere nigin, Negur nē Itotoya bun eig ye irok:

“Aya tamo kisi biya adodo neid kisi biya daũ afalauf,
aya tamo keleĩ odug adodo neid keleĩ alelauf.”*

²⁰ Tamo kisi biya adodo nain? Tamo keleĩ odug adodo nain? Sain enei nē keleĩ yaleya nigin luwa irouya tamo nain? Negur ĩ tenebur enei nē kisi biya anĩ to neneya inon de?

²¹ Negur nē kisi biya bunem, tenebur tamo dogo neid kisi biya anim, Negur nigin to kelein, anĩ nigin, neneya od dedig anĩ wogō taudig bunem, idi momoi def anidi isennēdiya nigin, Negur wau al fen.

²² Juda idi memelik nē uris dilouf nigin dirōdig, Grik idi kisi biya anĩ dimirēdig.

* 1:19: Asaia 29:14

²³ Anĩ ere, ada Kristus aa tetek bun dun anĩ wogõ taudig, od anĩ Juda idi bun, ye tũ fiya od, haiden idi bun, are neneya od,

²⁴ anĩ ere, idi Juda ado Grik Negurem iweignēdin anidi bun, Kristus ĩ Negur nē megeir, Negur nē kisi biya.

²⁵ Ere nigin, Negur nē neneya kisi are, tamo nē kisi biya wal fiya, Negur nē folo reya are, tamo nē megeir wal fiya.

²⁶ Turau tar, ā naig be fiya ufareg mog, ā iweignein anĩ kisi gouf. Ā musei sam, tamo nē keleĩ bunem, kisi biya ado wowā gen. Musei sam totol ado wowā gen. Musei sam yeneĩ ado wowā gen.

²⁷ Anĩ ere, Negur kisi biya adodo mama ifenēdiyof nigin, tenebur enei nē neneya igirnēdin. Negur ĩ megeir adodo mama ifenēdiyof nigin, tenebur enei nē folo reya igirnēdin.

²⁸ Negur ĩ tenebur enei nē yeneid sāsā, meleid irim lai difedig ado, ereb taka sã dedig anĩ igirnēdin, are ereb ado dedig anĩ, yana sa kalauf nigin age fen,

²⁹ anĩ bunem, Negur mala bun, taka nem yogo yana to yalesauf.

³⁰ Negur nigin ā Kristus Jesus bun ubodōgef, Jesus ĩ ada nigin Negur bunem kisi biya wõ yen, are ada ĩ bunem madur bagai, fateul wowā tau fen, isennēya talen.

³¹ Anĩ nigin, Negur nē Itotoya bun eig ye irok, “Tamo ĩ yogo yana yalesef are, Odug ereb age fen anĩ nigin yana yalesauf.”†

2

¹ Turau tar, aya ā gein asi fen, Negur yaor afouf nigin wogõ ayein sain bun, aya od biya odug nem be, kisi biya odug nem to wogõ aun.

² Ere nigin, aya ā geid tabodon sain, aya ereb ereb ganan wederou tu kel fen, Jesus Kristus ado, ĩ aa tetek

bun laa fen anĩ dogol kisi afouf nigin kisi afokelen.

³ Sain aya ā gein asin, aya totolou sã, fatuk bagai kumĩ tererē aun.

⁴ Neu od ado neu wogõya, are kisi biya nē, wauĩ faleiya nē od bunem sã, Awa Uur nē megeir nē ifelnēya bunem,

⁵ are āgenei momoiya, tamo nē kisi biya bun to ibodõf, Negur nē megeir bun ibodõf nigin age afen.

Awa Uur Nē Kisi Biya

⁶ Ada kisi biya nē od atīya anidi atun wogõ taudig, anĩ ere, kisi biya anĩ, are sain enei nē sã, sain enei nē uyu irouya, fau inanakelediyof anidi neid sã.

⁷ Anĩ ere, ada, Negur nē waa kisi biya anĩ, wogõ taudig, are iminēyan ibodok, teneub kare fiya sã mog Negur neda fula fiya medeīya nigin mogo igirin anĩ.

⁸ Sain enei nē uyu irouya takam, kisi biya anĩ to kelein. Idi kisi biya anĩ keleim are, idi fula fiya medeīya nē Odug aa tetek bun to dum.

⁹ Anĩ ere, Negur nē Itotoya eig ye irok kilei:

“Negur nigin waud laa fedig idi nigin
Negur dodok fen anĩ,
malam taka to ilen,
weder takam to karĩ yen,
kisi takam to fokõ yen.”*

¹⁰ Anĩ ere, Negur yogon Awa Uurem ada bun anĩ yaor fen.

Awa Uur ĩ ereb ereb ganan fai yeledig, Negur nē ereb ereb ilon bargaig fai yeledig.

¹¹ Tamo atun aim, tamo taka nē kisi keleĩ? Are tamo anĩ nē uurem dogol keleĩ. Age fiya bagai, tamo takam Negur nē kisi keleĩ sã, Negur nē Awa Uurem dogol keleĩ.

¹² Ada teneub enei nē uur to talen, anĩ ere, ada Awa Uur Negur bun tamal talen, are ereb Negur wau sã ifanadan anĩ, ada keleĩ youf nigin age tafen.

¹³ Ada enei anĩ wogõ taudig, are tamo nē kisi biya bunem od difel-nadan anĩ bunem sã, are od Awa

† 1:31: Jeremaia 9:24 * 2:9: Asaia 64:4

Uurem ifelnadan anī bunem. Ada Awa Uur nē od bunem Awa Uur nē kisi wogō taudig.

¹⁴ Tamo Awa Uur sã ĩ, Negur nē Awa Uur bun tamal ereb isif anī to yale iroudig, ere nigin, yogon kariya bun, are neneya. ĩ anī keleĩa nigin kisi feleya sã, ere nigin, are Awa Uur adodom dogol es difedig.

¹⁵ Awa Uur ado tamo ĩ, ereb ereb ganan nigin es fedidig, anī ere, ĩ yogo taka nem to es fiyēf.

¹⁶ Negur nē Itotoya eig ye irok: “Aim Odug nē kisi kelei ken, ĩ fated fiyēf?”†
Anī ere, ada Kristus nē kisi ado.

3

Sios Bun Fara Fiya

¹ Turau tar, aya ã momoiya nigin atīya gen to ayein, ã teneub enei nē dogol, ã Kristus bun momou gen ayein.

² Aya su afenein, saaf total anī to afenein, ere nigin, ã anī nigin to saika gen. Momoi, ã gamag fau to saika gef.

³ Æ fau teneub enei nē dogol ubodōgef. Æ atun, kiyeĩ ado luwa irouya ibodok, anī nigin, ã fau teneub enei nē sã de? Æ teneub enei nē tamo gen to ago gef de?

⁴ Takam irok, “Aya Pol dō afef,” takam irok, “Aya Apolos dō afef,” ago gouf are, ã teneub enei nē tamo sã de?

⁵ Agef ilauf are, Apolos ĩ ai? Pol ĩ ai? Amã Negur nē kabī tamo dogol, amã bunem ã momoi gen, are Odugem kabī morou morou ifanaman kilei.

⁶ Ayam faat atenē di, Apolosem naan fen, anī ere, Negurem odugouf nigin age fen.

⁷ Anī nigin, faat itenēya tamo ado naan fiya tamo are ege, anī ere, Negur ĩ yogo dogol odug, ere nigin, ĩ ereb odugouf nigin age fedig.

⁸ Faat itenēya tamo ado naan fiya tamo, idi kariya tekelei ado. Negur

idi mugu mugu kabī dalen kilei, mala solo ifenēdiyof.

⁹ Ere nigin, amã Negur nē kabī tura tar, ã Negur nē kabī akor, Negur nē fō.

¹⁰ Negur ĩ aya wau ifenēya ifanan anī bunem, aya fō inoya keleĩ biya tamo gen, fō inoya nigin gariya anon, age afe di, taka nem anī teten fō inof. Anī ere, tamo mugu mugu el de, lo de fen, fō dinouf nigin lo difalauf.

¹¹ Ere nigin, fō gariya inon, are Jesus Kristus, taka nem fō gariya fire inoya kisi feleya sã.

¹² Tamo takam fō gariya enei teten, gol, silwa, meein moni odug, aa, yeye be, wit turu nem fō inouf are,

¹³ yogon kabī naig be fiya are yaorouf, ere nigin, Kristus nē naa bun, anī lalan bun irousi inouf. Are yã ado wō ye di, yã anim tamo mugu mugu nē kabī nē kaũ es fouf.

¹⁴ ĩ ereb inon anī ifarlauf are, ĩ yogon mala solo yalouf.

¹⁵ ĩ ereb inon anī isaikalauf are, ĩ agogon youf. ĩ yogo Negurem kel yalouf, anī ere, ĩ yã malan tamal ulō yesiya tamo gen ibodōf.

¹⁶ Æ aug are Negur nē tempel, Negur nē Awa Uur ã namein ibodōdig anī, ã to keleĩ de?

¹⁷ Taka ĩ Negur nē tempel daũ fouf are, Negur ĩ tamo anī daũf irailauf, ere nigin, Negur nē tempel are fa-teul, are ã tempel anī.

¹⁸ Æ aug to udegnēgouf. Ægenei taka ĩ, gama sain enei nē keleĩ bunem, aya kisi biya ado yef are, ĩ neneya wō youf bagai, are ĩ kisi biya ado wō youf nigin age fouf.

¹⁹ Ere nigin, Negur mala bun, teneub enei nē kisi biya are neneya. Negur nē Itotoya eig ye irok kilei, “Negur ĩ, kisi biya adodo tamo dogo neid keleĩ anim kor bun dilelel mog, gei fedidig,”*

²⁰ Negur nē Itotoya takag irok, “Odug ĩ keleĩ, kisi biya adodo tamo neid kisi, are ege.”†

† 2:16: Asaia 40:13 * 3:19: Job 5:13 † 3:20: Sam 94:11

²¹ Anĩ nigin, tamo yeneid to wale-sagauf! Ere nigin, ereb ereb ganan are āgenei,

²² Pol, Apolos, Pita, teneub enei, mata ibodōya, laa, gama be, dumen, ereb ereb ganan, are āgenei,

²³ ā Kristus nē, Kristus ĩ Negur nē.

4

Kristus Nē Aposel Tar

¹ Anĩ nigin, tamo idi, amā nigin, idi Kristus nē kabĩ tamo tar, Negur nē waa lo fiya nigin idi imeid bun inon de fen, kisi difouf.

² Tamo idi ereb lo difouf nigin imeid bun inon anidi, dogo neid marau sigor dō difef dile, age difouf anĩ, marau orof.

³ Ā aya es wiyagef be, tamo nē kot bun es difiyaf, are aya to sii fiyaf. Momoi, aya yug nigineg to es afedig.

⁴ Neu kisi are karētut, anĩ ere, anim aya mosor sã to auf. Odug im aya es fiyaf.

⁵ Anĩ nigin, es fiya nē sain fau wōya sã mog, to es gouf. Tari gef uleg, Odug isiyouf bun. ĩ ereb gugum bun iminek anĩ lalan bun irou isi fen, tamo neid waud bun kisi ibodok anĩ yaor fouf. Sain anĩ bun, idi mugu mugu Negur bun yana odug dalouf.

⁶ Turau tar, gama aya, āgenei biya fiya nigin, ereb enei arokenein, aya yug ado Apolos bunem, afelnein, anĩ bunem, ā wogōya eig fiya nē gariya, are amā bun keleĩ walogouf, “Itotoya bun yenek anĩ to ufodulagauf.” Ā anĩ keleĩ youf are, ā tamo taka anĩ yana waleseg fen, taka to lai gouf.

⁷ Ere nigin, aim õ, taka wal fiya inenok? Õ mogo ado, ere anĩ õ to walen? Õ mogo anĩ walen ouf are, ere nigin õ anĩ to walen gen, ogo yanã walesef?

⁸ Ereb ā oroyeik ganan ā mogo ado. Ā mogo safina kisi feleya bagai ubodōgef. Ā mogo king wowã gen, are amā geid sã. Amā ā geid king wowã tauf nigin, ā momoi bagai king wowã gem anĩ, aya orouf bagai.

⁹ Ere nigin, aya kisi afef, Negur ĩ amā aposel, tamo yukesiya nigin dinenēdig gen, tamo dilouf nigin, gĩ bun idikeleyan bagai inenaman. Saa teneub ado, are tamo ado engel meleid bun, amā fele difamãf nigin inoman.

¹⁰ Amā Kristus nigin neneya mabodok, anĩ ere, ā Kristus bun kisi biya bagai ubodōgef. Amā total sã mabodok, anĩ ere, ā total ubodōgef. Ā yeneĩ dalesedig, amā yanamã to dalesedig.

¹¹ Kulu nem isi gama sain enei bun, amā naũ ado naan ail mayok, amā gabar masasak mafilaik, amā darau difanamak, amā fõ sã.

¹² Amā mug imamam kabĩ total maledig. Sain amā disisnamak are, amā el fiya mafenēdidig. Amā darau difanamak are, darau anĩ faali mafedig.

¹³ Bouwamã bun od duk sain, amā molol nem od solo mafedig. Mabodok masi gama sain enei bun, amā teneub enei nē ido gen ado, ereb ereb ganan nē moto gen wõ maun.

¹⁴ Aya ā mama ifeneĩya nigin enei to atotof, anĩ ere, ā neu kesu tar oboiyou gen wedereĩ arouf nigin age afef.

¹⁵ Ere nigin, Kristus bun, ā ten tausen kulat tamo ado, anĩ ere, ā temeĩ musei sã, are aya Kristus Jesus bun biya od bunem temeĩ wõ aun.

¹⁶ Anĩ nigin, aya ā madē wiyagauf nigin total bagai arokeneik.

¹⁷ Gariya enei nigin, aya neu kesu Timoti, ĩ Odug bun aya oboiyou ado dō fiya biya, ā gein sur afef. Im Kristus Jesus bun, neu mata ibodōya nē suma anĩ, ā wedereĩ fokõ fouf, are aya modoũ ganan sios ganan bun afelnēdidig age fiya bagai.

¹⁸ Ā tunĩ, Pol ĩ amā garan to isiyouf ge fen, ā aug yeneĩ walesegen.

¹⁹ Anĩ ere, Odug orouf are, aya kaisã bagai ā gein asiyouf, age afe fen, aya dogo yeneid yaleseya tamo eneidi naig de wogõ def anĩ sã, anĩ ere, ereb megeir idi ado anĩ fele afouf.

²⁰ Ere nigin, Negur nē tano are ege wogōya nē sã, are megeir nē.

²¹ Ere anī ã oroyeik? Aya wagagã yeīya nigin tibog ado ã gein asiyouf de, wau laa fiya ado molol bunem asiyouf?

5

Tureĩ Noli Tobonunã Ado Walelnēgouf!

¹ ã atun, noli tobonunã age fiya, are haiden atuneg to wō yedig anī, ibodok yeya karī aun. Tamo taka ī tama nē kayau we fedig.

² Age fe di, ã aug selī wabigedig! Age fiya ban, ã wauī gudūf fen, tamo tobonunã enei inof anī, āgenei uyu kũ fiya bun walelnēgouf, are deuf.

³ Aya bouwau ã geid to ibodok, anī ere, uur bun are, aya ã geid tabodok. Aya ã geid ibodōya gen, tamo enei age fen, are ī mogo es afiyen.

⁴ ã neda Odug Jesus yana bunem guru gouf bun, aya uur bun ã geid tabodōf, are neda Odug Jesus nē megeir ibodōf sain bun,

⁵ tamo enei Satan ima bun unenēg, anī bunem, mosor nē bouwa daūf iraile fen, Odug nē naa bun yogon uur isennēya yalouf.

⁶ ã yeneī yaleseya are to biya. Yis naal bagai flawa obu namen kabī yaledig anī, ã to keleī de?

⁷ ã flawa mata yis sã gen wō gouf nigin, yis tubu anī waleleg, are ã anī flawa mata yis sã. Ere nigin, Kristus, neda Pasa naa nē sipsip naal, sesewi difiyen.

⁸ Anī nigin, ada Pasa Sifa naa anī tarouwauf, are yis tubu, sesen ado to biya nē yis bunem sã, anī ere, bret yis sã, karētut ado momoi nē bret bunem age tafouf.

⁹ Aya ã noli tobonunã dinodig tamo kayau geid to nigal gouf nigin, neu pas mogo atokenein,

¹⁰ anī ere, aya teneub enei nē tamo kayau geid to nigal gouf nigin to orok, are idi noli tobonunã, ereb

ereb nigin akorouya, idegēya bunem taka nē safina bē yaleya be, idegēya waitou yana yaleseya age difedig. ã idi geid to nigal gouf are, ã teneub enei utorōgouf.

¹¹ Anī ere, gama aya ã bun atotof are, ã taka ī yogo nigin tura ye fen, noli tobonunã, ereb ereb nigin akorouya, idegēya waitou yana yaleseya, bou yūya od wogōya, naan yōya be, idegēya bunem taka nē safina bē yaleya age fedig, ī weim to nigal gouf. Tamo age fiya ado weim saafeg to wāgauf.

¹² Ere nigin aya idi sios mayarē difaref anī es afediyouf? Are, idi sios namen difaref anī ã to es wiyēdigef de?

¹³ Negur idi sios mayarē difaref anī es fediyouf. Are Negur nē Itotoya bun eig ye irok kilei, “ã atun tamo sane anī walelnēgouf.”*

6

Momoiya Tamo Kayau Atun Kot Fiya

¹ ãgenei takam, taka ado fefuya yenēf are, ere nigin ī Negur nē tamo kayau wagedin irouleya ban, ī idi momoiya sã anidi bun, mama sã gen es fiya nigin irouledig?

² Are Negur nē tamo kayau teneub enei es difouf anī, ã to keleī de? ã teneub enei es gouf are, ã morō naal bagai es fiya nigin kisi feleya sã de?

³ Are amã engel es mafediyouf anī, ã to keleī de? Age fouf are, mata ibodōya enei nē morō es fiya nigin naig fiyauf?

⁴ Anī nigin, ã teneub enei nē morō age fediya nigin fefuya adouf are, ã haiden idi, sios bun tamo yeneid sã anidi, es fiya tamo nigin ugirnēdigef de?

⁵ Aya ã mama yeīf nigin od enei orok. Are ã atun, momoiya tamo kayau fefuya idi atun ibodok anī, es fiya nigin kisi biya ado tamo taka sã de?

* 5:13: Diuteronomi 17:7; 19:19; 21:21; 22:21, 24; 24:7

⁶ Anĩ ere, momoiya tamo takam tura taka kiwai ifen ken, kot bun iledig, are enei momoiya sã anidi wagedin irouledig.

⁷ Momoi bagai, ã atun abob nigin kot bun fefuya ibodok anim, ã mogo kuku gen anĩ yaoref. Ere nigin ã idi to utornēdige di, sane diyeĩf? Ere nigin ã idi to utornēdige di, didegneĩf?

⁸ Age fiya ban, ã aug udegēg fen, sane ago gedig, are ã tureĩ tar bun enei ago gedig.

⁹ Tamo tobonunã sesen idi, Negur nē tano to akorouf anĩ, ã to keleĩ de? Are ã idi to utornēdige di, didegneĩf. Idi noli tobonunã dinodig, idi idegēya waitou yana dalesedig, idi seseirã tobonunã dinodig, tamo idi bouweid na nē sur difedig, tamo tutur, kayau tutur noli tobonunã dinodig,

¹⁰ idi bē daledig, idi ereb ereb safina nigin akorou dedig, idi naan dōdig, idi bou yūya od wogō dedig, idi idegēya bunem taka nē safina daledig anidi ganan, Negur nē tano to akorouf.

¹¹ Are ã tunĩ age fiya anĩ ago gedig. Anĩ ere, ã mosor bun tamal kulo yein, are ã fateul inenein, are ã, Odug Jesus Kristus yana bun ado neda Negur nē Awa Uur bunem, Negur mala bun madur bagai wowã gen.

Noli Tobonunã

¹² Taka irōf, “Aya ereb ereb ganan nigin sã age afeid kisi feleya.” Are de momoi, anĩ ere, ereb ereb ganan to isennadauf. Aya ereb ereb ganan nigin sã age afeid kisi feleya, anĩ ere, aya ereb takam to irouna di, ferfer abodōf.

¹³ Taka irōf, “Saaf are te guroub nē, te guroub are saaf nē.” Anĩ ere, Negur anĩ ganan daũ falauf. Bouwa are noli tobonunã nē sã, anĩ ere, Odug nē, are Odug ĩ bouwa anĩ nē.

¹⁴ Are, Negur yogon megeir bunem Odug laa bun tamal yalesnen, are adag ĩ yalesnadauf.

¹⁵ Æ bouweĩ are, Kristus yogo bouwa nē tunĩ anĩ ã to keleĩ de? Age fiyauf are, aya Kristus bouwa nē tunĩ ale fen, kayau bouwa na sur fedig ado bagu afouf de? Sã bagai!

¹⁶ Tamo ĩ yogo, kayau taka bouwa na nē sur fedig ado bagu difouf are, ĩ kayau anĩ ado bouwa tekelei youf anĩ, ã to keleĩ de? Ere nigin, Negur nē Itotoya bun eig ye irok, “Idi urom bouweid tekelei youf.”*

¹⁷ Anĩ ere, taka ĩ yogo Odug ado bagu difouf are, ĩ uur bun Odug ado tekelei youf.

¹⁸ Noli tobonunã bun tamal uya-gauf. Mosor tunĩ ganan tamo taka inof, are ĩ yogo bouwa serē inof, anĩ ere, taka ĩ yogon bouwam noli mosor inof, are ĩ yogo bouwa bun mosor inof.

¹⁹ Æ bouweĩ are Awa Uur Fateul nē tempel, Awa Uur Fateul are ã namein ibodok anĩ Negur bun tamal walegen are, ã to keleĩ de? Æ aug, āgenei sã,

²⁰ ere nigin, ã mala odugem na yaleyeyin. Anĩ nigin, bouweĩ anim Negur yana walesaugauf.

7

Tamo Kayau Ado Bagu Fiya Nigin

¹ Gama od anĩ ã utotogen nigin arokeneik, tamo ĩ kayau to yalouf, are deuf.

² Anĩ ere, noli tobonunã musei bagai ibodok nigin, are tamo mugu mugu ĩ yogon kayau adouf, are kayau mugu mugu ĩ yogon tamo adouf.

³ Tamo ĩ yogon bouwa nigin, yogon kayau to katũ fiyēf, age fiya gen, kayau ĩg yogon bouwa nigin yogon tamo to katũ fiyēf.

⁴ Kayau ĩ yogon bouwa nē mudur to ibodōf, are yogon tamo nē, age fiya gen, tamo ĩ yogon bouwa nē mudur to ibodōf, are yogon kayau nē.

⁵ Æ abob nigin bouweĩ to katũ gouf, anĩ ere, ã kosē gouf nigin, sain naal bagai yo ge fen, bouweĩ katũ gouf,

* 6:16: [Jenesis 2:24](#)

are kisi falauf. Agog fen, ã bouweĩ kulatun fiya anĩ, malai nigin, are Satanem to kisi yeĩf nigin, baban ã bouweĩ bagu gouf.

⁶ Aya od enei karĩ gouf nigin orok, are itãfiya sã.

⁷ Tamo ganan aya gen dibodok, are aya orouf. Anĩ ere, tamo mugu mugu idi, Negur bun dogo neid ege luwa dalef, taka ege luwa enei, taka ege luwa anĩ.

⁸ Anĩ ere, aya kayau tamo yaleya sã, tamo kayau yaleya sã ado, waab arokenẽdif, are idi aya gen age de dibodok dilauf, are deuf.

⁹ Anĩ ere, idi dogo bouweid nigin kulatun fiya kisi feleya sãf are, tamo idi kayau dalouf, kayau idi tamo dalouf, ere nigin, noli kisi waud bun yã gen bobo reya anĩ ban, tamo idi kayau yaleya, kayau idi tamo yaleya are deuf.

¹⁰ Tamo idi kayau adodo, kayau idi tamo adodo bun, aya od enei arokenẽdif, are ayam sã, Odugem. Are kayau ã ne tamo to itornẽf.

¹¹ Anĩ ere, kayau ã tamo itornẽf are, ã tamo taka to yalouf be, are ã yogon tamo ado komo difouf. Are tamo ã yogon kayau to iru irailauf.

¹² ã tunĩ ganan bun, aya od enei arokenẽdif, are ayam, Odugem sã. Tura taka ã kayau ado, are kayau ã momoiya sã, anĩ ere, ã tamo ado ibodõya nigin oro fouf are, tamo ã kayau anĩ to iru irailauf.

¹³ Kayau taka ã tamo ado, are tamo ã momoiya sã, anĩ ere, ã kayau ado ibodõya nigin oro fouf are, kayau ã tamo anĩ to iru irailauf.

¹⁴ Ere nigin, tamo momoiya sã ã, yogon kayau bunem fateulen, are kayau momoiya sã ã, yogon momoiya tamo bunem fateulen. Age fiya sãf are, ã gereĩ tar idi karẽtut to dibodõf. Anĩ ere, idi gama fateul dibodok.

¹⁵ Anĩ ere, taka ã momoiya sã, iyawau fenẽ nigin oro fouf are, utornẽge di, age fouf. Suma age fiya bun, momoiya tamo be kayau, ereb taka anim to katĩ fiyek. Are Negur

ã ada wau inosiya bun tabodõf nigin iweignadan.

¹⁶ Kayau õ, nẽ tamo usennẽf be sã be anĩ, naig fe di, õ keleĩ youf? Tamo õ, nẽ kayau usennẽf be sã be anĩ, naig fe di, õ keleĩ youf?

¹⁷ Odug ada mugu mugu igirnadan kilei ado, Negur ada mugu mugu iweignadan kilei bagai, age tag, mata tabodõgouf. Are, aya sios ganan bun nun enei anof.

¹⁸ Sain Negur ã tamo taka iweignen, tamo ã mogo mulũ ilen de? Are tamo ã mulũ ileya sã to ilauf. Sain Negur ã tamo taka iweignen, tamo ã mulũ ileya sã de? Are tamo ã to mulũ ilauf.

¹⁹ Mulũ ileya are ege, mulũ ileya sã areg ege. Anĩ ere, Negur nẽ itãfiya dõ fiya anĩ odug bagai.

²⁰ Tamo mugu mugu ã Negur iweignen sain bun, ã ibodon suma anĩ bun, agef ibodõf.

²¹ Sain Negur ã iweignon, õ ferfer ubodon de? Õ anĩ nigin to morõ yõf, anĩ ere, õ ferfer itorõya nigin kisi falauf are, anĩ õ agouf.

²² Ere nigin, taka ã, Odugem iweignen sain bun, ferfer ibodon, ã Odug nẽ karika tamo ibodok, age fiya gen, taka ã iweignen sain bun, karika tamo ibodon, ã Kristus nẽ ferfer ibodok.

²³ ã mala odugem na yaleyein. ã tamo neid ferfer to wowã gouf.

²⁴ Turau tar, tamo mugu mugu ã Negur iweignen sain bun ibodon suma anĩ bun, agef Negur ado dibodõf.

²⁵ Kayau taulei nigin, aya Odug bun tamal itãfiya taka to alen. Anĩ ere, aya, taka ã Odug nẽ wau yũya bunem momoi bagai tamo wõ yen anĩ, aya neu kisi afeneik.

²⁶ Gama enei nẽ morõ odug nigin, aya kisi afef, are tamo ã gama ibodok gen, agef ibodõf, are deuf.

²⁷ Õ kayau ado de? Age fiyauf are, õ kayau iru iraileya nigin naab to umirẽf. Õ kayau to walen de? Age

fiyauf are, ò kayau taka yaleya nigin to umirēf.

²⁸ Anī ere, ò kayau walef are, ò mosor to unof. Kayau taulei taka tamo yalef are, ī mosor to inof. Anī ere, tamo kayau dalef, kayau tamo dalef, idi mata ibodōya enei bun morō musei dalouf, are aya morō enei ā bun to wō youf anī orouf.

²⁹ Turau tar, aya od enei aro-keneik, are sain mogo tobegaf, anī nigin, gama sain enei ilef bun, idi kayau ado, idi kayau sā gen dibodōf;

³⁰ idi maruid isif, idi to maruid isif gen dibodōf; idi waud al difef, idi waud to al difef gen dibodōf; idi ereb taka na dalef, idi ereb taka sā gen dibodōf;

³¹ idi teneub enei nē safina diroudif, are idi waud adok anī bun to dinouf. Ere nigin, teneub enei, gama agef ibodok anī, inanakalauf.

³² Aya ā to suwē gouf nigin orouf. Tamo kayau sā, ī Odug nē kabī nigin kisi fedig, are ī ereb age fe di, Odug al foug nigin kisi fedig.

³³ Anī ere, tamo kayau ado, ī teneub enei nē bouwa isennēya nigin kisi fedig, are ī ereb age fe di, yogon kayau al foug nigin kisi fedig.

³⁴ Age fe di, yogon kisi fara fedig. Kayau tamo sā be, kayau taulei, ī Odug nē kabī nigin kisi fedig, are ī bouwa ado uur bun fateul wō youf nigin age fedig. Anī ere, kayau tamo ado, ī teneub enei nē bouwa isennēya nigin kisi fedig, are ī ereb age fe di, yogon tamo al foug nigin kisi fedig.

³⁵ Aya od enei āgenei biya fiya nigin orok, aya ā ifōyeif nigin to age afef, anī ere, ā madur agog fen, ā aug nigin Odug bun fara fiya sā wenēgouf nigin age afef.

³⁶ Anī ere, tamo taka ī, kayau taulei yaleya nigin digirnen anī, ī bun tobonunā biya sā age afef ye fen, kayau ī tamo yaleya nē sain mogo wal fe di, tamo ī kayau yaleya nigin kisi fef are, tamo ī yogon oroya kilei age foug. ī mosor to inof, are idi bagu difoug.

³⁷ Anī ere, tamo ī yogon wau bun total ifar fen, taka nē kisim to we fiyēf, anī ere, yogon oroya dōf fen, kayau taulei anī to yalouf nigin yogon kisi ifōf are, areg ī tutuk age foug.

³⁸ Anī nigin, tamo ī kayau taulei yalef are, ī tutuk age fef, anī ere, tamo ī kayau to yalef are, ī tutuk bagai age fef.

³⁹ Kayau ī yogon tamo fau mata ibodōf are, ī yogon tamo ado dibodōf. Anī ere, yogon tamo laa foug are, ī yogon oroya dōf fen, taka bun ileya kisi feleya, anī ere, tamo ī Odug nigin momoi yef anī bun dogol.

⁴⁰ Anī ere, neu es fiya bun, kayau ī gama ibodok gen, ibodōf are, ī fatuk bagai al foug. Aya kisi afef, are ayag Negur nē Awa Uur ado.

8

Saaf Idegēya Waitou Bun Sesewi Difen

¹ Gama, saaf idegēya waitou bun sesewi difedig nigin, ada keleī, are ada ganan keleī ado. Keleī are yogo yana yaleseya inodig, anī ere, wau laa fiya anim biya yalesedig.

² Tamo ī ereb taka nigin aya keleī yef are, ī ereb taka keleī youf anī ī fau keleī sā.

³ Anī ere, tamo ī Negur nigin wau laa fef are, Negur ī nigin keleī.

⁴ Anī nigin, saaf idegēya waitou bun sesewi difedig anī yōya nigin, ada keleī, are tenebur ein idegēya waitou are ege, anī ere, Negur taka sā, tekelei dogol ibodok.

⁵ Ere nigin, saa be teneub bun, idi waitou dedig anī dibodok, are momoi bagai waitou musei ado odug musei dibodok,

⁶ anī ere, ada bun Negur tekelei dogol ibodok, are Dei, ī bun tamal ereb ereb ganan wō yen, ī nigin ada mata tabodok. Odug tekelei dogol ibodok, are Jesus Kristus, ī bunem ereb ereb ganan wō yen, ī bunem ada mata tabodok.

⁷ Anī ere, tamo ganan enei keleī sā. Tamo kayau tunī fau idegēya waitou

nigin fatuk bagai kisi difedig nigin, sain idi saaf anī doko, idi saaf anī idegēya waitou bun sesewi difen de fen, kisi difedig, age dife di, idi waud totol sā nigin, amuyēdig.

⁸ Anī ere, saafem ada Negur non to irouladauf, are ada saaf to tāf are, anim ada to daū fadauf, ada saaf tāfeg, anim ada to isennadauf.

⁹ Anī ere, ereb ā karika ago gouf anim, idi momoiya totol sā anidi bun, naabura gudū fiya to wenēdigouf nigin lo walagauf.

¹⁰ Ere nigin, taka ī wau totol sā anī, ō keleī enei ado, idegēya waitou nē tempel bun saaf wō mog ileyōf are, ī saaf idegēya waitou bun sesewi difen anī, kumī sā to yāf de?

¹¹ Anī nigin, turā totol sā, ī nigin Kristus laa fen, are ogon keleim ī daū fiyek.

¹² Sain ā naab enei bun tureī tar bun mosor unog fen, dogo neid waud totol sā anī daū wedigef are, ā Kristus bun mosor unogef.

¹³ Anī nigin, ereb aya āf anim neu turau mosor bun inenēf are, ayam ī mosor bun to anenēf nigin, aya muda baban to bagai āf.

9

Aposel Ereb Yaleyā Nigin Kisi Feleyā

¹ Ereb takam aya katī fiyaf de? Aya aposel sā de? Aya Jesus neda Odug to ailen de? Ā Odug bun neu kabī bunem to wō gen de?

² Tunī bun aya aposel sā be, anī ere, momoi bagai aya ā bun aposel. Ere nigin, ā Odug bun aya aposel kabī alef anī nē uris.

³ Idi aya es difiyauf nigin dibodok anidi bun, isennaya od enei orok.

⁴ Amā saaf ado naan yōya nigin to kisi feleya de?

⁵ Amā, aposel tunī ganān, Odug nē tura tar ado Pita age difedig gen, kayau momoiya ado amā geid marou malauf, are to kisi feleya de?

⁶ Takag, aya ado Banabas dogol mata ibodōya nigin kabī malouf de?

⁷ Aim kusī tamo kabī yale fen, yogo nigin ereb ereb na yaledig? Aim wain kabier wain iten ken, dogo neid biya to yōdig? Aim sipsip lof fen, dogo neid su sumin to yōdig?

⁸ Aya tamo nē lo fiya bunem dogol, od enei orok de? Lo anīg enei nigin tekelei bagai to irok de?

⁹ Ere nigin, Moses nē Lo bun eig ye itoton, “Ō bulmakau, wit faat biya nē gabar loko fediyouf nigin lalai feid mog, yogon awa to ufokalauf.”* Negur ī bulmakau nigin kisi fef de?

¹⁰ Momoi, Negur ī od enei ada nigin to irok de? Momoi, od enei ada nigin itoton, ere nigin, tamo teneub gudū fedig ado, tamo wit faat biya nē gabar yaledig, idi kusu fiya sain bun dogo neid morou morou dalouf nigin waud ise fen, age difedig.

¹¹ Amā ā atun āgenei uur nigin faat mararan ouf are, amā ā bun bouwa buru nē safina kusu mafouf are, anī odug biya de?

¹² Tunī ā bun isennēya enei yaleyā nigin kisi falauf are, amā idi wal fiya anī, to malouf de?

Anī ere, amā ā bun safina yaleyā nigin kisi feleyā enei to age mafen. Age fiya ban, amā Kristus nē biya od to naabura gudū mafouf nigin, ereb ereb ganān faali mafef masin.

¹³ Idi tempel bun kabī daledig anidi, dogo neid saaf tempel bun daledig, idi alta bun aruna daledig anidi, ereb alta bun sesewi difen anī dale dogoledig, are ā to keleī de?

¹⁴ Naab tekelei anī bun, Odug iron, are idi biya od wogō def anidi, biya od bunem mata ibodōya nē safina dalouf.

¹⁵ Anī ere, aya safina yaleyā nigin kisi feleyā eneidi, anī taka to age afen. Age afe fen, aya, ā aya nigin ago gouf nigin, enei to atotof. Takam yanau yaleseya enei aya bun yalelauf are, aya laa fiyauf anī orouf.

* 9:9: Diuteronomi 25:4

¹⁶ Aya biya od wogō auf sain bun, aya yug nigin yanau to alesedig, ere nigin, Negurem biya od wogō auf nigin nugo fiyadig. Aya biya od to wogō auf are, aya bun morō odug bagai wō youf.

¹⁷ Aya neu oroya bunem kabī enei alouf are, aya mala yaleya kisi feleya. Are neu oroyam sã, anī ere, aya Negurem kabī ifanan nigin age afef.

¹⁸ Age afouf are, ere anī neu mala solo? Are, sain aya biya od wogō auf, aya mala yaleya sã biya od wogō audig, are aya biya od bun mala yaleya nigin kisi feleya anī to age afedig.

¹⁹ Aya tamo taka nē sã, are aya karika, anī ere, aya tamo musei kisi feleya bagai gei afouf nigin, aya yug tamo ganam nē ferfer wō auf.

²⁰ Juda idi bun, aya Juda idi gei afouf nigin, Juda tamo gen wō aun. Idi lo farumen dibodok anidi bun, aya yug lo farumen to abodok, anī ere, aya idi lo farumen dibodok anidi gei afouf nigin, aya tamo lo farumen ibodok gen wō aun.

²¹ Idi lo sã anidi bun, aya Negur nē lo bun karika sã, are aya Kristus nē lo farumen abodok, anī ere, aya idi lo sã anidi gei afouf nigin, aya tamo lo sã gen wō aun.

²² Idi furūya anidi bun, aya idi furūya anidi gei afouf nigin, aya tamo furūya gen wō aun. Aya ereb ereb ganam kisi feleya anī bunem, tunī kel gei afouf nigin, tamo ganam bun, idi dibodok gen tobonunã age fiya gen wō aun.

²³ Aya biya od nigin enei ganam age afedig, are aya biya od nē el fiya weim talouf nigin.

²⁴ Gududuya bun, tamo ganam gududu dedig, anī ere, tekeleim dogol mala yaledig anī ã to keleī de? Naab age fiya bun, gududu gei fen, mala walougouf.

²⁵ Tamo ganam kodē wal difouf nigin age difedig anidi, ereb ereb ganam bun total bagai tai difedig. Idi

mala fau sa kalauf anī dalouf nigin age difedig, anī ere, amã mala gai ibodkalauf anī yaleya nigin age mafedig.

²⁶ Anī nigin, aya tamo gariya sã gudu redig gen, to gudu raudig. Aya yau yūdig gen, to ege imau warū yeledig.

²⁷ Anī ere, aya yug bouwau au ken, anī neu ferfer ibodōf nigin age afedig, are aya tunī wogō afiyeīd fen, aya yug mala solo yaleya nigin, kisi feleya sã to bagai wō auf nigin age afedig.

10

Israel Neid Tubuid Tar Bun Weder Irouya Od

¹ Turau tar, aya ã enei to keleī youf nigin to orouf, are Moses nē sain bun, tubuda tar ganam budū farumen difar fen, idi ganam Maaī Giriya atu diyok dilen.

² Idi ganam budū bun ado maaī bun naan dale fen, Moses nē ibor tar wowã den.

³ Are, idi ganam uur nē saaf tekelei anī don,

⁴ idi ganam uur nē naan tekelei anī don, are uur nē meein idi geid weim diyok dilen anī bun, idi naan don, meein are Kristus.

⁵ Anī ere, Negur ī idi musei ganam nigin wau to al fen, anī nigin, dogo neid bouweid gerere tuan firagagaū difen.

⁶ Enei ganam ada wederada irouya nigin wō yen, anī bunem ada idi age difen gen, ereb sane nigin wauda to tanouf.

⁷ Idi neid tunī gen, ã idegēya waitou yana to walesagauf. Are Negur nē Itotoya bun eig ye irok, "Tamo kayau saaf naan doko dibod ken, fafã de dale, noli tobonunã dinon."*

⁸ Ada idi tunī age difen gen, noli tobonunã to tanouf. Age dife di, naa tekelei bun, idi atun tuwenti tri tausen tamo kayau gare den.

* 10:7: Eksodas 32:6

⁹ Ada idi tunī age difen gen, Odug kisi fiya bun to tanenēf. Idi age difen, gogourum didenkesin.

¹⁰ Ada idi tunī gen, to nauseir tauf. Idi age difen, daū fiya nē engelem idenkesin.

¹¹ Eneidi ada ifelnadauf nigin idi bun wō yen, are idikeleya sain, ada bun mogo wō yen anī bun, wederada irouya nigin itoton.

¹² Anī nigin, taka ī kisi fef, total ifaref yef, ī to kubū youf nigin lo falauf.

¹³ Kisi fiya ganān ā bun wō yedig, are tamo bun wō yedig dogol. Anī ere, Negur ī age afouf yef anī, age fedig, ī kisi fiya ā yaleya kisi feleya sā anī, ā bun to wō youf nigin age fouf. Anī ere, ā kisi yeīf sain bun, Negur ī iyawoya nē naab anīg ifelneīf, anī bunem ā total ufaragauf nigin sā kisi falauf.

Saaf Idegēya Waitou Bun Dinon Ado Odug Nē Saaf

¹⁴ Anī nigin, neu turau tar oboiyou, idegēya waitou yana yaleseya bun tamal uyalalagauf.

¹⁵ Aya ā tamo kayau kisi biya ado gen arokeneik, ereb aya arok anī, ā aug es gouf.

¹⁶ De fiyēya nē kap, ada de fiya tafenedig, are Kristus nē naud bun bagu fiya sā de? Bret ada mumā tafedig, are Kristus nē bouwa bun bagu fiya sā de?

¹⁷ Bret tekelei dogol ibodok nigin, ada musei, anī ere, bouwada tekelei, ere nigin, ada ganān bret tekelei anī bun bagu tafedig.

¹⁸ Israel tamo kayau nigin kisi wal-ogouf, idi sesewi fiya nē saaf dōdig anidi, alta bun to bagu difedig de?

¹⁹ Age fouf are, ere anī kisi afef, are sesewi fiya nē saaf idegēya waitou difenek anī odug de, oo idegēya waitou anī odug de?

²⁰ Sā, anī ere, haiden neid sesewi fiya anī kaa sesen bun difenedidig, are Negur bun sā. Are aya ā kaa sesen geid bagu gouf nigin to orouf.

²¹ Ā Odug nē kap bun ado kaa sesen neid kap buneg yōya nigin kisi feleya sā. Ā Odug nē tebol bun ado kaa sesen neid tebol buneg bagu fiya nigin kisi feleya sā.

²² Ada Odug kiyeī ifanadauf nigin age tafef de? Ada neda megeir ī wal fiya de?

Momoiya Tamo Kayau Neid Tobo-nunā

²³ Tunī dirōdig, “Ada ereb ereb ganān nigin, sā age tafeid, age fiya nigin kisi feleya,” anī ere, ereb ereb ganān to isennadauf. Tunī dirōdig, “Ada ereb ereb ganān nigin, sā age tafeid, age fiya nigin kisi feleya,” anī ere, ereb ereb ganān biya fiya to inouf.

²⁴ Taka ī yogon biya fiya nigin to imirēf, anī ere, tunī neid biya fiya nigin imirēf.

²⁵ Ereb ereb yaro maket bun na sur difedig anī, āgenei kisi bun to fiya sā wāgauf,

²⁶ ere nigin, “Teneub ado ereb ereb ganān anī namen yenek are Odug nē.”†

²⁷ Momoiya sā tamo taka, saaf yōya nigin ā iweigneī di, ā ileya nigin oroyeīf are, ereb ereb ā meleī bun inodin anī, āgenei kisi bun to fiya sā wāgauf.

²⁸ Anī ere, taka ī ā irokeneīf, “Enei are sesewi fiya bun difenen,” youf are, tamo irokenein ī nigin ado kisi es fiya yaor karētut ibodōf nigin, saaf anī to wāgauf.

²⁹ Neu wogōya nē gariya are, tamo anī nē kisi es fiya nigin, are āgenei kisi es fiya nigin sā. Taka nem irōf, “Age fiyauf are, ere nigin neu ereb ereb nigin kisi feleya anī, tamo taka nē kisim es fouf?”

³⁰ Aya de fiya bunem saaf āf are, ere nigin taka nem saaf anī nigin, Negur de afiyek nigin bou yūya od irok?”

³¹ Anī ere, ā saaf wāgauf, naan wāgauf ado, ereb ereb ganān ago

† 10:26: Sam 24:1

gouf are, Negur nē fula fiya medeīya nigin anī ganān ago gouf.

³² Juda tamo, Grik tamo be, Negur nē sios bun tamo taka, to ye tū fouf nigin ago gouf.

³³ Ayag naab ganān bun tamo ganān al afiyēdiyof nigin age afedig gen, ago gouf. Ere nigin, aya neu biya fiya to amirek, anī ere, musei isennēdiyof nigin, dogo neid biya fiya amirek.

11

¹ Ayag Kristus madē afiyēdig gen, ā aya madē wiyagauf.

Negur Yana Yaleseya Bun Mudur Kerū Fiya

² Aya ā yeneī alesef, ere nigin, ā ereb ereb ganān bun aya nigin karī weleg fen, ifelnēya anī aya ale fen, ā afenein anī, kafī weleg uroug usigef.

³ Anī ere, aya ā eig fiya anī keleī youf nigin orouf, are tamo ganān neid mudur are Kristus, kayau nē mudur are tamo, Kristus nē mudur are Negur.

⁴ Tamo ganān, taka ī yogon mudur kerū fel fen, kosē yef be, profet od wogō yef, ī yogon mudur Kristus mama ifenek.

⁵ Kayau ganān, taka ī yogon mudur to kerū fel fen, kosē yef be, profet od wogō yef, ī yogon mudur, are aiwa anī mama ifenek, are ī yogon fatiya korerē feleya gen.

⁶ Kayau taka ī yogon mudur kerū fiya sāf are, ī yogon fatiya gudū falauf. Kayau taka ī yogon fatiya gudū fouf be, korerē fouf anim, mama ifenēf are, ī yogon mudur kerū fouf.

⁷ Tamo taka ī yogon mudur to kerū fouf, ere nigin, ī Negur nē malakanon ado fula fiya medeīya, tamo bun. Anī ere, kayau ī tamo nē fula fiya medeīya, kayau bun.

⁸ Ere nigin, tamo ī kayau bunem to isin, anī ere, kayau ī tamo bunem isin.

⁹ Takag, tamo ī kayau isennēf nigin to inon, anī ere, kayau ī tamo isennēf nigin inon.

¹⁰ Age fiya nigin, kayau ī, engel idi neid meleid bun, ī tamo farumen ibodok anī ifelnēdiyof nigin, yogon mudur kerū fouf.

¹¹ Anī ere, Odug bun kayau ī tamo bun yogo mugu to ifaref, tamo īg kayau bun yogo mugu to ifaref.

¹² Ere nigin, kayau ī tamo bunem isin gen, tamo īg kayau bunem wō yen. Anī ere, ereb ereb ganān Negur bun tamal isif.

¹³ Ā aug es gouf, are kayau taka ī yogon mudur to kerū fel fen, Negur kosē fiyek, are de de?

¹⁴ Tamo taka fatiya salo isiya adouf anim mama ifenek anī, tamo nē to-bonunā anī to ifelneik de?

¹⁵ Anī ere, kayau taka ī fatiya salo isiya adouf, are yogon fula fiya medeīya. Ere nigin, fatiya salo isiya are, yogon mudur kerū fiya nigin ifenen.

¹⁶ Anī ere, taka ī od enei kiwai ifenēf are, ada suma taka sā, Negur nē sios buneg suma taka sā.

Odug Nē Saaf

(Matyu 26:26-29; Mak 14:22-25; Luk 22:14-20)

¹⁷ Faded fiya dō fiya enei bun, aya ā yeneī to alesef, ere nigin, āgenei guru fiya biya anī fotokar sane isidig.

¹⁸ Uruwa bun, aya karī aun, are ā sios nigin guru gef ā atun, fara fiya yenēdig, age afe fen, od tunī aya momoi auf.

¹⁹ Ā atun fara fiya bagai yenek, anī bunem, ā atun ai anī Negur yo fiyen anī ifelneif.

²⁰ Anī nigin, sain ā guru gef, are Odug nē Saaf bagai anī to wōgedig,

²¹ ere nigin, sain ā saaf wōgef bun, ā abob tari fediya sā, mugu mugu saaf wōgedig, anī nigin, taka ī naū ibodōdig, taka ī naan yōdig.

²² Saaf ado naan yōya nigin ā fō sā de? Ā Negur nē sios lai ge fen, idi safina sā anidi mama wenēdigef de? Aya ā ere ayeif? Aya enei nigin ā yeneī alesauf de? Sā bagai! Aya enei nigin ā yeneī to alesauf.

²³ Ere nigin, aya enei Odug bun tamal ale fen, āg afenein. Are Odug

Jesus, Judas ï kiwai ifenen bõ anï bun, bret yale,

²⁴ Negur de fiye ken, bret anï mumãf fen, iron, “Enei neu bouwau, are ã nigin. Aya nigin karï walagauf nigin enei ago gouf.”

²⁵ Naab tekelei bun, bõ saaf bure difel fen, ï kap yale fen, iron, “Kap wain enei neu naudou bun bar itenëya mata. Sain ganan ã wãgauf, aya nigin karï walagauf nigin enei ago gouf.”

²⁶ Ere nigin, sain ganan ã bret enei wõg fen, kap enei bun wãgauf, ã Odug nẽ laa nigin kurõ wesig mog, ï fau isiyouf.

²⁷ Anï nigin, taka ï tutuk sã bret anï yãf be, Odug nẽ kap bun yãf are, ï Odug nẽ bouwa ado naud bun mosor inouf.

²⁸ Taka ï yogo nigin es fel fen, bret anï yoko, kap anï bun yãf.

²⁹ Ere nigin, taka ï Odug nẽ bouwa nigin to kisif fen, bret yoko, kap bun yãf are, ï yogon es fiya anï yogo yoko.

³⁰ Anï nigin, ã atun musei malegeid fen, dagi didig, ãgenei tunï gare den.

³¹ Anï ere, ada nigin es tafouf are, ada es fiya bun to tabodõf.

³² Sain ada Odugem es fadauf, are ada Odugem madur fadauf, are ï teneub enei nẽ tamo kayau geid ada mosor ado to youf nigin age foug.

³³ Anï nigin, neu turau tar, sain ã yõya nigin guru gouf are, ã abob nigin tari gouf.

³⁴ Taka ï naũ fouf are, ï fõ bun yãf, anï bunem, sain ã guru gouf, ã es fiya bun to ulagauf.

Sain aya asiyouf, aya faded fiya tobol afeneif.

12

Awa Uur Fateul Nẽ Ege Luwa

¹ Turau tar, aya ã Awa Uur Fateul nẽ ege luwa nigin to keleï youf anï to orouf.

² Æ keleï, sain ã haiden ubodõgen, naab fire fire bun ditonei ken, eweid ifofakeleya idegëya waitou bun, fõ yeleya nigin dirou dileyein.

³ Anï nigin, aya ã arokeneik, are taka ï Negur nẽ Awa Uur bunem wogõ yef, ï to irõdig, “Jesus sane lauf.” Takag, taka nem eig ye irõya kisi feleya sã, “Jesus ï Odug,” are Awa Uur Fateulem dogol.

⁴ Ege luwa nigin fire fire dibodok, anï ere, Awa Uur anï tekelei.

⁵ Kabï gariya fire fire dibodok, anï ere, Odug tekelei.

⁶ Kabï nẽ megeir fire fire dibodok, anï ere, Negur tekelei ï, tamo ganan bun, kabï nẽ megeir ganan nigin kabï yaledig.

⁷ Tamo ganan isennëdiyof nigin, tamo mugu mugu bun Awa Uur yaor fedig.

⁸ Taka bun Awa Uur bunem kisi biya nẽ od ifenek, taka bun Awa Uur tekelei bunem keleï nẽ od ifenek,

⁹ taka bun Awa Uur tekelei bunem momoïya anï ifenek, taka bun Awa Uur tekelei anï bunem dagi el fiya nẽ ege luwa ifenek,

¹⁰ taka bun memelik inoya nẽ megeir ifenek, taka bun profet od ifenek, taka bun uur es fiya ifenek, taka bun od fire fire nem wogõya ifenek, taka bun od fire fire nem wogõya anï falei fiya ifenek.

¹¹ Enei ganan Awa Uur tekelei dogol ï yogon kabï, ï yogon oroya dõf fen, tamo kayau mugu mugu anï ifenëdidig.

Bouwa Tekelei, Fara Fiya Musei

¹² Bouwa anï tekelei, anï ere, bouwa anï fara fiya musei bunem inof. Yogon fara fiya ganan are musei, anï ere, idi bouwa tekelei dinof. Kristus ïg age fiya.

¹³ Ere nigin, ada ganan, Juda tamo be Grik tamo, ferfer be kafï fiya sã tamo, Awa Uur tekelei bunem naan tale fen, bouwada tekelei wõ taun, agef fen, ada ganan Awa Uur tekelei naan gen tokon, megeir talouf nigin ifanadan.

¹⁴ Bouwa ï fara fiya tekeleim to inof, anï ere, fara fiya museim inof.

¹⁵ Ye ï, aya ima sã, anï nigin, aya bouwa nẽ tunï sã youf, anï ere,

gariya anī bun ī aya bouwa nē tunī sā yeya kisi feleya sā.

¹⁶ Takag, weder ī, aya mala sā, anī nigin, aya bouwa nē tunī sā youf, anī ere, gariya anī bun ī aya bouwa nē tunī sā yeya kisi feleya sā.

¹⁷ Bouwa adok malauf are, nainenem karī wouf? Bouwa adok wederouf are, nainenem sumei walouf?

¹⁸ Anī ere, momoi, Negur ī bouwa nē fara fiya, ī orof kilei bagai, mugu mugu ganā inenēdin.

¹⁹ Bouwa nē fara fiya anī ganā tekelei youf are, bouwa ī nain ibodōf?

²⁰ Age fiya gen, bouwa nē fara fiya musei dibodok, anī ere, bouwa de tekelei.

²¹ Mala ima to irokenēf, “Aya ō to orouf!” Are, mudur ye to irokenēf, “Aya ō to orouf!”

²² Age fiya ban, bouwa nē fara fiya tunī total sā tailedig anī sāf are, bouwa ibodōya kisi feleya sā.

²³ Ada bouwa nē fara fiya yana sā gen tauf anī, ada yana talesedig. Ada bouwa nē fara fiya yaor fiya kisi feleya sā anī, dede ta, ed tafedig,

²⁴ anī ere, bouwada nē fara fiya yaor fiya kisi feleya anī, ada to dede ta, ed tafedig. Anī ere, Negur ī bouwa nē fara fiya bagu feleid fen, fara fiya yana sā idi yana odug ifenēdin,

²⁵ anī bunem, bouwa bun foi fiya to ibodōf, anī ere, bouwa nē fara fiya idi abob nigin kilei kilei kisi difouf.

²⁶ Bouwa nē fara fiya takam darau yalouf are, bouwa nē fara fiya ganā ī geid darau daledig. Bouwa nē fara fiya takam yana yalouf are, bouwa nē fara fiya ganā ī geid kulī dedig.

²⁷ Gama, ā Kristus nē bouwa, are ā mugu mugu anī nē fara fiya.

²⁸ Sios bun Negur ī uyulil aposel ganā igirnēdin, anī dō fiya profet, anī dō fiya tise, age fe di, memelik inoya tamo ado, dagi el fiya nē megeir dalen anidi, tunī isennēdiya nigin kisi feleya anidi, erēb erēb lo fiya nigin megeir dalen anidi, od fire

fire nem wogōya nigin kisi feleya anidig igirnēdin.

²⁹ Idi ganā aposel de? Idi ganā profet de? Idi ganā tise de? Idi ganā memelik dinof de?

³⁰ Idi ganā dagi el fiya nē megeir dalef de? Idi ganā od fire fire nem wogō def de? Idi ganā od fire fire nem wogōya anī falei difef de?

³¹ Anī ere, Awa Uur nē ege luwa odug yaleya nigin kisi total walo-gouf.

Gama aya naab gai biya bagai taka afelneif.

13

Wau Laa Fiya

¹ Aya tamo nē od fire fire nem ado engel nē od nem wogō aufeg, wau laa fiya sāf are, aya belo gaōya be, kadod ait gūya gen dogol.

² Aya profet od wogōya nigin Awa Uur nē ege luwa ado fen, Negur nē waa ganā ado keleī ganā kelei ken, arei godo fiya nigin momoiya odug ado, anī ere, wau laa fiya sāf are, aya tamo ege.

³ Aya erēb aya ado ganā maleg afeneīd fen, bouwau atorō di, yā malan dirāf, anī ere, aya wau laa fiya sāf are, aya mala biya taka to alouf.

⁴ Wau laa fiya are molol, wau laa fiya are dor yaleya. Ī to kiyeī inidig. Ī yogo yana to yalesedig. Ī yogo to seli yabidig.

⁵ Ī tobonunā sane sā, ī yogo nigin aya dogol to yedig, ī kaisā to seye yedig, ī sane difiyek anī to karī yeledig.

⁶ Wau laa fiya anī sane nigin to kulī yedig, anī ere, momoi nigin kulī yedig.

⁷ Ī faimud kulatun fedig, ī faimud momoi yedig, ī faimud wau isedig, ī faimud feseya sā megeir ifaredig.

⁸ Wau laa fiya are to bagai sa kalauf. Anī ere, profet od wogōya are sa kalauf, od fire fire nem wogōya are sa kalauf, keleī are sa kalauf.

⁹ Ere nigin, ada keleĩ tunĩ dogol kelei ken, profet od tunĩ dogol wogõ taudig,

¹⁰ anĩ ere, sain kibo feleya bagai anĩ isiyouf, kibo feleya bagai sã anĩ sa kalauf.

¹¹ Aya simõ bun, aya simõ gen wogõ aun, aya simõ gen kisi afen, aya simõ gen karĩ aun. Sain aya biyau fen, aya simõ nẽ tobonunã dumeun arailen.

¹² Gama ada dodo bun gen malakanon yaor sã tailedig, sain ada tarabã fadauf bun tutuk bagai tailauf. Gama aya tunĩ dogol keleĩ, sain anĩ bun Negur aya nigin ganan keleĩ gen, aya ganan keleĩ youf.

¹³ Are gama towo eneidi difaref, momoiya, wau iseya ado, wau laa fiya. Anĩ ere, anĩ atun wau laa fiya anĩ odug bagai, ganan wal fiya.

14

Profet Od Wogõya Ado Od Fire Fire Nem Wogõya Nigin Awa Uur Nẽ Ege Luwa

¹ Wau laa fiya nẽ naab dõg fen, Awa Uur nẽ ege luwa yaleya nigin kisi total walogouf, Awa Uur nẽ ege luwa bun profet od wogõya nẽ anĩ bagai walogouf.

² Ere nigin, taka ã od fire nem wogõ yef, ã tamo to wogõ fiyẽdif, anĩ ere, ã Negur wogõ fiyek. Are, taka nem in od to keleĩ youf. ã Awa Uur bunem Negur nẽ waa wogõ yef.

³ Anĩ ere, taka ã profet od wogõ yef, ã tamo megeir ifenẽdiyof nigin, waud yalesauf nigin ado, waud yo fouf nigin wogõ fiyẽdif.

⁴ Taka ã od fire nem wogõ yef, ã yogo dogol isennek, anĩ ere, taka ã profet od wogõ yef, ã sios isennek.

⁵ Aya ã ganan od fire fire nem wogõ gouf nigin orouf, anĩ ere, aya ã profet od wogõ gouf nigin orouf bagai. Taka ã od fire nem wogõ yef, ã sios isennẽf nigin taka nem yogon od to falei fouf are, taka ã profet od wogõ yef anim, taka ã od fire nem wogõ yef anĩ wal fiya.

⁶ Turau tar, aya ã gein asi fen, od fire nem wogõ auf sain bun, aya kurõ fesiya od tunĩ, keleĩ, profet od be, faded fiya nẽ od, ã bun to arou asiyouf are, ere biya aya ã afeneif?

⁷ Ereb idi mata sã aitedif, digẽ be gita age fiya, idi ailõ fire fire to dinouf are, naig fe di, taka nem ere seg kodẽ def anĩ keleĩ youf?

⁸ Takag, taur ait tutuk to wõ youf are, aim kusĩ nigin dodok fouf?

⁹ ãg age fiya. ã, ãgenei baleim od fire nem yaor to wogõ gouf are, taka ã naig fe fen, ã wogõ gef anĩ keleĩ youf? ã ege od yau bun urarãgouf dogol.

¹⁰ Tenebur ein od fire fire musei dibodok, anĩ ere, idi gariya sã taka to ibodok.

¹¹ Aya erab taka nem wogõ yef, anĩ nẽ gariya to keleĩ youf are, aya wogõ yef anĩ nẽ yaũ tamo, age fe di, ã aya bun yaũ tamo.

¹² ãg age fiya. ã Awa Uur nẽ ege luwa yaleya nigin kabĩ total walegedig, anĩ nigin, sios isennẽya nẽ ege luwa yaleya nigin kabĩ total walogouf.

¹³ Age fiya nigin, taka ã od fire nem wogõ yef, ã erab wogõ yef anĩ falei fouf nigin kosẽ youf.

¹⁴ Ere nigin, aya od fire nem kosẽ auf are, neu uur kosẽ yef, anĩ ere, neu kisi faat yũya sã.

¹⁵ Anĩ nigin, aya naig afouf? Aya neu uur bun kosẽ auf, anĩ ere, aya neu kisi buneg kosẽ auf. Aya neu uur bun seg alouf, anĩ ere, aya neu kisi buneg seg alouf.

¹⁶ Õ ogon uur bun Negur yana walesauf are, taka ã idi anĩ to keleĩ anidi atun ibodok, ã erab õ urok anĩ keleĩ sã nigin, naig fe fen, ã ogon de fiyẽya bun “Mmoi” youf?

¹⁷ Õ ogon de fiya are biya bagai, anĩ ere, taka to usennek.

¹⁸ Aya ã ganan wal yeĩya, od fire nem wogõ auf nigin Negur de afiyek.

¹⁹ Anĩ ere, sios bun, aya ten tausen od od fire nem wogõya anĩ fotokar, tunĩ tai fediya nigin od faif bun yaor wogõ auf anĩ orouf.

²⁰ Turau tar, āgenei kisi bun simō gen to ufareg. Sane nigin, momou nē kisi gen ufareg, anī ere, āgenei kisi bun biyeī ufareg.

²¹ Lo bun eig ye itoton:
Odug irok,
“Tamo od fire nem wogō def anidi bunem ado,
yaū tamo sigoreid bunem,
aya tamo kayau eneidi wogō afediyouf,
anī ere, sain anī buneg idi aya to karī difiyauf.”*

²² Anī nigin, od fire nem wogōya are, momoiya tamo kayau bun uris sã, anī ere, momoiya sã tamo kayau bun uris. Anī ere, profet od wogōya are, momoiya tamo kayau bun, momoiya sã tamo kayau bun sã.

²³ Anī nigin, sios guru fiya odug bun, tamo kayau ganan od fire nem wogō de di, tunī anī keleī sã be, tunī momoiya sã disiyouf are, idi ā nigin wadã ideneik to douf de?

²⁴ Anī ere, taka ī momoiya sã be, taka ī anī keleī sã, tamo kayau ganan profet od wogō de mog, isiyouf are, ī tamo kayau ganan neid wogōya bunem ī mosor tamo ya anī kisi fokō ye di, tamo kayau ganan ī es difiyēf,

²⁵ age dife di, yogon wau bun iminēdig anī yaorouf. Anī nigin, ī kusureis fen, Negur yana yales, “Moi moi bagai, Negur ā atun ibodok,” youf.

Negur Yana Suma Dōf Yaleseya

²⁶ Anī nigin, turau tar, ada naig tafouf? Sain ā guru gef, ā ganan atun taka seg ado, taka faded fiya nē od ado, taka kurō fesiya od ado, taka od fire nem wogōya be, od fire nem wogōya anī falei fiya adof. Anī ganan sios megeir fiya nigin ago gouf.

²⁷ Taka ī od fire nem wogō youf are, uru be, towom dogol age fiya sain dale fen, teke tekeleim wogō douf. Age fe di, taka nem od fire nem wogōya anī falei fouf.

²⁸ Od fire nem wogōya anī falei fiya tamo sãf are, wogōya tamo ī sios bun

foro yel fen, yogo ado Negur bun wogō youf.

²⁹ Profet uru be, towom age fiya wogō douf, age de mog, tunī ganan, ereb wogō yef anī el de es difouf.

³⁰ Anī ere, idi guru fiya dibodok anidi atun, kurō fesiya od taka, taka bun isiyouf are, uyu wogō yef are dē yalauf.

³¹ Ere nigin, ā ganan sain waleg fen, teke tekeleim profet od wogō gouf, anī bunem, ganan keleī dale fen, waud yalesauf.

³² Profet neid uur are profet dogo kulatun dife fen, dogo neid wogōya sain bun dogol wogō douf.

³³ Ere nigin, Negur ī ekul fiya nē Negur sã, ī wau inosiya nē Negur.

Tamo kayau fateul neid sios ganan bun age difedig gen,

³⁴ kayau idi sios bun foro del difarauf. Idi wogōya nē modou to difenēdiyof, anī ere, idi Lo irok kilei, anī dō difouf.

³⁵ Idi ereb taka nigin to fiya orodiyouf are, idi neid fō bun dogo neid tamo to difediyof, ere nigin, kayau taka sios bun wogōya are mama ado.

³⁶ Negur nē od ā bunem gariya inon de? Od anī ā bun dogol isin de?

³⁷ Taka ī kisif, ī profet taka be, ī Awa Uur nē ege luwa alen youf are, ī ereb aya atotkeneik are Odug nē itāfiya ya anī keleī youf.

³⁸ Taka ī enei welebi fouf are, ī yogo welebi fiyēf.

³⁹ Anī nigin, turau tar, profet od wogō gouf nigin kisi total walogouf. Agog fen, od fire nem wogōya nigin to katū wiyēdigouf.

⁴⁰ Anī ere, ereb ereb ganan suma bagai dōg fen, biya bagai ago gouf.

15

Kristus Nē Mata Kel Fāya

¹ Turau tar, aya biya od wogō ayeī di, waleg fen, anī teten ufaregef anī, baban ā kisi turī ayeīf nigin orouf.

² Ā od aya wogō ayein anī, uroug kafī waleg fen, ege to momoi gen ouf

* 14:21: Asaia 28:11, 12

are, biya od enei bunem ā kel gei yeif.

³ Ere nigin, ereb aya alen, are odug bagai nigin, uyulil anī aya ā afenein, are Kristus ī, Negur nē Itotoya bun yenek kilei, neda mosor nigin laa fe di,

⁴ Ī mū difen, are Negur nē Itotoya bun yenek kilei, naa towo bun ĩ mata kel fā yen,

⁵ are ĩ Pita bun wō ye fen, anī dumen in dō fiya tar tuwelf bun wō yen.

⁶ Anī bure fele di, ĩ sain tekelei bun tura tar faif handred wal fiya meleid bun wō yen, anidi ganan musei fau dibodok, tunī gare den.

⁷ Agef fen, ĩ Jems mala bun wō yen, anī dumen aposel ganan meleid bun wō yen.

⁸ Anī ganan bure fel fen, idikeleya bun, ĩ, aya kesu gō fiya sain sã bun gō difiyan gen anī, malau buneg wō yen.

⁹ Ere nigin, aya aposel idi atun naal bagai, aya to biya nigin aposel yeya nigineg kisi feleya sã, ere nigin, aya Negur nē sios darau afenen.

¹⁰ Anī ere, Negur nē wau ifenēya bunem, aya gama afaref gen age wō aun. Aya bun yogon wau ifenēya anī ege to ilen. Sã, aya kabī total idi ganan wal fediya alen, are ayam sã, anī ere, Negur aya ado ibodon in wau ifenēya anim.

¹¹ Age fiya nigin, ayam be, idim, amã enei wogō mauf, are ā enei momoi gen.

Gare Den Tamo Neid Mata Kel Fāya

¹² Amã Kristus gare den anidi bun tamal mata kel fā yen anī wogō maudig, anī ere, naig fe di, ā tunī, gare den anidi mata to ke de fā douf gedig?

¹³ Gare den anidi, mata to ke de fā douf are, Kristus ĩg mata to kel fā yem.

¹⁴ Kristus ĩ mata to kel fā yem are, nemã wogōya anī kaũ sã di, āgenei momoiya areg kaũ sam.

¹⁵ Age fiyam are, amã Negur nigin idegēya od wogō maudig anī dilemam, ere nigin, amã Negur ĩ Kristus gare den anidi bun tamal turī fiyen anī kurō mafesidig. Anī ere, Negur ĩ gare den anidi to turī fediyouf anī momoi ouf are, ĩ Kristus to turī fiyem.

¹⁶ Ere nigin, Negur ĩ gare den anidi to turī fediyouf are, ĩ Kristuseg to turī fiyem.

¹⁷ Negur ĩ Kristus to turī fiyem are, āgenei momoiya are ege, ā āgenei mosor bun fau ubodōgef.

¹⁸ Age fiyam are, idi Kristus nigin momoi de fen, gare den anidig fō delem.

¹⁹ Ada ein mata ibodōya enei nigin dogol, Kristus bun wauda iseya adouf are, ada tamo ganan wal fediya maladalon ado.

²⁰ Anī ere, Kristus momoi bagai gare den anidi bun tamal kel turī fiyen, are idi gare den anidi bun tamal faat uyulil yun gen.

²¹ Are, laa are tamo tekelei bunem isin nigin, gare den neid kel fāya areg tamo tekelei bunem isif.

²² Are, Adam bun ganan gare dedig, age fiya gen, Kristus bun ganan mata ifenēdiyof.

²³ Anī ere, idi mugu mugu dogo neid sain bun age difouf: Kristus ĩ uyulil faat yūya, anī dumen, ĩ isiyouf sain bun, idi yogon dibodok anidi, mata ke de fā douf.

²⁴ Anī bure fele di, idikeleya sain isiyouf, sain anī bun, Kristus ĩ gawaman ganan, yeneid ado ganan, megeir ganan daũ fel fen, tano anī yale, Dei Negur ima bun inouf.

²⁵ Ere nigin, ĩ king ibodok ile, yogon kiwai tar ganan yogo ye farumen inenēdiyof sain anī bun.

²⁶ Kiwai idikeleya bun daũ fiya nē, are laa.

²⁷ Are Negur nē Itotoya bun eig ye irok kilei, “Negur ĩ ereb ereb ganan yogo ye farumen inenēdin.”* Sain ĩ irok, are ereb ereb ganan ĩ farumen inenēdin, are Negur ĩ ereb ereb

* 15:27: Sam 8:6

ganan Kristus farumen inenēdin, Negur ī yogo enei farumen to ibodok ya anī yaor.

²⁸ Sain Negur ī enei age fel fen, Naal yogo, Negur ī ereb ereb ganan Kristus farumen inenēdin anī, farumen inenēf, anī bunem, Negur ī ereb ereb ganan nē mudur ibodōf.

²⁹ Mata kel fāya anī sāf are, idi tamo gare den anidi nigin naan dalef idi naig difouf? Tamo gare den anidi to bagai kel turī fediyouf are, ere nigin tamo kayau idi nigin naan daledig?

³⁰ Takag, amā nigin, ere nigin amā mug sain ganan bouwamā waila bun manenēdig?

³¹ Turau tar, aya ā neda Odug Kristus Jesus bun ubodōgef nigin, yanau alesedig anī bunem, momoi bagai enei totol bagai arok, are aya naa ganan laa bun eledig.

³² Aya tamo nē kisi bunem dogol, Efesus oun gaar kuī geid kusī aun ouf are, ere mala biya anī aya alen? Tamo gare den anidi to kel turī fediyouf are, Negur nē Itotoya bun yenek kilei,

“Saaf ado naan tāf,
ere nigin, nil gare tauf.”†

³³ Ā taka nem to idegneif. “Sane geid nigal yūya bun, tobonunā biya daū fedig.”

³⁴ Kisi biya bun kel usig ufareg fen, mosor inoya utorōg, ere nigin, ā atun tunī Negur nigin keleī sā difaref. Aya ā mama yeif nigin enei wogō auf.

Kel Fāya Nē Bouwa

³⁵ Anī ere, taka nem to fouf, “Tamo gare den anidi, naig fe kel turī fediyouf? Bouweid naig fiya bagai ado disiyouf?”

³⁶ Ā neneya bagai! Ereb ō tu wouf anī, to laa fouf are, anī mata to wō youf.

³⁷ Sain ō tu wof, ō fau ibodōf nē bouwa anī to utenek, anī ere, wit be, ereb taka nē faat dogol.

³⁸ Anī ere, Negur ī oron kilei, bouwa ifenēdig, agef fen, ī faat

fire fire dogo neid bouweid fire fire ifenēdidig.

³⁹ Bouwa ganan tekelei sā. Tamo nē bouwa are fire, gaar bouwa fire, ninā bouwa fire, gau bouwa fire.

⁴⁰ Saa ilun nē bouweid ado di, tenebur nē bouweideg ado. Anī ere, saa ilun nē bouweid fula fiya medeīya fire di, tenebur nē bouweid fula fiya medeīya areg fire.

⁴¹ Gaa are futu reya fire di, ogō are futu reya fire, age fe di, barisa are futu reya fire. Barisa idi atuneg futu reya fire fire ado.

⁴² Age fiya gen, tamo gare den anidi neid mata kel fāya areg age fouf. Bouwa tu fiyaf nē are bura le di, bouwa kel fā yef nē are to bura ledig.

⁴³ Sane bun tu fiya di, fula fiya medeīya bun kel fā yef. Totol sā tu fiya di, totol ado kel fā yef.

⁴⁴ Bouwa buru maug are tu fiya di, uur nē bouwa are kel fā yef.

Bouwa buru maug ibodok are, uur nē bouwag ibodok.

⁴⁵ Anī nigin, Negur nē Itotoya bun eig ye irok, “Uyulil inon tamo Adam ī mata ibodōya wō yen.”‡ Idikeleya Adam ī mata ifenēya nē uur wō yen.

⁴⁶ Uur nē bouwa ketem to isin, anī ere, bouwa buru maug ketem isin. Age fe di, anī dumen, uur nē bouwa.

⁴⁷ Uyulil inon tamo are tenebur aas nē, anī dō fiya tamo are saa ilun nē.

⁴⁸ Tenebur nē tamo idi, tamo teneub nem inon gen. Saa ilun nē tamo idig, tamo saa ilun tamal gen.

⁴⁹ Ada tenebur tamo inon age fiya tabodok gen, adag tamo saa ilun tamal age fiya tabodōf.

⁵⁰ Turau tar, aya ā arokeneik, are tenebur nē bouwam Negur nē tano to akorou youf. Ereb bura ledig anīg to bura lauf anī to akorou youf.

⁵¹ Karī wog, aya waa taka arokeneif: Ada ganan to gare tauf, anī ere, ada ganan bouwada falei fouf,

⁵² are ereb fili yeleya be, mala kamisāya gen idikeleya nē taur

† 15:32: Asaia 22:13 ‡ 15:45: Jenesis 2:7

aitouf bun, bouwada agef falei fouf. Taur aite di, tamo gare den anidi kel turī fedi di, to buraya nē ado fā douf, age fe di, ada bouwada falei fouf.

⁵³ Are, buraya nē anī to burauf nē anī ifonūf. Laa fiya nē anī to laa fouf nē anī ifonūf.

⁵⁴ Buraya nē anī to burauf nē anī ifonūf, laa fiya nē anī to laa fouf nē anī ifonūf sain anī bun, Negur nē Itotoya bun ibodok enei agef kisi fel wō youf, “Negurem kusī bun laa wal fe fen, anī adok itob len.”§

⁵⁵ “O laa, ogon kusī wal fiya nē megeir nain?

O laa, ogon waila nain?”*

⁵⁶ Laa nē waila are mosor, mosor nē megeir are lo.

⁵⁷ Anī ere, Negur de tafiyēf! Ī neda Odug Jesus Kristus bunem kusī wal fiya ifanadadig.

⁵⁸ Anī nigin, neu turau tar oboiyou, total ufareg. Ereb takam to yokū yeif. Faimud Odug nē kabī fatuk bagai walogouf, ere nigin, ā keleī, are ā Odug bun kabī walegef anī, ege to ilauf.

16

Negur Nē Tamo Kayau Isennēdiya Nigin Kolekta

¹ Gama Negur nē tamo kayau isennēdiya nē kolekta nigin, ereb aya Galesia sios age difouf nigin aro-kenēdin anī ago gouf.

² Uub ganan nē naa matu bun, ā mugu mugu, augeneī monī walegedig anī foig, fire unog fen, kuru gouf, anī bunem, sain aya asiyouf bun, kolekta baban to unogouf.

³ Sain aya wō auf, tamo ā ugirnēdigen anidi bun, pas afeneīd fen, āgenei ege luwa ado Jerusalem sur afediyouf.

⁴ Ayag idi geid ileyā nigin deuf are, idi aya geid weim malauf.

Pol Nē Wau Irōya

§ 15:54: Asaia 25:8 * 15:55: Hosia 13:14

⁵ Aya Masedonia provins atu ele fen, ā gein asiyouf, ere nigin, aya Masedonia atu alauf.

⁶ Aya ā geid sain naal tabodōf be, yau ado menig sain bun ā geid tabodōf, anī bunem, ā neu iyōya nain be alauf bun usennagauf.

⁷ Aya gama ā ailiyei ken, sain naal ki yeīya anī to orouf. Odug yo youf are, aya sain naal meluk ā geid tabodōf anī wau irok.

⁸ Anī ere, aya Efesus ein abodok ele, Pentikos naa wō youf,

⁹ ere nigin, kabī kaū ado nē sukar odug, aya bun kā fen, age fe di, musei aya kiwai difanaf.

¹⁰ Timoti isiyouf are, ĩ ā geid ibodōf bun, ĩ ereb taka nigin to kumī youf nigin lo welegei, ere nigin, ĩ aya gen Odug nē kabī faali fef.

¹¹ Anī nigin, taka nem ĩ yaleya nigin to itorōf. Yogon delē bun wau inosiya ado sur wiyēge di, ĩ aya gein kel isiyouf. Ī tura tar geid disiyouf nigin, aya ololo afedif.

¹² Neda turada Apolos nigin, ĩ tura tar geid ā gein dilauf nigin, aya total bagai arokenen. Ī gama ileyā nigin wau yenēya sā, anī ere, ĩ ileyā nigin sain biya isiyouf are, ĩ ilauf.

¹³ Lo welegei, momoiya bun total ufareg, tamo total ado kumī sā wōg, total waleg.

¹⁴ Ereb ereb ganan wau laa fiya bun ago gouf.

¹⁵ Ā keleī, are Stefanas nē ibor, Akaia provins oun uyulil momoiya tamo kayau wō de fen, idi dogo neid oroya dō de, Negur nē tamo kayau disennēdiyof nigin, kabī total daledig. Turau tar, aya total bagai arokenek,

¹⁶ are ā eneidi age fediya ado, idi ganan kabī bun disi fen, kabī dalef anidi farumen ubodōg.

¹⁷ Sain Stefanas, Fotunatus ado, Akaikus wō den, aya wau al fen, ere nigin, ereb ā bun tamal ifanamāya anī, idim ā fotokar difanaman.

¹⁸ Are, idi age dife di, neu uur ado ãgeneig filolõ fen. Anĩ nigin, tamo age fediya nigin de fiyēdiya nē kisi walogouf.

Idikeleya Nē Aanya

¹⁹ Asia provins bun sios idi, ã bun aanya sur difef. Akwila Prisila ado aanya, wau sere fiya ado Odug bunem ã bun sur difef. Sios idi neid fõ bun guru difedig idig age difef.

²⁰ Ein tureĩ tar ganan ã bun aanya sur difef. ã abob aan wiyēg fen, fateul bunem umã gouf.

²¹ Aya, Pol imaum bagai aanya enei atotof.

²² Taka ĩ Odug nigin wau to laa fouf are, isisiya ĩ bun isiyouf. O Odug, usi!

²³ Odug Jesus nē wau ifenēya, ã bun ibodõf.

²⁴ Neu wau laa fiya, Kristus Jesus bunem ã ganan bun ibodõf. Momoi.

2 Korin

¹ Pol, Negur nē oroya bunem Kristus Jesus nē aposel wō aun, neda turada Timoti ado,

pas enei Negur nē sios Korin bun ado, tamo kayau fateul ganan Akaia provins bun dibodok bun matotof.

² Tamada Negur ado Odug Jesus Kristus neid wau ifenēya ado wau inosiya, ā bun ibodōf.

Wau Yo Fiya Ganā Nē Negur

³ Negur, neda Odug Jesus Kristus Tama, wau yūya nē Tama, wau yo fiya ganā nē Negur yana talesauf,

⁴ ĩ neda morō ganā bun wauda yo fedig, anī nigin, ada dug wau yo fiya Negur bun tamal talen anī bunem, idi morō adodo anidi waud yo tafedig.

⁵ Kristus nē darau gogūf, ada namedan isif gen, neda wau yo fiya anīg Kristus bunem gogū felef.

⁶ Amā darau malef are, anī āgenei wauī yo fiya nigin ado, kel gei yeīya nigin. Amā waumā yo fef are, anī āgenei wauī yo fiya nigin, anī bunem darau de tekelei amāg malef anī, ā faali gef ulegef.

⁷ Ā nigin nemā waumā iseya total ifaref, ere nigin, amā keleī, are ā nemā darau walegef gen, ā nemā waumā yo fiyag walegef.

⁸ Turamā tar, darau amā Asia provins bun malen anī, ā to keleī youf anī, to oromak. Amā morō faali fiya kisi feleya sā bagai bun mabodon, anī nigin, amā mata ibodōya nē kisig matoron.

⁹ Momoi, amā waumā bun, es fiya tamo kot bun taka laa foug ye di, kisi fedig gen, kisi mafen. Anī ere, amā mug bun to mafar fen, Negur tamo gare den anidi kel turī fedidig ĩ bun mafarauf nigin enei wō yen.

¹⁰ ĩ laa nē willa ado kafī fiya age fiya bun tamal yalelnaman, anī nigin, ĩ fau yalelnamāf. ĩ toku

yalelnamāf nigin waumā iseya ĩ bun manon.

¹¹ Are ā, āgenei kosēya bunem usennamāge di, Negurem age foug. Negur ĩ musei neid kosēya solof fen, wau ifenēya nē ege luwa ifanamāf nigin, museim amā nigin Negur de difiyēf.

Pol Iyōya Nē Delē Falei Yen

¹² Amā mug nigin seli yabiya are yeir: Nemā kisi es fiya bun kurō fesif, are amā tenebur ein, Negur nē fateul ado momoi bunem, ā bun bagai age mafedig. Amā tenebur ein bouwa buru isennēya nē kisi biya bunem to age mafedig, anī ere, Negur nē wau ifenēya bunem age mafedig.

¹³⁻¹⁴ Amā ereb ā uweseg fen, ā keleī anī wal fiya to matotkeneik. Gama ā amā nigin naal keleī, anī ere, ā amā nigin keleī bagai youf anī oromak, anī bunem amā Odug Jesus nē naa bun ā nigin selī malesauf gen, āg amā nigin selimā walesauf.

¹⁵ Aya enei momoi bagai agef wō youf au fen, ā sain uru el fiya walougouf nigin, ā ket ki yeīya anī kisi afen.

¹⁶ Aya Masedonia provins ileya nigin asi, ki ayei ken, Masedonia ele fen, anenem ā gein baban kela asi di, ā aya Judia distrik ileya nigin sur wiyagauf nigin kisi afen.

¹⁷ Sain aya enei kisi afen, aya karika bagai age afen de? Aya, tenebur nē tamo kayau age difedig gen, nameun “Sā” au fen, sigoroum “Yo” auf de?

¹⁸ Anī ere, Negur ĩ age afoug ye fen, agef bagai dō fedig gen, nemā od ā gein isif are yo ye fen, sāya sā.

¹⁹ Ere nigin, Negur Naal, Jesus Kristus ĩ nigin, aya, Sailas Timoti ado geid ā atun wogō mayeīdig anī, ĩ sain tekelei bun, yo ye fen, to sā yedig, anī ere, ereb ĩ yo yef anī, ĩ faimud agef dōf kisi feledig.

²⁰ Ereb Negur age afoug yen od anī ganā Kristus bun yoya dogol. Anī nigin, ĩ bunem ada Negur bun fula fiya medeīya tarousiyoug nigin, sigoradam “Momoi” taudig.

²¹ Negurem, amã ado ã, Kristus bun totol tafarauf nigin age fef. Ì igirnada fen, ada bun mouf fi fel fen,

²² Ì, ada yogon nigin, ada bun yogon uris ino fen, Ì wauda bun, ereb isiyouf anĩ momoi bagai isiyouf ye fen, yogon Awa Uur iben.

²³ Negur Ì aya nigin keleĩ bagai nigin, Ì neu od megeir fe fen, isennēdidig, Ì aya isennauf nigin aweignek, are aya ã nigin wauĩ ina fen, morõ ifeneĩya ator ken, Korin to kela asin.

²⁴ Amã āgenei momoiya nugo fiyēya nigin to age mafef, anĩ ere, amã ã wauĩ al fouf nigin ã geid kabĩ malef, ere nigin, momoiya bunem ã totol ufaregef.

2

¹ Anĩ nigin, aya ã gein morõ ado baban to ki ayeĩf nigin, neu kisi afon.

² Ere nigin, aya ã wauĩ morõ afeneĩf are, aim anĩ aya wau al fiya ifanauf, are ã aya morõ afenein anim dogol sã de?

³ Aya enei bagai nigin atotkenein, are sain aya asiyouf bun, idi aya wau al fiya difanauf anidi bun, aya morõ to alouf nigin age afen. Aya enei momoi auf, are sain aya wau al fef, ã gananeg wauĩ al fef.

⁴ Aya morõ odug ado wau gudũ fiya bun, inã odug ado atotkenein, are aya ã morõ afeneĩf nigin to age afen, anĩ ere, ã bun neu wau laa fiya odug bagai anĩ, ã keleĩ youf nigin age afen.

Mosor Tamo Nē Mosor Nigin Weder Tu Keleya

⁵ Tamo anim morõ ifenen ouf are, Ì aya morõ to ifanan, anĩ ere, Ì ã ganan morõ sau fiya ifenein. Aya totol bagai to arõf nigin ‘sau fiya’ auf.

⁶ ã musei gananem Ì darau wenēgen are, Ì nigin kisi feleya.

⁷ Age fiya ban, gama ã in mosor wedereĩ tu kel fen, Ì wau yo gouf, anĩ bunem, Ì wau gudũ fiya fatuk bagaim to kuroub fiyēf.

⁸ Anĩ nigin, aya Ì āgenei wauĩ laa fiya baban ufelnēgouf nigin totol od arokeneik.

⁹ Aya, pas bun ã atotkenein, ere nigin, aya ã kisi ayeĩ di, ã ereb ereb ganan bun neu od dõ gouf anĩ ailauf nigin age afen.

¹⁰ ã taka nē mosor nigin wedereĩ tu kalauf are, ayag in mosor nigin wederou tu kalauf. Ereb taka weder tu keleya nē ibodõ di, aya wederou tu kelen, are aya āgenei biya fiya nigin, Kristus mala bun wederou tu kelen,

¹¹ are Satanem ada to wal fada fen, bilã youf nigin age afen. Ere nigin, ada yogon kisi keleĩ.

Bar Itenēya Mata Nē Kabĩ Tamo Tar

¹² Sain aya Kristus nē biya od wogõ auf nigin Troas taun ele fen, Odug Ì aya nigin sukar kã fel mog ailen,

¹³ aya fau nameun wau inosiya san, ere nigin, aya turau Taitus an to ailen. Anĩ nigin, aya idi dabuo afiyēid fen, Masedonia provins elen.

¹⁴ Anĩ ere, Negur de mafiyēf, Ì faimud amã Kristus bun kusĩ wal fiya bun uyū iroukanamādig, agef fen, Ì, amã bunem, Kristus nigin keleĩ anĩ nē sumeĩ biya, modou ganan bun firagagaũ feledig.

¹⁵ Ere nigin, amã idi kel gei fedif anidi ado idi isaikalauf anidi atun, Negur mala bun, Kristus nē sumeĩ biya.

¹⁶ Taka bun amã laa nē sumeĩ, taka bun amã mata ifenēya nē sumeĩ biya. Aim anĩ kabĩ age fiya yaleya kisi feleya?

¹⁷ Amã, musei idi Negur nē od nigin moni mala kabĩ daledig gen sã. Age fiya ban, Kristus bun, amã, tamo Negurem sur fedin gen, Negur mala bun momoi nē bunem wogõ maudig.

3

¹ Amã baban yanamã yaleseya nigin gariya manof de? Amã, tamo tunĩ age difedig gen, kabĩ biya daledig nē isennēya pas, amam ã gein sur mafouf be, āgem amã bun sur gouf de?

² Æ aug anī, nemā pas, are waumā bun itoton, age fe di, tamo ganan kelei ken, diwasedig.

³ Æ aug anī, Kristus nē pas, nemā kabī nē kaū anī yaor gef, itoton are ink bunem sā, are mata ibodkeleya Negur nē Awa Uur bunem, meein fadaleya bun sā, are tamo waud bun.

⁴ Amā enei morok, ere nigin, amā Kristus bunem, Negur nigin moiya ado.

⁵ Amā ereb taka amā mug bunem isif yeya kisi feleya sā, anī ere, amā nemā kisi feleya Negur bunem isif.

⁶ Negur ī amāg bar itenēya mata nē kabī tamo wōya kisi feleya in- enaman, are lo itotoya nē sā, Awa Uur nē, ere nigin, lo itotoya anim idenkesidig, anī ere, Awa Uur im mata ifenēdidig.

Bar Itenēya Mata Nē Fula Fiya Medeīya

⁷ Kabī laa irou isidig, are meein bun gegē itoton anī fula fiya medeīya ado isin, anī nigin, Israel tamo kayau yogon fula fiya medeīya nigin meleid dē yel fen, Moses nē nawa lo feleya kisi feleya san, anī ere, fula fiya medeīya anī komomor fen. Kabī age fiya fula fiya medeīya ado isin ouf are,

⁸ Awa Uur nē kabī nē fula fiya medeīya anim lo nē fula fiya medeīya anī to wal fouf de?

⁹ Tamo neid mosor nigin bouweid bun od yūdig nē kabī anī, fula fiya medeīyauf are, kabī madur bagai irou isidig in fula fiya medeīya nē odug naig fiya bagai!

¹⁰ Ereb kulu fula fiya medeīya yenen, are gama nē fula fiya medeīya odug bagai nigin, kulu nē are sa kelen.

¹¹ Ereb komomor falauf nē anī, fula fiya medeīya ado isin ouf are, faimud ibodkeleya nē fula fiya medeīya, yogon odug naig fiya bagai!

¹² Anī nigin, amā waumā iseya age fiya ado nigin, amā wogōya bun tuninīrya sā.

¹³ Amā Moses gen sā, ī yogo nawa bun lalan komomor fe mog, Israel tamo kayau to dilouf nigin, yogo nawa bun gabar dede fedig.

¹⁴ Anī ere, idi neid kisi totolen, are sain enei bun, bar itenēya tubu iwe- seya bun gabar de anim fau ibodok. Gabar anī fau yaleleya sā ibodok, ere nigin, Kristus bun dogol anī yale- leyauf.

¹⁵ Sain enei buneg, Moses nē ito- toya iweseya bun, gabar dogo neid waud dede fedig.

¹⁶ Anī ere, ereb sain taka ī Odug bun falei youf are, gabar are lelek felef.

¹⁷ Gama, Odug ī Awa Uur, Odug nē Awa Uur ibodok nē an, are katī feleya taka sā.

¹⁸ Anī nigin, ada ganan, nawada bun gabarem dede fiya sā are, Odug nē fula fiya medeīya tail fen, ada bun so fe di, ada ī gen falei fada di, neda fula fiya medeīya odugef iledig, are Odug bunem isidig, ī anī Awa Uur.

4

Mis Namen Safina Biya Bagai

¹ Anī nigin, amā Negur nē wau yūya bunem kabī enei ado nigin, amā waumā bun to folo redig.

² Anī ere, amā inokōya ado mama nē naab matoron, amā to madeg ken, Negur nē od to falei mafeledig. Anī ere, amā momoi nē anī yaor mafe fen, Negur mala bun, tamo ganan dogo neid kisi es fiya bun, amā mug nigin yanamā iseledig.

³ Amā nemā biya od dede fiyauf are, idi inanakalauf nē anidi bun dede fedif.

⁴ Teneub enei nē waitou, idi moiya sā anidi neid kisi ifofakelen, anī nigin, Kristus ī anī Negur nē malakanon, yogon fula fiya medeīya nē biya od anī nē lalan, idi ileyā kisi feleya sā.

⁵ Amā, amā mug nigin to wogō maudig, anī ere, Jesus Kristus ī Odug mau fen, amā Jesus nigin āgenei fer- fer maudig.

* 4:6: Jenesis 1:3

6 Negur ĩ iron, “Gugum namen lalan fula fei,”* yen, inim Kristus nē nawa bun yogon fula fiya medeĳya anĳ, amā keleĳ youf nigin, yogon lalan waumā bun fula foug nigin inon.

7 Anĳ ere, amā nameman mis namem gen, safina biya bagai enei ado, are ereb ereb ganam wal fiya nē megeir, are amā nemā sā, Negur nē anĳ yaorouf nigin.

8 Amā siri ganam bun totol bagai lai difamak, anĳ ere, narĳ famāya sā; ereb taka age mafouf nigin neneya difanamak, anĳ ere, amā waumā folo reya sā;

9 darau difanamak, anĳ ere, to folō famalef; didenamā dirarak, anĳ ere, daū famaleya sā.

10 Amā faimud Jesus nē laa anĳ, bouwamā bun faali ma mayōdig, are Jesus nē matag bouwamā bun yaorouf nigin.

11 Amā mata mabodok, anĳ ere, faimud Jesus nigin laa bun dine-namādig, are yogon matag nemā laa nē bouwamā bun yaorouf nigin.

12 Anĳ nigin, laa, amā bun kabĳ yaledig, anĳ ere, mata, ā bun kabĳ yaledig.

13 Negur nē Itotoya eig yef, “Aya momoi aun, anĳ nigin, aya wogō aun.”† Momoiya de tekelei anĳ nē kisi bunem, amāg momoi mauf, anĳ nigin, amāg wogō mauf,

14 ere nigin, amā keleĳ, Negur ĩ Odug Jesus laa bun tamal kel turĳ fen anim, amāg Jesus geid kel turĳ fama ken, amā ā geid in mala bun inenadauf.

15 Enei ganam are, āgenei biya fiya nigin, anĳ bunem, wau ifenēya anĳ tamo kayau bun kaka fef ile di, dogo neid Negur de fiyēya gogū fef anim, Negur fula fiya medeĳya ifenēf.

16 Anĳ nigin, amā waumā to folo redig. Amā bouwamā buru foinenem ilumuk iledig, anĳ ere, amā nameman naa ganam bun mataya tobol fe iledig.

17 Nemā karika ado sain modeg nē morō anim, faimud ibodkeleya nē fula fiya medeĳya, are morō anĳ ganam fatuk bagai wal fiya anĳ, amā malouf nigin kabĳ yaledig.

18 Anĳ nigin, ada ereb maladam tailef ani to lo tafalauf, anĳ ere, ereb maladam to tailef anĳ lo tafalauf. Ere nigin, ereb tailef, are sain tobega nē, anĳ ere, ereb to tailef, are faimud ibodkeleya nē.

5

Saa Tanon Ibodōya Nē Bouwa

1 Ada keleĳ, tenebur nē salafat ada anĳ namem tabodōdig anĳ narĳ foug are, ada fō taka Negur bun tamal ado, are saa ilun oun faimud ibodkeleya nē fō, are tamo imam inoya sā.

2 Gama ada fō enei bun tabod ken, osi taudig, age tafe fen, saa ilun neda ibodōya modoū bunem ifounnadauf nigin wauda fatuk irōdig,

3 ere nigin, ada saa tanon ibodōya nē bouwa ifounnadauf sain bun, ada gemū to diledauf.

4 Ada salafat enei bun tabod mog, morō faali tafe fen, osi taudig, ere nigin, ada salafat enei lelek fel kanadauf nigin to orodadig, anĳ ere, saa ilun neda ibodōya modoū bun ifounnadauf nigin orodadig, anĳ bunem, ereb laa nē anĳ, mata anim itob lauf.

5 Negur ĩ enei nigin bagai ada inoda fen, ada wauda bun, ereb isiyouf anĳ momoi bagai isiyouf ye fen, Awa Ur iben.

6 Anĳ nigin, ada faimud kisi totol ado fen keleĳ, are ada bouwada buru ado tabodok sain anĳ bun, ada Odug weim to tabodōdig.

7 Ada momoiya bunem tabodōdig, ereb maladam tailef bunem sā.

8 Aya arok, ada kisi totol ado fen, ada bouwada enei tator ken, Odug geid takai tabodōf nigin orodaf bagai.

9 Anĳ nigin, ada bouwada buru ado tabodok be tatorok be, ĩ wau al foug nigin ada kisi tatenēf.

† 4:13: Sam 116:10

¹⁰ Ere nigin, ada ganan Kristus nē es fiya sia wagen wō tauf bagai, are mugu mugu, ereb biya be sane be, ada bouwada buru ado tabod ken, age tafen anī kilei, yogon mala solo yalouf.

Komo Fiya Nē Kabī

¹¹ Amā Odug anini fiyēya anī keleī nigin, amā tamo waud yaleya nigin age mafedig. Amā naig fiya anī Negur keleī bagai, age fiya gen, amā nigineg āgenei kisi es fiya bun yaorouf nigin, aya wau irok.

¹² Amā ā bun baban yanamā yaleseyā nigin to age mafef, anī ere, ā amā yanamā walesagauf nigin sain mafeneik, anī bunem, idi ereb waud bun ibodok anī fotokar, ereb meledim dilef anī nigin yeneid dalesedig anidi bun, ā solof irōya kisi feleya.

¹³ Amā wadā idenamāf, are Negur nigin. Amā kisi biya adouf, are ā nigin.

¹⁴ Kristus nē wau laa fiya anim amā toli famādig, amā kisi mafef, tekeleim ganan nigin laa fen, anī nigin, yogon laa bun, ganan gare den.

¹⁵ Ī ganan nigin laa fen, anī nigin, idi mata dibodok anidi dogo nigin to dibodōf, anī ere, ĩ idi nigin laa fe di, kel turī fiyen anī nigin dibodōf.

¹⁶ Anī nigin, gama einenem ilef ganan, ada tamo nē karīya bunem taka to keleī youf. Ada kulu naab enei bunem Kristus kelein, anī ere, ada baban to age tafedig.

¹⁷ Anī nigin, taka ĩ Kristus bun ibodok, Negur ĩ yale, mata bagai inon. Tubu are ilele di, mata anī isin.

¹⁸ Enei ganan Negur bun tamal, ĩ Kristus bunem ada ĩ geid komo fada fen, komo fiya nē kabī anī ada ifanadan.

¹⁹ Are Negur ĩ tamo nē mosor idi bun to iwes fen, Kristus bun tenebur tamo kayau ĩ geid komo fedin. Agef fen, Negur ĩ komo fiya nē od ada bun inon.

²⁰ Anī nigin, amā Kristus nē soosi tamo, are Negur ĩ yogon wau irōya, amā bunem wogō yedig gen. Amā Kristus fotokar ā magoneik, Negur geid komo gouf.

²¹ Negur ĩ, ada nigin ye fen, Kristus mosor sā anī, mosor ĩ bun inon, are ĩ bunem, ada Negur nē madur bagai wowā tauf nigin age fen.

6

¹ Negur nē kabī tura tar amā, ā total bagai marokeneik, are Negur nē wau ifenēya walegen anī, ege to aaluwan ilauf.

² Ere nigin, Negur ĩ irok,
“Neu wau ifenēya sain bun, aya ō karī ayon,
kel yaleya nē naa bun, aya ō asennon.”*
Aya ā arokeneik, gama eī Negur nē wau ifenēya nē sain, gama eī kel yaleya nē naa.

Pol Nē Morō

³ Amā taka delē ilauf bun ye to tū fouf nigin meein to manodig, are nemā kabī yana sane to ilauf nigin age mafedig.

⁴ Age fiya ban, amā, naab ganan bun, amā Negur nē kabī tamo bagai ya anī mafelnēdidig, are feseya sā ifareya bun, darau, morō, wau morō bun,

⁵ didenamak bun, kalabus bun, kusī bun, kabī total bun, bō mulaī itorōya bun ado, naū bun,

⁶ karētut bun, keleī bun, molol bun, dor yaleya bun, Awa Uur Fateul bun ado, wau laa fiya bagai bun,

⁷ momoi nē wogō bun, Negur nē megeir bun, madur bagai nē willa ima biyalē ado ima kilē bun,

⁸ tunī yanamā dalesedig ado tunī to yanamā dalesedig bunem, yana sane inoya ado yana biya inoya bunem; amā momoi marok, anī ere, amā idegēya tamo gen kisi difedig;

⁹ idi amā nigin keleī, anī ere, keleī sā gen kisi difedig; gare mauf, anī ere, amā mata mabodok; didenaman, anī ere, to didenamakesin;

* 6:2: Asaia 49:8

10 waumã gudũ fef, anĩ ere, faimud waumã kulĩ yedig; maleg, anĩ ere, musei safina kisi feleya manenēdidig; ereb taka sã, anĩ ere, ereb ereb ganan ado.

11 Korin tamo kayau, amã karika wogõ mayein. Age ma fen, amã ã bun waumã sukar fatuk bagai kã mafen.

12 Amã nemã waumã laa fiya ã bun to mafokeledig, anĩ ere, ãgenei wauĩ laa fiya amã bun ufokelegedig.

13 Aya neu kesu tar bun gen ã wogõ ayeik, ã solog fen, wauĩg sukar fatuk bagai kãg.

Momoiya Sã Geid To Bagu Gouf

14 Momoiya sã geid to bagu gouf. Madur bagai sane ado naig de nigal dũf? Lalan gugum ado ere bunem nigal dũf?

15 Kristus Satan ado naig fe di, waud tekelei youf? Ere anĩ momoiya ado, momoiya sã atun tekelei?

16 Negur nē tempel, idegēya waitou atun, ere mamad katõ fiya ado? Are ada mata ibodõya Negur nē tempel. Negur iron kilei, “Aya idi geid mabod ken, idi atun ayõf, age afe fen, aya idi neid Negur ouf, age afe di, idi neu tamo kayau ouf.”†

17 “Anĩ nigin, utornēdig fen,
fire ufareg,
Odug irok.

Ereb amuyē ado to kobũg,
ago ge di, aya ã aleyeĩf.”‡

18 “Aya ãgenei temeĩ di,
ã nau kesu tar, nau barai tar ouf,
Odug saa ilun nē kusĩ tamo guri
feid uyu iroudig anĩ irok.”§

7

1 ã neu oboiyau, ada Negur age afouf yen od enei ado nigin, ada dug ereb ereb ganan bouwa ado uur amuyē ifenēdig anĩ lilik tafe fen, Negur anini fiyēya bunem fateul bagai wõ tauf.

Pol Nē Kulĩya

2 ãgenei wauĩ bun, amã nigin modoũ unog. Amã aib taka bun to kũ mafenen, amã aib taka sane bun to manenen, amã aib taka idegnēya bunem ereb ereb to son mafen.

3 Aya ã bouweĩ yũya nigin od enei to wogõ auf. Ere nigin, aya mogo oron, are ãgenei ibodõya modoũ, amã waumã bun ado nigin, amã ã geid mata tabodõf be, gare tauf.

4 Aya ã nigin fatuk bagai momoi au fen, fatuk bagai ã yeneĩ alesef. Aya wau fatuk bagai yalesef, nemã morõ ganan bun, neu wau kulĩya gogũ felef.

5 Sain amã Masedonia masin, nemã bouwamã enei si inoya san, anĩ ere, amã siri ganan bun darau difanaman, serē kiwai difanamã mog, nameman kumĩ ado.

6 Anĩ ere, Negur ĩ waud morõ adodo waud yo fedidig, Taitus isin bunem ĩ waumã yo fen.

7 Are, in isin bunem dogol sã, anĩ ere, wau yo fiya ĩ wenēgen anĩ bunem ado. ã aya uleyagauf nigin bagai oroyein, ereb wõ yen anĩ nigin ãgenei awaun yeya odug fen, ã aya nigin kisi fatuk bagai walegedig anĩ ĩ irokanaman, anĩ bunem, neu kulĩya odug bagai iselen.

8 Aya neu pas bunem wauĩ gudũ fiya afenein, anĩ nigin, aya uruwa bun awaun aun. Anĩ ere, gama aya anĩ nigin to awaun auf, ere nigin, aya ailef, are neu pas anim, sain naal bagai dogol wauĩ gudũ fen.

9 Anĩ ere, gama aya wau al fef, are wauĩ gudũ fiya afenein anĩ nigin sã, anĩ ere, ãgenei wauĩ gudũ fiya anim, wauĩ faleiya bun irouleyein nigin. Ere nigin, ã Negur nē oroya kilei wauĩ gudũ fen, anĩ nigin, amã ã daũ fiya to mafenein.

10 Wau gudũ fiya Negur nē orof kilei anĩ, wau faleiya irusi, kel yaleya bun irouledig, anĩ nigin, ada to awaun taudig, anĩ ere, tenebur nē wau gudũ fiya laa irusidig.

† 6:16: Levitikas 26:12; Jeremaia 32:38; Esekiel 37:27 ‡ 6:17: Asaia 52:11; Esekiel 20:34, 41

§ 6:18: 2 Samuel 7:14; 7:8

¹¹ Negur nē wau gudū fiya eneim, ā bun faat yun anī ulogouf, are ereb totol bagai wauī irōdig, morō wō yen anim to lai yeīf nigin ereb ā aug madur gedig, ereb sane nigin seye gedig, ereb Negur nigin anini gedig, ereb taka nigin bagai oroyēdig, ereb kabī totol walegedig, ereb sane age fen bun mala solo wenēgedig. Ereb ereb ganan bun, ā aug enei nigin kū fenēya taka sã anī yaor gen.

¹² Anī nigin, aya ā bun atoton are, taka ī sane age fen be, takam ī bun sane age fen anī nigin sã, anī ere, ā amã nigin naig ge wauī wanamãgef anī, Negur mala bun aug ulogouf nigin age afen.

¹³ Enei ganan nigin amã waumã yo fef.

Amã waumã yo fiya anī teten, amã Taitus ī fatuk bagai wau al fen anī mail fen, fatuk bagai waumã al fen, ere nigin, yogon uur ā ganan bunem filolō fen.

¹⁴ Aya ī bun yeneī alesen, age afe di, ā aya mama to wanagen. Anī ere, ereb amã wogō mayein anī ganan momoi, age fiya gen, amã Taitus bun yeneī malesen areg, momoi anī yaoren.

¹⁵ Ā ganan ī dōg fen, aniniya ado tererēya bunem ī walegen anī, ī kisif fen, ā nigin yogon wau laa fiya mugi bagai ilen.

¹⁶ Aya, ereb ereb ganan bun, ā nigin, sã momoi auf nigin, wau al fef.

8

Wau Ifenēya Bunem Kolekta Inoya

¹ Turamã tar, amã, ā wau ifenēya Negur Masedonia sios ifenēdin anī keleī youf nigin oromak.

² Idi morō odug bagai dale fen, maleg bagai dibodon, anī ere, idi neid waud kulīya mugi ado bun, idi isennēdiya nigin kolekta moni musei difenēdin.

³ Aya kurō afeis eig au arokeneik, idi ifenēdiya kisi feleya ado, anī wal fesiyag difenēdin. Dogo neid oroyam,

⁴ idi Negur nē tamo kayau isennēdiya kabī amã geid malouf, are dem de fen, anī nigin totol bagai dirokanaman.

⁵ Age dife fen, idi, amã idi nigin kisi mafen kilei, to age difen, anī ere, idi anī wal fiya age difen. Idi dogo anī ketem Odug difen ken, anī dumen Negur nē oroya dō de, idi dogo amã difanaman.

⁶ Anī nigin, amã Taitus totol bagai marokenen, ī uruwa bun gariya inon nigin, wau ifenēya nē kabī enei ā buneg bure falauf nigin marokenen.

⁷ Anī ere, ā ereb ereb ganan bun, momoiya bun, wogō bun, keleī bun, wauī adok irōya ganan bun, āgenei wauī amã nigin laa fiya bun, kisi feleya ago gef gen, wau ifenēya nē kabī enei buneg ā kisi feleya ago gouf.

⁸ Aya ā ago gouf bagai nigin sii fiya to afeneik, anī ere, aya sios tunī kabī totol dalef anī bunem, āgenei wauī laa fiya anī, momoi be sã be anī es ayeīf.

⁹ Ere nigin, ā neda Odug Jesus Kristus nē wau ifenēya keleī, are ī safina kisi feleya, anī ere, ā nigin ī maleg wō yen, are yogon maleg bunem ā safina kisi feleya wō gouf nigin, ī age fen.

¹⁰ Aya enei nigin neu kisi, āgenei biya fiya nigin afeneik. Yar tubu bun, ā ket wenēdigen anī dogol sã, ā ago gouf nigin wauī iseya anīg adon.

¹¹ Gama kabī anī udikalagauf, anī bunem, ā ago gouf nigin, āgenei oroya totol bagai ibodon gen, ā safina kisi feleya kilei kabī anī bure walagauf.

¹² Oroya anī an ibodōf are, Negur ereb tamo taka safina ado kilei anī yalouf, ereb tamo taka safina sã bunem sã.

¹³ Amã nemã oroya, tunī waud karika ifenēdi di, ā wauī morō ifeneik anī sã, anī ere, ganan kisi kisi feleya ibodōya nigin oromak.

¹⁴ Sain enei bun, āgenei ereb ereb musei anim, ereb idi lau difef anī gadō gouf, anī bunem, dogo neid ereb ereb musei animeg, abag ereb

ã lau gef anī gadō difouf, age dife di, kisi kisi feleya ubodōgouf,

¹⁵ are Negur nē Itotoya eig ye irok kilei, “Taka ī safina musei kuru fen, ī musei bagai to yalen, taka ī naal kuru fen, ī to lau fen.”*

Taitus Korin Sur Difiyen

¹⁶ Aya, Negur ī, kisi aya ã nigin ado kisi de tekelei, Taitus nē wau bun inon nigin, Negur de afiyek.

¹⁷ Ere nigin, Taitus ī, nemã od ã ki yeīya nigin anī, de ye fen, ī yogon wau irōya odug bagai ado, yogon oroyam ã gein isif.

¹⁸ Amã, turamã taka biya od bun yogon kabī nigin, sios ganan yana dalesedig anī, Taitus ado sur mafedif.

¹⁹ Enei dogol sã, turamã ī anī, wau ifenēya nē kabī enei bun, amã geid mayok malauf nigin, sioseme digirnen, kabī are, amã Odug bun fula fiya medeīya marousiyouf nigin ado, amã nemã isennēdiya nigin waumã irōya mafelnēdiyof nigin kabī malef anī.

²⁰ Amã, wau ifenēya bunem ege luwa musei dinon enei, lo ma mog, tunī anī nigin od sane to dirōf nigin oromak.

²¹ Ere nigin, amã Odug mala bun ado, tamo meleid buneg, ereb madur bagai anī age mafouf nigin lo mafedig.

²² Amã, turamã taka, idi geid sur mafedif, ī amã sain musei es mafiye ken, ī ereb ereb musei bun kabī total yaledig anī mailedig, ī ã nigin fatuk bagai momoi yef nigin, ī gama isennēdiya nigin kabī total yaleya orib yef.

²³ Taitus nigin, ī neu tã tar taka, ī ã nigin neu kabī turau; nemã turamã tar nigin, idi sios neid arū tamo, Kristus bun fula fiya medeīya dirousidig.

²⁴ Anī nigin, āgenei wauī laa fiya nē kaū ado, amã ã yeneī malesedig anī nē gariya nē kaū, tamo eneidi ufelnēdigouf, anī bunem, sios idi anī dilouf.

9

¹ ã mogo keleī nigin, aya Negur nē tamo kayau bun kabī enei nigin baban to atotkeneif.

² Ere nigin, aya isennēdiya nigin āgenei wauī irōya total anī kelei ken, Masedonia tamo kayau bun yeneī alesedig, are yar tubu bun tamal isi, gama ã Akaia an isennēdiya nigin dodok gen anī arokenēdi di, isennēdiya nigin āgenei wauī irōya total anim, idi musei waud fã yen.

³ Anī ere, aya turau tar sur afedin, are amã ã yeneī malesedig anī enei bun ege to ilauf, anī ere, ã aya aron gen dodok gouf nigin, age afen.

⁴ Ere nigin, Masedonia tamo tunī aya geid masi fen, ã dodok fiya sã anī dilouf are, amã ã nigin momoiya age fiya ado nigin mama malouf, āg mama yeif nigin ereb od taka sã.

⁵ Anī nigin, aya kisi afen, aya turau tar total bagai arokenēdi di, idi ketem ã gein dile fen, ã wau ifenēya nē ege luwa musei wenēdigouf urōgen anī nigin dodok fiya bure difalauf, are deuf, aun. Age dife di, wau ifenēya nē ege luwa dodok fiyauf, are nugo yeīya bunem ege luwa inoya sã.

Wau Ifenēya Bunem Safina Ifenēya

⁶ Enei karī walagauf, aib taka faat musei sã irarak, ī musei sãg kusu fouf, aib taka faat musei irarak, ī museig kusu fouf.

⁷ Tamo mugu mugu, ereb yogon wau bun ifenēya nigin kisi ifon anī ifenēf, are wau morō bunem sã, takam nugo fiya bunem sã, ere nigin, Negur ī tamo wau kulīya bunem ifenek nigin wau laa fef.

⁸ Negur ī wau ifenēya ganan ã kisi feleya bagai ifeneīya kisi feleya, are ereb ereb ganan bun, ã faimud ereb ã kisig fen, lau gef anī ganan waleg fen, kabī biya ganan kisi feleya bagai ago gouf nigin age fef.

⁹ Negur nē Itotoya eig ye irok kilei: “Ī yogon safina firagagaū feid fen, maleg ifenēdin;

* 8:15: Eksodas 16:18

yogon madur bagai faimud ibodkalauf.”*

¹⁰ Negur ī, faat irarāya tamo, faat ado yōya nē bret ifenēdig, ī āgenei faat irarāya nigineg ifen ken, musei inouf, agef fen, ī āgenei madur bagai nē kusu fiya odug inouf.

¹¹ Negur ī ereb ereb ganan bun, ā safina ado inoyeīf, anī bunem, ā sain ganan wau ifenēya bunem musei wenēdigouf, ago ge di, idi amā bunem āgenei ege luwa dale fen, Negur de difiyēf.

¹² Kabī enei ā walegedig anim, ereb Negur nē tamo kayau lau difef anī nigin dogol to isennēdif, anī ere, ago ge di, musei idi Negur de difiyek buneg gogū felef.

¹³ Kabī ā walegedig anī bunem, ā aug nigin yaor gen, anī nigin, tamo idi Negur yana dalesauf, ere nigin, ā Kristus nē biya od kurō wesig fen, anī dōg fen, ā wau ifenēya bunem idi adok ganan bun musei wenēdigen.

¹⁴ Age de fen, ā nigin idi neid kosē bun, dogo neid waud ā bun isiyouf, ere nigin, Negur ī wau ifenēya ereb ereb ganan wal fiya anī ā ifenein.

¹⁵ Negur nē ege luwa dir feleya kisi feleya sã anī nigin, Negur de tafiyēf!

10

Pol Yogo Ne Kabī Nigin Isennēya Od

¹ Aya, Pol, tunī dirōdig, aya ā geid tabodok sain bun, are yukeleya dedig, aya ā geid to tabodok sain bun, are total od irōdig dedig, aya Kristus nē imatkesiya ado molol nem eig au, ā arokeneik.

² Aya asiyouf sain bun, aya tunī amā teneub enei nē lo fiya bun mabodōdig dedig anidi bun, aya total od arōf nigin kisi afef gen, to age afouf nigin, aya ā agoneik.

³ Momoi, amā tenebur ein mabodok, anī ere, amā kusī nigin, tenebur ein age difedig gen to age mafedig.

⁴ Amā nemā kusī nē waila are, teneub enei nē sã, anī ere, idi kau total narī fiya nigin Negur nē megeir ado.

⁵ Amā, monēya ado, ereb ereb ganan Negur nigin keleīya nē naabura gudū fiya nigin yogo iselef anī, narī mafedidig, age mafe fen, amā kisi ganan male fen, Kristus dō fiya nigin marouledidig.

⁶ Sain ā, āgenei dō fiya ganan bun, kisi feleya bagai wō gouf, amā fe temeleid ganan darau ifenēdiya nigin dodok mafef anī kisi falauf.

⁷ Ā ereb ereb teten nē anī dogol lo gedig. Taka ī yogo nigin Kristus nē ye fen, anī nigin total bagai momoi youf, amāg ī gen Kristus nē anī, ī baban kisi fouf.

⁸ Aya, ā daū yeīya ban yalesneīya nigin Odug yana ifanaman anī nigin, yanau naal yaor afe alesaufeg, aya anī nigin to mama fiyauf.

⁹ Aya neu pas bunem, ā kumī ifeneīya nigin age afef gen, ā kisi gef anī to orouf.

¹⁰ Ere nigin, tunī dirōdig, “In pas are morō ado fen, total ado, anī ere, ī amā geid mabodok sain bun, ī maleg le fen, yogon wogō are ege iledig.”

¹¹ Tamo age fediya idi keleī youf, amā ā geid to tabodok sain bun, nemā pas bun amā naig be fiya anī, amā ā geid tabodok sain bun, amā de dō maf, age mafouf bagai.

¹² Amā, tunī dogo neid yeneid dalesedig idi geid, kerē sã dede to mauf. Idi dogo, dogo nigin dogo bun fele dife fen, dogo nigin dogo bun es difef anidi, idi kisi biya sã.

¹³ Anī ere, amā yanamā to daū wal ma fen, malesauf, anī ere, amā kabī Negur igirkanaman bun dogol yanamā malesauf, kabī are ā buneg ilef.

¹⁴ Amā yanamā gerō bagai to males maroulef, amā ā gein to masim are, amā yanamā gerō bagai males maroulem, ere nigin, amā Kristus nē biya od ado, ā geineg masin.

* 9:9: Sam 112:9

15 Amã tunim kabĩ dalen anĩ bun to daũ wal mafe fen, yanamã malesedig. Nemã waumã iseya are eig fiya, ãgenei momoiya odugef iseled, ã atun amã nemã kabĩ akor fatuk bagai bilalaũ fef ilauf,

16 anĩ bunem, amã ãgenei akor wal mafesil fen, biya od wogõ mauf. Ere nigin, amã tamo taka nẽ akor bun kabĩ dalen anĩ nigin, yanamã yaleseya to oromak.

17 Anĩ ere, “Taka ã yana yalesef, ã Odug bun yana yalesauf.”*

18 Ere nigin, taka ã yogo yana yalesef nigin, Negur to de yedig, anĩ ere, taka ã Odugem yana yalesef anĩ, Negur de yedig.

11

Pol Idegẽya Aposel Geid

1 ã aya utornag len, neneya od naal wogõ auf nigin aya wau irok, anĩ ere, ã mogo yeir ago gef.

2 Aya ã bun Negur nẽ kiyeyĩ bunem kiyeyĩ afeneik. Aya ã aiweĩ tekelei, Kristus bun agirnein, are aya ã kayau taulei bagai gen, ã gein arouliyeĩf nigin age afen.

3 Anĩ ere, Eva gougourem ed fe idegenen gen, ãgenei kisi sane le di, ã ãgenei wauĩ bun, Kristus bun ãgenei momoiya ado kisi karõtut utorõg fen, sane lauf nigin, aya kumĩ auf.

4 Takam ã gein isi fen, Jesus taka nigin, amã wogõ mayein anĩ nigin gen sã, wogõ youf be, ã uur fire, uur ã walegen gen sã anĩ walogouf be, ã biya od fire, biya od ã walegen gen sã anĩ walogouf are, ã anĩ karika bagai karĩ wedigedig.

5 Anĩ ere, aya kisi afef, aya aposel yeneid odug anidi farumen to bagai abodok.

6 Aya wogõya nigin biya sã be, anĩ ere, aya keleĩ ado. Amã, enei, ã bun naab ganan bun, ereb ereb ganan bun yaor mafen.

7 Aya yug nigin aukesil fen, Negur nẽ biya od mala sã ege bagai wogõ

ayein bunem, ã alesnein anĩ mosor de?

8 Aya ã aruneĩ yaleya nigin, sios tunĩ bun tamal isennaya alen anĩ, sios tunĩ idi bun tamal bẽ alen gen.

9 Takag, sain aya ã geid tabod ken, ereb taka nigin lau afen, aya ã taka to morõ afenein, ere nigin, turau tar Masedonia bun tamal disin idi, ereb aya lau afen kisi feleya bagai difanan. Ereb ereb ganan bun, aya yug ã morõ ifeneiãya ator ken, toku age afouf.

10 Kristus nẽ momoi anĩ, aya nameun ibodok nigin, taka nem Akaia provins bun neu yanau yaleseya enei to katĩ falauf.

11 Ere nigin? Aya ã nigin wau laa fiya sã nigin de? Negur ã keleĩ, aya ã nigin wau laa fedig!

12 Aya ereb ereb nigin idi yeneid dalesedig anĩ bun, amã idi geid tekelei ya anĩ karĩ douf nigin orodidig anidi neid naabureid gudũ fiya nigin, ereb aya age afef anĩ, toku age afouf.

13 Ere nigin, tamo age fediya are idegẽya aposel fen, idegẽya kabĩ tamo, idi Kristus nẽ aposel neweid dale fen, kabĩ daledig.

14 Are terẽya sã, ere nigin, Satan ã yogo bagai fula fiya nẽ engel nawa yaledig.

15 Anĩ nigin, Satan nẽ kabĩ tamo idi, madur bagai nẽ kabĩ tamo neweid dalouf are, to terẽ tãuf. Idi neid didikalauf bun, idi age difedig kilei dalouf.

Pol Yogon Kabĩ Nigin Morõ Musei Yalen

16 Aya baban arok, taka nem aya nigin neneya tamo to youf. Anĩ ere, ã ago gouf are, aya neneya tamo gen waleyag, anĩ bunem, ayag yanau naal alesauf.

17 Aya yug yanau yaleseya enei bun, aya Odug gen to wogõ auf, anĩ ere, neneya tamo gen wogõ auf.

18 Musei idi, teneub enei nẽ tamo kayau age difedig gen, yeneid dalesedig nigin, ayag yanau alesauf.

* 10:17: Jeremaia 9:24

19 Ā kisi biya bagai ado nigin, ā wauñ al fiya ado neneya tamo karī wedigedig!

20 Ere nigin, taka nem ā ferfer ineneik, ereb ereb ganan bun ā kadir ineneik, idegēya bun yaleyeik, yogo yana yaor falaisi ilun iselef be, weleñ fā fef bun, ā karī wiyēgedig.

21 Aya momoi eig au arok nigin mama fiyaf, are amā felu reya bagai nigin to age mafedig!

Anñ ere, taka ï total ino fen, ereb taka nigin yana yalesauf are-aya neneya tamo gen wogō auf-ayag to-tol ano fen, yanau alesauf.

22 Idi Hibiru tamo de? Ayag anñ. Idi Israel tamo de? Ayag anñ. Idi Abraham nē ibor nē tubu tar de? Ayag anñ.

23 Idi Kristus nē kabī tamo de? (Aya wadā gen eig au wogō auf.) Aya idi wal fediya. Aya idi wal fediya kabī aledig, aya kalabus bun idi wal fediya abodōdig, aya idi wal fediya wagī difiyadig, age de fen, aya laa bun baba baban dinenan.

24 Juda idi aya sain faif bun teti nain wagī difiyan.

25 Sain towo bun, aya tibogem wagī difiyan, sain tekelei bun, aya meinem dinan, waag aya abodon sain towo sanen, aya, bō taka ado gaa taka ado, maañ atun abodon.

26 Aya toku ayok bun, kuwei sane waila wal afen, bē tamo nē waila wal afen, neu fō turau tar geid kiwai wal afen, haiden geid kiwai wal afen, taun bun kiwai waila wal afen, gerere tuan kiwai waila wal afen, maañ bun waila wal afen, idegēya turau tar nē kiwai waila wal afen.

27 Aya kabī total ale, morō ado fen, sain musei mulañ to ainēdig. Aya nañ ado naan ail fiya fen, sain musei saaf sã aledig. Aya menig fiya fen, gemū abodōdig.

28 Ereb ereb ganan anñ sirin, aya naa ganan bun, sios ganan nigin suwēya morō anim lai fiyadig.

29 Aib felu re di, aya to felu rauf de? Aib mosor bun iroule di, aya to wau

morō fiyauf de?

30 Aya yanau yaleseya nigin bagai youf are, aya ereb ereb neu felu reya anñ yaor fedig anñ nigin yanau alesauf.

31 Odug Jesus nē Dei, Negur, ï anñ yana faimud yaleseya, ï keleñ, aya to adegek.

32 Damaskus oun, gawaman nē mudur, King Areta farumen ï, aya yaleya nigin taun bobog bun lo fiya tamo inenēdin.

33 Anñ ere, aya karam kuren dinena fen, kau mosokoronem folo folō di-fiya di, yogon iman tamal ulō aran.

12

Pol Nē Mala Seleulā Kurā Fiya Ado Yogon Kudag Kereuk Fiya

1 Aya yanau alesef alauf. Ereb mala to aloufeg, aya Odug bunem malau seleulā kurā fen ado, kurō fesiya od alen anñ wogō auf alauf.

2 Aya tamo taka* Kristus bun ibodok anñ keleñ, ï kulu yar fotin ilelen bun, Negurem yale, saa tano towo bun irou iselen. ï bouwa ado be, bouwa sã be, aya keleñ sã, Negur keleñ.

3 Aya keleñ, tamo enei-ï bouwa ado be, bouwa sã be, aya keleñ sã, anñ ere, Negur ï keleñ-

4 ï paradis bun irou iselen. ï ereb ereb tamom faded feleya kisi feleya sã, tamom wogōya nigin katū fiyen anñ karī yen.

5 Aya tamo age fiya anñ yana alesauf, anñ ere, aya yug nigin yanau to alesauf, aya neu felu reya nigin dogol yanau alesauf.

6 Aya yana yaleseya nigin agirifeg, aya neneya to abodōf, ere nigin, aya momoi anñ wogō auf. Anñ ere, aya yana yaleseya nigin atorok, are taka nem ereb aya age afef be, wogō auf anñ wal fe fen, aya nigin fatuk to kisi foug nigin age afef.

7 Kurō fesiya odug bagai enei alen anñ bunem, aya yug yanau yaleseya katī feleya nigin, bouwa bun kudag

* 12:2: Tamo taka anñ, Pol yogo nigin irok.

ifanan, Satan nē arū tamo darau ifanauf nigin bouwa bun yun, are aya yug yanau yaleseya katī feleya nigin.

⁸ Sain towo, Odug aya bun anī yalelkanauf nigin, aya ī agonen.

⁹ Anī ere, ī irokanan, “Neu wau ifenēya ō nigin kilei bagai, ere nigin, neu megeir felu reya bun kisi feleya bagai wō yef.” Anī nigin, aya fatuk bagai wau al fiya bun neu felu reya nigin yanau alesauf, are Kristus nē megeir aya bun ibodōf nigin age afouf.

¹⁰ Anī nigin, Kristus nigin, aya felu reya bun, kono fiya bun, wau morō bun, darau bun, morō bun, wau kulī yedig. Ere nigin, sain aya felu rauf bun, aya total adodig.

Pol Korin Tamo Kayau Nigin Suwē Yen

¹¹ Aya yug nigin neneya tamo wō aun, anī ere, ā aya nugo wiyage di, aya age afen. Ā aya nigin yanau walesegem, are dem, ere nigin, aya ege, anī ere, aya aposel yeneid odug farumen to bagai abodok.

¹² Aya ā atun abod ken, ereb aposel bagai nē anī, uris, ereb urug bagai ado, memelik, morō ganan bun, fe-seya sā anodin.

¹³ Aya sios ganan bun age afedig anī, ā buneg age afen, anī ere, ereb tekelei dogol ā bun to age afen, are aya ā isennaya nigin morō taka to afenein anī dogol. Neu kū fenēya enei nigin wedereī tu kel!

¹⁴ Gama aya eneim sain towo ki ayeīf nigin saika afef, aya ā isennaya nigin morō to afeneīf, ere nigin, ereb aya orouf are, āgenei safina sā, ā aug anī. Kesum sina tama nigin moni to kuru difedig, anī ere, sina tamam nedi gereneid tar nigin age difedig.

¹⁵ Anī nigin, aya wau al fiya odug bun, neu safinau ganan ā nigin araile fen, aya yugeg arailauf. Aya ā nigin wau fatuk afeneī di, ā aya nigin wauī naal bagai wanagauf de?

¹⁶ Ā tunī aya nigin urōgedig, ‘Ī amā masennēf nigin morō to ifanaman, anī ere, ī idegēya keleī bagai, idegēya kor bunem gei famādig, ’gedig.

¹⁷ Aya tamo susur afedin anidi taka bunem, ā adegnei ken, āgenei safina alen de?

¹⁸ Aya Taitus ā gein ileya nigin total bagai aroken ken, aya amā turamā ī ado sur afedin. Taitus ī to idegnei ken, safineī yalen, ī age fen de? Amā kisi tekelei bun age mafe fen, naab tekelei dō mafen, anī sā de?

¹⁹ Ā sain enei ganan, amā mug isennamāf nigin ā bun age mafedig be, kisi gedig. Amā, Negur mala bun, tamo Kristus nigin momoi def anidi gen, wogō maudig. Ā nemā oboimā, ereb ereb ganan amā age mafef, are ā megeir walogouf nigin.

²⁰ Sain aya asiyouf, aya ā nigin kisi afef gen to ailiyeīya nigin be, ā aya nigin kisi gef gen to uleyageya nigin, aya kumī auf. Ā bun an, kusī, kiyeī, seyeya, fara fiya, ne tā bou yūya, dumen od irōya, aya aya yeya be, ekul ge ufaregeya nigin, aya kumī auf.

²¹ Sain aya baban asiyouf, neu Negur ā meleī bun aya mama ifana di, musei kulu mosor dino fen, amuyē, noli tobonunā fire fire ado, bouwa nē oroya nigin total sane wau fāya bunem waud to falei difen anidi nigin, aya wau gudū fouf nigin kumī auf.

13

Idikeleya Nē Weder Irouya Od

¹ Eneim sain towo ā gein asif. “Od ganan isennēya urom be, towom sig-oredim kurō difesiyouf anī megeir gouf.”*

² Uruwa aya asi fen, baban asi ā geid tabodon sain bun, aya wedereī irouya od arokeneī bure afe-len. Gama aya ā geid to tabod ken, anī ket, idi uruwa mosor dinodin anidi geid tunī ganan arokeneik: Aya kelau asiyouf sain bun, idi to

* 13:1: Diuteronomi 19:15

loloum afediyouf, anī ere, kafī fiya afenēdiyouf,

³ ere nigin, ā Kristus ī aya bunem wogō yef anī ileyā oroyeik. Ī ā bun kabī yaleyā nigin to felu ref, anī ere, ĩ ā atun megeir ado.

⁴ Ere nigin, momoi bagai, ī felu reya bun aa tetek bun dun, anī ere, ĩ Negur nē megeir bunem mata ibodok. Age fiya gen, amāg ĩ bun felu reya, anī ere, Negur nē megeir bunem, amā ĩ geid mata mabodōf. Age mafe fen, amā Negur nē megeir ā atun yaor mafouf.

⁵ Ā momoiya bun ubodōgef be sā be anī, ulogouf nigin ā aug es gouf. Ā aug kisig uleg. Kristus Jesus ĩ, ā bun ibodok anī ā to keleī de? Sāf are, momoi bagai, ā es fiya bun kubū gef.

⁶ Anī ere, amā es fiya bun to kubū maun anī ā ulogouf nigin, aya momoi auf.

⁷ Ā ereb sane taka to ago gouf nigin, amā Negur bun kosē mauf. Are amā es fiya bun to kubū maun anī tamo kayau dilouf nigin sā, anī ere, amā es fiya bun kubū maun gen dilemāfeg, ā ereb madur ago gouf nigin.

⁸ Ere nigin, amā ereb taka momoi anī to kiwai mafenek, anī ere, momoi nē nigin dogol age mafef.

⁹ Amā felu mauf bun, ā megeir adof nigin, amā waumā al fef. Ā kisi feleyā bagai wō gouf nigin, amā kosē mauf.

¹⁰ Gariya eig fiya nigin, aya ā geid to tabod ken, enei atotof, are sain aya asiyouf, aya neu yanau bunem totol od ā to arokeneif nigin age afef, yanau are ā daū yeīya ban yalesneīya nigin Odug ifanan.

Idikeleya Nē Aanya

¹¹ Idikeleya bagai, turau tar, dabuo. Kisi feleyā bagai wō gouf nigin ago gouf, aya neu wogō anī karīg, kisi tekelei waleg, wauī inosiya bun ubodōg. Ago ge di, wau laa fiya ado wau inosiya nē Negur ā geid ibodōf.

¹² Fateul umāya bunem, abob aan wiyēg.

¹³ Negur nē tamo kayau ganān, nedi aanya ā bun sur difef.

¹⁴ Odug Jesus Kristus nē wau ifenēya, Negur nē wau laa fiya ado, Awa Uur Fateul nē nigal yūya ā ganān bun ibodōf.

Galesia

¹ Aya Pol, aya aposel, tamo nē to-bonunā bunem to wō aun, tamomeg aya to sur difiyan, anī ere, Jesus Kristus ado Tamada Negur ī Jesus Kristus laa bun tamal turī fe di, kel fā yen anim aya sur difiyan,

² are aya neu turau tar aya weim mafaref anidi ganan geid, pas enei Galesia sios bun sur mafef.

³ Negur neda Tamada ado Odug Jesus Kristus bun tamal, wau ifenēya ado wau inosiya ā bun ibodōf,

⁴ Kristus ī, neda Tamada Negur nē oroya dōf fen, sain sane enei bun tamal, ada kel gei fadauf ye fen, neda mosor nigin yogo luwa itoron.

⁵ Anī nigin, Negur ī bun fula fiya medeīya gai gai ibodkalauf. Momi.

Biya Od Fire Taka To Ibodok

⁶ Aya, ā kaisā bagai Negur ī Kristus nē wau ifenēya bunem ā iweignein anī utornēg fen, biya od fire bun falei ge di, terē auf.

⁷ Od are biya od bagai sā. Momi bagai, tamo tunī, ā neneya bun dirāyei ken, Kristus nē biya od anī falei difalauf nigin age difef.

⁸ Anī ere, amam be, engel taka saa ilun tamalem, biya od fire, amā biya od wogō mayein anī to wogō yeif are, utornēg len, ī gai gai daū fiye kalauf!

⁹ Amā mogo marokenein gen, aya gama baban arokeneik: Aibem taka ā biya od fire, ā walegen anī to wogō yeif are, utornēg len, ī gai gai daū fiye kalauf!

¹⁰ Aya tamo nē yo ya yaleya nigin age afef de, Negur nē yo ya yaleya nigin age afef? Aya tamo waud al foug nigin age afef de? Aya fau tamo waud al foug nigin age afouf are, aya Kristus nē ferfer sā.

Pol Ī Negurem Iweignen

¹¹ Turau tar, aya ā enei keleī youf nigin orouf, biya od aya wogō ayein, are tamo nē kisim to dinon.

¹² Aya anī tamo taka bun tamal to alen, takameg to ifelnan, anī ere, aya Jesus Kristus nē kurō falaisiya bunem alen.

¹³ Aya kulu Juda neid momoiya bun abod ken, naig be afen are ā karī gen. Aya Negur nē sios darau fatuk bagai afen ken, daū afalauf nigin age afen.

¹⁴ Aya, Juda neid momoiya bun, Juda tamo aya gegen atun idi musei wawal afedin, age afe fen, aya neu tubu tar neid tobonuneid dō fiya nigin fatuk bagai kisi totol anon.

¹⁵ Anī ere, Negur ī, aya sinau fau gō fiyaya sā mog, igirna fen, yogon wau ifenēya bunem aya iweigna di,

¹⁶ aya haiden atun yogon Naal nigin wogō auf nigin, yogon Naal aya bun yaor fiya nigin wau iron, sain anī bun, aya aib bun keleī yaleya nigin tamo taka to, to afiyen.

¹⁷ Aya, idi aya aposel wōya sā mog, aposel dibodon anidi ailediyouf nigin Jerusalemeg to eselen. Anī ere, aya kaisā bagai Arabia kantri ele fen, dum Damaskus kelau elen.

¹⁸ Yar towo ilele di, aya Pita ado uyu kū mafouf nigin Jerusalem esel fen, ī ado naa fiftin mabodon.

¹⁹ Aya aposel anidi taka to ailen, Odug nē tura, Jems dogol.

²⁰ Aya Negur mala bun momoi arokeneik, aya atotkeneik are idegēya sā.

²¹ Anī dumen, aya Siria ado Silisia provins elen.

²² Judia distrik oun sios Kristus bun dibodok idi, aya nigin keleī sā.

²³ Idi od enei dogol karī den: “Tamo ī kulu ada darau ifanadan, ī momoiya daū fouf nigin kulu age fen anī, gama wogō yef.”

²⁴ Age de fen, idi aya nigin Negur yana dalesen.

2

Aposel Idi Pol Daleyen

¹ Yar fotin ilele di, aya baban Jerusalem eselen, sain anī are Banabas ado. Aya Taituseg ale fen, meselen.

² Aya Negur kurō fesiya ifelnan kilei, esel fen, biya od aya haiden atun wogō aun anī, idi fated afiyēdin. Anī ere, aya, ganan keleī sā mog, iminēyan idi sios nē uyu irouya gen ailedin anidi bun age afen, ere nigin, aya neu kabī alef ado mogo alen anī, ege ileyā nigin kumī aun.

³ Anī ere, Taitus ī aya weim mabodon, ī Grik tamal, anī ere, idi ī mulū ileyā nigin to nugo difiyen.

⁴ Morō are, idegēya turamā tar tunī, amā atun iminēyan disin anidi nigin fā yen, idi amā atun dimin ken, Kristus Jesus bun karika mabodon anī kofo de fen, amā lo nē kafī fiya bun diroulemāf nigin disin.

⁵ Biya od nē momoi anī, ā bun ibodōf nigin, amā idi neid od anī, sain naal bagaig to maroun.

⁶ Idi sios bun yeneid ado anidi-idi naig be fediya are aya bun fire to ailedig, Negur ī tetenem lo fiya bunem to es fedig-tamo sios bun yeneid ado anidi neu od anī taka to tobol difen.

⁷ Age fiya ban, idi, Pita Juda idi bun biya od wogōya nē kabī ifenen gen, aya haiden bun biya od wogōya nē kabī ifanan anī dilen.

⁸ Negur ī, Pita Juda idi atun aposel kabī yalen anī bun kabī yalen gen, aya haiden atun aposel kabī alen buneg Negur kabī yalen.

⁹ Jems, Pita, Jon, idi sios nē monog tor gen diledin anidi, idi Negur aya wau ifenēya ifanan anī dile fen, aya Banabas ado nigal maūf nigin, imamā biyalē bagu difen. Idi, amā haiden bun mele di, idi Juda anidi bun dilauf nigin, yo den.

¹⁰ Idi amā faimud maleg masennēdiyof nigin dogol dirokana-man, kabī are, aya age afouf nigin kisi totol aledig anī age afedig bagai.

Pol Pita Ou Fiyen

¹¹ Sain Pita Antiok taun isi di, aya ī mala bun ou afiyen, ere nigin, ī yaor bagai kū fenen.

¹² Jems tamo tunī sur fedin anī fau isiya sā mog, Pita ī haiden geid saaf

dō don. Anī ere, idi disi wō de di, ī haiden itorneīd fen, so fedin, ere nigin, ī idi mulū bun temeleid anidi kumī fiyeīd fen.

¹³ Juda tunī ganān, yogon mala yaleyā anī dō difen, age dife di, dogo neid mala yaleyā bunem, Banabaseg naab anī dō fen.

¹⁴ Sain aya, idi neid tobonuneid, biya od nē momoi anī to dō dife di, ail fen, aya idi ganān meleid bun Pita arokenen, “Ō Juda tamo, anī ere, ō haiden gen ubodok, Juda tamo gen sā. Agouf are, naig fe di, haiden idi Juda neid tobonunā dō difouf nigin, nugo wiyēdif?”

¹⁵ Ada Juda temelada gogū di-fadan, haiden mosor temelada sā.

¹⁶ Anī ere, ada keleī, tamo ī lo dō fiya bunem Negur mala bun madur bagai to wō yedig, anī ere, Jesus Kristus nigin momoiya bunem. Anī nigin, adag, Kristus Jesus nigin momoi taudig, are Kristus nigin momoiya bunem, lo dō fiya bunem sā, Negur mala bun madur bagai wō tauf nigin age tafedig, ere nigin, lo dō fiya bunem, aibem taka Negur mala bun madur bagai to wō youf.

¹⁷ Ada, Kristus nigin momoiya bunem, Negur mala bun madur bagai wō tauf tau fen, ada dug mosor temelada anī dilouf are, Kristus ī mosor nē kabī tamouf de? Gai sā bagai!

¹⁸ Ereb aya daū afen anī, baban kare afouf are, aya yug, aya lo narī fiya tamo wō auf.

¹⁹ Lo bunem, aya lo mala bun laa fiyan, are aya Negur mala bun mata abodōf nigin age afen.

²⁰ Aya Kristus ado aa tetek bun dinakesin, anī nigin, aya baban mata to abodok, anī ere, Kristus aya bun mata ibodok. Gama aya bouwau mata ibodok, are aya Negur Naal nigin momoiya bunem mata abodok, ī aya nigin wau laaf fen, aya nigin yogo luwa itoron.

²¹ Aya Negur nē wau ifenēya to tadū afouf, ere nigin, lo bunem Ne-

gur mala bun madur bagai wōya anī isiyouf are, Kristus ĩ ege laa fen.

3

Lo Dō Fiya De, Momoiya?

¹ Galesia tamo kayau, ā neneya! Aim ā idegnein? Ā meleĩ bun bagai, Jesus Kristus aa tetek bun dukessin anī, yaor bagai mafelnein.

² Ereb taka dogol, aya ā bun keleĩ you fenē: Ā lo dō fiya bunem Awa Uur walegen de, oo erēb karĩ gen anī nigin momoi ge di?

³ Ā fau neneya ufaregef de? Awa Uur bunem gariya unog fen, gama ā tamo nē total bunem udikalagau fenē de?

⁴ Ā darau fatuk bagai ege walegen de? Are momoi, ege bagai walegen de?

⁵ Negur ĩ, ā, lo dō fiya bunem yogon Awa Uur ifeneĩ di, ā atun memelik inodin de, oo erēb ā karĩ gen anī nigin momoi ge di?

⁶ Abraham bun kisi gouf: “Ī Negur nigin momoi yen, age fe di, Negurem ĩ madur bagai fiyen.”*

⁷ Anī nigin, karĩ gouf, idi momoi def anidi, are idi Abraham gere tar.

⁸ Negur nē Itotoya ketem, Negur ĩ haiden idi neid momoiya bunem madur bagai fediyouf anī ifelnadan, Negur ĩ, anī fau wōya sā mog, biya od anī ketem Abraham irokenen: “Teneub ganān ō bunem el fediyouf.”†

⁹ Anī nigin, idi momoiya ado are, momoiya tamo Abraham geid el fedif.

¹⁰ Idi lo dō fiya bunem dedig anidi ganān, are isisīya farumen dibodok, ere nigin, Negur nē Itotoya bun eig ye irok, “Idi ganān Lo nē Buk bun itotoya ibodok anī ganān toku to dō difouf are, isisīya farumen difaref.”‡

¹¹ Taka ĩ lo bunem Negur mala bun madur bagai to wō youf, are yaor, ere nigin, Negur nē Itotoya eig ye

irok, “Tamo madur bagai ĩ, momoiya bunem mata ibodōf.”§

¹² Lo are, momoiya bunem to ifaref, age fiya ban, Negur nē Itotoya eig ye irok, “Tamo ĩ enei age fedif, ĩ anī bunem mata ibodōf.”*

¹³ Kristus ĩ, ada fotokar isisīya nē wō ye fen, ada lo nē isisīya bun temelada kel yaledan, ere nigin, Negur nē Itotoya eig ye irok, “Ganan aa bun diseginnēdif, idi isisīya farumen dibodok.”†

¹⁴ Ī, el fiya Negurem Abraham ifenen anī, Kristus Jesus bunem, haiden bun isiyouf nigin, ada kel yaledan, are ada, momoiya bunem, Awa Uur nē promis anī talouf nigin age fen.

Lo ado Promis Od

¹⁵ Turau tar, aya tamo nē tobonunā bunem wogō auf: Tamo nē bar itenēya anīg, tamo waud iro ken, bar ditenek anī, to dalelef be, to tobol difedig gen, eneig age fiya.

¹⁶ Negur ĩ, promis od anī, Abraham ado yogon ibor irokenēdin. Negur nē Itotoya to eig yef, “yogon ibor tar bun,” age youf are, are musei nigin, anī ere, Negur nē Itotoya, “ogon ibor bun,”‡ yef, are tamo tekelei, ĩ Kristus nigin.

¹⁷ Aya wogō auf anī nē gariya, are eig fiya: 430 yar ilele di, lo wō yen anī, Negur kulu bar itenēya inon anī to we fel fen, Negur nē promis to yalelef.

¹⁸ Lo bunem akor anī yaleya nigin ouf are, promis bunem akor are to dalouf. Anī ere, Negur ĩ, yogon wau ifenēya bun promis bunem akor anī Abraham ifenen.

¹⁹ Age fiyauf are, lo are ere nigin? Lo are mosor yaor fouf nigin ifenēdi di, anī ibodok ile, Abraham nē ibor ĩ nigin promis iron anī, wō youf bun bure falauf. Lo are, engelem, atun tamo Moses difenē di, lo anī yaor fen.

²⁰ Atun tamo ĩ, tamo foi fiya tekelei nē dogol to ibodōdig. Anī ere, Negur

* **3:6:** Jenesis 15:6 † **3:8:** Jenesis 12:3; 18:18; 22:18 ‡ **3:10:** Diuteronomi 27:26 § **3:11:** Habakuk 2:4 * **3:12:** Levitikas 18:5 † **3:13:** Diuteronomi 21:23 ‡ **3:16:** Jenesis 12:7; 13:15; 24:7

ĩ tekelei dogol, ĩ yogo bagai Abraham promis anĩ ifenen. (Anĩ bun, atun tamo taka to ibodok.)

²¹ Anĩ nigin, lo ado Negur nē promis kiwai youf de? Gai sã bagai! Lo ifenen anim tamo mata ifenem are, Negur mala bun madur bagai wōya are, momoi bagai, lo bunem isim.

²² Anĩ ere, Negur nē Itotoya kurō falaisi, tenebur tamo kayau ganan mosor nē kafĩ fiya bun difaref yef, are Negur nē promis Jesus Kristus nigin momoiya bunem ifenēf anĩ, idi momoi def anidi ifenēdiyof nigin, Negur age fen.

²³ Momoiya enei isiya sã mog, ada lo nē kafĩ fiya bun tabodon, tabodok tele mog, momoiya anĩ yaoren.

²⁴ Anĩ nigin, lo anim ada ulum iroukanada di, Kristus wagen tele di, ĩ ada momoiya bunem Negur mala bun madur bagai fadauf nigin, inon.

²⁵ Gama momoiya mogo isin nigin, ada gama baban lo farumen to tabodok.

Negur Gere Tar

²⁶ Ā ganan, Kristus Jesus nigin momoiya bunem, Negur gere tar ubodōgef,

²⁷ ere nigin, ā Kristus bun naan walegen ganan, are mogo Kristus ufonūgen.

²⁸ Ā gama, Juda tamo be Grik tamo, ferfer be kafĩ fiya sã, monog be gober to ufaregef, ere nigin, Kristus Jesus bun ā ganan tekelei ufaregef.

²⁹ Ā Kristus nē ufaragauf are, ā Abraham gere tar, anĩ nigin, in promis bunem yogon akor anĩ walougouf.

4

¹ Aya eig au wogō auf, kesu monog tama fotokar ĩ fau simōf are, are ĩ tama nē akor ganan yaloufeg, ĩ fau ferfer gen ibodok.

² ĩ fau simō ibod mog, ĩ idi kulatun fiya tamo ado idi lo fiya tamo farumen ibodō di, idi yogon kabĩ nigin

lo difef, ile, tama sain ifenek anĩ bun didikalauf.

³ Age fiya gen, adag Kristus fau isiya sã mog, simō bun, tenebur nē uur sesen farumen, ferfer gen kafĩ fiya bun tabodon.

⁴ Anĩ ere, yogon sain bagai wō ye di, Negur yogo Naal sur fe di, kayau bunem wō yen, lo farumen wō yen,

⁵ are idi lo farumen difaref anidi kel gei fediyof nigin, age fe di, ada Negur gere tar ya bagai anĩ talouf nigin age fen.

⁶ Ā Negur gere tar nigin, Negur ĩ yogo Naal nē Awa Uur, ada wauda bun sur fe di, Awa Uurem iweig irōdig, “Abba,* Dei.”

⁷ Anĩ nigin, ō baban ferfer sã, ō in kesu. Ō in kesu ubodok nigin, Negur ĩ ōg yogon akor walouf nigin ineyon.

Pol Galesia Sios Nigin Osi Yen

⁸ Uruwa bun, ā Negur keleĩ sa ken, ā idi waitou bagai sã anĩ farumen ferfer ubodōgen.

⁹ Anĩ ere, gama ā Negur keleĩ, oo Negur ā nigin keleĩ youf auf are deuf, naig fe di, ā falei weleg fen, feseya ado maleg nē ifelnēya bun ulegef? Ā baban idim ferfer dineneĩf nigin oroyeik de?

¹⁰ Ā naa tunĩ, ogō tunĩ, saneya tunĩ ado, yar tunĩ anĩ bun, anĩ nē lo dōg fen, āgenei kisi unogedig!

¹¹ Aya ā nigin kumĩ auf, are aya ā nigin ege be kabĩ alen.

¹² Turau tar, aya ā agoneik, aya gen wowāg, ere nigin, ayag ā gen wō aun. Ā aya bun ereb sane taka to ago gen.

¹³ Ā keleĩ, are aya dagi nigin, aya ā bun urug bagai biya od wogō ayein.

¹⁴ Neu dagi are ā morō ifenein, anĩ ere, ā aya to meleĩ irim wiyag fen, soso wiyagen. Age fiya ban, ā, aya Negur nē engel gen, Kristus Jesus yogo bagai gen, waleyagen.

¹⁵ Āgenei wauĩ kulīya ganan gama nain ibodok? Āgenei meleĩ kusuf yale, aya ifanaya nigin kisi feleyam are, ā kusug waleg aya wanagem,

* 4:6: Anĩ nē gariya, Aram od nem, Dei.

aya agef kurō feis irokeneīya nigin kisi feleya.

¹⁶ Aya age a momoi arokeneik bunem, āgenei kiwai wō auf de?

¹⁷ Tamo anidi are ā gei diyeīf nigin kabī total daledig, anī ere, biya nigin sã. Idi ā ama bun tamal dalelneīf nigin orodif, are ā idi nigin kabī total walogouf nigin age difef.

¹⁸ Ereb biya nigin kabī total yaleya, are biya, sain aya ā geid tabodok bun dogol sã, wededem ago gouf, are biya.

¹⁹ Neu kesu tar, aya ā nigin baban darau kesu gō fiya nigin gen alef ele, Kristus ā namein kare fouf.

²⁰ Aya ā geid gama tabod ken, aya neu ailō falei afouf nigin aya wau adok irok, ere nigin, aya ā nigin nene auf!

Hagar Sara Ado

²¹ Aya urokanag, ā lo farumen ibodōya oroyeik, ā lo irok anī to keleī de?

²² Negur nē Itotoya bun irok, Abraham ī kesu uru ado, taka ferfer kayau bunem wō yen, agef fen, taka kafī fiya sã kayau bunem wō yen.

²³ Yogon kesu ferfer kayau bunem wō yen are, tamo nē tobonunā bunem gō fen. Age fe di, yogon kesu kafī fiya sã kayau bunem wō yen are, promis od anī dōf fen, wō yen.

²⁴ Enei are yaab od gen tailauf: Kayau are, bar itenēya uru nigin. Bar itenēya taka are, Sinai Arei bun tamal anī kesu gogū fen, are ferfer wowā douf nigin. Are Hagar.

²⁵ Hagar are Sinai Arei Arabia teneub bun ibodok anī nigin, takag, falei fel Jerusalem taun gama ibodok anī, ere nigin, ī yogon gere tar geid idi ferfer dibodok.

²⁶ Anī ere, Jerusalem ilun ibodok, are kafī fiya sã. Agef fen, ī neda sinada.

²⁷ Are Negur nē Itotoya eig ye irok: “O kayau dali, ō kesu to gogū wodig, waū al fe.

Ō kesu gō fiya nē darau to walef, uweig fen, fatuk kaī wouf,

ere nigin, kayau dali nē kesu are musei biya fen, kayau tamo ado nē kesu wal fiya.”†

²⁸ Turau tar, ā, Isak gen, promis nē gere tar.

²⁹ Anī ere, sain anī bun, kesu tamo nē tobonunā bunem gō fen are, kesu Awa Uur nē megeir bunem gō fen anī darau ifenen. Gamag agef yenek.

³⁰ Anī ere, Negur nē Itotoya ere yef? “Ferfer kayau ado yogon kesu uru uraileid, ere nigin, ferfer kayau nē kesu ī, kafī fiya sã kayau nē kesu akor anī to foi fenēf.”‡

³¹ Anī nigin, turau tar, ada ferfer kayau gere tar sã, kafī fiya sã kayau nē gere tar.

5

Kristus Bun Kafī Fiya Sã Ibodōya

¹ Ada karika tabodōf nigin, Kristus ī ada kafī fiya bun tamal yalelnadan. Anī nigin, megeir ufareg fen, baban ferfer nē kafī fiya farumen to ubodōg.

² Karī weleg! Aya Pol, ā arokeneik, ā mulū bun ulalagauf are, Kristus ī, ā bun kabī sã bagai youf.

³ Tamo ganan mulū bun dilef are, aya baban arokenēdif, idi lo ganan bagai dō difouf.

⁴ Ā lo bunem Negur mala bun madur bagai wō gouf nigin ago gef, ā Kristus bun tamal fara yein. Ā wau ifenēya utorōg fen, uyagen.

⁵ Anī ere, ada momoi tau fen, Awa Uur bunem madur bagai wō tauf nigin, wauda ise fen, total bagai tari tafef.

⁶ Ere nigin, taka ī Kristus Jesus bun ibodok are, mulū ileyā be, mulū ileyā sã, anī ganan ege. Ereb odug bagai are, momoiya, wau laa fiya bunem kabī yalef anī dogol.

⁷ Ā meli bagai gududu gen. Aim anī ā momoi anī dō fiya nigin naabu-reī gudū fen?

⁸ Weder te yabiya od age fiya, are ī ā iweigneik anī bunem to isif.

† 4:27: Asaia 54:1 ‡ 4:30: Jenesis 21:10

⁹ “Yis naal bagai anim bret ganan gē yedig.”

¹⁰ Aya Odug bun ã nigin momoi auf, are ã kisi fire to walogouf. Aib ï ã neneya bun iraileyeik are, mala solo sane yalouf.

¹¹ Turau tar, aya mulũ ileyã nigin fau wogõ auf are, ere nigin aya fau darau difanaf? Aya age afem are, Kristus nẽ aa tetek, are tamo yeid tũ fiya nẽ meein to ibodom.

¹² Idi ã wauĩ tũ fiya difeneik anidi, idi dile, dogo bouweid gudũ difouf nigin, aya wau irok.

¹³ Neu turau tar, ã kafĩ fiya sã ufaragauf nigin iweignein. Anĩ ere, ãgenei kafĩ fiya sã anĩ bunem, bouwa nẽ oroya to dõ gouf, age fiya ban, wauĩ laa fiya bunem, abob aruna walogouf.

¹⁴ Lo ganan are lo tekelei bun bagu felef: “Õ ogo nigin waũ laa fef gen, nẽ tã nigin waũ laa fouf.”*

¹⁵ Æ atun monëg fen, waila kaka gouf are, ã abob daũ wiyëgouf nigin, lo walagauf.

Awa Uur Bunem Ubodõgouf

¹⁶ Anĩ nigin, aya orok, Awa Uur bunem ubodõgouf, ago gouf are, ã bouwa nẽ oroya to dõ gouf.

¹⁷ Ere nigin, bouwa nẽ oroya ï, Awa Uur nẽ oroya anĩ to orodig, age fe di, Awa Uur ï, bouwa nẽ oroya to orodig. Idi urom abob kiwai difenëdig, are ã ereb oroyeik anĩ to ago gouf nigin age difedig.

¹⁸ Anĩ ere, ã Awa Uurem ulum iroukeneif are, ã lo farumen to ubodõgef.

¹⁹ Bouwa nẽ oroya nẽ tobonunã are yaor: noli tobonunã, amuyë ado, bouwa nẽ oroya nigin total sane wau fãya;

²⁰ idegëya waitou yana yaleseya ado idegëya kosëya; abob kiwai ifenëya, kusïya, kiyeĩ inoya, seyeya, aya dogol yeya, fara fiya, foi fiya ado,

²¹ name nameya, aai naanueiya, bilãya ado, tobonunã age fiya anĩ

ganan. Aya ã kulu arokenein gen, gama total bagai arokeneik, idi age de difaref anidi, Negur nẽ tano to dalouf.

²² Anĩ ere, Awa Uur nẽ faat are, wau laa fiya, wau kuliya, wau inosiya, wau yukeleya, wau ifenëya, tobonunã biya, dõ fiya biya,

²³ molol ado yogon bouwa tobonunã biya bun kulatun fiya. Lo takam enei ganan to katĩ felef.

²⁴ Aib idi Kristus Jesus nẽ dibodok, mogo mosor nẽ bouwa anĩ, yogon mala ile oroya ado bouwa nẽ oroya geid, aa tetek bun dukesin.

²⁵ Ada Awa Uur bunem tabodok nigin, ada Awa Uur bunemeg tayõf.

²⁶ Ada yanada to talesauf, to seye talesauf, age ta feneg, abob nigin kiyeĩ to tanouf.

6

Ganan Bun Biya Ago Gouf

¹ Turau tar, taka mosor ino mog ulogouf are, Awa Uur bun ufaregef ã, ï molol nem madur wiyëgouf. Anĩ ere, ãg kisi fiya bun to ulagauf nigin, ã aug nigin lo walagauf.

² Abob nẽ morõ faali ge, agog fen, naab anĩ bunem, Kristus nẽ lo anĩ ã bun kisi falauf.

³ Taka ï aya odug ye fen, ï yana sã ege ibodõf are, ï yogo idegnek.

⁴ Tamo mugu mugu yogon kabĩ anĩ es fouf. Agef fen, ï yogo nigin dogol yogon yana yales fen, taka yogo ad nigin to es fouf.

⁵ Ere nigin, mugu mugu yogon morõ anĩ faali fouf.

⁶ Taka ï Negur nẽ od nigin keleĩ yalef, ï ereb ereb biya anĩ ganan, yogon tise ado foi difouf.

⁷ Takam to idegneif: Takam Negur iseilnëya kisi feleya sã. Tamo ï ereb itenek de anĩ yaledig.

⁸ Taka ï yogo bouwa nẽ oroya dõ fiya nigin itenek, ï bouwa nẽ oroya bunem daũ fiya yalouf. Taka ï Awa Uur dõ fiya nigin itenek, ï Awa Uur bunem mata ibodkeleya anĩ yalouf.

* 5:14: Levitikas 19:18

⁹ Ada ereb biya age fiya nigin wauda to folo rouf, ere nigin, ada to fese tauf are, ada tatenek anī, yogon sain bun bagai talouf.

¹⁰ Anī nigin, ada anī age fiya nigin naab wō youf are, ada, tamo kayau ganau bun biya age tag, are idi momoiya nē ibor dibodok anidi bun bagai.

Mulū Bun Ileya Sā, Anī Ere, Mata Wōya

¹¹ Aya imaum bagai od nē ereb gegē odug atotkenein anī uleg.

¹² Idi mayarē lo tafef anī bunem biya difamāf def anidim, ā mulū ileya nigin totol bagai dirokeneik. Idi enei age difef are, idi Kristus nē aa tetek bunem darau yaleya ditor ken nigin dogol, age difef.

¹³ Idi mulū dilen anidig lo to dō difedig, anī ere, idi āgenei bouweī bunem yeneid dalesauf nigin ā mulū ileya nigin orodif.

¹⁴ Aya yug nigin to bagai yanau alesauf, neda Odug Jesus Kristus nē aa tetek nigin dogol. Aa tetek bunem, teneub enei nē oroya, aya bun laa fen, age fe di, ayag neu oroya, teneub enei nē oroya bun laa fiyan.

¹⁵ Mulū ileya, mulū ileya sā be, are ganau ege. Safina odug are, mata wōya.

¹⁶ Wau inosiya ado wau yūya, idi od enei mogo wogō aul anī dō difef anidi ganau bun isiyouf, Negur nē Israel tamo kayau buneg isiyouf.

¹⁷ Sain enei bunem ilauf ganau bun, taka nem morō to ifanauf, ere nigin, aya bouwau bun Jesus nē uris ibodok.

¹⁸ Turau tar, neda Odug Jesus Kristus nē wau ifenēya āgenei uur bun ibodōf. Momoi.

Efesus

¹ Aya Pol, Negur nē oroya bunem, Kristus Jesus nē aposel wō aun,

Efesus Negur nē tamo kayau, Kristus Jesus el de dō difedig anidi bun, pas enei atotof.

² Negur neda Tamada ado Odug Jesus Kristus neid wau ifenēya ado wau inosiya, ā bun ibodōf.

Kristus Bunem Uur Nē El Fiya Ifanadan

³ Ada, neda Odug Jesus Kristus nē Tama Negur, ī yana talesauf, ī uur nē el fiya Kristus bun saa ilun dibodok anī ganan bunem el fadan.

⁴ Negur ī saa teneub ado kare fiya sā mog, ada yogon mala bun, fateul ado amuyē sā tabodōf nigin, Jesus bun igirnadan.

⁵ Wau laa fiya bun, Negur ī yogon wau kulīya ado oroya kilei, Jesus Kristus bunem, ada yaleda fen, Negur nē gere tar wowā tauf nigin, mogo igirnadan.

⁶ Anī nigin, Negur nē wau ifenēya, are Jesus Negurem ī nigin wau laa fedig anī bun, ege luwa ifanadan anī nē fula fiya medeīya nigin, Negur yana talesauf.

⁷ Jesus bun, ada, yogon naud bunem kel yaleya, mosor nigin weder tu keleya anī, Negur nē wau ifenēya barikā bunem, talen.

⁸ Negur ī yogon wau ifenēya bunem, kisi biya ado kisi fokōya ganan, ada bun foula fen.

⁹ Agef fen, ī yogon oroya nē waa anī ifelnadan, are yogon wau kulīya nē kisi Kristus bun kisi fen kilei,

¹⁰ yogon sain anī kisi fel wō youf bun kabī yalouf, sain anī bun, Negur ī saa teneub ado bun erab erab ganan dibodok anī, mudur tekelei, Kristus farumen gurif iroulauf.

¹¹ Negur ī yogon oroya dōf fen, erab erab ganan age fedig, ī yogon kisi dōf fen, ada mogo igirnadan, age

fe di, adag Kristus bun yogon akor talen,

¹² are ada uyulil Kristus bun wauda iseya talen anī, Negur nē fula fiya medeīya yana talesauf nigin age fen.

¹³ Ā momoi anī nē od, āgenei kel yaleya nē biya od anī karī ge fen, āg Kristus bun ubodōgen. Ā Kristus nigin momoi ge di, Negur ā bun uris, are Awa Uur Fateul Negur afeneīf yen anī inon.

¹⁴ Negur ī, idi Negur nē anidi kel yaleya fau wōya sā mog, ada neda akor momoi bagai talouf nigin megeir fe fen, Awa Uur Fateul iben, are ada yogon fula fiya medeīya yana talesauf nigin age fen.

De Fiyēya Ado Kosēya

¹⁵ Age fiya nigin, aya Odug Jesus nigin āgenei momoiya ado, Negur nē tamo kayau ganan nigin āgenei wauī laa fiya anī karī au fen,

¹⁶ aya ā nigin Negur de fiyēya to folō afelen. Aya neu kosēya bun ā nigin karī aul fen,

¹⁷ neda Odug Jesus Kristus nē Negur, Tamada fula fiya medeīya barikā, ī, ā ī nigin keleī bagai youf nigin, kisi biya ado kurō fesiya nē Awa Uur ifeneīf nigin, kosē audig.

¹⁸ Aya āgenei wauī nē meleī fokō foug nigineg kosē audig, are ā, wau iseya ī anī bun iweignein, yogon fula fiya medeīya barikā nē akor Negur nē tamo kayau bun ibodok anī ado,

¹⁹ yogon megeir barikā momoi tauf ada bun kabī yalef anī, keleī youf nigin, age afedig. Megeir are, yogon total barikā anim kabī yalef geñ,

²⁰ megeir de tekelei anim Kristus bun kabī yale fen, ī laa bun tamal kel turī fiye ken, saa ilun Negur ima biyalē inenen.

²¹ Negur ī, Kristus, uyu irouya ganan, yeneid adodo ganan, megeir ganan, odudug ganan ado, yeneid sain enei bun ado sain fau isiyouf buneg ifenēdiyof ani ganan wal fiya bun inenen.

²² Agef fen, Negur ĩ, erēb erēb ganān Kristus ye farumen gō fel fen, ĩ sios nigin erēb erēb ganān neid mudur ibodōf nigin igirnen.

²³ Sios are, yogon bouwa, ĩ naab ganān bunem erēb erēb ganān kisi feledig anī nē kisi feleya.

2

Kristus Bun Mata Tabodok

¹ Ā kulu āgenei kũ fenēya ado mosor bun gare gen.

² Sain anī bun, ā teneub enei nē naab ado, owōbē tano nē mudur, are uur idi dō fiya sã anidi bun gama kabī yalef anī nē naab dō gen.

³ Idi atun ada ganāneg, uruwa bun bouwada nē oroya anī dō tafe fen, yogon oroya ado kisi dō tafēn. Ada, tamo tunī ganān idi gogū difēdin gen, adag age de gogū difadān bunem, Negur nē didi farumen tabodon.

⁴ Anī ere, ada nigin yogon wau laa fiya odug bunem, Negur wau yūya barikā,

⁵ ĩ, ada kũ fenēya bun gare taun sain buneg, ada Kristus geid turī fadān. Are wau ifenēya bunem, ā kel yaleyēin.

⁶ Agef fen, Negur ĩ, ada Kristus geid kel turī fada fen, Kristus Jesus bun ada ĩ geid saa ilun tabodōf nigin inēnadan,

⁷ are, fau isiyouf sain bun, ĩ yogon biya fiya Kristus Jesus bun ifanadan anī bunem, yogon wau ifenēya barikā ifelnēdiyof nigin age fen.

⁸ Wau ifenēya bunem, ā momoiya bunem kel yaleyēin, are aug bunem sã, Negur nē ege luwa ifenein,

⁹ are kabī bunem sã, anī nigin, taka nem to yana yalesauf.

¹⁰ Ada Negur nē imaba, kabī biya talouf nigin Kristus Jesus bun ada kare fadān, kabī biya are Negur ada age tafouf nigin uruwa bun mogo dodok fanadan.

Kristus Bun Ada Tekelei

¹¹ Anī nigin, uruwa bun, ā gō diyēin bunem haiden ubodōge di, idi

mulū dilen anidim (are tamo bouwa bun tamo imedim age difēn) ā mulū ileya sã diyēin anī karī weleg.

¹² Sain anī bun, ā Kristus nigin gerō ufaregen, ā Israel buneg yeneī sã, promis nē bar itenēya buneg ā yaū, tenebur ein wau iseya sã, Negur nigin keleī sã ubodōgen anī karī weleg.

¹³ Anī ere, gama ā uruwa gerō ufaregen anī, Kristus Jesus bun, Kristus nē naud bunem, Negur non guri yeī ırousiyēin.

¹⁴ Ere nigin, Kristus yogo ĩ neda maror, uru anī yale, tekelei inon, agef fen, kiwai fara fiya nē garaī anī narī fen.

¹⁵ ĩ yogo bouwa bunem lo, ĩtāfiya ado, nun anī yaleledin. ĩ yogo bun tamo uru anī bunem, tamo mata tekelei ino fen, maror inouf nigin age fen.

¹⁶ ĩ bouwa tekelei enei bun, idi uruwom aa tetek bunem Negur bun komo fediyof nigin agef fen, ĩ aa tetek bunem dogo neid kiwai yukesin.

¹⁷ ĩ isi fen, ā haiden gerō ufaregen bun maror nigin wogō yei ken, idi Juda temeleid non difaren anidi buneg, maror nigin wogō fiyēdin.

¹⁸ ĩ bunem, ada uruwom Awa Uur tekelei bunem, Tamada wagen ileya kisi feleya.

¹⁹ Anī nigin, ā yaū tamo ado tamo urug sã, anī ere, Negur nē tamo kayau geid tekelei fen, Negur nē ibor tar.

²⁰ Ā, aposel ado profet fō gariya dinon anī teten fō gen inoyēin, are Kristus Jesus yogo ĩ monog tor gen.

²¹ Kristus bun, fō ganān katō fel fen, Odug bun tempel fateul wō youf nigin fã yef.

²² Kristus bun, āg, mata ibodōya nē modoū Negur yogon Awa Uur bunem ibodōf nē anī wō gouf nigin, weim inoyeik.

3

Pol Haiden Bun Biya Od Wogōya Tamo

¹ Age fiya nigin, aya Pol, haiden ā nigin, Kristus Jesus nē kabī nigin au fen, kalabus bun abodok.

² Momoi bagai, Negur nē wau ifenēya ā nigin aya ifanan anī, naig fe kabī yalen are, ā karī gen.

³ Are waa Negurem kurō fesiya bunem aya ifelnan, are aya mogo tobega bagai atoton gen.

⁴ Ā enei uweseg fen, Kristus nē waa nigin aya wederou fokō felen anī, keleī youf.

⁵ Are Awa Uurem Negur nē fateul aposel ado profet bun gama kurō fesin gen, sain mogo ilelen anī nē tamo kayau bun tamo idi to agef ifelnēdin.

⁶ Waa are, biya od bunem, haiden idi Israel geid Negur nē akor dalouf, idi ganan bouwa tekelei nē bagu fiya dibodōf, agef fen, Kristus Jesus bun promis nē akor anī weim dalouf.

⁷ Negur nē megeir kabī yale di, aya Negur nē wau ifenēya ege luwa ifanan anī bunem, biya od enei nē kabī tamo wō aun.

⁸ Negur nē tamo kayau ganan atun, tamo naal farumen aya gai naal bagai anī, wau ifenēya enei aya ifanan, are Kristus nē kisi feleya, are imir ken, ileya kisi feleya sã anī, haiden bun wogō auf nigin ado,

⁹ waa enei, kulu isin ganan Negur ereb ereb ganan kare fen anī bun iminēyan ibodon anī, naig fe kabī yalef anī, tamo kayau ganan bun yaor afouf nigin ifanan.

¹⁰ Negur nē kisi are, gama sios bunem, Negur nē kisi biya fire fire, saa ilun uyū iroudiya ado yeneid adodo ifelnēdiyof,

¹¹ are Negur ī, yogon mata ibod-keleya nē oroya, neda Odug Kristus Jesus bun kisif bure felen anī kilei, age fen.

¹² Kristus bun, ada Kristus nigin momoia bunem, karika ado kumī sã, Negur wagen ileya kisi feleya.

¹³ Anī nigin, aya ā arokeneik, aya ā nigin darau alef ge fen, to felu

gouf, darau are ā fula fiya medeīya ifeneīya nigin.

Efesus Sios Nigin Kosēya

¹⁴ Gariya enei nigin, Dei ī bunem, yogon ibor ganan saa ilun ado tenebur ein dibodok,

¹⁵ dogo neid yeneid yaledig, aya ī wagen iborou bobou afef.

¹⁶ Aya kosē auf, ī yogon fula fiya medeīya kisi feleya bunem, yogon Awa Uur bunem megeir ā namein ife fen, megeir yeīf nigin,

¹⁷ are Kristus ī momoia bunem āgenei wauī bun ibodōf nigin. Age afe fen, aya kosē auf, ā warumutei ado gariya, wau laa fiya bun utenēg fen,

¹⁸ ā Negur nē tamo kayau ganan geid, Kristus nē wau laa fiya anī, odug naig be fiya, meluk, ilun ado, namen naig be fiya anī ulougouf nigin megeir walougouf,

¹⁹ agouf fen, wau laa fiya enei, keleī ganan wal fiya anī keleī youf, anī bunem, Negur nē kisi feleya ganan ā bun kisi falauf nigin kosē auf.

²⁰ Ī gama yogon megeir ada namedan kabī yalef anī bunem, ereb ada to tafef be, kisi tafef anī ganan wal fiya, age fiya kisi feleya,

²¹ sios bun ado Kristus Jesus bun, fula fiya medeīya, ibor ganan gai gai ibodok ilauf bun, ī bun ibodōf! Momoi.

4

Kristus Bouwa Bun Bagu Fiya

¹ Aya Kristus nigin kalabus bun abod ken, iweigya ā walegen kilei, mata ubodōgouf nigin total bagai arokeneik.

² Ā wauī adok ukalaisileg fen, molol bagai ubodōgouf. Ā to feseg, wauī laa fiya bun abob nē morō uteīgouf.

³ Awa Uur maror bunem bagu yein anī uroug kafī walagouf nigin, kabī total waleg.

⁴ Sain ā iweignein, ā wau iseya tekelei bun iweignein, age fiya gen, bouwa tekelei, Awa Uur tekelei,

5 Odug tekelei, momoiya tekelei, naan igūya tekelei,

6 Negur tekelei, ĩ ganan neid Temeid, ĩ ganan wal fiya, ĩ ganan atun, ĩ ganan namen ibodok.

7 Anĩ ere, ada mugu mugu wau ifenēya, Kristus ege luwa ifenēya nigin kisi fen kilei, ifanadan.

8 Negur nē Itotoya anĩ nigin eig ye irok,

“Ĩ ilun iselen sain,
ĩ tamo musei geif irou iselen,
agef fen, ĩ tamo ege luwa ifenēdin.”*

9 (“Ĩ ilun iselen” ya nē gariya are ere? Anĩ nē gariya are, ĩ tenebur farumen bagai buneg isilen.

10 ĩ isilen are, ĩ anĩ saa ilun ganan wal fiya iselen, are owō ganan inolauf nigin age fen.)

11 Inim anĩ, tunĩ aposel kabĩ, tunĩ profet kabĩ, tunĩ soosi kabĩ, tunĩ pastor kabĩ ado tise kabĩ ifenēdin,

12 are Negur nē tamo kayau, aruna yaleya kabĩ dalouf nigin dodok fedi di, Kristus nē bouwa odugouf nigin age fen.

13 Agef ile ile, ada ganan, momoiya tekelei ado Negur Naal nigin keleĩ tekelei bun tasi fen, tamo kisi feleya bagai wō tau fen, Kristus nē kisi feleya bagai bun talauf.

14 Age tafouf, ada baban momou gen to tabodōf, maaĩ moloun wīya gen to age ta fen, tai fiya ganan, tamo neid beugya ado, idegēya tamo neid kisi anidim, yaum fū fe di, aarau ilef isif fedig gen, to wewu fadauf.

15 Age fiya ban, ada wau laa fiya bun momoi anĩ wogō tau fen, ereb ereb ganan bun Mudur ibodok bun biya daf iselauf, Mudur are Kristus.

16 ĩ bunem, dirumunā ganan bouwa isenne ken, katokitĩ fe, bagu fele di, bouwa nē fara fiya mugu mugu yogon kabĩ yalef bunem, bouwa adok odug fen, wau laa fiya bun yogo inof.

Lalan Nē Gere Tar Gen Tabodōf

17 Anĩ nigin, aya enei Odug bun to-tol bagai arokeneik, ā baban, haiden idi difaredig gen, kisi sã gen to ufara-gauf.

18 Idi neid kisi gugum kel fen, Negur nē mata bun ibodōya ditoron, ere nigin, idi wedereid to fokō ye fen, waud totolen.

19 Idi es fiya kisi ganan ditor ken, idi dogo bouweid adok sane bun difen ken, ereb ereb sane ganan, dogo nigin dogol, es fiya sã age difedig.

20 Anĩ ere, ā Kristus nigin naab anĩ bunem to kelein.

21 Momoi bagai, ā ĩ nigin karĩ gen ado, ĩ bun difelnein, are momoi Jesus bun ibodok anĩ kilei.

22 Ā uruwa ubodōgen, āgenei oroya tubu, yogon idegēya oroya bunem sane len anĩ, utorōg fen,

23 āgenei kisi nē tobonunā bun mata wōg fen,

24 oroya mata, madur bagai ado momoi nē fateul bun Negur gen inon anĩ, ufonūgouf nigin difelnein.

25 Anĩ nigin, ā mugu mugu idegēya utorōg fen, ā neĩ tã momoi nem urokenēgouf, ere nigin, ada ganan bouwa tekelei nē tunĩ.

26 “Āgenei seyeya bun, mosor to unog.”† Ā wauĩ bun to seye yef ile, gaa kuru kalauf.

27 Agog fen, ā Satan nē modoũ taka to utoumkenēgouf.

28 Aib ĩ bē ilenouf, baban to bē ilauf, anĩ ere, yogo imam ereb biya nigin kabĩ yale di, ĩ lau difef anidi ifenēdiya nigin safina adouf.

29 Āgenei eweĩ bun od sesen to wō youf, anĩ ere, idi lau difef anidi fã de dalouf nigin isennēya od anĩ dogol urōge di, idi karĩ def are isennēdiyof.

30 Negur nē Awa Uur Fateul to wau morō wenēg, ĩ bunem kel yaleya nē naa nigin uris ā bun inon.

31 Ereb ereb dirikeĩ ganan, didi fatuk iseya, seyeya, gurūya, dumen

* 4:8: Sam 68:18 † 4:26: Sam 4:4

od irōya ado, ereb ereb sane ganan utorōg.

³² Abob el wiyēg fen, abob nigin wauī yu ken, Negur ī Kristus bun āgenei mosor nigin weder tu kelen gen, abob nē mosor nigin wedereī tu kalauf.

5

¹ Anī nigin, ā Negur gere tar oboi nigin, ī gen bagai ago gouf.

² Kristus ada nigin wau laaf fen, ada nigin yogo bouwa ofa ado sesewi fiya sumeī biya gen Negur ifenen gen, wauī laa fiya bun agog ubodōgouf.

³ Anī ere, ā atun, naal bagai noli tobonunā be, ereb amuyē ado taka be, safina musei youf nigin ima su lai fe fen sū we fiya taka to ibodōf, ere nigin, eneidi are Negur nē fateul tamo kayau bun to biya.

⁴ Takag, od sesen, neneya od be, od sane nem weli to unogouf, are ada nigin to biya, anī ere, de fiyēya od wogō gouf.

⁵ Ere nigin, ā momoi bagai enei keleī: Tamo noli tobonunā ado, amuyē ado be, safina musei youf nigin ima su lai fe fen sū we fiya (tamo age fiya are idegēya waitou yana yaleseya tamo), ī Kristus ado Negur nē tano bun akor to yalouf.

⁶ To lo ge di, taka nem od egem idegneīf, ere nigin, age fediya bunem Negur nē didi, idi nokū difef anidi bun isidig.

⁷ Anī nigin, idi geid to nigal ūgouf.

⁸ Ere nigin, ā uruwa bun gugum, anī ere, gama Odug bun ā lalan. Lalan nē gere tar gen agog ufareg.

⁹ Ere nigin, lalan nē faat are, biya fiya, madur bagai ado, momoi anī ganan bun ibodok.

¹⁰ Agog fen, ereb Odug wau al foug anī keleī youf.

¹¹ Ereb gugum bun tamal tobonunā faat biya sā anī geid to nigal ūgouf, anī ere, yaor wedigouf.

¹² Ere nigin, ereb fe temeleid imnēyan age difedig anī nigin irōya, areg mama ado.

¹³ Anī ere, ereb ereb ganan lalan bun yaor fef, are yaoredig,

¹⁴ ere nigin, lalan anim age fe di, ereb ereb ganan yaoredig. Enei nigin wogōya eig yef,

“Fā wale, mulaī tamal,

laa bun tamal fā wo,

ago di, Kristus ō bun fula foug.”*

¹⁵ Anī nigin, āgenei ibodōya nigin el ge lo walagouf. Kisi sā gen to ufaragouf, anī ere, kisi biya ado gen ufaragouf.

¹⁶ Naa biya ā nigin wō youf ganan to sekil gouf, ere nigin, naa are sane.

¹⁷ Anī nigin, to neneg, anī ere, Odug nē oroya naig fiya anī ā keleī youf.

¹⁸ Ā wain musei to wō ge di, meleī waī youf, are bouwa nē oroya nigin totol sane wau fāya bun irouleyeīf. Age fiya ban, Awa Uurem nameī isokosouf.

¹⁹ Od Negur nē Itotoya Sam bun ibodok, Negur yana yaleseya seg ado, uur nē seg bunem abob wogō wiyēgouf. Āgenei wauī bun Odug bun seg waleg fen, kakū gouf.

²⁰ Sain ganan bun, Negur Tamada ereb ereb ganan nigin, neda Odug Jesus Kristus yana bun de wiyēgouf.

²¹ Kristus anini wiyēg fen, abob farumen ubodōg.

Tamo Aiwa Ado Kayau Aiwa

²² Kayau, ā Odug farumen ubodōgedig gen, aiweī tar farumen ubodōgouf.

²³ Ere nigin, Kristus ī, sios nē mudur ibodok gen, tamo ī kayau nē mudur ibodok, agef fen, Kristus ī sios, yogon bouwa nē kel yaleya tamo.

²⁴ Sios Kristus farumen ibodok gen, kayau idig ereb ereb ganan bun, dogo neid aiweid tar farumen dibodōf.

* 5:14: Asaia 26:19; 60:1; Rom 13:11

²⁵ Tamo, Kristus sios nigin wau laaf fen, yogo bouwa ï nigin ifenen gen, aiweï tar nigin wauï laa foug.

²⁶ Kristus ï anï age fen, are sios fateul ibodöf nigin od bunem naan nem fili youf nigin kulof fen,

²⁷ are sios medeïya bagai, diri sã, ifokoïya be, ereb age fiya taka sã, anï ere, fateul fen bouwa od sã, yogo bun iroulauf nigin age fen.

²⁸ Age fiya bagai, tamo dogo bouweid nigin waud laa fedig gen, aiweid tar nigin agef waud laa foug. Aib ï aiwa nigin wau laa fef, are yogo nigin wau laa fef.

²⁹ Aibem taka yogo bouwa to sane fiyëdig, anï ere, ï ifout ken, kulatun fedig, Kristus sios nigin age fedig gen,

³⁰ ere nigin, ada yogon bouwa në tunï.

³¹ Are Negur në Itotoya eig ye irok kilei, "Age fiya nigin, tamo ï yogon tama sina ado itorneïd fen, yogon aiwa ado bagu difoug, age de fen, idi uruwom bouweid tekelei youf."†

³² Waa enei are, odug bagai, anï ere, aya Kristus ado sios nigin wogö auf.

³³ Anï ere, ã aug nigin wauï laa fedig gen, ã mugu mugu ägenei kayau tar nïneg agog wauï laa foug. Age fe di, kayau ï yogon tamo farumen ibodöf.

6

Sina Tama Kesu Tar Geid

¹ Kesu, Odug bun sineï temeï tar sigoreid dö goug, ere nigin, anï madur.

² "Sinã tamã yeneid walesauf," are ïtäfiya matu promis ado bagu fen,

³ "anï bunem, ö ibodöya biya ile di, tenebur ein sain meluk ubodöf."*

⁴ Tama tar, gereneï tar waud saneya to wenëdig, age fiya ban, Odug në tai fiya ado ifelnëya bunem lo wedigoug.

Ferfer Ado Marau Tamo

⁵ Ferfer, ä Kristus dö gounë gen, tenebur ein ägenei marau tamo, kumï ado aniniya ado, wauï adok bunem sigoreid dö goug.

⁶ Ä meleid yaleya bunem to sigoreid dö goug, anï ere, Kristus në ferfer gen, Negur në oroya, ägenei wauï adok bunem ago goug.

⁷ Ä Odug aruna walogounë gen, tamo nigin sã, wauï adok yen ken, aruneid walogoug,

⁸ ere nigin, ä keleï, ï ferfer be, kafï fiya sã, Odug ï mugu mugu ganan, ereb biya age difef anï kilei, mala solo ifenëdiyoug.

⁹ Marau tamo ä, ägenei ferfer naab de anï bunem el wedigoug. To kumïya wenëdig, ere nigin, ä keleï, ä ado idi nigin, ägenei Marau saa ilun ibodok, ï bun taka nigin dogol anï, kinau ya sã.

Negur Në Kusï Në Saki

¹⁰ Od idïya nigin, Odug bun ado yogon megeir barikã bun, total ufareg.

¹¹ Negur në kusï në saki ganan waleg, naki weleg fen, Satan në kisi, fe fiyëya nigin, sã megeir ufaragoug.

¹² Ere nigin, ada neda kusï are, bouwa ado naud në oroya fe fiyëya nigin sã, anï ere, uyu iroudiya, yeneid adodo, tenebur në gugum në megeir ado, saa ilun kaa sesen në megeir në total fe fiyëya nigin.

¹³ Anï nigin, Negur në kusï në saki ganan waleg, naki weleg, anï bunem, sesen në naa wö ye di, ä tutub yü ifareya nigin kisi feleya, agog fen, ä ereb ereb ganan agog fen, ufaragoug.

¹⁴ Anï nigin, total ufareg, momoi në lü luweï gug fen, madur bagai në siot kapam akoreï dedeg,

¹⁵ agog fen, ägenei yeï bun su ufonüg fen, maror në biya od wogöya nigin dodok fiya saika ufaragoug.

¹⁶ Enei ganan bun tobol fe fen, momoia në makanam waleg, anï bunem, ä sesen në magir yã bale ado isif anï ganan, sã gare walagoug.

† 5:31: Jenesis 2:24 * 6:3: Eksodas 20:12; Diuteronomi 5:16

¹⁷ Agog fen, kel yaleya nē hat kapa ado Awa Uur nē dimig, are Negur nē od, anī waleg.

¹⁸ Kosēya ado to fiya ganan bun, sain ganan Awa Uur bun kosē gouf. Enei kisi bun unog fen, saika ge fen, sain ganan Negur nē tamo kayau ganan nigin kosē gouf.

¹⁹ Aya nigineg kosē gouf, are sain aya od arōf bun ganan, Negurem od ifana fen, aya kumī sā biya od nē waa anī wogō auf nigin ago gouf.

²⁰ Biya od enei nigin, aya soosi tamo wō au fen, kalabus bun abodok. Aya to kumī au fen, biya od sā kurō afalaisiyouf nigin kosēg.

Idikeleya Nē Aanya

²¹ Tikikus, turau oboiyou fen Odug bun kabī tamo dō fiya biya, ī ereb ereb ganan irokeneīf, age fe di, āg, aya naig be afef ado aya ere kabī alef anī, keleī youf.

²² Aya, ī, gariya enei nigin bagai ā gein sur afef, are ā amā naig be fiya mabodok anī keleī youf nigin ado, ī āgenei wauī megeir foug nigin.

²³ Tamada Negur ado Odug Jesus Kristus bunem, turau tar, wau inosiya ā bun ibodōf, agef fen, wau laa fiya momoiya ado ā bun isiyouf.

²⁴ Idi, neda Odug Jesus Kristus nigin waud laaf fen, waud laa fiya anī to folō difeledig anidi ganan bun, wau ifenēya ibodōf.

Filipai

¹ Pol ado Timoti, Kristus Jesus nē ferfer,

Filipai oun Kristus Jesus bun Negur nē tamo kayau ganan ado, uyu iroudiya ado uyu iroudiya farumen sios kabī daledig anidi bun pas enei matotof.

² Neda Tamada Negur ado Odug Jesus Kristus bunem, wau ifenēya ado wau inosiya ā bun ibodōf.

De Fiyēya Ado Kosēya

³ Sain aya ā nigin karī aulef ganan bun, aya neu Negur de afiyēdig.

⁴ Ā ganan nigin neu kosēya ganan bun, aya sain ganan bun wau kulīya ado kosē audig,

⁵ ere nigin, ā gariya bunem biya od nigin, amā geid uyu kū ta tasin isi, gama sain enei bun.

⁶ Aya enei nigin momoi auf, are taka ī ā namein kabī biya gariya inon are, tokō fel ile, Kristus Jesus nē naa bun idikalauf.

⁷ Aya ā ganan nigin eig afe kisi afef, are tutuk, ere nigin, ā neu wau bun ufaregef, ere nigin, aya kalabus bun be abodok, biya od asen ken, kurō afeis fen megeir afef bun, ā ganan Negur nē wau ifenēya bun, aya geid tabodōgedig.

⁸ Kristus Jesus nē wau laa fiya bunem, aya ā ganan nigin wau naig be fe laa fedig, are Negur ī keleī.

⁹ Enei nigin aya kosē auf, are āgenei wauī laa fiya anī, keleī ado es fiya kisi ganan bun, odugef ilauf,

¹⁰ anī bunem, ā ereb biya bagai ya es fiya keleī ken, ā karētut fen, od sā ubodōgef uleg, Kristus nē naa bun wō gouf,

¹¹ ago ge di, madur bagai nē faat Jesus Kristus bunem isif anī, ā bun barikāf, anī bunem, Negur ī fula fiya medeīya ado yana yaleseya yalouf.

Pol Kalabus Ibodon Anim Biya Od Fou Yelen

¹² Turau tar, gama aya ā enei keleī youf anī orouf, ereb aya bun wō yen anim, biya od el fe isennē di, fou yelen.

¹³ Anī bunem, Sisa* nē fō lo fiya tamo ganan ado tamo kayau ganan idi, aya Kristus nigin kalabus bun abodok ya anī keleī.

¹⁴ Aya kalabus bun abodok anī bunem, neu turau tar musei ganan, Odug bun dibodok idi, Negur nē od nigin, total ado kumī sā, wogō douf nigin waud yalesen.

¹⁵ Momoi, tunī kiyeī ado kiwai bunem Kristus nigin wogō dedig, anī ere, tunī kisi biya bunem age difedig.

¹⁶ Idi kisi biya bunem age difedig anidi, wau laa fiya bunem age difedig, are aya biya od asennen bunem kalabus bun abodok anī idi keleī.

¹⁷ Idi kiyeī ado kiwai bunem age difedig anidi, kisi karētut ban, dogo yeneid nigin de fen, Kristus nigin wogō def, are sain aya kalabus bun abod mog, morō aya bun tobol fiya nigin de fen age difedig.

¹⁸ Anī ere, ere naig fouf? Ereb odug bagai are, naab ganan bun, kisi kū fenēya bunem be, kisi tutuk bunem age difef, are Kristus nigin wogō def. Anī age dife di, aya wau al fef.

Momoi, aya neu wau al fiya tokō afalauf,

¹⁹ ere nigin, aya keleī, āgenei kosēya bunem ado Jesus Kristus nē Awa Uurem isennēya bunem, ereb aya bun wō yen anim, aya kafī fiya bun tamal yalelnauf.

²⁰ Aya total bagai kisi afe fen, wau irok, are aya naab taka bunem to mama fiyauf, anī ere, aya kumī sā total barikā ano di, Kristus ī, sain ganan age fedig gen, gamag neu bouwau bun, mata ibodōya bun be laa buneg, yana ilun iselauf.

²¹ Ere nigin, aya bun, mata ibodōyauf are Kristus nigin, laa fiyauf areg aya biya alouf.

* **1:13:** Rom neid king odug.

22 Aya fau bouwau bun mata abodok alauf are, aya faat biya yũf nigin kabĩ alouf. Anĩ ere, ere anĩ aya dõ afouf? Aya keleĩ sã!

23 Aya uru anidim si sitakã dĩ di-fiyaf. Aya ile, Kristus ado ibodõya nigin orouf, are gai biya bagai,

24 anĩ ere, aya bouwau mata ibodõf are, ã nigin biya bagai youf.

25 Aya enei nigin momoi bagai au fen, aya keleĩ, aya fau abodõf, age afe fen, aya, ãgenei momoiya biya ilauf nigin ado ã momoiya bun wauĩ kulĩ youf nigin, ã ganan geid tabodõf.

26 Age fe di, aya ã geid baban tabodõf anĩ bunem, aya bunem, ãgenei wauĩ kulĩya Kristus Jesus nigin ise gogũ fouf.

27 Ereb wõ youf, Kristus nẽ biya od kisin bagai ereb ereb ago gouf. Anĩ bunem, aya asi ã ailiyeĩf be, aya ã atun ibodõya sa ken karĩ be dogol auf, aya keleĩ youf, are ã uur tekelei bun total ufareg fen, biya od nẽ momoiya nigin tamo tekelei gen, bagug fen, kabĩ total walogouf.

28 Idi naab fire fire bunem, kiwai difeneĩf anidi nigin, ã kumĩ sã ufara-gauf. Are idi bun, idi daũ feidlauf anĩ nẽ uris, anĩ ere, ã bun, Negurem ã kel yaleyeĩf anĩ nẽ uris.

29 Ere nigin, ã Kristus nigin momoi gouf nigin dogol, Kristus aruna yaleya nẽ el fiya to ifenein, anĩ ere, ã ã nigin daraug walogouf nigin ifenein.

30 ã aya kusĩ aun ulegen, gamag fau kusĩ auf karĩ gef anĩ, ãg ago gef.

2

Kristus Nẽ Wau Yukesileya Anĩ Madẽ Gouf

1 Anĩ nigin, ã Kristus bun wauĩ yaleseya adouf are, Kristus nẽ wau laa fiya bunem wauĩ yo fiya adouf are, Awa Uur geid nigal yũya adouf are, molol ado wauĩ yũya adouf are,

2 neu wau kulĩya anĩ, wauĩ tekelei, wauĩ laa fiya tekelei, uur ado kisi bun tekelei bunem tobol ge di, neu wau kulĩya barikãf.

3 Aug nigin dogol be, ege yeneĩ yaleseya bunem ereb taka to ago gouf, anĩ ere, wauĩ yukesileya bun, ã aug nigin kisi gef anĩ wal fiya, taka nigin agog kisi gouf.

4 ã mugu mugu ãgenei biya fiya nigin dogol to kisi gouf, anĩ ere, tunĩ neid biya fiya nigineg kisi gouf.

5 ãgenei tobonuneĩ, Kristus Jesus nẽ ado tekelei youf:

6 ã yogo Negur bagai, anĩ ere, ã Negur gen ibodõya anĩ itoron,

7 anĩ ere, ã yogon kisi ganan yukalaisil fen, ferfer gen ibod ken, tamo bagai gen wõ yen.

8 Agef fen, tamo bagai gen wõ ye mog, dilen.

ã yogo wau yukesil fen, laa nigineg sigor dõ fen, agef fen, aa tetek buneg laa fen!

9 Anĩ nigin, Negur ã ilun bagai yaleselne ken, ã yana, yana ganan wal fiya anĩ ifenen.

10 Age fe di, Jesus yana anĩ bun, iboreid ganan bobou difouf, saa ilun ado, tenebur ado, teneub farumeneg.

11 Age de fen, sigoreid ganan kurõ difalaisi, Jesus Kristus ã Odug de fen, Tama Negur fula fiya medeĩa difenẽf.

Barisa Gegen Fula Fiya

12 Anĩ nigin, neu oboiyou tar, aya malau bun dogol sã, anĩ ere, fatuk bagai aya ã geid to tabodok buneg, ã gai dõ gedig gen, ãgenei kel yaleya nigin, kumĩ ado tererẽya bunem, kabĩ total walogouf,

13 ere nigin, Negur nẽ kisi biya kilei, ã kisig fen, dõ gouf nigin, Negur ã ã namein kabĩ yaledig.

14 Ereb ereb ganan, nauseirya sã, monẽya sã bunem, ago gouf,

15 ago ge di, ã bouweĩ od sa ken, karẽtut bagai, tenebur tamo kayau waud gogileya ado sane atun, Negur gere tar kũ fenẽya sã wowã gouf,

ã idi atun owõbê barisa gegen fula gouf.

¹⁶ Mata ifenêya nê od uroug kafi walagauf, ago ge di, aya Kristus nê naa bun, aya ege to gudu raun be kabî alen anî nigin, yanau alesauf.

¹⁷ Anî ere, aya, âgenei momoiya anî nê sesewi fiya ado aruna ya-leya bun, wain ofa gen, naudou fi falaufeg, aya wau al fe fen, â ganan geid wauda kulî youf.

¹⁸ Anî nigin, âg wauî al fe fen, aya geid wauda kulî youf.

Timoti Epafroditus Ado

¹⁹ Odug Jesus bun, aya Timoti â bun kaisâ bagai sur fiya nigin, wau isef, are aya â nigin od ale fen, ayag wau al foug nigin age afef.

²⁰ Aya ein, aib taka î gen, âgenei biya fiya nigin wau fâya anî to ailen.

²¹ Ere nigin, ganan dogo nigin dogol kisi difedig, Jesus Kristus nê biya fiya nigin to kisi difedig.

²² Anî ere, â keleî, Timoti î yogo nigin yaor fen, ere nigin, î aya urom, kesu yogon tama ado gen, biya od nigin kabî malen.

²³ Anî nigin, aya bun ereb ereb naig fe wõ youf anî ail fen, î â bun kaisâ bagai sur fiya nigin, wau irok.

²⁴ Age afe fen, aya Odug bun momoi auf, aya yug kaisâ bagai asiyouf.

²⁵ Anî ere, aya kisi afef, aya Epafroditus â gein baban sur afiyêf are deuf auf, î neu turau, neu kabî turau ado, kusî tamo turau, îg âgenei soosi tamo, î ereb aya lau afef anî kulatun fiyauf nigin sur wiyêgen anî.

²⁶ Î â ganan ileyêya nigin wau fatuk bagai irok, agef fen, î dagi ado ya anî karî gen bunem wau morõ ado.

²⁷ Momoi î dagi fen, laaf genen. Anî ere, Negur î nigin wau yun, î nigin dogol sã, aya nigineg wau yu ken, aya wau gudû fiya teten, wau gudû fiya baban to alouf nigin age fen.

²⁸ Anî nigin, aya î sur fiyêya nigin wau total bagai irok, age afe di, sain

ã î baban uleg fen, wauî al fe di, aya wau morõ are wau warasa youf.

²⁹ Æ Odug bun wauî al fiya odug bunem aan wiyêgouf, agog fen, tamo î gen yeneid walesagauf,

³⁰ ere nigin, î Kristus nê kabî nigin laaf genen, î â aya isennêya ifanaya kisi feleya sã anî, aya ifanauf nigin, yogon bou itoron.

3

Bouwa Nê Oroya Nigin To Momoi Ge

¹ Od idîya nigin, neu turau tar, Odug bun wauî kulî ye! Aya â bun de tekelei enei baban itotoya nigin morõ sã. Are â kulatun yeîya nigin, age afef.

² Gaû anidi nigin lo walagauf, tamo idi sane age difedig, idi mulû ileya nigin bouweid gudû difedig anidi.

³ Ere nigin, ada anî mulû telen, ada anî Negur nê Awa Uur bunem Negur yana talesedig, ada anî Kristus Jesus nigin yanada talesedig, age ta fen, ada bouwa nê oroya nigin to momoi taudig.

⁴ Anî ere, aya yug bouwa nê oroya bun yanau yaleseya nigin gariya ado.

Aib taka î bouwa nê oroya bun yana yaleseya nigin gariya ado youf, aya î wal fiya.

⁵ Naa eit bun aya mulû elen, aya Israel tamo, Benjamin nê ibor bun tamal, Hibru tamo bagai, aya lo bunem Farisia tamal,

⁶ aya Negur nigin au fen, kabî total aledig, age afe fen, sios darau afenêdidig, lo dô fiya bunem madur bagai wõya nigineg, aya bouwau bun od sã.

⁷ Anî ere, ereb ereb anî ganan aya isennauf aun are, Kristus nigin au fen, atoron.

⁸ Anî dogol sã, neu Odug Kristus Jesus nigin keleîya anî, ereb ereb ganan wal feid fen, odug bagai nigin, aya ereb ereb ganan are ege auf. Aya î nigin ereb ereb ganan ator ken, sisik gen kisi afef, are aya Kristus anî ale fen,

⁹ Ī ado bagu mafouf nigin age afen. Neu madur bagai aya bun ibodok are, lo bunem isiya sã, anĩ ere, madur bagai Kristus nigin momoiya bunem isif, are madur bagai Negur bun tamal momoiya bunem isif.

¹⁰ Aya, Kristus nigin, yogon mata kel fãya nẽ megeir nigin ado, yogon darau bun ifareya nigin kelei ken, yogon laa bun ĩ gen wõ auf nigin orouf,

¹¹ are aya laa bun tamal kel fãya anĩ alouf nigin age afef.

Pol Ī Daũ Bun Wõya Nigin Gudu Ren

¹² Aya enei ganan mogo alen be, kisi feleya bagai wõ aun gen to kisi afef, anĩ ere, aya, ereb aya yaleya nigin Kristus Jesus igirnan anĩ, yaleya nigin total bagai gudu rauf.

¹³ Turau tar, aya anĩ mogo alen to auf. Anĩ ere, ereb aya age afef are, ereb aya dudum afen are wederou tu kel fen, ereb malabag ifaref anĩ bun gudu rauf.

¹⁴ Aya, mala solo Negurem saa ilunem Kristus Jesus bun iweignan anĩ, alouf nigin daũ bun gudu rauf.

¹⁵ Ada atĩya wõ taun ganan, eig ya dogol kisi tafouf. Ā kisi tunĩ nigin fire kisi gouf, areg Negur ā bun yaor fouf.

¹⁶ Anĩ ere, ereb ada mogo talen anĩ dõ tafouf.

¹⁷ Turau tar, ā tunĩ geid bagug fen, aya dõ wiyagauf, agog fen, ā, idi amã tobonunã mafelnein bun difaref anidi dõ wedigouf.

¹⁸ Ere nigin, aya mogo sain musei arokeneik asin anĩ, gama baban maru isi fen arokeneik, musei idi Kristus nẽ aa tetek nigin kiwai dibodok.

¹⁹ Idi neid idikeleya are daũ feleya bun, idi neid waitou are dogo neid naumeid, agef fen, dogo neid fula fiya are dogo neid mama bun ibodok. Dogo neid kisi are tenebur nẽ safina bun ibodok.

²⁰ Anĩ ere, ada neda ibodõya modoũ are, saa ilun ibodok. Agef

fen, ada kel yaleya tamo Odug Jesus Kristus an tamal fatuk bagai tari tafef.

²¹ Kristus ĩ, ereb ereb ganan ĩ farumen irouleya nẽ megeir bunem, ada bouwada tenebur nẽ enei falei fele di, ĩ yogon bouwa fula fiya medeĩya gen wõ douf.

4

¹ Anĩ nigin, neu turau tar, aya ā nigin wau laaf fen, kisi total anodig, ā neu wau kulĩya ado teter. Neu oboiyou tar, ā Odug bun agog ufareg, megeir lauf.

Wau Yaleseye Od

² Aya Yuodia õ agonok, Sintike õg agonok, ā Odug bun wauĩ tekelei youf.

³ Kabĩ turau bagai, aya õ arokonok, kayau eneidi biya od nigin aya isen-naya nigin kabĩ total daledig anidi usenneid fen, Klemen ado neu kabĩ turau tar ganan, dogo neid yeneid mata ibodõya nẽ buk bun ifaref anidi, usennēdiyof.

⁴ Sain ganan Odug bun wauĩ kulĩ youf. Aya baban arokeneik: Wauĩ kulĩ ye!

⁵ Āgenei molol anĩ tamo ganan bun yaor gouf. Odug ĩ mogo melsak.

⁶ Ā ereb taka nigin to suwẽ gouf, anĩ ere, ereb ereb ganan bun, kosẽya ado to fiya bunem, Negur de wiyẽg fen, āgenei to fiya Negur bun uno-gouf.

⁷ Ago ge di, Negur nẽ wau inosiya tamo nẽ karĩya ganan wal fiya anim, Kristus Jesus bun, āgenei wauĩ ado āgenei kisi kulatun fediyof.

⁸ Od idĩya nigin, turau tar, ereb momoi anĩ, ereb biya anĩ, ereb madur anĩ, ereb karētut anĩ, ereb wau laa fiya nẽ anĩ, ereb yana iseleya nẽ anĩ, ereb taka biya bagai fen, yana iseleya nẽ bagai anĩ, ereb ereb age fiya nigin kisi gouf.

⁹ Ereb aya bunem ā kelein, walegen, karĩ gen be, aya bun ulegen anĩ, agog dõ gouf. Ago ge di, wau inosiya nẽ Negur, ā geid ibodõf.

Pol Idi Neid Ege Luwa Nigin De Fiyēdin

¹⁰ Gama ā aya isennaya nigin baban kisi fā yen nigin, aya Odug bun fatuk bagai wau kulī yef. Momoi, ā aya isennaya nigin kisi gen, anī ere, ā anī yaor fiya nigin naab taka to wō yen.

¹¹ Aya ereb lau afef nigin, enei to orok, ere nigin, sain naig be fe isiyoufeg, aya wau inois ibodōya nigin kelein.

¹² Aya maleg bun ibodōya are aya keleī, aya safina ado ibodōyag aya keleī. Nain be, ereb sain naig be fe wō youf bun, aya nameu isokosauf be, naū abodōf, aya safina musei ado be, aya safina naal bagai adoufeg, aya wau inois ibodōya nē waa are aya kelein.

¹³ Aya ereb ereb ganan, ī aya megeir ifanadig bunem, sã age afouf.

¹⁴ Anī ere, aya neu morō bun isennaya nigin kisi gen are, ā biya ago gen.

¹⁵ Filipai tamo kayau ā gai keleī bagai, aya Masedonia provins ator ken, asi, biya od uyulil wogō ayein sain bun, sios takam safina yaleya bun be, ifenēya bun to isennan, āgem dogol.

¹⁶ Sain aya Tesalonika taun abodoneg, ā safina aya isennēya nigin aya lau afe mog, baba baban sur wanagen.

¹⁷ Aya safina ege luwa yaleya nigin to kisi afef, anī ere, aya āgenei dumen mala solo biya walogouf nigin kisi afef.

¹⁸ Aya ereb ereb ganan kisi feleya ale fen, anī wal fiyag alen. Aya fatuk bagai wanagen, gama aya Epafroditus bunem safina fire fire ege luwa sur gen anī alen. Anī ganan are, sesewi fiya sumeī biya ado anī, Negur wau al fiya ado yalouf.

¹⁹ Agef fen, neu Negur ī, Kristus Jesus bun, yogon kisi feleya fula fiya medeīya barikā bunem, āgenei lau gef ganan ifeneīf.

²⁰ Neda Tamada Negur bun fula

fiya medeīya gai gai ibodkalauf. Momoi.

Idikeleya Nē Aanya

²¹ Kristus Jesus bun Negur nē tamo kayau ganan aan wiyēdigouf. Turau tar aya geid mafaref anidim aanya sur difef.

²² Negur nē tamo kayau ganan, ā bun aanya sur difef, idi atun, idi Sisa nē ibor bun kabī daledig anidim bagai anī, ā bun aanya sur difef.

²³ Odug Jesus Kristus nē wau ifenēya āgenei uur bun ibodōf. Momoi.

Kolosi

¹ Aya Pol, Negur nê oroya bunem Kristus Jesus nê aposel wō aun ado, neda turada Timoti adom,

² oun Kolosi taun, Negur nê fa-teul tamo kayau, Kristus bun momoiya turamã tar bun pas enei matokeneik.

Wau ifenēya ado wau inosiya, Tamada Negur bunem ã bun ibodōf.

De Fiyēya Ado Kosēya

³ Sain amã ã nigin kosē mauf bun, amã faimud neda Odug Jesus Kristus nê Tama, Negur de mafiyēdig,

⁴ ere nigin, amã Kristus Jesus bun āgenei momoiya ado, ã Negur nê tamo kayau ganan nigin wauī laa fiya anī karī maun.

⁵ ã mogo momoi nê od, biya od ã bun isin anī karīg fen, ereb ã nigin saa ilun inon nigin wauī ise fen, momoiya ado wauī laa fiya anī wō yen.

⁶ Sain ã biya od anī karīg fen, Negur nê wau ifenēya momoi bagai kelein sain anī bunem ilauf ganan, biya od anī ã atun age fen gen, teneub ganan bun, biya od enei faat yu ken, odugef.

⁷ ã, nemã oboimã ferfer turamã Epafra bun keleī anī walegen, ã amã nawamã yaleya, Kristus nê kabī tamo dō fiya biya,

⁸ agef fen, inimeg āgenei Awa Uur bun wauī laa fiya nigin irokanaman.

⁹ Age fiya nigin, sain amã ã nigin karī maun bunem isif ganan, amã ã nigin Negur kosē mafiye ken, uur nê kisi biya ado kisi fokōya ganan bunem Negur nê oroya nigin keleī aura yeif nigin to fiyēya to matorōdig.

¹⁰ Age mafe fen, amã, ã Odug nê oroya bun ubodōg fen, ereb ereb ganan bun Odug wau al foug nê anī ago gouf nigin kosē maudig: faat biya kabī biya ganan bun yūf nigin,

Negur nigin keleī, ã bun odugouf nigin,

¹¹ yogon fula fiya medeīya nê megeir bunem megeir ganan ifeneī di, ã ereb ereb ganan bun, feseya sã megeir bagai ufaragouf nigin, agef fen, wauī kulīya ado,

¹² Tamada ã, ã lalan nê tano bun Negur nê tamo kayau neid akor weim walogouf nigin age fen anī, de wiyēgouf nigin kosē maudig.

¹³ Ere nigin, ã ada gugum nê megeir bun yalelnada fen, in Naal Negurem ã nigin wau laa fedig anī nê tano bun gei fada irou isidan.

¹⁴ ã Naal bun ada kel yaledan, neda mosor nigin weder tu kelen.

Kristus ã Ere Ere Gan Wal Fiya

¹⁵ Kristus ã, Negur ada to tailef anī nê malakanon, ã Negur nê kesu matu, ereb ereb inodin ganan anī nê mudur inenen.

¹⁶ Are, Kristus ã bunem ereb ereb ganan inodin, ereb ereb saa ilun ifaredif ado tenebur ein ifaredif, ereb ereb tailef ado to tailef, king, megeir, uyu iroudiya be, yeneid adodo; ereb ereb ganan Kristus bunem Kristus nigin ye fen, inodin.

¹⁷ Kristus ã ereb ereb ganan wōya sã mog, ibodon, agef fen, ã bun ereb ereb ganan ifaref.

¹⁸ ã bouwa are sios, ã yogo anī nê mudur. ã gariya, tamo gare den bun tamal uyulil kel fã yen, are ereb ereb ganan bun ã mudur ibodōf nigin age fen.

¹⁹ Negur ã yogon kisi feleya bagai anī ganan, Kristus bun ibodōf nigin oro fen,

²⁰ ã Kristus nê naud aa tetek bun fi felen anī bunem maror ino fen, Kristus bunem ereb ereb ganan tenebur ifaredif be, saa ilun ifaredif, ã geid komo difouf nigin oron.

²¹ Uruwa bun, ã Negur nigin gerō ufareg fen, āgenei tobonunã sane bunem, āgenei kisi bun Negur nigin kiwai ubodōgen.

²² Anĩ ere gama, Negur ĩ, Kristus nẽ bouwam laa bunem, yogon lo fiya bun ã fateul, amuyẽ sã, od sã ineneĩf nigin ĩ geid komo yein.

²³ Ǻ āgenei momoiya tobol ge fen, feseya sã totol ufareg fen, biya od karĩ gen sain bun wauĩ iseya walegen anĩ bun to ulegef usigef gouf are, agog wõ gouf. Biya od enei are, ereb ereb ganan saa farumen ifaref anidi bun kurõ fesin, agef fen, aya Pol biya od anĩ nẽ kabĩ tamo wõ aun.

Pol Sios Nigin Kabĩ Totol Yalen

²⁴ Gama aya ã nigin darau alef anĩ nigin wau al fef, age afe fen, Kristus ĩ yogon bouwa sios nigin darau yalen bun fau to kisi felef anĩ kisi falauf nigin, aya bouwaum darau anĩ ale di, kisi falauf.

²⁵ Aya Negur nẽ od anĩ kisi feleya bagai afeneĩf nigin, Negur kabĩ ifanan anĩ nẽ kabĩ tamo wõ aun.

²⁶ Negur nẽ od are ĩ waa, kulunem ibor isin ganan bun iminẽyan ibodon anĩ, gama Negur nẽ momoiya tamo kayau bun yaor fen.

²⁷ Negur nẽ tamo kayau bun, Negurem waa enei nẽ fula fiya medeĩya barikã anĩ naig be fiya anĩ, haiden atun yaor fouf nigin wau iron, waa are Kristus ã namein ibodok, anĩ nẽ fula fiya medeĩya nigin wau iseya anĩ.

²⁸ Amã ĩ nigin kurõ mafalaisi, tamo kayau ganan wedereid maroud fen, kisi biya ganan bun, tamo kayau ganan mafelnẽdidig, are amã tamo kayau ganan Kristus bun, kisi feleya bagai manenẽdiyof nigin age mafef.

²⁹ Enei kisi falauf nigin, aya kabĩ totol alef, yogon megeir aya nameun ibod ken, kabĩ totol yalef anim aya gunĩ auf.

2

¹ Aya ã nigin, idi Laodisia taun difaref anidi nigin ado, idi aya to bagai dileyaf anidi ganan nigin, naig afe gunĩ auf anĩ, ã keleĩ youf nigin orouf.

² Neu kisi bagai are, idi waud alese di, wau laa fiya bunem waud katõ

difouf, age fe di, idi kisi fokõ feleya nigin keleĩ barikãf, anĩ bunem, idi Negur nẽ waa keleĩ youf, are Kristus.

³ ĩ bun kisi biya ado keleĩ nẽ safina biya ganan inokon ibodok.

⁴ Aya taka nem meleĩ yaleya od biyai biyai bunem to idegneĩf nigin enei arokeneik.

⁵ Momoi, aya bouwaum ã geid to tabodok, anĩ ere, aya uur bun ã geid tabod ken, ã naig be ge tutuk ufareg fen, āgenei Kristus bun momoiya naig be fe megeir ifaref anĩ, ileya nigin wau irok.

Tamo Nẽ Lo Wal Fe Fen, Kristus Bun Mata Ibodõya

⁶ Ǻ Kristus Jesus āgenei Odug walegen, anĩ nigin, ã ĩ bun mata ubodõgouf.

⁷ ĩ bun warei urarãg fen, fõ kare gen walesagauf, ã difelnein kilei, āgenei momoiya bun megeir ge fen, de fiyẽya anĩ ã bun ise gogũ fouf.

⁸ Taka nem ã, tamo nẽ idegẽya keleĩ kaũ sã bunem to guarar yeĩ irouleyeĩf nigin lo walagauf, are Kristus dõ fiya ban, tamo nẽ tobonunã ado tenebur enei nẽ tobonunã dõ fiya nigin.

⁹ Ere nigin, Kristus bun Negur nẽ kisi feleya bagai ganan bouwa bun ibodok.

¹⁰ Agef fen, ã Kristus bun kisi feleya bagai ifenein, Kristus ĩ megeir ganan ado yeneid adodo ganan neid mudur.

¹¹ ĩ bun āg mulũ ulegen, are tamo imam mulũ bun ineneĩya sã, anĩ ere, mosor nẽ oroya yaleleya nigin, Kristusem mulũ bun inenein.

¹² Ǻ, ĩ geid naan yaleya bun mũ yei ken, Negur ĩ laa bun tamal Kristus kel turĩ fiyen anĩ nẽ megeir bun, āgenei momoiya bunem ĩ geid kel turĩ yein.

¹³ Sain ã, āgenei mosor nigin ado āgenei mosor nẽ oroya nigin mulũ ileya sã nigin, laa bun ufareg mog, Negur ĩ, ã Kristus geid kel turĩ yein. ĩ neda mosor adok nigin weder tu kelen.

14 Ī lo nē ĭtāfiya itotoya, are ada weteda kiwai ibodon anī isasalen, ĭ anī yalel fen, aa tetek bun yun.

15 Agef fen, ĭ, megeir adodo yeneid adodo neid totol ganan, ye farumen gō fel fen, Kristus nē aa tetek bunem kusī bun idi wal fedin anī dilouf nigin, ganan meleid bun yaor fen.

16 Anī nigin, ā saaf be naan wāgauf, uub sifa naa fire fire be, ogō mata sigigi fiya naa be, Sabat naa* to dō gouf bun, taka nem to es yeĭf.

17 Eneidi are, ereb fau isiyouf nē malakanon. Anī ere, ereb momoi bagai are Kristus bun fotou fiyauf.

18 Aib taka ĭ, mala yaleya nigin wau yukesileya ado engel yeneid yaleseya nigin wau al fef anim, ā mala solo walogouf anī to wal yeĭf. Tamo age fiya ĭ ereb ilen anī nigin nenerī meluk dir fe fen, yogon bouwa nē oroya anim, gariya sā fagā yedig.

19 Ī bouwa nē mudur Kristus anī folō fel fen ifaren, mudur are Kristus, ĭ bunem bouwa ganan tuwa katō fiya ado dirumunā anidim disennē di, katō fel ifar fen, Negur yogo age fe di, odugedig.

20 Ā Kristus geid tenebur enei nē tobonunā bun laa yein, age fiyauf are, ere nigin anī ā fau anī nē gen ufareg fen, yogon ĭtāfiya eig fiya farumen ufaregef,

21 “Ā to uroug! Ā to kobūg uleg! Ā to dorōg uleg!”?

22 Enei ganan are, kabī wenēge di, sa kalauf, ere nigin, idi tamo nē ĭtāfiya ado tai fiya dogol.

23 Momoi, ĭtāfiya age age fediya are, dogo neid kisim seli kulō fiya, dogo neid idegēya waud yukesileya ado, dogo neid bouweid kafī fiya ifenēya bun, kisi biya gen ulegedig, anī ere, idi bouwa nē oroya lai fesileya nigin kisi feleya sā.

3

Fateul Ibodōya Nē Faded Fiya

1 Age fiya nigin, ā mogo Kristus geid keg fā gen nigin, āgenei wauĭ ereb ereb ilun nē nigin, Kristus Negur ima biyalē ibodok nē an, unogouf.

2 Āgenei kisi ereb ereb ilun nē nigin unogouf, ereb ereb tenebur nē nigin sā.

3 Ere nigin, ā gareg fen, āgenei mata gama Kristus geid Negur bun inokon.

4 Kristus ĭ āgenei mata, ĭ wō youf sain bun, āg ĭ geid fula fiya medeĭya bun wō gouf.

5 Anī nigin, ereb ereb āgenei tenebur nē oroya nē anī udenkesig: noli tobonunā, amuyē tobonunā, noli kisi, oroya sesen ado, sa-fina musei youf nigin ima su lai fe fen sū we fiya (are idegēya waitou seli yabiya).

6 Eig fediya nigin, Negur nē didi isif.

7 Ā uruwa ubodōgen, naab enei bun uyōgen.

8 Anī ere, ā gama naab eig fediya, wau saneya, didi iseya, tobonunā sesen inoya, dumen od irōya ado, sigoreĭ bun od sesen wogōya, anī ganan utorōgouf.

9 Ā abob to udegnēgouf, ere nigin, āgenei bouweĭ nē oroya tubu yogon tobonunā ado uraileg fen,

10 oroya mata ufonūgen, are Negur nē malakanon nigin keleĭ bun mata falei yeĭdig.

11 Ein baban, Grik tamo be Juda tamo, mulū ileyā be mulū ileyā sā, yaū tamo be tamo kuĭ gen, ferfer be kafī fiya sā tamo gen, fire fire to ibodok, anī ere, Kristus ĭ anī ganan, ĭ ganan anī namedin ibodok.

12 Anī nigin, ā tamo kayau Negurem igirnein, fateul ado Negur nē oboi tar nigin, wau yūya, tobonunā biya, wau yukesileya, molol ado, kaisā to seyeya anī ufonūgouf.

13 Molol ufareg fen, abob nigin morō faali gouf, agog fen, ā atun abob ereb morō ibodōf anī nigin

* 2:16: Sabat naa anī, Juda neid uub nē naa.

wedereĩ tu kalauf. Odug āgenei mosor nigin weder tu kelen gen, āg mosor nigin wedereĩ tu kalauf.

¹⁴ Agog fen, enei ganan teten, wauĩ laa fiya ufonūgouf, anim erēb erēb ganan tekelei guf irouwauf.

¹⁵ Kristus nē wau inosiya āgenei wauĩ bun utorōg len, ulum irouwauf, ere nigin, ā bouwa tekelei bun wau inosiya bun iweignein. Agog fen, Negur de wiyēgouf.

¹⁶ Utorōg len, Kristus nē od fatuk bagai ā namein ibodō di, ā kisi biya ganan bunem abob ufeleñdig fen, abob weder urougauf, agog fen, od Negur nē Itotoya Sam bun ibodok, Negur yana yaleseya seg ado, uur nē seg, āgenei wauĩ bun Negur de fiyēya ado walogouf.

¹⁷ Agog fen, erēb ā ago gef, od bun be kabĩ yaleya bun, anĩ ganan Odug Jesus yana bun agog fen, ĩ bunem Dei Negur de wiyēgouf.

Momoiya Tamo Kayau Ibor Mata Ibodōya Nē Faded Fiya

¹⁸ Kayau, āgenei tamo farumen ubodōgouf, are Odug nē lo fiya bun biya bagai.

¹⁹ Tamo, āgenei aiweĩ tar nigin wauĩ laaf fen, idi waud morō to wenēdigouf.

²⁰ Kesu, ā erēb erēb ganan bun sineĩ temeĩ tar sigoreid dō gouf, anim Odug wau al fouf.

²¹ Tama, ā gereneĩ tar to waud saneya wenēdigouf, ago gouf, idi agogon de fen, waud to al fouf.

²² Ferfer, ā erēb erēb ganan bun, āgenei marau tenebur enei nē sigoreid dō gouf, idi meledin dogol idi biya difamāf ya bunem meleid yaleya nigin dogol to ago gouf, anĩ ere, ā wauĩ momoi nē ado Odug nigin anini ge fen, ago gouf.

²³ Erēb ago gef ganan, wauĩ adok iro ken, ago gouf, tamo nigin sã, Odug nigin kabĩ alef ge fen, kabĩ walogouf,

²⁴ ere nigin, ā keleĩ, ā Odug bun tamal in akor mala solo walogouf. Are Odug Kristus anĩ ā aruna walekenēgef.

²⁵ Aib taka ĩ sane age fouf, yogon sane age fiya nigin mala solo sane yalouf, ere nigin, an anĩ kinau ya sã.

4

¹ Marau ā, āgenei ferfer erēb madur ado biya anĩ wenēdigouf, ere nigin, ā keleĩ, āg saa ilun āgenei Marau ibodok.

Faded Fiya Tunĩ

² Kosēya anĩ total uroug, lo weleg fen, Negur de wiyēgouf.

³ Agog fen, amā nigineg kosē gouf, are Negur amā od wogō mauf nigin bobog kā fel kanamā di, amā Kristus nē waa kurō mafalaisiyouf nigin kosē gouf, anĩ nigin aya kalabus bun abodok.

⁴ Negur aya biya od wogō auf nigin ifanan anĩ, sã yaor kurō afalaisiyouf nigin kosē gouf.

⁵ Erēb tamo kayau serē temeleid bun ago gou fenē, kisi biya ado ago gouf. Sain biya ā nigin wō youf ganan to seki gouf.

⁶ Āgenei wogōya sain bun ganan wau ifenēya barikāf, od kariya biya dogol wogō gouf, anĩ bunem, ā, tamo kayau ganan naig be fe solof irokenēdiya nigin keleĩ youf.

Idikeleya Nē Aanya

⁷ Tikikusem aya nigin od ganan wogō yeĩf. ĩ neu turau oboiyou, kabĩ tamo dō fiya biya fen, Odug bun kabĩ turau.

⁸ Aya, ĩ, ā bun enei nigin bagai sur afiyek, are ā, amā naig ma mafaref anĩ keleĩ di, anĩ bunem ĩ āgenei wauĩ yalesauf nigin, age afef.

⁹ ĩ Onesimus ado disiyouf, Onesimus ĩ neda turada dō fiya biya oboida, ĩ āgenei taka. Idi erēb erēb ganan ein agef wō yef anĩ dirokeneĩf.

¹⁰ Neu kalabus turau Aristakus, ā bun yogon aanya sur fef, Mak, Banabas ne tam, ĩg agef aanya sur fef. (Ā

ĩ nigin fadef fiya walegen. Ĩ ã garan isiyouf are, ã ĩ walogouf.)

¹¹ Jesus ĩ yana taka Jastus dedig, ĩg aanya sur fef. Negur nẽ tano nigin neu kabĩ tamo turau tar atun, idi dogol anĩ Juda temeleid. Age de fen, idi momoi bagai de fen, neu wau dalesen.

¹² Epafra ĩ ãgenei taka, Kristus Jesus nẽ kabĩ tamo, ã bun aanya sur fef. Ĩ faimud kosẽya bun ã nigin total inodig, are ã Negur nẽ oroya ganan bun, kisi feleya bagai ado momoiya odug bun total ufaragauf nigin age fef.

¹³ Aya, ĩ, ã nigin, idi Laodisia taun difaref anidi nigin ado, idi Hierapolis taun difaref anidi nigin kabĩ total yaledig anĩ, sã ĩ nigin kurõ afesif.

¹⁴ Nemã oboimã dokta Luk ado Demas aanya sur difef.

¹⁵ Tureĩ tar Laodisia taun dibodok anidi bun ado, Nimfa ado sios yogon fõ bun guru difef anidi bun, neu aanya wenẽdigouf.

¹⁶ Pas enei uweseg le di, Laodisia sios buneg diwesauf, abag, Laodisia tamal paseg uwesagauf.

¹⁷ Akipus urokenẽg, “Õ Odug bun kabĩ walen anĩ, el wo udikalauf nigin karĩ walauf.”

¹⁸ Aya, Polem aanya enei imaum bagai atotof. Aya kalabus bun abodok anĩ karĩ walagauf. Wau ifenẽya ã ado ibodõf.

1 Tesalonika

¹ Pol, Sailas, Timoti,
amã, Tesalonika sios Tamada Negur,
Odug Jesus Kristus ado bun ufaregef
ã bun, pas enei matotof:

Wau ifenëya wau inosiya ado ã bun
ibodõf.

Tesalonika Neid Momoiya Nigin De Fiyëya

² Amã faimud ã ganan nigin Negur de
mafiye ken, nemã kosë bun ã nigin
marokenëdig.

³ Amã neda Negur Tamada mala bun,
momoiya bunem ägenei kabĩ faat yuk,
wauĩ laa fiya bunem ägenei kabĩ yaleya
ado, neda Odug Jesus Kristus bun wauĩ
ise fen, ã to fese gen anĩ toku karĩ
mauledig.

⁴ Turamã tar, Negur ã nigin wau laa
fedig anĩ, amã keleĩ, are Negur ï ã
igirnein,

⁵ ere nigin, nemã biya od ã bun isin,
are od dogol bunem sã, anĩ ere, megeir
ado, Awa Uur Fateul ado, momoia
bagai ado, ã bun isin. ã atun, ã nigin
naig be ma mabodon anĩ ã keleĩ.

⁶ ã, amã Odug Jesus geid madë wamãgen.
ã darau odug adon, anĩ ere, Awa Uur
Fateulem kulíya ifenein anĩ bun, ã od
anĩ walegen.

⁷ Anĩ nigin, ã Masedonia Akaia provins
ado bun, momoia tamo kayau ganan
neid dodo gen wowã gen.

⁸ Odug në od ã bunem ilen, Masedonia
Akaia provins ado bun dogol sã, ägenei
Negur nigin momoia anĩ fõ fõ ganan
iyokelen. Anĩ nigin amã baban ã ereb
to mayeĩf.

⁹ Idi dogo, ã amã naig ge walemãgen
anĩ kurõ difalaisi kanamak. Age de fen,
ã naig ge idegëya waitou utorõg fen,
Negur bun falei ge, mata ibodõya në
ado momoi në Negur aruna waleg fen,

¹⁰ ï Naal ï laa bunem turĩ fiyen, are
Jesus ï didi dumen isiyouf bun tamal

kel yaledadig anĩ, saa ilun tamal tari
gen anĩ dirokanamak.

2

Pol Tesalonika Oun Kabĩ Yalen

¹ Turamã tar, ã keleĩ, amã nemã ki
yeíya ege to ilen.

² ã keleĩ, amã Filipai taun oun darau
ado kono fiya malen, anĩ ere, neda
Negur në isennëya bunem amã total
mano fen, naabura gudũ fiya total
ibod mog, in biya od wogõ mayein.

³ Amã total bagai marokeneik are, kũ
fenëya bunem sã, kisi sane bunem sã,
idegneíya bunemeg sã.

⁴ Age fiya ban, Negur biya od wogõya
nigin igirneíd fen, yo fiyëdin anidim
gen, amã wogõ maudig. Amã tamo
waud al fouf nigin to kabĩ malef,
anĩ ere, Negur ï wauda es fedig, ï
wau al fouf nigin kabĩ malef.

⁵ ã keleĩ, amã meleĩ yaleya nigin to
bagai wogõ mau fen, naumamã nigin
to nawamã dede mafedig. Are amã
momo morok anĩ Negur ï keleĩ.

⁶ Amã tamom yanamã seli kulõ difouf
nigin to mamiren, ã bunem sã, taka
bunemeg sã.

Amã Kristus në aposel mau fen,
amã sã morõ mafeneí you në,

⁷ anĩ ere, ã atun, amã molol nem kesu
sina gere tar kulatun fedidig gen,
age mafen.

⁸ Amã ã nigin waumã fatuk laaf fen,
amã Negur në biya od ifeneíya nigin
dogol sã, nemã mata ã nigin iraileya
nigineg waumã iron, ere nigin, ã amã
bun oboimã bagai wowã gen.

⁹ Turamã tar, momoi, amã kabĩ total
morõ ado malen anĩ ã karĩ welegef.
Amã morõ ã taka to mafeneí nigin,
bõ ado gaa ado kabĩ male fen, Negur
në biya od ã bun wogõ maun.

¹⁰ ã, momoia tamo atun, amã naig
be mafen, fateul, madur bagai, od sã
mafaren, are ã keleĩ, Negureg keleĩ.

11 Ā keleĩ, are amã, tama ĩ gere tar nigin suma inodig gen, ã mugu mugu bun suma manon,

12 amã wauĩ malesedig, wowor mayeĩdig, Negur ĩ yogon tano ado fula fiya medeĩya bun ulagauf nigin iweigneik, ĩ orof kilei ã ubodõgouf nigin, wedereĩ maroudig.

13 Age ma fen, amãg toku Negur de mafiyẽdig, ere nigin, sain ã Negur nẽ od amã bunem karĩg fen, walegen, are tamo nẽ od gen to walegen, Negur nẽ od bagai walegen, Negur nẽ od anĩ, momoi gef ã bun kabĩ yalef.

14 Turamã tar, ã oun Judia distrik Negur nẽ sios madẽ wiyẽdigen. Sios Judia distrik oun Kristus Jesus bun difaref, Juda tamo bun darau dalen gen bagai, ãg fõ tureĩ tar bun darau walegen.

15 Juda tamo idi, Odug Jesus profet geid didenkeis fen, amãg dirumã dirailen. Idi Negur wau al fiya to difenen, idi tamo ganan kiwai difenẽdif.

16 Idi neid tobonuneid bun, amã haiden wogõ mafiyẽdi di, isennẽya dalouf nigin naaburamã gudũ difedig. Naab anĩ bunem, faimud idi neid mosor tete tete dife di, mudu isedig. Age fiya nigin, Negur nẽ didi kisi feleya bagai, idi bun mogo isin.

Pol Tesalonika Ileya Nigin Fatuk Bagai Wau Iron

17 Anĩ ere, turamã tar, sain modeg bun, ã geid tabodon anĩ fara mafen (are bouwamam, kisim sã), amã ã ileyeĩya nigin fatuk bagai waumã iro ken, naab ganan bun kabĩ totol malen.

18 Amã ã gein masiyouf nigin waumã yenen. Momoi, aya, Pol, baba baban lakĩ afen. Anĩ ere, Satan naaburamã katĩ felen.

19 Neda Odug Jesus isiyouf bun, ere anĩ ĩ mala bun, nemã wau iseya, kulĩya, yana yaleseya nẽ teter youf? Are ã anĩ sã de?

20 Momoi, ã nemã fula fiya medeĩya ado, nemã kulĩya.

3

1 Anĩ nigin, amã foiya kisi feleya sã nigin, amã kisi ma fen, amã mugu ein Atens mabodõf are deuf maun.

2 Amã, ã ãgenei momoiya bun megeir yei ken, wauĩ yalesauf nigin, Timoti, ĩ nemã turamã ado Kristus nẽ biya od nigin Negur nẽ kabĩ tura, sur mafiyen.

3 Are takam morõ eneidi bun to kisi rori youf nigin age mafen. Ā gai keleĩ bagai, are ada morõ eneidi nigin igirnadan.

4 Momoi, amã ã geid tabodon bun, amã, ada fau darau difanadauf nigin toku marokenein. Age fiya bagai, agef wõ yen, are ã keleĩ.

5 Anĩ nigin, aya foiya kisi feleya sã kisi afe fen, aya ãgenei momoiya ileya nigin sur afen. Aya, naab taka taka bun kisi fiya tamo kisi yeĩ di, nemã kabĩ totol ege ileya nigin kumĩ aun.

Timotim Pol Od Biya Iroulekenen

6 Anĩ ere, Timoti gama bagai, ã bun tamal amã gein isi fen, ãgenei momoiya ado wauĩ laa fiya nigin od biya irou isin. ĩ irokanaman, are ã, amã nigin faimud biya karĩ welegedig ado, amã ã ileyeĩya nigin waumã irõdig gen, ãg ilemãya nigin wauĩ irõdig yen.

7 Anĩ nigin, turamã tar, amã nemã waumã morõ ado, darau ganan bun, ãgenei momoiya bunem, amã ã nigin waumã yalesen.

8 Gama amã waumã kulĩya ado mata mabodok, ere nigin, ã Odug bun megeir ufaregef.

9 Neda Negur mala bun, amã ã nigin waumã kulĩya ifanaman enei ganan nigin, naig ma abag kisi mafel, ã nigin Negur de mafiyẽf?

10 Amã masi mailiyei ken, ereb ã fau ãgenei momoiya bun lau gef anĩ isenneĩya nigin, bõ ado gaa ado Negur totol bagai kosẽ mafiyẽdig.

11 Gama, neda Negur Tamada ĩ yogo, neda Odug Jesus ado, nemã naab ã gein isiya nigin dũf nigin oromak.

¹² Odug āgenei wauī laa fiya gire fese di, amā ā nigin waumā laa fedig age fiya gen, abob nigin ado ganan nigin wauī laa fiya gogū foug nigin oromak.

¹³ Negur ī, āgenei wauī megeir fe di, neda Odug Jesus, in fateul tamo kayau ganan geid disiyouf sain bun, neda Negur Tamada mala bun, ā bouweī od sā fateul wō goug nigin oromak.

4

Mata Ibodōya Bun Negur Wau Al Fiya Ifenēya

¹ Od idīya nigin, turamā tar, amā, ā Negur wau al fiya wenēgoug nigin naig ge ufaragouf nigin mafelnein, are gama agog ufaregef. Gama amā ā enei baba baban ago goug nigin to mayei ken, Odug Jesus bun total bagai marokeneik.

² Odug Jesus nē total bunem, amā ā faded fiya mafenein, are ā keleī.

³ Negur nē oroya are ā fateul wowā goug anī, are ā noli tobonunā sese wiyēgoug.

⁴ Ā mugu mugu bouweī kulatun ge di, fateul fen, yeneī biyauf nigin keleī youf.

⁵ Haiden Negur keleī sam, noli nigin mudureid ditenēdig gen to ago goug.

⁶ Enei bun, takam ne tura sane to age fiyēf, idegēya bunem morō to ifenēf. Amā mogo marokenei ken, wedereī maroun, are Odug fau mosor age fediya ganan nigin tamo mala solo ifenēdiyof.

⁷ Negur ada amuyē adouf nigin to iweignadan, anī ere, fateul ibodōya nigin iweignadan.

⁸ Anī nigin, taka ī od enei idodōf, ī tamo to idodnek, are Negur in Awa Uur Fateul ifeneīdig anī idodnek.

⁹ Gama tureī tar nigin wauī laa fiya anī nigin amā to matokeneif, ere nigin, ā aug abob nigin wauī laa foug nigin Negurem ifelnein.

¹⁰ Momoi, ā tureī tar ganan Masedonia provins ganan bun difaref

anidi nigin wauī laa fedig. Anī ere, turamā tar, ā baba baban ago goug nigin total bagai marokeneik.

¹¹ Amā marokenein gen, ā molol ibodōya nigin kisi total walougouf, āgenei kabī nigin kisig fen, aug imeim kabī walougouf.

¹² Anī bunem, āgenei ibodōya bun tamo serē temeleid dileyei ken, anini douf, taka bun to utobōgoug.

Odug Isiyouf

¹³ Turamā tar, amā ā gare den onudi nigin to keleī youf anī to oromak, takag, tamo tunī ganan, wau iseya sā gen wauī gudū foug anī to oromak.

¹⁴ Jesus laaf fen, kel fā yen nigin ada momoi tauf, anī nigin, Negur, idi Jesus bun gare den anidi, Jesus geid guri feid isiyouf nigin momoi tauf.

¹⁵ Odug nē od bunem, amā ā marokeneik, are ada fau mata tabodok, Odug isiyouf bun tafaref ada, idi gare den anidi to bagai wal tafediyouf.

¹⁶ Odug yogo bagai saa ilunem isiyouf, ait odugem irō di, engel uyu irouya nē ait ado, Negur nē taur bunem iweig di, Kristus bun gare den anidi ketem fāfā douf.

¹⁷ Anī bure fele di, ada fau mata tabod ken, tafaref anī geif, idi geid bagu fada fen, lalo bun kutū fada se, Odug fotou fiya nigin saa ilun irou iselnadauf. An ada Odug geid mata gai gai tabodkalauf.

¹⁸ Anī nigin, od enei bunem abob wau talesauf.

5

¹ Gama, turamā tar, amā sain ado naa nigin to matokeneif.

² Ere nigin, ā keleī bagai, Odug nē naa, bē tamo bō isiyouf gen wō youf.

³ Tamo kayau wau inosiya ado morō sā tabodok de mog, daū fiya nunū idi bun, kayau kesu gō fiya nigin firi yedig gen isi di, idi to diyalalauf.

⁴ Anī ere, turamā tar, ā gugum bun to ufaregef, anī nigin, naa anī bē tamo gen to isi fen, ba yeif.

5 Æ ganan lalan ado we bun temeļeĩ. Ada bõ ado gugum nẽ sã.

6 Anĩ nigin, ada, idi tunĩ denek gen to tafarauf, anĩ ere, ada lo tafel fen, karĩ adouf.

7 Are idi mulaĩ temeļeid, bõ anĩ denẽdig, idi aai meleid waĩ yedig, bõ anĩ aai meleid waĩ yedig.

8 Anĩ ere, ada we nẽ nigin, ada dug nigin karĩ ado fen, momoiya wau laa fiya ado siot kapa gen tafoun ken, kel gei fiya nẽ wau iseya anim hat kapa gen kurũ tafouf.

9 Negur ada didi yaleya nigin to igirnadan, anĩ ere, ada neda Odug Jesus Kristus bunem kel gei fadauf nigin igirnadan.

10 Æ ada nigin laa fen, are ada mata be tabodok, gare be tauf are, Æ geid tabodõf nigin age fen.

11 Anĩ nigin, abob wau tales fen, abob walesagauf, gama ago gef gen.

Idikeleya Nẽ Faded Fiya

12 Turamã tar, gama amã marokeneik, idi ã atun kabĩ total dalef, idi Odug bun ãgenei uyu irouya difar fen, wedereĩ dirouf anidi karĩ wiyẽdigouf.

13 Idi kabĩ dirouf nigin ge fen, idi nigin wauĩ laaf fen, fatuk bagai karĩ wiyẽdigouf. Abob nigin wau inosiya bun ufaragauf.

14 Turamã tar, amã total bagai marokeneik, fõ temeļeid wedereid uroug, anini temeļeid waud waleseg fen, forõ temeļeid usennẽdigouf, ganan nigin nameĩ ukeleg ubodõgouf.

15 Taka nem taka nẽ mosor to solo fouf, anĩ ere, abob nigin ado ganan nigin, faimud tobonunã biya ago gouf.

16 Wauĩ bun faimud kulĩ youf,

17 toku kosẽ gouf,

18 ereb ereb ganan bun de wiyẽgouf, ere nigin, are ã nigin Kristus Jesus bun Negur nẽ oroya.

19 Awa Uur nẽ yã to uroroukeleg,

20 profet neid od to welebi ge.

21 Ereb ereb ganan es gouf. Biya anĩ uroug, kafĩ walagauf.

22 Ereb sesen fire fire ganan sese gouf.

23 Negur Æ yogo, wau inosiya nẽ Negur, fateul kisi feleya bagai inoyeĩf. Ægenei uur, meleĩkanon ado, bouweĩ anĩ ganan, neda Odug Jesus Kristus isiyouf bun od sãf.

24 Æ iweigneik Æ yogon od dõ fiya biya, Æ de age fouf.

25 Turamã tar, amã nigin kosẽg.

26 Tureĩ tar ganan, umã fiya fateul bunem aan wedig.

27 Aya, tureĩ tar ganan bun pas enei uwesagauf nigin, Odug mala bun total bagai arokeneik.

28 Neda Odug Jesus Kristus nẽ wau ifenẽya ã ado ibodõf.

2 Tesalonika

¹ Pol, Sailas, Timoti weim,
Tesalonika sios, Tamada Negur,
Odug Jesus Kristus ado bun ufaregef
ã bun, pas enei matotof:

² Wau ifenēya wau inosiya ado,
Tamada Negur, Odug Jesus Kristus
ado bunem, ã bun ibodōf.

De Fiyēya Ado Kosēya

³ Turamã tar, amã ã nigin faimud
Negur de mafiyēf bagai, are de age
mafiyēf, ere nigin, āgenei momoiya
fau fau odugef iselef, agog fen, ã
ganan abob nigin wauī laa fiya anī
odugef.

⁴ Anī nigin, amã Negur nē sios
atun, ã momoi ge fen, ã kafī fiya
darau ganan ado walegef bun to fese
gef nigin selī kulō mafedig.

⁵ Enei ganan anim, Negur nē es
fiya are tutuk anī yaoref. Anī bunem,
ã Negur nē tano nigin kisi falauf, ã
anī nigin kafī fiya walegef.

⁶ Negur ī madur bagai. Ī morō
difeneik anidi morō ifenēdiyof,

⁷ ã morō walegef, ī karika ifeneif,
amāg ifanamāf. Anī Odug Jesus, in
engel megeir adodo geid, yā bale fi-
totoleya bun saa ilunem isiyof bun
wō youf.

⁸ Idi Negur keleī sã ado, neda Odug
Jesus nē biya od to dō difedig anidi,
darau ifenēdiyof.

⁹ Idi daū fiya faimud ibodkeleya
nē kafī fiya dale fen, Odug mala bun
tamal ado, yogon megeir nē fula fiya
medeīya bun tamal, irudiyof.

¹⁰ Naa anī bun, ī isi, yogon fa-
teul tamo kayau bun tamal, fula fiya
medeīya yale di, ī nigin momoi den
anidi ganan, ī nigin meleid yū yalouf.
Are ã gedyof, ere nigin, ã nemã od
nigin momoi gen.

¹¹ Anī nigin amã ã nigin toku kosē
maudig, are neda Negur iweigneik
anī kilei, ã kisi feleya inoyeif nigin,
takag, Negur in megeir bunem, ereb
ereb biya ganan ã ago gouf nigin kisi

gef anī ado, āgenei momoiya nē kabī
ganan kisi falauf nigin.

¹² Amã age ma kosē maudig, are
neda Negur ado Odug Jesus Kristus
neid wau ifenēya bunem, neda Odug
Jesus yana ã atun fula fiya medeīya
yale di, āg ī bun fula fiya medeīya
walogouf nigin age mafedig.

2

Lo Wal Fiya Tamo Wō Youf

¹ Turamã tar, Neda Odug Jesus
Kristus isiyof nigin ado, ī wagen
guru tagauf nigin, amã ã maro-
keneik,

² Odug nē naa mogo isin yeya
anī, profet od, wogōya be, pas amã
bunem isin ya anī karīg fen, to kaisã
terēg fen, wauī kui youf.

³ Naab taka taka bun, taka nem to
idegneif nigin lo weleg, ere nigin, fau
kiwai ketem wō ye fen, lo wal fiya
tamo, are daū fiya bun ileyã nē anī
wō ye bure fele di, naa are isiyof.

⁴ Ī kiwai ino fen, ereb ereb ganan
waitou de fen, seli dabidig anī ī faru-
men ineneid fen, ī yogo Negur nē
tempel bun ibod ken, ī yogo nigin
Negur ye kurō fesiyof.

⁵ Aya ã geid tabod ken, enei nigin
arokeneidig anī, ã to karī welegef de?

⁶ Gama erebem ironnek are ã
keleī, age fe di, fau yogon sain bun
bagai, ī wō youf.

⁷ Lo wal fiya nē waa megeir mogo
kabī yalef, anī ere, ī gama ironnek
anim irouf ile iwaikalauf.

⁸ Age fe di, lo wal fiya tamo
yaorouf, ī Odug Jesus in awa yau
nesityam yukeis fen, Odug isiya nē
medeīya anim ī daū falauf.

⁹ Lo wal fiya tamo nē isiya, de
Satan nē kabī ado susu fel, idegēya
memelik, uris ado, ereb urug bagai
fire fire ganan inodiyof.

¹⁰ Agef fen, sesen ganan bunem idi
inanakelef anidi idegnēdiyof. Idi
inanakelef, ere nigin, idi momoi ni-
gin waud laaf fen, kel gei fediyof
anī ditoron.

¹¹ Age fiya nigin, Negur idegëya totol sur fe di, idi anī nigin momoi douf.

¹² Are idi momoi nē nigin to momoi de fen, sesen nigin waud al fen anidi ganan, Negurem es fediyouf nigin age fef.

Megeir Ifareya

¹³ Anī ere, amā faimud, ā, turamā tar Odug nē oboi nigin, Negur de mafiyēf bagai, ere nigin, gariya bun, Negur, Awa Uur ā fateul ineneīya nigin kabī yalef bunem ado, ā momoi nē nigin momoi gef bunem, kel gei yeīf nigin igirnein.

¹⁴ Ī nemā biya od bunem enei bun iweignein, are ā neda Odug Jesus Kristus nē fula fiya medeīya anī walogouf nigin age fen.

¹⁵ Anī nigin, turamā tar, megeir ufareg fen, sigoramam wogōya bunem ado pas bunem, mafelnein anī uroug kafī walagauf.

¹⁶ Neda Odug Jesus Kristus ĩ yogo ado Tamada Negur, ĩ ada nigin wau laa fen ado, yogon wau ifenēya bunem, faimud ibodkeleya nē wau yaleseya ado wau iseya biya ifanadan anī,

¹⁷ ā wauī yaleseya difenei ken, ereb ereb biya ganan ago gef ado od wogōya bun megeir difeneīf nigin oromak.

3

Kosē Nigin To Fiya

¹ Od idīya nigin, turamā tar, Odug nē od, ā bun age fef gen, kaisā bagai iyokel fen, tamo kayau atun fula fiya medeīya yalouf nigin, amā nigin kosē gouf.

² Agog fen, amā tamo idodōya ado sesen bun tamal yalelnamāf nigin kosē gouf, ere nigin, tamo gananem momoiya sã.

³ Anī ere, Odug ĩ yogon od dō fiya biya, ĩ ā megeir ifenei ken, Satan bun tamal kulatun yeīf.

⁴ Amā Odug bun momoi mauf, are amā ā marokeneik anī ago gef ula-gauf.

⁵ Odug āgenei wauī itoneī di, Negur nē wau laa fiya ado Kristus nē feseya sã megeir ifareya bun ilauf nigin oromak.

Fō Temeleid Wedereid Irouya

⁶ Odug Jesus Kristus yana bunem, turamā tar, amā ā marokeneik, tureī tar fō temeleid ganan, amā mafelnein kilei to mata dibodōdig anidi so wiyēdigouf.

⁷ Amā age mafen anī naig ge dō gouf nigin, ā aug keleī. Amā ā geid tabodon sain bun, amā to fō faman.

⁸ Age ma fen, amā taka nē saaf na yaleya sã to mon. Age fiya ban, amā ā atun taka morō to mafenēf nigin, bō ado gaa ado kabī totol malen.

⁹ Amā ā bun tamal isennēya yaleya kisi feleya, anī ere, to age mafen, ere nigin, ā amā bun ulemāg fen, āg agog dō gouf nigin.

¹⁰ Amā ā geid tabodon sain bun, amā nun enei mafenein: “Taka ĩ kabī to yalouf are, ĩ saaf to yāf.”

¹¹ Amā ā atun tunī fō temeleid yeya anī karī maun. Idi fō temeleid, anī ere, idi dogo nigin kabī to dale fen, taka nigin dogol wogoī dedig.

¹² Tamo age fediya nigin, Odug Jesus Kristus yana bunem, amā totol bagai moro ken, wedereid marouf, dē desil fen, dogo naumeid nigin kabī dalouf.

¹³ Aug nigin, turamā tar, biya ago gouf nigin to fō yeīf.

¹⁴ Taka ĩ pas enei bun marokeneik anī to dō fouf are, dē wiyē kalagauf. Ī mama fouf nigin, weim to nigal ūgouf.

¹⁵ Anī ere, ĩ kiwai gen to ulogouf, ĩ tureī gen weder urougouf.

Idikeleya Nē Aanya

¹⁶ Gama wau inosiya nē Odug ĩ yogo, sain ganan bun, naab ganan bun, wau inosiya ifeneīf. Odug ā ganan geid ibodōf.

¹⁷ Aya, Pol, aya imaum aanya enei atotof, are neu pas ganan bun aya yug imauba. Aya eig afe atotodig.

¹⁸ Neda Odug Jesus Kristus nē wau ifenēya ā ganan bun ibodōf.

1 Timoti

¹ Aya, Pol, Negur neda Isennadaya ado Kristus Jesus neda wauda iseya neid nigiya od bunem Kristus Jesus nē aposel wō aun,

² Timoti, momoiya bun neu kesu bagai, bun pas enei atotof.

Tamada Negur ado neda Odug Kristus Jesus neid wau ifenēya, wau yūya ado, wau inosiya, ō bun ibodōf.

Idegēya Lo Tai Fiya Tamo Nigin Weder Irouya

³ Aya Masedonia provins alauf sain bun, aya ō total bagai arokonon, Efesus an ubod ken, tamo tunī urokenēdi di, idegēya keleī anī baban to tai difediyouf.

⁴ Ago di, idi nenerī ege ado ibor idikeleya sã dir difedidig anī so difediyouf. Age fediya are momoiya bunem Negur nē kabī yaleya ban, luwa irouya dogol dalesedig.

⁵ Weder irouya od enei nē gariya are, wau laa fiya, are ī wau karētut, es fiya kisi biya ado, momoiya bagai bun tamal isidig.

⁶ Tunī enei bunem diya dile, od kaū sã wogōya bun dilelen.

⁷ Idi lo tai fiya tamo wōya orodif, anī ere, idi ereb wogō def ado, ereb nigin total dinof are idi keleī sã.

⁸ Ada keleī, taka ī lo dōf el fouf are, lo ī biya.

⁹ Ada keleī, lo ī madur tamo nigin to inof, ī lo wal fiya, idodōya, Negur dudum fiya, mosor temeleid, idi fateul sã, idi buru naumeī nigin kisi difedig, idi sineid temeid tar didenkesif, tamo yukesiya,

¹⁰ noliya, tamo tutur kayau tutur noliya, ferfer inouf nigin tamo bē yaleya, idegēya, momoi nē od wa fiya, ereb ganan ifelnēya biya wal difef anidi nigin lo inof.

¹¹ Ifelnēya biya anī, biya od fula fiya medeīya, Negur el fiya barikã aya wogōya nigin ifanan anī susu felef.

Odug Nē Wau Ifenēya Pol Bun Ilen

¹² Aya neda Odug Kristus Jesus megeir ifanan anī de afiyek, ere nigin, ī aya yogon od dō fiya biya anī ile fen, in kabī alouf nigin igirnan.

¹³ Aya kulu kono fiya tamo, tadū fediya tamo, seye tamo, anī ere, aya wau yūya ifanan, ere nigin, aya to kelei ken, momoiya sa ken, age afen.

¹⁴ Neda Odug nē wau ifenēya, Kristus Jesus nē momoiya wau laa fiya ado, mugi bagai aya bun foula felen.

¹⁵ Od enei momoi bagai, ganan dale fen, momoi douf nigin: Kristus Jesus mosor tamo kel gei fiya nigin tenebur isin. Idi atun aya sane bagai, idi ganan wal fediya.

¹⁶ Anī ere, gariya eig fiya nigin, aya wau yūya ifanan, are aya mosor temeleid ganan wal fediya bun, Kristus Jesus in imatēya mugi bagai aya bun ifelnēdin, anī bunem idi momoi douf anidim dile fen, ī nigin momoi de fen, mata ibodkeleya anī dalouf nigin ī age fen.

¹⁷ Gama King ibodkeleya, ī mata ibodkeleya, ileya kisi feleya sã, Negur yogo dogol anī bun yana ado fula fiya medeīya gai gai ibodkalauf. Momoi.

¹⁸ Timoti, neu kesu, aya tai fiya od eig fiya afonok, are ō nigin profet od wogōya yenen anī dō wo di, ō sã biya kusī wouf nigin.

¹⁹ Momoiya ado wau karētut biya urou kafī wol. Tunī anī ditoraran nigin dogo neid momoiya tadū difelen.

²⁰ Age difen atun are Himeneus Aleksanda ado, idi Negur to kono difiyēf anī keleī youf nigin, Satan ima bun anenēdin.

2

Negur Yana Yaleseya Nigin Fad-edyā

¹ Aya ō total bagai orokonok, uruwa bagai, are nonī fiya, kosēya, taka nigin Negur irokenēya, de fiyēya anī, tamo ganan nigin agouf.

² King ado kabī nē mudur ganan nigin agouf, are ada wauda inosiya

ado foro tausil, Negur orof ganan ado fateul bun tabodōf nigin agouf.

³ Agouf are biya, Negur neda Isenadaya wau al fef,

⁴ Negur ī tamo adok ganan kel gei fouf nigin ado, momoi nē keleī bun disiyouf nigin orof.

⁵ Are, Negur ī tekelei, agef fen, atun tamo tekelei, Negur ado tamo atun ifaref, tamo are Kristus Jesus,

⁶ tamo ganan fotokar ī yogo bouwa itoron, anī yogon sain bun bagai Negurem tenebur tamo kayau keleī youf nigin yaoren.

⁷ Age fiya nigin, aya arū tamo, aposel igirnan, aya momoi bagai orok, aya idegēya sā, aya, haiden atun, momoiya bagai nē ifelnēdiya tamo igirnan.

⁸ Tamo fō fō ganan imeid fateul ilun dales fen, kosē douf anī aya orouf, seye sā, monē sā.

⁹ Takag, aya kayau kolos biya, taka mama ifenēya nē ani sā, tamo kayau nē lo fiya biya bun ifonūya anī orouf, fatiya kori fiya sā, gol sā, maaī tuwa meli bagai pel nē kilelei sā, meein odug nē kolos sā anī orouf.

¹⁰ Anī ere, aya idi tobonunā biya dō difouf anī orouf, are kayau Negur yana dalesef ya anī susu falauf.

¹¹ Kayau ī foro yel dē yesil fen, dō fouf anī bunem keleī yalouf.

¹² Aya kayaum tamo ifelnēya be, wal fiye ken, uyu iroukenēya nigin to yo auf, ī foro yalauf bagai.

¹³ Ere nigin, Adam ketem inon, agef fen, Eva inon.

¹⁴ Agef fen, Adam anī to idegnen, kayau anī idegnē di, mosor bun kubū yen.

¹⁵ Anī ere, kayau idi toku tobonunā biya bun momoi douf, waud laa fouf, fateul dibodōf are, idi kesu gō fiya bun isennēya dalouf.

3

Uyu Iroudiya Ado Uyu Iroudiya Farumen Kabī Tamo

¹ Od enei are momoi bagai: Taka ī uyu irouya wō youf nigin wau irōf, ī kabī biya yaleya nigin orof.

² Uyu irouya, yana sane sā, ī kayau aiwau, anī ere, ī kayau tekelei youf, ī molol tamo, yogo nigin el fe kulatun fouf, ī karī difiyēf, tamo dor yalouf, tai fiya kisi feleya,

³ aai to yōdig, to kusī youf, imatēya, monēya sā, moni nigin wau laa fiya sā.

⁴ Ī kayau kesu el fe, lo fediyouf bagai. Age fe di, in kesu el de dō de fen, karī difiyēf.

⁵ (Taka ī yogon kayau kesu lo feid fen, tutuk fediya kisi feleya sāf are, naig fe fen, ī Negur nē sios lo fouf?)

⁶ Ī gama bagai momoiya tamo wō ye fen, to uyu irouya ifarauf bagai, age fouf are, ī bilāya bunem fasikor fele di, Negur Satan es fiyen gen, īg es fiyēf be.

⁷ Ī serē temeleid buneg yana biya adouf bagai, anī bunem, ī yana sane to yale fen, Satan nē kor bun to ilauf.

⁸ Uyu iroudiya farumen kabī tamo anidi, areg age fiya, tamo idi karī difiyēdidig, idi baleid to kara urudig, aai fatuk to dōdig, idegēya bunem safina to daledig.

⁹ Idi momoiya nē keleī mugi, kisi karētut atata feleya ado dirouwauf bagai.

¹⁰ Uruwa idi kisi difediyouf, age de fen, idi bun od taka sāf are, utornēdig len, uyu irouya farumen kabī tamo wō de fen, tamo kayau disennēdiyof.

¹¹ Naab tekelei anī bunem, nedi aiweid tar idig karī difiyēdiyof, idi dumen od to wogō douf, anī ere, idi molol fen, ereb ereb ganan kulatun fiya kisi falauf.

¹² Uyu irouya farumen kabī tamo ī kayau aiwau, anī ere, kayau tekelei fen, in kesu tar ado fō ereb ereb ganan anī el fe, kulatun fediyof bagai.

¹³ Idi kabī biya dalen, are yeneid biya bagai dalef, age de fen, idi Kris-

tus Jesus bun momoiya nigin kukiŷa sã wogõ def.

¹⁴ Aya õ gein kaisã bagai isiya nigin wau yenek, anĩ ere, aya faded enei atotkonok, anĩ bunem,

¹⁵ aya foi auf are, tamo kayau Negur nẽ fõ bun naig de age difouf are õ keleĩ youf, Negur nẽ fõ anĩ mata ibodõya Negur nẽ sios, are momoi nẽ monog tor ado gariya.

¹⁶ Neda momoiya nẽ waa anĩ odug, are taka nem wa fiya kisi feleya sã:

Ĩ bouwa ado wõ yen,

Awa Uurem ĩ madur bagai anĩ yaoren,

age fe di, engelem dilen,

age de fen, teneub ganan bun ĩ nigin wogõ de,

momoi de di,

fula fiya medeĩya bun yalesnen.

4

Pol Timoti Faded Fiyen

¹ Awa Uur yaor bagai irok, dum bun tunĩ fau momoiya ditor ken, idegẽya uur ado ereb ereb kaa sesen idim difelnẽdiyof anĩ, idi dõ difouf.

² Ifelnẽdiya age fediya are, idegẽya tamo neid meleid yaleya bunem isif, idi neid kisi ain uruwam ifalege di, galig leya gen.

³ Idi tamo kayau yaleya katũ difiyeĩd fen, saaf tunĩ nigineg katũ difiyẽdiyof, saaf are Negurem tamo momoi de fen, momoi nigin keleĩ anidi Negur de difiye ken, dãf nigin inodin.

⁴ Ereb ereb ganan Negur inon are biya, ereb ereb Negur de fiye ken, yaleyauf anĩ, to sese fiyẽyauf,

⁵ ere nigin, are Negur nẽ od ado kosẽ bunem fateul ifenek.

⁶ Ereb ereb enei turã tar bun ufelnẽdiyof are, momoiya od ado ifelnẽya biya dõ wodig anim megeir ifonõ di, Kristus Jesus nẽ kabĩ tamo biya wõ wouf.

⁷ Negur ditoron anĩ nẽ od ado kayau tubau neid nenerĩ ege anĩ to urou, Negur nẽ tobonunã dõ fiya biya wõ wouf nigin, õ ogo tai wouf.

⁸ Bouwa buru nẽ tai fiya are naal isennadaf, anĩ ere, Negur nẽ tobonunã dõ fiya biya are ereb ereb ganan nigin isennadaf, anim gama mata ibodõya nẽ ado dumen mata ibodõya nẽ promis od irouf.

⁹ Od enei momoi bagai, ganan dale fen, momoi douf nigin

¹⁰ (enei nigin, ada kabĩ tale fen, lakĩ tafef), are ada neda wauda iseya mata ibodõya Negur bun tanon, ĩ tamo ganan nẽ isennẽya, idi momoi def anidi neid bagai.

¹¹ Ereb ereb eneidi urokeneĩd, su agog wiyeĩd fen, ufelneĩd.

¹² Õ kesu oosi de fen, takam to lai yõĩ, anĩ ere, wogõya bun, ibodõya bun, wau laa fiya bun, momoiya bun, amuyẽ sã karẽtut bun, momoiya tamo neid suma ago fen, idi age de dõ difouf nigin ufelnẽdiyof.

¹³ Atun meleid bun Negur nẽ Ito-toya uwesauf, faded wediyof, ago fen, ufelnẽdif ule mog, aya asiyouf.

¹⁴ Uyu irouya imeid õ teten dino fen, profet od bunem uur nẽ ege luwa walen anĩ to welebi wo.

¹⁵ Õ suma enei ganan dõ fen, waũ adok wenẽdiyof, anĩ bunem, tamo kayau ganan ogon kabĩ naig fe ilef anĩ dilouf.

¹⁶ Õ ogo nigin ado ogon ifelnẽdiya nigin lo walauf. Anĩ feseya sã toku agouf, anĩ bunem, õ ogo ado idi karĩ diyõf anidi isennẽya walogouf.

5

Momoiya Tamo Kayau Kulatun Fediya Nigin

¹ Tamo tubau total bagai to kãkã wiyẽf, anĩ ere, õ tamã gen urokenẽf. Kesu oosi, turã tar gen walediyof,

² kayau biyeid are sinã gen, kayau momoul are main tar gen, kisi karẽ bagai ado walediyof.

³ Kayau waab bagai kesu sã anidi el ge lo wedigouf.

⁴ Anĩ ere, waab taka ĩ gere tar be, tubu tar adouf are, uruwa idi neid Negur dõ fiya nẽ tobonunã biya tai fiya nigin, idi neid ibor el de kulatun

difouf, nedi sineid temeid tar simō bun lo difedin anī kilei abag age de kulatun difediyouf, anim Negur wau al fouf.

⁵ Kayau waab bagai taka, ī mugu bagai, isennēya yaleya nigin yogon wau iseya Negur bun ino fen, bō ado gaa ado toku kosē ye fen, Negur bun isennēya yaleya nigin to fiyēf.

⁶ Anī ere, waab taka ī bouwa sigigi fiya nigin dogol ibodōf are, ī mata ibodok, anī ere, ī laa fen.

⁷ Faded eneig tamo kayau wenēdiyof, ago di, taka bouwa bun od to dinouf.

⁸ Taka ī yogon ibor tar to kulatun fediyof, yogon sina tama kayau kesu bagai anī to kulatun fediyof are, in wau momoiya wa fef, anī bunem, ī sane bagai, taka to momoi yef anī wal fiya.

⁹ Waab taka ī aiwa tekelei ado el de dibodok dile 60 yar wal fen ouf are, waab neid daū bun unenēf,

¹⁰ agef fen, ī yogo tobonunā biya nigin yana ado, ī kesu kulat biya, ī tamo yaledig, momoiya tamo kayau yeid kulo fedig, morō adodo isenneīd fen, ī yogo ereb ereb biya ganan age fedig.

¹¹ Kayau waab fau gaū idi, waab neid daū bun to unouf. Ere nigin, idi neid bouwa nē oroya anī, Kristus nigin momoiya anī wal fese di, idi tamo yaleya nigin orodiyof.

¹² Anī bunem, idi es fiya dogo bouweid bun dinof, ere nigin, idi uruwa bun waud kuturol fen iron anī narī difen.

¹³ Takag, idi fō fiya tobonuneid ado fen, fō fō dalef diyōdig. Fō fiya dogol sã, dumen od wogōya ado, taka nigin wogō yef iyōya, idim to wogōya nē anī wogō dedig.

¹⁴ Anī nigin, kayau waab fau gaū, tamo dalouf, kesu adouf, nedi fō el de lo difouf, kiwaim idi dumedin irōya nigin naab to dukenēdiyof anī aya orouf.

¹⁵ Tunī mogo ditor ken, Satan dō difen.

¹⁶ Kayau taka ī momoiya ado, in ibor bun waab adodiyof are, ī yogo isennēdiyof, idi nigin sios morō to ifenēf, anī bunem, sios waab idi isennēdiya nigin bagai yenek anidi isennēdiyof.

¹⁷ Uyu irouya sios nē kabī el de diroulef, yana biya ado mala solo biya bagai dalouf, are idi biya od wogō def ado difelnēdif anidi, age difouf bagai.

¹⁸ Negur nē Itotoya eig ye irok, “Bulmakau wit faat biya nē gabar yalelauf nigin lalai feid mog, yogon awa to ufokol,”* takag, “Kabī tamo, yogon kabī mala yalouf.”†

¹⁹ Uyu irouya taka nigin bouwa yūya od to urouwauf, fau uruwom be towom dirō di, anī urouwauf.

²⁰ Idi mosor dinof are tamo kayau meleid bun ou wiyēdiyof, are tunī wedereid fokō youf nigin agouf.

²¹ Negur, Kristus Jesus ado, engel igirnēdin meleid bun, aya ō total bagai orokonok, faded enei dō fen, taka dogol waū to wenēf, ō anī kinau ya anī bunem ereb taka to agouf.

²² Tetedin imā inoya nigin to sibu wo, tunī neid mosor bun to kababal wo. Ō karē bagai ubodōf.

²³ Naan dogol to wāf, wain naal bagai walouf, ere nigin, ogon name darau nigin ado, ogon dagi baba baban wō yedig nigin.

²⁴ Tamo tunī neid mosor are yaor, anī ketem es fiya bun ifaref, anī ere, tunī neid mosor dum yaorouf.

²⁵ Age fiya gen bagai, biya age fiya are yaor, idi biya age fiya gama yaor sã areg, iminēya kisi feleya sã.

6

¹ Ferfer idi ganan, nedi moroid tar yana biya dino fen, karī difiyēdiyof, anī bunem, Negur nē yana ado ama mafelnēdif anī, to kono difouf.

² Tunī idi, nedi moroid tar momoiya adouf are, amā tura tura de fen, to karī difiyēdig gen to age difouf. Age fiya ban, idi el de

* 5:18: Diuteronomi 25:4 † 5:18: Luk 10:7

aruneid dalouf, ere nigin, idi neid kabī bunem biya dalef are momoiya tamo, idi neid oboiyeid. Enei ganan anī ufelneīd fen, totol bagai uro-kenēdiyof.

Moni Nigin Wau Laa Fiya

³ Taka ī idegēya keleī ifelneīd fen, Odug Jesus Kristus nē faded fiya biya ado fateul ibodōya ifelnēdiya anī nigin wau to irōf are,

⁴ ī idegēyam idegnē di, bilā yef, ī ereb taka to keleī. Ī monēya ado od luwa irouya nigin oroya sane ado, anī bunem, kiyeī, kusī, bou yūya od, sisiniya kisi sane irou fen,

⁵ tamo kisi sesen ado atun toku koukā ya ibodōf, tamo kisi sesen ado anidi, momoi anī ditor ken, fateul ibodōya are moni odug yaleya nigin de fen, kisi difedig.

⁶ Anī ere, safina nigin wau morō sā ado fateul ibodōya anī, mala biya ado.

⁷ Ere nigin, ada teneub enei bun gemū tasin nigin, age fiya bagai gemū ke tauf.

⁸ Anī ere, ada saaf ado kolos adouf are, ada nigin de tauf.

⁹ Tamo kayau safineid ado ibodōya kisi difef anidi, kisi fiya bun, kor bun ado, neneya kisi ado waila dī fiya kisi musei bun kuku def, kisi anim tamo daūf sane lauf.

¹⁰ Moni nigin wau laa fiya, are ereb ereb sesen ganan nē gariya. Tamo kayau tunī moni nigin waud ditenen, momoiya ditor ken, idi dogo waud darau musei dalen.

Polem Timoti Ago Dō Woi Fiyen

¹¹ Anī ere, ō, Negur nē tamo, enei ganan nigin so rel fen, madur bagai ibodōya, fateul ibodōya, momoiya, wau laa fiya, feseya sā ifareya ado, molol dō wouf.

¹² Momoiya nigin kusī biya walouf. Mata ibodkeleya are, ō musei meleid bun el wo, kurō wesin sain bun, ō anī nigin iweignon anī urou kafī wol.

¹³ Negur ereb ereb ganan mata ifenēdidig ado, Kristus Jesus ī Pontius

Pailat mala bun el fe kurō fesin, idi meleid bun, aya ō orokonok,

¹⁴ od enei dō, kerema sā dō wo ule, neda Odug Jesus Kristus wō youf,

¹⁵ are Negur yogon sain bun irou isiyof, Negur ī el fiya ado ī dogol Uyu Irouya, king neid King ado odudug neid Odug,

¹⁶ ī dogol ī mata ibodkeleya, agef fen, ī lalan medeīya barikā tamom an ileya nigin kisi feleya sā anī bun ibodōdig, taka nem to ilen, taka nemeg to ilouf. Ī bun yana ado megeir faimud ibodkalauf. Momoi.

¹⁷ Teneub enei bun safina musei adodo urokenēdig len, yeneid to dales fen, moni nigin waud to ditene, moni are gai to ibodkalauf, anī ere, idi neid waud Negur bun dinouf, ī ada wauda al fouf nigin, ereb ereb ganan kisi feleya ifanadadig.

¹⁸ Idi tobonunā biya age dife di, tobonunā biya inid ado dibodōf nigin, dor yaleya nigin ado, ne tā isennēya nigin urokenēdiyof.

¹⁹ Naab enei bunem, idi safina biya dogo neid dumen nē nigin gariya megeir ado dino fen, mudu dino di, iselauf, age de fen, idi mata are mata bagai anī dalouf.

²⁰ Timoti, ereb ereb ō bun inon anī kulatun wo. Momoiya sā neid od ado, kiwai kisi are idegēya bunem keleī biya dedig anī so wiyē,

²¹ are tunī mogo wogō den, anī age de fen, idi momoiya bun tamal ditor diyalelen.

Wau ifenēya ō bun ibodōf.

2 Timoti

¹ Aya, Pol, mata nē promis od, are Kristus Jesus bun ibodok anī kilei, Negur nē oroya bunem Kristus Jesus nē aposel wō aun,

² Timoti, neu kesu oboiyou bun pas enei atotof.

Tamada Negur ado neda Odug Kristus Jesus neid wau ifenēya, wau yūya ado, wau inosiya, ō bun ibodōf.

Momoiya Megeir Ifareya Nigin Wau Yaleseya Od

³ Aya ō nigin, toku bō ado gaa ado, neu kosē bun karī aul fen, aya, neu talik tar age difen gen, Negur mala bun kisi karē bunem, Negur aruna aledig anī, de afiyek.

⁴ Ogon maru nigin karī aul fen, ileyōya nigin wau fatuk irok, are aya wau fatuk al foug nigin age afef.

⁵ Aya ogon momoiya idegēya sã anī karī aulen, momoiya anī, uruwa bun ogon tubū Lois sinã Yunis ado bun ibodon gen, aya momoi auf, are ō buneg agef ibodok.

⁶ Anī nigin, Negur nē ege luwa anī kebu wo di, futu rouf nigin wederē fokō afef, Negur nē ege luwa are imau teten anon anī bunem ō bun ibodok anī.

⁷ Negur ada kumī nē uur to ifanadan, anī ere, megeir nē, wau laa fiya nē ado, ada dug kulatun fiya nē uur ifanadan.

⁸ Anī nigin, ō neda Odug kurō fesiya nigin ō to mama yōf, aya ī nigin kalabus bun abodok nigineg to mama yōf. Anī ere, Negur nē megeir bunem, ō aya ado bagu ta fen, biya od nigin darau talouf.

⁹ Negur ī kel gei fada fen, fa-teul ibodōya bun iweignadan, are ada ereb taka age tafen anī bunem sã, anī ere, ī yogon wau irōya ado wau ifenēya bunem ī age fen. Wau ifenēya enei, Kristus Jesus bun tetunem fau sain gariya inoya sã mog, ifanadan.

¹⁰ Anī ere, wau ifenēya anī gama neda Isennadaya, Kristus Jesus wō yen anī bunem yaoren, ī laa anī narī felen, agef fen, biya od bunem, mata ado faimud ibodkeleya anī yaor fen.

¹¹ Biya od enei nigin aya soosi tamo, aposel ado ifelnēya tamo igrinan.

¹² Age fiya nigin, aya darau enei alef, anī ere, aya to mama fiyaf, ere nigin, aya aib nigin momoi aun are aya keleī, Odug nē naa anī nigin, ereb aya ī kulatun foug nigin afenen are, ī lo fiya kisi feleya are aya keleī.

¹³ Ereb aya bun tamal karī won, ifelnēya biya anī, Kristus Jesus bun momoiya waū laa fiya ado, el wo dō fen, urou.

¹⁴ Awa Uur Fateul ada namedan ibodok anī nē megeir bunem, ereb ereb biya ifonon anī kulatun wo.

¹⁵ Ō keleī, Asia provins bun ganan ditornan, idi atun Figelus Hermogenes adog.

¹⁶ Odug, Onesiforus nē ibor bun wau yūya ifelnēdiyof nigin aya orouf, ere nigin, ī sain musei wau filolō fiya bunem el fiyadig, aya kokolin difiyan nigin to mama fen.

¹⁷ Ī Rom taun ibodon sain, aya nigin fatuk bagai imirnaf ile, dum fotou fiyan.

¹⁸ Odug nē wau yūya, Odug nē naa anī bun, Odug ī ifenēf nigin aya orouf! Ō keleī bagai, ī naig fe naab musei bun Efesus taun oun isennan.

2

¹ Anī nigin, ō, neu kesu, Kristus Jesus nē wau ifenēya bun megeir uno.

² Musei meleid bun aya wogō au di, karī won anī, karīya biya tamo anidi ufelnēdiyof, ago di, idi bagam tunī ifelnēdiya kisi feleyauf.

³ Kristus Jesus nē kusī tamo biya gen, ō amã geid darau karī taul fen, tafarauf.

⁴ Kusī tamo ī tamo ege neid tobouneid to kababal fef, ī yogon mudur ado anī wau al foug nigin orof.

⁵ Age fiya gen, gudu reya tamo ĩ gudu ref, ĩ gudu reya nē suma to dō foug are, ĩ uyu irouya nē teter to yalouf.

⁶ Kabī tamo kabī total yaledig ĩ, ketem kaū yalouf.

⁷ Aya orok anī kisi wo, Odug enei ganan nigin kisi fokō fonōf.

⁸ Jesus Kristus laa bunem kel fā yen ĩ, Dawid nē ibor bun tamal anī karī walauf. Enei are neu biya od,

⁹ enei nigin aya darau ale fen, mosor tamo gen kokolin difiyan. Anī ere, Negur nē od kokolin fiya sã.

¹⁰ Anī nigin, aya igirnēdin anidi nigin, ereb ereb ganan bun feseya sã afaredig, are idig isennēya Kristus Jesus bun ibodok anī, fula fiya medeīya ibodkeleya ado dalouf nigin age afedig.

¹¹ Od enei momoi bagai:

Ada ĩ weim gare taun ouf are,
adag ĩ weim mata tabodōf.

¹² Ada feseya sã tafarauf are,
adag ĩ weim lo fiya nē mudur
tabodōf.

Ada ĩ nigin wa tafouf are,
ĭg ada nigin wa foug.

¹³ Ada to dō tafoufeg,
ĭ de agef dō foug,
ere nigin, ĩ yogo nigin wa fiya
kisi feleya sã.

Kabī Tamo Negurem Ile Fen, De Yen

¹⁴ Idi ereb ereb enei nigin toku wedereid fokō wouf. Negur mala bun, od luwa irouya nigin wedereid urou, are kaū sã, are karī def anidi tadū difedidig dogol.

¹⁵ Ō Negur mala bun, kabī tamo ile fen, de youf, are kabī tamo ĩ yogon kabī nigin to mama foug, ĩ momoi od tutuk ifelnēdiya nē kabī el fe irouwauf anī, wō wouf nigin, kabī total bagai walouf.

¹⁶ Negur sã ado kaū sã nē od so wiyēf, ere nigin, idi anī bun dilelef are, fau gai momoiya sã bagai wowā douf.

¹⁷ Idi neid ifelnēya kaisã bagai gedi gen iyokalauf, idi atun are Himeneus Filetus ado,

¹⁸ idi momoi nē anī so difiyē diyalelen. Idi dirōdig, mata kel fāya are mogo wō yen, age de fen, tunī neid momoiya daū difef.

¹⁹ Anī ere, Negur nē gariya total ifaref, itotoya enei bun megeir fef, “Aib idi yogon are Odug ĩ keleī,”* ado, “Ganan idi Odug yana kurō difesif, sesen bun tamal falei douf bagai.”

²⁰ Fō odug taka bun, safina ereb ereb gariya fire fire nem dinon are dibodok, tunī gol ado silwa nem, tunī aa nem ado mafer nem dinon, tunī kabī odug ifenēya nē ado tunī kabī nanaal ifenēya nē.

²¹ Tamo taka ĩ, sesen enei bun tamal amuyē anī kulo felef are, ĩ fau kabī biya ifenēya nē wō youf, ĩ fateulouf, Marau mala bun, kabī biya yaleya kisi feleya wō ye fen, kabī biya ganan ifenēya nē wō youf nigin saika foug.

²² Oosi nē bouwa oroya sane so wiyē, ago fen, madur bagai ibodōya, momoiya, wau laa fiya ado, wau inosiya anī, aib idi waud karētut bun Odug diweignek anidi geid, dōg.

²³ Neneya ado wadã keleī nē luwa irouya anī to fedē wo, ere nigin, ō keleī, are anī bunem kiwai wō yedig.

²⁴ Odug nē ferfer to kusī youf bagai, age fiya ban, ĩ tamo kayau ganan nigin imatēya ifelnēdiyof, ifelnēdiya kisi feleyauf, to seye youf bagai.

²⁵ Idi ĩ kiwai difenek anidi molol nem wedereid urouwauf, ago di, Negur idi waud falei fe di, idi momoi nigin keleī youf nigin wau iseya adouf.

²⁶ Anī bunem, idi wedereid fokō ye fen, Satan nē kor bun tamal, in oroya dō difoug nigin Satan gei fedin anidi ditor diyawauf.

3

Idikeleya Naa Bun Tamo Kayau

* 2:19: Namba 16:5

Negur Ditorōf

¹ Anī ere, enei keleī youf. Idikeleya naa bun, morō odug wō youf.

² Tamo kayau dogo nigin waud laa foug, moni nigin waud laa foug, yeneid dalesauf, aya aya yeya, Negur kono difoug, sineid temeid sigoreid wal difoug, disennēdi di to de difiyēdiyof, fateul to dibodōf,

³ wau laa fiya sā, kiwai nigin weder tu keleya sā, taka dumen wogōya, yogo nigin kulatun fiya biya sā, nirāya, tobonunā biya nigin kiwai inoya,

⁴ ne tā kiwai ifenēya, sibuya, kisim aya aya yeya, Negur nigin wau laa fiya ban bouwa nē oroya nigin wau laa fiya,

⁵ bouwedim dogol Negur nē tobonunā dō dife fen, in megeir wa difoug. Idi age fediya so weid.

⁶ Age fediya anidim naab dimirek dile, fō bun dile fen, kayau maleg didegneīd, dogo neid kisi ulum diroukenēdidig, kayau mosor berikā anidi, oroya sane fire fire bun waud dalesedig,

⁷ kayau idi gai toku keleī daledig, anī ere, momoi anī to bagai keleīdig.

⁸ Janes Jambres ado Moses kiwai difenen gen, tamo enidig momoi anī kiwai difenek, tamo anidi kisi gelele fiya ado, momoiya sā nigin itornēdin.

⁹ Anī ere, idi gerō bai to dilauf, ere nigin, tamo uru age difen gen, idi neid kū fenēya tamo kayau ganan meleid bun kaisā yaorouf.

Polem Timoti Ago Dō Woi Fiyen

¹⁰ Anī ere, neu ifelnēya, neu tobonunā, neu kisi gariya, neu momoiya, sain meluk total ifareya, wau laa fiya, feseya sā ifareya,

¹¹ kafī fiya, darau, naig be fiya Antiok, Ikonium ado, Listra taun bun darau morō aya alen anī ganān ō keleī. Anī ere, Odug anī ganān bun tamal yalelnan.

¹² Momoi, tamo kayau ganān, idi Kristus Jesus bun Negur nē tobonunā dō difoug nigin orodiyof are, idi morō dalouf.

¹³ Agef mog, tamo sesen ado idegēya tamo, sane bunem sane bagai lauf, tunī didegneīd mog, abag didegnēdiyof.

¹⁴ Anī ere, ogo nigin, ereb ō keleī wale fen, momoi won anī toko tokō wo ule, ere nigin, idi difelnon are ō idi nigin keleī.

¹⁵ Agef fen, ō simō bunem Negur nē Itotoya fateul kelein, are ō isennō di, kisi biya wale fen, Kristus Jesus nigin momoiya bunem, kel yaleyōya kisi feleyauf.

¹⁶ Negur nē Itotoya ganān are Negur awa uur neseya bunem, are ifelnēya, sakāya, madur fiya ado, madur ibodōya tai fiya nigin biya.

¹⁷ Age fe di, Negur nē tamo, kabī biya ganān yaleya nigin kisi feleya bagai youf.

4

¹ Negur ado, Kristus Jesus ī isi fen, in tano inouf sain bun, ī mata dibodok ado gare den anidi es fediyof anī, idi meleid bun, aya od enei total bagai arokonok.

² Biya od wogō wo; biya od wogōya nigin, sain biya bun ado sain sane bun dodok wo, sain meluk feseya sā ifareya ado faded fiya bunem, madur wo, total od urokeneīd, waud walesauf.

³ Sain fau isiyof bun, tamo biya od nigin to wedereid dinouf. Age fiya ban, idi dogo neid oroya dō dife fen, wederedim karīya nigin gegeī fedidig anī karī douf nigin, idegēya ifelnēdiya tamo musei gou difediyof.

⁴ Idi fau momoi anī ditor ken, wedereid fitok du ken, nenerī ege anī karī douf.

⁵ Anī ere, ō ereb ereb ganān bun kisi fokō wol fen, morō faali wo, soosi kabī wale, ogon kabī ganān walel anī kisi falauf.

⁶ Aya mogo wain sesewi fiya gen fi afalau fenē, agef fen, neu ileyā sain mogo isil.

⁷ Aya biya kusī aun, aya gudu reya mogo bure afelen, aya momoiya kafī afelen.

⁸ Gama aya nigin, madur bagai nē teter dodok fe ibodok, are Odug, Es Fiya Tamo madur bagai, fau naa anī bun ifanau fenē, anī ere, aya dogol sā, idi in isiya tari difef anidig ifenēdiyof.

Pol Timoti Ī Gein Kaisā Isiyof Nigin Irokenen

⁹ Aya gein kaisā bagai usiyof nigin kabī total wale.

¹⁰ Ere nigin, Demas ĩ tenebur enei nē nigin wau laa fen nigin, itorna fen, Tesalonika taun ilen. Kresen ĩ Galesia provins ilen, age fe di, Taitus ĩ Dalmesia distrik ilen.

¹¹ Luk dogol aya ado mabodok. Mak wale fen, urom usig, ere nigin, ĩ neu kabī nigin isennaya kisi feleya.

¹² Aya Tikikus Efesus taun sur afen.

¹³ Ō usiyof sain bun, neu saket meluk Karpus nē fō bun Troas taun oun atoron anī wale urou usiyof, neu buk kori fediya anīg urou usiyof, anī atun neu buk kori fediya meme gabar bun itotoya nē anī to bagai utorōf.

¹⁴ Aleksanda ain kabī tamo ĩ, aya gai kiwai total bagai ifanan. Odug fau ĩ ereb age fen anī nigin mala solo sane ifenēf.

¹⁵ Ōg ĩ nigin lo welei, ere nigin, ĩ neda od nigin total bagai kiwai inon.

¹⁶ Aya uruwa kot bun afaren sain, takam to isennan, anī ere, ganan ditornan. Anī nē mala solo to ifenēdiyof nigin aya orouf.

¹⁷ Anī ere, Odug aya sirun ifar fen, megeir ifanan. Age fe di, aya bunem biya od kisi feleya bagai wogō au di, haiden ganan karī douf nigin age fen. Agef fen, aya laion awa bun tamal yalelnan.

¹⁸ Odug fau kiwai sane ganau bun tamal yalelna fen, karika bagai in

saa tanon irou iseleyauf. Ī bun fula fiya medeīya gai gai ibodkalauf. Momi.

Idikeleya Nē Aanya

¹⁹ Prisila, Akwila ado, Onesiforus nē ibor tar geid, aanya enei wenēdiyof.

²⁰ Erastus Korin taun ibodon, agef mog, aya Trofimus dagi mog, Miletus taun oun atornen.

²¹ Yau sain fau mog, ein kaisā usiyof nigin kabī total wale. Yubulus, Pudens, Linus, Klodia ado momoiya turā tar ganau aanya sur difonok.

²² Odug ogon uur ado ibodōf. Wau ifenēya ā bun ibodōf.

Taitus

¹ Aya Pol, Negur nē ferfer, Jesus Kristus nē aposel, Negur igirnēdin neid momoiya nigin ado, momoi nē keleī uyu irou di, idi fateul bagai dibodōf nigin, igirnan,

² momoiya ado keleī anī, mata faimud ibodkeleya nē wau iseya bun ibodok, mata faimud ibodkeleya anī nigin Negur ī to idegēdig, fau sain gariya inoya sā mog, wau kuturol fen, promis od iron.

³ Agef fen, yogon sain bun bagai, Negur neda Isennadaya ī irō di, aya biya od wogōya kabī ifanan anī bunem wogō au di, in od yaoren,

⁴ Taitus, neu kesu bagai, ada momoiya tekelei ado ō bun pas enei atotof:

Negur Tamada ado Kristus Jesus neda Isennadaya neid wau ifenēya ado wau inosiya ō bun ibodōf.

Taitus Nē Kabī Oun Krit Nuyo

⁵ Aya Krit nuyo an atornon anī nē gariya are, ereb bure felediya san anī madur woid fen, taun ganan bun uyu irouya, aya ō orokonon gen ugrnēdiyof nigin.

⁶ Uyu irouya are ī bouwa od sā, kayau tekelei aiwa, tamo ī ne gere tar momoiya ado, tetēya, idodōya sā.

⁷ Sios lo fiya tamo ī, Negur nē kabī ifenēya nigin, ī bouwa od sā, to aya dogol yedig, kaisā to name isedig, aai fatuk to yōdig, to kusī yedig, idegēya bunem safina to yaledig.

⁸ Agef mā, ī tamo yaledig, ereb biya nigin wau laa fedig, ī kisi biya ado ibodōdig, madur, fateul, ī yogo nigin biya kulatun fedig.

⁹ Ī momoiya od difelnen anī irou kafī falauf, anī bunem, ī sā tunī keleī biya bunem waud yalesauf, agef fen, ī idi keleī biya od nigin kiwai dinon anidi faded fiyēdiyof bagai.

¹⁰ Ere nigin, an idodōya tamo, od kaū sā, idegēya temeleid musei difaref, idi atun mulū bun temeleid anidim age difedig bagai.

¹¹ Idi sigoreid ufofāf, ere nigin, idi idegēya bunem safina yaleya nigin to ifelnēya nē anī difelneid fen, fō fō adok daū difedif.

¹² Idi neid fonō profet taka eig ye iron, “Krit tamo kayau idi faimud idegēya temeleid, gaar kuī sane gen, fō temeleid saaf weweneid.”

¹³ Od enei are momoi. Anī nigin, totol od urokeneid, ou wiyēdiyof, ago di, anī idi neid momoiya biyauf,

¹⁴ anī bunem, idi Juda neid nenerī kaū sā to karī douf, age de fen, idi momoi nē anī ditoron anidi neid od to dō difouf.

¹⁵ Karē bun temeleid bun, ereb ereb ganan karē, anī ere, idi amuyē kisi ado momoiya sā anidi bun, karē taka sā. Momoi, idi neid waud ado kisi es fiya sane len.

¹⁶ Idi Negur keleī dedig, anī ere, nedi tobonuneid bun, idi Negur nigin wa difedig. Idi sane bagai, idodōya temeleid, idi ereb biya age fiya nigin kisi feleya sā.

2

Ereb Mala Fire Fire Ifelnēdiyof

¹ Ō ereb biya od wogō yef anī kilei ufelnēdiyof.

² Tamo biyeid dogo nigin biya kulatun difouf nigin, idi anī karī difiyēdiyof nigin, idi kisi biya ado dibodōf nigin ado, momoiya, waud laa fiya ado, feseya sā ifareya bun madur dibodōf nigin ufelnēdiyof bagai.

³ Age fiya bagai, kayau biyeideg karī del dibodōf nigin, taka dumen od to dirōf nigin, wain fatuk bagai to dāf nigin, agef fen, ereb biya anī difelnēdiyof nigin ufelneid.

⁴ Ago di, idi, kayau momoul, nedi aiweid tar adodo kesu tar nigin waud laa fouf nigin, tai difediyof,

⁵ idi dogo nigin, sā biya kulatun difouf nigin ado bouweid od sā dibodōf nigin, fō bun kabī dalouf nigin,

tobonunā biya age difouf nigin ado, aiweid tar nigin karī difediyouf, age dife di, taka nem Negur nē od to kobu fouf nigin, kayau momoul tai difediyouf.

⁶ Age fiya gen bagai, kesu gaũ, dogo nigin biya kulatun difouf nigin wedereid urou.

⁷ Ereb erab ganan bun, idi dile fen, dō difouf nigin erab erab biya ago. Ogon ifelnēya bun, õ tutuk ifareya, wau adok ifelnēdiya bun ifenēya,

⁸ wogō biya tamo to kiwai difenēf nē anī ufelnēdiyouf, ago di, idi kiwai difonok anī mama fediyouf, ere nigin, idi ada nigin erab sane taka wogōya nigin are sã.

⁹ Ferfer, erab erab ganan bun, nedi moroid tar karī difediyouf, waud al fiya difenēdiyouf, aiteid to solo difouf,

¹⁰ idi bun tamal bē to dalouf, idi nedi moroid tar nē od dō fiya biya bagai anī difelnēdiyouf nigin ufelnēdiyouf, age dife di, naab ganan bun, idi age difef bunem, Negur neda Isennadaya nigin ifelnēya anī, tamo meleid bun biya ile di, tamo neid oroya anī bun dinouf.

¹¹ Negur nē wau ifenēya, isennēya irou isidig anī, tamo ganan bun isin.

¹² Anim, Negur nē tobonunā dō fiya sã ado tenebur nē oroya sane bun, “Bai” yeya nigin ifelnadadig, agef fen, ada dug nigin biya kulatun ibodōya, madur ibodōya ado, Negur nē oroya bun, gama sain enei bun ibodōya nigin, ifelnadadig,

¹³ agef mã, ada el fiya nē wauda iseya, are neda Negur odug ado Isennadaya, Jesus Kristus ï, fula fiya medeïya ado isiyouf anī tarï tafouf,

¹⁴ Jesus Kristus ï yogo luwa ada nigin itoron, are ï sesen ganan bun tamal yalelnada fen, ï yogo nigin yogon tamo kayau bagai kulo fele di, idi erab biya age difouf nigin kabï totol dalouf nigin, ï age fen.

¹⁵ Ereb erab enei õ ufelnēdiyouf. Ogon totol ganan bunem, idi neid waud wales fen, wedereid urou. To loloum weid len, õ lai diyōf.

3

Ereb Biya Anī Dōf Age Fouf

¹ Tamo kayau wedereid fokō wo, are idi lo fiya ado yeneid adodo tamo karī difediyouf, to didodōf, idi biya age difouf nigin ololo difouf,

² taka to bouwa bun od dūf, wau inosiya ado waud difenēdiyouf, tamo ganan bun dimatkesiyouf nigin ago.

³ Adag kulu kisi neneya adon, tadodon, didegnadan, tenebur nē oroya fire fire ado bouwa nē oroya fire fire nē ferfer tabodon. Ada tobonunā sesen ado kiyeï bun tabodon, to dileda orodin, adag taileid to orodan.

⁴ Anī ere, Negur neda Isennadaya nē tobonunā biya ado wau laa fiya wō ye fen,

⁵ ï isennadan, are ada erab madur age tafen anī bunem sã, are yogon wau yūya bunem. ï mata wōya nē naan kulo fiya bunem ado, Awa Uur Fateulem mata falei fiya bunem isennadan.

⁶ Negur ï, Jesus Kristus neda Isennadaya bunem, Awa Uur Fateul, ada bun kisi feleya bagai foula fen,

⁷ are yogon wau ifenēya bunem madur fadan, anī bunem, ada mata faimud ibodkeleya nē wauda iseya ado fen, in akor anī talouf nigin age fen.

⁸ Od enei momoi bagai, anī nigin, aya, õ enei totol wogō wo di, Negur nigin momoi def anidi karī del fen, erab biya anī el de age difouf anī orouf. Enei ganan are biya bagai, tamo ganan nigin deuf.

⁹ Anī ere, neneya kisi abob fe fiyēya anī, ibor dir fiya, monēya ado, lo nigin luwa irouya anī sese wiyeïd, ere nigin, anidi are kaũ sã, kabï ifenēya kisi feleya sã.

¹⁰ Taka ï, ã atun fara fef, uruwa bun weder urouwauf, ago fen, babaneg weder urouwauf. Anī bure fele di, ï utornēf.

¹¹ Õ keleï youf, tamo age fiya are wau gogil fen, mosor bun ilen, ï yogo bouwa sanen inon.

Idikeleya Nē Od

¹² Sain aya ò gein Artemas be Tikikus sur afiyē di, ò Nikopolis an, aya gein kaisā isiya nigin, total bagai naab umirēf, ere nigin, yau sain bun aya an abodōf nigin kisi anon.

¹³ Lo keleĩ tamo Senas ado Apolos, idi neid naab dilauf nigin, ereb ereb ganan usennēdiyof, ago di, idi ereb lau fiya sã dilauf.

¹⁴ Neda tamo kayau idig, ereb ereb biya age fiya nigin, idi de keleĩ anĩ dalouf bagai, are idi naa ganan nē safina dale fen, kaũ sã to dibodōf nigin age difouf.

¹⁵ Ganan aya geid mabodok anidim, ò bun aanya sur mafef. Momiya bun amã nigin waud laa fef anidi aan wiyeĩd.

Wau ifenēya ã ganan bun ibodōf.

Filemon

Pol Nē Aanya

¹ Aya, Pol, Kristus Jesus nē kalabus tamo, neda turada Timoti ado, oboida ado kabī turada Filemon gein,

² mainada Afia, kusī tamo turada Akipus ado, sios ogon fō bun guru difedig gein pas enei matotof.

³ Wau ifenēya ado wau inosiya, Negur neda Tamada ado Odug Jesus Kristus bunem ō bun ibodōf.

De Fiyēya Ado Kosēya

⁴ Aya, neu kosē bun, ō nigin karī aul fen, neu Negur faimud de afiyēdig,

⁵ ere nigin, aya, ogon momoiya Odug Jesus bun ilen anī karī au fen, Negur nē tamo kayau ganan nigin ogon waū laa fiya anī karī audig.

⁶ Aya, ō amā geid ogon momoiya nē uyu kū fiya anī kabī yale di, ereb ereb biya ganan, Kristus bun ada talem anī, ō kisi feleya bagai keleī youf nigin kosē auf.

⁷ Ogon waū laa fiya anim, wau al fiya odug ifana fen, neu wau yalesen, ere nigin, turau ō, Negur nē tamo kayau neid waud filolō fiya wenēdin.

Pol Onesimus Nigin To Fen

⁸ Anī nigin, Kristus bunem aya sā megeir afar fen, ō arokonō di, ereb ō agouf nigin kisi feleya,

⁹ anī ere, aya wau laa fiya bun afar fen, totol bagai to ayok. Aya, Pol, tamo tubau fen, gama Kristus Jesus nē kalabus tamo,

¹⁰ aya neu kesu Onesimus nigin totol bagai to ayok, ī kokolin afar mog, neu kesu wō yen.

¹¹ Kulu ī ō nigin to biyan, anī ere, gama ī ada uruwom nigin biya bagai.

¹² Aya, ī, ō gein kel sur afef, ī aya neu oboiyou.

¹³ Aya ī uruwom mabodom are, sain aya biya od nigin kokolin afar mog, ī ogon modoū yale fen, isen-nam.

¹⁴ Anī ere, aya ō waū to irō mog, aya ereb taka naig be fiya age afouf nigin to oroun, are ō nugo yōya bunem sā, ogon oroya dō wo agouf nigin age afen.

¹⁵ Momoi, ī ō uruwom sain naal bagai fara gen nē gariya are, ō ī baban gai gai kel walouf nigin be,

¹⁶ ī baban ferfer gen sā, anī ere, ferfer wal fiya, turā bagai. Ī aya bun neu oboiyou, anī ere, ī ō bun ogon oboi bagai neu wal fiya, are tamo nē lo fiya bun ado Odug nē lo fiya bun age fiyauf.

¹⁷ Anī nigin, ō, aya ogon kabī turā gen ago kisi wouf are, aya aan wiyaf gen, īg ago aan wiyēf.

¹⁸ Ī ō bun ereb sane taka age fen be, ereb wareg taka adouf, wareg are aya bun uno.

¹⁹ Aya, Pol, imaum bagai enei atotof. Aya fau aba afonōf, aya, ō aya bun ogon mata nigin wareg ado anī nigin ō to arokonok.

²⁰ Turau, aya fau ō bun tamal, ereb biya Odug bun alouf nigin orouf, Kristus bun, aya wau filolō fiya wana.

²¹ Ogon dō fiya anī momoi auf nigin, aya atotkonok, aya to ayok anī wal fiya agouf anī aya keleī.

²² Agef fen takag yeir. Aab taka, aya nigin dodok wana, ere nigin, āgenei kosēya bunem, aya baban ā bun kelau asi, an abodōf nigin, aya wau isef.

²³ Epafra, Kristus Jesus bun neu kalabus turau, ō bun aanya sur fef.

²⁴ Mak, Aristakus, Demas ado, Luk, neu kabī turau tar idig age difef.

²⁵ Odug Jesus Kristus nē wau ifenēya āgenei uur bun ibodōf.

Hibru

Negur Naal Engel Wal Fedif

¹ Kulu Negur, profet bunem, sain musei ado naab fire fire bun, tubuda tar wogō fiyēdin,

² anī ere, gama idikeleya naa enidi bun, ī Naal bunem wogō fadan, Naal ī ereb ereb ganān akorouf nigin Negurem igirnen, ī bunem saa teneub ado inon.

³ Naal ī Negur nē fula fiya medeīya nē so fiya, ī Negur yogo gen bagai, in od total ado bunem ereb ereb ganān megeir irou ifaref. Ī mosor lilik fiya anī age fel fen, saa ilun Negur Megeir Bagai ima biyalē ibodon.

⁴ Negur, Naal yana ifenen are engel yeneid wal fiya, age fiya bagai, Naal ī engel wal fediya.

⁵ Ere nigin, Negur ī yogon engel taka to eig ye irokenen,

“Ō neu Kesu,
gama aya ō Tamā wō aul.”*

Takag, Negur ī engel taka nigin to eig ye iron,

“Aya yogon Tama abodōf,
ī neu Kesu ibodōf.”†

⁶ Takag, Negur ī yogon kesu matu tenebur ein irou isif sain bun, ī ba-ban irok,

“Negur nē engel ganān ī seli dalouf.”‡

⁷ Negur ī engel nigin irok,

“Ī yogon engel yau gen wowā douf nigin inodif,

ī yogon kabī tamo yā bale gen wowā douf nigin inodif.”§

⁸ Anī ere, Negur ī Naal nigin irok,

“O Negur, ogon tano gai gai ibod-kalauf,

ō ogon tano tobonunā madur bagai bun lo wouf.

⁹ Ō tobonunā madur bagai nigin waū laaf fen, tobonunā sane anī sese wedig,

anī nigin, Negur, ogon Negur kulīya nē moul ō bun fi felen, anī bunem, nē tā tar wal feid fen, ilun inenon.”*

¹⁰ Takag, ī irok,

“O Odug, gariya bun ō teneub nē gariya kare won,

ō imam saa unon.

¹¹ Idi fau inanakalauf, anī ere, ō fau ubodōf,

idi ganān kolos gen sanef ilauf.

¹² Ō idi saket gen kori wediyouf, idi kolos gen falei wediyouf.

Anī ere, ō ubodok gen ago ubodōf, ogon sain to idikalauf.”†

¹³ Negur ī yogon engel taka to eig ye irokenen,

“Imau biyalē ubod mog,

ogon kiwai tar

ō yē inoya nē sawa anouf.”‡

¹⁴ Age fiyauf are, engel idi ere? Idi uur Negur nē kabī daledig, tamo kayau isennēya dalouf anidi disennēdiyof nigin Negurem idi sur fedidig.

2

Karī Yeleya Nigin Weder Irouya

¹ Anī nigin, ada karī taun anī fatuk bagai lo tafalauf, anī bunem, ada to kū tafenēf.

² Negur nē od tubuda tar bun engel bunem wogō difiyēdin are total ado ibodon, anī nigin, idi od anī didod ken, to dō difen anidi are, anī kilei mala solo darau dalen.

³ Anī nigin, ada isennēya odug anī to karī tafiyēf are, naig ta tayalalauf? Uruwa bun Odug ī isennēya enei nigin wogō yen, age fe di, idi ī karī difiyen anidim, isennēya are momoi anī, ada bun yaor difen.

⁴ Uris, ereb urug bagai, memelik fire fire bunem ado, Negur yogon oroya bunem Awa Uur Fateul ege luwa gadō fedin anim, Negur īg isennēya od anī megeir fen.

Jesus Ī Kel Yaledaya Nē Uyu Irouya

* **1:5:** Sam 2:7 † **1:5:** 2 Samuel 7:14, 1 Stori 17:13 ‡ **1:6:** Diuteronomi 32:43 § **1:7:** Sam 104:4 * **1:9:** Sam 45:6, 7 † **1:12:** Sam 102:25-27 ‡ **1:13:** Sam 110:1

⁵ Negur ĩ, engel, teneub mata isiyouf tau fen, wogõ taudig anĩ nẽ lo fiya tamo, to inenẽdin.

⁶ Anĩ ere, Negur nẽ Itotoya bun taka nem mogo eig ye iron:

“Tamo ĩ ere anĩ, õ ĩ nigin kisi wof?

Tamo naal ĩ ere anĩ, õ ĩ nigin karĩ weledig?

⁷ Õ ĩ sain naal engel farumedin unenen,

õ ĩ fula fiya medeĩya yana ado anĩ nẽ teter kurũ wiye ken,

⁸ ye farumen ereb ereb ganan gõ welen.”*

Negur ĩ farumen ereb ereb ganan gõ felen, are ereb taka ĩ farumen sã anĩ taka to ibodok. Anĩ ere, gama ada ereb ereb ganan ĩ farumen ifaref anĩ to tailef.

⁹ Anĩ ere, Jesus Negurem ĩ sain naal engel farumedin inene ken, ĩ darau yale laa fen nigin, gama ĩ fula fiya medeĩya yana ado anĩ nẽ teter kurũ fiyen anĩ ada tailef, are Negur nẽ wau ifenẽya bunem, ĩ tamo kayau ganan nigin laa ilen.

¹⁰ Negur ereb ereb ganan, yogo nigin ado yogo bunem inon, ĩ kesu tar musei fula fiya medeĩya bun irou isiyouf nigin, tamo kel gei fiya nẽ marau Jesus, darau bunem kisi feleya bagai wõ youf nigin agef inenen, are tutuk.

¹¹ Yogo tamo kayau fateul ifenẽdif ado, fateuledif anidi geid, ibor tekeleif. Anĩ nigin, Jesus idi turau tar fiyẽdiya nigin to mama fef.

¹² ĩ irok,

“Aya õ yanã neu turau tar bun kurõ afalaisiyouf,

tamo kayau guru difef meleid bun, aya õ selĩ abiyouf nigin seg alouf.”†

¹³ ĩ baban irok,

“Aya ĩ bun neu momoia anouf.”‡

Takag, ĩ baban irok,

“Aya yeir, Negur ĩ gere tar ifanan geid.”§

¹⁴ Gere tar idi bouweid ado naudeid ado nigin, ĩg bouwa ado

naud ado idi gen wõ yen, are ĩ yogon laa bunem, Satan ĩ laa nẽ megeir irouf anĩ daũ falauf nigin ado,

¹⁵ idi laa nigin kumĩ de fen, sain ganan anĩ nẽ ferfer dibodok disin anidi kafĩ fiya bun tamal yalelnẽdiyof nigin age fen.

¹⁶ Are momoi bagai, Jesus ĩ engel to isennẽdif, anĩ ere, ĩ Abraham nẽ ibor nẽ tubu tar isennẽdif.

¹⁷ Anĩ nigin, Negur ĩ, Jesus naab ganan bun yogon tura tar gen inenen, are Jesus ĩ pris mudur wau yũya, dõ fiya biya ado wõ ye fen, Negur aruna yalouf nigin ado, ĩ Negur nẽ didi yof fen, tamo kayau neid mosor yalelkenẽdiya kabĩ yalouf nigin age fen.

¹⁸ Jesus yogo bun kisi fiya wõ yen sain bun, ĩ morõ yalen, anĩ nigin, ĩ idi kisi fiya bun difaref anidi isennẽdiya kisi feleya.

3

Jesus ĩ Moses Wal Fiya

¹ Anĩ nigin, fateul turau tar, ãg Negurem iweignein, Jesus ĩ yogo aposel ado pris mudur, are ada ĩ nigin momoi tauf taudig, ĩ bun kisi fatuk tanouf.

² Moses ĩ Negur nẽ fõ ganan bun, Negur nẽ od el fe dõ fedig, age fiya bagai, Jesus ĩ, Negur ĩ igirnen anĩ ait el fe dõ fedig.

³ Fõ inoya tamo yogo yana odug yaledig, fõ anĩ wal fiya. Age fiya bagai, Jesus ĩ yana odug bagai, Moses wal fiya.

⁴ Fõ ganan fõ inoya tamo ado, anĩ ere, Negur ĩ yogo ereb ereb ganan inoya marau.

⁵ Moses ĩ, Negur nẽ fõ ganan bun kabĩ tamo ibod ken, Negur nẽ od el fe dõ fedig, agef fen, ĩ Negur dumen bun ereb wogõ youf anĩ kurõ fesin.

⁶ Anĩ ere, Kristus ĩ Negur Naal, ĩ Negur ait el fe dõf fen, Negur nẽ fõ lo fedig. Anĩ nigin, ada toku total tano fen, wauda isef anĩ nigin yanada

* 2:8: Sam 8:4-6 † 2:12: Sam 22:22 ‡ 2:13: Asaia 8:17 § 2:13: Asaia 8:18

talesef anī tarou tokō tafalauf are, ada yogon fō.

Momoiya Sā Nigin Weder Irouya

⁷ Anī nigin, Awa Uur Fateul eig ye irok kilei ago gouf:

“Gama ā, Negur nē ait karī gouf are,

⁸ ā oun gerere tuan Negur kisi wiyēg fen,

kiwai wenēgen age fiya gen,

ā wauī to agef totolouf.

⁹ An temeī tar aya kisi difiya fen, kiwai difanan,

are idi yar foti bun ereb age afen are dilen.

¹⁰ Anī nigin, aya ibor anidi nigin seye ise fen,

oron, ‘Idi neid waud faimud itorna fen, fire iledig,

age de fen, idi neu naab to keleīdig.’

¹¹ Anī nigin, aya seye ise fen, wau kuturol fen, oron,

‘Idi neu si inoya bun to bagai dilauf.’ ”*

¹² Turau tar, ā takam, wau sane ado momoiya sā anim, mata ibodōya Negur dudum fiyēf anī to ago gouf nigin lo welegei.

¹³ Anī ere, od ‘Gama’ yeya Negur nē Itotoya bun yenek anī, ada bun fau agef yenēf are, naa ganan bun abob wau talesagauf, anī bunem, ā taka mosorem idegnē di, wau to totolouf.

¹⁴ Uruwa bun ada kisi total adon anī, kafī tafel tarou, idikeleya bun talauf are, ada Kristus nē ereb ereb ganan weim talef.

¹⁵ Negur nē Itotoya eig ye irok kilei, “Gama ā Negur nē ait karī gouf are,

āgenei tubuī tar Negur kiwai difenen age fiya gen,

ā wauī to agef totolouf.”†

¹⁶ Are aiyaim karī de fen, kiwai dinon? Idi ganan Mosesem Isip tamal guri feid dilen anidim sā de?

¹⁷ Negur aiyai nigin yar foti wau sanen? Idi mosor dino fen, gerere tuan gare den anidi nigin sā de?

¹⁸ Negur aiyai nigin wau kuturol fen, idi yogon si inoya bun to bagai dilauf yen? Idi yogon od to dō difen anidi nigin sā de?

¹⁹ Anī nigin, ada tailef, are idi to momoi den nigin, namen ileya kisi feleya san.

4

Negur Nē Tamo Kayau Neid Sabat Si Inoya

¹ Anī nigin, Negur nē si inoya bun ileya nigin, Negur nē promis od anī fau yenek nigin, ā takam si inoya bun ileya nigin ā to biya ya anī, Negurem to ilouf nigin lo tafalauf.

² Ere nigin, idi karī den gen, adag biya od karī taun. Idi od karī den, anī ere, idi bun faat yūya sā, ere nigin, idi od karī den sain, idi momoiya ado od anī to dalen.

³ Gama ada mogo momoi taun, are si inoya anī bun telef. Are idi to momoi den nigin Negur eig ye iron kilei,

“Aya seye ise fen, wau kuturol fen, oron,

‘Idi neu si inoya bun to bagai dilauf.’ ”*

Negur nē kabī teneub kare fiya sain bun mogo bure felen, anī ere, ī od agef iron.

⁴ Negur nē Itotoya bun, Negur naa sewen nigin eig ye wogō yen, “Naa sewen bun, Negur ī yogon kabī ganan bun si inon.”†

⁵ Baban Negur nē Itotoya enei bun, ī eig ye irok, “Idi neu si inoya bun to bagai dilauf.”

⁶ Anī nigin, tunī si inoya anī bun sā dilauf nigin fau ibodok, anī ere, idi uyulil biya od karī den anidi, si inoya anī bun to dilen, ere nigin, idi od anī to dō difen.

⁷ Anī nigin, sain meluk ilele di, Negur baban naa taka igir ken, are “Gama” yen anī, Negur ī Dawid sigor bunem wogō yen, are mogo iron gen: “Gama ā, Negur nē ait karī gouf are, ā wauī to totolouf.”‡

* 3:11: Sam 95:7-11 † 3:15: Sam 95:7, 8 * 4:3: Sam 95:11 † 4:4: Jenesis 2:2 ‡ 4:7: Sam 95:7, 8

⁸ Josua ĩ si inoya anĭ to ifenēdin, ĩ si inoya anĭ ifenēdim are, Negur anĭ dumen naa taka nigin to wogō yem.

⁹ Anĭ nigin, Negur nē tamo kayau neid Sabat[§] si inoya fau ibodok.

¹⁰ Ere nigin, Negur ĩ yogon kabĭ bun si inon kilei, taka ĩ Negur nē si inoya bun ilef, ĩg yogon kabĭ bun si inof.

¹¹ Are, taka nem, od to dō difen anidi to dō feid fen, kubū youf nigin, si inoya anĭ bun ileyā nigin kabĭ total bagai talouf.

¹² Negur nē od mata ibod ken, kabĭ total yalef, are dimig waila si sitakā wal fiya. Are malakanon uur ado, tuwa katō fiya, tuwa nē seselina ado atun borū fel si sitakādig. Are wau bun kisi ado oroya es fedig.

¹³ Ereb erēb ganān inodin are Negur mala bun taka to iminek. Ereb erēb ganān ĩ mala bun lelek feleya ado yaor. ĩ bun ada erēb age tafēn anĭ faded tafiyēf.

Jesus Pris Mudur Odug

¹⁴ Anĭ nigin, pris mudur odug saa ilun Negur gein iselen, are Jesus Negur Naal, ada ĩ ado nigin, ada momoiya kurō tafesif anĭ tarou kafĭ tafalauf.

¹⁵ Are, neda pris mudur ĩ, neda felu yabiya keleĭ bagai nigin, wau yūya yaleya kisi feleya, ĩ ada gen mogo naab ganān bun kisi fiya yalen, anĭ ere, ĩ mosor sã.

¹⁶ Anĭ nigin, ada megeir tano fen, Negur nē sia wagen talauf, an wau ifenēya ibodok, anĭ bunem, ada neda lau fiya sain bun, ada isennadauf nigin wau yūya tale fen, wau ifenēya fotou tafouf.

5

¹ Pris mudur idi ganān tamo atun yale fen, tamo kayau nigin Negur aruna dale, mosor nigin ofa ado sesewi fiya difenēf nigin igirnēdin.

² ĩg yogo felu yabidig nigin, idi to keleĭ ken, kū difenek anidi, molol nem isennēdiya kisi feleya.

³ Age fiya nigin, ĩ tamo kayau neid mosor nigin ado, yogon mosor nig-ineg sesewi fedig.

⁴ Taka nem, pris mudur, yana odug anĭ, ĩ yogo bouwa bun to inodig, anĭ ere, ĩ Aron gen, Negurem dogol igirnēdig.

⁵ Age fiya gen, Kristus ĩg pris mudur ibodōf nē fula fiya medeĭya yogo bouwa bun to inon. Anĭ ere, Negur ĩ irokenen,

“Ō neu Kesu,

gama aya ō Tamā wō aul.”*

⁶ ĩ taka bun eig ye irok,

“Ō faimud ubodkalauf nē pris, Melkisedek nē gĭ bun.”†

⁷ Jesus ĩ tenebur mata ibodon sain bun, ĩ inā odug marum fe fen, Negur ĩ laa bun tamal isennēya nigin kisi feleya, ĩ bun kosē ye fen, igonen. Jesus ĩ imatkeis fen, Negur farumen ibodon nigin, Negur ĩ karĭ fiyen.

⁸ Jesus ĩ Negur Naal, anĭ ere, ĩ darau yalen anĭ bunem, dō fiya nigin keleĭ yale fen,

⁹ kisi feleya bagai wō yen. Agef fen, ĩ ait dō difef ganān neid mata ibodkeleya kel gei fiya nē gariya wō ye di,

¹⁰ Negur ĩ Jesus Melkisedek nē gĭ bun pris mudur inenen.

Momoiya Folō Feleya Nigin Weder Irouya

¹¹ Amā enei nigin wogōya musei ado, anĭ ere, amā faded yeĭya nigin total, ere nigin, ā keleĭya nigin forō gef.

¹² Ā tise wōya nigin sain meluk adon, anĭ ere, ā fau taka nem Negur nē od tamo mata urug ifelnēdidig age fiya baban ifelneĭf nigin ubodōgef. Ā fau su yōya nigin yenek, saaf total yōya nigin kisi feleya sã.

¹³ Taka ĩ su yoko are ĩ fau momou, anĭ nigin, ĩ madur bagai nē ifelnēya keleĭ sã.

¹⁴ Anĭ ere, saaf total are biyeid neid, idi tai fiya bun, kisi def dile fen, enei biya, enei saneya keleĭdig.

§ 4:9: Sabat naa anĭ, Juda neid uub nē naa. *

5:5: Sam 2:7 † 5:6: Sam 110:4

6

¹ Anī nigin, ada, ifelnēya gariya bunem Kristus nigin kelein dañ are tator ken, keleī tōya bagai bun talauf. Ada keleī eig fediya nigin baban to gariya tanouf, are laa ileyā nē suma bun tamal faleiya, Negur nigin momoia,

² naan igūdiya, ima teten inoya, laa bun tamal kel fāya ado, faimud ibodkeleya nē es fiya.

³ Negur wau irōf are, ada keleī mugier bagai talauf.

⁴ Idi Negur nē fula fiya mogo dalen, idi saa ilun nē ege luwa mogo kobū de dilen, idi Awa Uur Fateul dalen,

⁵ idi Negur nē od are biya bagai ado, sain fau isiyouf anī nē megeir mogo kelein,

⁶ age difen anidi momoia folō difalauf are, idi baban waud faleiya nigin guri feid isiya kisi feleya sā, ere nigin, idi dogo baban Negur Naal aa tetek bun du ken, mal atun mama difenek.

⁷ Teneub anī bun sain musei uyē isi lūf fen, kabī moroid saaf ifenēdidig, teneub are Negur el fiya ifenēdig.

⁸ Anī ere, teneub bun malū duri ado lili isedif, are teneub to biya, gelu fiya melsā ibodok. Idikeleya bun yā malan isaikalauf.

⁹ Oboimā tar, amā eig ma wogō mauf, anī ere, amā ā bun age fiya to wō ye fen, biya fiya ā bun isiyouf nigin momoi mauf, biya fiya are kel gei fiya ado isiyouf.

¹⁰ Negur ī madur, ī, āgenei kabī ado wauī laa fiya, are ā Negur nē tamo kayau usennēdigef usigef bunem Negur ufelnēgef anī, weder to tu kalauf.

¹¹ Amā, ā mugu mugu kabī total eig fiya bagai walegef uleg, idikeleya bun ulagauf anī oromak, ago ge di, āgenei wauī iseya anī agef kisi falauf.

¹² Amā, ā fō yeif anī to oromak, anī ere, ā, idi momoi de, to fese de fen, ereb Negur ī afeneif yen anī dalef anidi, madē wedig ago gouf anī oromak.

Negur Age Afouf Yen Anī Momoi Bagai Agef Wō Youf

¹³ Negur ī Abraham age afouf fiyen sain bun, taka Negur yogo wal fiya, ī yana bunem Negur wau kuturoleya od wogōya nigin taka to ibodon, anī nigin, ī yogo wau kuturol fen,

¹⁴ iron, “Aya momoi bagai el fiya afon ken, momoi bagai gerē tar musei afonōf.”*

¹⁵ Age ye di, Abraham ī feseya sā tari fef ile, Negur afonōf yen anī yalen.

¹⁶ Tamo idi waud kuturol fen, dogo neid od megeir difouf are, tamo ī idi wal fediya yana bunem megeir difedig. Waud kuturoleya od anim, od wogō def anī megeir fe fen, luwa irouya ganān irukaka kesidig.

¹⁷ Age fiya bagai, Negur age afouf yen anī dalouf anidi bun, Negur ī yogon kisi to bagai falei youf anī yaor fenēdiyof nigin, ī wau kuturoleya od wogō yen anim, ī age afouf yen anī, megeir fen.

¹⁸ Od uru enei, are od Negur age afouf yen ado wau kuturoleya od anī, faleiya kisi feleya sā, Negur ī od uru enei nigin idegēya kisi feleya sā anī bunem, wau iseya malada bun ifaref anī tarou kafī tafalauf nigin, Negur nē ahahaya bun taya telen ada anī, wauda fatuk yalesauf nigin Negur age fen.

¹⁹ Wau iseya enei are, ada maladakanon nē anka, are total fen, to gebe yedig. Are anim, gabar tempel namen ibodok anī borū fel, modou fateul bagai bun iledig.

²⁰ Jesus ī Melkisedek nē gī bun faimud ibodkeleya pris mudur wō ye fen, ī mogo ada nigin an uyulil ilen.

7

Pris Melkisedek

¹ Melkisedek enei Salem nē king, ī Negur Ilun Bagai nē pris. Ī Abraham king geid kusī del wal feid fen, kel isi mog, fotou fe fen, el fiya ifenen.

* 6:14: [Jenesis 22:17](#)

² Age fe di, Abraham ereb ereb ganan ĩ ado anĭ bun tamal ten tekelei ifenen. Yana Melkisedek nē gariya are “madur bagai nē king,” takag, “Salem nē king,” anĭ nē gariya, “wau inosiya nē king.”

³ Melkisedek ĩ sina tama sã, in ibor nē gĩ taka sã, wõ yen nē naa ado laa nē naa taka sã, ĩ Negur Naal gen faimud ibodkeleya pris.

⁴ ĩ naig fiya odug bagai anĭ kisi wog. Tubu Abraham ĩg safina kusĭ bun yalen anĭ ten tekelei ifenen.

⁵ Lo irok, are Lewi nē ibor nē tubu tar bun pris wowã def idi, tamo kayau bun ten tekelei dalouf, tamo kayau are nedi tureid tar. Tureid tar idig Abraham nē ibor, anĭ ere, idi age difedig.

⁶ Melkisedek ĩ Lewi nē ibor bun tamal sã, anĭ ere, ĩ Abraham bun tamal ten tekelei yale fen, Abraham Negurem age afouf fiyen anĭ el fiya ifenen.

⁷ Kisi togu fiya sã, tamo odugem, ĩ farumen anĭ el fiya ifenēdig.

⁸ Pris tamo, idi gare dedig, ten tekelei daledig, anĭ ere, Melkisedek nigin, Negur nē Itotoya yaor fef, ĩ mata ibodkeleya, ĩ ten tekelei yalen.

⁹ Ada sã eig tauf, Lewi ĩ ten tekelei yaledig, ĩg Abraham bunem Melkisedek ten tekelei ifenen,

¹⁰ ere nigin, Lewi ĩ fau tubu Abraham bouwa bun ibod mog, Melkisedek ĩ Abraham fotou fiyen.

Jesus ĩ Melkisedek Gen

¹¹ Israel tamo kayau lo ifenēdin anĭ bun irok nigin, Lewi idi pris kabĭ daledig. Lewi neid pris kabĭ anĭ bun lau fiya to yenem are, ere nigin pris taka isiya nigin lau fiya fau yenen, Melkisedek nē gĩ bun tamal taka, Aron nē gĩ bun tamal sã?

¹² Pris kabĭ falei fouf are, lo areg falei fouf.

¹³ Neda Odug nigin od enei wogõ yen, are ĩ ibor fire bun tamal, yogon ibor bun tamal taka pris kabĭ to yalen.

¹⁴ Neda Odug ĩ Juda ibor bun tamal are yaor. Anĭ ere, Moses ĩ pris nigin wogõ yen sain bun, Juda ibor nigin od taka to wogõ yen.

¹⁵ Pris taka Melkisedek gen bagai wõ yef are, od enei amã wogõ maun are yaor bagai wõ yef.

¹⁶ ĩ tamo pris kabĭ yaleya nē lo bunem pris to wõ yen, anĭ ere, ĩ, mata, daũ feleya kisi feleya sã anĭ nē megeir bunem pris wõ yen.

¹⁷ Are Negur nē Itotoya eig ye irok kilei:

“Õ faimud ubodkalauf nē pris, Melkisedek nē gĩ bun.”*

¹⁸ Lo tubu are megeir sã, kabĭ to yaledig, anĭ nigin, yerin gadi difelef,

¹⁹ (ere nigin, lo anim ereb taka to madur fedig). Anĭ ere, wau iseya biya anĭ wõ yef, anĭ bunem, ada Negur non telef.

²⁰ Negur ĩ Jesus pris inenen, are wau kuturoleya od sã to inenen. Pris tunĭ ganan idi age fiya sã, idi wau kuturoleya od sã, pris wõ den.

²¹ Negur ĩ Jesus irokenen sain bun, ĩ wau kuturoleya od ado pris wõ yen:

“Odug wau kuturol fen iron, are yogon kisi to falei youf,

‘Õ faimud ubodkalauf nē pris.’”†

²² Wau kuturoleya od enei nigin, Jesus ĩ bar itenēya tubu wal fiya nē megeir fiya wõ yen.

²³ Pris idi museim dibodon, ere nigin, idi gare de fen, kabĭ to tokõ difelen.

²⁴ Anĭ ere, Jesus ĩ faimud ibodkelef, anĭ nigin, ĩ gai gai pris kabĭ yalef, are taka bun to ilauf.

²⁵ Age fiya nigin, idi ĩ bunem Negur garan disif anidi, ĩ el fe isenneĭd leya kisi feleya, ere nigin, ĩ mata faimud ibod ken, idi nigin Negur bun kosē yef.

²⁶ Pris mudur age fiya anim, sã isennadauf. ĩ fateul, kerema sã, amuyē sã, mosor adodo bun tamal gadi felen, Negur ĩ saa ilun bagai inenen.

* 7:17: Sam 110:4 † 7:21: Sam 110:4

27 Pris mudur tunī ganān, naa ganān, dogo neid mosor nigin ket sesewi dife fen, tamo kayau neid mosor nigin sesewi difedig, anī ere, Jesus ī pris anidi gen sã. Ī yogo bouwa sesewi fen sain bun, ī idi neid mosor nigin sain tekelei dogol sesewi fen.

28 Lo are felu yabidig tamo pris mudur igirnēdidig, anī ere, Negur nē wau kuturoleya od, are lo dumen isin, od anim, Negur Naal, faimud kisi feleya bagai ibodkalauf nigin inenen, ī anī igirnen.

8

Bar itenēya Mata Nē Pris Mudur

1 Amã wogō mauf anī nē kaū, are yeir. Ada pris mudur age fiya ado, ī saa ilun Negur nē sia ima biyalē ibod ken,

2 modoū fateul bagai, are tamom sã, Odug yogo bagai salafat inon anī bun aruna yalef.

3 Pris mudur ganān, ofa ado yaro sesewi fiya difenēf nigin igirnēdif, anī nigin, neda Pris Mudur ĩg ereb taka ifenēf nigin adouf.

4 Ī tenebur ibodom are, ī pris to wō yem, ere nigin, tamo lo irok kilei ofa difenēdif are mogo dibodok.

5 Idi modoū fateul bagai, are saa ilun ibodok age fiya gen, anī nē maḷakanon bun aruna dalef. Anī nigin, Moses ī salafat fateul inouf nigin age fen sain bun, Negur ī weder iron, “Lo welei, ō arei bun afelnon age fiya kilei bagai, ereb ereb ganān unouf.”*

6 Anī ere, Jesus ī kabī yalen are idi neid kabī wal fiya, ere nigin, Negur ado tamo geid bar itenēya nigin, ī atun tamo kabī yalef, bar itenēya anī, bar itenēya tubu anī wal fiya, bar itenēya mata anī, Negur od age afouf yen, are od tubu wal fiya anī teten inon.

7 Bar itenēya tubu bun kũ fenēya taka to ibodom are, mata nigin to lau fiyam.

8 Anī ere, Negur ī tamo kayau bun kũ fenēya ile fen, iron:

“Odug irok, sain fau isif,

are Israel tamo kayau ado

Juda tamo kayau geid

bar itenēya mata anouf.

9 Bar itenēya are,

aya idi neid tubuid tar Isip bun

tamal imeid gim afe elen sain

bun,

idi tubuid tar geid,

bar itenēya anon age fiya gen

sãf.

Idi neu bar itenēya to dō difen nigin, aya idi dudum afedin.

10 Odug irok, sain anī dumen,

aya Israel tamo kayau geid, bar

itenēya enei anouf.

Aya neu lo idi neid kisi bun ano fen,

idi neid waud bun atotauf.

Aya idi neid Negur abodōf,

idi neu tamo kayau dibodōf.

11 Tamo takam ne tã to ifelnēf,

tamo takam tura to eig ye iro-

kenēf, ‘Odug nigin keleī youf,’

ere nigin, idi ganān aya nigin keleī youf,

naal bagai bunem isel, odug

bun.

12 Aya idi neid sane nigin wederou tu

kel fen,

idi neid mosor nigin to karī

aulauf.”†

13 Negur ī bar itenēya enei “mata” yen, anī bunem bar itenēya tubu are kabī sã. Ereb taka tubu, kabī sã yen anī, kaisã bagai iminkalauf.

9

Tenebur Negur Nē Salafat Bun Seli Yabiya

1 Bar itenēya tubu anī, seli yabiya nigin nun ado fen, seli yabiya nē modoū tenebur eineg adon.

2 Salafat taka dinon. Aab malabag anī bun, yal nē tibog, tebol ado, bret sesewi difen anī an ifaredin, modoū are Modoū Fateul dedig.

3 Gabar Modoū Fateul bun ibodok anī dumen, aab taka Modoū Fateul Bagai dedig ibodon,

* 8:5: Eksodas 25:40 † 8:12: Jeremaia 31:31-34

⁴ an gol alta aa gaula sumeĩ nigin tō fiyadig ado, bar itenēya nē bogis gol nem ganan kerũ feleya ibodon. Bogis enei bun, gol darum mana ado, Aron nē manig sana wō yen ado, meein bedu bar itenēya itoton ado ifaredin.

⁵ Bogis teten Fula Fiya Medeīya Negur nē engel Serubim difaren, wayeid yarirĩ dife, bogis mala dede difen, bogis mala are modoũ, Negur an mosor yaledidig. Anĩ ere, amā enei nigin gama to dir mafalauf.

⁶ Sain erab erab ganan age de dodok difel fen, pris idi Negur nē kabĩ dalouf nigin, aab malabag bun naa ganan diledig.

⁷ Anĩ ere, pris mudur dogol, aab Modoũ Fateul Bagai dedig gabar dumen ibodok anĩ bun, yar tekelei bun sain tekelei dogol iledig. Ī naud sã to bagai iledig. Ī yogo nigin ado, tamo kayau neid mosor to kelei ken dinon anĩ nigin naud Negur ifenēdig.

⁸ Enei bunem Awa Uur Fateul, salafat fateul urug bagai dinon anĩ fau ifar mog, Modoũ Fateul Bagai bun ileya nigin, bobog fau kã feleya sã anĩ ifelnēdin.

⁹ Enei are gama sain enei nigin malakanon. Are ofa ado yaro sesewi fiya Negur difenen anim, Negur seli yabidig tamo yogon wau kare keleya kisi feleya sã anĩ ifelnēdif.

¹⁰ Safina age fediya anĩ, are saaf, naan yōya ado, amuyē lilik fiya nē tobonunã fire fire dogol. Age fediya anĩ, are bouwa buru nē lo, kabĩ yalef ile, suma mata nē sain bun.

Kristus Nē Naud

¹¹ Kristus ĩ, erab erab biya mogo wō yen anĩ nē pris mudur isin. Ī salafat fateul odug, biya bagai bun isour yale ilen, salafat fateul are tamom to dinon, are erab kare fen enei nē tomina sã.

¹² Ī meme ado bulmakau naal nē naud ado to ilen, anĩ ere, ĩ Modoũ Fateul Bagai bun, yogon naud bunem, sain tekelei dogol isour yale ile fen,

ada nigin kel gei fiya faimud ibodkeleya anĩ yalen.

¹³ Meme ado bulmakau nē naud ado, bulmakau gober naal yã difalege di, isaikelen anĩ nē aas nem, idi amuyē lilik fiya sã anidi tetedin wiri dife di, idi amuyē lilik fele di, bouweid fili yedig.

¹⁴ Are momoi youf are, Kristus nē naud naig fe yenēf! Ī Awa Uur faimud ibodkeleya bunem, yogo bouwa amuyē sã, Negur bun sesewi fen. Yogon naud anim, ada wauda laa bun ileya nē tobonunã bun tamal kulo fadalef, anĩ bunem, ada mata ibodōya Negur aruna talouf.

¹⁵ Gariya enei nigin, Kristus ĩ bar itenēya mata nē atun tamo, anĩ bunem, tamo Negurem iweignēdin anidi, faimud ibodkeleya akor, are Negur age afouf yen anĩ dalouf. Ere nigin, bar itenēya tubu bun, mosor dinon anidi, nedi mosor bun tamal yalelnēdiyof nigin, ĩ laa fen.

¹⁶ Fadim anĩ kabĩ yalouf nigin, fadim yun tamo ĩ mogo laa fen are yaorouf,

¹⁷ ere nigin, fadim are, tamo laa fe di dogol, kabĩ yaledidig. Fadim yun tamo fau mata ibod mog, fadim anĩ to bagai kabĩ yaledidig.

¹⁸ Age fiya nigin, bar itenēya tubug naud sã to kabĩ yalen.

¹⁹ Moses lo bun ĩtãfiya ganan tamo kayau ganan wogō fiyeĩd fen, ĩ bulmakau naal ado meme nē naud, naan ado yale falei fe fen, sipsip siwi giriya ado aa hisop were nem, lo buk bun ado tamo kayau ganan bun wiri fen.

²⁰ Moses iron, “Enei are bar itenēya nē naud, are Negur ã dō gouf nigin irokenein.”*

²¹ Naab tekelei anĩ bunem, ĩ salafat fateul ado sesewi fiya nē safina ganan bun naud wiri fen.

²² Momoi, lo bun irok, melsã erab erab ganan naud bunem kulo falauf, are naud to fi falauf are, mosor nigin weder to tu kalauf.

* 9:20: Eksodas 24:8

²³ Anĩ nigin, saa ilun nẽ safina anĩ nẽ malakanon, sesewi fiya enei bunem kulo feledig, anĩ ere, saa ilun nẽ safina dogo, sesewi fiya enei wal fiya bunem, age fedig.

²⁴ Kristus ĩ modoũ fateul tamom dinon, are modoũ fateul momoi bagai nẽ malakanon anĩ bun to ilen. ĩ saa ilun bagai anĩ bun ile fen, Negur mala bun ada nigin wõ yen.

²⁵ Pris mudur ĩ, yogo naud sã, yaro naud ado, yar ganan Modoũ Fateul Bagai bun ile dig. Anĩ ere, Kristus ĩ yogo bouwa baba baban sesewi foug nigin saa ilun to ilen.

²⁶ Kristus ĩ age fem are, teneub kare fiya sain bunem isin are, ĩ sain musei darau yalem. Anĩ ere, gama idikeleya sain enei bun, ĩ yogo bouwa sesewi fe fen, mosor yalelauf nigin, sain tekelei dogol wõ yen.

²⁷ Tamo ganan sain tekelei dogol gare douf, anĩ dumen, Negur es fediyouf.

²⁸ Age fiya gen, Jesus ĩg tamo kayau musei neid mosor yalel kenẽdiyof nigin, yogo bouwa sesewi fe, tekelei fen. ĩ baban isiyof, are mosor yaleleya nigin sã, anĩ ere, tamo idi ĩ tari difef anidi kel gei fediyof nigin.

10

Jesus Sesewi Fe, Tekelei Felen

¹ Lo are safina biya isif anĩ nẽ malakanon dogol, momoi bagai safina biya anĩ sã. Agef yenek nigin, lo are, sesewi fiya de tekelei anĩ, yar ganan gai toku difenẽdig anĩ bunem, idi Negur seli dabiyof nigin disif anidi, madur tamo bagai wowãya kisi feleya sã bagai.

² Age fiya kisi feleyam are, idi sesewi fiya ganan ditorom. Ere nigin, Negur sesewi difedig tamo neid mosor, momoi bagai kulo felem are, idi baban mosor nigin waud to morõ fedim.

³ Anĩ ere, yar ganan bun sesewi fiya anim, tamo kayau idi, mosor nigin karĩ deledig,

⁴ ere nigin, bulmakau ado meme nẽ naud anim mosor yaleleya kisi feleya sã.

⁵ Anĩ nigin, Kristus tenebur isi fen, iron:

“Õ sesewi fiya ado ofa to oroyon, anĩ ere, õ aya nigin bouwa taka dodok won.

⁶ Õ, ofa yã bun ifaleg isaikeleya anĩ ado, mosor yaleleya nẽ ofa anĩ nigin waũ to iron.

⁷ Ago di, aya oron, ‘Aya nigin buk bun eig ye itoton,

O Negur, aya yeir, aya ogon oroya dõ afouf nigin asin.’ ”*

⁸ ĩ uruwa iron, “Sesewi fiya ado ofa, ofa yã bun ifaleg isaikeleya anĩ ado, mosor yaleleya nẽ ofa anĩ õ to oroyon, anĩ nigin waũ to iron” (anĩ ere, lo are, idi age difouf nigin iron).

⁹ Age ye fen, ĩ iron, “Aya yeir, aya ogon oroya dõ afouf nigin asin.” ĩ mata anĩ inouf nigin uruwa nẽ anĩ yalelen.

¹⁰ Oroya anĩ bun, Jesus Kristus ĩ yogo bouwa sesewi fe, tekelei felen, anĩ bunem, ada fateul wõ taun.

¹¹ Naa ganan bun, pris ganan mugu mugu difar fen, Negur nigin dogo neid kabĩ daledig. Idi sesewi fiya de tekelei anĩ toku difenẽdig, sesewi fiya anim mosor yaleleya nigin kisi feleya sã bagai.

¹² Anĩ ere, Kristus ĩ mosor nigin gai gai nẽ sesewi fiya tekelei fele fen, Negur ima biyalẽ ibodon.

¹³ Sain anĩ bunem isi gama, Kristus ĩ, yogon kiwai tar Negurem Kristus ye inoya nẽ sawa inenẽdiyof anĩ tari fef.

¹⁴ ĩ sesewi fe, tekelei felen anim, idi mosor bun temeleid kulo feledif anidi, gai gai nigin madur feledin.

¹⁵ Awa Uur Fateul ĩg od enei nigin eig ye irokanadaf. Uyulil ĩ irok:

¹⁶ “Odug irok, sain anĩ dumen, aya idi geid bar itenẽya enei anouf.

Aya neu lo idi waud bun ano fen, idi neid kisi bun atotauf.”†

* **10:7:** Sam 40:6-8 † **10:16:** Jeremaia 31:33

17 Age ye fen, ĩ tobol fe irok:
 “Dogo neid mosor ado sane age
 difedig are,
 aya to karĭ aulauf.”‡

18 Mosor enei weder tu kelen ouf are,
 baban mosor nigin sesewi fiya taka
 to yenek.

To Fese Tauf Nigin Iweigya

19 Anĭ nigin, turamā tar, ada Jesus
 nē naud bunem, Modoũ Fateul Bagai
 bun tuninir ya sã ileyā nigin kisi
 feleya.

20 An ileyā nē naab are, mata
 ibodōya nē naab mata, are ĩ, ada
 nigin, gabar Modoũ Fateul Bagai bun
 ileyā nigin bobog katĭ felen anĭ serek
 felen bunem kã felen, gabar are yogo
 bouwa.

21 Ada Negur nē fō lo fiya nigin pris
 odug ado.

22 Anĭ nigin, ada wauda tutuk fen,
 momoiya total ado Negur non ta-
 lauf, ere nigin, ada wauda, mosor nē
 wau morō bun tamal wirif kulo fada
 le fen, bouwada naan karētut nem
 kulo felen.

23 Neda wauda iseya ada wogō
 taudig anĭ, ada tarou kafĭ tafalauf,
 ere nigin, Negur age afouf yen, are
 ĩ de age fouf bagai.

24 Ada wau laa fiya ado tobonunã
 biya bun talauf nigin, abob wau yale-
 seya nigin kisi tafouf.

25 Ada guru fiya anĭ to tatorōf, tunĭ
 to guru difedig gen, to age tafouf, anĭ
 ere, ada abob wau talesef talauf, ere
 nigin, ã, Odug nē Naa melsã isif are
 ulegf.

26 Ada momoi anĭ kelei ken, neda
 oroya dō tafe, mosor tanof talauf are,
 mosor yaleleya nē sesewi fiya taka to
 ibodok,

27 anĭ ere, Negur yogon es fiya
 ado, yã bobo reya anim yogon kiwai
 tar yakur feid isasaikalauf anĭ, kumĭ
 ado tari fiya dogol ibodok.

28 Taka ĩ Moses nē lo dudum fen, ĩ
 nigin tamo urom be towom, ĩ age fen
 anĭ yaor dife di, waud yũya sã dukesi
 di, laa fen.

29 Age fiyauf are, taka ĩ, Negur Naal
 ye nem lai fe fen, bar itenēya nē
 naud anim ĩ mosor bun tamal kulo
 fiyekelen anĭ, fateul sã gen inene
 ken, wau ifenēya nē Awa Uur kono
 fiyek ĩ, darau naig fiya bagai yalouf
 anĭ kisi gef.

30 Ere nigin, ada kelei, Negur eig
 ye iron, “Taka ĩ sane age fouf, ĩ mala
 solo sane ifenēya are neu kabĭ, ayam
 mala solo sane afenēf.”§ Takag, ĩ ba-
 ban iron, “Odug ĩ yogon tamo kayau
 es fediyouf.”*

31 Taka ĩ mata ibodōya Negur ima
 bun ilauf are, ĩ fatuk bagai kumĭ
 tererē youf.

32 Ā uruwa bun fula fiya walegen,
 anĭ dumen naig wog ufaregen anĭ
 kisi waleg. Sain anĭ bun ã darau
 nē kusĭ odug walegen, anĭ ere, total
 ufaregen.

33 Sain tunĭ, ã mal atun kono diyeyi
 ken, darau difeneĭdig. Sain tunĭ,
 ã, idi morō age fiya dalen anidi
 usennēdigedig.

34 Ā tamo kalabus bun dibodon
 anidi nigin wauĭ yũya wenēdigen,
 agog fen, tamo idi āgenei safina
 ganan dale di, ã kulĭya ado folō wol
 kenēdigen, ere nigin, ã kelei, ã aug
 safina biya, mata gai gai ibodkeleya
 nē ado.

35 Anĭ nigin, āgenei kisi total anĭ
 to folō walagauf, are fau mala solo
 odug bagai ifeneĭf.

36 Ā total ufaragauf, anĭ bunem, ã
 Negur nē oroya dōg fen, ereb ĩ age
 afouf yen anĭ walogouf.

37 Ere nigin, sain naal bagai ilele di,
 “Tamo ĩ isif, are fau isiyouf, ĩ to foi
 youf.

38 Anĭ ere, neu tamo madur
 bagai, ĩ momoiya bunem mata
 ibodōf.

Ī dumelem soso rouf are,
 aya ĩ nigin wau to al fouf.”†

39 Anĭ ere, ada, idi dumelem soso de
 fen, fō delef gen sã, anĭ ere, ada, idi
 momoi de fen, isennēya dalef gen.

‡ 10:17: Jeremaia 31:34 § 10:30: Diuteronomi 32:35 * 10:30: Diuteronomi 32:36; Sam 135:14
 † 10:38: Habakuk 2:3, 4

11

Momoiya Bunem

¹ Momoiya are, ereb nigin wauda isef anī, de momoi bagai agef wō youf tauf anī. Momoiya are, ereb ada maladam to tailef anī, de momoi bagai ibodok tauf anī.

² Kulu nē tamo kayau, dogo neid momoiya bunem, Negur idi nigin de fiyēdin.

³ Momoiya bunem, ada keleī, Negur irō di, saa teneub ado wō yen, anī nigin, ereb ada malada bun tailef are, maladam to tailef anim inodin.

⁴ Momoiya bunem, Abel ī sesewi fiya, Kain nē wal fiya Negur ifenen. Abel nē momoiya bunem, Negur ī Abel nigin madur tamo bagai yen, ere nigin, Negur ī Abel nē sesewi fiya are de yen. Abel ī laa fen, anī ere, momoiya bunem, ī fau wogō yef.

⁵ Momoiya bunem, Enok teneub enei bun tamal yalelnen, anī nigin, ī to laa fen. Negurem ī yalelnen nigin, takam ī to fotou fiyen. Negur nē Itotoya irok, Negur ī fau to yale mog, ī Negur wau al fiya ifenen.

⁶ Taka ī to momoi youf are, ī Negur wau al fiya ifenēya kisi feleya sã, ere nigin, taka ī Negur gein isif, are Negur ibodok anī ado, ī dimirnek anidi mala solo ifenēdidig anī, de momoi bagai youf.

⁷ Momoiya bunem, Noa ī ereb malam fau ileya sã mog, Negurem weder iroun anī karī ye fen, ī Negur anini fiye ken, yogon ibor isennēdiyof nigin waag taka kare fen. Yogon momoiya bunem, Noa ī, teneub enei mosor ado anī yaor fe fen, madur bagai, are momoiya bunem isif anī, Negur bun tamal yalen.

⁸ Negur ī, Abraham yogon akor fau yalouf modoū bun ilauf nigin iweignen sain bun, Abraham ī nain be ilauf ya anī keleī san. Anī ere, ī momoiya bunem Negur nē od dōf fen, ilen.

⁹ Momoiya bunem, Abraham ī, Negur afonōf yen teneub anī bun, yaū teneub bun yaū tamo gen ibodon. Ī salafat bun ibodon, Isak Jakop ado, idi Negur afonōf yen od tekelei Abraham yalen anī dalen, idig salafat bun dibodon.

¹⁰ Are Abraham ī, taun anī gariya teten totol ifaref, are Negurem eig fe yenēf ye fen, kare fen anī tari fedig.

¹¹ Abraham ī tubau bagai, Sara ī yogo dali. Anī ere, momoiya bunem, Abraham tama wōya nigin kisi felen, ere nigin, ī, Negur age afouf yen anī agef wō youf bagai ye fen, momoi yen.

¹² Anī nigin, tamo tekelei ī tubau bagai laa tamo gen, ī bunem yogon ibor nē tubu tar, saa ilun barisa ado maaī ubun kulum yenek gen, iwesleya kisi feleya sã, fulus fen.

¹³ Tamo kayau eneidi ganan momoi de fen, gare den. Idi ereb Negur ī age afouf yen anī to dalen. Are idi egerom meledim dogol dile fen, waud al fen. Age dife fen, teneub enei bun idi yaū tamo, namala den.

¹⁴ Tamo kayau age de dirok, are dogo neid teneub dimirek anī difel-nadaf.

¹⁵ Idi teneub ditor disin anī nigin kisi dalem are, idi keku de dilauf nigin kisi feleya yenem.

¹⁶ Age fiya ban, idi teneub biya bagai, saa ilun nē anī nigin waud yenen. Anī nigin, Negur ī, idi nemã Negur def anī nigin to mama fef, ere nigin, ī idi neid taun taka dodok felen.

¹⁷ Momoiya bunem, Negur Abraham kisi fiyen sain bun, Abraham ī, Isak anī Negur sesewi fiya ifenen. Abraham Negurem age afouf fiyen ī, naal tekelei bagai anī sesewi fiya ifenēf nigin age fen.

¹⁸ Negur Abraham irokenen, “Isak bunem, ogon ibor tar wowã douf.”*

¹⁹ Abraham kisi fen, Negur ī laa tamo kel turī fiya kisi feleya. Anī nigin, ada eig tau wogōya kisi feleya,

* 11:18: *Jenesis 21:12*

Abraham i Isak laa bun tamal kel yalen.

²⁰ Momoiya bunem, Isak i, Jakop Esau ado, dumen bun idi neid ibodōya nigin el fiya ifenēdin.

²¹ Momoiya bunem, Jakop yogon laa melsā mog, Josef gere tar monog mugu mugu el fiya ifeneid fen, yogon manig tubi bun mudur isen ken, Negur seli yabin.

²² Momoiya bunem, Josef yogon laa melsā mog, Israel tamo kayau Isip tamal ditor dilauf nigin wogō ye fen, yogon tuwa nigin faded fiyēdin.

²³ Momoiya bunem, Moses sina tama adom, Moses wō ye di, i ogō towo dinokelen, ere nigin, Moses i kesu meli bagai dile fen, idi king nē od nigin to kumī den.

²⁴ Momoiya bunem, Moses i biya fen, Isip king nē barai nē kesu yeya anī itoron.

²⁵ Moses i, mosor nē oroya sain naal bun dō fiya itor ken, Negur nē tamo kayau geid morō dalouf nigin wau iron.

²⁶ Moses i kisi fen, are Kristus nigin kono fiya yaleya anī, Isip nē safina biya bagai anī wal fiya, ere nigin, i yogon mala solo dumen nē anī lo felen.

²⁷ Momoiya bunem, Moses i Isip king nē seye nigin kumī sā, Isip itor ilen. I total ifaren, ere nigin, Moses i, Negur ileya kisi feleya sā anī, ilen gen age fen.

²⁸ Momoiya bunem, i Pasa ado, bobog bun naud wiri fiya nē suma inon, are Yukesiya nē Engel i, Israel neid kesu monog matu to idenkesiyouf nigin age fen.

²⁹ Momoiya bunem, Israel tamo kayau, teneub maug bun gen Maaī Giriya atu diyok dilen. Anī ere, Isip tamo idi dibal mog, naan kerub fedid, gare den.

³⁰ Momoiya bunem, Israel tamo kayau, Jeriko kau, naa sewen kalī dife di, Jeriko kau narī felen.

³¹ Momoiya bunem, naabur kayau Rahab, idi Negur ait to dō difedig

geid to didenkesin, ere nigin, i kofotamo aan fiyēdin.

³² Aya baban ere od taka arokeneif? Aya Gidion, Barak, Samson, Jepta, Dawid, Samuel ado, profet idi nigin dir feleya nigin sain sā.

³³ Idi momoiya bunem king geid kusī de fen, lai difedin. Idi madur bagai bunem kulatun difen. Idi Negur age afeneif yen anī dalen. Idi laion eweid difofakelen.

³⁴ Idi yā bale difofor len. Idi dimig willa wal difen. Idi total sā, anī ere, megeir dale fen, total difaren. Idi kusī namen total dale fen, yaū kusī tamo lai difedin.

³⁵ Kayau dogo neid tar gare dedin, baban mata ke de fafā de di, daledin. Tunī darau sane bagai dale fen, kafī fiya bun tamal yalelnēdiya ditoron, are idi kel fāya biya anī, dalouf nigin age difen.

³⁶ Tunī kono fiya ado tibog dalen, tunī sen nem difofa ken, kalabus bun dinenēdin.

³⁷ Idi meein tulu difedin. Idi so nem kokour difedi di, uru wō yen. Idi dimig nem didenkesin. Idi sip-sip gabar ado meme gabar difoungkel dilen, are idi maleg dibodon, darau dalen, to biya difiyēdin.

³⁸ Tenebur ein, idi ed fe ibodōya nigin to biya. Idi gerere tuan, arein, meein ku bun ado, teneub kur diyōdig.

³⁹ Eneidi ganan, Negur, dogo neid momoiya nigin de fiyēdin. Anī ere, idi takam, Negur age afouf yen anī to yalen,

⁴⁰ ere nigin, Negur ada nigin kisi biya bagai inon, are idi ada weim ouf dogol, kisi feleya bagai wowā douf nigin, Negur i age fen.

12

Negur Yogon Kesu Tar Madur Fiyēdidig

¹ Ada momoiya tamo kayau age fediya musei budū gen kalilī difadaf. Anī nigin, ereb ereb ganan naaburada gudū fef anī ado, mosor karika sane fili fadaf anī taraile fen,

abob wawal fiya nē gudu reya Negurem inokanadan anī bun, feseya sã gududu tauf.

² Ada malada Jesus bun dogol tanouf, ī neda momoiya nē gariya ado, momoiya kisi feleya bagai wōya nē. Ī wau al fiya mala bun ifaren anī nigin ye fen, ī aa tetek nigin to fese ye fen, mama yaleya nigin to kukī yen, agef fen, ī Negur nē sia ima biyalē ibodon.

³ Jesus ī mosor adodo tamom kiwai fatuk difenen anī ganan faali fen, ī nigin kisi tafouf, are ā to fō yei ken, wauī folo rouf nigin age tafouf.

⁴ Ā mosor ado gunī gedig, anī ere, ā fau kusīg fen, naudeī fi feleya sã.

⁵ Agog fen, ā wauī yaleseya od, Negur neu kesu tar yein anī wedereī tu kelen:

“Neu kesu, ō Odug nē madur fiya to ege wouf,

Odug ī ou yōf are, wau to folo rouf,

⁶ ere nigin, Odug ī, idi nigin wau laa fedig anidi madur fiyēdidig, agef fen, ī yogon kesu tar yaledif anidi ganan darau ifenēdidig.”*

⁷ Morō ā ado are, Negur nē madur fiya anī de faali gouf. Negur ī, ā yogon kesu tar nigin age fef. Kesu nanī taka, tamam to madur fiyēdig?

⁸ Negur yogon kesu tar ganan madur fiyēdidig, anī ere, ī ā to madur yeif are, ā yogon kesu tar sã, ā dubur temeī.

⁹ Ada ganan tamada tar ado, idi ada madur difada di, anī nigin bobou tafiyēdidig. Anī nigin, ada fatuk bagai neda uur nē Tama farumen tabod ken, mata tabodōf!

¹⁰ Ada tamada tar, sain naal bagai, idi biya kisi difen anī kilei, madur difadan. Anī ere, Negur neda biya fiya nigin, madur fadadig, are ada ī geid fateulouf nigin age fedig.

¹¹ Sain madur fiya ganan bun, wau al fiya to taledig, darau anī taledig. Anī ere, dum, idi darau age

fiya bunem madur fiyēdin anidi bun, madur bagai ado wau inosiya nē faat biya wō youf.

¹² Anī nigin, imeī bubur kelediya ado iboreī felu reya megeir weledigouf.

¹³ “Yeī nigin naab tutuk gouf,”† anī bunem, yeī kirorōya to sesen lauf, are biya lediyouf.

Negur Dudum Fiya Nigin Weder Irouya

¹⁴ Tamo ganan geid wauī inosiya bun ubodōg fen, fateulouf nigin kabī total waleg. Fateul sãf are, takam Odug to ilouf.

¹⁵ Taka nem Negur nē wau ifenēya to folo rouf nigin ado, aa faat dirikeī gen to wō ye fen, musei morō ifeneīd fen, amuyē ifenēdiyof nigin lo welegei.

¹⁶ Taka nem noli tobonunā to inouf nigin be, Esau gen Negur nigin kisi sã to ibodōf nigin lo welegei. Esau ī, kesu matu nigin yogon akor fau yalouf anī, sain tekelei nē saaf anī nem na sur fen.

¹⁷ Anī dumen, ā karī gef kilei, ī el fiya enei akorouf nigin oron, anī ere, ī to yalen. Ī inā ado el fiya anī imiren, anī ere, ī wau faleiya nigin naab taka san.

¹⁸ Ā arei eig fiya bun to usigen, arei are kobū fiya kisi feleya, yã balē yef ado, gugum, tubutubuya, uyē yau total ado,

¹⁹ taur ait, ait taka od wogōya nē, are tamo idi ait anī karī de fen, od baban to wogō fiyēdiyof nigin digonen,

²⁰ ere nigin, idi eig ye irokenēdin anī yaleya kisi feleya sã, “Gaar taka arei anī kobū foufeg, meein tulu difouf.”‡

²¹ Moses anī ile fen, fatuk bagai kumī ise fen, iron, “Aya kumī tererē auf.”§

²² Anī ere, ā Saion Arei bun, saa ilun nē Jerusalem, are mata ibodōya Negur nē taun usigen. Ā engel mala

* **12:6:** Proverb 3:11, 12 † **12:13:** Proverb 4:26 ‡ **12:20:** Eksodas 19:12, 13 § **12:21:** Diuteronomi 9:19

musei biya al de guru difef bun usigen.

²³ Æ, Negur nē kesu matu, idi yeneid saa ilun itoton anidi neid sios bun usigen. Æ tamo ganan nē es fiya Negur bun ado, madur tamo kisi feleya bagai wowã den anidi neid uur bun usigen.

²⁴ Æ, Jesus, bar itenēya mata nē atun tamo bun ado, naud wiri fen, are Abel nē naud wogō yef anī wal fiya od wogō yef anī bun usigen.

²⁵ Lo welegei, are ī wogō yef anī to dudum wog. Idi tenebur ein wedereid iroun ī dudum difiyen idi to diyalelen, ani nigin, ada saa ilunem wederada irouf ī dudum tafouf are, ada iyaleleya nigin malai bagai.

²⁶ Sain anī bun, yogon aitem teneub enei yokū fen, anī ere, gama ī promis od eig ye iron, “Baban aya teneub dogol sã, saa ado yokū afouf.”*

²⁷ Od “baban” yef are ifelnadaf, are ereb ereb inodin yokū fiya kisi feleya anī yokū feid fen, yalelauf, are ereb yokū fiya kisi felya sã anī fau ifarauf nigin age fouf.

²⁸ Ada tano yokū fiya kisi feleya sã anī talem, anī nigin, Negur de tafiye ken, Negur wau al fouf nigin, kumī ado aniniya bunem, Negur seli tabiyouf,

²⁹ ere nigin, neda “Negur ī isaikelaya nē yã.”†

13

Idikeleya Nē Wau Yaleseya Od

¹ Abob nigin tureī tar gen, toku wauī laa fouf.

² Tamo mata urug yalediya nigin to wedereī tu kalauf, tamo tunī age difen are, keleī sa ken, engel gei difedin.

³ Idi kalabus bun difaref anidi, Æ idi geid takai kalabus bun ifareya gen, karī wedigouf. Idi to biya difiyēdif anidi, Æ morō takai walegef gen, karī wedigouf.

* 12:26: Hagai 2:6 † 12:29: Diuteronomi 4:24

⁴ Tamo kayau ado bagu fiya nigin, tamo ganan, yana odug an dinouf. Tamo kayau ado bagu fiya nē fatar karētut ibodōf, ere nigin, Negur ī, idi seseirã tobonunã dinof anidi ado, idi noli tobonunã dinof anidi, es fediyouf.

⁵ Moni nigin kisi fatuk to unogouf, safina Æ adof anī, are eī de gouf, ere nigin, Negur ī iron,

“Aya to bagai atorneīf,

aya to bagai folō ayeikalauf.”*

⁶ Anī nigin, ada kumī sã torōf,

“Odug ī neu isennēya, aya to kumī auf.

Aya tamom ere naig fiyauf?”†

⁷ Ægenei uyu irouya, Negur nē od wogō diyein anī karī walagouf. Idi naig de dibodok disi di, ereb wō yen anī kisig fen, idi neid momoia madē gouf.

⁸ Jesus Kristus ī to falei yedig, nor, gama ado, sain ganan, de agef ibodkeledig.

⁹ Æ ifelnēya fire fire anim to wewu yeī irouleyeīf. Ada wauda, wau ifenēya anim megeir fouf anī biya, saaf nē lo dō fiya bunem ada wauda to megeir fouf, are idi saaf nē lo dō de doko anidi, anim to isennēdif.

¹⁰ Ada alta ado, an pris salafat fateul bun kabī daledig idi, neda alta anī bun yōya nigin kisi feleya sã.

¹¹ Pris mudur, yaro naud anī, mosor nē sesewi fiya Negur ifenēf nigin, Modoū Fateul Bagai bun iledig, yaro bouwa are, fō mayã dumeitur difaleg isaikeledig.

¹² Anī nigin, Jesus īg yogon naud bunem, tamo kayau neid mosor yalelauf nigin, taun bobog dumeitur darau faali fen.

¹³ Anī nigin, ada, ī mama faali fen anī tale fen, fō mayã dumeitur ī gein talauf.

¹⁴ Ere nigin, ada, tenebur ein, faimud ibodkeleya nē taun sã, anī ere, ada taun fau isiyouf anī tamirek.

¹⁵ Anī nigin, ada toku, Jesus bunem, yana yaleseya nē sesewi

* 13:5: Diuteronomi 31:6 † 13:6: Sam 118:6,

fiya, Negur tafenēf, yana yaleseya nē sesewi fiya are, sigoradam Jesus yana kurō tafesif anī.

¹⁶ Ereb erēb biya agog fen, abob wenēgouf anī to wedereī tu kalauf, ere nigin, sesewi fiya age fediya anim Negur wau al fedig.

¹⁷ Āgenei uyu irouya farumen ubodōg fen, karī wiyēdigouf. Idi ā lo diyeīdig, idi dogo neid kabī nigin dum Negur dirokenēf. Idi karī wiyēdigouf, anī bunem, idi neid kabī morō sā, wau kulīya ado dalouf, ere nigin, idi morō ado kabī dalouf are, ā to isenneīf.

¹⁸ Amā nigin kosē gouf. Amā momoi mauf, are amā kisi karētut ado, amā erēb erēb ganān bun biya age mafouf nigin oromak.

¹⁹ Negur aya ā gein kaisā bagai sur fyauf nigin, ā kosē gouf nigin, fatuk bagai arokeneik.

²⁰ Wau inosiya nē Negur ī, faimud ibodkeleya bar itenēya nē naud bunem, neda Odug Jesus, sipsip lo fiya tamo odug, laa bun tamal kel irousin.

²¹ Wau inosiya nē Negur ī, Jesus Kristus bunem, yogon oroya dō gouf nigin erēb erēb biya ganān ā ifenei ken, yogo wau al fouf nigin ada bun kabī yalouf anī amā oromak. Negur ī bun fula fiya medeīya gai gai ibodōf. Momoi.

²² Turau tar, ā, neu wau yaleseya od anī, karī gouf nigin, total bagai arokeneik, ere nigin, aya pas tobega dogol atokenein.

²³ Neda turada Timoti, kalabus bun tamal ulō yesin anī, ā keleī youf nigin aya orouf. Ī kaisā wō youf are, amā urom ā mailiyeīf nigin masiyouf.

²⁴ Āgenei uyu irouya ganān ado, Negur nē tamo kayau ganān aan wiyēdigouf. Idi Itali temeleid, ā bun, idi neid aanya, sur difeneik.

²⁵ Negur nē wau ifenēya ā ganān bun ibodōf.

Jems

¹ Aya Jems, Negur ado Odug Jesus Kristus neid ferfer,

Israel neid ibor tuwelf tenebur ein firagagaũ difen bun pas enei atotof.

Aan yeya.

Morõ Bun Ado Kisi Fiya Bun

² Turau tar, ereb sain morõ fire fire walogouf are, ã wauĩ al fiya nigin gouf,

³ ere nigin, ã keleĩ, ãgenei momoia, kisi fiya bunem, feseya sã ifareya wõ yedig.

⁴ Feseya sã ifareya anĩ tobol ge di, ketẽ yese di, ã atĩyeĩ ken, kisi feleya bagai, ereb taka nigin lau fiya sã wõ gouf.

⁵ Æ taka kisi biya nigin lau fouf, Negur tamo ganan kisi biya nigin lau de fen to difiyẽf anĩ to ou fiyeĩd fen, wau sã kisi biya kisi feleya ifenẽdidig anĩ to fiyẽf, age fe di, ã ifenẽf.

⁶ Anĩ ere, ã to fiyẽ fenẽ, ã momoi ye fen, to wau uru ouf bagai, ere nigin, taka ã wau uru ouf are, ã maaĩ moloun wĩya gen, yaum wese fe di, ilef isif fedig gen.

⁷ Tamo age fiya, ã Odug bun tamal ereb taka alouf ye fen, to kisi fei.

⁸ Æ tamo wau uru ado, ereb age fef ganan bun, in wau to dẽ yesiledig.

⁹ Momoia turada taka ã maleg are, ã Negur mala bun yogon modoũ ilun nigin wau al fouf bagai.

¹⁰ Anĩ ere, taka safina musei ado, sain Negur ã lai fesilnẽf are, ã anĩ nigin wau al fouf bagai, ere nigin, ã odõ munĩ gen inanakalauf.

¹¹ Gaa ise fen, yogon uruwa nẽ totol anim aayũ gariri keledig, age fe di, munĩ tu rel fen, kubũ ye fen, yogon gegẽ meli bagai anĩ inanakalauf. Age fiya gen, tamo safina musei ado ãg yogon kabĩ yalef ile mog, inanakalauf.

¹² Tamo taka ã, morõ bun megeir ifaref ilauf, ã el fiyek, ere nigin, ã kisi fiya bun ifaren nigin, ã mata nẽ teter

Negur idi ã nigin waud laa fef anidi afenẽdiyof yen anĩ yalouf.

¹³ Kisi fiya isi di, taka nem to irõf, “Negur aya mosor anouf nigin kisi fiyaf.” Ere nigin, Negur ã sanem kisi fiyẽya kisi feleya sã, agef fen, inimeg taka mosor inouf nigin to kisi fiyẽf.

¹⁴ Anĩ ere, mugu mugu ã, yogon oroya sanem mala yũ yale di, kisi fiya bun iledig.

¹⁵ Age fe di, bouwa nẽ oroya anim, mosor wau bun kare fe di, mosor gõ fef, mosor anĩ isora le fen, laa gõ fef.

¹⁶ Turau tar oboiyof, to didegneĩf.

¹⁷ Erebiya ganan ado ege luwa bagai ganan, are ilun tamal, Negur saa ilun nẽ lalan ganan kare fen ã bunem isif, ã to falei fulu yedig, ã buri ilef isif fedig gen to falei yedig.

¹⁸ Æ, yogon oroya bunem, ada, yogon momoi od bunem yogon gere tar wõ tauf nigin igirnadan, are ada ereb ã inodin anĩ ganan bun faat uyulil taka gen wõ tauf nigin age fen.

Karĩya Ado Dõ Fiya

¹⁹ Turau tar oboiyof, enei karĩ walagauf: Tamo ganan kaisã bagai karĩ gouf, kaisã to wogõ gouf, kaisã to seye gouf,

²⁰ ere nigin, tamo nẽ wau saneya are, tutuk mata ibodõya Negur orof anĩ to irou isidig.

²¹ Anĩ nigin, ereb ereb amuyẽ ganan ado, sesen ketẽ yesen ganan walelagauf, agog fen, wauĩ yukesileya bunem, od ã namein Negurem itenen, kel yaleyeĩf kisi feleya anĩ walogouf.

²² Æ od ege karĩ dogol ya bunem, to aug bouweĩ udegnẽg. Erebyef anĩ dõg agog.

²³ Aib taka ã od karĩ ye fen, erebyef anĩ to dõ fef are, ã tamo yogo nawa dodo bun ilef gen,

²⁴ Æ yogo nawa felef, waĩf yale di, kaisã bagai yogo nawa nigin nene yedig gen age fiya.

²⁵ Anĩ ere, tamo ã, lo kisi feleya bagai, karika ifenẽdig anĩ bun, el fe felef fen, faimud age fef ile, ereb karĩ

yen anī to weder tu kel fen, anī agei fouf are, ī ereb age fef anī bun el fiyēf.

²⁶ Aibem taka ī aya momoi auf ye fen, ereb ereb lo irok kilei bagai dōf age fouf, anī ere, yogon sigor to fateul inouf are, ī yogo idegne ken, yogon momoiya are kaū sā.

²⁷ Momoiya, Negur ada Tamada karētut ado kū fenēya sā gen iledig, are eig fiya: maad ado waab, nedi morō bun kulatun fediya, agef fen, tenebur nē oroyam to amuyē iroudauf nigin lo feleya.

2

Ā Wauī Wenēgef Anī Dogol To Lo Walagauf

¹ Turau tar, ā, neda fula fiya medeīya nē Odug Jesus Kristus nigin momoi gef nigin, ā wauī wenēgef anī dogol to lo walagauf.

² Tamo taka ī, āgenei guru fiya bun ima sai gol ado kolos biya ifoun ken, isi di, maleg tamo taka kolos tubu adog namen isiyouf.

³ Ā tamo kolos biya ado anī el ge lo weleg fen, “Ogon ibodōya modoū biya bagai yeir,” ge fen, maleg tamo urokenēgouf, “Ō an ufar,” be “Ō yeu gariyan tenebur ubod,” wiyēgouf are,

⁴ ā atun es ge fen foi gen, agog fen, kisi gariya sane bunem es fiya tamo wō gen.

⁵ Karīg, turau tar oboiyou! Negur ī, tenebur tamo kayau meleid bun maleg anidi momoiya bun kisi feleya bagai wō de di, Negur nē tano ī nigin waud laa fedig anidi afenēdiyof yen anī, idi akor dalouf nigin to igirnēdin de?

⁶ Anī ere, ā maleg anidi anī meleī irim uledigen. Tamo safineid adodom to lai diyēīdig de? Idim ā kot bun to guri diyēī dirouleyēdig de?

⁷ Idim, Kristus yana biya anī bunem ā iweigneīdig anī, to yana sane dinodig de?

⁸ Ā, momoi bagai, neda King nē lo, Negur nē Itotoya bun ibodok, “Ō ogo nigin waū laa fef gen, nē tā nigineg ago waū laa fouf,”* anī dō gouf are, ā biya ago gef.

⁹ Anī ere, ā wauī wenēgef anī dogol lo walagauf are, ā mosor unog fen, lo bunem, ā lo wal fiya tamo wowā gef.

¹⁰ Ere nigin, taka ī lo ganan dōf fen, lo tekelei dogol wal fouf are, ī lo ganan wal fef.

¹¹ Aib ī iron, “Ō seseirā to uno,”† ī eig yeg iron, “Ō taka to ukeis.”‡ Ō seseirā to unof, anī ere, taka ukesiyof are, ō lo wal fiya tamo wō wouf.

¹² Idi, lo karika ifenēdidig anim, es fediyof age fediya gen wogōg fen, dō gouf,

¹³ ere nigin, Negur, es fiya wau yūya sā anī, aib wau yūya sā bun inouf. Taka ī taka nigin wau yūya ifelnēf are, ī es fiya anī wal fouf, ere nigin, īg Negurem wau yūya ifelnēf.

Momoiya Ado Dō Fiya

¹⁴ Turau tar, tamo taka aya momoi auf ye fen, to dōf age fouf, ī ere biya age fouf? Momoiya age fiam tau isennēf?

¹⁵ Turada be mainada taka ī, kolos ado saaf naa teke tekelei yōya nē sā.

¹⁶ Ā takam ī irokenēf, “Wau inosiya bun ule, aya ō de ailiyok, uruwa wale fen, wō el wo,” age ye fen, ī bouwa buru isennēya nigin ereb taka to age fouf, ī ere biya age fef?

¹⁷ Naab age fiya bagai, momoiya yogo dogol, dō fiya bunem to isennek, are laa fef.

¹⁸ Anī ere, takam irōf, “Taka momoiya ado, taka dō fiya ado.” Kisi age fiya are kū fenēya.

Ogon momoiya, dō fiya sāf are, naig fe di, aya ō momoiya ado ya anī keleī youf? Anī ere, aya, neu dō fiya bunem, aya momoiya ado ya anī afelnōf.

* **2:8:** Levitikas 19:18 † **2:11:** Eksodas 20:14; Diuteronomi 5:18 ‡ **2:11:** Eksodas 20:13; Diuteronomi 5:17

¹⁹ Õ Negur tekelei ibodok ya anĩ momoi wof. Are de! Kaa seseneg age de momoi de fen, kumĩ tererẽ dedig.

²⁰ Õ neneya bagai, õ momoiya dõ fiya sã are, ege bagai ya anĩ keleĩ you fenẽ de?

²¹ Ada tubuda Abraham yogo naal Isak alta bun Negur sesewi fiyẽf nigin age fen bun, ereb ã age fen bunem, Negur ã madur bagai to fiyen de?

²² Õ, yogon momoiya ado yogon dõ fiya bagu de kabĩ dale di, yogon momoiya, ereb age fen anĩ bunem, kisi felen anĩ ulef.

²³ Anĩ bunem, Negur nẽ Itotoya eig ye irok anĩ kisi felen, “Abraham Negur nigin momoi yen, age fe di, Negur Abraham madur bagai yen,” § age ye fen, Negur Abraham nigin neu mou yen.

²⁴ Anĩ bun, õ ulef, are tamo ã ereb age fef anĩ bunem, Negur ã nigin madur bagai yef, momoiya dogol bunem sã.

²⁵ Age fiya bagai, Rahab naab kayau ãg, kofo fiya tamo gei feid fen, naab taka bunem sur fedin anĩ bunem, Negur Rahab nigin to madur bagai fiyen de?

²⁶ Bouwa uur sã are laa fef age fiya gen, momoiya dõ fiya sã are laa fef.

3

Sigoreĩ Kulatun Gouf

¹ Turau tar, ã atun musei tise wowãya nigin to kisi gouf, ere nigin, ã keleĩ, amã tise kabĩ malef, totoo bagai es famãf.

² Ada ganan naab musei bun kuku taudig. Aib taka ã ereb yef bun to kũ fenẽf, ã tamo kisi feleya bagai, yogon bouwa ganan ulum iroukeneya kisi feleya.

³ Ada hos sigorada dõ difouf nigin eweid bun ain tobega tanof are, ada hos bou ganan, sã gadi tafiyẽf.

⁴ Takag, waag bun kisi gouf. Idi odug bagai fen, yau totolem irouledig, anĩ ere, ulum irouya tamo narib ileya nigin, ulum naal bagai

anim waag anĩ narib ileya orof nẽ irouledig.

⁵ Age fiya bagai, bouwada bun baleda are gai naal bagai, anĩ ere, ã, ereb odudug ã age fef nigin, yogo yana seli yabidig. Dub odug yã nini-mam age fe di, uu yedig age fiya gen bagai kisi gouf.

⁶ Baledag ã yã, bouwada ganan atun sane nẽ teneub. ã tamo oditekei bouwa ganan amuyẽ ifenẽdig, yogon mata ibodok ilauf ganan bun yã irãdig, age fe di, ãg yogo hel bunem isaikalau.

⁷ Gaar fire fire ganan, ninã, gaar luwedim diyõdig anĩ ado, maaĩwõ difaref are ganan, maman difiyẽdig nigin tamom maman difediyouf.

⁸ Anĩ ere, tamo takam bale maman fiya kisi feleya sã. ã faimud sane fen, laa nẽ mũ sanem barikã.

⁹ Baledam ada neda Odug ado Tamada yana talesedig, age tafe fen, de anim tamo Negur yogo gen inodin anĩ gelu tafedidig.

¹⁰ Awada tekelei anĩ bun tamal, yana yaleseya ado gelu fiya wõ yedig. Turau tar, anĩ to agef ilauf bagai.

¹¹ Maaĩ naan ado naan maug, warur tekelei bun tamal wõya kisi feleya de?

¹² Turau tar, aa fig, aa oliv faat imaya kisi feleya de? Aa wain, aa fig faat imaya kisi feleya de? Age fiya gen, maaĩ naan, warur bun tamal, naan maug wõya kisi feleya sã.

Tenebur Nẽ Kisi Biya Ado Negur Nẽ Kisi Biya

¹³ ã atun taka, kisi biya ado fen, kisi fokõ feleya adouf are, ã yogon to-bonunã biya bunem, wau yukesileya kisi biya bunem isif anĩ bun, dõ fiya bunem anĩ yaorouf.

¹⁴ Anĩ ere, ã ãgenei wauĩ bun, kiyeĩ makik ado, aya aya yeya adouf are, ã yeneĩ to waleseg fen, aya kisi biya ado gouf. Ago gouf are, ã udegẽg fen, momoi nẽ od anĩ to dõ gouf.

¹⁵ Yeneĩ yaleseya nẽ kisi age fiya, saa ilunem to isif, anĩ ere, are

tenebur tamal, bouwa nē oroya nē, Satan bun tamal.

¹⁶ Ere nigin, kiyeĩ ado aya aya yeya ibodok nē an, ekul fiya ado ereb ereb sane ganan ibodok.

¹⁷ Anĩ ere, kisi biya saa ilunem isif are, uyulil karētut, age fe di, maror nigin wau laa fiya, molol, abob karĩ fiyēya, wau yūya barikā ado, faat biya yūya, anĩ kinau ya sã ado, mala yaleya sã.

¹⁸ Maur gudū fiya tamo ĩ maror bun itenek, ĩ madur bagai anĩ kusu fedig.

4

Negur Farumen Ubodōgouf

¹ Erem age fe di, kusīya ado monēya ā atun ibodok? Are āgenei oroya ā namein kusī yedig anĩ bunem to wō yedig de?

² Ā ereb oroyeik, anĩ ere, to walegedig. Anĩ nigin, ā safineid adodo udenkesig fen, ereb ereb yalekenēdiya nigin kisi gedig. Ā ereb oroyeik, anĩ ere, yaleya kisi feleya sã. Anĩ nigin, ā monēg fen, kusī gedig. Ā to walegedig, ere nigin, ā Negur to, to wiyēgedig.

³ Sain ā to gef bun, to walegedig, ere nigin, ā wauĩ bun tutuk sa ken, to gedig, ā ereb walegef are aug naumeĩ nigin ge fen, irailaya nigin ago gedig.

⁴ Ā gai de, tamo kayau seseirā dinodig gen! Ā tenebur nē oroya ado bagu gouf are, Negur kiwai wenēgef anĩ ā keleĩ sã de? Taka ĩ tenebur nē oroya ado bagu fouf are, Negur nē kiwai tamo wō youf.

⁵ Ā kisi gef, Negur nē Itotoya ĩ gariya sã, “Ur ada namedan ibodōf nigin inon anĩ kiyeĩ total bagai ifenek,” yef de?

⁶ Anĩ ere, Negur ĩ wau ifenēya mugı bagai ada ifanadadig. Anĩ nigin, Negur nē Itotoya eig ye irok, “Negur ĩ, dogo yeneid dalesef anidi kiwai ifeneĩd fen, waud dukesil dibodok anidi wau ifenēdidig.”*

⁷ Age fiyauf are, aug Negur farumen ubodōgouf. Satan wal fiya nigin teĩbir gouf, ago ge di, ĩ ā folō yeikalau.

⁸ Negur wagen usig len, ĩ ā wagein isiyouf. Mosor adodo ā, imeĩ kulo gouf, kisi uru adodo ā, kisi tenebur ein nē oroya bun unogef anĩ otorōg fen, kisi ganan Negur bun dogol unogouf.

⁹ Wauĩ gudūf, maruĩ isi fen, inā walogouf. Kasāya otorōg fen, wauĩ gudū fouf, wauĩ kulīya otorōg fen, wauĩ morōf.

¹⁰ Odug mala bun wauĩ ukesileg, ago ge di, ĩ ā yalesneĩf.

¹¹ Turau tar, ā abob, ō sane to wiyēg. Taka ĩ, tura, ō sane fiyek be, es fiyek, ĩ lo are sane ye fen, lo es fiyek. Ā lo es wiyēgouf are, ā lo dō fiya tamo sã, anĩ ere, ā lo nē marau gen wowāg fen, ā aug tamo es wiyēgedif.

¹² Lo ifenēya ado es fiya tamo, de tekelei dogol ibodok, ĩ yogo kel yaleya ado daũ feleya kisi feleya. Anĩ ere, ā ere anĩ neĩ tā es wiyēgouf?

Nil Nigin Yana Yaleseya

¹³ Gama karĩ gouf, ō aib urōgedig, “Gama be nil, amā fau taun enei be anĩ bun mele, an yar tekelei mabod, bisnis mano fen, moni malouf,” gedig.

¹⁴ Anĩ ere, āgenei mata are nil naig fe ilauf anĩ, ā keleĩ sã. Āgenei mata are ere? Ā ogou sain naal bagai wō ye fen, iwaikeledig gen.

¹⁵ Anĩ nigin, ā eig gouf, “Odug orouf are, amā mabod ken, enei be anĩ age mafouf,” gouf.

¹⁶ Anĩ ere, ā agog wauĩ fã ye di, yeneĩ walesegedig. Yana yaleseya age fediya ganan are sane.

¹⁷ Age fiya nigin, taka ĩ biya nigin kelei ken, age fiya kisi feleya anĩ to age fouf, ĩ mosor inouf.

* 4:6: Proverb 3:34

5

Safina Musei Adodo Bun Weder Irouya

¹ Gama karĩ weleg, ã safina musei adodo, morõ odug ã bun isif anĩ nigin maruĩ isi fen, inã walogouf.

² ãgenei safineĩ bura le di, dedek ãgenei kolos dakasin.

³ ãgenei gol ado silwa maat te yun. Dogo neid maat te anim, ã nigin kiwai od wogõ ye fen, yã nem gen ãgenei bouweĩ yakasiyouf. ã gamag idikeleya sain mog, safina kuru gen.

⁴ Ulegef! Kabĩ tamo ãgenei kabier kusu fiya nigin oroi dilen anĩ to na waledigen nigin, na yaleya nẽ wareg ã to wenẽdigen anim, ã nigin kaĩ ye fen, iron. Age dife di, oroi tamo aiteid, Odug saa ilun nẽ kusĩ tamo guri feid uyu iroudig anĩ, wederen ilen.

⁵ ã tenebur ein ereb ereb biyai biyai ado ubodõg fen, bouweĩ sigigi gen. ã idenkesiya nẽ naa nigin bouweĩ gimiru unogen.

⁶ ã, idi mosor sã, kiwai to difenein anidi, bouweid ùg fen, udenkesigen.

Darau Bun Feseya Sã Ifareya

⁷ Anĩ nigin, turau tar, to fese gef uleg, Odug nẽ isiya sain wõ youf. Saaf kabĩ yaleya tamo, teneub bun saaf biya bagai wõ youf nigin, naig fe tarif fen, uyẽ uruwan isif ile idikeledig anĩ atun, naig fe feseya sã tarif fen, kabĩ yaledig anĩ uleg.

⁸ ãg, to feseg fen, total ufaragouf, ere nigin, Odug isiya nẽ naa are mogo melsak.

⁹ Turau tar, abob to nauseir wiyẽg, abob nauseir wiyẽgouf are, es fiya ã bun isiyouf. Es fiya tamo mogo bobogẽ ifaref!

¹⁰ Turau tar, profet Odug nẽ yana bun wogõ den anidi, darau bun feseya sã difaren gen ãg ago gouf.

¹¹ ã keleĩ, ada idi feseya sã difaren anidi el fedif taudig. ã Job naig fe feseya sã ifaren anĩ karĩg fen, dum Odug ã bun ereb naig fen are ulegen.

Age fiya gen, Odug ã wau ifenẽya ado wau yũya barikã.

¹² Anĩ ganan wal fiya, turau tar, ã wauĩ kuturol fen, saa ilun bunem, tenebur bunem be, ereb taka bunem od to megeir wogouf. ãgenei yoya are de yo dogol gouf, ãgenei sãya are de sã dogol gouf. To dõ gouf are, es fiya bun ufaragouf.

Momoiya Bunem Kosẽya

¹³ ã atun taka ã morõ bun ibodok de? Age fouf, ã kosẽ youf bagai. ã atun taka wau al fef de? Age fouf, ã yana yaleseye nẽ seg yalediyouf.

¹⁴ ã atun taka dagi ado de? Age fouf, ã sios nẽ mudur adodo ã nigin kosẽ de fen, Odug yana bun ã mudur bun mouf fi difalauf nigin iwegnẽdiyof bagai.

¹⁵ Age fe di, momoiya bunem kosẽ def anim dagi tamo el fiyẽdig. Odug ã yalesnẽf. ã mosor inon ouf are, in mosor nigin weder tu kalauf.

¹⁶ Anĩ nigin, ãgenei mosor nigin abob mala bun kurõ wesig fen, abob nigin kosẽ ge di, ã karika walogouf. Madur tamo nẽ kosẽya are megeir ado fen, kabĩ yaledig.

¹⁷ Eliya ã tamo ada gen taka. ã uyẽ to isiyouf nigin total bagai kosẽ ye di, tenebur ein yar towo ogõ sigis uyẽ to isin.

¹⁸ ã baban kosẽ ye di, saa ilunem uyẽ isin, age fe di, tenebur nẽ saaf wowã yen.

¹⁹ Turau tar, ã atun taka, momoi nẽ naab kũ fen ken, fasikor fel, meteig ile di, takam ã momoi nẽ naab bun kel irousiyouf are,

²⁰ enei karĩ gouf, aibem taka ã mosor tamo yogon kũ fenẽya nẽ delẽ bun tamal falei fiyek are, yogon malakanon laa bun tamal kel yale fen, mosor musei ganan nigin weder tu keleya anĩ irou isif.

1 Pita

¹ Aya Pita, Jesus Kristus nē aposel, Negur igrnēdin anidi, tenebur ein yaũ tamo gen Pontus, Galesia, Kapadosia, Asia ado, Bitinia provins firagagaũ de difaref anidi bun pas enei atotof.

² Ā, ereb wōya sã mog, Negur Tamada nē keleĩ biya kilei igrneĩ di, Awa Uur nē kabĩ bunem fateul wõ gen, anĩ bunem, ā Jesus Kristus sigor dõg fen, yogon naud ā tetein wiri fen.

Wau ifenēya ado wau inosiya ā bun barikāf.

Mata Ibodōya Wau Iseya Nigin Negur Yana Yaleseya

³ Negur, neda Odug Jesus Kristus nē Tama yana talesauf! Yogon wau yūya odug bun, Negur ĩ Jesus Kristus laa bun tamal kel fã yen bunem, ada mata gõ fadan, are ada mata ibodōya wau iseya bun tele fen,

⁴ yogon akor, inanakeleya, bura leya be, sa keleya kisi feleya sã, ā nigin saa ilun dodok fen anĩ bun talauf nigin age fen.

⁵ Momoiya bunem, ā Negur nē megeir anim kulatun yeik ile, kel yaleya, idikeleya sain bun yaor foug nigin dodok fef anĩ, isiyouf.

⁶ Anĩ nigin, gama sain naal bagai, ā morõ fire fire anĩ bun wauĩ morõ yeĩdigeg, ā fatuk bagai wauĩ kulĩ yef.

⁷ Morõ eneidi ā bun isin are, āgenei momoiya, gol yã nem difalegefeg, sa keledig anĩ wal fiya wõ ye fen, āgenei momoiya anĩ, momoiya bagai yaore di, Jesus Kristus wõ youf sain bun, yana ifenēya, fula fiya medeĩya ado, yana yaleseya walogouf nigin agef isin.

⁸ Ā ĩ to ulegen, anĩ ere, ā ĩ nigin wauĩ laa fef. Ā gama ĩ to uleggef, anĩ ere, ā ĩ nigin momoi ge fen, wauĩ kulĩya dir feleya kisi feleya sã ado fula fiya medeĩya anim aura yeik,

⁹ ere nigin, ā āgenei momoiya nē kaũ, āgenei meleĩkanon kel yaleya anĩ mogo walegef.

¹⁰ Kel yaleya enei nigin, profet idi wau ifenēya ā bun isin anĩ nigin wogõ den anidi, fatuk bagai el de dimir ken,

¹¹ Kristus nē Uur idi bun ibodon anĩ, Kristus nē darau ado anĩ dumen isiyouf nē fula fiya medeĩya nigin profet od wogõ yen sain bun, ĩ ere nigin ado ereb sain nigin wogõ yen anĩ, idi keleĩ youf nigin age difen.

¹² Awa Uur Fateul saa ilunem sur fen anĩ bunem, soosi tamo idi biya od wogõ diyein anim ereb wogõ diyein, are engeleg dilouf nigin total bagai orodif anĩ nigin, profet idi wogõ den sain bun, idi dogo nigin sã, ā nigin aruna dalen anĩ, idi bun yaor fen.

Fateul Ubodõgouf

¹³ Anĩ nigin, dõ fiya nigin āgenei kisi dodok gouf. Ā aug nigin biya kulatun gouf. Jesus Kristus yaor foug sain bun, wau ifenēya ifeneĩf anĩ nigin āgenei wauĩ iseya barikāf.

¹⁴ Gere tar dõ fiya biya gen, sain ā neneya bun ubodõg fen, oroya sane ā walegen anĩ to dõ gouf.

¹⁵ Anĩ ere, Negur ā iweignein, ĩ fateul ibodok gen, ereb ā ago gef ganan bun fateul ubodõgouf,

¹⁶ ere nigin, Negur nē Itotoya eig ye irok, "Fateul ubodõg, ere nigin, aya fateul abodok."*

¹⁷ Ā, Dei anĩ kinau ya bunem tamo mugu mugu nē kabĩ to es fedig ĩ, uweignēgef, anĩ nigin, ā tenebur ein yaũ tamo gen, kumĩ ado aniniya anĩ bun, āgenei mata ubodõgouf.

¹⁸ Ere nigin, ā keleĩ, ā, mata ibodōya kaũ sã, tubuĩ tar bunem walegen anĩ bun tamal kel yaleyeyin, are silwa be gol age fediya gen, ereb bura lauf anĩ bunem sã,

¹⁹ anĩ ere, Kristus, sipsip naal amuyē sã, gerĩ tõ fiya taka sã anĩ nē naud biya bagai anĩ bunem kel yaleyeyin.

* **1:16:** Levitikas 11:44, 45; 19:2; 20:7

²⁰ Negur ereb ereb ganan kare fiya sã mog, ï igirnen, anï ere, ã nigin idikeleya sain enei bun ï yaor fen.

²¹ Kristus bunem, ã, Negur Kristus laa bun tamal kel turï fiye ken, fula fiya medeïya ifenen ï nigin momoi gen, anï nigin, ãgenei momoiya ado wauï iseya Negur bun ibodok.

²² Æ gama momoi anï dõ fiya bunem, aug nigin lilik ge fen, tureï tar nigin wauï laa fiya bagai walegen nigin, abob nigin fatuk bagai wauï bun wauï laa fouf.

²³ Ere nigin, ã bura leya nẽ faat bunem sã, to bura leya nẽ faat bunem baban gõ yein, are Negur nẽ od mata ibod ken, faimud ibodkeleya anï bunem age fen.

²⁴ Are Negur nẽ Itotoya eig ye irok kilei,

“Tamo ganan fisir gen,
agef fen, dogo neid fula fiya medeïya ganan kabier odõ munï gen.

Fisir gariri keleid fen, munï kuku redig,

²⁵ anï ere, Odug nẽ od faimud ibodkalauf.”†
Od enei are ã wogõ yein.

2

¹ Anï nigin, sane ganan, idegëya ganan, mala yaleya, kiyeï ado, du-men od irõya ganan urailagauf.

² Momou mata gõ fediya gen, uur nẽ sumin karëtut nigin fatuk bagai oroyeïf, ago ge di, ã anï bunem ãgenei kel yaleya bun odugouf.

³ Gama ã, Odug ï biya yeya anï, mogo wõg ulegen.

Mata Ibodõya Meein Ado Tamo Kayau Negurem Igirnëdin

⁴ Æ, ï mata ibodõya Meein, tamom dudum difiyen, anï ere, Negurem igirne ken, Negur mala bun biya bagai wõ yen anï bun usig fen,

⁵ ãg, mata ibodõya meein gen, uur nẽ fõ inoyeï di, pris fateul wõg fen, Jesus Kristus bunem uur nẽ

sesewi fiya Negur mala bun biya anï wenëdigouf.

⁶ Are Negur nẽ Itotoya eig ye irok kilei,

“Lo weleg, aya Saion oun meein taka, monog tor aya agirnen, biya bagai anï anof,

age afe di, taka ï, ï nigin momoi yef, ï mama to bagai yalouf.”*

⁷ Momoi gef ã bun, meein enei are biya bagai. Anï ere, idi to momoi def anidi bun,

“Meein fõ inoya tamom sane de fen, ditoron anï, gama monog tor wõ yen.”†

⁸ Agef fen,

“Ï, tamo yeid tũ fiya nẽ meein wõ ye fen, idi kuku douf nẽ sa tuwa anï wõ yen.”‡

Idi yeid tũ fef, ere nigin, idi od anï to dõ difef, areg Negurem idi age difouf nigin igirin.

⁹ Anï ere, ã tamo kayau Negurem igirnein, king nẽ pris, teneub fateul, Negur nẽ tamo kayau wowã gen, are ï ã gugum bun tamal iweignei ken, yogon lalan biya bagai bun irouleyein anï nẽ yana, ã walesagauf nigin, agog wõ gen.

¹⁰ Uruwa bun, ã Negur nẽ tamo kayau sã, anï ere, gama ã Negur nẽ tamo kayau. Uruwa bun, ã wau yüya to walegen, anï ere, gama ã mogo wau yüya anï walegen.

¹¹ Turau tar oboiyou, aya ã tenebur ein yaũ tamo ado urug tamo gen anï, mosor nẽ oroya meleïkanon geid kusï yedig anï so wiyëgouf nigin, totol bagai arokeneik.

¹² Æ haiden atun tobonuneï biya bagai bun ubodõge di, idi ã nigin sane ago gedig dedig anidi, ãgenei tobonuneï biya anï dile fen, Negur ada ki fadauf sain bun, idi Negur yana dalesauf.

Uyu Iroudiya Ado Odudug Farumen Ibodõya

† 1:25: Asaia 40:6-8 * 2:6: Asaia 28:16 † 2:7: Sam 118:22 ‡ 2:8: Asaia 8:14

¹³ Æ aug Odug nigin ge fen, megeir ganan tamo atun inodin anī farumen ubodōgouf, are king megeir ilun bagai ī farumen be,

¹⁴ gawaman nē mudur adodo idi, tamo sane age difef anidi darau difenēdiyof nigin ado, tamo tutuk age difef anidi yeneid dalesauf nigin, Negurem sur fedif anidi farumen ubodōgouf.

¹⁵ Ere nigin, Æ ereb biya ago gef bunem, kisi neneya tamo neid neneya wogōya anī foro dalauf, are Negur nē oroya.

¹⁶ Tamo kafī fiya sã ubodōgouf, anī ere, āgenei kafī fiya sã anī sane kerub fiya nē kabī bun to unogouf. Negur nē ferfer ubodōgouf.

¹⁷ Tamo ganan anini wiyēdigouf. Momoiya tureī tar nigin wauī laa fouf. Negur kumī ado anini wiyēgouf. Agog fen, king anini wiyēgouf.

¹⁸ Ferfer Æ, aniniya ganan ado āgenei odudug farumen ubodōgouf, idi biya fen, waud yūdig anidi dogol farumen sã, idi wau morō difeneīdig anidig farumen ubodōgouf.

¹⁹ Ere nigin, tamo taka ī gariya sã darau yalef sain bun, ī Negur nigin kisif fen, darau nē morō anī faali fouf, are biya.

²⁰ Anī ere, Æ mosor unogen nigin wagī fiya waleg fen, morō faali gouf are, Æ bun ere biya anī isiyouf? Anī ere, Æ ereb biya ago gen nigin darau waleg fen, anī faali gouf are, enei are Negur mala bun biya.

²¹ Enei bun Æ iweignein, ere nigin, Kristus Æ nigin darau yalen, are āg ī uleg fen, yogon delē anī dō gouf nigin age fen.

²² “Ī mosor taka to inon, age fe di, yogon sigor bun idegēya taka to dilen.”

²³ Sain idi ī kono difiyen, ī idi to solo fedin. Sain ī darau yalen, ī kumī to ifenēdin. Age fiya ban, ī yogo Negur tutuk es fedig ī ima bun inon.

²⁴ Neda mosor ī yogo bouwam aa tetek bun faali fen, are ada mosor

bun gare tau fen, madur bagai bun mata tabodōf nigin age fen. Yogon gudū fiyam Æ el yein.

²⁵ Æ sipsip gen fō yeleyan ulegen, anī ere, gama Æ sipsip marau, āgenei meleīkanon nē lo fiya tamo bun keg usigen.

3

Kayau Aiweid Tar Geid

¹ Kayau Æ, age fiya bagai, aiweī tar farumen ubodōgouf, ago ge di, aib idi biya od nigin to momoi defeg, idi irokenēdiya bunem sã, nedi kayau tar neid tobonuneid bunem kel yalediyof,

² are idi āgenei tobonuneī karētut ado aniniya anī dile fen, momoi douf.

³ Āgenei meli meli, mayarē naki anī, fatiya korif ifōya, gol sai ifonūya be, kolos biya ifonūya age fediya bunem to isiyouf.

⁴ Age fiya ban, āgenei meli meli, Æ namein uur molol ado imatēya anī nē meli meli to inanakalauf, are Negur mala bun odug bagai anī bunem isiyouf.

⁵ Naab enei bun, fateul kayau kulu temeleid idi, Negur bun waud dinon anidig, dogo nigin meli bagai wowā douf nigin age difedig. Idi dogo neid aiweid tar farumen dibodōdig.

⁶ Sara ī Abraham sigor dōf fen, ī nigin yogon odug yedig gen, Æ ereb madur agog fen, kumī farumen to ubodōgouf are, Æ ne barai tar wowā gef.

⁷ Tamo āg, age fiya bagai, aiweī tar geid ubodōg fen, idi nigin kisi gouf, are idi forōya nigin tamo wal fiya sã, idi dum mata ibodōya nē ege luwa wau ifenēya, Æ weim walogouf nigin, aniniya ado ago wiyēdigouf, ago ge di, āgenei kosēya, ereb takam to naabura gudū fouf.

Biya Age Fiya Nigin Darau Yaleya

⁸ Od idīya nigin, Æ ganan abob geid wauī tekelei bun ubodōgouf. Abob nigin wauī ūgouf. Tureī tar gen abob

nigin wauĩ laa foug. Wauĩ yũya ado wauĩ yukesileya bun ubodõgouf.

⁹ Sane anĩ sane bunem be, kono fiya anĩ kono fiya bunem to solo gouf, anĩ ere, el fiya bunem solo gouf, ere nigin, ã ago ge di, el fiya anĩ walougouf nigin, ã enei bun iweignein.

¹⁰ Are Negur nẽ Itotoya eig ye irok kilei,

“Aib ã mata nigin wau laaf fen,
naa biya ilouf,

ĩ yogo bale sane wogõya bun tamal
so fiye ken,

yogon sigor idegẽya wogõya bun
tamal so fiyẽf bagai.

¹¹ Ì sane itor ken, biya age foug bagai.

Ì maror imir ken, anĩ dõ foug
bagai.

¹² Ere nigin, Odug nẽ malam tamo
madur bagai lo fedidig,
agef fen, yogon weder dogo neid
kosẽya anĩ karĩ yedig.

Anĩ ere, Odug nẽ nawa, idi sane
age difef anidi bun dudum
fiyẽdidig.”

¹³ ã biya age fiya nigin kabĩ total
walougouf are, aim anĩ ã sane yeĩf?

¹⁴ Anĩ ere, ã ereb madur nigin
darau walougoufeg, ã el yeik. “Ereb
idi kumĩ def anĩ to kumĩg, to morõ
yeĩf.”*

¹⁵ Anĩ ere, ãgenei wauĩ bun Kristus
ĩ Odug unougouf. Idi wauĩ iseya ã
namein ibodok anĩ nẽ gariya karĩ
douf nigin to diyeik anidi ganan
solog urokenẽdigouf nigin, faimud
dodok gouf. Anĩ ere, molol ado
aniniya bunem enei agog fen,

¹⁶ kisi karẽtut walougouf, ago ge
di, idi Kristus bun ãgenei tobonuneĩ
biya nigin od sane wogõ def anidi,
dogo neid dumen od wogõya nigin
mama fediyouf.

¹⁷ Biya age fiya nigin darau yaleya,
are Negur nẽ orouauf, enei are, sane
age fiya nigin darau yaleya anĩ wal
fiya, are biya bagai youf.

¹⁸ Kristus ã, sain tekelei dogol,
mosor nigin laa fen, ã madur tamo
anĩ, idi madur sã tamo nigin laa fen,

are ã, ã Negur bun irouleyeĩf nigin
age fen. Ì bouwa dukesin, anĩ ere,
Awa Uur bunem mata ibodon.

¹⁹ Awa Uur bunemeg ã ile fen, uur
kalabus bun dibodon anidig wogõ
fiyẽdin.

²⁰ Eneidi are, kulu Noa nẽ sain bun,
waag ifot mog, Negur idi nigin feseya
sã tari fedidig, anĩ ere, idi fe den.
Waag anĩ namen, tamo kayau musei
sã, ganan eit dogol naan bunem kel
yaledin.

²¹ Naan enei are, naan igũya, gama
Jesus Kristus nẽ mata kel fãya bunem
ãg kel yaleyeik anĩ nẽ malakanon,
are bouwa bun amuyẽ yaleleya sã,
are Negur bun kisi karẽtut biya in-
oya.

²² Jesus Kristus ã saa ilun isel fen,
Negur ima biyalẽ ibodok, age fe
di, engel, yeneid adodo ado, megeir
ganan ã farumen dibodok.

4

Negur Nigin Mata Ibodõya

¹ Anĩ nigin, Kristus ã yogo bouwa
bun darau yalen nigin, ã augeg yo-
gon kisi de tekelei anĩ urougouf, ere
nigin, taka ã yogo bouwa bun darau
yalen, ã mosor inoya nigin folõ felen.

² Agef fen, ã tenebur ein yo-
gon mata ibodõya fau ibodok bun,
tamo bouwa nẽ oroya nigin to mata
ibodõf, anĩ ere, Negur nẽ oroya nigin
mata ibodõf.

³ ã kulu sain meluk bagai, ereb
haiden age difedig anĩ, ago gedig, idi
bouwa nẽ oroya nigin total sane wau
fãya, noli kisi, aai yõya, bilãya, mala
odug bun naan yõya ado, idegẽya
waitou yana yaleseye sane bagai bun
dibodõdig.

⁴ ã idi geid, idi sane bagai age
difedig anĩ bun to ulege di, idi anĩ
dile fen, terẽ def, age de fen, idi ã
nigin od sane wogõ def.

⁵ Anĩ ere, idi, Negur idi mata di-
bodok anidi ado idi gare den anidi es
fediyouf nigin dodok fef ã bun, dogo
nigin kurõ difeis dirokenẽf.

* **3:14:** Asaia 8:12

⁶ Enei nigin, biya od anī, idi gama mogo gare den anidig wogō fiyēdin, are idi bouweid bun, tamo gen es feid fen, dogo neid uur bun, Negur mata ibodok gen mata dibodōf nigin age fen.

⁷ Ereb erob ganān nē idikeleya naa mogo melsak. Anī nigin, ā kosē gouf nigin, kisi el ge waleg fen, aug nigin biya kulatun gouf.

⁸ Anī ganān wal fiya, abob nigin fatuk bagai wauī laa foug, ere nigin, wau laa fiya are mosor musei kerub fedidig.

⁹ Nauseirya sā, abob el ge waledigouf.

¹⁰ Ā mugu mugu, Negur bunem ege luwa walegen anī bunem, Negur nē wau ifenēya fire fire nē lo fiya tamo dō fiya biya gen, abob aruna walogouf.

¹¹ Aib taka ī od wogō yef, ī Negur nē od bagai wogōya gen wogō youf. Aib taka ī aruna yalef, ī megeir Negur ī ifenek anī bunem age foug, are erob erob ganān bun, Jesus Kristus bunem, Negur yana dalesauf nigin age foug. Ī bun fula fiya medeīya ado megeir gai gai ibodkalauf. Momoi.

Momoiya Tamo Ibodōya Nē Darau

¹² Turau tar oboiyu, ā darau yā isaīneī geneg gama walegef anī nigin, erob urug ā bun wōya gen to terē gouf.

¹³ Anī ere, ā Kristus geid darau walegef nigin wauī kulī youf, ago ge di, ā yogon fula fiya medeīya anī yaor foug sain bun, wauī fatuk bagai kulī youf.

¹⁴ Ā Kristus yana nigin de fen, kono diyeīf, ā el yeik, ere nigin, fula fiya medeīya nē Awa Uur, are Negur nē anī ā bun ibodok.

¹⁵ Ā darau walogouf, are tamo yukesiya tamo, bē tamo, tamo tobonā sane fire fire dinodig be, baula fiya tamo, nedi darau gen sāf.

¹⁶ Age fiya ban, ā momoiya tamo nigin darau walogouf are, ā to mama

yeī, anī ere, ā Negur yana anī urougef nigin ī yana walesagauf.

¹⁷ Ere nigin, sain eī, Negur nē ibor bun, es fiya gariya inoya nē. Es fiya anī ada bun gariya inof are, idi Negur nē biya od to dō difedig anidi bun ere anī wō youf?

¹⁸ Are Negur nē Itotoya eig ye irok kilei,

“Madur tamo kel yalediya nigin malai bagai youf are, tamo momoiya sā ado mosor temeleid nigin ere anī wō youf?”*

¹⁹ Anī nigin, idi Negur nē oroya bunem darau dalef anidi, idi dogo, Negur kare fedin yogon od dō fiya biya, ī ima bun dino fen, toku erob biya anī age difef dilauf.

5

Sios Nē Uyu Iroudiya Ado Kesu Oosi Bun

¹ Sios nē uyu irouya ā atun dibodok bun, aya, uyu irouya tureī, Kristus nē darau ail fen, kurō afe-sidig ado, fula fiya medeīya fau yaor foug weim talouf anī, ā arokeneik.

² Negur nē sipsip ā farumen dibodok anī nē lo fiya tamo wōg fen, kabī mala nigin ge fen to lo wedigouf, anī ere, ā wauī iro ken, Negur ā ago gouf nigin orof kilei lo wedigouf. Moni nigin ge fen, to ago gouf, anī ere, aruneid yaleya nigin bagai fen, ago gouf.

³ Idi ā gem lo wedigouf nigin inodin anidi to nugo wiyēdigouf, anī ere, ā sipsip dileyei ken, dō diyeīf nē tobonuneī bun ago gouf.

⁴ Agog mog, sipsip lo fiya tamo neid mudur wō youf sain bun, ā fula fiya medeīya nē teter to bagai tu ralauf anī walogouf.

⁵ Age fiya bagai, kesu oosi ā, biyeid uyu irouya farumen ubodōgouf. Ā ganān, abob nigin wauī yukesileya anī ufonūgouf, ere nigin,

* 4:18: Proveb 11:31

“Negur ĩ yeneid dalesef anidi kiwai
gen iledidig,
anĩ ere, ĩ waud yukesileya anidi
wau ifenēdidig.”*

⁶ Anĩ nigin, Negur nē ima megeir
barikā farumen wauĩ ukalaisileg
ubodōgouf, ago ge di, ĩ ā yogon sain
bun yalesneif.

⁷ Āgenei suwēya ganan ĩ bun uno-
gouf, ere nigin, ĩ ā nigin suwē yedig.

⁸ Ā aug nigin biya kulatun ubodōg
fen, lo walagauf. Āgenei kiwai, Satan
ĩ laion ninirā ye fen, taka yakasiy-
ouf nigin mumul katĩ fedig gen, age
fedig.

⁹ Momoiya bun total ufareg fen, ĩ
wal fiya nigin teĩbir gouf, ere nigin, ā
keleĩ, ā tureĩ tar teneub ganan bun,
darau de tekelei age fiya anĩ daledig.

¹⁰ Ago ge di, wau ifenēya ganan nē
Negur ĩ, ā Kristus bun, yogon fula
fiya medeīya faimud ibodkeleya bun
iweignein ĩ, ā sain naal darau walege
di, ĩ yogo baban yalesnei ken, ā kisi
feleya bagai total, megeir ado, feseya
sā wōya nigin age fouf.

¹¹ ĩ bun megeir gai gai ibodkalauf.
Mmoi.

Idikeleya Nē Aanya

¹² Sailas, ĩ aya turau dō fiya biya
gen kisi afedig, in isennēya bunem,
aya ā tobega bagai atotkenein, anĩ
bunem, aya ā wauĩ ales fen, enei
ā gama walegef anĩ momoi bagai
Negur nē wau ifenēya au fen, kurō
afesin. Anĩ bun total ufaragauf.

¹³ Sios Babilon ibodok, ĩ ā geid
weim igirnein, ĩ ā bun yogon aanya
sur fef, age fe di, neu kesu Mak ĩg age
fef.

¹⁴ Wauĩ laa fiya bunem, abob umā
wiyēg fen, aan gouf. Ā Kristus bun
ufaregef anĩ ganan bun, wau inosiya
ibodōf.

* 5:5: Proverb 3:34

2 Pita

¹ Aya Simon Pita, Jesus Kristus nē ferfer fen aposel,

idi neda Negur ado Isennadaya, Jesus Kristus nē madur bagai bunem momoiya meli bagai neda gen dalen anidi bun, pas enei atotof.

² Ā, Negur ado neda Odug Jesus nigin keleī bunem, wau ifenēya ado wau inosiya ā bun barikāf.

Negur Ī Ada Yogon Igirnadān

³ Negur ĩ yogon fula fiya medeīya ado biya bunem iweignadan, ada ĩ nigin keleī bunem, ada Negur nē oroya bun mata tabodōf nigin, ereb lau tafef anī ganān yogon megeir anim ifanadan.

⁴ Enei bunem, ĩ ada yogon promis od, odug fen meli bagai andi ifanadan, are anī bunem ā Negur nē tobonunā bun bagai ufareg fen, bouwa nē oroya sanem teneub ganān daū fen anī utorōgouf nigin age fen.

⁵ Age fiya nigin, āgenei momoiya bun, biya anī tobol fiya nigin kabī tofol walogouf, agog fen, biya bun, keleī tobol fiya nigin,

⁶ agog fen, keleī bun, aug nigin biya kulatun ibodōya tofol fiya nigin, agog fen, aug nigin biya kulatun ibodōya bun, feseya sā ifareya tofol fiya nigin, agog fen, feseya sā ifareya bun, Negur nē oroya bun ibodōya tofol fiya nigin,

⁷ agog fen, Negur nē oroya bun ibodōya bun, abob geid nical yūya tofol fiya nigin, agog fen, abob geid nical yūya bun, wau laa fiya tofol fiya nigin kabī tofol walogouf.

⁸ Ere nigin, ā tobonunā enei ganān waleg fen, tofol gouf are, ā neda Odug Jesus Kristus nigin keleī yaleya bun kabī biya kaū ado walogouf.

⁹ Anī ere, taka ĩ eneidi taka to yalouf, ĩ melsā nigin dogol ilya kisi feleya fen, mala ifofakeleya, agef fen,

ĩ yogon mosor kulu tamal bun tamal lilik fiyekelen anī weder tu kelen.

¹⁰ Anī nigin, turau tar, Negurem ā iweignei ken, igirnein anī tutuk bagai keleī youf nigin, kabī tofol walogouf. Ere nigin, ā enei ago gouf are, ā to bagai kubū gouf.

¹¹ Ago ge di, ā, neda Odug fen Isennadaya, Jesus Kristus nē tano mata gai ibodkeleya bun, ilya nigin lakī fiya taka to ibodōf.

Negur Nē Itotoya Nē Profet Od

¹² Anī nigin, ā enei nigin keleī ken, momoiya ā gama ado anī bun tofol ufaregef, anī ere, aya enei nigin kisi gouf nigin, faimud wedereī fokō afouf.

¹³ Aya kisi afef, aya bouwau enei nē salafat bun abod mog, āgenei kisi turī afouf, are tutuk,

¹⁴ ere nigin, aya mogo, neda Odug Jesus Kristus kurō feis irokanan nigin, aya keleī, aya mogo melsā yerin awaikalauf.

¹⁵ Anī nigin, aya ā atorneī mog, ā faimud enei karī walagauf nigin kabī tofol alouf.

¹⁶ Amā, neda Odug Jesus Kristus nē megeir ado isiya nigin ā marokenein sain are, amā nemā kisim tamo nē nenerī anī to wogō mayein, anī ere, amā malamam bagai yogon fula fiya medeīya nē megeir mailen anī wogō maun.

¹⁷ Ait are Negur fula fiya medeīya megeir ado bunem ĩ bun isi fen, iron, “Eī neu Kesu, ĩ nigin aya wau laa fedig, ĩ nigin aya wau kulī yedig,”* sain anī bun, ĩ, Tama Negur bunem, yana odug ado fula fiya medeīya yalen.

¹⁸ Amā ĩ geid arei fateul bun mafar mog, ait enei saa ilunem isi mog, amā mug bagai karī maun.

¹⁹ Agef fen, ada, profet neid od are momoi anī, megeir tafe, momoi tauf, are lalan gugum modoū bun, we fef ile, we kasasa fe fen, bonimeī nē barisa wauī bun fā youf gen, ā profet neid od karī weleg fen, el ge dō gouf are, ā biya ubodōgouf.

* 1:17: Matyu 17:5; Mak 9:7; Luk 9:35

²⁰ Ereb odug bagai are eig fiya, ā keleī youf, Negur nē Itotoya nē profet od taka, tamo nē kisim to faded foug.

²¹ Ere nigin, profet od, tamo nē oroya bunem to wogō den, anī ere, tamo Awa Uur Fateulem ulum iroukenēdi di, Negur bun tamal od dale fen, wogō den.

2

Idegēya Tise Ado Idi Daū Fediya Nigin

¹ Anī ere, tamo kayau atun idegēya profeteg difaren, age fiya gen, ā atun idegēya tise dibodōf. Idi fau tamo kayau daū fediya nē idegēya od anī iminēyan difelneīf, Odug na yaledin ī anī wa de fen, idi dogo bun kaisā bagai daū feidleya anī dinouf.

² Musei dogo neid tobonuneid sane dō de fen, momoi nē naab are naabura gudū difouf.

³ Dogo naumeid nigin, tise eneidi nenerī dogo neid kisim wogō diyei ken, safineī gei difouf. Negur idi mogo es fedin, agef fen, idi daū fediya nē are mogo isiyouf.

⁴ Negur ī engel mosor dino di, to isenneīd fen, hel bun sur fiyēdin, dumen es fediyouf nigin ku gugum keleya bun inenēdin.

⁵ Negur ī kulu tenebur nē tamo kayau to isenneīd fen, tamo kayau idi Negur nē to difaren anidi bun kuwei sur fen, anī ere, ī, Noa madur bagai nigin wogōya tamo ado, sewen anidi geid ahaha fedin.

⁶ Negur ī, Sodom taun ado Gomora taun, yam yakur feid aasu ileya bunem daū feidlen, are tamo kayau Negur nē to difaref anidi bun, ereb wō youf anī ifelnēdiyof nigin age fen.

⁷ Negur ī, Lot madur tamo, tamo lo to dō difedig anidi neid tobonuneid sane nigin wau morōdig ī ahaha fiyen

⁸ (ere nigin, madur tamo are, naa ganan bun, idi atun ibod ken, tobonuneid sane ilen ado karī yen anī

bunem, yogon malakanon madur anī darau yalen).

⁹ Age fiyauf are, Odug ī naig fe fen, tamo Negur nē dibodok anidi, morō bun tamal yaleneīd fen, tamo Negur nē to dibodok anidi, darau bun ironēdif ile, es fiya nē naa bun ileya nigin anī keleī.

¹⁰ Negur ī, idi bouwa nē oroya sane dō de fen, Odug nē yana lai difedig anidi bun, momoi bagai age foug.

Idi kumī sā ado, dogo yeneid dalesedig. Idi, engel megeir adodo nigin bou yūya od wogōya nigin to kumī dedig.

¹¹ Anī ere, engeleg dogo neid total ado megeir odug bagai nigin tamo eneidi wal fediya, Odug mala bun, engel megeir adodo age fediya nigin bou yūya od to wogō dedig.

¹² Anī ere, tamo eneidi, ereb idi keleī sā nigin kono difedig. Idi gaar kuī kisi sā, bouwa nē oroya dogol dō dife di, tamom kaka difeid fen, didenkesiyouf nigin dogol gō difedig anidi gen. Gaar kuī gen, idig daū fediyouf.

¹³ Idi sane age difen kilei, mala solo sane dalouf. Idi gaa atun bouwa nē oroya sigigi fiya nigin orodidig. Idi amuyē ado gerī tō fiya. Idi ā geid sifa dino fen, nedi bouweid nē oroya sigigi difedig.

¹⁴ Idi meleid bun seseirā tobonunā barikā ado fen, mosor inoya nigin to bagai ditorōdig. Idi, tamo kayau total sā difaref anidi, didī difedig. Idi safina musei youf nigin imeid su lai de fen sū we fiya nigin keleī bagai. Idi daū feidleya nē gere tar.

¹⁵ Idi naab madur anī ditor ken, Beor naal, Balam ī sane nē mala solo nigin wau laa fedig anī nē naab dō difouf nigin fasis difen.

¹⁶ Anī ere, ī donki, gaar kuī wogōya kisi feleya sā anim, yogon kū fenēya nigin ou fiyen, donki ī tamo nē ait nem wogō ye fen, profet anī nē neneya kisi katū fiyen.

¹⁷ Tamo eneidi, naan warur gere keleya gen ado, ogou uyē yau total ado bunem irou isidig gen. Modoū

gugum keleya bagai anī, idi nigin saia fen.

¹⁸ Idi yana yaleseya od kaũ sā wogō de fen, tamo kayau idi kũ fenēya bun dibodok anidi bun tamal, mogo diyawof anidi, bouwa nē oroya, noli nigin kisi fāya bunem didī difedidig.

¹⁹ Tamo sane eneidi, tamo kayau karika ibodōya mafeneif de diro-kenēdidig, anī ere, idi dogo sane nē ferfer, ere nigin, tamo ī, ereb ī wal fiyek anī nē ferfer.

²⁰ Idi, neda Odug ado Isennadaya, Jesus Kristus kelei ken, tenebur nē sane bun tamal soso dife di, baban tenebur nē sanem fili feid fen, wal fediyouf are, idi gariya bun sane dibodon anī wal fiya, idikeleya bun sane bagai dibodōf.

²¹ Idi madur bagai nē naab anī kelei ken, itāfiya fateul idi imeid bun dinon anī dudum difem are, idi madur bagai nē naab anī to keleim, are dem.

²² Od biya tamo kayau wogō dedig are, idi nigin momoi, “Gaũ yogon iluf anī kel yōdig,”* takag, “Bor naan igu kel fen, baban ile ed igūdig.”

3

Odug Nē Naa

¹ Turau tar oboiyou, eī neu pas baban ā bun sur afef. Aya pas uru enei atotodin are, kisi biya turī akeneī di, wedereī fokō youf nigin age afen.

² Aya, od profet fateul kulu wogō den ado, itāfiya neda Odug ado Isennadaya, āgenei aposel bunem ifenein anī, ā karī walagauf nigin orouf.

³ Ā uyulil enei kelei youf, idikeleya naa bun, kono temeleid disiyouf, idi disi, kono de fen, dogo neid oroya sane dō difouf.

⁴ Idi dirōf, “Ī asiyouf yen promis od anī nain? Amā nemā tamamā tar gare den bunem isif, ereb ereb ganan uruwa bun kare fen gen, agef yenek.”

⁵ Anī ere, idi, kulu bagai Negur nē od bunem saa wō ye fen, teneub

naan bun tamal ado naan nem kare fen anī, karī del fen, wedereid tu kelen.

⁶ Naan anim, kuwei fā ye fen, sain anī bun teneub ganan daũ felen.

⁷ Od de anim, saa ado teneub gama tailef are, yā nigin faraf foi fen, agef fen, tamo kayau momoiya sā es fiya ado daũ feidleya nē naa nigin inon ibodok.

⁸ Anī ere, turau tar oboiyou, ereb tekelei enei to wedereī tu kalauf, Odug bun naa tekelei are tausen yar gen, agef fen, tausen yar are naa tekelei gen.

⁹ Odug ī, yogon promis od kisi falauf nigin, tunī age dedig gen, to foi yedig. Ī taka daũ feleyan ileya itor ken, ganan waud falei fouf nigin, sain meluk tari yeīdig.

¹⁰ Anī ere, Odug nē naa are, bē tamo gen isiyouf. Saa gududū ye fen, iwaikalauf, ereb ereb nanaal teneub inon are ganan yam daũ falauf, agef fen, teneub ado ereb ereb ganān ī bun ibodok are yaor fouf.*

¹¹ Naab enei bun, ereb ereb ganān daũ falauf, anī nigin, ā tamo kayau naig fiya bagai wōya nigin kisi gef? Ā fateul ubodōg fen, Negur nē tobonunā bun ubodōgouf.

¹² Ā, Negur nē naa tarig fen, kaisā bagai isiyouf nigin ololo gouf. Naa anī bun, yam saa daũ falauf, ereb ereb nanaal teneub inon are uruwam naan kalauf.

¹³ Anī ere, ada yogon promis od tarou fen, saa mata ado teneub mata ololo tafef, are madur tamo kayau an dibodōf.

¹⁴ Age fiya nigin, turau tar oboiyou, ā enei tari gef nigin, Odug mala bun amuyē sā, od sā wowāg fen, ī ado wauī katō gouf nigin kabī total walo-gouf.

¹⁵ Āgenei kisi bun, neda Odug sain meluk tari fiya are, kel yaleya nigin gouf, are neda turada oboida Pol ĩg Negur kisi biya ifenē di, ā bun pas itoton kilei.

* 2:22: Proverb 26:11 * 3:10: Itotoya tunī eig de ditoton: are yakur falauf.

¹⁶ Ī yogon pas ganan bun, eig fe ito-
toid fen, enei nigin wogõ yen. Yogon
pas bun, ereb ereb tunĩ keleĩya nigin
lakĩ fiya bagai ibodok, are idi keleĩ sa
ken, momoiya ilef isif anidi, Negur
nẽ Itotoya tunĩ bun age difedig gen,
falei difeid fen, dogo daũ feidleya
bun diledig.

¹⁷ Anĩ nigin, turau tar oboiyou, ã
enei mogo keleĩ nigin, lo wal fiya
tamo neid kũ fenẽyam to guri diyeyi
ken, dile āgenei modoũ biya utorõg
fen, kubũ geya nigin lo welegei.

¹⁸ Anĩ ere, neda Odug ado Isenna-
daya, Jesus Kristus nẽ wau ifenẽya
ado keleĩ bun, odugouf. Ī bun fula
fiya medeĩya gama ado faimud ibod-
kalauf! Momoi.

1 Jon

Mata Ibodōya Nē Od

¹ Are ī gariya bun tamal, are amā mogo karī maun, are amā mogo malamam mailen, are amā mogo mail fen, amā imamam kobū mafenanī amā mata ibodōya nē Od mau fen, kurō mafesif.

² Mata are wō yen. Amā anī mail fen, anī nigin kurō mafesif. Age mafe fen, amā, mata ibodkeleya ī, Tama ado dibod ken, amā bun wō yen anī, ā yaor mafe marokeneik.

³ Amā ereb mailen ado karī maun anī, ā yaor mafe marokeneik, are āg amā geid nīgal taūf nigin age mafef. Age fe di, neda nīgal yūya are, Tama ado yogon Naal Jesus Kristus geid nīgal taūf.

⁴ Amā nemā waumā kulīya barikāf nigin enei matotof.

Lalan Bun Iyōya

⁵ Od enī, amā ī bun tamal karī mau fen, ā yaor mafe marokeneik: Negur ī lalan, ī bun gugum taka to ibodok.

⁶ Ada ī geid nīgal tauk tau fen, gugum bun tayōf are, ada tadeg fen, momoi anī bunem to tabodok.

⁷ Anī ere, ī lalan bun ibodok gen, adag lalan bun tayōf are, ada abob geid nīgal taūf, age tafe di, Negur Naal, Jesus nē naud anim, mosor ganan bun tamal kulo fadalauf.

⁸ Ada mosor sā tauf are, ada dug tadeg ken, momoi anī ada namedan ibodōya sā.

⁹ Ada neda neda mosor kurō tafalaisiyouf are, ī yogon od dō fiya biya fen, madur bagai, anī nigin, ī fau neda mosor nigin weder tu kel fen, ada neda madur bagai sā anī ganan bun tamal kulo fadalauf.

¹⁰ Ada mosor to tanon tauf are, ada, Negur ī idegēya tamal tau fen, in od ada namedan to ibodok.

2

Kristus Ī Ada Isennadaya

¹ Neu kesu tar, ā mosor to unogouf nigin, aya enei atotkeneik. Anī ere, taka ī mosor inouf are, taka ada isen-nadauf nigin yogon Dei irokenēdig anī ibodok, ī Jesus Kristus, madur bagai.

² Ī neda mosor nigin Negur nē didi yo fiya nē sesewi fiya, are neda mosor nigin dogol sā, anī ere, tenebur tamo kayau ganan neid mosor nigin.

³ Ada keleī, ada yogon itāfiya dō tafef are, ada mogo ī keleī.

⁴ Tamo ī aya ī keleī ye fen, ereb ī irok anī to dō fouf are, ī idegēya tamo, agef fen, momoi anī ī bun to ibodok.

⁵ Anī ere, taka ī yogon od dō fef are, Negur nē wau laa fiya are momoi bagai ī bun kisi felef. Anī bunem, ada ī bun tabodok anī ada keleī.

⁶ Aib taka ī bun abodok yef, ī Jesus age fedig gen age fouf bagai.

Ītāfiya Mata

⁷ Turau tar oboiyou, aya itāfiya mata to atotkeneik, anī ere, itāfiya tubu, are abob nigin wau laa fiya anī, ā uruwa Jesus nigin momoi gen sain bunem karī gen. Ītāfiya tubu enei are, od ā karī gen anī.

⁸ Anī ere, aya itāfiya mata atotkeneik, are anī nē momoi anī, ī bun ado ā bun mogo ulegef, ere nigin, gugum mogo iwaikele di, lalan momoi bagai anī mogo so fef.

⁹ Taka ī lalan bun abodok ye fen, yogon tura nigin to orof, ī fau gugum bun ibodok.

¹⁰ Aib taka ī yogon tura nigin wau laa fef, ī lalan bun ibodok, age fe di, ereb anim ī ye tū fiya nigin, ī bun taka to ibodok.

¹¹ Anī ere, aib taka ī yogon tura nigin to orof, ī gugum bun ibod ken, gugum bun iyōdig. Ī narib ilef anī, ī keleī sā, ere nigin, gugum anim ī mala ifofakelen.

¹² Aya kesu tar ā atotkeneik, ere nigin, āgenei mosor in yana bunem weder tu kelen.

¹³ Aya tama tar ā atotkeneik,

ere nigin, ā ī gariya bun ibodok anī keleī.
 Aya kesu oosi ā atotkeneik,
 ere nigin, ā sane anī mogo wal gen.
¹⁴ Aya kesu tar ā atotkeneik,
 ere nigin, ā Dei anī mogo keleī.
 Aya tama tar ā atotkeneik,
 ere nigin, ā ī gariya bun ibodok anī keleī.
 Aya kesu oosi ā atotkeneik,
 ere nigin, ā total ado,
 age fe di, Negur nē od ā bun ibodok,
 age fe di, ā sane anī mogo wal gen.

Teneub Ein Nē Nigin To Wauī Laa Fouf

¹⁵ Ā teneub enei be, ereb taka tenebur ibodok anī nigin to wauī laa fouf. Taka ī teneub enei nigin wau laa fouf are, Dei nē wau laa fiya ī bun to ibodok.

¹⁶ Ere nigin, ereb ereb ganan tenebur ein ifaref-mosor tamo nē oroya, yogon mala ile oroya ado, ereb ī ado fen ereb ī age fef anī nigin yana yaleseya-are Dei bun tamal to isif, anī ere, tenebur tamal isif.

¹⁷ Teneub ado yogon oroya are sa kalauf, anī ere, tamo Negur nē oroya dō fef, ī mata ibodkalauf.

Kristus Nē Kiwai Tar Nigin Weder Irouya

¹⁸ Neu kesu tar, sain enei are idikeleya sain. Kristus nē kiwai isif anī, ā mogo karī gen, age fiya gen, gamag Kristus nē kiwai tar musei disin. Anī bunem, sain enei are idikeleya sain anī, ada keleī.

¹⁹ Idi uruwa bun, ada geid tabod ken, ada bun tamal dilen, anī ere, idi momoi bagai neda sā. Ere nigin, idi nedam are, idi ada geid tabodom. Anī ere, idi ada bun tamal dilen anim, idi ganan neda sā anī yaor fen.

²⁰ Anī ere, ā, Kristus ī Fateul anī bunem, Awa Uur Fateul waleg fen, ā ganan momoi anī keleī.

²¹ Aya ā momoi anī keleī sā nigin to atotkeneik, anī ere, ā momoi anī keleī nigin ado, idegēya taka momoi

anī bun tamal to isif nigin, aya ā atotkeneik.

²² Ai anī idegēya tamo? Tamo, Jesus ī Kristus yeya anī wa fef anī. Tamo age fiya, are Kristus nē kiwai. Ī, Dei ado Naal wa fedif.

²³ Taka ī Naal wa fef, ī bun Dei sā. Aib taka ī Naal kurō fesif, ī bun Deig ado.

²⁴ Ereb ā gariya bunem karī gen anī, ā bun agef ibodōf nigin lo wala-gauf. Ago gouf are, ā Naal bun ado Dei buneg ubodōgouf.

²⁵ Agef fen, enei anī ereb ī age afouf fadan, are mata ibodkeleya.

²⁶ Aya, idi ā kū fenēya bun dirouleyeīya nigin age difef anidi nigin, enei atotkeneik.

²⁷ Ā nigin, Awa Uur Fateul ā ī bun tamal walegen are, ā bun ibodok, age fe di, aib takam ā ifelneīya nigin lau fiya taka to ibodok. Anī ere, yogon Awa Uur Fateul anim, ereb ereb ganan nigin ā ifelneīdig. Age fe di, Awa Uur Fateul anī momoi bagai, idegēya sā, anī nigin, ā ifelnein kilei anī, ī bun ubodōgouf.

Negur Nē Gere Tar

²⁸ Neu kesu tar, gama ī bun agog ubodōgouf, ago ge di, ī wō youf sain bun, ī isi di, ī mala bun, ada kumī sā ado mama sā tafarauf.

²⁹ Ā, ī madur bagai anī keleī youf are, ā keleī, tamo idi ereb madur age difef anidi ganan ī bunem gogū fedin.

3

¹ Tamada, ada bun, wau laa fiya fatuk bagai ifanadan, anī nigin, Negur, ada in gere tar yedig. Are ada age fiya. Teneub enei ada nigin keleī sā, ere nigin, teneub enei ī nigin keleī sā.

² Turau tar oboiyou, ada gama Negur nē gere tar. Age fe di, ada naig be fiya bagai wowā tauf, are fau yaor fiya sā. Anī ere, ada keleī, ī isyouf sain bun, ada ī gen wowā tauf, ere nigin, ada ī bagai anī tailauf.

³ Aib taka ī bun wau iseya anī ado, ī karētut bagai gen, ī yogo karētut ouf.

⁴ Aib taka mosor inof, ï lo wal fef. Momoi bagai, mosor are lo wal fiya.

⁵ Anï ere, ã keleï, ï ada neda mosor yalelauf nigin wõ yen. Agef fen, ï bun mosor sã.

⁶ Taka ï bun ibodok, ï mosor to inof iledig. Taka ï mosor inof iledig, ï to ilen be, oo, ï nigin keleï san.

⁷ Neu kesu tar, ã takam to idegneïf. Aib taka ï ereb madur age fef, Odug ï madur bagai gen, ï madur.

⁸ Aib taka ï ereb mosor age fef, ï Satan nẽ, ere nigin, Satan ï gariya bunem mosor inof isin. Negur Naal ï, Satan nẽ kabï anï daũ falauf nigin wõ yen.

⁹ Taka Negur bunem gõ fen, ï mosor to inof iledig, ere nigin, Negur nẽ faat ï bun ibodok. ï mosor inof ileyã kisi feleyã sã, ere nigin, ï Negur bunem gõ fen.

¹⁰ Ada ai anï Negur nẽ gere tar ado, ai anï Satan nẽ gere tar anï, naig tafe keleï youf, are eig fiya. Aib taka ï ereb madur to age fef, ï Negur nẽ kesu sã, aib taka ï yogon tura nigin to wau laa fef, ïg Negur nẽ kesu sã.

Abob Nigin Wauï Laa Fouf

¹¹ Od enei ã gariya bunem karï gen, are ada abob nigin wauda laa fouf bagai.

¹² Æ Kain gen to ago gouf, ï Satan nẽ fen, yogo tura yukesin. Ere nigin ï yogo tura yukesin? Ere nigin, yogon tobonunã are sane fen, yogo tura nẽ tobonunã are madur.

¹³ Turau tar, teneub enei nẽ tamo kayau sane diyẽif are, to terẽ gouf.

¹⁴ Ada keleï, ada laa tator ken, mata ibodõya bun telen, ere nigin, ada neda turada tar nigin wauda laa fef. Aib taka ï to wau laa fef, ï laa bun ibodok.

¹⁵ Aib taka ï yogon tura nigin to orof, ï tamo yukesiya tamo, agef fen, ã keleï, tamo yukesiya tamo ï bun, mata ibodkeleyã sã.

¹⁶ Ere anï wau laa fiya naig tafe ada keleï youf, are eig fiya. Jesus Kristus ï ada nigin yogon mata itoron. Anï nigin, adag turada tar nigin neda mata tatorõf bagai.

¹⁷ Aib taka ï safina ado fen, yogon tura laa fiya bun ibodok anï ile fen, ï nigin wau to yuk, Negur nẽ wau laa fiya naig fe ï bun ibodok?

¹⁸ Neu kesu tar, ada od be, sigorada wogõya bunem wauda to laa fouf, anï ere, age tafedig ado momoi bun age tafouf.

¹⁹ Anï bunem, ada momoi bagai nẽ anï, ada keleï youf, age tafe fen, ada wauda yogon mala bun si inouf,

²⁰ ada neda wauda, ada nigin kafï fiya ifanadauf sain anï buneg, age fouf. Ere nigin, Negur ï neda wauda wal fiya, agef fen, ï ereb ereb ganã nigin keleï.

²¹ Turau tar oboiyou, ada wauda kafï fiya to ifanadauf are, ada Negur mala bun kumï sã totol tafar fen,

²² ereb ada ï to tafiyek anï, ï bun tamal talouf, ere nigin, ada yogon ïtãfiya dõ tafe fen, ereb ï orof anï age tafef.

²³ Yogon ïtãfiya are eig fiya. Negur Naal, Jesus Kristus nẽ yana nigin momoi tau fen, ï ada irokanadan kilei, abob nigin wauda laa fouf anï.

²⁴ Idi yogon ïtãfiya dõ difef anidi, ï bun dibodok, agef fen, ï idi bun ibodok. ï ada bun ibodok anï, naig tafe ada keleï youf, are eig fiya. Ada Awa Uur ifanadan anï bunem, ada anï keleï.

4

Uur Nigin Es Gouf

¹ Turau tar oboiyou, uur ganã nigin to momoi ge fen, idi Negur bun tamal be sã anï ulogouf nigin, idi es wiyẽdigouf, ere nigin, idegẽya profet musei teneub ganã bun diyokelef.

² Negur nẽ Awa Uur naig ge ã keleï youf, are eig fiya. Uur ganã Jesus Kristus ï tamo bouwa bun isin anï dirõdig, are Negur bun temeleid.

³ Anï ere, uur ganã Jesus nigin wa difef, are Negur bun temeleid sã. Enei are Kristus nẽ kiwai anï nẽ uur, are ï mogo isif ya anï karï gen, gamag ï mogo tenebur ibodok.

⁴ Neu kesu tar, ã Negur nẽ ubodõg fen, idi wal wiyẽdigen, ere nigin, ï ã

bun ibodok anī, ī tenebur ein ibodok anī wal fiya.

⁵ Idi tenebur temeleid, anī nigin, idi tenebur nē lo fiya bunem wogō de di, tenebur tamo kayau idi karī difiyēdidig.

⁶ Ada Negur bun temelada, age tafe di, aib ī Negur keleī, ada karī fadadig, anī ere, aib ī Negur bun tamal sã, ada to karī fadadig. Anī bunem, ada momoi bagai nē Awa Uur ado kũ fenēya nē uur nigin keleī youf.

Negur Nē Wau Laa Fiya Ado Neda Wauda Laa Fiya

⁷ Turau tar oboiyou, abob nigin wauda laa fouf, ere nigin, wau laa fiya are Negur bunem isidig. Ganan waud laa fedig idi, are Negurem gō fedi di, idi Negur keleī.

⁸ Aib taka ī to wau laa fedig, ī Negur keleī sã, ere nigin, Negur ī wau laa fiya.

⁹ Negur nē wau laa fiya eig fe ifel-nadan. Ī yogon Naal tekelei bagai, ada ī bunem mata tabodōf nigin, tenebur sur fen.

¹⁰ Wau laa fiya are yeir. Ada Negur nigin wauda to laa fen, anī ere, ī ada nigin wau laaf fen, yogon Naal, neda mosor nigin Negur nē didi yo fiya nē sesewi fiya anī sur fen.

¹¹ Turau tar oboiyou, Negur ī ada nigin agef wau laa fen nigin, adag abob nigin wauda laa fouf bagai.

¹² Takam Negur to bagai ilen. Anī ere, ada abob nigin wauda laa fouf are, Negur ada bun ibod ken, yogon wau laa fiya ada bun kisi falauf.

¹³ Ada keleī, ada ī bun tabodok, agef fen, ī ada bun ibodok, ere nigin, ī yogon Awa Uur ada ifanadan.

¹⁴ Ada tail fen, kurō tafeis, Dei, yogon Naal tenebur enei nē kel yaleya tamo wō youf nigin sur fen, taudig.

¹⁵ Aib taka Jesus ī Negur Naal youf are, Negur ī bun ibodok, age fe di, ī Negur bun ibodok.

¹⁶ Age fiya nigin, ada, wau laa fiya ada nigin Negur ado anī kelei ken, momoi taudig.

Negur ī wau laa fiya. Aib taka wau laa fiya bun ibodok, ī Negur bun ibodō di, Negur ī bun ibodok.

¹⁷ Naab age fiya bun, wau laa fiya ada atun kisi fele di, ada es fiya naa bun, kumī sã, totol tafarauf, ere nigin, tenebur ein, ada Kristus gen tabodok.

¹⁸ Wau laa fiya bun, kumī taka to ibodok. Anī ere, wau laa fiya kisi feleya bagai anī, kumī irudig, ere nigin, kumī mala solo sane ado iledig. Taka ī kumī yef, ī wau laa fiya bun, kisi feleya bagai to wō yef.

¹⁹ Ada wauda laa fedig, ere nigin, ī ketem ada nigin wau laa fen.

²⁰ Aib taka ī aya Negur nigin wau laa fef ye fen, yogon tura nigin to orouf are, ī idegēya tamal. Ere nigin, aib taka ī yogon tura ī iledig anī nigin to wau laa fef are, ī Negur to ilen anī nigin wau laa fiya kisi feleya sã.

²¹ Kristus ī ada itāfiya enei ifanadan. Aib taka Negur nigin wau laa fef, ī yogon tura nigineg wau laa fouf bagai.

5

Negur Naal Nigin Momoiya

¹ Aib taka ī Jesus ī Kristus yef, ī Negurem gō fen, agef fen, aib taka tama nigin wau laa fef, ī yogon kesu nigineg wau laa fef.

² Ada Negur nē gere tar nigin wauda laa fef ya anī, naig tafe keleī youf, are eig fiya. Negur nigin wau laaf fen, yogon itāfiya dō fiya bunem.

³ Negur nigin wau laa fiya, are yeir. Yogon itāfiya dō fiya. Agef fen, yogon itāfiya are, ada age tafouf nigin morō to ifanadadig,

⁴ ere nigin, ganan Negur bunem wowã den idi, tenebur nē oroya wal difedig. Momoiya bunem, ada tenebur nē oroya wal tafedig.

⁵ Aim anī tenebur nē oroya wal fef? Ī, Jesus Negur Naal ye fen, momoi yef anim dogol.

⁶ Enei anī, naan igūya nē naan ado laa nē naud bunem isin, are Jesus Kristus. Ī naan bunem dogol to isin,

anĩ ere, naan ado naud bunem isin. Agef fen, Awa Uurem anĩ kurõ fesif, ere nigin, Awa Uur ĩ momoi bagai.

⁷ Towo anidim kurõ difesif.

⁸ Awa Uur, naan ado, naud. Agef fen, towo are tekelei wogõ def.

⁹ Ada tamom kurõ difesif anĩ taledig, anĩ ere, Negur nẽ kurõ fesiya are tamo nẽ wal fiya. Negur nẽ kurõ fesiya are yeir, ĩ yogon Naal nigin kurõ fesin.

¹⁰ Aib taka Negur Naal nigin momoi yef, ĩ kurõ fesiya od enei in wau bun ibodok. Aib taka Negur nigin to momoi yef, ĩ Negur idegẽya tamo yef, ere nigin, ĩ Negur yogon Naal nigin od kurõ fesin anĩ to momoi yef.

¹¹ Kurõ fesiya od are yeir. Negur ada mata ibodkeleya ifanadan, age fe di, mata enei are yogo Naal bun ibodok.

¹² Taka ĩ Naal ado, ĩ mata ado, taka ĩ Negur Naal sã, ĩ mata sã.

Idikeleya Nẽ Od

¹³ Aya, ã Negur Naal nẽ yana nigin momoi gef anĩ, mata ibodkeleya ã bun ibodok anĩ, ã keleĩ youf nigin enei atotkeneik.

¹⁴ Negur mala bun, ada kumĩ sã totol ado anĩ eig fiya. Ada yogon oroya dõ tafe fen, ereb taka nigin to tafiyẽf are, ĩ ada karĩ fadauf.

¹⁵ Age fe di, ada ereb nigin to tafiyek, ĩ karĩ fadadig anĩ ada keleĩ youf are, ada keleĩ, ereb ada to tafiyek are ada talem.

¹⁶ Aib taka ĩ yogon tura mosor laa bun to irouledig anĩ ino mog, ilouf are, ĩ tura nigin kosẽ ye di, Negur tura mata ifenẽf. Aya idi nedi mosor laa bun to guri feid irouledig anidi nigin wogõ auf. Mosor laa bun guri feid irouledig are ibodok. Aya mosor anĩ nigin kosẽ youf nigin to wogõ auf.

¹⁷ Kũ fenẽya ganam, are mosor, agef fen, mosor laa bun to guri feid irouledig anĩ ibodok.

¹⁸ Ada keleĩ, aib taka Negur bunem wõ yen, ĩ mosor to inof iledig. Negur Naal ĩ kulatun fiyẽ di, Satan nẽ anim ĩ to daũ fiyẽf.

¹⁹ Ada keleĩ, ada Negur nẽ gere tare di, teneub ganam Satan nẽ anĩ farumen ibodok.

²⁰ Takag ada keleĩ, Negur Naal isi fen, ada keleĩ fokõ fanadan, are ada, Negur momoi bagai anĩ, keleĩ youf nigin age fen. Age fe di, ada, Negur momoi bagai anĩ bun tabodok, are yogon Naal Jesus Kristus bun. ĩ momoi bagai Negur fen, mata ibodkeleya anĩ.

²¹ Neu kesu tar, idegẽya waitou so wiyẽdigouf.

2 Jon

Aan Yeya

¹ Aya, sios nē mudur ado,

kayau* Negurem igirnen ado yogon gere tar bun pas enei atotof. Aya momoi anī bun ā nigin wau laa fedig, are aya dogol sã, anī ere, ganan idi momoi nigin keleĩ anidig,

² are momoi anī ada namedan ibod ken, ada geid ibodkalauf anī nigin.

³ Wau ifenēya, wau yūya ado, wau inosiya, Dei Negur ado Jesus Kristus, Dei nē Naal bunem, momoi ado wau laa fiya bun ada geid ibodōf.

Momoi Bun Mata Ibodōya

⁴ Aya ogon gere tar tunī, Dei ada irokanadan kilei, momoi bun diyō mog, ail fen, fatuk bagai wau al fen.

⁵ Gama, kayau oboiyou, aya itāfiya mata ō to atotkonok, anī ere, ada gariya bunem talen anī dogol. Ada abob nigin wauda laa foug anī, aya to afef.

⁶ Enei anī wau laa fiya, are ada yogon itāfiya dō fiya bun tayōf. Enei anī yogon itāfiya, are ā gariya bunem mogo karī gen kilei, ā wauī laa fiya bun uyōgouf.

⁷ Idegēya tamo musei, teneub ganan bun diyok, idi Jesus Kristus tamo bouwa bagai bun isin anī wa difedig. Tamo age fiya ī idegēya tamo fen, ī Kristus nē kiwai.

⁸ Ā nigin amā kabī total maledig anī, ege kilē to ilauf nigin ado, ā mala solo kisi feleya bagai walogouf nigin lo walagouf.

⁹ Taka ī Kristus nē ifelnēya anī idod ken, anī bun to ibodok, ī namen Negur to ibodok. Aib taka ī ifelnēya anī bun tobol fef ilef, ī namen Dei ado Naal dibodok.

¹⁰ Aib taka ā bun isi fen, ifelnēya enei to irou isiyouf, ī āgenei fō bun to waleg uroulagouf, ī aaneg to wiyēgouf.

¹¹ Aib taka ī aan fiyek, ī yogon kabī sane bun weim kabī dalef.

Idikeleya Nē Aanya

¹² Aya ā bun itotoya nigin musei ado, anī ere, aya pepa ado ink nem itotoya nigin to orouf. Age fiya ban, aya ā ki ayei ken, abob nawa bun wogō tauf nigin wau irok, age tafe di, wauda al fiya anī isokosouf.

¹³ Ogon main Negurem igirnen anī nē gere tar, nedi aanya sur difef.

* **1:1:** Kayau are, kayau Jon ī nigin keleĩ anī be, oo, ī are sios.

3 Jon

Aan Yeya

¹ Aya, sios nē mudur ado,

turau oboiyou Gaius, aya ī nigin momoi anī bun, wau laa fedig, ī bun pas enei atotof.

² Turau oboiyou, ogon malākanon biya ibodok gen, ō boū biya ibod ken, ereb ereb ganān ō nigin biya ilauf nigin, aya kosē auf.

³ Turau tar tunī disi fen, ō momoi anī biya bagai dō wo fen, momoi anī bun toku uyōdig anī dirokana di, aya fatuk bagai wau al fen.

⁴ Aya gereu tar momoi anī bun diyōdig karīya anim, wau al fiya ereb ereb ganān wal fiya anī ifanadig.

Negur Nē Kabī Tamo Kulatun Fediya

⁵ Turau oboiyou, ō, turada tar idi, ō bun yaū tamo anidi nigin el wo, biya ago wedidig.

⁶ Idi ogon waū laa fiya nigin sios dirokenēdin. Ō idi tobonunā Negur orof kilei sur wediyouf are, ō biya ago wouf.

⁷ Idi Odug yana nigin, haiden bun tamal isennēya taka to dale fen, dilen.

⁸ Anī nigin, ada, momoi anī nigin weim kabī talouf nigin, tamo age fediya tasennēdiyof bagai.

⁹ Aya sios bun pas atoton, anī ere, Diotrefes uyulil ibodōya nigin wau laa fedig, ī nemā od to karī yedig.

¹⁰ Anī nigin, aya asiyof sain bun, aya ī ereb age fef, amā nigin dumen od sane bagai irōdig anī yaor afouf. Anī dogol sā, ī turada tar yalediya nigin itoron. Ī idi turada tar yaleya nigin orodif anidig katū feid fen, idi sios bun tamal yalelnēdin.

¹¹ Turau oboiyou, ereb sane anī to madē wo, ereb biya anī madē wouf. Aib taka ereb biya age fef, ī Negur bun tamal. Aib taka ereb sane age fef, ī Negur to ilen.

¹² Demetrius ī nigin, ganān biya wogō dedig, momoi anī ī yogog age fedig. Amāg ī nigin biya wogō maudig, age mafe di, ā keleī, nemā wogō are momoi.

Idikeleya Nē Aanya

¹³ Aya ō bun itotoya nigin musei ado, anī ere, aya pepa ado ink nem itotoya nigin to orouf.

¹⁴ Aya kaisā ileyōya nigin wau irok, age afe fen, abob nawa tail fen, wogō tauf.

¹⁵ Wau inosiya ō bun ibodōf. Turada tar ein, nedi aanya sur difef. Turada tar an mugu mugu yeneid nem aan wediyouf.

Jud

¹ Aya Jud, Jesus Kristus nē ferfer fen, Jems ne tura,

idi Negurem iweignēdin, Tamada Negur idi nigin wau laa fe di, Jesus Kristus kulatun fedidig anidi bun, pas enei atotof.

² Wau yūya, wau inosiya ado, wau laa fiya, ā bun barikāf.

Momoiya Sā Tamo Neid Mosor Ado Daū Feidleya

³ Turau tar oboiyou, aya, ā kel yaleya ada weim talen anī nigin atotkeneif nigin, kisi totoo aledig, age a mā, aya kisi afen, aya atot fen, momoiya sain ganan nigin sain tekelei bun, Negur nē tamo kayau imeid bun ifenēdin anī, el ge kulatun gouf nigin, totoo bagai arokeneif, are deuf aun.

⁴ Ere nigin, tamo tunī idi daū feidleya nigin mogo kulu yeneid itoton anidi, ā keleī sā mog, ā atun iminēyan disin. Idi Negur nē ibodōya sā, idi neda Negur nē wau ifenēya anī falei difel, karika tobonunā sane inoya nē gen dino fen, Jesus Kristus neda Uyu Irouya fen Odug yana wa difedig.

⁵ Momoi, ā enei ganan mogo keleī, anī ere, aya ā, Odug yogon tamo kayau Isip bun tamal kel gei fedin, anī ere, dum idi to momoi den anidi daū feidlen anī nigin, baban wedereī fokō afouf nigin orouf.

⁶ Takag, engel idi dogo neid ifareya modoū bun to dibod ken, dogo neid modoū ditoron anidi, Negurem es fiya naa odug nigin ye fen, idi gugum bun ineneid fen, sen mata ibodkeleya anim ifofakelen.

⁷ Age fiya bagai, Sodom Gomora ado, taun anidi kalilī fiya idi noli tobonunā ado tobonunā sane bun dilelen. Idi bun, yā mata faimud ibodkeleya nē darau dalouf anī nē malakanon ileyauf nigin age fen.

⁸ Naab gai age fiya bagai, imīya tamo eneidi dogo bouweid amuyē

dinoid fen, Negur nē yana dudum difiye ken, engel megeir adodo dumedin od dirōdig.

⁹ Anī ere, engel neid mudur ado Maikel, sain ī Satan ado Moses bouwa nigin luwa dirou fen, ī bouwa bun kumī sā od sane wogōya nigin itoron, anī ere, ī iron, “Odug ō ou yok!”

¹⁰ Anī ere, tamo eneidi, ereb idi keleī sā anī nigin, od sane dirōdig. Age de fen, idi gaar kisi sam gen, bouwa nē oroya bunem idi keleī anī dō dife fen, daū feleya bun dileledig.

¹¹ Idi meleidlou ado! Idi Kain nē naab dō difen. Idi moni nigin de fen, Balam nē kū fenēya bun kaisā dilelen. Idi Kora nē kiwai inoya dō dife di, daū feidlen.

¹² Tamo enidi, āgenei wauī laa fiya nē sifa bun, ā geid kumī sā saaf dokon maaīwō sa tuwa waag daū fiyēdig gen, daū diyeidig. Idi sipsip lo fiya tamo, dogo naumeid nigin dogol kisi difedig gen. Idi budū uyē sā, yaum irouf iyōdig gen. Idi aa wei, mayo sain bun faat sā, agef fen, laaf uru fen, warumutei teten isen gen.

¹³ Idi maaī moloun fatuk fā ye fen, dogo neid mama sali moku fiya gen. Idi barisa ilef isif fedig, anidi nigin karos bagai gugum keleya gai gai nigin saia fen gen.

¹⁴ Enok, ī Adam bunem isin ibor sewen, tamo eneidi nigin profet od wogō yen, “Uleg, Odug ī yogon fateul anidi tausen tausen geid disif.

¹⁵ Ī ganan es feid fen, Negur nē to dibodok anidi ganan, dogo neid tobonunā sane, naab sane bun age difedig nigin ado, Negur nē to dibodok mosor temeleid anidi, od sane ganan ī nigin wogō dedig nigin, Negur nē to dibodok anidi neid mosor yaor fediyouf.”

¹⁶ Tamo eneidi are nauseir temeleid fen, taka nē kū fenēya dimirēdig. Idi dogo neid oroya sane dō difedig. Idi dogo yeneid dales fen, dogo neid biya fiya nigin, tunī meleid yaleya bun biya biya le fen, wogō dedig.

Feseya Sã Ifareya Nigin

¹⁷ Anĩ ere, turau tar oboiyou, ereb neda Odug Jesus Kristus nẽ aposel mogo dirokenein anĩ kisi gouf.

¹⁸ Idi ã dirokenein, “Idikeleya sain bun, kono fiya tamo wowã de fen, dogo neid oroya sane dõ difouf.”

¹⁹ Tamo eneidim ã fara diyeĩf, idi tenebur nẽ kisi dõ de fen, Awa Uur idi bun to ibodok.

²⁰ Anĩ ere, ã, turau tar oboiyou, ã aug nigin ãgenei momoiya fateul bagai bun fõ gen unogef useleg fen, Awa Uur Fateul bun kosẽ gouf.

²¹ ã, neda Odug Jesus Kristus nẽ wau yũya anim, mata ibodkeleya bun irouleyeĩf anĩ tarig fen, Negur nẽ wau laa fiya bun, aug nigin kulatun gouf.

²² Idi momoiya total sã nene def anidi bun wauĩ wenẽdigouf.

²³ Tunĩ yã bun tamal gurar ge gei wedigouf. Agog fen, tunĩ bun wauĩ yũya aniniya ado ufelnẽdigouf. Anĩ ere, dogo neid kolos, bouwa nẽ oroya sanem amuyẽ iroun anĩ utorõg.

Negur Yana Yaleseya Nẽ Od

²⁴ Negur ã, ã to kubũ gouf nigin kulatun yei ken, fula fiya medeĩya ã mala bun, kũ fenẽya sã, wau kulĩya odug ado ineneĩya kisi feleya ã anĩ bun,

²⁵ ada Isennadaya Negur tekelei dogol ã anĩ bun, fula fiya medeĩya, total, megeir ado, yana odug, neda Odug Jesus Kristus bunem, kulu, gama ado, faimud ibodkalauf! Momoi.

Kurō Fesiya Od

Od Uyu Irouya

¹ Jesus Kristus nē kurō fesiya od, are ereb kaisā bagai wō youf anī, Negurem yogon ferfer ifelnēdiyof nigin Jesus ifenen. Jesus ī, yogon ferfer Jon od anī keleī youf nigin, yogon engel Jon bun sur fen.

² Jonem ereb ereb ganan ī ilen anī kurō falaisif, are Negur nē od ado, Jesus Kristus nē od.

³ Taka ī profet od enei iwesef are ī el fiyek, agef fen, idi anī karī de fen, ereb anī bun itoton anī waud bun dinof anidi el fedif, ere nigin, sain mogododolef.

Jon Sios Sewen Bun Yogon Aanya Sur Fen

⁴ Aya Jon,

Asia provins bun sios sewen bun pas enei atotof.

Negur ī gama ibodok, kulu ibodon, dumen isiyof bunem, uur sewen yogon king nē sia wagen difaref bunem ado,

⁵ Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganan neid mudur ī bunem, wau ifenēya ado wau inosiya ā bun isif.

Jesus ī ada nigin wau laaf fen, yogon naud bunem, ada neda mosor bun tamal yalelnadan.

⁶ Agef fen, ī ada yogon Tama Negur aruna yaleya nigin, in tano ado in pris inodan. Ī bun fula fiya medeīya ado megeir gai gai ibodkalauf! Momoi.

⁷ Log, ī lalo bunem isif.

Age fe di, meleid ganan ī dilouf, idi ī gilī difen anidig dilouf.

Age fe di, tamo kayau tenebur ein ganan ī nigin waud gudū fouf.

Are agef bagai wō youf! Momoi.

⁸ Odug Negur irok, “Aya uyulil ado idikeleya, aya gama abodok, kulu abodon, dumen asiyof, aya saa ilun nē kusī tamo guri afeid uyu aroudig anī.”

Taka Ī Tamo Naal Gen

⁹ Aya Jon, āgenei tureī, aya, Jesus bun darau, Negur nē tano ado, fesyeyā sā ifareya, ā geid taledig, aya Negur nē od ado Jesus nē od wogō aun nigin, Patmos nuyo bun abodon.

¹⁰ Odug nē naa bun, aya Awa Ur namen abod ken, aya dumeun ait odug taur gen wō ye mog, karī aun.

¹¹ Ait iron, “Ereb ō ulef anī, buk kori fiya bun utot fen, sios sewen bun sur wediyof, oun Efesus, Smerna, Pergamum, Taiataira, Sardis, Filadelfia ado, Laodisia.”

¹² Aya ait wogō fiyan anī ileyā nigin falei aun. Aya falei aul fen, lam nē gol tutur sewen ailedin.

¹³ Lam tutur anī atun, aib taka “tamo naal gen”* kolos meluk ifonū di, yen isilen ado, let gol akor gu fen anī ifaren.

¹⁴ In mudur ado fatiya, sipsip siwi lalau, saa lalo lalau gen, yogon mala are yā mala fitotoleya gen.

¹⁵ Yogon ye are bras yā malan ifalegeya medeīya gen, in ait are naan uhuhuya gen.

¹⁶ Yogon ima biyalē barisa sewen iroun, agef fen, in awa bun tamal, dimig bala waila si sitakā wō yen. Yogon nawa are gaa ririya gen medeī yen.

¹⁷ Aya ī ail fen, aya ī ye gariyan kubū au, laa gen ainen. Age afe di, ī ima biyalē aya teteun ino fen, iron, “Ō to kumī wo. Aya gariya, aya idikeleya.

¹⁸ Aya mata ibodōya nē, aya laa fiyan, anī ere, uleyaf, aya gai gai mata abodkalauf! Aya laa nē ado Hades nē ki aroudif.

¹⁹ “Anī nigin, ereb ō ulen, ereb gama ibodok, ereb dumen wō youf anī utot.

²⁰ Barisa sewen aya imau biyalē ulen ado, lam nē gol tutur sewen

* **1:13:** Daniel 7:13

ulen anī nē waa nē gariya, are eig fiya: Barisa sewen are sios sewen neid engel, lam nē tutur sewen are sios sewen.

2

Efesus Sios Bun Od Ilef

¹ “Efesus sios nē engel bun utot:

Od enei are, ī barisa sewen ima biyalē irou mog, sewen gol lam tutur difaren atun iyok ilen nē od:

² Ereb ō ago wof, are aya keleī, ogon kabī total yaleya ado ogon feseya sã ifareya anī. Aya keleī, ō tamo sesen to loloum weid fen, idi dogo anī aposel dedig, anī ere, aposel sã anidi es wiyeīd fen, idi neid idegēya anī ulen.

³ Ō total ufar fen, neu yanau nigin morō faali won, anī ere, ō to fō yon.

⁴ Anī ere, aya ō nigin od enei ado:

Ō uruwa aya nigin waū laa fen anī utoron.

⁵ Anī nigin, ō nainenem kubū won anī kisi wo! Falei wo fen, ereb uruwa agon anī agouf. Ō to falei wouf are, aya ō gein asi fen, ogon lam tutur ado yogon modoū bun tamal alelauf.

⁶ Anī ere, tobonunā biya enei ō ado: Ō Nikolas dō difiyek neid tobonuneid to oroyōdig, are ayag to oroudig.

⁷ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mata ifenēya nē aa Negur nē paradis bun ibodok anī bun tamal, yōya nigin yo afiyēf.

Smerna Sios Bun Od Ilef

⁸ “Smerna sios nē engel bun utot:

Od enei are, ī gariya ado idikeleya, ī laaf fen, baban mata fã yen nē od.

⁹ Ogon darau ado ogon maleg nigin aya keleī, anī ere, ō safina musei ado. Aya idi dogo nigin Juda tamo dedig, anī ere, idi Juda tamo sã, Satan nē guru fiya anidi neid bou yūya od nigin keleī.

¹⁰ Ereb mogo ō darau ifonōf nigin to kumī wo. Aya ō arokonok, Satan ī mogo ā tunī kisi yeīya nigin kalabus bun ineneīf. Age fe di, ā naa ten darau walogouf. Ō laa bun dinenōfeg, ogon momoiya urou kafī walauf, ago di, aya ō mata nē teter kurū ayōf.

¹¹ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, namba tu nē laa ī to daū fiyēf.

Pergamum Sios Bun Od Ilef

¹² “Pergamum sios nē engel bun utot:

Od enei are, ī dimig bala waila si sitakā ado nē od.

¹³ Ō ubodok nē an aya keleī, an Satan nē sia ibodok. Anī ere, ō neu yanau urou kafī welef. Antipas, neu dō fiya biya, aya nigin od wogō yedig, ī Satan ibodok nē āgenei taun an dukesin sain anī buneg, ō aya nigin ogon momoiya to folō welen.

¹⁴ Anī ere, aya ō nigin od tunī ado: Ō tamo tunī an Balam nē keleī dirouf anidi ado, Balam ī Balak ifelnē di, Balak ī Israel tamo kayau yeid tū fiya nē meein ino fen, idegnēdi di, Israel idi saaf idegēya waitou bun sesewi difen anī dokon, noli tobonunā dinon.

¹⁵ Age fiya gen, ō aneg tunī Nikolas nē ifelnēya dirouf anidi ado.

¹⁶ Anī nigin, waū falei wo! Sãf are, aya kaisā bagai ō gein asi fen, neu sigorou nē dimig ado idi geid kusī auf.

¹⁷ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mana iminēyan ibodok tunī afenēf. Aya ī meein lalau takag, yana mata teten itoton anī afenēf. Aib ī anī yalef dogol yana anī keleī youf.

Taiataira Sios Bun Od Ilef

¹⁸ “Taiataira sios nē engel bun utot:

Od enei are Negur Naal nē od, yogon mala are yã mala fitotoleya

gen, yogon ye are bras yā malan ifalegeya medeīya gen.

¹⁹ Aya keleī, ō ereb agof, ogon waū laa fiya ado momoiya, ogon aruna yaleya ado feseya sā ifareya. Aya keleī, ō uruwa bun ago won anī wal fiya gama ō agodig.

²⁰ Anī ere, aya ō nigin od enei ado: Ō kayau Jesebel, ī yogo nigin profet kayau yef anī, loloum wedig. Ī yogon ifelnēya bunem neu ferfer idegnēdi di, idi noli to-bonunā bun dile fen, saaf idegēya waitou sesewi difen anī dōdig.

²¹ Aya ī yogon mosor nigin wau falei youf nigin sain afenen, anī ere, ī to orof.

²² Anī nigin, aya ī darau nē fatar bun ara ken, idi ī geid seseirā dinodig anidi, kayau anī nē naab nigin waud to falei youf are, aya idi darau fatuk bagai afenēdiyof.

²³ Aya ī gere tar adenkesiyof. Age afe di, sios ganan, aya waud ado kisi es afedig anī keleī youf. Age afe fen, aya ā mugu mugu ereb ereb ā ago gef kilei, mala solo afeneīf.

²⁴ Anī ere, aya ā tunī ganan Taiataira ufaregef anī arokeneik, ā kayau anī nē ifelnēya to uroug fen, Satan nē waa namen bagai dedig anī to kelein anī arokeneik (aya ā bun ereb morō taka to afeneīf).

²⁵ Ereb ā urougef anī dogol urougef uleg mog, asiyof.

²⁶ Aib ī kusī anī wal fe fen, neu oroya dōf ile, idikeleya bun ouf, aya ī teneub lo fediya nigin megeir afenēf.

²⁷ Ī ain manig nem ulum iro-kenēdiyof,

ī mis gen daū fedi di, urud falaisiyof,*

are aya neu Dei bunem megeir alen gen.

²⁸ Aya ī bonimeī nē barisa kilokilog afenēf.

²⁹ Taka ī weder adouf, utornēg len, ī Awa Uur sios irokenēdif anī karī youf.

3

Sardis Sios Bun Od Ilef

¹ “Sardis sios nē engel bun utot:

Od enei are, ī Negur nē uur sewen ado barisa sewen irouf anī nē od. Ō ereb agof, are aya keleī. Ō mata ubodok dedig, anī ere, ō laa yon.

² Fā wale! Ereb mogo laa fou fenē anī megeir wenē, ere nigin, aya ō ereb agof are neu Negur nē mala bun tutuk bagai sā ailef.

³ Anī nigin, ereb ō walen, ereb ō karī won anī karī walauf. Anī dō wo fen, waū falei wo. Ō to fā walouf are, aya bē tamo gen asiyof. Aya sain nanī be, ō gein asiyof anī, ō to keleī youf.

⁴ Anī ere, ō, Sardis an tamo kayau tunī, idi neid kolos amuyē fiya sā difaref anidi ado. Idi kolos lalau difoun ken, aya geid mayōf, ere nigin, idi kisi feleya bagai.

⁵ Aib ī kusī anī wal fouf, ī idi gen kolos lalau ifonūf. Aya yogon yana, mata ibodōya nē buk bun tamal to alelauf, age afe fen, yogon yana neu Dei ado yogon engel meleid bun kurō afesiyof.

⁶ Taka ī weder adouf, utornēg len, ī Awa Uur sios irokenēdif anī karī youf.

Filadelfia Sios Bun Od Ilef

⁷ “Filadelfia sios nē engel bun utot:

Od enei are, ī fateul bagai ado momoi nē od, ī Dawid nē ki irouf. Ereb ī kā fef, taka nem to inolalauf, agef fen, ereb ī inolelef, taka nem to kā falauf.

⁸ Ō ereb agof, are aya keleī. Ulef, aya, sukar kā feleya taka nem inoleleya kisi felya sā anī, ō wagen anon. Aya keleī, ō megeir naal bagai ado, anī ere, ō neu od dō wo fen, neu yanau to wa won.

⁹ Ulef, idi Satan nē guru fiya namen temeleid, idi dogo nigin Juda tamo dedig, anī ere, idi Juda tamo sā, idegēya tamo anī, ayam age afe di, idi disi, ō yē gariyan kubū de fen,

* 2:27: Sam 2:9

aya ō nigin wau laa fedig anī idi keleī youf.

¹⁰ Ō feseya sã ufarauf nigin neu od urou kafī welen anī nigin, ayag idi tenebur dibodok kisi fediya nigin teneub ganan bun darau isiyouf sain bun, aya ō ahaha ayōf.

¹¹ Aya kaisã bagai asiyouf. Ō ereb urouf anī kafī walauf, ago di, taka nem ogon kurū fiya nē teter anī to yalouf.

¹² Aib ī kusī anī wal fouf, aya, neu Negur nē tempel bun, ī monog tor atennēf. Ī anī baban to bagai itorōf. Aya ī bun, neu Negur nē yana ado, neu Negur nē taun yana, Jerusalem mata, are saa ilun tamal neu Negur bunem isiyouf anī atouf. Age afe fen, aya neu yanau matag ī bun atouf.

¹³ Taka ī weder adouf, utornēg len, ī Awa Uur sios irokenēdif anī karī youf.

Laodisia Sios Bun Od Ilef

¹⁴ “Laodisia sios nē engel bun utot: Od enei are Momoi Barikā nē od, ī dō fiya biya ado, momoi bagai Negur nē od wogō yedig, ī ereb ereb Negur inodin ganan nē gariya.

¹⁵ Ō ereb agof anī aya keleī, are ō medir sã, uruwag sã. Aya ō medir be, uruwa anī taka ubodok nigin orouf.

¹⁶ Anī nigin, ō laigog, medir sã, uruwag sã nigin, aya ō mogo awau bun tamal atigil arāyōf.

¹⁷ Ō urōdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anī ere, ō keleī sã, ō gai sane bagai, malalon ado, maleg, malā ifofakeleya ado, gemū ubodok.

¹⁸ Aya ō arokonok, ō aya bun gol bagai, gol yā bun difalegen anī, ō safina ganan kisi feleya bagai wō wouf nigin, na walouf, ō kolos lalaug ufonū di, ogon gemū mama dede wouf nigin na walouf, ō mala marasin malā bun uno fen, kelē walauf nigin na walouf.

¹⁹ Aya idi nigin wau laa fedig anidi, aya ou afeid fen, tai afe-didig. Anī nigin, kabī total wale fen, mosor utor ken, waū falei wouf.

²⁰ Lo weleg, aya bobogē afar fen, godu afef. Taka ī aitou karī ye fen, sukar kā fouf are, aya ī namen asi fen, ī ado saaf māf, age afe di, ī aya ado saaf māf.

²¹ Aib ī kusī anī wal fouf, aya kusī wal afe fen, neu Dei nē king nē sia bun, neu Dei ado mabodok gen, īg neu king nē sia bun, aya ado mabodōf nigin yo afiyēf.

²² Taka ī weder adouf, utornēg len, ī Awa Uur sios irokenēdif anī karī youf.”

4

King nē Sia Saa Ilun Ibodok

¹ Anī bure fele di, aya kelē aulen, aya wageun an saa ilun nē sukar kā feleya ifar mog, ailen. Age afe fen, ait aya uyulil taur gen wogō fiya di, karī aun are iron, “Ein use, ago di, ereb enei bure fele di, wō youf anī, afelnōf.”

² Kaisã bagai aya Awa Uur namen abodon, age afe fen, wageun an saa ilun king nē sia bun, aib taka ibodon anī ailen.

³ Agef fen, taka an ibodon are, lo fiya bun meein medeīya jaspera ado meein giriya medeīya konilian gen wō yen. Walol taka, meein aarau mata age fiya medeīya emeral gen sof fen, king nē sia anī kalilī fen.

⁴ King nē sia anī sirin, tuwenti-fo king nē sia anim salili de fen, tuwenti-fo mudur adodo anī bun dibodon. Idi kolos lalau difoun ken, dogo neid mudureid bun king nē gol teter ado dibodon.

⁵ King nē sia bun kolimei filiya firagagaū fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anī.

⁶ Takag, king nē sia wagen, ereb taka maaī gen galas nem dinon anī, galas medeīya bagai age fiya ibodon.

Anī atun king nē sia salili fiya bun, ereb mata ibodōya aiwa adodo difaren. Idi meleid barikā, wagedin ado dumedineg.

⁷ Ereb mata ibodōya uyu ifaren are laion gen, anī dō fiya are bulmakau gen, anī dō fiya are nawa, tamo nawa gen, anī dō fiya are webi fatutu yef gen.

⁸ Ereb mata ibodōya aiwa adodo idi mugu mugu wayeid sigis ado fen, bouweid ganan bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul
are Odug Negur saa ilun nē kusī
tamo guri feid uyu iroudig anī,
ī kulu ibodon, ī gama ibodok, ī
dumen isiyouf.”

⁹ Ereb sain ereb mata ibodōya idi, taka ī king nē sia bun ibod ken, mata faimud ibodkeleya anī bun, fula fiya medeīya, yana odug ado, de fiyēya difenēdig bun,

¹⁰ mudur adodo tuwenti-fo, ī king nē sia bun ibod mog, ī wagen kuku de fen, ī mata faimud ibodkeleya anī seli dalesedig. Idi king nē sia wagen dogo neid teter gō difel fen, dirōdig:

¹¹ “Nemā Odug Negur,
ō fula fiya medeīya, yana odug
ado, megeir yaleyā kisi feleya
bagai,
ere nigin, ō ereb ereb ganān ago di,
wowā den,
ago fen, ogon oroya bunem idi
unodi di,
age de difaref.”

5

Buk Kori Fiya Ado Sipsip Naal

¹ Age de di, aya ī king nē sia bun ibodon anī ima biyalē, buk kori fiya si sitakā itotoya ado uris sewen nem itā de fen, sile fiyan anī ailen.

² Age afe fen, aya engel megeir ado taka ailen, ī ait odugem iweig iron, “Aim uris eneidi narī feid fen, buk kori fiya enei fara feleya kisi feleya?”

³ Anī ere, saa ilun be, tenebur be, teneub farumen tamal, taka nem buk kori fiya anī fara feleya be, namen fele fiya kisi feleya sā.

⁴ Aya fatuk bagai inā alen, ere nigin, taka nem buk kori fiya anī fara feleya be, namen fele fiya kisi feleya to wō yen.

⁵ Age afe di, mudur adodo takam aya irokanan, “To inā wale! Ulef, Juda nē ibor bun tamal Laion, Dawid nē Warei mogo kusī wal fen. Inim, sā buk kori fiya anī yogon itāfiya uris sewen ado fara falauf.”

⁶ Age ye di, aya Sipsip Naal dukessin anī gen, king nē sia ereb mata ibodōya aiwa adodo salili difiyen ado, mudur adodo atun ifar mog, ailen. Ī karat sewen ado mala sewen ado, mala sewen are Negur nē awa uur sewen teneub ganān bun susur fedin anidi.

⁷ Sipsip Naal ī isi fen, ī king nē sia bun ibodon anī nē ima biyalē buk kori fiya anī yalen.

⁸ Sain ī anī yalen, ereb mata ibodōya aiwa adodo, mudur adodo tuwenti-fo geid, Sipsip Naal wagen kuku den. Idi mugu mugu harp* ado beī gol nem kaaū sumeī biya isokoseya ado guri difen, kaaū sumeī biya are momoiya tamo kayau neid kosē.

⁹ Age de fen, idi seg mata dalen:
“Ō buk kori fiya anī wale fen,
yogon itāfiya uris sewen anī fara
feleya kisi feleya bagai,
ere nigin, ō dinōkesi di,
ō ogon naud bunem
ibor ganān bun, od fire fire
ganān bun, tamo kayau ganān
bun ado, teneub ganān bun,
Negur nē tamo kayau na
waledin.

¹⁰ Ō idi neda Negur aruna dalouf nigin, tano ado pris unenēdin, ago di, idi teneub ganān lo fiya nigin mudur dibodōf.”

¹¹ Age de di, aya malau ara ken, engel musei bagai neid aiteid karī aun, idi tausen musei ado handred

* 5:8: Harp anī gita gen musik kodē dedig.

tausen musei wal fiya. Idi king nē sia, ereb mata ibodōya ado, mudur adodo salili difiyēdin.

¹² Age de fen, idi aiteid odugem seg dalen:

“Sipsip Naal dukessin ĩ megeir, safina, kisi biya, totol, yana odug, fula fiya medeīya ado, yana yaleseya yaleya kisi feleya bagai!”

¹³ Agef fen, aya, ereb ereb ganan saa ilun difaref, tenebur difaref, teneub farumen difaref ado, maaĭ bun difaref, ereb ereb ganan anĭ namen mata difaref idi seg dale mog, karĭ aun:

“Ī king nē sia bun ibodok ado Sipsip Naal bun, yana yaleseya, yana odug, fula fiya medeīya ado, megeir, gai gai ibodkalauf!”

¹⁴ Ereb mata ibodōya aiwa adodo diron, “Momoi,” age de di, mudur adodo kuku de fen, yana dalesen.

6

Ītāfiya Uris

¹ Aya lo afe mog, Sipsip Naal ĩtāfiya uris sewen anĭ uyulil fara fen. Age fe di, aya, ereb mata ibodōya aiwa adodo takam, ait kolimei ait gen bun eig ye mog, karĭ aun, “Usi!”

² Aya lo afen, aya wageun an hos lalau taka ifaren. Tamo anĭ teten ibodon ĩ wĭ taka iroun, ĩ kusĭ wal fiya nē teter ifenen, age fe di, ĩ hos bun kusĭ wal fe fen, kusĭ wal fediyouf nigin ilen.

³ Sipsip Naal ĩ ĩtāfiya uris uyulil dō fiya anĭ fara fen, age fe di, aya ereb mata ibodōya uyulil dō fiya anĭ eig ye mog, karĭ aun, “Usi!”

⁴ Age ye di, hos taka isin, are giriya bagai. Tamo anĭ teten ibodon ĩ, tenebur tamal malol yalel fen, tamo abob didenkesiyouf nigin megeir ifenen. Ī anĭ dimig odug ifenen.

⁵ Sipsip Naal ĩ ĩtāfiya uris anĭ dō fiya fara fen, age fe di, aya ereb mata ibodōya anĭ dō fiya anĭ eig ye mog, karĭ aun, “Usi!” Aya lo afen, aya

wageun an hos karos taka ifaren. Tamo anĭ teten ibodon, yogon ima bun ĩ foi fiya nē safina iroun.

⁶ Age fe di, aya ereb mata ibodōya aiwa adodo atun ait taka gen karĭ aun are iron, “Naa tekelei nē mala solo wit bret tekelei yalouf, naa tekelei nē mala solo baali bret towo yalouf. Ago fen, oliv moul ado wain to daū wo!”

⁷ Sipsip Naal ĩ ĩtāfiya uris anĭ dō fiya fara fen, age fe di, aya ereb mata ibodōya anĭ dō fiya anĭ eig ye mog, karĭ aun, “Usi!”

⁸ Aya lo afen, aya wageun an hos bailuya taka ifaren. Tamo anĭ teten ibodon ĩ yana Laa, age fe di, Hades ĩ degē degē fiyen. Idi tenebur tamo kayau aiwa adodo foi fiya atun taka anĭ, dimig nem, kadir nem, dagi odug nem ado, tenebur gaar kuĭ nem didenkesiyouf nigin megeir ifenēdin.

⁹ Sipsip Naal ĩ ĩtāfiya uris anĭ dō fiya fara fen, age fe di, aya idi Negur nē od dale fen, feseya sā od anĭ wogō de di, didenkesin anidi neid meleidkanon alta farumen ailedin.

¹⁰ Idi aiteid odugem diweig diron, “Ereb ereb ganan nē Odug, fateul fen momoi, ere sain bun bagai, ō tenebur tamo kayau es woid fen, idi amā didenamakesin nigin mala solo wenēdiyouf?”

¹¹ Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabĭ tureid tar ado momoiya tamo kayau Negur igrnēdin ganan, idi age difedin gen didenkesiya kisi falauf nigin irokenēdin.

¹² Aya ĩ ĩtāfiya uris anĭ dō fiya fara fel mog, ailen. Age fe di, mimĭ odug wō yen. Gaa gugum kel fen, wau gudū fiya nē gabar meme siwi nem iwaya gen karos kelen. Ogō oditekei naud giriya gen falei felen.

¹³ Age fe di, saa ilun barisa tenebur kuku ren, are aa fig faat dobi yau totolem yoū fe di, kuku redig gen age fen.

¹⁴ Saa, pepa kori fiya gen iwaike-len, agef fen, arei ganan ado nuyo

ganan, dogo neid modoũ ditoraran.

¹⁵ Age fe di, tenebur nē king, tamo yeneid adodo, kusī mudur, safina musei adodo, megeir adodo ado, ferfer ganan ado tamo kafī fiya sā bun difaref ganan, kuren ado arei nē sa atun diminanan.

¹⁶ Idi arei ado sa diweig dirokenēdin, “Tetenaman kubūg fen, ī king nē sia bun ibodok anī nawa ado Sipsip Naal nē didi bun tamal unokolnamāg!

¹⁷ Ere nigin, idi neid didi nē naa odug mogo isin, anī nigin, aim ifareya kisi feleya?”

7

Israel Tamo Kayau 144,000 Bun Uris Dinon

¹ Anī bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nē yau, yau takam teneub be, maaī be, aa taka bun to fū foug nigin kafī difel mog, ailen.

² Age afe fen, aya engel taka mata ibodōya Negur nē itāfiya uris ado gaa iseyan ise mog, ailen. Ī engel aiwa adodo teneub ado maaī daū fiya nē megeir ifenēdin anidi, ait odugem iweig irokenēdin:

³ “Ā teneub be, maaī be, aa taka fau mog to daūg, amā neda Negur nē ferfer demeid bun itāfiya uris manol len.”

⁴ Age ye di, aya idi itāfiya nē uris dinon anidi ganī anī karī aun, are 144,000 idi Israel ibor ganan bun temeleid.

⁵ Juda nē ibor bun tamal 12,000 are itāfiya uris dinon,

Ruben nē ibor bun tamal are 12,000, Gad nē ibor bun tamal are 12,000,

⁶ Aser nē ibor bun tamal are 12,000, Naftali nē ibor bun tamal are 12,000, Manase nē ibor bun tamal are 12,000,

⁷ Simeon nē ibor bun tamal are 12,000,

Lewi nē ibor bun tamal are 12,000, Isakar nē ibor bun tamal are 12,000,

⁸ Sebulun nē ibor bun tamal are 12,000,

Josef nē ibor bun tamal are 12,000,

Benjamin nē ibor bun tamal are 12,000.

Guru Fiya Mala Odug Kolos Lalau Meluk Difonundin

⁹ Anī bure fele di, aya lo afen, aya wageun an guru fiya mala odug bagai, taka nem iwesleya kisi feleya sā, idi teneub ganan bun, ibor ganan bun, tamo kayau ganan bun ado, od fire fire ganan bun temeleid, idi king nē sia wagen ado Sipsip Naal wagen difaren. Idi kolos lalau meluk difoun ken, pam boge anā boge gen anī imedim guri difen.

¹⁰ Age de fen, idi aiteid odugem diweig diron:

“Kel gei fiya are

neda Negur king nē sia bun ibodok ado

Sipsip Naal nē.”

¹¹ Engel ganan, king nē sia ado, mudur adodo ado, ereb mata ibodōya aiwa adodo salili difiyeid difar fen, king nē sia wagen neweid lē kuku de fen, Negur yana dalesen.

¹² Idi diron:

“Momoi!

Yana yaleseya, fula fiya medeīya,

kisi biya, de fiyēya, yana odug,

megeir ado, total are

neda Negur bun gai gai ibodkalauf.

Momoi!”

¹³ Age de di, mudur adodo takam aya to fiyan, “Idi eneidi kolos lalau meluk difonun are nanidim, idi nainenem disin?”

¹⁴ Aya ī arokenen, “Tamo biya, ō keleī.”

Age au di, ī irokanan, “Eneidi are darau, kafī fiya odug bun temeleid disin. Idi dogo neid kolos meluk Sipsip Naal naud nem kulo dife di, lalaun.

¹⁵ Anī nigin,

“idi Negur nē king nē sia wagen difar fen,

yogon tempel bun gaa ado bō ganan aruna daledig.

Age dife di, ĩ king nē sia bun ibodok
anim yogon salafat biraraũ fe
fen, kerũ fediyouf.

¹⁶ Idi baban to naũ fediyouf,
to naan ail fediyouf.

Gaam be, ereb uruwa adom,
baban to isaĩnēdiyof.

¹⁷ Ere nigin, Sipsip Naal king nē sia
atun ifaref inim, dogo neid lo
fiya tamo ibodōf.

Ī idi mata ibodōya nē naan
warur bun gurif ĩroulediyof.
Age fe di, Negur ĩ idi meleid bun
tamal maruid ganan waĩ
falauf.”

8

Ītāfiya Uris Namba Sewen Ado Aa Gaula Sumeĩ Biya Nē Gol Beĩ

¹ Sain Sipsip Naal ĩtāfiya uris
namba sewen anĩ fara fele di, saa
ilun hap aua age fiya karasā sã mutũ
bagai yenen.

² Age fe di, aya engel sewen Ne-
gur wagen difaren anidi, taur sewen
ifeneĩd mog, ailen.

³ Engel taka ĩ, aa gaula sumeĩ biya
nē gol beĩ ado isi, alta bun ifaren. Ī
aa gaula sumeĩ biya musei, momoiya
tamo kayau ganan neid kosē ado,
king nē sia wagen gol alta bun sesewi
fouf nigin difenen. ⁴ Aa gaula sumeĩ
biya nē kaau, momoiya tamo kayau
neid kosē ado, engel ima bun tamal
Negur wagen iselen.

⁵ Agef fen, engel aa gaula sumeĩ
biya nē beĩ yale, alta bun tamal yã ife
fen, tenebur iran, age fe di, kolimei
gudūya, gurūya odug, kolimei filiya
ado, mimĩ wō yen.

Taur

⁶ Age fe di, engel sewen taur sewen
ado, taur wese fiya nigin dodok
difen.

⁷ Engel uyulil yogon taur wese fe
di, uyē ais, yã naud ado bagu fen, isi
di, tenebur iraran, age fe di, teneub
tekelei faraf towo fiya gen anĩ taka
adok isaikelen, aa ganan faraf towo
fiya gen anĩ taka adok isaikelen, agef
fen, fisir mata ganan isasaikelen.

⁸ Engel uyu wō yen anĩ dō fiya
yogon taur wese fe di, ereb arei odug
gen yã fitotoleya ado maaĩwō iran.
Maaĩ faraf towo fiya gen anĩ taka,
naud falei felen,

⁹ maaĩwō ereb ereb mata ibodōya
faraf towo fiya gen anĩ taka gare den,
agef fen, waag ganan faraf towo fiya
gen anĩ taka daũ felen.

¹⁰ Anĩ dō fiya engel taka yogon taur
wese fe di, barisa odug yal gen kaur
fen, saa ilunem, naan faraf towo fiya
gen anĩ taka bun ado, naan warur
anidi bun kubũ yen.

¹¹ Barisa anĩ nē yana Dirikeĩ. Naan
faraf towo fiya gen anĩ taka dirikeĩ
kele di, tamo kayau musei, naan
dirikeĩ kelen anĩ bunem gare den.

¹² Anĩ dō fiya engel taka yogon taur
wese fe di, gaa faraf towo fiya gen
anĩ taka, ogō faraf towo fiya gen anĩ
taka ado, barisa faraf towo fiya gen
anĩ taka yũ di, idi ganan faraf towo
fiya gen anĩ taka gugum kelen. Naa
faraf towo fiya gen anĩ taka lalan sa
kelen, agef fen, bō faraf towo fiya gen
anĩ takag age fen.

¹³ Aya lo afe mog, aya webi taka
karĩ au mog, ilun fatutu ye fen,
ait odugem iweig iron, “Malalon!
Malalon! Malalon tenebur dibodok
anidi bun, ere nigin, engel towog
mogo taur ait wese difou fenē!”

9

¹ Engel anĩ dō fiya engel taka yogon
taur wese fe di, aya barisa taka saa
ilunem tenebur kubũ yen anĩ ailen.
Barisa are ku isil idīya sã nē ki anĩ
ifenen.

² Ī ku isil idīya sã anĩ kã fele di,
kaau are yã odug kũ fiya modoũ bun
tamal gen fã yen. Ku isil idīya sã bun
tamal kaau anim, gaa ado saa gugum
kelen.

³ Age fe di, kaau namen tamal, to-
tobi tenebur wowã den, are idi neid
megeir, tenebur ābei neid megeir
gen ifenēdin.

⁴ Idi tenebur tamal fisir be, ereb
aayũ be, aa taka to daũ difouf, anĩ

ere, tamo kayau idi Negur nē uris de-meid bun sã anidi dogol daũ difediyouf nigin irokenēdin.

⁵ Idi tamo idenkesiya nē megeir to ifenēdin, anī ere, idi ogō faif bun darau dogol difenēdiyof nigin megeir ifenēdin. Age fe di, idi neid darau arar, ābei tamo garū fe di, darau arar iledig gen.

⁶ Naa anidi bun tamo laa dimirēf, anī ere, to dilouf. Idi laa orodiyouf, anī ere, laa to gurug fediyouf.

⁷ Totobi are hos kusī bun ileyā nē gegen. Idi neid mudureid bun, ereb gol teter gen kurū difedin, idi neid neweid tamo neweid gen.

⁸ Nedi fatiyeid kayau fatiyeid gen, agef fen, waileid are laion willa gen.

⁹ Nedi siot kapa are ain nē siot kapa gen, agef fen, idi neid wayeid furūya are hos musei ado karis kusī bun gududu de fen, gou redig gen.

¹⁰ Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyof nigin megeir adon.

¹¹ Idi uyu iroukenēdiya nē king ado, are ku isil idīya sã nē engel, in yana Hibru od nem are Abadon, Grik od nem are Apolion.*

¹² Morō odug uyulil anī bure felen, age fe di, morō odug uru are fau disif.

¹³ Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun.

¹⁴ Ait are engel namba sigis taur ado anī irokenen, “Engel aiwa adodo Yufretis naan odug bun difofan anidi fara woidle.”

¹⁵ Age ye di, engel aiwa adodo are aua, naa, ogō, yar enei bun bagai, tamo teneub ganān bun fara fiya towo anī taka adok didenkesiyof nigin, dodok fedin anī folō feledin.

¹⁶ Hos teten kusī bun ileyā nē tamo anidi are 200 milion. Aya dogo neid namba karī aun.

¹⁷ Aya malau seleulā kurā fiya bun, hos adodo tamo hos tetedin dibodon anidi eig fiya ailedin: Idi neid siot kapa are, yā giriya gen, maaī gegē gen ado, bailuya salfa gen. Hos mudureid are, laion mudureid gen, agef fen, idi eweid bunem yā, kaau ado, salfa wowā yen.

¹⁸ Tamo tenebur ganān faraf towo fiya gen anī taka ganān, sane towo anim, yā, kaau ado, salfa idi eweid bun wowā yen anim didenkesin.

¹⁹ Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamo kayau darau difenēdidig.

²⁰ Tamo kayau tunī ganān, sane eneidim to didenkesin anidi, idi imedim dinon anī to ditor ken, waud to falei yen. Idi kaa sesen yeneid yaleseya to ditor ken, gol, silwa, bras, meein ado, aa nē idegēya waitou, are lo fiya, karīya be, iyōya kisi felya sã anidi yeneid yaleseya itorōya sã.

²¹ Idi tamo yukesiya, dogo neid idegēya kosēya, dogo neid noli tobonunā be, dogo neid bē yaleya tobonunā nigineg waud to falei yen.

10

Engel Ado Buk Kori Fiya Naal

¹ Anī bure fele di, aya engel megeir ado taka saa ilunem isi mog, ailen. Ī lalom silef fen, yogon mudur bun walol ado. In nawa gaa gen, agef fen, yogon ye are tor yā bobo reya gen.

² Ī buk kori fiya naal taka ima bun fara feleya iron. Ī ye biyalē maaī bun iten ken, ye kilē teneub bun itenen.

³ Agef fen, ĩ laion ninirā ye gen ken, ait odugem iweig iron. Sain ĩ iwegin, kolimei gudūya sewen neid aiteid wogō den.

⁴ Kolimei gudūya sewen wogō de di, aya anī atotau fenē age afen, anī ere, aya ait taka saa ilunem eig ye mog, karī aun, “Ereb kolimei gudūya

* **9:11:** Abadon ado Apolion nē gariya, Daũ Fiya Tamo.

sewen wogō den anī bun itāfiya uris uno fen, ō to utotauf.”

⁵ Age ye di, engel maaī bun ado teneub bun ifar mog ailen, are ima biyalē saa ilun yalesen.

⁶ Agef fen, engel ī, Negur gai gai mata ibodkeleya, saa ado ereb ereb ganan anī bun difaref, teneub ado ereb ereb ganan anī bun difaref, maaī ado ereb ereb ganan anī bun difaref inodin anī yana nem, wau kuturol fen, iron, “Foiya nē sain sā!

⁷ Anī ere, engel namba sewen anī yogon taur wese foug naa bun, Negur nē waa, ī yogon ferfer profet irokenēdin kilei, agef wō ye kisi falauf.”

⁸ Anī bure fele di, ait saa ilunem aya irokana di, karī aun, are baban irokanan, “Ule, engel maaī ado teneub bun ifaref anī ima bun, buk kori fiya fara feleya irouf anī wale,” yen.

⁹ Age ye di, aya engel garan ele fen, buk kori fiya naal anī ifanauf nigin arokenen. Ī aya irokanan, “Are wale wō wakas. Are ō namē bun dirikeī youf, anī ere, ō awā bun are nin te gen dan yōf.”

¹⁰ Aya buk kori fiya naal engel ima bun tamal ale on. Are neu awau bun nin te gen dan fiyan, anī ere, aya akalaisile di, nameun dirikeī fiyan.

¹¹ Age afe di, idi aya dirokanan, “Ō tamo kayau musei, teneub musei, od musei ado, king musei nigin, baban profet od wogō wouf.”

11

Od Megeir Fiya Nē Isennēya Tamo Uru

¹ Aya sisi fiya nē tibog gen werī taka ifana fen, irokanan, “Ule fen, Negur nē tempel ado alta sisi wo fen, Negur yana an ganim dalesedig anī uwes.

² Anī ere, tempel fofomala anī utor. Are to sisi wo, ere nigin, are haiden ifenēdin. Idi foti-tu ogō bun taun fateul anī lai difalauf.

³ Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun

wau gudū fiya nē gabar difoun ken, profet od kurō difesiyouf.”

⁴ Eneidi are oliv aa uru ado lam tutur uru, tenebur nē Odug wagen difaref.

⁵ Takam idi darau ifenēdiya nigin age foug are, yā eweid bunem wō ye fen, idi neid kiwai tar oditekei yakur falauf. Aibem taka idi darau ifenēdiyou fenē age foug, are agef laa foug bagai.

⁶ Tamo eneidi saa katī feleya nē megeir ado nigin, idi profet od wogō douf sain, uyē to isiyouf, agef fen, idi naan falei fe di, naud wōya nigin megeir ado fen, ereb sain orodif kilei, idi ereb sane fire fire bunem teneub yūya nē megeir ado.

⁷ Idi Negur nē od kurō fesiya bure difele di, gaar kuī anī ku isil idīya sā bunem ulō yeis fen, idi geid kusī de, wal feid fen, idenkesiyouf.

⁸ Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedi Odugeg aa tetek bun dukesin.

⁹ Tamo kayau fire fire bun tamal, ibor fire fire bun tamal, od fire fire bun tamal ado, teneub fire fire bun tamal, tamo kayau idi, naa towo ado naa taka atun bun, nedi bouweid buru dile fen, mumā difoug nigin to yo douf.

¹⁰ Tamo kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

¹¹ Anī ere, naa towo ado naa taka atun anī bure fele di, mata neseya nē uur Negur bunem idi namedin ilen, age fe di, idi fafā de difaren. Age dife di, idi diledin are kumī tererē den.

¹² Anī bure fele di, idi saa ilunem ait odug eig ye irokeneid mog, karī den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

¹³ Sain anī bun bagai, mimī odug wō ye di, taun anī bun ten tekelei adok daū felen. Sewen tausen tamo kayau mimī anim idenkesin. Age

fe di, idi gareya sã are kumĩ tererẽ de fen, saa ilun nẽ Negur fula fiya medeĩya difenen.

¹⁴ Morõ odug uyu ilen anĩ dõ fiya bure fele di, morõ odug anĩ dõ fiya mogo melsã bagai isiyou fenẽ.

Engel Taur Namba Sewen Anĩ Wese Fen

¹⁵ Engel namba sewen anĩ yogon taur wese fe di, saa ilun ait odug wowã ye fen, diron:

“Tenebur nẽ tano are, neda Odug ado yogon Kristus nẽ tano wõ yen,

age fe di, ã gai gai lo fiya nigin anĩ nẽ mudur ibodõf.”

¹⁶ Age de di, tuwenti-fo mudur adodo, Negur wagen dogo neid king nẽ sia bun dibodon wageidlẽ kuku de fen, Negur yana dales,

¹⁷ diron:

“Odug Negur saa ilun nẽ kusĩ tamo guri weid uyu uroudig anĩ, õ gama ubodok, kulu ubodon, amã õ de mayok, ere nigin, õ ogon megeir odug wale fen, lo fiya nigin king wõ won.

¹⁸ Teneub ganan waud sanen, anĩ ere, ogon didi mogo isin.

Tamo gare den anĩ es fediya sain mogo isin,

ogon ferfer profet, ogon tamo kayau fateul ado,

idi ogon yanã nigin anini den anidi nanaal ado odudug,

mala solo ifenẽdiya sain mogo isin,

idi teneub daũ difef anidi daũ fediya sain mogo isin.”

¹⁹ Anĩ bure fele di, Negur nẽ tempel saa ilun kã fele di, yogon tempel namen yogon bar itenẽya nẽ bogis wõ yen. Age fe di, kolimei filiya, gurũya odug, kolimei gudũya, mimĩ ado, uyẽ ais ado odug wõ yen.

12

Kayau Ado Gogour Odug

¹ Uris odug fire bagai saa ilun wõ yen. Kayau taka gaa ifoun kel

fen, yogon ye farumen ogolam ado, yogon mudur bun barisa tuwelf nẽ teter kurũ fen.

² Ì bou ado fen, kesu gõ fiya sain melsã di, darau nigin kaĩ yen.

³ Age fe di, uris takag saa ilun wõ yen. Gogour giriya odug bagai mudur sewen, karat ten ado, teter sewen mudur sewen bun difaren ado wõ yen.

⁴ Yogon ibum barisa fara fiya towo anĩ taka saa ilun waĩf, tenebur iraran. Gogour odug anĩ kayau kesu gõ fiya sain melsã anĩ wagen ifaren, are ì yogon kesu gõ falaisi di, itobouf nigin age fen.

⁵ Kayau kesu taka gõ fen, are kesu monog, ì teneub ganan ain manig nem ulum irokenẽdiyof. Age fe di, yogon kesu kaisã bagai gurar fe yale, Negur ado yogon king nẽ sia wagen irouselen.

⁶ Kayau, Negurem modoũ dodok fenen nẽ gerere tuan iya ilen, an ì Negurem 1,260 naa kulatun fiyẽf.

⁷ Agef fen, saa ilun kusĩ wõ yen. Maikel yogon engel geid, gogour odug geid kusĩ den. Age fe di, gogour odug, yogon engel geid, abag idi geid kusĩ den.

⁸ Anĩ ere, gogour odug in engel geid, idi neid megeir kisi feleya sã, anĩ nigin, idi saa ilun nedi modoũ ditoron.

⁹ Gogour odug bagai are dale diran, are gogour kulu tamal bagai, anĩ Devil be, Satan dedig, ì teneub ganan idegnẽdidig. Ì tenebur dale dira ken, yogon engeleg ì geid diraran.

¹⁰ Age fe di, aya saa ilunem ait odug eig ye mog, karĩ aun:

“Gama neda Negur nẽ kel yaleya, megeir, tano ado,

yogon Kristus nẽ total mogo isin.

Ere nigin, ì neda turada tar bouweid yũya od irõdig,

ì neda Negur wagen, gaa ado bõ, idi bouweid yũya od irõdig,

are mogo dale diran.

¹¹ Idi Sipsip Naal naud bunem ado, dogo neid Jesus nigin od wogõya bunem

ĩ wal difiyen.
 Idi dogo mata ibodōya nigin kisi
 fatuk to dale fen,
 laa uyu ditoron.

¹² Anĩ nigin, saa ilun ō ado,
 an ufaregef ā, wauĩ kulĩ ye!
 Anĩ ere, teneub ado maaĩ ā, meleĩlon
 ado,

ere nigin, Satan mogo ā bun
 isilen!

Seye ĩ bun isokosef,
 ere nigin, ĩ keleĩ, yogon sain
 mogo modegef.”

¹³ Sain gogour odug ĩ tenebur di-
 ran anĩ ile fen, ĩ kayau kesu monog
 gō fen anĩ iruf ilen.

¹⁴ Kayau are, gerere tuan modoũ ĩ
 nigin dodok fenen anĩ bun fatutu ye
 ilauf nigin, webi odug nē waye uru
 difenen, an kayau gogour odug anim
 to ironēf nigin, yar towo ado yar
 taka atun, kayau anĩ kulatun difiyēf.

¹⁵ Age fe di, gogour ĩ awa kurenem,
 naan odug gen, naan foula fen, are
 kayau anĩ wal fiye ken, kuwei bun
 yale irousilauf nigin age fen.

¹⁶ Anĩ ere, teneub kayau isenne
 ken, awa aã ye fen, gogour odug awa
 kurenem naan odug foula fen anĩ
 yakasin.

¹⁷ Age fe di, gogour odug kayau
 nigin fatuk bagai name fen, kayau
 nē ibor tar fau dibodok anidi ganan
 geid kusīya nigin ilen, idi Negur nē
 itāfiya dō de fen, Jesus nē biya od
 dirouf anidi.

13

¹ Agef fen, gogour odug maaĩ yerin
 ifaren.

*Gaar Kuĩ Maaĩ Namenem Ulō
 Yesin*

Age fe di, aya gaar kuĩ taka maaĩ
 namenem ulō yeis mog, ailen. ĩ karat
 ten ado, mudur sewen ado fen, ĩ
 yogon karat ten bun teter adodo fen,
 mudur ganan bun Negur kono fiya
 nē yana ado.

² Gaar kuĩ aya ailen are lepat*
 gen, anĩ ere, yogon ye are bea nē ye
 gegen, agef fen, awa laion nē gen.

* **13:2:** Lepat are fus kuĩ odug gen.

Gogour odug yogon megeir, yogon
 king nē sia ado, total odug, gaar kuĩ
 ifenen. ³ Gaar kuĩ nē mudur taka are
 dũ di, laa fou fenē gen yenen, anĩ
 ere, dũ di, laa fou fenē gen yenen are
 baban biya len. Teneub ganan terē
 de fen, gaar kuĩ dō difen.

⁴ Tamo idi gogour odug yana dale-
 sen, ere nigin, ĩ gaar kuĩ megeir
 ifenen. Age de fen, idi gaar kuĩg yana
 dales fen, diron, “Aim anĩ gaar kuĩ
 gen? Aim anĩ ĩ ado kusī yalesauf?”

⁵ Gaar kuĩ ĩ, yogo seli kulō fiya nē
 od ado Negur nigin kono fiya nē od
 wogō youf nigin sigor ifen ken, foti-
 tu ogō bun kabĩ yalouf nigin megeir
 ifenen.

⁶ Gaar kuĩ ĩ Negur kono fiyēf ni-
 gin, Negur yana, Negur nē ibodōya
 modoũ ado, idi saa ilun dibodok
 anidi bun bou yūya od wogō youf
 nigin awa kamen.

⁷ Gaar kuĩ ĩ, Negur nē tamo kayau
 geid kusī de fen, idi wal fediyouf
 nigin megeir ifenen. Agef fen, ĩ,
 ibor ganan, tamo kayau ganan, od
 fire fire ganan ado, teneub ganan nē
 mudur ibodōf nigin megeir ifenen.

⁸ Tenebur dibodok anidi ganan
 gaar kuĩ yana dalesauf, are idi, saa
 teneub ado kare fen sain bunem isi
 sain enei bun, idi yeneid Sipsip Naal
 dukesin anĩ nē mata ibodōya nē buk
 bun to itoton anidim age difouf.

⁹ Taka ĩ weder adouf, utornēg len,
 ĩ karĩ youf.

¹⁰ Taka ĩ kalabus bun ileya nigin
 igirnēf,

ĩ kalabus bun ilauf.

Taka ĩ dimig nem dukesiyouf nigin
 igirnēf,

dimig nem ĩ dukesiyouf.

Enei wō youf sain bun, Negur nē
 tamo kayau feseya sã total difar fen,
 momoiya kafĩ difel dirouwauf.

Gaar Kuĩ Teneb Bunem Ulō Yesen

¹¹ Anĩ bure fele di, gaar kuĩ taka
 teneburem ulō yeis mog, ailen. ĩ
 sipsip naal gen karat uru ado, anĩ
 ere, ĩ gogour odug gen wogō yedig.

¹² Ī gaar kuī uyulil ulō yesin anī lof mog, yogon megeir ganan yale fen, kabī yalen. Agef fen, ī, teneub ado idi tenebur difaref anidi ganan, gaar kuī uyulil ulō yesin, are dū di, laa fou fenē gen yenen anī baban biya len, ī yana dalesauf nigin nugo fedin.

¹³ Agef fen, ī uris memelik odug inodin, ī tamo kayau lo de mog, age fe di, yā saa ilunem tenebur isin anīg age fen.

¹⁴ Ī gaar kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. Ī, gaar kuī, are dimig nem dū di, baban biya len anī yana dalesauf nigin, idi anī nē malakanon dinouf nigin irokenēdin.

¹⁵ Ī gaar kuī uyulil ulō yesin anī malakanon mata ifenēya nē megeir ifenen, anī bunem, malakanon are sã wogō yen, ī age fe di, idi malakanon anī yana yaleseya ditoron anidi ganan didenkesin.

¹⁶ Gaar kuī dumen ulō yesin are, tamo kayau ganan, nanaal ado odudug, safina ado ado maleg, kafī fiya sã tamo ado ferfer, uris taka imeid biyalē be, demeid bun dalouf nigin nugo fedin.

¹⁷ Age fe di, aibem taka to na yale fen, to na sur fouf, ī gaar kuī nē uris adouf anī dogol, uris are gaar kuī nē yana be, yogo yana nē namba.

¹⁸ Kisi biya adouf are, enei keleī youf. Are taka ī kariya biya adouf, ī utornēg len, gaar kuī nē namba iwesauf, ere nigin, namba are tamo nē. In namba are 666.

14

Sipsip Naal Ado 144,000 Tamo

¹ Anī bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ī geid difaren.

² Age afe fen, aya ait taka saa ilunem, naan fatuk wī ye fen, gou redig gen ado, kolimei gudūya odug gen karī aun. Ait aya karī aun are,

harp kodēya tamo harp kodē dedig gen.

³ Age de fen, idi, king nē sia, ereb mata ibodōya aiwa adodo ado, mudur adodo wagedin seg mata dalen. Aibem taka seg anī keleīya kisi feleya sã, 144,000 idi tenebur tamal kel gei fedin anidim dogol.

⁴ Eneidi are kayau geid yen ken, amuyē inoya sã anidi, ere nigin, idi dogo nigin karētut bagai dibodon. Idi Sipsip Naal narib ile di, idi dō de diyōdig. Idi tamo ganan atun kel geif fen, faat uyulil yūya gen, Negur ado Sipsip Naal bun sesewi fedin.

⁵ Idi sigoredin idegēya taka to wō yen, idi bouweid bun od taka sã.

Engel Towo

⁶ Anī bure fele di, aya engel taka ilun bagai fatutu ye mog, ailen. Ī idi tenebur dibodok anidi, are teneub ganan, ibor ganan, od fire fire ganan ado, tamo kayau ganan bun kurō fesiyouf nigin, mata ibodkeleya nē biya od ado ailen.

⁷ Ī ait odugem iron, “Negur anini wiyēg fen, ī fula fiya medeīya wenēg, ere nigin, yogon es fiya nē sain mogo isin. Ī saa, teneub, maaī ado, naan warur inodin anī yana waleseg.”

⁸ Anī dō fiya engel takam dō fiye ken, iron, “Ī kubū yen! Babilon Odug kubū yen, ī teneub ganan yogon se-seirā tobonunā nē wain total ifeneīd don.”

⁹ Anī dō fiya engel takam dō fiyeīd fen, ait odugem iron, “Taka ī gaar kuī ado yogon malakanon yana yales fen, yogon uris dama bun be, ima bun yalouf,

¹⁰ Īg Negur nē didi nē wain yāf, are mogo total adok yogon didi nē kap bun fi felen. Ī engel fateul anidi ado Sipsip Naal meleid bun, salfa yā bobo reya bun darau yalouf.

¹¹ Age fe di, dogo neid darau nē yākaau fā ye, gai gai agef ibodkalauf. Idi gaar kuī ado yogon malakanon yana dalesedig anidi be, aib taka yogon yana nē uris yalen ī, naa be bō, si inoya nē sain sã.”

¹² Enei wō youf sain bun, Negur nē tamo kayau, idi Negur nē itāfiya dō de fen, Jesus nigin momoiya dirou kafī difelef anidi, feseya sã megeir difarauf bagai.

¹³ Anī bure fele di, aya saa ilunem ait taka eig ye mog, karī aun, “Utot: Idi sain enei bunem ilauf ganan, Odug bun gare douf are el fediyouf.”

Awa Uurem irok, “Momoi, idi dogo neid kabī bun si dinouf, ere nigin, idi ereb age difen are ado dilauf.”

Tenebur Saaf Kusu Fiya Sain

¹⁴ Aya lo afen, aya wageun lalo lalau taka ado, lalo bun ibodon are ‘tamo naal gen,* ĩ yogon mudur bun gol teter kurū fen, yogon ima bun dimig gunō waila ado irouf anī ailen.

¹⁵ Age fe di, engel taka tempel bunem isi fen, ĩ lalo bun ibodon anī ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.”

¹⁶ Age ye di, lalo bun ibodon ĩ, yogon dimig gunō waila ado tenebur waī fe di, tenebur saaf kokour fen.

¹⁷ Engel taka, saa ilun oun tempel bunem isin, ĩg dimig gunō waila ado iroun.

¹⁸ Age fe di, engel takag, yã lo fedig anī alta bunem isi fen, ait odugem ĩ dimig gunō waila ado iroun anī iweig irokenen, “Ogon dimig gunō waila ado wale fen, tenebur tamal wain nē biya kuru wo, ere nigin, wain biya are mayol.” ¹⁹ Engel ĩ yogon dimig gunō waila ado anī tenebur waī fen, wain biya kuru fen, agef fen, ĩ Negur nē didi nē wain asi fiya modoū odug bun iraran.

²⁰ Wain biya are, taun yerin wain asi fiya modoū bun asi difen, age dife di, naud wain asi fiya modoū bunem isin, are 300 kilomita meluk fen, wan ado hap mita ilun.

* 14:14: Daniel 7:13

15

Engel Sewen Teneub Daū Fiya Nē Sesen Sewen Adodo

¹ Anī bure fele di, aya saa ilun uris odug taka fire bagai ailen. Are engel sewen, idikeleya nē teneub daū fiya nē sesen sewen adodo, are idi idikeleya nē, ere nigin, idi bunem Negur nē didi idikalauf.

² Age afe fen, aya ereb taka maaī galas nem dinon anī, yã ado bagu fiya gen ail fen, idi gaar kuī, yogon malakanon ado, yogon yana nē namba kusī bun wal difen anidi, maaī yerin difaren anī ailen. Idi Negurem harp ifenēdin anī guri de fen,

³ Negur nē ferfer, Moses nē seg ado, Sipsip Naal nē seg dalen:

“Odug Negur saa ilun nē kusī tamo guri weid uyu uroudig anī, ò agodig anī odug fen, mala yū yaleya.

Teneub ganan nē King,

ogon naab are madur fen, momoi bagai.

⁴ O Odug, aim anī ò to kumī yo ken, ò yanā bun fula fiya medeīya to inouf?

Ere nigin, ò dogol fateul.

Ogon tobonunā biya madur bagai are yaor won nigin, teneub ganan disi fen,

ò wagen yanā dalesauf.”

⁵ Anī bure fele di, aya lo afe mog, saa ilun oun tempel, Negur nē Od Kurō Fesiya nē Salafat Fateul, are kã fen.

⁶ Tempel namenem, engel sewen idi teneub daū fiya nē sesen sewen adodo anī ulō desin. Idi kolos lalau amuyē sã, medeīya difoun ken, idi akoreid bun gol let gu difedin.

⁷ Age dife di, ereb mata ibodōya aiwa adodo takam, gol beī sewen Negur mata faimud ibodkeleya nē didi isokoseya anī, engel sewen ifenēdin.

⁸ Age fe di, tempel are, Negur nē fula fiya medeīya ado yogon megeir nē kaau isokose di, engel sewen neid teneub daū fiya nē sesen sewen anī

fau bure feleya sã mog, taka nem tempel namen iley a kisi feleya sã.

16

Beĩ Sewen Negur Nē Didi Ado

¹ Anĩ bure fele di, aya ait odug taka tempel bunem engel sewen irokeneĩd fen, eig ye mog, karĩ aun, “Uleg, beĩ sewen Negur nē didi adodo anidi teneub bun fi weleg.”

² Engel uyulil ile fen, yogon beĩ teneub bun fi fele di, guruma sane darau odug bagai anĩ, tamo kayau gaar kuĩ nē uris ado fen, yogon malakanon yana dalesedig anidi bun, wowã yen.

³ Anĩ dō fiya engel taka, yogon beĩ maaĩ bun fi fele di, maaĩ anĩ laa tamo nē naud gen falei fen, age fe di, ereb ereb maaĩwō mata dibodon ganan gare den.

⁴ Anĩ dō fiya engel taka, yogon beĩ, naan odudug ado naan warur anidi bun fi felen, age fe di, naud falei feledin.

⁵ Age fe di, aya engel naan lo fedig anĩ eig ye mog, karĩ aun:

“Ō gama ubodok, kulu ubodon, ō Fateul Bagai,
ō madur bagai,
ere nigin, ō mogo ago es won.

⁶ Idi ogon tamo kayau ado ogon profet didenkeis fen, dogo neid naud fi difelen,
anĩ nigin, ō idi naud yōya nigin wenēdin, are idi yōya kisin bagai wenēdin.”

⁷ Age ye di, aya alta eig ye mog, karĩ aun:

“Momoi, Odug Negur saa ilun nē kusĩ tamo guri weid uyu uroudig anĩ,
ogon es fiya are, momoi fen madur bagai.”

⁸ Anĩ dō fiya engel taka, yogon beĩ gaa bun fi fele di, gaa tamo kayau yã nem ifalegnēdiyof nigin megeir ifenen.

⁹ Idi uruwa total bagai bunem ifalegnēdi di, idi, Negur teneub daũ fiya nē sesen eneidi lo fedidig anĩ, yana kono difen, age de fen, idi waud

falei ye fen, Negur yana yaleseya ditoron.

¹⁰ Anĩ dō fiya engel taka, yogon beĩ gaar kuĩ nē king nē sia bun fi fele di, yogon tano gugum kelen. Tamo idi darau nigin baleid mū de fen,

¹¹ dogo neid darau ado gurumeid nigin, saa ilun nē Negur kono difen. Anĩ ere, idi ereb sane age difen anĩ to ditor ken, waud to falei yen.

¹² Anĩ dō fiya engel taka, yogon beĩ Yufretis naan odug bun fi fele di, naan are, gaa iseyan tamal king disiyof nē naab dodok fiya nigin, gere kelen.

¹³ Anĩ bure fele di, aya kaa sesen towo felĩ gen, idi gogour odug awa kurem, gaar kuĩ awa kurem ado, idegēya profet awa kurem ulō deis mog, ailen.

¹⁴ Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusĩ tamo guri feid uyu iroudig anĩ nē naa odug bun, idi kusĩ bun guru difof nigin gou difediyof.

¹⁵ Jesus irok, “Lo welegei, aya bē tamo gen asiyof! Taka ĩ mulaĩ yenēya sa ken, yogon kolos sirin ado ĩbodok are, ĩ el fiyek, ere nigin, ĩ gemū to ile di, yogon mama to dilouf.”

¹⁶ Age de fen, idi king, Hibru od nem Amagedon dedig nē an guru difof nigin gou difedin.

¹⁷ Anĩ dō fiya engel taka, yogon beĩ ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!”

¹⁸ Age fe di, kolimeĩ filiya, gurūya odug, kolimeĩ gudūya ado, mimĩ odug wō yen. Tamo tenebur difar mog, mimĩ odug age fiya taka to wō yen, mimĩ are gai odug bagai.

¹⁹ Taun odug Babilon are faraf towo fen, agef fen, teneub ganan nē taun daũ feledin. Negur ĩ Babilon Odug nigin weder fokōf fen, kap yogon didi barikã nē wain isokosen anĩ ifenen.

20 Nuyo ganan sa kele di, areig ilediya kisi feleya sã.

21 Saa ilunem uyē ais ado odug, teke tekelei 50 kilogram age fiya tamo bun kuku ren. Age fe di, idi uyē ais adom daū fedin nigin de fen, Negur kono difen, ere nigin, daū fiya are, gai sane bagai.

17

Kayau Gaar Kuī Teten Ibodon

1 Engel sewen beī sewen adodo anī takam isi fen, aya irokanan, “Usi, aya kayau bouwa na sur fedig odug, ī naan musei teten ibodōdig anī nē kafī fiya afelnōf.

2 Tenebur nē king, ī geid seseirã tobonunã dino di, tamo kayau tenebur difaref anidi, yogon seseirã tobonunã nē wain bunem, idi meleid waī yen.”

3 Age ye fen, engel ī Awa Uur bunem aya gerere tuan yale irouleyan. An aya, kayau, gaar kuī giriya, bouwa bun kono fiya yeneid barikã, mudur sewen ado, karat ten anī teten ibod mog, ailen.

4 Kayau ī, kolos giriya tu releya medeīya ado giriya bagai ifoun ken, gol, meein meli bagai ado, maaī tuwa meli bagai pel naki yen. Ī gol kap, ninir safineid ado yogon seseirã tobonunã nē sisik isokosen anī imam iroun.

5 Waa nē yana are, yogon dama bun ditoton:

BABILON ODUG
KAYAU BOUWEID NA SUR FIYA ADO
TENEUR NINIR IBODOK ANIDI
NEID SINA.

6 Aya, kayau, Negur nē tamo kayau neid naudeid ado, idi Jesus nē od kurō difesin anidi, nedi naudeid yokon, mala waī ye mog, ailen.

Aya kayau anī ail fen, fatuk bagai terē aun.

7 Age afe di, engel aya irokanan, “Ō ere nigin terē wof? Aya, ō, kayau nē waa ado, gaar kuī kayau anī teten ibodōdig, ī mudur sewen ado fen, karat ten ado anī nē waa anī faded ayōf.

8 Gaar kuī ulen are, kulu ibodon, gama ibodōya sã, agef fen, ī ku isil idīya sã bunem ulō yeis fen, yogo daū falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōya nē buk bun to itoton, idi gaar kuī anī dile fen terē douf, ere nigin, gaar kuī ī kulu ibodon, gama ibodōya sã, agef fen, fau dum isiyouf.

9 “Enei keleīya nigin, kisi biya adouf. Mudur sewen are, arei mudu sewen kayau teten ibodōdig anī.

10 Idig king sewen anidi. Faif idi kuku ralaisin, taka fau ibodok, taka fau isiya sã. Anī ere, ī isiyouf are, sain naal bagai ibodōf.

11 Gaar kuī kulu ibodon, gama ibodōya sã, are ī namba eit king, ī sewen anidi nē taka, ī yogo daū fiya bun ilauf.

12 “Karat ten ō ulen are, ten king idi tano fau yaleya sã anidi, anī ere, idi gaar kuī geid, aua tekelei king nē megeir dalouf.

13 Idi kisi tekelei ado fen, dogo neid megeir ado totoo, gaar kuī difenēf.

14 Idi Sipsip Naal geid kusī douf, anī ere, Sipsip Naal idi kusī bun wal fediyouf, ere nigin, ī odug neid Odug ado king neid King. Idi ī iweignēdin anī, igirnēdin anī, feseya sã dō difen anidi, ī geid difarauf.”

15 Age ye fen, engel aya irokanan, “Naan, kayau bouwa na sur fedig ī anī teten ibodon, ō ulen are, tamo kayau, guru fiya odug, teneub ganan ado, od fire fire ganan.

16 Karat ten ō ulen ado gaar kuī, idi kayau bouwa na sur fedig anī to orodiyouf. Idi ī daū difiye ken, gemū dinenēf. Idi ī bouwa dokon, yã nem tō difiyēf.

17 Negur idi neid waud bun kisi anī ino di, idi Negur nē oroya dō difouf nigin, idi kisi tekelei dino fen, dogo neid tano gaar kuī difenēf, age dife dile mog, Negur nē od kisi falauf.

18 Kayau ō ulen are, taun odug, tenebur nē king neid mudur ibodok anī.”

18

Babilon Narī Fen

¹ Anī bure fele di, aya engel taka saa ilunem isi mog, ailen. Ī megeir odug ado, age fe di, yogon fula fiya medeīya anim teneub lalan len.

² Ī ait odugem, total bagai iweig iron:

“Kubū yen! Babilon Odug kubū yen!
 Ī, kaa sesen neid fō,
 kaa sesen ganan neid fō ado,
 ninā amuyē ado ninir sane to ile
 oroya ganan neid fō falei fen.

³ Teneub ganan,
 yogon seseirā tobonunā nē wain
 total don.

Tenebur nē king, Ī geid seseirā tobonunā dinon,
 age fe di, tenebur nē bisnis tamo
 idi, yogon safina nigin oroya
 total ado bunem, safina musei
 dalen.”

⁴ Anī bure fele di, aya ait taka saa ilunem eig ye mog, karī aun:

“Neu tamo kayau, ā yogon mosor anī
 utin to walogouf nigin ado,
 ā in mala solo sane taka to walo-
 gouf nigin,
 ā Ī utornēg fen, usig,

⁵ ere nigin, yogon mosor mogo mudu
 ilun isel saa ilune di,
 Negur yogon idododin nigin
 weder fokō yen.

⁶ Ī ifenein kilei abag wenēgouf,
 ereb Ī age fen are, Ī age fen
 anī ado, taka teten unog fen,
 wenēgouf.

Ereb Ī yogon kap bun falei fen
 are, Ī falei fen anī ado, taka
 falei ge fen, teten unogouf.

⁷ Ī fula fiya medeīya ado safina meli
 meli, yogo nigin yalen kilei,
 darau ado wau gudū fiya fatuk
 bagai wenēgouf.

Ī yogon wau bun, yogo yana yales
 fen,
 ‘Aya kuin abodok, aya waab sā,
 agef fen, aya to bagai wau gudū
 fouf,’ yen.

⁸ Anī nigin, naa taka bun, in daū
 fiyēya nē sesen Ī bun isiyouf,

are laa, wau gudū fiya ado,
 kadir.

Agef fen, Ī yā bun isaikalauf,
 ere nigin, Odug Negur Ī es fiyek,
 Ī anī megeir barikā.

⁹ “Tenebur nē king idi, Ī geid se-
 seirā tobonunā dino fen, yogon sa-
 fina meli meli foi difen anidi, Ī isaī di,
 kaau dile fen, idi Ī nigin waud gudūf
 fen, inā logurouf.

¹⁰ Idi in darau yaleya anī nigin
 fatuk bagai kumī de fen, gerō difar
 fen, dirōf:

“ ‘Malalon! Malalon, O taun odug,
 O Babilon, taun megeir ado!

Aua tekelei bun, ogon daū fiya mogo
 isin!’

¹¹ “Tenebur nē bisnis tamo idi Ī
 nigin waud gudūf fen, inā logurouf,
 ere nigin, taka nem idi neid safina
 baban to na yalouf,

¹² safina are, gol, silwa, meein meli
 meli ado, maaī tuwa meli bagai pel;
 gabar lalau medeīya, gabar giriya
 tu releya medeīya, gabar slika ado,
 gabar giriya bagai; aa meli meli fire
 fire; ereb ereb fire fire elefan karat
 nem, aa meli meli nem, bras nem,
 ain nem ado, mambol nem dinodin;

¹³ sinamon, ye, aa gaula sumeī
 nigin tō fiyadig, moul aa bun tamal
 sumeī biya biya ado, moul biya
 takag; wain ado oliv moul; flawa ado
 wit, bulmakau ado sipsip; hos ado
 karis, ferfer ado tamo mata dibodok.

¹⁴ “Idi dirōf, ‘Ereb ereb yaleya ni-
 gin ō oroyon are, mogo sa kelen.
 Ogon safina musei ado ereb ereb fula
 fiya medeīya ganan, mogo sa kelen,
 idi baban to bagai fotou difouf.’

¹⁵ Bisnis tamo safina eneidi na sur
 dife fen, Ī bunem safina musei dalen
 anidi, yogon darau nigin fatuk bagai
 kumī de fen, gerō difarauf. Idi inā
 logurouf fen, waud gudūf fen,

¹⁶ diweig dirōf:

“ ‘Malalon! Malalon, O taun odug,
 kolos lalau meli bagai, giriya
 tu releya medeīya ado, giriya
 bagai ifoun ken,
 gol, meein meli bagai ado, maaī
 tuwa meli bagai pel naki yen!

17 Aua tekelei bun dogol, safina odug
bagai age fiya daū felen!’

“Maaī bun ulum irouya tamo
ganan, idi waag bun diyōdig ganan
ado, idi maaī bunem dogo neid
mata ibodōya nē safina daledig anidi
ganan, gerō bagai difarauf.

18 Sain idi ī isaī di, kaau dile fen, idi
diweig dirōf, “Taun odug eig fiya taka
tau ibodon?”

19 Idi aas mudureid bun digu ken,
waud gudū fe di, inā logur fen, di-
weig dirōf:

“ ‘Malalon! Malalon, O taun odug,
an idi maaī bun waag adon
ganan,
yogon safina odug bunem safina
musei dalen!

Aua tekelei bun, are daū felen!

20 O saa ilun, ī nigin waū kulī ye!
Negur nē tamo kayau, aposel
ado, profet, wauī kulīg!

Ī ā age yein kilei, Negur ī es fiyen.’ ”

21 Age ye fen, engel megeir ado,
meein odug wit itutuya nē age fiya,
yale fen, maaīwō ira ken, iron:

“Waila sane eig fiya bunem,
Babilon taun odug agef daū fe di,
baban to bagai dilouf.

22 Harp kodēya tamo, seg tamo, kelel
fiya tamo ado, taur fūya tamo,
idi neid ailō ō bun baban to
bagai karī douf.

Kabī fire fire ganan nē keleī tamo,
ō bun baban taka to bagai wō
youf.

Wit itutuya nē meein ait,
ō bun baban to bagai karī douf.

23 Lam nē lalan ō bun baban to bagai
so fouf.

Tamo kayau yalef yalef yeya ait,
ō bun baban to bagai wō youf.

Ogon bisnis tamo idi, teneub ganan
nē tamo odug.

Ō ogon idegēya kosē bunem,
teneub ganan udegnēdin.

24 Profet, Negur nē tamo kayau ado,
tenebur ein didenkesin anidi
ganan neid naudeid, ī bun
dilen.”

19

Halleluya!

1 Anī bure fele di, aya saa ilun
tamo kayau guru fiya mala odug
neid aiteid gou reya gen, karī aun:

“Halleluya!

Kel gei fiya, fula fiya medeīya ado,
megeir are, neda Negur nē.

2 Yogon es fiya are, momoi fen madur
bagai.

Ī kayau bouwa na sur fedig odug,
ī yogon seseirā tobonunā bunem
teneub daū fen anī, es fiyen.

Ī yogon ferfer neid naudeid, anī mala
solo ī bun ifenen.”

3 Idi baban diweig diron:

“Halleluya!

Ī bunem kaau faimud gai gai ise-
lauf.”

4 Mudur adodo tuwenti-fo ado,
ereb mata ibodōya aiwa adodo, kuku
de fen, Negur king nē sia bun ibodon
anī yana dalesen. Age de fen, idi
diweig diron:

“Momoi, Halleluya!”

5 Age dife di, ait taka, king nē sia
bunem wō ye fen, iron:

“Ā in ferfer ganan,
ī anini wiyēgedig,
nanaal ado odudug,
neda Negur yana waleseg!”

6 Age ye di, aya guru fiya mala
odug aiteid gen karī aun, are naan
fatuk wī ye fen, gou redig gen ado,
kolimei gudūya odug gen, diweig
dirō mog, karī aun:

“Halleluya!

Ere nigin, neda Odug Negur saa
ilun nē kusī tamo guri feid uyu
iroudig anī, ī lo fiya nigin king
ibodok.

7 Ada wauda kulī ye, wauda al fe fen,
fula fiya medeīya tafenēf!

Ere nigin, Sipsip Naal kayau yaleya
nē naa mogo isin,

age fe di, yogon kayau mois
mogo yogo nigin dodok fen.

8 Kolos lalau meli bagai, medeīya ado
filiya,

ī ifonūf nigin ifenen.”

(Kolos lalau meli bagai are, Negur nē tamo kayau neid tobonuneid madur anī.)

⁹ Anī bure fele di, engel aya irokanan, “Utot: ‘Idi Sipsip Naal kayau mois ado bagu fiya nē sifa bun ibodōya nigin iweignēdin are, idi el fedif!’ ” Age ye fen, ī tobol fe iron, “Enei are, Negur nē od momoi bagai.”

¹⁰ Age fe di, aya ī yana alesauf nigin, ye gariyan kubū aun. Anī ere, ī aya irokanan, “To ago! Aya, ō ado, ogon turā tar idi Jesus nē wogōya kafī difel dirouf anidi geid, ada in ferfer. Negur yana wales! Ere nigin, Jesus nigin wogōya are, profet od wogōya nē uur anī.”

Tamo Hos Lalau Teten Ibodon

¹¹ Aya saa ilun kā feleya ifar mog, aya wageun an hos lalau ifar mog, ailen. Tamo anī teten ibodon are, yana ‘Feseya Sā Dō Fiya Biya’ ado ‘Momoi Bagai’ dedig. Madur bagai bunem, ī es feid fen, kusī yedig.

¹² Yogon mala are, yā mala fitotoleya gen, agef fen, yogon mudur bun tetet musei biya. Ī yogo bun yana itotoya taka ado, are aibem taka to keleī, ī yogo dogol.

¹³ Ī kolos meluk naud bun nu fen anī ifonun. Yogon yana are, Negur nē Od.

¹⁴ Saa ilun nē kusī tamo, idi hos lalau tetedin dibodada ken, kolos meli bagai, lalau fliya difoun ken, ī dō difiyen.

¹⁵ Ī yogon awa bunem, dimig waila ado, teneub ganan yūf nigin wō yen. “Ī ain manig nem ulum iroukenēdiyof.”* Ī, Negur saa ilun nē kusī tamo guri feid uyu iroudig anī nē didi total nē wain asi fiya modoū bun, asi fouf.

¹⁶ Ī, yogon kolos meluk bun ado yogon tukuri bun, yana enei itotoya ibodok:

KING NEID KING ADO ODUG NEID
ODUG.

¹⁷ Age afe fen, aya engel taka gaa bun ifar mog, ailen, ī ait odugem ninā ganan ilun fatutu def anidi iweig irokenēdin, “Usig, Negur nē sifa odug bun gurug,

¹⁸ agog fen, ā, king bouweid, kusī mudur bouweid, tamo megeir adodo neid bouweid, hos ado hos tetedin dibodadak anidi neid bouweid, tamo kayau ganan, kafī fiya sā tamo ado ferfer, nanaal ado odudug, bouweid wāgauf.”

¹⁹ Anī bure fele di, aya, gaar kuī, tenebur nē king ado, dogo neid kusī tamo idi, tamo hos teten ibodon anī, yogon kusī tamo geid weim kusī douf nigin, guru de mog, ailedin.

²⁰ Anī ere, gaar kuī are dale diroun, age de fen, idegēya profet, ī memelik nē uris gaar kuī mala bun inodin anīg, gaar kuī ado dale diroun. Uris anidi bunem, ī, idi gaar kuī nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yā bobo reya barikā ado bun, gei de diraran.

²¹ Dogo neid kusī tamo ganan, dimig, tamo hos teten ibodon awa bunem wō yen anim, idenkesin, age fe di, ninā ganan idi neid bouweid dō dō, teid isokosen.

20

Tausen Yar

¹ Anī bure fele di, aya engel taka saa ilunem, ī ku isil idīya sā nē ki ado, sen odug imam irou fen, isi mog, ailen.

² Ī gogour odug, gogour kulu tamal bagai, are Devil be Satan dedig anī yale fen, tausen yar ifarauf nigin sen nem ifokelen.

³ Ī ku isil idīya sā bun ira ken, ku katī fel fen, anī teten itāfiya uris inon. Ī tenebur tamo kayau to idegneid mog, tausen yar ilauf nigin age fen. Anī bure fele di, sain tobega dogol ī folō fiyekalauf.

* 19:15: Sam 2:9

⁴ Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fā de fen, Kristus geid, lo fiya nigin tausen yar ilauf anī nē mudur dibodon.

⁵ (Tamo gare den tunī ganan to ke de, fā de mog, tausen yar are bure felen.) Enei are, kel fāya uyulil anī.

⁶ Idi kel fāya uyulil anī bun ke de, fā den are, idi el feid fen, fateul. Laa uyulil anī dō fiya isif are, idi bun megeir sā. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

Satan Daū Felen

⁷ Tausen yar anī bure fele di, Satan ī yogon kalabus bun tamal yalelnē di,

⁸ ī tamo kayau teneub ganan bun idegnēdiyof nigin, teneub idīyan aiwa adodo, are Gog ado Magog bun ile fen, idi kusī bun ileyā nigin gou fediyof. Idi neid namba are, maaī ubun mumul ifaref age fiya.

⁹ Idi teneub modoū odug bun dile fen, Negur nē tamo kayau neid modoū ado, taun Negur anī nigin wau laa fedig anī salili difen. Anī ere, yā saa ilunem isi fen, idi yakur feidlen.

¹⁰ Age fe di, Satan idi idegnēdin are, ku kolili fiya meein salfa yā bobo reya ado bun dale diran, gaar kuī ado idegēya profet idi ketem mogo an diraran. Idi ganan an sain ganan, bō ado gaa ado, gai gai darau dalouf.

Gare Den Anidi Es Fediyof

¹¹ Anī bure fele di, aya king nē sia lalau odug ado, taka anī teten ibodon anī ailen. Teneub ado saa, ī mala iran nē waīf yale di, idi modoū san.

¹² Age fe di, aya, gare den anidi, odudug ado nanaal, sia wagen difaren ado, buk ikoudiya anidig

ailedin. Buk takag ikouya ailen are, mata ibodōya nē buk. Gare den anidi, ereb age difen buk bun itoton anī kilei, es fedin.

¹³ Maaī bun gare den anidi, maaim ifenēdi di, laa ado Hades, gare de di, idi bun difaren anidi difenēdin. Age fe di, mugu mugu ereb age difen kilei, es fedin.

¹⁴ Age fe di, laa ado Hades, ku kolili fiya yā bobo reya ado bun geif iraran. Ku kolili fiya yā bobo reya ado, are laa uyulil isin anī dō fiya laa anī.

¹⁵ Aib taka ī, yogon yana mata ibodōya nē buk bun itotoya sā ilen, ī ku kolili fiya yā bobo reya ado bun, yale iran.

21

Jerusalem Mata

¹ Anī bure fele di, aya, saa mata ado teneub mata, ailen. Saa uyulil ado teneub uyulil are waīf yalen, agef fen, maaī baban to ibodon.

² Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon ileyā nigin naki rel fen, dodok fen gen.

³ Age afe fen, aya ait odug king nē sia bunem eig ye mog, karī aun, “Gama Negur nē salafat, tamo bun ibodok, age fe di, ī idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf.

⁴ Ī idi neid meleid bun maruid ganan waī falauf. Baban laa, wau gudū fiya, inā yaleya be, darau to ibodōf, ere nigin, ereb ereb tubu nē are, ganan sa kelen.”

⁵ Ī king nē sia bun ibodon are iron, “Aya ereb ereb ganan mata anof!” Age ye fen, ī iron, “Enei utot, ere nigin, od eneidi are, agef bagai wō youf nigin momoi bagai.”

⁶ Ī aya irokanan, “Gama mogo bure felen. Aya uyulil ado idikeleya, gariya ado idikeleya. Taka ī naan ail fouf, aya ī mata ifenēya nē naan

warur bun tamal, mala sã, afenē di, yãf.

⁷ Taka ï kusĩ wal fouf, ï enei ganan akorouf, age fe di, aya yogon Negure di, ï neu kesu ibodōf.

⁸ Anĩ ere, idi dume dume age difedig, momoiya sã, tobonunã sane bagai dinodig, tamo dukesidig, noli tobonunã dinodig, idegēya bun kosē dedig, idegēya waitou yana dalesedig ado, idegēya tamo ganan, idi neid modoũ are, ku kolili fiya meein salfa yã bobo reya barikã ado bun. Enei are, laa uyulil dō fiya namba tu laa anĩ.”

⁹ Engel sewen anĩ taka, beĩ sewen idikeleya nē sesen barikã teneub daũ fiya nē ado anĩ taka, isi fen, aya irokanan, “Usi, aya kayau mois, Sipsip Naal nē kayau anĩ afelnōf.”

¹⁰ Age ye fen, ï aya Awa Uur bunem arei odug ilun bagai anĩ bun irouleya fen, Taun Fateul, Jerusalem, Negur bun tamal saa ilunem isi mog, ifel-nan.

¹¹ Taun are, Negur nē fula fiya medeīya anim so fen. Yogon medeīya are, meein na sur fiya nē meli bagai jasper gen, yogon filiya are, galas medeīya bagai gen.

¹² Taun are, yogon garaĩ odug ilun fen, bobog tuwelf ado. Agef fen, engel tuwelf bobog bun difaren. Bobog bun, Israel ibor tuwelf anidi yeneid itoton.

¹³ Bobog towo gaa iseyan, bobog towo not melē, bobog towo saut melē, bobog towo gaa ileyan age de difaren.

¹⁴ Taun anĩ nē garaĩ, gariya tuwelf ado, gariya tuwelf anĩ bun, Sipsip Naal nē aposel tuwelf yeneid ado.

¹⁵ Engel aya wogō fiyan are, ï taun, taun nē bobog ado, yogon garaĩ sisi fediyouf nigin, sisi fiya nē gol tibog iron.

¹⁶ Taun nē bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yogon bagalam ado yogon ilun areg de anĩ kilei.

¹⁷ Engel ï, tamo nē sisi fiya bunem, taun garaĩ nē mugi sisi fen, are 65

mita, areg engel nē sisi fiya.

¹⁸ Garaĩ are, meein jasper nem inon. Agef fen, taun are gol bagai nem dogol inon, gol filiya are galas medeīya bagai gen.

¹⁹ Taun garaĩ nē gariya are, meein meli bagai fire fire nem, naki fen. Gariya uyulil ifaren are jasper nem, anĩ dō fiya are meein maaĩ gegē gen sapaia nem, anĩ dō fiya are meein kalsedoni nem, anĩ dō fiya are meein aarau mata gen emeral nem,

²⁰ anĩ dō fiya are meein giriya ado lalau sadonikis nem, anĩ dō fiya are meein giriya konilian nem, anĩ dō fiya are meein aarau mayo gen krisolait nem, anĩ dō fiya are meein aarau mata gen beril nem, anĩ dō fiya are meein aarau mayo gen topas nem, anĩ dō fiya are meein krispres nem, anĩ dō fiya are meein haiasin nem, anĩ dō fiya are meein giriya ametis nem.

²¹ Bobog tuwelf are maaĩ tuwa meli bagai pel tuwelf, bobog teke tekelei, maaĩ tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

²² Aya taun an tempel taka to ailen, ere nigin, Odug Negur saa ilun nē kusĩ tamo guri feid uyu iroudig anĩ ado Sipsip Naal are, idi anĩ tempel.

²³ Taun are, gaa lalan be, ogō lalan yaleya nigin to yenek, ere nigin, Negur nē fula fiya medeīya anim lalan ifenēdig, agef fen, Sipsip Naal are taun nē lam.

²⁴ Tenebur tamo kayau, taun anĩ nē lalan bun diyō di, tenebur nē king, nedi fula fiya medeīya, taun anĩ bun dirousiyouf.

²⁵ Naa taka bun, yogon bobog taka to bagai inolalauf, ere nigin, an bō sãf.

²⁶ Tenebur tamo kayau idi, nedi fula fiya medeīya ado yana odug, taun anĩ bun dirou disiyouf.

²⁷ Ereb taka amuyē ado an namen to ilauf, agef fen, aib taka mama nē tobonunã age fedig be, idegēdig, ïg an to ilauf, anĩ ere, idi yeneid Sipsip

Naal nē mata ibodōya nē buk bun itoton anidi dogol dilauf.

22

Mata Ifenēya Nē Naan Odug

¹ Anī bure fele di, engel ī, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan,

² naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū tuwelf fedig, ogō teke tekelei bun yogon faat yūdig. Agef fen, aa aarau are, tenebur tamo kayau dagi yalelkenēdiya nē.

³ Isisīya taka baban to ibodōf. Negur nē ado Sipsip Naal nē king nē sia are, taun namen ibodōf, age fe di, yogon ferfer idi, in aruna dalouf.

⁴ Idi in nawa dilouf, age dife di, yogon yana idi demeid bun ibodōf.

⁵ Baban bō taka to ibodōf. Idi lam nē lalan be, gaa nē lalan nigin, to kisi difouf, ere nigin, Odug Negur idi lalan ifenēdiyof. Age fe di, idi gai gai lo fiya nigin mudur dibodōf.

⁶ Engel ī aya irokanan, “Od eneidi are, agef bagai wō youf nigin momoi bagai. Odug, profet neid uur nē Negur, ī ereb mogo wō youf bagai anī yogon ferfer ifelnēdiyof nigin, yogon engel sur fen.”

Jesus Mogo Isif

⁷ “Ulef! Aya mogo kaisā bagai asiyou fenē! Taka ī profet od buk enei bun ibodok anī dō fef are, ī el fiyek.”

⁸ Aya, Jon, ayam eneidi karī au fen, ailedin. Sain aya anī karī au fen, ailedin, aya engel aya ifelnan anī, ye gariyan kubū au fen, yana alesauf nigin age afen.

⁹ Anī ere, ī aya irokanan, “To ago! Aya, ō, ogon turā tar profet ado, idi buk enei nē od dō difef anidi ganan geid, ada in ferfer. Negur yana wales!”

¹⁰ Age ye fen, ī aya irokanan, “Ō buk enei nē profet od anī bun, itāfiya

uris to uno, ere nigin, sain mogo melsak.

¹¹ Aib ī mosor inof, utornēg len, ī agef mosorei youf. Aib ī sane age fef, utornēg len, ī sane agei fouf. Aib ī biya age fef, utornēg len, ī biya agei fouf. Aib ī fateul ibodok, utornēg len, ī fateulei youf.”

¹² Jesus irok, “Ulef! Aya mogo kaisā bagai asiyou fenē! Mala solo tamo ifenēdiya nē are yeir, aya bun ibodok, anī nigin, aya, tamo mugu mugu ereb age difen kilei anī afenēdiyof.

¹³ Aya uyulil ado idikeleya, uyulil nē ado dumen bagai nē, gariya ado idikeleya.

¹⁴ “Idi dogo neid kolos meluk kulo difef, anī bunem, idi mata ifenēya nē aa bun ileya nigin ado, taun nē bobog bunem taun namen ileya nigin kisi feleya, are idi el fedif.

¹⁵ Mayarē difaref are, idi gaū, idi idegēya bunem kosē dedig, noli tobonunā dinodig, tamo dukesidig, idegēya waitou yana dalesedig ado, idi ganan idegēya nigin waud laaf fen, age difedig anidi.

¹⁶ “Aya, Jesus, ayam kurō fesiya od enei sios nigin afeneīf nigin, ā bun neu engel sur afen. Aya Dawid nē Warumutei ado Ibor, Bonimeī nē Barisa medeīya.”

¹⁷ Awa Uur ado kayau mois dirok, “Usi!” Aib taka ī karī yef, irōf, “Usi!” Aib taka ī naan ail fef, utornēg len, ī isiyof. Aib taka ī orof, utornēg len, ī mata ifenēya nē naan ege luwa yalouf.

¹⁸ Aya, idi ganan buk enei nē profet od karī def anī, totol bagai arokenēdif: Aibem taka od enei teten ereb taka tobol fouf, Negur ī daū fiya nē sesen buk enei bun itoton anī, ī bun tobol fouf.

¹⁹ Agef fen, aib taka profet od nē buk enei bun od taka yalelauf, Negur ī, mata ifenēya nē aa ado taun fateul, buk enei bun faded fel itoton anidi bun tamal, ī yalelnēf.

²⁰ Taka ĩ enei ganan kurō fesif, are irok, “Mmoi, aya mogo kaisã bagai asiyou feně.”

Mmoi. Odug Jesus usi.

²¹ Odug Jesus nē wau ifenēya, Negur nē tamo kayau bun ibodōf. Mmoi.

Od Marik Nu Testamen Enei Bun Ifaredif Nē Fadedya

Aa Fig

Aa fig are aa taka, in faat anī yōya nigin dan bagai.

Aa Gaula Sumei Biya (Luk 1:9-11; Revelesen 8:3, 4)

Aa gaula sumei biya are aa taka nē sumin aarau ado warumutei anidi bunem dinodig. Tempel bun, tamo kayau Negur bun kosē douf sain bun, aa gaula sumei biya anī tō difedig, are sumei meli bagai youf nigin.

Aa Hisop (Jon 19:29; Hibrū 9:19)

Aa hisop are aa taka, pris idi naan be naud bun nu difeis fen, safina bun be tamo kayau bun wiri difedig, are idi suma anī bunem Negur nē lo fiya bun fateul wō youf nigin age difedig.

Aa Oliv (Rom 11:17, 24; Jems 3:12; Revelesen 11:4)

Aa Oliv are aa taka, anī faat adodig. Juda idi aa oliv faat nem moul dinodig. Moul anī saaf yabiya nigin, bouwa bun wā fiya di, sumei biyauf nigin ado ereb tuni musei nigin anī kabī difenēdig. Juda idi neid ibodōya bun, oliv are safina odug bagai. Aa Oliv nē Arei are arei taka Jerusalem non ibodok, an aa oliv ifaredidig.

Aa Tetek

Rom tamo kayau neid tobonunā bun, tamo taka ereb sane bagai age fen ouf, are eig fiya, taka yukesiya be, taka fefu fiye ken, bē yaleya anī, idi i kafī fiya bun aa tetek ilun dū di, laa foug nigin age difedig.

Idi aa masak uru aninem aa tetek dinodig, age difel fen, idi tutim tamo aa tetek bun dūdig, oo, malum i difōdig. Age de fen, idi aa tetek dales diteg ifare di, tamo an ditornē di, i an kuuri yef ile laa fedig. Tamo taka i aa tetek bun eig de duk, i darau odug bagai yalef ile

fen, dum i laa fedig. Are anīg taka, mama yaleya nigin odug bagai.

Aa Wain Faat

Aa wain faat are faat taka. Anī bunem wain dinodig. Juda idi nedi kabier aa wain musei diteneidig, age de fen, idi aa wain faat musei youf nigin aa wain el de lo difedig.

Abel (Matyu 23:35; Luk 11:51; Hibrū 11:4, 12:24)

Abel are, i Kain tura naal.

Abraham

Abraham i, Israel tamo kayau neid temeid matu. Kulu bagai, Negur i Abraham irokenen, are i teneub mata taka i an ibodōf nigin ifenēf yen. Age fe di, teneub anī dogo neid bagai youf. Abraham yagon fō gariya itor ken, ile teneub anī imirēf nigin Negur i irokenen. Abraham dōf age fen. I yar musei, gerō bagai iyok ile, ile teneub anī fotou fen. Teneub are gama Israel dedig anī.

Are Abraham bun, Negur in uyulil bar itenēya anī inon. Negur i Abraham irokenen, i ado in ibor tar anī, Negur nē tamo kayau bagai wowā youf, aib idi Negur dō difoug are, Negur idi kulatun fediyoug yen.

Abraham aiwa, Sara dedig anī yalen. Idi kesu taka yaleya san, ile ile, idi uruwom tubau bagain. Anī nigin, Negur memelik ino di, Sara kesu gō fen. Idi kesu yana dū Isak den.

Isak i biya fen, i kayau Rebeka dedig anī yalen. Rebeka kesu uru gō fen, are idi aina ado, idi yeneid are Esau, Jakop ado. Jakop i yana takag Israel, i bunem Juda idi, Israel tamo kayau yeya yana anī dalen.

Kesu monog uru anidi taka, Jakop i kayau uru tura ado anī gei fen, idi yeneid Lea, Rahel ado, babaneg kayau uru yalen. I kesu monog tuwelf gogū fen, idi anī Israel ibor tuwelf neid tubuid tar. Idi yeneid Jon nē kurō fesiya od

7:4-8 (Revelesen 7:4-8) nē itotoya bun gī fen.

Kesus monog eneidi, kesu musei adodof ile, Israel tamo kayau fulus bagai felen. Anī nigin, idi adok Abraham nē ibor tar.

Adam (Luk 3:38; Rom 5:14; 1 Korin 15:22, 45; 1 Timoti 2:13, 14; Jud 14)

Negur uyulil tamo inon, are Adam. Negur ī Adam kare fiyen, are teneub nem.

Adam ī, aiwa Eva adom, uyulil Negur nē itāfiya difodul ken, mosor dinon. Sain anī bunem ilen, tamo mosor bun dilelen.

1 Korin 15:45 bun, Jesus Kristus ī, idikeleya nē Adam yef, ere nigin, ī tamo kayau, nedi mosor bun tamal kel gei fedin. Adam im mosor inon, anim tamo kayau tunī ganam mosor bun dilelen. Jesus Kristus, tamo kayau dogo neid mosor bun tamal kel gei feid fen, idi ibodōya mata anī ifenēdin.

Alabasta (Matyu 26:7; Mak 14:3; Luk 7:37)

Sain taka bun, kayau taka, moul sumeī meli bagai anī, Jesus ye kulo foug nigin irou isin. Moul enei, gulub taka, are meein gariya fire taka nem dinon anī namen ibodon. Meein age fiya anī alabasta dedig.

Alta

Juda idi, Negur bun sesewi fediya anī age difedig. Idi, sesewi fiya nigin, yaro, are sipsip, meme be, bulmakau age fediya anī didenkesidig. Alta are, modoū an sesewi difedig. Meein nem anī dinodig.

Aposel

Jesus uyulil in dō fiya tar tuwelf igirnēdin, are idi yogon aposel wowā douf nigin (Matyu 10:1-4; Mak 3:13-19; Luk 6:12-16).

Tamo enidi ī geid dibod ken, ifelnēdin. Jesus laaf fen, kel fā yen sain bun, idi ī meledim dilen. Ī, tamo kayau bun, ereb idi dilen ado biya od wogō difediyouf nigin idi susur fedin. Idi, tamo kayau Jesus

nigin momoi den anidi neid uyu irouya wowā den.

Aposel nē buk bun, Pol, Banabas ado, tamo tunīg, are idig aposel dedig. Idig tamo Jesus Kristus nē kabī yaleya nigin igirnēdin. Inglis nem, tamo enidi are 'apostles' dedig. Od enei nē gariya are, tamo idi susur fedif anidi.

Areopagus (Aposel 17:19-22; 34)

Areopagus are, arei mudu taka nē yana Atens taun ibodon. Taun tamo kayau yeneid adodo arei mudu anī bun guru difedig. Anī nigin, tamo kayau anidi neid guru fiya anīg Areopagus dedig.

Aron (Luk 1:5; Aposel 7:40; Hibiru 5:4, 7:11, 9:4)

Aron ī, Jakop nē gere tar tuwelf atun taka Lewi nē ibor bun tamal anī taka. Tamo anī, ī pris kabī yalouf nigin uyulil igirnen, are Negur ī iron, Aron nē ibor tar anidi, Israel tamo kayau are Juda anidi atun, pris dibodōf, yen.

Aron ī, are Moses tura biya. Idi uruwom uyu kū de fen, Israel tamo kayau Isip neid ferfer difaren sain bun, kabī dalen. Idi israel tamo kayau kafī fiya bun tamal dalelnēdiyof nigin uyu diroun.

Sain taka bun, Israel tamo kayau tunī, Moses ado Aron kiwai difenēdi di, Negur ī, idi anī uyu irouya tamo bagai igirnēdin anī yaor fe ifelnēdin. Negur, idi Israel ibor tuwelf uyu irouya morou morou neid manig dale, Negur nē Salafat bun gō difoug nigin irokenēdin. Negur ī iron, tamo ī uyu irouya ibodōf nigin igirnen, are yogon manig ifaraūf, yen. Naa taka di, Aron nē manig bonu fel, ifirau kel fen, faat yun. Negur iron, sain anī bunem ilauf ganam, Aron nē manig enei are Negur nē Salafat bun bar itenēya nē bogis namen uris gen ibodōf, yen.

Asaia (Matyu 3:3; Aposel 8:30; Rom 9:27-29)

Asaia ī Negur nē propet odug taka. Kulu bagai Jesus Kristus tenebur isiya sā mog, Asaia ereb musei ī bun wowā youf anī nigin wogō yen.

Atemis (Aposel 19:24-35)

Atemis are kayau waitou taka yana, anī Asia teneub bun, tamo kayau musei, ī yana dalesedig.

Awa Uur Fateul

Awa Uur Fateul are Negur nē Uur. Awa Uur Fateul, Negur, Jesus Kristus, idi are tekelei (Matyu 28:19). Negur nē Awa Uur, tamo kayau Jesus Kristus nigin momoi def anidi bun ibodōdig. Ī kabī yaledig are eig fiya:

1. Ī tamo kayau momoi anī keleī youf nigin age fedig (Jon 16:13; 1 Korin 2:10-13).
2. Ī idi Jesus Kristus nigin momoi def anidi nigin, Negur kosē fiyēdig (Rom 8:26).
3. Ī tamo kayau Negur nē naab keleī youf nigin, ulum iroukenēdidig (Aposel 13:2; 16:6, 7).
4. Ī tamo kayau Negur nē od wogō de fen, yogon kabī dalouf nigin megeir ifenēdidig (1 Korin 2:4, 5).
5. Ī tamo kayau mugu mugu sios kabī dale di, sios ganan total ifarauf nigin megeir ifenēdidig (1 Korin sapta 12, 14)

Baali

Baali are faat taka age fiya. Are wit gen. Tamo kayau in faat anidi nem, bret dinodig, anī ere, baali bunem bret dinof, are to biya, are wit bunem bret dinof bagai gen sã.

Babilon

Babilon are, taun odug bagai taka anī yana. Kulu bagai, tamo kayau teneub anī bun temeleid, Israel tamo kayau geid kusī de fen, idim wal difedin. Idi, Israel tamo kayau musei ferfer gen, nedi teneub bun guri difeid diroulen, age dife di, Israel tamo kayau idi, sewenti yar an difaren (Matyu 1:11, 12, 17; Aposel 7:43).

Jon nē kurō fesiya od buk bun (Revelesen 14:8, 17:5, sapta 18) taun taka Babilon def anī nigin irok. Are fau Rom taun nē be uris nigin anī irok. 1 Pita 5:13 nē itotoya bun, Babilon are fau de be Rom taun nigin irok.

Bal (Rom 11:4)

Bal are idegēya waitou taka. Kulu bagai, Israel tamo kayau, Israel teneub bun dile dibodōya sā mog, tamo kayau teneub anī bun difaredig, Bal waitou anī yana dalesedig. Sain tunī, Israel tamo kayaug, Negur yana yaleseya ditor ken, Bal waitou yana dalesedig. Anī nigin, Negur fatuk bagai idi nigin name isedig.

Balam (2 Pita 2:15; Jud 11; Revelesen 2:14)

Balam are Negur nē profet taka. Sain taka bun, teneub taka Moab dedig anī bun, an Israel tamo kayau neid kiwai tar difaren. Nedi king are Balak dedig. Balak ī, Balam Israel tamo kayau isisnēdiyof nigin wau iron, age fe di, ī idi kusī bun wal fediyof nigin. Uruwa bun, Balam ī itoron, anī ere, ī Balak nē modoū bun ileya nigin gariya inon. Ī fau naab luwe ile mog, engel naabura ī ilauf nē bun katī fel ifaren. Donki Balam teten ibod ken, ilen anī, engel ile fen, norū fel ileya nigin itoron, malakaī, Balam ī wagī fiyeneg ileya san. Are donki Balam iroken ken, ī ou fiyen.

Balam ī, Israel tamo kayau to isisnēdin, ere nigin, ī keleī, Negur el fiya idi ifenēdin. Balam nigin, Nu Testamen nē itotoya bun irok, are ī moni nigin wau laa fen, ere nigin, Balak ī Negur nē tamo kayau neid kiwai fiyeneg, Balam ī Balak isennēf nigin yo yen (Namba sapta 22-24).

Bar Itenēya (Namba wan bar itenēya: Luk 1:72; Aposel 3:25, 7:8; Galesia 3:17; Hibrū 9:1; Namba tu bar itenēya: Matyu 26:28; Mak 14:24; Luk 22:20; Rom 11:27; 1 Korin 11:25;

2 Korin 3:6; Hiebru 7:22, 8:6-13, 9:15, 10:16, 29, 12:24, 13:20)

Bar itenēya are tamo kayau uruwo atun dinodig. Sain tamo taka ī bar itenēya inou fenē, ī tamo taka nigin, ereb taka agef kenēf anī, age afouf bagai fiyek, are abag solo fef, are tamo taka ī nigin, ereb taka age fenēf anī, age afouf bagai yedig. Negur ī yogo, yogon tamo kayau geid bar itenēya anī ino fen, yogon tamo kayau ī dō difiyēf are, ī dogo neid Temeid ado Odug ibodōf nigin, age afouf yen.

Negur bar itenēya uruwo anī inon. Bar itenēya uyulil bun, Negur ī Moses ado bar itenēya inon, agef fen, Negur iron, are idi aib aib yogon lo dirouwauf are, ī yogon tamo kayau bagai gen gei fediyouf. Anī ere, takam in lo dō feleya bagai kisin san, anī nigin, takam, Negur mala bun bar itenēya uyulil bun, madur bagai wōya kisi feleya san. Bar itenēya mata bun, Negur iron, tamo taka Jesus Kristus nigin momoi youf are, ī Negur mala bun madur bagai wō ye di, ī kel yaleyēf, are ī in lo ifodulēya be mosor to inon gen Negurem ileyēf.

Bar Itenēya Nē Bogis (Hiebru 9:4; Revelesen 11:19)

Bogis anī, aa nem dino fen, bouwa ganan gol nem degē difelen. Namen meein odudug uruwo, are teten Negur itāfiya ten itotodin anī dibodon (Hiebru 9:4, 5). Israel tamo kayau gerere tuan luwe diyok dile fen, bogis are de ado faali de dilen, age de fen, Negur nē Salafat bun dinodig. Bogis ado safina namen ifaredin, are fateul bagai, ere nigin, are bar itenēya Negur ī Israel tamo kayau geid inon anī nē uris.

Barak (Hiebru 11:32)

Barak are, Israel tamo kayau neid uyu iroukenēdiya odug taka. Ī kusī bun idi uyu iroukeneīd dile fen, nedi kiwai tar wal difedin (Jas sapta 4, 5).

Bea (Revelesen 13:2)

Bea are gaar taka odug bagai, anī teneub tunī bun dubur difaredig.

Belsebul

Belsebul are uur neid yana taka anī, ibor tunī Israel tamo kayau non difaref anidim yana dalesedig. Gariya bun bagai, ī Bal-sebub deden. Ī anīg, Satan dedig, yogo anī kaa sesen neid mudur.

Benjamin (Aposel 13:21; Rom 11:1; Filipai 3:5; Revelesen 7:8)

Benjamin ī are Jakop nē kesu monog tuwelf anidi taka, ī Juda neid tubuid tar tuwelf ibor anī taka.

Dawid

Dawid ī are Israel tamo kayau neid king odug bagai. Ī in tama Jesi dedig anī ne naal ibuye. Kulu ī fau king wōya sã mog, ī ne tama nē sipsip anī lo lo fedin. Sain ī fau kesu oosi mog, guru fiya taka bun, ī tamo odug bagai taka Goliat ado kusī de fen, yukesin.

Dawid ī, Negur nigin fatuk bagai wau laa fedig. Ī, Negur yana yale-seya nigin seg musei itotodin, anī Sam dedig.

Are Dawid nē ibor bun anī Jesus ī wō yen (Rom 1:3; Revelesen 22:16). Kulu bagai, Kristus nigin anī iron, kel yaleya tamo anī Negur sur fouf, are King Dawid nē ibor bun tamal taka.

Dō Fiya Tar

Inglis od bun, dō fiya tar are ‘disciple.’ Jesus nē dō fiya tar ganan, are tamo kayau Jesus nigin momoi def, in od karī de fen, dō difedig anidi.

Aposel nē buk bun, od tunī Jesus nē dō fiya tar nigineg agef faded fef, are ‘tamo kayau Jesus nigin momoi def anidi’ oo ‘tureid tar’ dedig.

Sain tunī, Matyu, Mak, Luk ado Jon nē buk bun, dō fiya tar tuwelf anidi nigin irok. Dō fiya tar tuwelf anidi, ī weim dibodōf nigin, fire bagai igirnēdin. Jesus ī, idig ne soosi tamo wowā douf nigin sur

fedin, are Matyu 10:1-4 bun irok kilei.

Elisa (Luk 4:27) - Naman bun anī ulouf.

Eliya (Matyu 11:14; Mak 9:4; Rom 11:2; Jems 5:17)

Eliya ī Negur nē profet odug taka. Ī nigin, nenerī Jems 5:17 bun anī itoton.

Engel

Engel are, Negur nē soosi tamo tar, saa ilun Negur wagen difaredig. Soosi tamo enidi, are tamo bagai sã, are idi uur. Idi malam ilediya kisi feleya sã, dogom yaorediyof dogol.

Negur ī, yogon engel yogon kabī dalekenēf nigin sur fedidig. Dogo neid kabī are, Negur nē tamo kayau lo fediya nigin (Aposel 12:6-11, 27:23; Hibru 1:14). Sain taka taka, Negur, tamo taka bun od mata wogō youf nigin yogon engel susur fedidig.

Engel mudur ī Maikel dedig (Jud 9). Engel yana ado taka, are Gabriel (Luk 1:19, 26).

Epikurian Tamo (Aposel 17:18)

Epikurus nē dō fiya tar ado, tamo kayau foi fiya anī 'Stoik Tamo' dedig anidi, idi keleī adodo anī, momoi ado keleī yaleya nigin fatuk bagai kisi difedig. Idi eneidi katō fiya nigin, sain musei daledig.

Esau (Rom 9:13; Hibru 11:20, 12:16-17)

Isak kesu uruwo gō fedin, are idi aina ado. Idi Esau ado Jakop dedig. Esau ī kesu matu, anī ere, sain taka bun, Esau ī naū fe fen, ī saaf bunem yogon kesu matu nē akor anī Jakop bun solo fen. Esau ī, are Jakop anī, yogon kesu matu nē el fiya anī yalouf nigin, saaf tar yabiya bunem solof ifenēf nigin yo yen.

Eva (2 Korin 11:3; 1 Timoti 2:13)

Eva ī Adam aiwa. Negur teneub kare fen sain anī bun, ī uyulil Adam ino fen, ī Adam ne siri tuwa taka anī yale fen, anī nem Eva ineyen. Kū fenēya bunem, Eva

gogour nē sigor dō fen, are Satanem Eva idegnē di, kayau ī aa faat anī Negur to dāf nigin idi irokenēdin anī yon. Kayau ī aa faat tunīg, Adam ifenē di, ī aa faat anī yon. Idi uyulil Negur nē itāfiya anī wal difen, sain anī bunem ilen, tamo kayau mosor dinodif disin. Adam Eva ado idi kesu towo, are idi Kain, Abel ado, Set.

Faat Korō Feleya Tamo (Matyu 19:12; Aposel 8:27)

Tamo faat korō felediya, idi kabī tamo odudug, king nē aruna daledig. Teneub uyu takā tunī neid tobonunā bun, idi tamo anidi faat korō difel kenēdidig.

Farao (Aposel 7:10, 13, 21; Rom 9:17; Hibru 11:24)

Farao ī Isip tamo kayau neid king odug nē yana. Nedi king odug ganan Farao dedig.

Farisia

Farisia are, Juda tamo kayau idi atun, mala odug bagai taka. Farisia idi musei lo ifelnēya kabī daledig. Idi, Negur nē lo Moses ifenen anī keleī bagai, age de fen, idi tobonunā musei ado nun idi tobol difedin anīg difelnēdidig. Idi tamo kayau tunī ganan wal fediya gen momoi de fen, dogo yeneid dalesedig. Idi sain musei mala yaleya tamo, idi namedin kisi sane ado fen, mayarē biya gen tamomoi dedig. Farisia idi, Jesus kiwai difen ken, ī dukesiyof nigin kisi difen.

Gidion (Hibru 11:32)

Gidion ī Israel tamo kayau nē uyu irouya odug taka. Ī momoiya odug ado fen, Negur ulum iroukenēf nigin ī bun kosē yen. Ī tamo musei sã kusī bun irou leid fen, idi Negur nē isennēya bunem nedi kiwai tar wal difedin.

Gomora - Sodom bun ulouf.

Grik

Grik anī kantri taka. Grik nē taun mudur are Atens, are Korin tauneg, teneub anī bun ibodok.

Grik tamo kayau idi keleī odug bagai adodo, anī nigin, tenebur tamo kayau nedi kisi biya nigin

anini difiyêdidig. Tamo kayau musei Grik od anî wogō dedig. Jesus Kristus teneub enei bun ibod mog, tamo kayau keleĩ adodo ganan Grik od anî wogō dedig. Nu Testamen anî Grik od nem uyulil diton.

Hagar (Galesia 4:24, 25)

Hagar ĩ Abraham aiwa Sara nê fō nê kabĩ kayau taka anĩ. Sain anĩ bun, Sara kesu taka fau gō fiya sã mog, ĩ Hagar Abraham ado denêf nigin irokenen, age fe di, Abraham bunem Ismael dedig anĩ wō yen. Ismael ĩ anĩ, Negur ĩ, Abraham ifenêf nigin promis od to ifenen. Anĩ nigin, Ismael ne ibor tar, Negur ĩ ereb Abraham nê ibor tar ifenêdiyof nigin promis od ifenen anĩ to dalen. Dum, Sara yogo Isak gō fen, kesu anĩ, Negurem Abraham Sara ado ifenêdiyof nigin promis od anĩ irokenêdin.

Sara Isak gō fel fen, ĩ Hagar monê fiye ken, kesu ado irudi di, diyawon. Hagar ile arei mudu Sinai dedig non ibodon. Arei mudu anĩ bun an, yar musei ilele di, dum Negur Moses iroken ken, ĩ yogon ĩtãfiya ifenen. Anĩ nigin, Galesia 4 bun irok, are Hagar ĩ ferfer kayau taka, ĩ idi tamo kayau Negur nê ĩtãfiya nê ferfer dibodok anidi neid malakanon yef. Idi ferfer, ere nigin, idi momoi def are, tamo taka Negur nê ĩtãfiya ganan dō fef anĩ, ĩ Negur mala bun madur bagai wō ye di, Negurem yalouf def. Idi Negur nê od eig fiya anĩ to momoi def, are ganan Jesus Kristus nigin momoi def anidi Negur mala bun madur bagai wō def anĩ.

Haiden

Inglis od nem ‘Gentile’ are tamo kayau ganan idi Juda sã anidi. Grik od bun anĩ nê gariya are teneub ganan bun tamo kayau difaref anidi, anĩ are, Juda sã anĩ. Juda idi amam amam yeya bagai dedig, ere nigin, Negurem idi yogon tamo kayau igirnêdin nigin, age fe di, idi

teneub tunĩ ganan nê tamo kayau lalai difedidig.

Halleluya (Revelesen 19:1-6)

Sain Juda idi Negur yana dale-sau fenê, idi ‘Halleluya’ de kakaĩ dedig. Od anĩ nê gariya are “Negur yana taleseg.”

Hermes (Aposel 14:12)

Hermes are, waitou taka yana anĩ Grik idi yana dalesedig. Grik tamo kayau dirōdig, ĩ waitou tunĩ ganan neid soosi tamo.

Herod

Nu Testamen bun, are tamo aiwa adodo fire fire anĩ Herod dedig:

1. King Herod ĩ anĩ, Herod Odug dedig, Jesus wō yen sain anĩ bun, Judia distrik bun king ibodon. Im anĩ Jesus momou mog, yuke-siyof nigin age fen (Matyu 2:1-22; Luk 1:5).
2. Jesus biya od wogōya ado memelik inodin sain anĩ bun, Herod Antipas anĩ, Galili distrik nê uyu irouya ibodon. ĩ de anim anĩ Herodias yale fen, naan igunêdiya tamo Jon nê mudur gudũ fen. Jesus Pailat nê kot bun ifaren sain anĩ bun, Herod ĩ es fiyêf nigin wagen diroulen (Mak 6:14-29; Luk 23:6-12).
3. King Herod Agripa I ĩ, sios uruwa bun idi Jesus Kristus nigin momoi den anidi darau ifenêdin. ĩ, Jon nê tura Jemseg yukesin (Aposel 12:1-23).
4. King Herod Agripa II ĩ anĩ Pol nê od es fe fen, ĩ Sisa wagen es fiyêf nigin Rom sur fiyen (Aposel 25:13-26:2, 26:19, 27-32).

Hibru

‘Hibru’ nê gariya are ‘Juda’ de tekelei. Tamo kayau idi Hibru difiyêdif are idi Abraham nê ibor. Yana anĩ nedi tubuid tar taka bunem isin, ĩ anĩ Eber dedig. Od Juda idi dirōdig anĩg, Hibru dedig.

Hosiana

Od Hosiana, are aanya anĩ tamo kayau, tamo be kayau be taka suma bun yana odug difenêf nigin kakaĩ yei yeya anĩ agei difedig. Anĩ

nē gariya, are “Negur sã ã isennēf!” be, “Negur yana taleseg.”

Isak (Aposel 7:8; Rom 9:7; Hibru 11:9)

Isak ã Abraham Sara ado neid kesu. In yana nē gariya are kasã. Abraham bun ulouf.

Isennēya Tamo

Jesus ã ‘tenebur enei nē Isennēya Tamo’ dedig, ere nigin, ã tamo kayau idi dalouf nē kafī fiya bun tamal diyawauf nigin naab anī kā fen. Jesus laaf fen, tamo kayau ganan nigin ye fen kafī fiya anī yalen, anī nigin, Negur idi ã nigin momoi def anidi ganan neid mosor nigin weder tu keledidig. Negur Jesus nigin ye fen, idi madur bagai gen iledidig.

Isip

Isip are teneub taka Israel non ibodok anī. Israel tamo kayau 400 yar Isip oun ferfer difaren (Aposel 7:34-38).

Israel

Israel yana anī, are Negurem Jakop ifenen, ã Isak in aiwa Rebeka ado neid kesu uru atun taka anī.

Israel nē ibor are yeneid tunī wogōya fire fire bunem dirōdig. Idi anī, ‘Israel nē tamo kayau’ dedig, dum idi ‘Juda’ dedig, age de feneg, idig ‘Hibru’ dedig. Juda bun ulouf.

Teneub Israel tamo kayau dibodok nē an, anīg Israel dedig. Uruwa bun, teneub are Kanan dedig. Gamag teneub anī Palestin dedig.

Jakop

Jakop de tamo tekelei Israel anī. ã ne kesu monog tuwelf anidi adon, idi anī Israel nē ibor tuwelf nē tubuid tar. Abraham bun ulouf.

Jepta (Hibru 11:32)

Jepta ã kusī tamo odug taka. Sain taka bun, ã Israel tamo kayau neid uyu irouya tamo ibodon.

Jeremaia (Matyu 2:17, 16:14, 27:9)

Jeremaia ã Negur nē propet taka. ã, Kristus kel yaleya tamo Negurem sur fe di, isi youf nigin promis od iron anī isiyouf sain

bun, ereb musei wō youf anī nigin profet od wogō yen.

Jesi (Matyu 1:5-6; Luk 3:32; Aposel 13:22; Rom 15:12)

Jesi ã King Dawid ne tama, anī Jesus Kristus nē tubu. Kulu bagai, propet Asaia, Jesi ado Dawid nē ibor bun tamal Kristius wō youf anī nigin itoton.

Jesus

Jesus yana anī nē gariya, are “Kel yaleya tamo,” oo “Neda Negur anī neda Kel Yaleya Tamo”. Yeneid tunī Jesus nigin wogō dedig are: Jesus Kristus, Negur Naal, Tamo Naal, Dawid Naal.

Jona (Matyu 12:39-41, 16:4; Luk 11:29-32)

Jona ã Negur nē propet taka. Sain taka bun, Negur in biya od wogō youf nigin, taun taka Niniwe dedig bun an ã sur fiyen. Anī are, Jona modoū taka bun ileya nigin ye fen, waag taka bun sō yen. Sain ã waag bun ibod mog, Negur yau uyē ado odug bagai sur fen. Tamo kayau waag anī bun difaren idi, Jona bunem yau uyē ado odug bagai wō yen anī kelein. Anī nigin, idi ã maaīwō diran. Gau odug takam ã yakalaisile di, ã gau te namen naa towo ibodon, age fe di, gau ã, Jona teneub bun ilu iran. Anī bure fele di, Jona Negur nē od dōf fen, Negur nē biya od wogō youf nigin Niniwe taun ilen.

Josef

Nu Testamen bun, tamo yeneid Josef dedig tunī difaref.

1. Josef ã, Jakop nē gere tar tuwelf anidi taka, Jakop nē gere tar tuwelf anidi Israel tamo kayau neid tubuid tar. Josef ã anī Benjamin nē tura (Aposel 7:9-14; Jon 4:5; Hibru 11:21, 22; Revelesen 7:8).
2. Josef taka, are Maria ne tamo.
3. Josef taka, are Jesus nē tura tar anidi taka (Matyu 13:55; Mak 6:3).

4. Josef taka, are Jems taka, Jems tura naal dedig anī nē tura (Matyu 27:56; Mak 15:40, 47)
5. Josef, Arimatea tamal, are sa-fina musei ado tamo, ī Juda uyu iroudiya neid kaunsel guru fiya anidi taka. Ī tamo biya fen, Jesus Kristus dō fiyēdig (Matyu 27:57-60; Mak 15:42-46; Luk 23:50-53; Jon 19:38-42).
6. Josef Basabas ī (Aposel 1:23) Jesus Kristus nē dō fiya tar taka, ī Jesus geiden. Sain idi Judas ne modoū fotokar, tamo taka aposel wō youf nigin digirin, idi Josef ado Matias atun aisaī diran. Are, Matias ī anī digirnen.
7. Barabas ī anīg, Josef dedig (Aposel 4:36).

Josua (Aposel 7:45; Hibrū 4:8)

Moses laa fe di, Josua im anī Israel tamo kayau neid uyu irouya wō yen. Ī Kanan teneub bun idi guri feid iroulen, teneub are, Negur idi ifenēdiyof nigin promis od iron anī. Age de fen, idi tamo kayau an difaren anī kusī bun wawal difedin. Josua ī teneub anī foif fen, Israel nē ibor tar mugu mugu bun teneub morou morou anī ifenēdin, anī are, Lewi ne ibor idi pris kabī dalouf nigin igirnēdin anidi dogol teneub taka morowouf nigin ifenēdiya sā. Josua ī uyu irouya odug wō ye fen, tamo kayau waud tekelei ado Negur dō difouf nigin total od irokenēdin. Ī iron, “Neu tamo kayau ado aya niginēg, amā Negur dō mafouf,” yen.

Juda (Hibrū 7:14, 8:8; Revelesen 5:5, 7:5)

Juda ī Jakop ne gere tar tuwelf anidi taka. Ī Juda ibor dedig anī nē tubuid. Teneub in tubuid tar difaren are Judia dedig, teneub anī bun, taun Jerusalem dedig anī ibodok. Jesus Kristus ī Juda nē ibor bun tamal wō yen.

Juda Tamo Kayau

Tamo kayau idi Juda dedig, are Abraham nē ibor tar. Abraham bun ulouf.

Gariya bun, Juda yana nē gariya are, “tamo kayau idi Juda nē teneub bun difaref anidi,” are tamo kayau Juda nē ibor bun temeleid. Juda ibor anī Israel neid ibor tuwelf anidi taka. Anī are, dum Israel tamo kayau ganan nigin yana ‘Juda’ anī dirōdig. Israel bun ulouf.

Jon nē biya od bun, Jon yana Juda anī wogō yedig, are Juda neid uyu irouya tar nigin ye fen age fedig.

Kaa Sane

Kaa sesen anidi, are Satan nē dō fiya tar. Idi uur anidi anī, tamo morō difenēdi di, tamo kayau idi Negur nē od wal dife fen, Satan dō difouf nigin age difedig. Sain tunī, idi tamo dirounēdig, are tamo ī Satan nē kabī ado ereb sane bun ilauf bun, age difedig.

Kain (Hibrū 11:4; 1 Jon 3:12; Jud 11)

Kain ī, Adam Eva ado neid kesu matu. Ī yogon tura naal are ī Abel dedig anī nigin fatuk bagai kiyeī inon, ere nigin, Negur ī, Abel nē sipsip sesewi fiya anī de yen, anī ere, Kain nē saaf kabier tamal sesewi fiya are itoron. Anī nigin, ī Abel yukesin. Enei nigin, Negur ī iron, Kain ī fau de teneub ganan bun iyokesi di, tamo kayau ganan ī dudum difiyēf.

Kamel (Matyu 3:4, 19:24; Mak 10:25; Luk 18:25)

Kamel are gaar odug taka anī, tamo kayau teten dibod ken, diyōdig. Ī morō odudugeg faali fedig. Sain tunī kamel nē siwi anim kolos didi ado dinodig.

Kanan (Aposel 7:11, 13:19)

Kanan are teneub yana, anī Negur ī, Israel tamo kayau nedi teneub ouf, anī ifenēdiyof nigin promis od irokenēdin. Gamag, teneub anī, are Israel dedig. Sain tunīg, are Palestin dedig.

Koban (Mak 7:11-12)

Koban dedig, tobonunā anī nē gariya taka to kelein, anī ere, ereb

nigin irok anī, Mak nē itotoya 7:11-12 bun ibodok dogol.

Kora (Jud 11)

Kora ī, Moses ado Aron kiwai ifeneid fen, kusī uyu iron. Anī nigin, Negur fatuk bagai name fen, teneub anī bagā ye di, Kora ado idi ganan ī dō difen anidi itob le nēdin.

Kristen (Aposel 11:26, 26:28)

Kristen nē gariya, are tamo taka ī Jesus Kristus dō fef anī.

Kristus

Inglis od bun, Kristus anīg Mesia dedig. Od Kristus, are Grik od nem, od Mesia, are Juda neid od nem. Od gariya are tamo ī mudur bun moul fi difelef anī. Ere nigin, enei are, kulu bagai, sain Negur Juda neid king taka age fiya igrnek, idi ī moul mudur bun fi difeledig, uris taka gen, ī king wō youf nigin. Negur yogon tamo kayau kel gei fediyouf nigin, isennēya taka sur foug nigin age afouf yen, agef fen, tamo anī irou isiyouf. Tamo enei, are Kristus dedig, ere nigin, tamo anī, Negur igrne ken bagai sur fen.

Lewi (Hibru 7:5, 9, 10; Revelesen 7:7)

Lewi ī Jakop ne gere tar tuwelf anidi taka, Jakop ne gere tar tuwelf anidi Israel ibor tuwelf nē tubuid tar. Lewi ne ibor tar, temple bun Negur nē kabī dalouf nigin igrnēdin. Lewi ne ibor tar bun, pris anidi igrnēdin, are Lewi ne ibor bun, Aron nē ibor bun temeleid pris anidi igrnēdidig. Aron bun ulouf.

Jesus ne dō fiya tar taka īg Lewi dedig. Ī yana taka are Matyu (Matyu 9:9-13; Mak 2:14; Luk 5:27-29).

Lo

Negur nē lo are, Buk Baibel bun buk faif uyulil ditoton bun yenek. Lo eneidi, Negur in tamo kayau nigin ye fen, anī Moses bun yaor fen.

Lo Ifelnēdiya Tamo

Lo ifelnēdiya tamo idi, lo Negur ī Juda idi nigin Moses ifenen

anī tamo kayau difelnēdidig. Idi Moses nē buk faif bun od ditotodin anidi bagai difelnēdidig. Lo, Moses bun ulouf.

Lot (Luk 17:28-32; 2 Pita 2:7)

Lot ī Haran ne naal, Haran ī Abraham ne tura naal. Abraham bun ulouf. Sain Abraham teneub mata Negurem afonōf yen anī imirēf nigin ilen, Lot ī ado dilen. Idi teneub anī bun dile fen, sain taka bun, Lot Sodom taun ibodōf nigin ilen. Taun anī nē tamo kayau ereb ereb sesen musei age difedig. Anī nigin, Negur ī Sodom taun daū fouf nigin iron. Negur ī Lot taun anī bun tamal iyawouf nigin weder irowauf nigin in engel sur fen. Lot in ibor tar geid taun anī ditoron, idi ditor dilele di, Negur taun anī yā nem daū felen. Idi taun ditor dilel mā, idi dumedin to lo difouf nigin, engel Lot irokenen, anī ere, Lot aiwa falei yel, dumen lo fen, kaisā bagai, kayau ī sol nem tamo nē malakanon inoya anī gen falei felen.

Maaī Giriya

Maaī Giriya are Israel ado Isip atun yenek. Moses bun ulouf.

Mana (Jon 6:31, 49; Hibru 9:4; Revelesen 2:17)

Kulu bagai, Israel tamo kayau Isip bun tamal diyalelen sain anī bun, idi gerere tuan yar foti diyokesin. Sain anī bun, Negur idi saaf ifenēdin. Saaf enei mana dedig. Naa mugu mugu bun, saaf enei saa ilunem tenebur kuku redig, anī ere, Sabat naa bun sā. Age fe di, tamo kayau dile saaf enei kuru difedig. Saaf enei Eksodas 16:13-36 bun es fe faded fef.

Masted (Matyu 13:31-32, 17:20; Mak 4:31-32; Luk 13-19, 17:6)

Masted are aa taka, in faat anidi nanaal bagai. Anī ere, ī odugouf are, aa odug gen, odug bagai wō yedig.

Melkisedek (Hibru sapta 5-7; Sam 110:4)

Ada Melkisedek nigin tutuk bagai keleī sā, anī ere, Hibru sapta 5-7 nē itotoya bun ereb yef anī

dogol keleī. Jenesis 14:17-20 nē itotoya bun, sain taka bun, kiwai tamo idi disi fen, Abraham ne tura nē naal Lot, in ibor tar geid, nedi safina ganan ado dirouneīd fen, lei difedin. Anī nigin, Abraham ile fen, kiwai tamo kusī bun wal feid fen, Lot ado yogon safina ganan kel gei fedin. Sain Abraham kel isi mog, Melkisedek ī naabur fotou fiyen. Melkisedek ī, bret ado wain, Abraham ifen ken, Negur ī bun biya age fef anī de age fe tobol foug nigin kosē ye, el fiya ifenen. Abraham ī, safina ganan kusī bunem gei fedin anī nē ten tekelei Melkisedek ifenen, age fiya gen, dum, Israel tamo kayau nedi safina ganan bun ten tekelei anī pris idi age de difenēdidig. Anī nigin, Buk Hibru bun, Melkisedek īg pris taka yef. Dum, Negur, Israel tamo kayau neid pris anidi Lewi nē ibor bun tamal digirnēdiyof yen. Anī ere, sain Melkisedek ī, Abraham fotou fiyen, Lewi ī Abraham nē ibor, fau wōya sā mog. Anī nigin, Buk Hibru nē itotoya bun, sain Abraham in safina ganan bun, ten tekelei anī Melkisedek ifenen, are Lewi ne ibor bun temeleid pris ganan dogo neid ten tekelei anīg Melkisedek difenen gen ileyau f yen, ere nigin, dum idi Abraham bunem wō douf.

Mesia - Kristus bun ulouf.

Moses

Moses ī, Israel tamo kayau neid uyu irouya odug. Israel tamo kayau Isip nē ferfer difaren sain anī bun, Negur ī, Israel tamo kayau uyu iroukenēdi di, idi Isip bun tamal diya fen, teneub Negurem idi ifenēdin anī bun ke douf nigin, Moses igrinen. Negur naab fire bagai bun, Moses fotou fiyen. Moses, aa taka yā uu ye mog anī ilen, anī ere, uu ya san. Ī modoū anī bun Negur ibodok ya anī kelein. Age fe di, Negur ī wogō fiye ken, ī yogon tamo kayau uyu iroukenēdi di, nedi teneub bun ke

de dilauf nigin Moses igrinen anī ī irokenen.

Negur ī, Moses bunem ereb biya bagai musei age fedin. Sain taka bun, Isip tamo, Israel tamo kayau dirudidi di, idi maaī taka, Maaī Giriya dedig bun disin sain bun, Negur naan wī yef anī dē yalouf nigin age fe di, naan anī garaī taka gen ifare di, tamo kayau teneub gere keleya bun diyok dilen. Idi dibal dilele di, Isip tamog dibalauf nigin age difen, anī ere, naan baban wī ye fen, idi kerub fedin, age fe di, idi dimutatakesin.

Negur ī, yogon lo, Israel tamo kayau nigin ye fen, Moses ifenen. Sain idi gerere tuan diyō mog, naa taka bun, Moses arei Sinai dedig anī bun ibod ken, Negur bun kosē youf nigin an iselen. Negur yogo Moses bun yaor fe fen, in itāfiya anidi ī irokenen. Negur itāfiya ten odug bagai anidig, meein uruwo bun itotodin, meein eneidi anī, Negur nē salafat namen modoū fa-teul anī bun dinodin. Moses ī Sinai arei bunem isi bure fel fen, ī itāfiya ganan itotodin. Itāfiya eneidi are Buk Baibel bun buk faif uyulil ditoton anidi, are 'Moses ne buk' dedig anī bun dibodok; eneidi are Jenesis, Eksodas, Levitikas, Namba ado, Diuteronomi. Lo buneg ulouf.

Mosor

Tamo taka Negur nē itāfiya anī taka be ifodulouf, are anī mosor. Are tamo nē lo fiya bun, safina naal be odugeg, anī Negur mala bun fau de mosor.

Moul Aa Bun Tamal Sumeī Biya, Mer (Myrrh) (Matyu 2:11; Mak 15:23; Jon 19:39; Revelesen 18:13)

Moul aa bun tamal sumeī biya, Mer, are safina taka, anī moni odug bagaim naa sur difedig, ī sumeīg meli bagai. Ī aa taka nē gaula anī dale fen, anī dinodig. Juda idi anī nem marasin dinodig, marasin are tamo darau odug bagai to yalouf nigin, ī yenēya nigin age fedig. Idi laa

tamo nē bouwa buru mū difouf nigin dodok difouf nigineg marasin anī kabī difenēdig.

Mulū Ileya

Juda neid tobonunā bun, idi kesu monog ganan gogū difef, are naa eit ilele di, idi bouwa gudū fiya anī age difedig. Are Negurem enei idi age difouf nigin Abraham irokenen. Jenesis 17:9-14 bun ulouf.

Mulū ileya are, tamo ĩ Juda tamo yeya anī nē uris. Juda tamo kayau nigin ‘idi mulū ileya bun temeleid’ dedig.

Sain tamo kayau biya od uyulil wogō den, Juda tunī an, idi eig den, tamo taka ĩ Juda sã anī, ĩ kristen taka wō youf nigin oro fouf are, ĩ uyulil mulū ilauf. Enei anī ĩ Juda tamo yeya anī nē uris, age fe di, dum ĩ kristen taka wō youf. Pol anī to yo yen. ĩ Galesia sios tamo kayau bun, pas anī nigin itotodin, ado modoũ musei tunī buneg. ĩ iron, tamo taka ĩ isennēya yaleya nigin oro fouf are, ĩ safina tekelei dogol de age fouf, are ĩ Jesus Kristus bun momoi youf dogol.

Naan Igūya

Buk Baibel nē itotoya bun, are Jon ĩ tamo kayau musei Jordan naanū naan igunēdin. ĩ idi irokenēdin, are idi nedi mosor bun tamal de waud falei ye fen, naan digūwau, anī bunem, are idi waud falei yen anī, ganan keleĩ youf.

Tamo kayau idi Jesus Kristus nigin momoi def anidi atun, naan igūya are, aib taka ĩ kristen taka wō yef anī tamo kayau ifelnēdif nē uris.

Naan igūya nē gariya are:

- (a) Aib taka ĩ naan igun, are ĩ mosor inodin anī bun tamal wau falei yen.
- (b) ĩ, Jesus Kristus aib aib idi ĩ nigin momoi def anidi neid mosor nigin weder tu kalauf yen anī nigineg momoi yef.
- (c) ĩ Jesus Kristus dō fiya nigin ado, ne od dō fiya nigin oro fedig.

Nad (Mak 14:3; Jon 12:3)

Sain taka bun, kayau taka, Jesus ye bun wã fouf nigin mouf irou isin. Mouf enei nad bunem dinon, nad are aa spikenard dedig anī nē sumin.

Naman (Luk 4:27)

Naman ĩ kusī tamo neid mudur taka nē yana, ĩ Siria kantri bun tamal. ĩ Juda tamo sã. ĩ kusī tamo odug bagai, anī ere, ĩ lepra guruma ado. Sain taka bun, ĩ profet Elisa bun ile fen, ĩ lepra guruma bun tamal el fiyēf nigin to fiyen. Elisa ĩ Jordan naanū ile fen, ĩ yogo sain seven naan igūwau anī irokenen. Naman dōf age fen, age fe di, ĩ bouwa el fe biya len.

Negur Nē Sipsip Naal

Jon 1:29, 36 bun, Jon naan igunēdiya tamo, Jesus nigin, “Negur nē sipsip naal” yedig. Juda neid tobonunā bun, idi sipsip naal taka, Negur nedi mosor weder tu kalauf nigin, sesewi fiya nigin tō dife isaikedig. Sipsip naal nē naud anim, Negur nē lo fiya bun, idi fateul inenēdig. Jesus ĩ Negur nē sipsip naal dedig, ere nigin, ada sã neda mosor nigin weder tu keleya anī talouf nigin, ĩ yogon mata sesewi fiya taka gan anī ifenen.

Negur Nē Tempel

Negur nē Tempel anī Jerusalem, Israel nē taun odug an ibodon. Modoũ enei are Juda idi an dile, sifa naa odug sigigi dife fen, sesewi fediya ado ofa anidi Negur bun dinodig.

Tamo kayau Juda sã anidi tempel nē mayaĩ mayarē dogol diledig. Tempel namen bagai an, idi Negur nē safina fateul anidi dinodig. Yar ganan bun sain tekelei dogol, pris mudurem dogol modoũ anī bun iledig. Gabar odug taka modoũ fateul bagai anī nē bobog ileya bun dinolelen. Gabar enei anī, Jesus laa fen sain bun, muduronem serek fe isil ye bunen (Matyu 27:51; Mak 15:38; Luk 23:45). Enei are, sain anī bunem, tamo kayau ganan Kristus nigin momoi douf

are, Negur idi ī wagen ileya nigin naab anī kā fen anī ifelnadaf.

Niniwe (Matyu 12:41; Luk 11:32)

Niniwe are taun yana, anī bun Negur profet Jona in biya od wogō youf nigin sur fen. Buk Jona bun ulouf. Negur in od are eig fiya, idi ereb sesen anidi age difedig nigin, ī idi daū fediyouf. Sain idi od enei karī den, idi maruid isi fen, waud falei yen. Anī nigin, Negur idi neid mosor nigin weder tu kel fen, idi to daū fedin.

Noa (Matyu 24:37-38; Luk 3:36, 17:26-27; Hibrū 11:7; 1 Pita 3:20; 2 Pita 2:5)

Noa ī kulu bagai ibodon. Tamo nē ibor Adam bunem garia inon, ī are namba nain ibor. Sain Noa tenebur ibodon, tenebur tamo kayau ganān ereb ereb sesen musei age difedig. Anī nigin, Negur ī, kuwei odug taka sur fe di, tenebur tamo kayau ganān ado ereb ereb ganān tenebur difaref anī daū fediyouf nigin iron. Anī ere, Noa ī tamo biya, ī Negur nē od dō fedig. Anī nigin, Negur Noa waag odug taka inouf nigin irokenen, Negur ī irokenen kilei bagai, waag age inouf nigin irokenen. Negur Noa in aiwa ado gere tar towo, nedi aiweid tar weim waag namen dilauf nigin irokenen, idi weim, gar, ninā fire fire bun monog tekelei ado gober tekelei, anī ere, gar, ninā tunī bun monog sewen ado gober sewen weim waag namen dilauf nigin irokenen. Noa ī, Negur od iron anī nigin momoi ye fen, ī Negur od ī irokenen kilei bagai age fen. Noa in tamo kayau geid waag namen dilele di, Negur uyē odug sur fen, age fe di, kuwei odug ilen. Arei mudu ganāneg naan kerū feledin. Tenebur tamo kayau tunī ganān dimutatakesin, anī ere, Noa ado in ibor tar are kel gei fedin.

Ogō musei ilele di, naan isilelen, age fe di, teneub baban sagau kelen. Anī nigin, Noa in tamo kayau geid waag bun tamal kututū

desin. Age dife fen, Noa Negur bun sesewi fe fen, ī yana yalesen, ere nigin, Negur idi isennēdin nigin. Negur baban kuwei taka age fiya, ī age fe di, to wō youf nigin promis od iron. Ī walol are yogon promis od nē uris ye fen, promise od eig fiya wogō yen, are sain enei bunem ilauf ganān bun, an naa, bō, uyē saniya, gaa saniya, ifaya nē sain ado kusu fiya nē sain anidi ibodōf yen.

Paradis (Luk 23:43; 2 Korin 12:3; Revelesen 2:7)

Paradis nē gariya are ‘kabī meli bagai.’ Modoū meli bagai Iden, are gariya bun Negur Adam ado Eva an inenēdin anī nigin Paradis dedig. Anī ere, Nu Testamen bun, Paradis nē gariya, are saa tano nē gariya de tekelei, are modoū meli bagai an tamo kayau Jesus Kristus nigin momoi den anidi, dum idi gare douf bun, dilauf.

Pasa - Sifa Naa bun ulouf.

Pentikos - Sifa Naa bun ulouf.

Pris

Pris idi Israel tamo kayau nigin de fen, Negur bun sesewi fiya difenēdiyof nigin Negurem igirnēdin anidi. Jesus nē sain bun, idi Jerusalem Tempel bun sesewi fiya difenēdidig. Pris idi Aron nē ibor bun digirnēdidig (Aron bun ulouf), are Lewi nē ibor tar atun Aron nē ibor bun temeleid. (Lewi bun ulouf).

Pris mudur ī, pris idi atun odug bagai. Pris mudur ī, yar tekelei nē dogol ibodōf nigin digirnēdidig, age de fen, anī baban pris taka digirnēdig. Pris mudur im dogol Tempel nē modoū fateul bagai namen iledig, are yogon mosor ado tamo kayau neid mosor yaleleya nigin Negur bun sesewi fiya ifenēf nigin age fedig.

Pris atun pris odug dedig anidig dibodon. Pris odug idi are, pris mudur, pris ganān kulu pris mudur dibodon anidi ado, tamo

yeneid adodo pris nē ibor bun temeleid anidi.

Profet

Profet are tamo taka ī, od Negur ī bun yaor fe irokenen anī wogō yedig. Ī Negur nigin ye fen, od tamo kayau bun wogō yedig.

Uruwa bun, Negur profet musei sur fedidin, are Samuel, Asaia ado Jeremaia age fediya. Idi bunem, Negur dum bun ereb wō youf anī nigned yaor fen. Yar musei Jesus Kristus fau wōya sā mog, idi in isiya nigin, ereb ereb musei ī age fediyouf nigin ado, ereb ī bun wō youf anī nigin diron. Idi, Jesus Kristus tenebur tamo kayau es fediyouf nigin, fau baban kel isiya sā mog, ereb ereb musei teneub enei nē idikeleya naa bun wowā youf nigned diron.

Rabi

Rabi are yana Juda idi tise odug bagai be idi atun uyu iroya anī bun difenēdig. Tamo aib ī kisi biya ado fen, yana adouf are, ī Rabi difiyēdig. Rabi yana taka are Raboni, anī nē gariya Rabi de tekelei.

Rahab (Hibru 11:31; Jems 2:25)

Kulu bagai, sain Israel tamo kayau, teneub Negur idi afenēdiyof yen anī bun dilauf nigin age difen, idi, tamo kayau teneub anī bun difaren anidi dile fen, naig de idi wal difedyouf nigin kisi dalouf nigin kofo tamo sur difedin. Rahab naabur kayau taka bouwa na sur fedig, ī teneub anī bun ibodōdig. Sain Israel kofo tamo an disin, kayau ī, idi isenneīd fen, idi inokolnēdin, ere nigin, kayau ī, Israel tamo kayau teneub de anī dalouf anī Negur nē oroya ye fen, momoi yen. Anī nigin, sain Israel tamo kayau teneub anī nē tamo kayau wal difedin, idi Rahab to dukessin, anī ere, idi, taun anī bun tamo kayau tunī ganan didenkesin. Kayau Matyu 1:5 bun irok anī, kayau de tekelei be, are ī de Jesus nē tubuid tar taka.

Rahel (Matyu 2:18)

Rahel ī, Jakop ne kayau tar anidi taka, ī nigin Jakop wau fatuk bagai laa fedig. Rahel ī Josef ado Benjamin ado sineid, are Juda tamo kayau neid sineid tar ganan anī im ifaref.

Rebeka (Rom 9:10-13)

Abraham ne naal Isak ne kayau anī Rebeka. Ī, Esau ado Jakop, idi urom aina anidi neid sineid. Esau uyulil wō yen, anī ere, Jakop im anī Negurem ī uyulil wō youf nigin igirnen, age fe di, ī bunem Juda idi ibor wowā den. Esau ado Jakop bun ulouf.

Rom

Rom are kantri Itali dedig anī nē taun odug. Jesus tenebur ibodon sain anī bun, Rom nē tamo kayau teneub tunī musei kusī bunem lei difen. Idi Israel anīg wawal difeid fen, Israel tamo kayau anī ulum dirounēdin. Anī nigin, Israel tamo kayau, Rom idi to oroid fen, nedi teneub bun idi dalelnēdiyof nigin waud yenen. Rom nē king, are Sisa dedig ī, sain anī bun, teneub ganan atun king odug bagai ibodon.

Sabat Naa

Sabat naa are naa odug bagai. Jenesis nē Buk bun ditoton are eig yef, Negur naa sigis anidi bun teneub kare fen, agef fen, naa sewen bun ī si inon, ere nigin, in kabī are bure felen. Negur iron, tamo kayau de naa sigis anidi bun dogol kabī dalouf, age de fen, naa sewen bun idi de si dino fen, Negur yana dalesauf.

Juda idi Sabat naa nigin lo musei adon. Idi dirōdig, tamo kayau de naa anī bun ereb kabī taka to dalouf, age de fen, tamo kayau lo anī difodulouf are, idi fatuk bagai namedidig. Age fiya nigin, sain Jesus Sabat naa bun tamo taka dagi ado el fiyen ado, sain Jesus nē dō fiya tar Sabat naa bun kurukeis dāf nigin nonū difedin, idi anī nigin waud sanen. Idi diron, are idi kabī dalef den.

Sadusia

Sadusia are Juda idi atun yeneid adodo neid mala taka. Idi kisi difedig, are tamo kayau, lo Negur Moses ifenen anī ado Juda neid tobonunā tunī ganan, tutuk bagai dō difouf dedig. Idi Juda tamo neid mala taka Farisia gen (Faria bun ulouf). Anī ere, idi sain musei Farisia tamo geid luwa diroudig, ere nigin, Farisia idi momoi def are, tamo taka ī laaf fen, baban mata kel fā youf def, anī ere, Sadusia enei to momoi dedig.

Saion (Matyu 21:5; Jon 12:15; Rom 9:33, 11:26; 1 Pita 2:6)

Saion are arei mudu taka anī bun Jerusalem taun anī dinon anī nē yana. Tempel anī arei mudu anī bun ifaren, are modoū anī, taun ganan nē fateul bagai. Sain tunī, Saion yana are Jerusalem ganan nigin anī dirōdig. Sain tunī, Saion yana Jerusalem ilun ibodok anī nigin dirōdig, are saa tano yogo anī. Are modoū anī, Negur ibodok nē an anī nē uris. (Hibru 12:22, Revelesen 14:1)

Salafat

Kulu bagai, Israel tamo kayau gerere tuan diyon sain anī bun, Negur Moses salafat fire bagai taka inouf nigin irokenen. Ī salafat anī, gabar biya ado gaar gabar bunem naig fiya inouf nigin ī de tutuk bagai ī irokenen. Are an idi bar itenēya nē bokis, meein uruwo Negur anidi bun itāfiya ten itotodin ado, Negur nē safina tunī salafat anī namen dibodok.

Juda idi salafat enei bun Negur yana dalesedig, age dife fen, idi Negur bun an sesewi fediya difenēdidig, are age ifaref ile Solomon Tempel inon sain anī bunen.

Salfa (Revelesen 9:17)

Salfa are safina bailuya taka anī, yā bale ado el fe uu ye fen, sumei total ado. Anī bunem, gan nē pauda dinodig.

Sam

Buk Psalm are Negur bun yana yaleseya seg nē buk. Dawid tamo

kayau tunī geid seg eneidi ditoton, are idi naig de fen, Negur nigin waud laaf fen, ī bun yana dalesef anī dirōf nign.

Samaria

Samaria are teneub akor taka nē yana. Samaria tamo kayau idi Juda tamo kayau bagai sã, ere nigin, kulu bagai, idi kayau Juda sã anidi lei difedin. Anī nigin, Juda bagai anidim idi lai difedidig.

Samson (Hibru 11:32)

Kulu bagai, Samson ī Juda neid uyu iroudiya taka ibodon. Negurem ī bouwa buru nē total odug anī ifenen.

Samuel (Aposel 3:24, 13:20; Hibru 11:32)

Samuel ī profet odug taka. Im anī, Dawid Israel neid king ibodōf nigin moul mudur bun fi felen. Ī anī tamo kayau neid uyu irouya odug taka.

Sara (Rom 4:19, 9:9)

Sara ī Abraham ne kayau. Kayau ī yar musei dalin, anī ere, sain ī tubau bagai mog, ī Isak gō fen. Abraham bun ulouf.

Satan

Satan ī kaa sesen neid uyu irouya. Ī Negur nē kiwai, ī tamo kayau idegnēdi di, idi sane age difouf nigin age fedig. Ī tamo kayau Jesus Kristus nigin momoi def anidi, idi kulu ereb sane age difen anī nigin toku wedereid fokō fenēdi di, idi nedi mosor nigin Negur weder to tu kelen gen kisi difouf nigin age fedig. Satan ī anig 'Devil' oo 'tenebur enei nē king' dedig.

Sifa Naa

Sifa naa are naa tunī odudug anī bun, Juda idi yar ganan bun sigigi difedig. Sifa naa enidi bun, idi Negur nē biya fiya ado kulu Negur idi nigin ereb age fedin anī nigin kisi difedig. Sifa naa nē yana tunī are eig fiya:

Tempel Mata Negur Ifenēya Nē Sifa Naa (Jon 10:22)

Sifa naa enei bun, Juda idi, kulu bagai, tamo taka Judas Makabius dedig ī, Negur nē Tempel haiden idi amuyē dinon anī amuyē sā ino fen, tamo kayau an Negur yana dalesauf nigin Tempel dodok fen anī karī deledig. Ī enei age fen, ere nigin, urug tamo idi ado kiwai tamo anidim, Tempel bun dile fen, amuyē dinodin.

Juda idi sifa naa enei nigin age de dirōdig, ‘Lalan nē Sifa Naa’. Age fiya nigin, sain anī bun, Jesus iron, “Aya teneub enei nē Lalan.” (Jon 9:5)

Pasa Nē Sifa Naa (Matyu 26:2, 5, 17-19)

Pasa nē sifa naa dedig are Juda idi nigin, sifa naa odug bagai. ‘Pasa’ yana nē garia, are wawal fiya. Sifa naa enei bun, Juda idi, kulu bagai, Isip nē kafī fiya teneub bun tamal, naig de diyalelen anī karī deledig. Sain anī bun, Negur, Isip neid fō mugu mugu bun kesu monog matu idenkesidiyouf nigin in engel sur fen. Anī are, ī Juda neid fō mugu mugu bun idi sipsip naal taka dukeis fen, sipsip naal nē naud anī sukar nē tor bun ororo difediyouf nigin irokenēdin. Age dife di, sain engel naud anī ile fen, ī fō anī wal fen, agef fen, an kesu taka to yukessin.

Anī nigin, Pasa nē sifa naa bun, Juda idi, fō mugu mugu bun, sipsip naal taka dukeis fen, weim sipsip naal dō don.

Bret Yis Sā Nē Sifa Naa

Bret yis sā nē sifa naa are, Pasa nē sifa naa de anī bun, Juda idi sigigi difedig. Sain Juda idi Isip teneub bun tamal diya dilelen, idi tari fiya nigin sain taka sak ile, idi bret fau to gē ye mog anī yā bun dinodig. Anī nigin, sifa naa enei bun, Juda idi, bret yis sā anī dō don.

Salafat Nē Sifa Naa (Jon 7:2-52)

Sifa naa enei bun, Juda idi kulī dedig, ere nigin, saaf kusu fiya anī mogo kisi felen. Idi salafat di-

noid fen, uub tekelei sifa naa nigin an difaredig, age fe di, idi naab anī bun, nedi tubuid tar Negur idi teneub afenēdiyof yen anī fau yaleya sā mog, idi gerere tuan 40 yar diyo ken, salafat bun dibodon anī karī deledig.

Pentikos Nē Sifa Naa (Aposel 2:1, 20:16; 1 Korin 16:8)

Pentikos nē sifa naa anīg are Juda idi nigin sifa naa odug bagai. ‘Pentikos’ yana nē garia are fifti. Juda idi, Pasa naa wō ye naa fifti ilele di, sifa naa enei sigigi difedig.

Pentikos nē sifa naa bun, Juda idi wit kusus fiya nigin sigigi difedig. Juda idi, kulu bagai, Negur Sinai arei bun Juda idi nigin Lo anī Moses ifenen nigin karī deledig. Gama, Pentikos are Kristen tamo kayau, naa enei bun Awa Uur Fa-teul uyulil tamo kayau Jesus Kristus bun momoi den anidi bun isin anī nigin karī deledig. (Aposel 2:1-4)

Sinai

Sinai are arei mudu taka nē yana, an Moses ibodon sain, Negur in itāfiya ī ifenen. Moses bun ulouf.

Sinamon (Revelesen 18:13)

Sinamon, are aa taka nem dinodig. Ī sumeī meli bagai fen, ī na yaleya nigin moni odug bagai. Tamo kayau moul sumeī meli bagai youf nigin, anī moul ado falei difedig, moul anī, tamo kayau mudureid bun fi difelediyof nigin age difedig, are sain tunī tamo laa fen anī bouwa buneg inoya nigin age difedig.

Sipsip

Baibel nē sain bun, Juda idi sipsip kulatun fiya nē suma age difedig are eig fiya:

1. Sain anī bun, tamo tekelei sipsip musei kulatun fedig. Idi taun bun to difar genēdig, anī ere, tamo kayaum dubur idi guri difeid dirouledig, are modou fisir musei biya ifaredif nē an sipsip idi dāf nigin dinenēdidig.

2. Tamo tunī sipsip idi kulatun fediya nigin dub anī bun sipsip geid weim difaredig. Tamo eneidi, sipsip nigin keleī bagai. Idi sipsip mugu mugu keleīdig.
3. Tamo sipsip kulatun fef, are de modoū taka ganan kau ifokeleya ado anī dodok fedig. Bō sain, idi sipsip ulum dirou fen, an dinenēdig, anī bunem, ereb takam idi to daū fediyouf. Tamo sipsip kulatun fedif, ī de an garaī bobog bun yenēdig. Sain tunī, bē tamo taka, sipsip taka bē yalouf nigin kau gar yeis kutū yesiya nigin age fedig.
4. Juda idi, Negur bun sipsip sesewi fiya anī difnēdig. Negur nē sipsip naal bun ulouf.

Sisa

Sisa ī, are Rom tamo kayau neid king nē yana. Rom tamo kayau teneub ganan kusī bunem wawal difeid fen, uyu diroun. Sisa ī, idi ganan anī nē odug. Rom tamo kayau neid king ilun difaref ganan anī, are Sisa dedig.

Sodom (Matyu 10:15, 11:23-24; Luk 17:29; Revelesen 11:8)

Sodom are taun taka Lot ibodon anī nē yana (Lot bun ulouf). Taun taka Gomora dedig anī Sodom taun non ifaren. Sodom ado Gomora taun neid tamo kayau idi ereb sesen musei age difen. Anī nigin, Negur, taun anidi, yā nem daū feledin.

Solomon (Matyu 1:6-7, 6:29, 12:42; Luk 11:31, 12:27; Aposel 7:47)

Solomon ī Dawid ne naal. Ī Israel tamo kayau neid king odug taka.

Sain taka bun, Negur imīya bun, Solomon bun isi fen, ere safina ege luwa anī ī ifenēf anī orof anī to fiyen. Solomon ī, in tamo kayau sā el fe ulum iroukenēdiyof nigin Negur kisi biya ī ifenēf nigin ī irokenen. Negur kisi biya odug

Solomon ifenen, ī king ganan anidi bun kisi biya bagai anī wō yen. Negur Solomon safina odug musei bagaig anī ifenen, momoi, ī safina musei anī kisi feleya bagai.

Solomon im anī uyulil Negur nē Tempel inon. Tempel anim Negur nē salafat uruwa bun Juda idi Negur yana dalesedig anī nē modoū yalen. Tempel anī gai meli bagai.

Stoik Tamo Epikurian tamo bun ulouf

Sus (Aposel 14:12)

Sus are waitou odug Grik idi yana dalesedig anī nē yana. Sain tunī, tamo kayau ī anī Jupita dedig. In soosi tamo are Hermes dedig.

Tamo Naal

Kulu bagai, kel yaleya tamo anī Negurem yogon tamo kayau nedi mosor bun tamal kel gei fediyouf nigin sur fouf yen anī, profet taka Daniel dedig anī kel yaleya tamo anī nē yana agef irōdig. Anī nē gariya are Kristus de tekelei (Kristus bun ulouf). Jesus yogo nigin yana eneī agef irōdig. Sain Jesus yogo nigin aya Tamo Naal yef, are ī anī tamo taka Negurem sur fiyen ado, ī anī Negur bun tamal megeir yalen anī yef. Ī tamo bagai, are ī anīg Negur.

Wau Faleiya

Wau faleiya nē gariya bagai are:

1. Tamo taka ī sane age fen anī ilouf;
2. Ī irok, ī ereb sesen age fedig anī itor ken, ereb Negur orof anī age fouf;
3. Ī ereb sesen ī age fedig anī nē mosor nigin weder tu kalauf nigin Negur irokenek.

Yis (Matyu 13:33, 16:6, 12; 1 Korin 5:6-8; Galesia 5:9)

Yis are safina bret inoya nigin kabī difenēdig. Safina anim, bret gē youf nigin age fedig. Yis naalem dogol bret odug biya musei inoya nigin kabī difenēdig.